

तैत्तिरीय  
ब्राह्मणम्

## Colophon

This document was typeset using Xe<sub>La</sub>TeX, and uses the Siddhanta font extensively. It also uses several LaTeX macros designed by *H. L. Prasād*. Practically all the encoding was done with the help of Ajit Krishnan's mudgala IME (<http://www.aupasana.com/>).

## Acknowledgements

The initial ITRANS encodings of some of these texts were obtained from <http://sanskritdocuments.org/> and <https://sa.wikisource.org/>. Thanks are also due to Ulrich Stiehl (<http://sanskritweb.de/>) for hosting a wonderful resource for Yajur Veda, and also generously sharing the original Kathaka texts edited by Subramania Sarma. See also <http://stotrasamhita.github.io/about/>

FOR PERSONAL USE ONLY

NOT FOR COMMERCIAL PRINTING/DISTRIBUTION

## अनुक्रमणिका

## अष्टकम् १

1

प्रथमः प्रश्नः . . . . .	1
द्वितीयः प्रश्नः . . . . .	27
तृतीयः प्रश्नः . . . . .	45
चतुर्थः प्रश्नः . . . . .	67
पञ्चमः प्रश्नः . . . . .	90
षष्ठमः प्रश्नः . . . . .	111
सप्तमः प्रश्नः . . . . .	136
अष्टमः प्रश्नः . . . . .	159

## अष्टकम् २

173

प्रथमः प्रश्नः . . . . .	173
द्वितीयः प्रश्नः . . . . .	193
तृतीयः प्रश्नः . . . . .	217
चतुर्थः प्रश्नः . . . . .	235
पञ्चमः प्रश्नः . . . . .	262
षष्ठमः प्रश्नः . . . . .	279
सप्तमः प्रश्नः . . . . .	313
अष्टमः प्रश्नः . . . . .	336

## अष्टकम् ३

365

प्रथमः प्रश्नः . . . . .	365
द्वितीयः प्रश्नः . . . . .	389
तृतीयः प्रश्नः . . . . .	419
चतुर्थः प्रश्नः . . . . .	446
पञ्चमः प्रश्नः . . . . .	452
षष्ठमः प्रश्नः . . . . .	463
सप्तमः प्रश्नः . . . . .	480
अष्टमः प्रश्नः . . . . .	524
नवमः प्रश्नः . . . . .	558

## तैत्तिरीय आरण्यकम्

590

प्रथमः प्रश्नः — अरुणप्रश्नः . . . . .	590
द्वितीयः प्रश्नः . . . . .	632
तृतीयः प्रश्नः . . . . .	650
चतुर्थः प्रश्नः . . . . .	667
पञ्चमः प्रश्नः . . . . .	698
षष्ठः प्रश्नः . . . . .	735
सप्तमः प्रश्नः — शीक्षावल्ली . . . . .	752
अष्टमः प्रश्नः — ब्रह्मानन्दवल्ली . . . . .	760
नवमः प्रश्नः — भृगुवल्ली . . . . .	766

दशमः प्रश्नः — महानारायणोपनिषत् . . . . .	772
---	-----

कृष्णयजुर्वेदीयतैत्तिरीय-काठकम्	816
---------------------------------	-----

प्रथमः प्रश्नः . . . . .	816
--------------------------	-----

द्वितीयः प्रश्नः . . . . .	833
----------------------------	-----

तृतीयः प्रश्नः . . . . .	852
--------------------------	-----

॥ अष्टकम् १ ॥

॥ प्रथमः प्रश्नः ॥

॥ तैत्तिरीयब्राह्मणे प्रथमाष्टके प्रथमः प्रपाठकः ॥

ब्रह्म सन्धत्तं तन्मे जिन्वतम्। क्षत्रं सन्धत्तं तन्मे जिन्वतम्। इषं सन्धत्तं तां मे जिन्वतम्। ऊर्जं सन्धत्तं तां मे जिन्वतम्। रयिं सन्धत्तं तां मे जिन्वतम्। पुष्टिं सन्धत्तं तां मे जिन्वतम्। प्रजां सन्धत्तं तां मे जिन्वतम्। पशून्सन्धत्तं तान्मे जिन्वतम्। स्तुतोऽसि जनधाः। देवास्त्वा शुक्रपाः प्रणयन्तु॥१॥

सुवीराः प्रजाः प्रजनयन्परीहि। शुक्रः शुक्रशोचिषा। स्तुतोऽसि जनधाः। देवास्त्वा मन्थिपाः प्रणयन्तु। सुप्रजाः प्रजाः प्रजनयन्परीहि। मन्थी मन्थिशोचिषा। सञ्जग्मानौ दिव आपृथिव्यायुः। सन्धत्तं तन्मे जिन्वतम्। प्राणं सन्धत्तं तं मे जिन्वतम्। अपानं सन्धत्तं तं मे जिन्वतम्॥२॥

व्यानं सन्धत्तं तं मे जिन्वतम्। चक्षुः सन्धत्तं तन्मे जिन्वतम्। श्रोत्रं सन्धत्तं

तन्मे जिन्वतम्। मनः सन्धत्तं तन्मे जिन्वतम्। वाचं सन्धत्तं तां मे जिन्वतम्।  
 आयुः स्थ आयुर्मे धत्तम्। आयुर्यज्ञाय धत्तम्। आयुर्यज्ञपतये धत्तम्। प्राणः स्थः  
 प्राणं मे धत्तम्। प्राणं यज्ञाय धत्तम्॥३॥

प्राणं यज्ञपतये धत्तम्। चक्षुः स्थश्चक्षुर्मे धत्तम्। चक्षुर्यज्ञाय धत्तम्। चक्षुर्यज्ञपतये  
 धत्तम्। श्रोत्रं स्थः श्रोत्रं मे धत्तम्। श्रोत्रं यज्ञाय धत्तम्। श्रोत्रं यज्ञपतये धत्तम्।  
 तौ देवौ शुक्रामन्थिनौ। कल्पयतं देवीर्विशः। कल्पयतं मानुषीः॥४॥

इषमूर्जमस्मासु धत्तम्। प्राणान्पशुषु। प्रजां मयि च यजमाने च। निरस्तुः  
 शण्डः। निरस्तो मर्कः। अपनुत्तौ शण्डामर्कौ सहामुना। शुक्रस्य समिदसि। मन्थिनः  
 समिदसि। स प्रथमः सङ्कृतिर्विश्वकर्मा। स प्रथमो मित्रो वरुणो अग्निः। स प्रथमो  
 बृहस्पतिश्चिकित्वान्। तस्मा इन्द्राय सुतमा जुहोमि॥५॥

नयन्वपानं सन्धत्तं तं मे जिन्वतं प्राणं यज्ञाय धत्तं मानुषीरग्निं च॥ (ब्रह्मं क्षत्रं तदिषमूर्जं रयिं पुष्टिं प्रजां तां पशून्तान्सन्धत्तं तत्प्राणमपानं व्यानं तं चक्षुः श्रोत्रं मनस्तद्वाचं ताम्। इषादिपश्वके वाचं तां मे पशून्सन्धत्तं तान्मे प्राणादित्रितये तं मेऽन्यत्र तन्मे)॥

[१]

कृत्तिकास्वग्निमादधीत। एतद्वा अग्नेर्नक्षत्रम्। यत्कृत्तिकाः। स्वायामेवैनं

दे॒वता॑यामा॒धाय॑। ब्र॒ह्मव॑र्च॒सी भ॑वति। मुखं॒ वा ए॒तन्नक्ष॑त्राणाम्। यत्कृ॒त्तिकाः॑। यः  
कृ॒त्तिका॑स्व॒ग्निमा॑ध॒त्ते। मुख्यं॒ एव॑ भ॒वति॑। अथो॒ खलु॑॥६॥

अ॒ग्नि॒नक्ष॑त्रमित्यप॑चायन्ति। गृ॒हान् ह॒ दाहु॑को भवति। प्र॒जाप॑ती रोहि॒ण्याम॑ग्निम॒-  
सृ॒जत॑। तं दे॒वा रो॑हि॒ण्यामा॑द॒धत॑। ततो॒ वै ते सर्वा॑न्नो॒हान॑रोहन्। तद्रो॑हि॒ण्यै  
रो॑हि॒णित्व॑म्। यो रो॑हि॒ण्याम॑ग्निमा॑ध॒त्ते। ऋ॒ध्नोत्ये॒व। सर्वा॑न्नो॒हान्नो॑हति। दे॒वा वै भ॒द्राः  
सन्तो॒ऽग्निमा॑धि॒त्सन्त॑॥७॥

तेषा॒मना॑हितो॒ऽग्निरा॑सीत्। अथै॒भ्यो वा॒मं व॑स्वपा॑क्रामत्। ते पुन॑र्वस्वो॒राद॑धत।  
ततो॒ वै तान् वा॒मं व॑सूपाव॑र्तत। यः पु॒राऽभ॒द्रः स॑न्पा॒पीया॑न्त्स्यात्। स  
पुन॑र्वस्वो॒रग्नि॑माद॑धीत। पुन॑रे॒वैनं॑ वा॒मं व॑सूपाव॑र्तते। भ॒द्रो भ॑वति। यः का॒मये॑त्  
दान॑का॒मा मे॒ प्र॒जाः स्यु॑रिति॑। स पूर्॒वयोः॑ फल्गु॑न्यो॒रग्नि॑माद॑धीत॥८॥

अ॒र्य॒म्णो वा ए॒तन्नक्ष॑त्रम्। यत्पूर्वे॒ फल्गु॑नी। अ॒र्यमे॒ति तमा॑हुर्यो॒ ददा॑ति।  
दान॑का॒मा अ॒स्मै प्र॒जा भ॑वन्ति। यः का॒मये॑त् भ॒गी स्या॑मिति॑। स उत्त॑रयोः



फल्गु॑न्योर॒ग्निमाद॑धीत। भग॑स्य॒ वा ए॒तन्नक्ष॑त्रम्। यदु॒त्तरे॒ फल्गु॑नी। भ॒ग्यैव॑ भ॒वति॑।  
का॒ल॒क॒ञ्जा॒ वै ना॒मासु॑रा आसन्॥९॥

ते सु॒वर्गाय॑ लो॒काया॒ग्निम॑चिन्वत। पुरु॑ष॒ इष्ट॑का॒मुपा॑दधात्पुरु॑ष॒ इष्ट॑काम्। स  
इन्द्रो॑ ब्राह्म॒णो ब्रुवा॑ण॒ इष्ट॑का॒मुपा॑धत्त। ए॒षा मे॑ चि॒त्रा ना॒मेति॑। ते सु॒वर्गं॑ लो॒कमा॑  
प्रा॒रोहन्। स इन्द्र॒ इष्ट॑का॒मावृ॑हत्। तेऽवा॑कीर्यन्त। येऽवा॑कीर्यन्त। त ऊ॒र्णाव॑भयो-  
ऽभवन्। द्वावु॑द॒पत॑ताम्॥१०॥

तौ दि॒व्यौ श्वा॒नाव॑भवताम्। यो भ्रातृ॑व्यवा॒न्थस्यात्। स चि॒त्राया॑म॒ग्निमाद॑धीत।  
अ॒व॒कीर्यै॑व भ्रातृ॑व्यान्। ओजो॑ बल॑मिन्द्रि॒यं वीर्य॑मा॒त्मन्ध॑त्ते। व॒सन्ता॑ ब्राह्म॒णो-  
ऽग्नि॑माद॑धीत। व॒सन्तो॑ वै ब्रा॒ह्मण॑स्य॒र्तुः। स्व ए॒वैन॑मृतावा॒धाय॑। ब्र॒ह्मव॑र्च॒सी भ॑वति।  
मुखं॑ वा ए॒तदृ॑तूनाम्॥११॥

यद्व॑सन्तः। यो व॒सन्ता॑ऽग्निमा॑ध॒त्ते। मुख्यं॑ ए॒व भ॑वति। अथो॑ योनि॑मन्तमे॒वैनं॑  
प्रजा॑तमाध॒त्ते। ग्री॒ष्मे रा॑ज॒न्यं आद॑धीत। ग्री॒ष्मो वै रा॑ज॒न्यस्य॒र्तुः। स्व  
ए॒वैन॑मृतावा॒धाय॑। इन्द्रि॒यावी॑ भ॒वति॑। श॒रदि॑ वैश्य॒ आद॑धीत। श॒रद्वै

वैश्यस्यर्तुः॥१२॥

स्व ए॒वैन॑मृ॒तावा॒धाय॑। प॒शुमा॑न्भवति। न पूर्व॑योः फल्गु॑न्योर॒ग्निमा॑द॒धीत॑। ए॒षा वै  
ज॑घ॒न्या रा॒त्रिः सं॒वत्स॒रस्य॑। यत्पूर्वे॑ फल्गु॑नी। पृ॒ष्टित॑ ए॒व सं॒वत्स॒रस्या॒ग्निमा॑धाय॑।  
पापी॑यान्भवति। उत्त॑रयो॒रा द॑धीत। ए॒षा वै प्र॑थ॒मा रा॒त्रिः सं॒वत्स॒रस्य॑। यदुत्त॑रे  
फल्गु॑नी। मुख॑त ए॒व सं॒वत्स॒रस्या॒ग्निमा॑धाय॑। वसी॑यान्भवति। अथो॒ खलु॑। यदै॒वैन॑  
य॒ज्ञ उ॑प॒नमे॑त्। अथाद॑धीत। सै॒वास्य॑र्द्धिः॥१३॥ खल्वाधि॒त्सन्त॒ फल्गु॑न्योर॒ग्निमा॑द॒धीता॒सन्न॑प॒तता॑मृ॒तूनां॒ वैश्य॑स्य॒र्तुरुत्त॑रे॒ फल्गु॑नी  
षट्॥

[२]

उद्ध॑न्ति। यदे॒वास्या॑ अमे॒ध्यम्। तदप॑हन्ति। अ॒पोऽवो॑क्ष॒ति शान्त्यै॑। सिक्ता॑  
निव॑पति। ए॒तद्वा अ॒ग्नेर्वै॑श्वान॒रस्य॑ रू॒पम्। रू॒पेणै॒व वै॑श्वान॒रम॑व॒ रुन्धे॑। ऊ॒षां  
निव॑पति। पु॒ष्टिर्वा ए॒षा प्र॒जन॑नम्। यदू॒षाः॥१४॥

पु॒ष्ट्यामे॒व प्र॒जन॑नेऽग्नि॒माध॑त्ते। अथो॑ सं॒ज्ञान॑ ए॒व। सं॒ज्ञानु॑ꣳ ह्ये॒तत्प॑शूनाम्।  
यदू॒षाः। द्यावा॑पृथि॒वी स॒हास्ता॑म्। ते वि॒यती॑ अ॒ब्रूता॑म्। अस्त्वे॒व नो॑ स॒ह

य॒ज्ञिय॒मिति॑। यद॒मुष्या॑ य॒ज्ञिय॒मासी॑त्। तद॒स्याम॑दधात्। त ऊ॒षा॑ अभवन्॥१५॥

यद॒स्या य॒ज्ञिय॒मासी॑त्। तद॒मुष्या॑मदधात्। तद॒दश्च॒न्द्रम॑सि कृ॒ष्णम्।  
ऊ॒षा॑न्नि॒वप॑न्नदो ध्या॒येत्। द्यावा॑पृ॒थिव्यो॒रेव य॒ज्ञिये॒ऽग्निमा॑धत्ते। अ॒ग्निर्दे॒वेभ्यो॑  
नि॒लाय॑त। आ॒खू रू॒पं कृ॒त्वा। स पृ॒थि॒वीं प्रावि॑शत्। स ऊ॒तीः कु॑र्वाणः पृ॒थि॒वीमनु॑  
सम॑चरत्। तदा॑खुकरीषम॑भवत्॥१६॥

यदा॑खुकरीषः सम्भारो भवति। यदे॒वास्य॑ तत्र न्य॒क्तम्। तदे॒वाव॑ रुन्धे। ऊ॒र्जं  
वा ए॒तः रसं॑ पृ॒थि॒व्या उ॑प॒दीका॑ उद्दि॒हन्ति॑। यद्व॒ल्मीक॑म्। यद्व॒ल्मीक॑व॒पा सम्भारो॑  
भवति॑। ऊ॒र्जमे॒व रसं॑ पृ॒थि॒व्या अ॒व॑ रुन्धे। अथो॒ श्रोत्र॑मे॒व। श्रोत्र॑ः ह्ये॒तत्पृ॒थि॒व्याः।  
यद्व॒ल्मीकः॑॥१७॥

अ॒ब॒धिरो॑ भवति। य ए॒वं वेद॑। प्र॒जाप॑तिः प्र॒जा अ॑सृजत। तासा॒मन्न॑मुपा॑क्षीयत।  
ताभ्यः॑ सू॒दमु॑प॒प्राभि॑नत्। ततो॒ वै तासा॒मन्नं॑ नाक्षी॑यत। यस्य॑ सू॒दः सम्भारो॑  
भवति॑। नास्य॑ गृ॒हेऽन्नं॑ क्षीयते। आपो॒ वा इ॒दम॑ग्रे स॒लिल॑मासीत्। तेन॑

प्रजापतिरश्राम्यत्॥१८॥

कथमिदं स्यादिति। सोऽपश्यत्पुष्करपूर्णं तिष्ठत्। सोऽमन्यत। अस्ति वै तत्। यस्मिन्निदमधि तिष्ठतीति। स वराहो रूपं कृत्वोप न्यमञ्जत्। स पृथिवीमध आच्छत्। तस्या उपहत्योदमञ्जत्। तत्पुष्करपर्णेऽप्रथयत्। यदप्रथयत्॥१९॥

तत्पृथिव्यै पृथिवित्वम्। अभूद्वा इदमिति। तद्धूम्यै भूमित्वम्। तां दिशोऽनु वातः समंवहत्। तां शर्कराभिरदहत्। शं वै नोऽभूदिति। तच्छर्कराणां शर्करत्वम्। यद्वराहविहतं सम्भारो भवति। अस्यामेवाच्छम्बद्वारमग्निमाधत्ते। शर्करा भवन्ति धृत्यै॥२०॥

अथो शन्त्वायं। सरिता अग्निराधेय इत्याहुः। आपो वरुणस्य पत्न्य आसन्। ता अग्निरभ्यध्यायत्। ताः समभवत्। तस्य रेतः पराऽपतत्। तद्विरण्यमभवत्। यद्विरण्यमुपास्यति। सरितसमेवाग्निमाधत्ते। पुरुष इन्वै स्वाद्रेतसो बीभत्सत् इत्याहुः॥२१॥

उत्तर॒त उपा॑स्यत्यर्वा॒भ॒त्सायै॑ । अति॒ प्रय॑च्छति । आ॒र्तिमे॒वाति॒ प्रय॑च्छति ।  
 अ॒ग्निर्दे॒वेभ्यो॑ नि॒लाय॑त । अ॒श्वो रू॒पं कृ॒त्वा । सोऽश्व॑त्थे सं॒वत्सर॑म॒तिष्ठ॑त् ।  
 तद॑श्व॒त्थस्या॑श्व॒त्थत्व॑म् । यदाश्व॑त्थः सम्भा॒रो भव॑ति । यदे॒वास्य॒ तत्र॒ न्य॑क्तम् ।  
 तदे॒वाव॑ रुन्धे ॥ २२ ॥

दे॒वा वा ऊ॒र्जं व्य॑भजन्त । तत॑ उदु॒म्बर॒ उद॑तिष्ठत् । ऊ॒र्वा उ॑दु॒म्बरः॑ । यदौदु॑म्बरः  
 सम्भा॒रो भव॑ति । ऊ॒र्जमे॒वाव॑ रुन्धे । तृ॒तीय॑स्यामि॒तो दि॒वि सोम॑ आसीत् । तं  
 गा॒य॒त्र्याऽह॑रत् । तस्य॑ पर्ण॑म॒च्छिद्य॑त । तत्पर्णो॑ऽभवत् । तत्पर्ण॑स्य॑ पर्ण॒त्वम् ॥ २३ ॥

यस्य॑ पर्ण॒मयः॑ सम्भा॒रो भव॑ति । सोम॑पी॒थमे॒वाव॑ रुन्धे । दे॒वा वै ब्र॒ह्म॑न्नवदन्त ।  
 तत्पर्ण॑ उपा॑शृणोत् । सु॒श्रवा॒ वै नाम॑ । यत्पर्ण॑मयः सम्भा॒रो भव॑ति । ब्र॒ह्म॑व॒र्च॒समे॒वाव॑  
 रुन्धे । प्र॒जाप॑तिर॒ग्निम॑सृजत । सोऽबि॑भेत्प्र मा॑ धक्ष्य॒तीति॑ । त॒ श॒म्या॑-  
 ऽशम॑यत् ॥ २४ ॥

तच्छ॒म्यै शमि॑त्वम् । यच्छ॒मीम॑यः सम्भा॒रो भव॑ति । शान्त्या॒ अप्र॑दाहाय । अ॒ग्नेः

सृष्टस्य यतः। विकङ्कतं भा आच्छत्। यद्विकङ्कतः सम्भारो भवति। भा एवाव  
 रुन्धे। सहृदयोऽग्निराधेय इत्याहुः। मरुतोऽद्विरग्निमतमयन्। तस्य तान्तस्य  
 हृदयमाच्छिन्दन्। साऽशनिरभवत्। यदशनिहतस्य वृक्षस्य सम्भारो भवति।  
 सहृदयमेवाग्निमा धत्ते॥२५॥ ऊपां अभवन्नभवद्वल्मीकौऽश्राम्यदप्रथयद्धृत्यै वीभक्षत् इत्याहु रुन्धे पर्णत्वमंशमयदच्छिन्दुः श्रीणि च॥ [३]

द्वादशसु विक्रामेष्वग्निमा दधीत। द्वादश मासाः संवत्सरः। संवत्सरादेवैनमवरुद्ध्या  
 धत्ते। यद्द्वादशसु विक्रामेष्वग्निमा दधीत। परिमितमव रुन्धीत। चक्षुर्निमित्त आदधीत।  
 इयद्द्वादश विक्रामा(३) इति। परिमितं चैवापरिमितं चाव रुन्धे। अनृतं वै वाचा  
 वदति। अनृतं मनसा ध्यायति॥२६॥

चक्षुर्वै सत्यम्। अद्रा(३)गित्याहु। अदर्शमिति। तत्सत्यम्। यश्चक्षुर्निमित्ते-  
 ऽग्निमाधत्ते। सत्य एवैनमा धत्ते। तस्मादाहिताग्निर्नानृतं वदेत्। नास्य ब्राह्मणो-  
 ऽनाश्वान्गृहे वसेत्। सत्ये ह्यस्याग्निराहितः। आग्नेयी वै रात्रिः॥२७॥

आग्नेयाः पशवः। ऐन्द्रमहः। नक्तं गार्हपत्यमा दधाति। पशून्नेवाव रुन्धे।  
 दिवाऽऽहवनीयम्। इन्द्रियमेवाव रुन्धे। अर्धोदिते सूर्य आहवनीयमा दधाति।

ए॒तस्मि॒न्वै लो॒के प्र॒जाप॑तिः प्र॒जा अ॑सृजत। प्र॒जा ए॒व तद्य॑जमानः सृजते। अथो॑  
भू॒तं चै॒व भ॑विष्यच्चा॒व रुन्धे॑॥२८॥

इडा॒ वै मा॑न॒वी य॑ज्ञानूक॒शिन्या॑सीत्। साऽशृ॑णोत्। अ॒सुरा अ॒ग्निमा॑दधत् इति॑।  
तद॑गच्छत्। त आ॑हव॒नीय॑मग्र आदधत्। अथ॑ गा॒र्हप॑त्यम्। अथा॑न्वा॒हार्य॑पच॒नम्।  
साऽब्र॑वीत्। प्र॒तीच्ये॑षाऽ॒ श्रीर॑गात्। भ॒द्रा भू॒त्वा परा॑ भविष्यन्तीति॑॥२९॥

यस्यै॒वम॒ग्निरा॑धी॒यते॑। प्र॒तीच्य॑स्य॒ श्रीरे॑ति। भ॒द्रो भू॒त्वा परा॑भवति। साऽशृ॑णोत्।  
दे॒वा अ॒ग्निमा॑दधत् इति॑। तद॑गच्छत्। ते॑न्वा॒हार्य॑पच॒नम॒ग्र आ॑दधत्। अथ॑  
गा॒र्हप॑त्यम्। अथा॑ऽऽहव॒नीय॑म्। साऽब्र॑वीत्॥३०॥

प्राच्ये॑षाऽ॒ श्रीर॑गात्। भ॒द्रा भू॒त्वा सु॒वर्गं लो॒कमे॑ष्यन्ति। प्र॒जां तु न वै॑त्थस्यन्त॒  
इति॑। यस्यै॒वम॒ग्निरा॑धी॒यते॑। प्राच्य॑स्य॒ श्रीरे॑ति। भ॒द्रो भू॒त्वा सु॒वर्गं लो॒कमे॑ति। प्र॒जां  
तु न वि॑न्दते। साऽब्र॑वीदिडा॒ मनु॑म्। तथा॒ वा अ॒हं तवा॒ग्निमा॑धा॒स्यामि॑। यथा॒ प्र  
प्र॒जया॑ प॒शुभि॑र्मिथुनैर्जनिष्यसे॑॥३१॥

प्रत्यस्मिँल्लोके स्थास्यसि। अ॒भि सु॒व॒र्गं लो॒कं जे॒ष्यसी॑ति। गार्ह॑पत्य॒मग्र॑  
आद॑धात्। गार्ह॑पत्यं वा अनु॑ प्र॒जाः प॒शवः॑ प्रजायन्ते। गार्ह॑पत्येनैवास्मै॑ प्र॒जां  
प॒शून्प्राज॑नयत्। अथा॑न्वाहार्य॒पच॑नम्। ति॒र्यङ्मि॒त्रं वा अयं॑ लो॒कः। अ॒स्मिन्ने॒व तेन॑  
लो॒के प्रत्य॑तिष्ठत्। अथा॑ऽऽह॒वनी॑यम्। तेनै॒व सु॒व॒र्गं लो॒कम॒भ्यज॑यत्॥ ३२॥

यस्यै॒वम॒ग्निरा॑धी॒यते॑॥ प्र प्र॒जया॑ प॒शुभिर्मि॑थुनैर्जा॑यते। प्रत्य॒स्मिँल्लो॒के ति॑ष्ठति।  
अ॒भि सु॒व॒र्गं लो॒कं ज॑यति। यस्य॑ वा अय॑थादेवतम॒ग्निरा॑धी॒यते॑॥ आ  
दे॒वता॑भ्यो वृ॒श्च्यते॑। पापी॑यान्भवति। यस्य॑ यथादे॒वतम्। न दे॒वता॑भ्य॒ आवृ॑श्च्यते।  
वसी॑यान्भवति॥ ३३॥

भृ॒गूणां॑ त्वाऽङ्गि॑रसां व्रतपते व्र॒तेनाद॑धा॒मीति॑ भृ॒गव॑ङ्गि॑रसामाद॑ध्यात्। आ॒दि॒त्यानां॑  
त्वा दे॒वानां॑ व्रतपते व्र॒तेनाद॑धा॒मीत्य॒न्यासां॑ ब्राह्म॑णीनां प्र॒जाना॑म्। वरु॑णस्य त्वा  
राज्ञो॑ व्रतपते व्र॒तेनाद॑धा॒मीति॑ राज्ञः॑। इन्द्र॑स्य त्वेन्द्रि॒येण॑ व्रतपते व्र॒तेनाद॑धा॒मीति॑  
राज॒न्यस्य॑। मनो॑स्त्वा ग्रा॒म॒ण्यो॑ व्रतपते व्र॒तेनाद॑धा॒मीति॑ वैश्य॑स्य। ऋ॒भूणां॑ त्वा  
दे॒वानां॑ व्रतपते व्र॒तेनाद॑धा॒मीति॑ रथका॒रस्य॑। य॒थादे॒वतम॒ग्निरा॑धी॒यते॑। न दे॒वता॑भ्य॒



आवृश्यते। वसीयान्भवति॥३४॥  
ध्यायति वै रात्रिश्चरं रुन्धे भविष्यन्तीत्यब्रवीज्जनिष्यसेऽजयद्वसीयान्भवति नवं च॥—[४]

प्रजापतिर्वाचः सत्यमपश्यत्। तेनाग्निमाधत्त। तेन वै स आर्ध्रोत्। भूर्भुवः  
 सुवरित्याह। एतद्वै वाचः सत्यम्। य एतेनाग्निमाधत्ते। ऋध्रोत्येव। अथो सत्यप्राशूरेव  
 भवति। अथो य एवं विद्वानभिचरति। स्तृणुत एवैनम्॥३५॥

भूरित्याह। प्रजा एव तद्यजमानः सृजते। भुव इत्याह। अस्मिन्नेव  
 लोके प्रति तिष्ठति। सुवरित्याह। सुवर्ग एव लोके प्रति तिष्ठति।  
 त्रिभिरक्षरैर्गार्हपत्यमा दधाति। त्रय इमे लोकाः। एष्वेवैनं लोकेषु प्रति-  
 ष्ठितमाधत्ते। सर्वैः पञ्चभिराहवनीयम्॥३६॥

सुवर्गाय वा एष लोकायाधीयते। यदाहवनीयः। सुवर्ग एवास्मै लोके वाचः  
 सत्यं सर्वमाप्नोति। त्रिभिर्गार्हपत्यमा दधाति। पञ्चभिराहवनीयम्। अष्टौ  
 सम्पद्यन्ते। अष्टाक्षरा गायत्री। गायत्रौऽग्निः। यावानेवाग्निः। तमाधत्ते॥३७॥

प्रजापतिः प्रजा असृजत। ता अस्मात्सृष्टाः पराचीरायन्। ताभ्यो

ज्योतिरुदङ्गृह्णात्। तं ज्योतिः पश्यन्तीः प्रजा अ॒भि स॒माव॑र्तन्त। उ॒परी॑वा॒ग्निमु॑द्गृहीयादु॒द्य  
ज्योति॑रे॒व पश्य॑न्तीः प्र॒जा यज॑मानम॒भि स॒माव॑र्तन्ते। प्र॒जाप॑ते॒रक्ष्य॑श्चयत्। तत्परा॑-  
ऽपतत्। तदश्वो॑ऽभवत्। तदश्व॑स्याश्व॒त्वम्॥३८॥

ए॒ष वै प्र॒जाप॑तिः। यद॒ग्निः। प्रा॒जाप॒त्योऽश्वः॑। यदश्वं॑ पु॒रस्ता॒न्नय॑ति। स्वमे॒व चक्षुः॑  
पश्य॑न्प्र॒जाप॑तिरनूदेति। व॒ज्री वा ए॒षः। यदश्वः॑। यदश्वं॑ पु॒रस्ता॒न्नय॑ति। जा॒ताने॒व  
भ्रातृ॑व्यान्प्रणु॑दते। पुन॒रा व॑र्तयति॥३९॥

ज॒निष्य॑माणाने॒व प्रति॑नुदते। न्या॑हव॒नीयो गार्ह॑पत्यमकामयत्। निगार्ह॑पत्य  
आहव॒नीयम्। तौ वि॒भाजं॑ नाश॑क्रोत्। सोऽश्वः॑ पूर्॒ववा॑ङ्मुत्वा। प्राश्चं॑ पूर्॒वमु॑दवहत्।  
तत्पूर्॒ववा॑हः पूर्॒ववा॑द्वम्। यदश्वं॑ पु॒रस्ता॒न्नय॑ति। विभ॑क्तिरे॒वैन॑योः सा। अथो॒  
नाना॑वीर्या॒वेवैनौ॑ कुरुते॥४०॥

यदु॒पर्यु॑परि॒ शिरो॑ हरे॑त्। प्रा॒णान् विच्छि॑न्ध्यात्। अ॒धोऽधुः॑ शिरो॑ हरति। प्रा॒णानां॑  
गोपी॒थाय॑। इय॒त्यग्रे॑ हरति। अथेय॒त्यथे॑यति। त्रयं॑ इ॒मे लो॒काः। ए॒ष्वेवैनं॑ लो॒केषु॒

प्रतिष्ठितुमाधत्ते। प्रजापतिरग्निमंसृजत। सौऽबिभेत्प्र मां धक्ष्यतीति॥४१॥

तस्य त्रेधा महिमानं व्यौहत्। शान्त्या अप्रदाहाय। यत्रेधाऽग्निराधीयते।  
महिमानमेवास्य तद्व्यूहति। शान्त्या अप्रदाहाय। पुनरा वर्तयति। महिमानमेवास्य  
सन्दधाति। पशुर्वा एषः। यदश्वः। एष रुद्रः॥४२॥

यदग्निः। यदश्वस्य पदेऽग्निमादध्यात्। रुद्राय पशूनपिदध्यात्। अपशुर्यजमानः  
स्यात्। यन्नाक्रमयेत्। अनवरुद्धा अस्य पशवः स्युः। पार्श्वत आक्रमयेत्।  
यथाऽऽहितस्याग्नेरङ्गारा अभ्यववर्तेरन्। अवरुद्धा अस्य पशवो भवन्ति। न  
रुद्रायापिदधाति॥४३॥

त्रीणि हवींषि निर्वपति। विराज एव विक्रान्तं यजमानोऽनु विक्रमते। अग्नये  
पवमानाय। अग्नये पावकाय। अग्नये शुचये। यदग्नये पवमानाय निर्वपति।  
पुनात्येवैनम्। यदग्नये पावकाय। पूत एवास्मिन्नाद्यं दधाति। यदग्नये शुचये।  
ब्रह्मवर्चसमेवास्मिन्नुपरिष्ठादधाति॥४४॥

पुनमाहुवनीयं धत्तेऽश्वत्वं वर्तयति कुरुत इति रुद्रो दधाति यदग्नये शुचय एकं

च॥

[५]

दे॒वा॒सु॒राः संय॑त्ता आसन्। ते दे॒वा वि॑ज॒यमु॑प॒यन्तः॑। अ॒ग्नौ वा॒मं व॒सु सं  
न्य॑दधत्। इ॒दमु॑ नो भविष्यति। यदि॑ नो जे॒ष्यन्ती॑ति। तद॒ग्निर्नो॑त्सह॑मशक्रोत्। तत्  
त्रे॒धा वि॒न्य॑दधात्। प॒शुषु॑ तृती॑यम्। अ॒प्सु तृती॑यम्। आ॒दि॒त्ये तृती॑यम्॥४५॥

तद्दे॒वा वि॒जित्य॑। पुन॑रवा॒रुरु॑त्सन्त। ते॑ऽग्नये॒ पव॑मानाय पुरो॒डाश॑म॒ष्टाक॑पालं  
नि॒र॑वपन्। प॒शवो॑ वा अ॒ग्निः पव॑मानः। यदे॒व प॒शुष्व॑ासी॑त्। तत्ते॒नाव॑रुन्धत्। ते॑ऽग्नये॒  
पाव॑काय। आपो॑ वा अ॒ग्निः पा॑वकः। यदे॒वाप्स्वासी॑त्। तत्ते॒नाव॑रुन्धत्॥४६॥

ते॑ऽग्नये॒ शुच॑ये। अ॒सौ वा आ॑दि॒त्योऽग्निः॑ शुचिः॑। यदे॒वाऽऽदि॒त्य आसी॑त्।  
तत्ते॒नाव॑रुन्धत्। ब्र॒ह्म॒वा॒दिनो॑ वदन्ति। त॒नुवो॑ वावैता अ॒ग्न्या॒धेय॑स्य। आ॒ग्ने॒यो वा  
अ॒ष्टाक॑पालोऽग्न्या॒धेय॑मिति। यत्तं नि॒र्वपे॑त्। नैतानि॑। यथा॒ऽऽत्मा॑ स्यात्॥४७॥

नाङ्गा॑नि। ता॒दृगे॒व तत्। यदे॒तानि॑ नि॒र्वपे॑त्। न तम्। यथा॒ऽङ्गा॑नि॒ स्युः। नाऽऽत्मा॑।  
ता॒दृगे॒व तत्। उ॒भया॑नि स॒ह नि॒रुप्या॑णि। य॒ज्ञस्य॑ सा॒त्म॒त्वाय॑। उ॒भयं॑ वा ए॒तस्ये॑न्द्रि॒यं  
वी॒र्य॑माप्यते॥४८॥

योऽग्निमाधुत्ते। ऐन्द्राग्रमेकादशकपालमनु निर्वपेत्। आदित्यं चरुम्। इन्द्राग्नी वै देवानामयातयामानौ। ये एव देवते अयातयाम्नी। ताभ्यामेवास्मा इन्द्रियं वीर्यमव रुन्धे। आदित्यो भवति। इयं वा अदितिः। अस्यामेव प्रति तिष्ठति। धेनै वा एतद्वेतः॥४९॥

यदाज्यम्। अनडुहस्तण्डुलाः। मिथुनमेवाव रुन्धे। घृते भवति। यज्ञस्यालूक्षान्तत्वाय। चत्वार आर्षेयाः प्राश्नन्ति। दिशामेव ज्योतिषि जुहोति। पशवो वा एतानि हवींषि। एष रुद्रः। यदग्निः॥५०॥

यत्सद्य एतानि हवींषि निर्वपेत्। रुद्राय पशूनपि दध्यात्। अपशुर्यजमानः स्यात्। यन्नानुनिर्वपेत्। अनवरुद्धा अस्य पशवः स्युः। द्वादशसु रात्रीष्वनु निर्वपेत्। संवत्सरप्रतिमा वै द्वादश रात्रयः। संवत्सरेणैवास्मै रुद्रं शमयित्वा। पशूनव रुन्धे। यदेकमेकमेतानि हवींषि निर्वपेत्॥५१॥

यथा त्रीण्यावपनानि पूरयेत्। तादृक्तत्। न प्रजननमुच्छिंसेत्। एकं निरुप्य।

उत्तरे समस्येत्। तृतीयमेवास्मै लोकमुच्छिषति प्रजननाय। तं प्रजया पशुभिरनु  
प्रजायते। अथो यज्ञस्यैवैषाऽभिक्रान्तिः। रथचक्रं प्रवर्तयति। मनुष्यरथेनैव देवरथं  
प्रत्यवरोहति॥५२॥

ब्रह्मवादिनो वदन्ति। होतव्यमग्निहोत्रां(३) न होतव्या(३) मिति। यद्यजुषा  
जुहुयात्। अयथापूर्वमाहुती जुहुयात्। यत्र जुहुयात्। अग्निः परां भवेत्। तूष्णीमेव  
होतव्यम्। यथापूर्वमाहुती जुहोति। नाग्निः पराभवति। अग्नीधे ददाति॥५३॥

अग्निमुखानेवर्तून्प्रीणाति। उपबर्हणं ददाति। रूपाणामवरुद्धौ। अश्वं ब्रह्मणै।  
इन्द्रियमेवाव रुन्धे। धेनुं होत्रे। आशिष एवाव रुन्धे। अनङ्गाहमध्वर्यवे। वह्निर्वा  
अनङ्गान्। वह्निरध्वर्युः॥५४॥

वह्निनैव वह्निं यज्ञस्याव रुन्धे। मिथुनौ गावौ ददाति। मिथुनस्यावरुद्धौ।  
वासो ददाति। सर्वदेवत्यं वै वासः। सर्वा एव देवताः प्रीणाति। आ द्वादशभ्यो  
ददाति। द्वादश मासाः संवत्सरः। संवत्सर एव प्रति तिष्ठति। काममूर्ध्वं देयम्।

अपरिमितस्यावरुद्धौ॥५५॥ आदित्ये तृतीयमुपस्वासीत्तत्तेनावारुन्धत् स्यादाप्यते रेतोऽग्निरेकमेकमेतानि हवीरपि निर्वप्यत्यवरोहति  
ददात्यध्वर्युर्दयमेकं च॥ [६]

घर्मः शिरस्तदयमग्निः। सम्प्रियः पशुभिर्भुवत्। छुर्दिस्तोकाय तनयाय यच्छ।  
वार्तः प्राणस्तदयमग्निः। सम्प्रियः पशुभिर्भुवत्। स्वदितं तोकाय तनयाय पितुं पंच।  
प्राचीमनु प्रदिशं प्रेहि विद्वान्। अग्नेरग्ने पुरो अग्निर्भवेह। विश्वा आशा दीद्यानो  
विभाहि। ऊर्जं नो धेहि द्विपदे चतुष्पदे॥५६॥

अर्कश्चक्षुस्तदसौ सूर्यस्तदयमग्निः। सम्प्रियः पशुभिर्भुवत्। यत्ते शुक्र शुक्रं वर्चः  
शुक्रा तनूः। शुक्रं ज्योतिरजस्रम्। तेन मे दीदिहि तेन त्वाऽऽदधे। अग्निनाऽग्ने  
ब्रह्मणा। आनशे व्यानशे सर्वमायुर्व्यानशे। ये ते अग्ने शिवे तनुवौ। विराद्व स्वराद्व।  
ते माविंशतां ते मा जिन्वताम्॥५७॥

ये ते अग्ने शिवे तनुवौ। सम्राट्वाभिभूश्च। ते माविंशतां ते मा जिन्वताम्।  
ये ते अग्ने शिवे तनुवौ। विभूश्च परिभूश्च। ते मा विंशतां ते मा जिन्वताम्।  
ये ते अग्ने शिवे तनुवौ। प्रभ्वी च प्रभूतिश्च। ते मा विंशतां ते मा जिन्वताम्।

यास्ते अग्ने शिवास्तनुवः। ताभिस्त्वाऽऽदधे। यास्ते अग्ने घोरास्तनुवः। ताभिरमुं  
गच्छ॥ ५८ ॥ चतुष्पदे जिवतां तनुवस्त्राणि च॥ \_\_\_\_\_ [७]

इमे वा एते लोका अग्नयः। ते यदव्यावृत्ता आधीयेरन्। शोचयेयुर्यजमानम्।  
घर्मः शिर इति गार्हपत्यमा दधाति। वातः प्राण इत्यन्वाहार्यपचनम्।  
अर्कश्चक्षुरित्याहवनीयम्। तेनैवैनान्व्यावर्तयति। तथा न शोचयन्ति यजमानम्।  
रथन्तरमभिगायते गार्हपत्य आधीयमाने। रथन्तरो वा अयं लोकः॥ ५९ ॥

अस्मिन्नेवैनं लोके प्रतिष्ठितमा धत्ते। वामदेव्यमभिगायत उद्धियमाणे। अन्तरिक्षं  
वै वामदेव्यम्। अन्तरिक्ष एवैनं प्रतिष्ठितमा धत्ते। अथो शान्तिर्वै वामदेव्यम्।  
शान्तमेवैनं पशव्यमुद्धरते। बृहदभिगायत आहवनीयं आधीयमाने। बार्हतो वा  
असौ लोकः। अमुष्मिन्नेवैनं लोके प्रतिष्ठितमा धत्ते। प्रजापतिरग्निमसृजत॥ ६० ॥

सोऽश्वोऽवारो भूत्वा पराडैत्। तं वारवन्तीयेनावारयत। तद्वारवन्तीयस्य  
वारवन्तीयत्वम्। श्यैतेन श्येती अंकुरुत। तच्छ्यैतस्य श्यैतत्वम्। यद्वारवन्तीयमभि



गायते। वा॒र॒यि॒त्वै॒वैनं॑ प्र॒ति॒ष्ठि॒त॒मा ध॑त्ते। श्यै॒तेन॑ श्ये॒ती कु॑रुते। घ॒र्मः शि॒र इति॑  
गा॒र्ह॑प॒त्य॒माद॑धाति। स॒शी॒र्षा॒णमे॒वैन॒मा ध॑त्ते॥६१॥

उ॒पै॒न॒मु॒त्त॒रो य॒ज्ञो न॑मति। रु॒द्रो वा ए॒षः। यद॑ग्निः। स आ॑धीय॒मान ई॒श्वरो  
यज॑मानस्य प॒शून् हि॑सि॒तोः। स॒म्प्रि॒यः प॒शुभि॑र्भु॒वदि॒त्याह॑। प॒शुभि॑रे॒वैन॑स॒म्प्रि॒यं  
करो॑ति। प॒शूना॑महि॑सायै। छु॒र्दि॒स्तो॒काय॑ तन॒याय॑ य॒च्छे॒त्याह॑। आ॒मे॒वैता॑मा  
शा॑स्ते। वा॒तः प्रा॒ण इत्य॑न्वाहा॒र्य॒पच॑नम्॥६२॥

स॒प्रा॒णमे॒वैन॒मा ध॑त्ते। स्व॒दि॒तं तो॒काय॑ तन॒याय॑ पि॒तुं प॒चे॒त्याह॑। अ॒न्नमे॒वास्मै॑  
स्व॒दय॑ति। प्रा॒ची॒मनु॑ प्र॒दिशं॑ प्रेहि॑ वि॒द्वानि॒त्याह॑। वि॒भ॒क्ति॒रे॒वैन॑योः सा। अथो॒  
ना॒ना॒वी॒र्या॒वे॒वैनौ॑ कुरुते। ऊ॒र्जं नो॑ धेहि॑ द्वि॒पदे॑ चतु॑ष्पद॒ इत्या॑ह। आ॒मे॒वैता॑मा  
शा॑स्ते। अ॒र्कश्च॑क्षु॒रिति॑ाह॒वनी॑यम्। अ॒र्को वै दे॒वाना॑म॒न्नम्॥६३॥

अ॒न्नमे॒वाव॑ रु॒न्धे। तेन॑ मे दी॒दि॒ही॒त्याह॑। स॒मि॒न्ध ए॒वैन॑म्। आ॒न॒शे व्या॑न॒श इति॑  
त्रि॒रु॒दि॒ङ्ग॒यति॑। त्रयं॑ इ॒मे लो॒काः। ए॒ष्वे॒वैनं॑ लो॒केषु॑ प्र॒ति॒ष्ठि॒त॒मा ध॑त्ते। तत्तथा॑ न

कार्यम्। वीङ्गितमप्रतिष्ठितमा दधीत। उद्धृत्यैवाधायाभिमन्त्रियः। अवीङ्गितमेवैनं  
 प्रतिष्ठितमाधत्ते। विराट् स्वराट् यास्ते अग्ने शिवास्तनुवस्ताभिस्त्वाऽऽदध  
 इत्याह। एता वा अग्नेः शिवास्तनुवः। ताभिरेवैनं समर्धयति। यास्ते अग्ने  
 घोरास्तनुवस्ताभिरमुं गच्छेति ब्रूयाद्यं द्विष्यात्। ताभिरेवैनं पराभावयति॥६४॥ लोको-  
 ऽसृजतेनुमाधत्तेऽन्वाहार्यपचनं देवानामन्नमेनं प्रतिष्ठितमाधत्ते पञ्च च॥ [८]

शमीगर्भादग्निं मन्थति। एषा वा अग्नैर्यज्ञियां तनूः। तामेवास्मै जनयति। अदितिः  
 पुत्रकामा। साध्येभ्यो देवेभ्यो ब्रह्मौदनमपचत्। तस्या उच्छेषणमददुः। तत्प्राश्नात्।  
 सा रेतोऽधत्त। तस्यै धाता चार्यमा चाजायेताम्। सा द्वितीयमपचत्॥६५॥

तस्या उच्छेषणमददुः। तत्प्राश्नात्। सा रेतोऽधत्त। तस्यै मित्रश्च  
 वरुणश्चाजायेताम्। सा तृतीयमपचत्। तस्या उच्छेषणमददुः। तत्प्राश्नात्।  
 सा रेतोऽधत्त। तस्या अशश्च भगश्चाजायेताम्। सा चतुर्थमपचत्॥६६॥

तस्या उच्छेषणमददुः। तत्प्राश्नात्। सा रेतोऽधत्त। तस्या इन्द्रश्च  
 विवस्वाश्चाजायेताम्। ब्रह्मौदनं पचति। रेत एव तदधाति। प्राश्नन्ति ब्राह्मणा

औद॒नम्। यदाज्यमु॒च्छिष्य॑ते। तेन॑ स॒मिधो॒ऽभ्यज्या॑ द॒धाति। उ॒च्छेष॑णा॒द्वा अदि॑ती॒  
रेतो॑ऽधत्त॥६७॥

उ॒च्छेष॑णादे॒व तद्रेतो॑ धत्ते। अस्थि॒ वा ए॒तत्। यथ्स॒मिधः॑। ए॒तद्रेतः॑। यदाज्यम्।  
यदाज्ये॑न स॒मिधो॒ऽभ्यज्या॑द॒धाति। अस्थ्ये॒व तद्रेत॑सि द॒धाति। तिस्र॑ आद॒धाति  
मिथु॑न॒त्वाय॑। इय॑तीर्भवन्ति। प्र॒जाप॑तिना यज्ञमु॒खेन॒ सम्मि॑ताः॥६८॥

इय॑तीर्भवन्ति। य॒ज्ञप॒रुषा॒ सम्मि॑ताः। इय॑तीर्भवन्ति। ए॒ताव॒द्वै पुरु॑षे  
वीर्य॑म्। वीर्य॑सम्मिताः। आ॒र्द्रा भ॑वन्ति। आ॒र्द्रमि॑व हि रे॒तः सि॒च्यते॑।  
चि॒त्रि॒यस्याश्च॒त्थस्याद॑धाति। चि॒त्रमे॒व भ॑वति। घृ॒तव॑तीभि॒रा द॑धाति॥६९॥

ए॒तद्वा अ॒ग्नेः प्रि॒यं धाम॑। यद्घृ॒तम्। प्रि॒येणै॒वैनं॑ धाम्ना॒ सम॑र्धयति। अथो॒  
तेज॑सा। गा॒यत्रीभिर्ब्रा॑ह्मणस्याद॒ध्यात्। गा॒यत्र॑छ॒न्दा वै ब्रा॑ह्म॒णः। स्वस्य॒ छन्द॑सः  
प्रत्य॑यन॒स्त्वाय॑। त्रि॒ष्टु॒र्भो राज॑न्य॒स्य। त्रि॒ष्टु॒च्छ॒न्दा वै रा॑ज॒न्यः। स्वस्य॒ छन्द॑सः  
प्रत्य॑यन॒स्त्वाय॑॥७०॥

जग॑तीभिर्वैश्य॒स्य। जग॑तीछ॒न्दा वै वैश्यः॑। स्वस्य॒ छन्द॑सः प्रत्य॑यन॒स्त्वाय॑। त९

संवत्सरं गोपायेत्। संवत्सरं हि रेतो हितं वर्धते। यद्येनं संवत्सरे नोपनमेत्।  
समिधः पुनरादध्यात्। रेतं एव तद्धितं वर्धमानमेति। न मांसमंश्जीयात्। न  
स्त्रियमुपेयात्॥ ७१॥

यन्मांसमंश्जीयात्। यच्छ्रियमुपेयात्। निर्वीर्यः स्यात्। नैनमग्निरुपनमेत्। श्व  
आधास्यमानो ब्रह्मौदनं पंचति। आदित्या वा इत उत्तमाः सुवर्गं लोकमायन्। ते  
वा इतो यन्तं प्रतिनुदन्ते। एते खलु वावाऽऽदित्याः। यद्वाह्मणाः। तैरेव सन्त्वं  
गच्छति॥ ७२॥

नैनं प्रतिनुदन्ते। ब्रह्मवादिनो वदन्ति। क्वां सः। अग्निः कार्यः। योऽस्मै  
प्रजां पशून्प्रजनयतीति। शल्कैस्तां रात्रिमग्निमिन्धीत। तस्मिन्नुपव्युषमरणी  
निष्टपेत्। यथर्षभायं वाशिता न्याविच्छायति। तादृगेव तत्। अपोदूह्य भस्माग्निं  
मन्थति॥ ७३॥

सैव साऽग्नेः सन्ततिः। तं मथित्वा प्राश्चमुद्धरति। संवत्सरमेव तद्रेतो

हितं प्रजंनयति। अनाहितस्तस्याग्निरित्याहुः। यः समिधोऽनाधायाग्निमाधत्त  
 इति। ताः संवत्सरे पुरस्तादादध्यात्। संवत्सरादेवैनमवरुध्याधत्ते। यदि  
 संवत्सरेऽनादध्यात्। द्वादश्यां पुरस्तादादध्यात्। संवत्सरप्रतिमा वै द्वादश  
 रात्रयः। संवत्सरमेवास्याऽऽहिता भवन्ति। यदि द्वादश्यां नादध्यात्। त्र्यहे  
 पुरस्तादादध्यात्। आहिता एवास्य भवन्ति॥७४॥ द्वितीयमपचच्चतुर्थमपचद्विती रेतोऽधत्त समिन्ता घृतवतीभिरादधाति  
 राज्ञ्यः स्वस्य छन्दसः प्रत्ययन्स्वायेयाद्रच्छति मन्यति रात्रयश्चत्वारि च॥

[९]

प्रजापतिः प्रजा असृजत। स रिरिचानोऽमन्यत। स तपोऽतप्यत। स  
 आत्मन्वीर्यमपश्यत्। तदवर्धत। तदस्मात्सहसोर्ध्वमसृज्यत। सा विराडभवत्। तां  
 देवासुरा व्यगृह्णत। सोऽब्रवीत्प्रजापतिः। मम वा एषा॥७५॥

दोहा एव युष्माकृमिति। सा ततः प्राच्युदक्रामत्। तत्प्रजापतिः पर्यगृह्णात्।  
 अथर्व पितुं मे गोपायेति। सा द्वितीयमुदक्रामत्। तत्प्रजापतिः पर्यगृह्णात्। नर्य  
 प्रजां मे गोपायेति। सा तृतीयमुदक्रामत्। तत्प्रजापतिः पर्यगृह्णात्। शङ्स्यं पशून्मे

गोपायेति॥७६॥

सा चतुर्थमुदक्रामत्। तत्प्रजापतिः पर्यगृह्णात्। सप्रथं सभां मे गोपायेति। सा पञ्चममुदक्रामत्। तत्प्रजापतिः पर्यगृह्णात्। अहे बुध्निय मन्त्रं मे गोपायेति। अग्नीन् वाव सा तान्व्यक्रमत। तान्प्रजापतिः पर्यगृह्णात्। अथो पङ्क्तिमेव। पङ्क्तिर्वा एषा ब्राह्मणे प्रविष्टा॥७७॥

तामात्मनोऽधि निर्मिमीते। यदग्निराधीयते। तस्मादेतावन्तोऽग्नय आधीयन्ते। पाङ्क्तं वा इदं सर्वम्। पाङ्क्तेनैव पाङ्क्तं स्पृणोति। अथैव पितुं मे गोपायेत्याह। अन्नमेवैतेन स्पृणोति। नर्यं प्रजां मे गोपायेत्याह। प्रजामेवैतेन स्पृणोति। शंस्यं पशून्मे गोपायेत्याह॥७८॥

पशून्मेवैतेन स्पृणोति। सप्रथं सभां मे गोपायेत्याह। सभामेवैतेनैन्द्रियं स्पृणोति। अहे बुध्निय मन्त्रं मे गोपायेत्याह। मन्त्रमेवैतेन श्रियं स्पृणोति। यदन्वाहार्यपचनेऽन्वाहार्यं पचन्ति। तेन सोऽस्याभीष्टः प्रीतः। यद्वार्हपत्य

आज्यमधि॑श्रय॑न्ति॒ सम्पत्नी॑र्याजय॑न्ति। तेन॒ सोऽस्या॒भीष्टः॑ प्री॒तः। यदा॑हव॒नीये॒  
जुह्व॑ति॥ ७९॥

तेन॒ सोऽस्या॒भीष्टः॑ प्री॒तः। यथ्स॒भायां॑ वि॒जय॑न्ते। तेन॒ सोऽस्या॒भीष्टः॑ प्री॒तः।  
यदा॑वस॒थेऽन्न॒९ हर॑न्ति। तेन॒ सोऽस्या॒भीष्टः॑ प्री॒तः। तथा॑ऽस्य॒ सर्वे॑ प्री॒ता अभीष्टा॑  
आधी॑यन्ते। प्र॒वस॒थमे॒ष्यन्ने॒वमु॑प॒तिष्ठे॒तैक॑मेकम्। यथा॑ ब्राह्म॒णाय॑ गृहे॒वासिने॑ परि॒दाय॑  
गृहा॑नेति। ता॒दृगे॒व तत्। पुन॑रा॒गत्यो॑प॒तिष्ठ॑ते। सा भा॑गेयमे॒वैषां॑ तत्। सा तत्  
ऊ॒र्ध्वारो॑हत्। सा रो॑हि॒ण्य॑भवत्। तद्रो॑हि॒ण्यै रो॑हि॒णित्व॑म्। रो॑हि॒ण्याम॒ग्निमा॑दधीत।  
स्व ए॒वैनं॒ योनौ॒ प्रति॑ष्ठित॒माध॑त्ते। ऋ॒ध्नोत्ये॑नेन॥ ८०॥ एषा पशून् गोपायेति प्रविष्टा पशून् गोपायेत्याहु जुह्वति  
तिष्ठते सुप्त च॥

[१०]

ब्रह्म सन्धत्तुं कृत्तिकासुद्धन्ति द्वादशसु प्रजापतिर्वाचो देवासुरास्तदग्निर्नोद्धर्मः शिरं इमे वै शमीगुर्भात्प्रजापतिः स रिचिचानः स तपः स आत्मन्वीर्यं दश॥ १०॥  
ब्रह्म सन्धत्तुं तौ दिव्यायथौ शन्त्वाय प्राच्येषां यदुपयुपरि यत्सद्यः सोऽश्वोऽवारो भूत्वा जगतीभिरशीतिः॥ ८०॥  
ब्रह्म सन्धत्तुमृध्नोत्येनेन॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके प्रथमः प्रपाठकः समाप्तः॥

॥द्वितीयः प्रश्नः॥

॥तैत्तिरीयब्राह्मणे प्रथमाष्टके द्वितीयः प्रपाठकः॥

उद्धन्यमानमस्या अमेध्यम्। अप पाप्मानं यजमानस्य हन्तु। शिवा नः सन्तु  
प्रदिशश्चतस्रः। शं नो माता पृथिवी लोकसाता। शं नो देवीरभिष्टये। आपो भवन्तु  
पीतये। शं योरभि स्रवन्तु नः। वैश्वानरस्य रूपम्। पृथिव्यां परिस्रसा। स्योनमा  
विशन्तु नः॥१॥

यदिदं दिवो यददः पृथिव्याः। सञ्जज्ञाने रोदसी सम्बभूवतुः। ऊषांकृष्णमवतु  
कृष्णमूषाः। इहोभयोर्यज्ञियमागमिष्ठाः। ऊतीः कुर्वाणो यत्पृथिवीमचरः।  
गुहाकारमाखुरूपं प्रतीत्य। तत्ते न्यक्तमिह सम्भरन्तः। शतं जीवेम शरदः  
सर्वीराः। ऊर्जं पृथिव्या रसमाभरन्तः। शतं जीवेम शरदः पुरूचीः॥२॥

वम्रीभिरनुवित्तं गुहांसु। श्रोत्रं त उर्व्यबधिरा भवामः। प्रजापतिसृष्टानां प्रजानाम्।  
क्षुधोऽपहत्यै सुवित्तं नो अस्तु। उप प्रभिन्नमिषमूर्जं प्रजाभ्यः। सूदं गृहेभ्यो



रस॒माभ॑रामि। यस्य॑ रू॒पं बिभ्र॑दि॒मामवि॑न्दत्। गुहा॒ प्रवि॑ष्टाः सरि॒रस्य॑ मध्ये॑।  
तस्ये॒दं विह॑तमा॒भर॑न्तः। अछ॑म्ब॒द्वारम॒स्यां वि॑धेम॥३॥

यत्प॒र्यप॑श्य॒त्सरि॑रस्य॒ मध्ये॑। उ॒र्वीमप॑श्य॒ज्जग॑तः प्रति॒ष्ठाम्। तत्पु॑ष्कर॒स्याऽऽय॑त॒नाद्धि॑  
जा॒तम्। पु॒र्णं पृ॑थि॒व्याः प्रथ॑नः॒ हरामि॑। याभि॒रदृ॑ह॒ज्जग॑तः प्रति॒ष्ठाम्। उ॒र्वीमि॒मां  
वि॒श्वज॑नस्य॑ भ॒र्त्रीम्। ता नः॑ शि॒वाः शर्क॑राः सन्तु॒ सर्वाः॑। अ॒ग्ने रे॒तश्च॑न्द्रः  
हि॒र॒ण्यम्। अ॒द्भ्यः सम्भू॑तम॒मृतं॑ प्र॒जासु॑। तत्स॒म्भर॑न्नुत्त॒रतो॑ नि॒धाय॑॥४॥

अ॒तिप्र॑यच्छुं दुरि॑तिं तरेयम्। अश्वो॑ रू॒पं कृ॒त्वा यद॑श्व॒त्येऽति॑ष्ठः। स॒व॒त्सरं॑  
दे॒वेभ्यो॑ नि॒लाय॑। तत्ते॒ न्य॑क्तमि॒ह स॒म्भर॑न्तः। श॒तं जी॑वेम श॒रदः॑ स॒र्वीराः॑। ऊ॒र्जः  
पृ॑थि॒व्या अ॒ध्युत्थि॑तोऽसि। वन॑स्पते श॒तव॑ल्शो वि॒रोह॑। त्वया॑ व॒यमि॑षमू॒र्जं म॑दन्तः।  
रा॒यस्पोषे॑ण॒ समि॑षा म॑देम। गा॒य॒त्रिया॑ ह्रि॒यमा॑णस्य॒ यत्ते॑॥५॥

पु॒र्णमप॑त॒तृती॑यस्यै दि॒वोऽधि॑। सो॒ऽयं पु॒र्णः सोम॑प॒र्णाद्धि॑ जा॒तः। ततो॑ हरामि  
सोम॑पी॒थस्याव॑रु॒द्धौ। दे॒वानां॑ ब्र॒ह्मवा॑दं व॒दतां॑ यत्। उ॒पाशृ॑णोः सु॒श्रवा॑ वै श्रु॒तोऽसि॑।

ततो॒ मामावि॑शतु ब्रह्मवर्च॑सम्। तत्स॒म्भर॑ऽस्तदव॑रुन्धीय सा॒क्षात्। यया॑ ते  
सृष्ट॑स्या॒ग्नेः। हे॒तिम॑शमयत्प्र॒जाप॑तिः। तामि॒माम॑प्रदाहाय॥६॥

श॒मीः शान्त्यै॑ ह॒राम्य॑हम्। यत्ते॑ सृष्ट॑स्य॒ यतः॑। वि॒कङ्क॑तं भा आ॑र्च्छ॒ज्जात॑वेदः। तया॑  
भा॒सा स॑म्मितः। उ॒रुं नो॑ लो॒कम॑नु प्रभा॑हि। यत्ते॑ ता॒न्तस्य॑ हृद॑य॒माच्छि॑न्द॒ज्जात॑वेदः।  
म॒रुतो॑ऽद्विस्तम॑यित्वा। ए॒तत्ते॒ तद॑श॒नेः स॑म्भ॒रामि॑। सा॒त्मा अ॒ग्ने स॑हृद॑यो भवे॒ह।  
चि॒त्रि॒याद॑श्व॒त्थात्स॑म्भृ॒ता बृ॑हत्यः॥७॥

शरी॑रम॒भि स॑ऽस्कृ॒ताः स्थ। प्र॒जाप॑तिना यज्ञ॒मुखे॑न॒ सम्मि॑ताः। ति॒स्रस्त्रि॑वृ॒द्धिर्मि॑थुना  
प्रजा॑त्यै। अ॒श्वत्था॑द्व्यवा॒हाद्वि जा॑ताम्। अ॒ग्नेस्त॑नूं य॒ज्ञिया॑ः स॑म्भ॒रामि॑।  
शा॒न्तयो॑निः श॒मीग॑र्भम्। अ॒ग्नये॑ प्रज॑नयितवै। यो अ॑श्व॒त्थः श॑मीग॒र्भः। आ॒रुरो॑ह  
त्वे स॒चा। तं ते॑ ह॒रामि॑ ब्रह्म॑णा॥८॥

य॒ज्ञियैः॑ के॒तुभिः॑ स॒ह। यं त्वा॑ स॒मभ॑र॒ज्जात॑वेदः। य॒थाश॑री॒रं भू॑तेषु न्य॑क्तम्। स  
स॑म्भृ॒तः सी॒द शि॒वः प्र॒जाभ्यः॑। उ॒रुं नो॑ लो॒कम॑नु॒नेषि॑ वि॒द्वान्। प्र॒वेध॑से॒ क॒वये॑

मेध्याय। वचो वन्दारु वृषभाय वृष्णे। यतो भयमभयं तन्नो अस्तु। अव देवान्  
यजे हेड्यान्। समिधाऽग्निं दुवस्यत॥९॥

## ॥ घृत-सूक्तम् ॥

घृतैर्बोधयतातिथिम्। आऽस्मिन् हव्या जुहोतन। उप त्वाऽग्ने हविष्मतीः।  
घृताचीर्यन्तु हर्यत। जुषस्व समिधो मम। तं त्वा समिद्धिरङ्गिरः। घृतेन वर्धयामसि।  
बृहच्छोचा यविष्ठ्य। समिध्यमानः प्रथमो नु धर्मः। समक्तुभिरज्यते विश्ववारः॥१०॥

शोचिष्केशो घृतनिर्णिक्पावकः। सुयज्ञो अग्निर्यजथाय देवान्। घृतप्रतीको  
घृतयोनिरग्निः। घृतैः समिद्धो घृतमस्यान्नम्। घृतप्रुषस्त्वा सरितो वहन्ति। घृतं  
पिबन्त्सुयजा यक्षि देवान्। आयुर्दा अग्ने हविषो जुषाणः। घृतप्रतीको घृतयोनिरेधि।  
घृतं पीत्वा मधु चारु गव्यम्। पितेव पुत्रमभिरक्षतादिमम्॥११॥



त्वामग्ने समिधानं यविष्ठ। देवा दूतं चक्रिरे हव्यवाहम्। उरुज्रयंसं

घृतयोनिमाहुतम्। त्वेषं चक्षुर्दधिरे चोदयन्वति। त्वामग्ने प्रदिव आहुतं घृतेन।  
सुम्रायवः सुषमिधा समीधिरे। स वावृधान ओषधीभिरुक्षितः। उरु ज्रयांसि  
पार्थिवा वितिष्ठसे। घृतप्रतीकं व ऋतस्य धूरुषदम्। अग्निं मित्रं न समिधान  
ऋञ्जते॥१२॥

इन्धानो अक्रो विदथेषु दीद्यत्। शुक्रवर्णामुदु नो यंसते धियम्। प्रजा अग्ने  
संवासय। आशाश्च पशुभिः सह। राष्ट्राण्यस्मा आधेहि। यान्यासन्त्सवितुः सवे।  
मही विश्वती सदाने ऋतस्य। अर्वाची एतं धरुणे रयीणाम्। अन्तर्वती जन्यं  
जातवैदसम्। अध्वराणां जनयथः पुरोगाम्॥१३॥

आरोहतं दशतः शक्रिर्मम। ऋतेनाग्र आयुषा वर्चसा सह। ज्योग्जीवन्त  
उत्तरामुत्तराः समाम्। दर्शमहं पूर्णमासं यज्ञं यथा यजै। ऋत्विगवती स्थो  
अग्निरेतसौ। गर्भं दधाथां ते वामहं ददे। तत्सत्यं यद्वीरं बिभृथः। वीरं जनयिष्यथः।  
ते मत्प्रातः प्रजनिष्येथे। ते मा प्रजाते प्रजनयिष्यथे॥१४॥

प्रजयां पशुभिर्ब्रह्मवर्चसेनं सुवर्गे लोके। अनृतात्सत्यमुपैमि। मानुषाद्वैव्यमुपैमि।  
 दैवीं वाचं यच्छामि। शल्कैरग्निमिन्धानः। उभौ लोकौ संनेमहम्। उभयोर्लोकयोर्  
 ऋध्वा। अति मृत्युं तराम्यहम्। जातवेदो भुवनस्य रेतः। इह सिञ्च तपसो  
 यज्जनिष्यते॥१५॥

अग्निमंश्चत्थादधि हव्यवाहम्। शमीगर्भाञ्जनयन् यो मयोभूः। अयं ते  
 योनिर्ऋत्वियः। यतो जातो अरोचथाः। तं जानन्नंश्च आरोह। अथा नो वर्धया  
 रयिम्। अपेतु वीतु वि च सर्पतातः। येऽत्र स्थ पुराणा ये च नूतनाः। अदादिदं  
 यमोऽवसानं पृथिव्याः। अक्रन्निमं पितरो लोकमस्मै॥१६॥

अग्नेर्भस्मास्यग्नेः पुरीषमसि। संज्ञानमसि कामधरणम्। मयि ते कामधरणं  
 भूयात्। संवः सृजामि हृदयानि। सꣳसृष्टं मनो अस्तु वः। सꣳसृष्टः प्राणो अस्तु  
 वः। सं या वः प्रियास्तनुवः। सं प्रिया हृदयानि वः। आत्मा वो अस्तु सम्प्रियः।  
 सम्प्रियास्तनुवो मम॥१७॥

कल्पेतां द्यावापृथिवी। कल्पन्तामाप ओषधीः। कल्पन्तामग्नयः पृथक्। मम  
ज्यैष्ठ्याय सव्रताः। यैऽग्नयः समनसः। अन्तरा द्यावापृथिवी। वासन्तिकावृतू  
अभि कल्पमानाः। इन्द्रमिव देवा अभि सं विशन्तु। दिवस्त्वा वीर्येण। पृथिव्यै  
महिम्ना॥१८॥

अन्तरिक्षस्य पोषेण। सर्वपशुमादधे। अजीजनन्नमृतं मर्त्यासः। अस्त्रेमाणं तरणिं  
वीडुजम्भम्। दश स्वसारो अश्रुवः समीचीः। पुमांसं जातमभि सश्रभन्ताम्।  
प्रजापतेस्त्वा प्राणेनाभि प्राणिमि। पूष्णः पोषेण मह्यम्। दीर्घायुत्वाय शतशारदाय।  
शतश्रु शरद्ध्य आयुषे वर्चसे॥१९॥

जीवात्वै पुण्याय। अहं त्वदस्मि मदसि त्वमेतत्। ममासि योनिस्तव  
योनिरस्मि। ममैव सन्वहं हव्यान्यग्ने। पुत्रः पित्रे लोककृज्जातवेदः। प्राणे  
त्वाऽमृतमादधामि। अन्नादमन्नाद्याय। गोप्तारं गुप्त्यै। सुगारुहपत्यो विदहन्नरातीः।  
उषसः श्रेयसीः श्रेयसीर्दधत्॥२०॥

अग्ने॑ स॒पत्ना॑ꣳ अ॒प॒ बाध॑मानः। रा॒यस्पोष॑मिष॒मूर्ज॑म॒स्मासु॑ धेहि। इ॒मा उ॒  
मा॒मुप॑तिष्ठन्तु रा॒यः। आ॒भिः प्र॒जाभि॑रि॒ह संव॑सेय। इ॒हो इ॒डां तिष्ठ॑तु वि॒श्वरू॑पी।  
म॒ध्ये वसो॑र्दी॒दिहि जा॑तवेदः। ओज॑से ब॒लाय॑ त्वोद्य॑च्छे। वृष॑णे शुष्मा॒यायु॑षे वर्च॑से।  
स॒प॒त्न॒तूर॑सि वृ॒त्र॒तूः। यस्ते॑ दे॒वेषु॑ म॒हिमा सु॑व॒र्गः॥२१॥

यस्त॑ आ॒त्मा प॒शुषु॑ प्रवि॑ष्टः। पु॒ष्टि॒र्या ते॑ म॒नुष्ये॑षु पप्र॒थे। तया॑ नो अग्ने  
जु॒षमा॑ण॒ एहि॑। दि॒वः पृ॒थि॒व्याः पर्य॑न्तरि॒क्षात्। वाता॑त्प॒शुभ्यो॒ अ॒ध्योष॑धी॒भ्यः। यत्र॑  
यत्र जा॑तवेदः सम्ब॒भूथ॑। ततो॑ नो अग्ने जु॒षमा॑ण॒ एहि॑। प्राची॑मनु॒ प्रदि॑शं प्रेहि॑  
वि॒द्वान्। अ॒ग्नेर॑ग्ने पु॒रो अ॑ग्नि॒र्भवे॑ह। वि॒श्वा आ॑शा दी॒द्यानो॒ वि भा॑हि॥२२॥

ऊ॒र्जं नो॑ धेहि द्वि॒पदे॒ चतु॑ष्पदे। अ॒न्व॒ग्निरु॒षसा॑म॒ग्रम॑ख्यत्। अ॒न्वहा॑नि प्रथ॒मो  
जा॑तवे॒दाः। अनु॑ सूर्य॒स्य पुरु॑त्रा च र॒श्मीन्। अनु॑ द्यावा॑पृथि॒वी आ॑त॒तान॑। वि॒क्रम॑स्व  
म॒हाꣳ अ॑सि। वे॒दिष॑न्मानु॒षेभ्यः॑। त्रि॒षु लो॒केषु॑ जागृ॒हि। यद्वि॑दं दि॒वो यद्व॑दः  
पृथि॒व्याः। सं॒वि॒दा॒ने रोद॑सी सं बभू॒वतुः॥२३॥

तयोः पृष्ठे सीदतु जातवेदाः। शम्भूः प्रजाभ्यस्तनुवै स्योनः। प्राणं त्वाऽमृत  
 आ दधामि। अन्नादमन्नाद्याय। गोप्तारं गुप्त्यै। यत्ते शुक्रं शुक्रं वर्चः शुक्रा तनूः।  
 शुक्रं ज्योतिरजस्रम्। तेन मे दीदिहि तेन त्वाऽऽदधे। अग्निनाऽग्ने ब्रह्मणा। आनशे  
 व्यानशे सर्वमायुर्व्यानशे॥२४॥

नर्यं प्रजां मे गोपाय। अमृतत्वाय जीवसे। जातां जनिष्यमाणां च। अमृते  
 सत्ये प्रतिष्ठिताम्। अथर्व पितुं मे गोपाय। रसमन्नमिहायुषे। अदब्धायोऽशीततनो।  
 अविषन्नः पितुं कृणु। शङ्स्यं पशून्मे गोपाय। द्विपादो ये चतुष्पदः॥२५॥

अष्टाशफाश्च य इहाग्ने। ये चैकशफा आशुगाः। सप्रथ सभां मे गोपाय। ये च  
 सभ्याः सभासदः। तानिन्द्रियावतः कुरु। सर्वमायुरुपासताम्। अहे बुध्निय मन्त्रं  
 मे गोपाय। यमृषयस्त्रैविदा विदुः। ऋचः सामानि यजूंषि। सा हि श्रीरमृता  
 सताम्॥२६॥

चतुः शिखण्डा युवतिः सुपेशाः। घृतप्रतीका भुवनस्य मध्ये। मर्मज्यमाना



मह॑ते सौभ॑गाय। मह्यं॑ धु॒क्ष्व॒ यज॑मानाय॒ कामान्। इ॒हैव॑ सन्तत्रं॑ सु॒तो वो॑  
अ॒ग्नयः॑। प्रा॒णेन॑ वा॒चा मन॑सा बिभ॑र्मि। ति॒रो मा॒ सन्त॑मायु॒र्मा प्र॑हासीत्।  
ज्योति॑षा वो वैश्वान॒रेणोप॑तिष्ठे। प॒ञ्चधाऽग्नी॑न्व्य॒क्रामत्। वि॒राट्त्सृ॑ष्टा प्र॒जाप॑तेः।  
ऊ॒र्ध्वाऽऽरो॑हद्रोहिणी॑। योनि॑र॒ग्नेः प्र॑ति॒ष्ठितिः॑॥२७॥ वि॒शन्तु॒ नः पुरु॑चीर्वि॒धम॒ नि॒धाय॒ यत्तेऽप्र॑दाहाय॒ बृह॑त्याँ ब्र॒ह्मणा॑  
दुव॑स्यत वि॒श्ववार॑ इ॒ममृ॑जते पुरो॑गां प्र॒जंनयि॑ष्यथो॒ जनि॑ष्यते॒ऽस्मे मम॑ महि॒म्ना वर्च॑से दध॑त्सुव॒र्गो भा॑हि सम्ब॒भूवतु॑रायु॒र्व्यान॑शे चतु॑ष्पदः सु॒तां प्र॒जाप॑तेद्वे च॥[१]

न॒वैतान्य॑हा॒नि भव॑न्ति। न॒व॒ वै सु॑व॒र्गा लो॒काः। यदे॒तान्य॑हा॒न्युप॑यन्ति। न॒वस्वे॒व  
तत्सु॑व॒र्गेषु॑ लो॒केषु॑ सु॒त्रिणः॑ प्र॒ति॒तिष्ठ॑न्तो यन्ति। अ॒ग्नि॒ष्टोमाः॑ परः॑ सा॒मानः॑ कार्या॑  
इत्या॑हुः। अ॒ग्नि॒ष्टोम॑सं॒मितः॑ सु॒वर्गो॑ लो॒क इति॑। द्वा॒द॒शाग्नि॑ष्टोमस्य॑ स्तो॒त्राणि॑।  
द्वा॒द॒श मा॑साः॒ संव॑त्सरः॒ तत्तन्न॑ सू॒क्ष्मम्। उ॒क्थ्या॑ ए॒व स॑प्तद॒शाः परः॑ सा॒मानः॑  
कार्याः॑॥२८॥

प॒शवो॒ वा उ॒क्थानि॑। प॒शूना॑मव॒रुद्धौ॑। वि॒श्वजि॑द॒भिजि॑ता॒वग्नि॑ष्टोमौ। उ॒क्थ्याः॑  
स॑प्तद॒शाः परः॑ सा॒मानः॑। ते स॒ंस्तु॑ता वि॒राज॑म॒भि सम्प॑द्यन्ते। द्वे च॒र्चाव॑तिरि॒च्येते।  
ए॒कया॒ गौर॑तिरि॒क्तः। ए॒कया॒ऽऽयु॑रू॒नः। सु॒वर्गो॑ वै लो॒को ज्योतिः॑। ऊ॒र्ग्वि॒राट्॥२९॥

सुवर्गमेव तेन लोकमभि जयन्ति। यत्परं राथन्तरम्। तत्प्रथमेऽहंकार्यम्।  
बृहद्वितीयै। वैरूपं तृतीयै। वैराजं चतुर्थै। शाक्रं पञ्चमे। रैवतं षष्ठे। तदु पृष्ठेभ्यो  
नयन्ति। सन्तनय एते ग्रहा गृह्यन्ते॥३०॥

अतिग्राह्याः परः सामसु। इमानेवैतैर्लोकान्त्सन्तन्वन्ति। मिथुना एते ग्रहा  
गृह्यन्ते। अतिग्राह्याः परः सामसु। मिथुनमेव तैर्यजमाना अवरुन्धते। बृहत्पृष्ठं  
भवति। बृहद्वै सुवर्गो लोकः। बृहतैव सुवर्गं लोकं यन्ति। त्रयस्त्रिंशि नाम सामं।  
माध्यं दिने पवमाने भवति॥३१॥

त्रयस्त्रिंशद्वै देवताः। देवता एवावरुन्धते। ये वा इतः पराश्च  
संवत्सरमुपयन्ति। न हैनं ते स्वस्ति समश्नुवते। अथ येऽमुतोऽर्वाश्चमुपयन्ति।  
ते हैनं स्वस्ति समश्नुवते। एतद्वा अमुतोऽर्वाश्चमुपयन्ति। यदेवम्। यो ह खलु  
वाव प्रजापतिः। स उवेवेन्द्रः। तदु देवेभ्यो नयन्ति॥३२॥

च॥

कार्या विराड्गृह्यन्ते पवमाने भवतीन्द्र एकं

[२]

सन्ततिर्वा एते ग्रहाः। यत्परः सामानः। विष्वान्दिवाकीर्त्यम्। यथा शालायै

पक्ष॑सी। ए॒व॒ सं॒वत्स॒रस्य॑ पक्ष॑सी। यदे॒तेन॑ गृ॒ह्ये॒रन्। विषू॑ची संवत्स॒रस्य॑ पक्ष॑सी  
व्य॒व॒स्र॒से॒या॒ता॒म्। आ॒र्ति॒मा॒र्च्छे॒युः। यदे॒ते गृ॒ह्यन्ते॑। यथा॒ शा॒ला॒यै पक्ष॑सी मध्य॒मं  
व॒॒श॒म॒भि॒ सं॒मा॒यच्छ॑ति॥ ३३॥

ए॒व॒ सं॒वत्स॒रस्य॑ पक्ष॑सी दि॒वाकी॒र्त्य॑म॒भि॒ सं॒ त॑न्वन्ति। ना॒र्ति॒मा॒र्च्छ॑न्ति।  
ए॒क॒वि॒॒श॒म॒ह॑र्भवति। शु॒क्रा॒ग्रा॒ ग्र॒हा॑ गृ॒ह्यन्ते। प्रत्यु॑त्त॒ब्धे॒ स॒य॒त्वा॒य॑। सौ॒र्य॑ ए॒तद॑हः  
प॒शु॒रा॒ल॑भ्यते। सौ॒र्यो॑ऽति॒ग्रा॒ह्यो॑ गृ॒ह्यते। अ॒ह॑रे॒व रू॒पेण॑ स॒म॑र्धयन्ति। अथो॒ अ॒हं  
ए॒वैष॑ ब॒लि॒र्ह्य॑ते। स॒प्तै॒तद॑ह॒रति॒ग्रा॒ह्या॑ गृ॒ह्यन्ते॑॥ ३४॥

स॒प्त॒ वै शी॑र्ष॒ण्याः॑ प्रा॒णाः। अ॒सा॒वा॒दि॒त्यः शि॒रः॑ प्र॒जा॒ना॑म्। शी॒र्ष॒न्ने॒व प्र॒जा॒ना॑  
प्रा॒णान्द॑धाति। तस्मा॑त्स॒प्त शी॑र्ष॒न्प्रा॒णाः। इन्द्रो॑ वृ॒त्र॒ ह॒त्वा। अ॒सु॒रा॒न्प॒रा॒भाव्य॑। स  
इ॒माँल्लो॒कान॑भ्य॒जय॑त्। तस्या॒सौ लो॒कोऽन॑भिजित आसीत्। तं वि॒श्वक॑र्मा भू॒त्वा-  
ऽभ्य॑जयत्। यद्वै॑श्वक॒र्म॒णो गृ॒ह्यते॑॥ ३५॥

सु॒व॒र्गस्य॑ लो॒कस्या॑भिजित्यै। प्र॒ वा ए॒ते॑ऽस्मा॒ल्लो॒काच्च॑वन्ते। ये वै॑श्वक॒र्म॒णं

गृह्णते। आदित्यः श्वो गृह्यते। इयं वा अदितिः। अस्यामेव प्रति तिष्ठन्ति। अन्योन्यो गृह्यते। विश्वान्येवान्येन कर्माणि कुर्वाणा यन्ति। अस्यामन्येन प्रति तिष्ठन्ति। तावाऽपरार्धात्संवत्सरस्यान्योन्यो गृह्यते। तावुभौ सह महाव्रते गृह्यते। यज्ञस्यैवान्तं गत्वा। उभयोर्लोकयोः प्रति तिष्ठन्ति। अर्क्यमुक्थं भवति। अन्नाद्यस्यावरुद्धौ॥ ३६॥ समायच्छत्यतिग्राह्यां गृह्यन्ते गृह्यते संवत्सरस्यान्योन्यो गृह्यते पञ्च च॥ [३]

एकविंश एष भवति। एतेन वै देवा एकविंशेन। आदित्यमित उत्तमं सुवर्गं लोकमारोहयन्। स वा एष इत एकविंशः। तस्य दशावस्तादहानि। दशं प्रस्तात्। स वा एष विराज्युभयतः प्रतिष्ठितः। विराजि हि वा एष उभयतः प्रतिष्ठितः। तस्मादन्तरेमौ लोकौ यन्। सर्वेषु सुवर्गेषु लोकेष्वभितपन्नेति॥ ३७॥

देवा वा आदित्यस्य सुवर्गस्य लोकस्य। परांचोऽतिपादादबिभयुः। तं छन्दोभिरदृहं धृत्यै। देवा वा आदित्यस्य सुवर्गस्य लोकस्य। अवांचोऽवपादादबिभयुः। तं पञ्चमीं रश्मिभिरुदवयन्। तस्मादेकविंशेऽहन्यश्च

दिवाकीर्त्यानि क्रियन्ते। रश्मयो वै दिवाकीर्त्यानि। ये गायत्रे। ते गायत्रीषूत्तरयोः  
पवमानयोः॥ ३८॥

महादिवाकीर्त्यं होतुः पृष्ठम्। विकर्णं ब्रह्मसामम्। भासोऽग्निष्टोमः। अथैतानि  
पराणि। परैर्वै देवा आदित्यं सुवर्गं लोकमपारयन्। यदपारयन्। तत्पराणां  
परत्वम्। पारयन्त्येनं पराणि। य एवं वेद। अथैतानि स्पराणि। स्परैर्वै देवा  
आदित्यं सुवर्गं लोकमस्परयन्। यदस्परयन्। तत्स्पराणां स्परत्वम्।  
स्परयन्त्येनं स्पराणि। य एवं वेद॥ ३९॥ एति पवमानयोः स्पराणि पञ्च च॥ [४]

अप्रतिष्ठां वा एते गच्छन्ति। येषां संवत्सरेऽनातेऽथ। एकादशिन्याप्यते।  
वैष्णवं वामनमालभन्ते। यज्ञो वै विष्णुः। यज्ञमेवालभन्ते प्रतिष्ठित्यै।  
ऐन्द्राग्नमालभन्ते। इन्द्राग्नी वै देवानामयातयामानौ। ये एव देवते अयातयाम्नी।  
ते एवाऽऽलभन्ते॥ ४०॥

वैश्वदेवमालभन्ते। देवता एवावरुन्धते। द्यावापृथिव्यां धेनुमालभन्ते।  
द्यावापृथिव्योरेव प्रति तिष्ठन्ति। वायव्यं वत्समालभन्ते। वायुरेवैभ्यो यथा-

ऽऽयत॒नाद्दे॒वता॒ अव॑ रुन्धे। आ॒दि॒त्याम॒विं व॒शामा॑ल॒भन्ते। इ॒यं वा अ॒दि॒तिः।  
अ॒स्यामे॒व प्र॒तिं ति॑ष्ठन्ति। मै॒त्राव॒रु॒णीमा॑ल॒भन्ते॥४१॥

मि॒त्रेणै॒व य॒ज्ञस्य॒ स्वि॑ष्ट॒ः श॒मय॑न्ति। वरु॑णेन दुरि॑ष्टम्। प्रा॒जाप॒त्यं तू॒परं म॑हाव्र॒त  
आ॑ल॒भन्ते। प्रा॒जाप॒त्योऽति॑ग्रा॒ह्यो गृ॑ह्यते। अह॑रेव रू॒पेण॒ सम॑र्धयन्ति। अथो अ॒हं  
ए॒वैष ब॒लिर्ह्रि॑यते। आ॒ग्नेय॑मा ल॒भन्ते॒ प्रति॑ प्र॒ज्ञा॒त्यै। अ॒ज॒पे॒त्वान् वा ए॒ते पूर्वे॑र्मा॒सैर॑व  
रुन्ध॑ते। यदे॒ते गु॒व्याः प॒शव॑ आल॒भ्यन्ते॑। उ॒भये॑षां प॒शूना॑मव॒रुद्धौ॥४२॥

यदति॑रि॒क्तामे॒काद॒शिनी॑मा॒लभै॑रन्। अप्रि॑यं भ्रातृ॒व्यम॒भ्यति॑रिच्येत। यद्वौ द्वौ प॒शू  
स॒मस्ये॑युः। कनी॑य॒ आयुः॑ कुर्वी॒रन्। यदे॒ते ब्रा॒ह्म॒णव॑न्तः प॒शव॑ आल॒भ्यन्ते॑। नाप्रि॑यं  
भ्रातृ॒व्यम॒भ्यति॑रिच्यंते। न कनी॑य॒ आयुः॑ कुर्वते॥४३॥ ते ए॒वाल॑भन्ते मै॒त्राव॒रु॒णीमा॑ल॒भन्तेऽव॑रुद्धौ सप्त च॥[५]

प्र॒जाप॑तिः प्र॒जाः सृ॒ष्ट्वा वृ॒त्तोऽश॑यत्। तं दे॒वा भू॒ताना॑ः र॒सं तेजः॑ स॒म्भृत्य॑।  
तेनै॒नम॑भिष॒ज्यन्। म॒हान॑वव॒र्तीति॑। तन्म॑हाव्र॒तस्य॑ म॒हाव्र॑त॒त्वम्। म॒हद्व्र॑तमि॒ति।  
तन्म॑हाव्र॒तस्य॑ म॒हाव्र॑त॒त्वम्। म॒हतो॑ व्र॒तमि॑ति। तन्म॑हाव्र॒तस्य॑ म॒हाव्र॑त॒त्वम्।  
प॒ञ्चवि॑ंशः स्तोमो॑ भवति॥४४॥

चतुर्विंशत्यर्धमासः संवत्सरः। यद्वा एतस्मिन्संवत्सरेऽधि प्राजायत। तदन्नं पञ्चविंशमभवत्। मध्यतः क्रियते। मध्यतो ह्यन्नमशितं धिनोति। अथो मध्यत एव प्रजानामूर्ध्नीयते। अथ यद्वा इदमन्ततः क्रियते। तस्मादुदन्ते प्रजाः समेधन्ते। अन्ततः क्रियते प्रजननायैव। त्रिवृच्छिरो भवति॥४५॥

त्रेधाविहितः हि शिरः। लोमं छुवीरस्थि। परांचा स्तुवन्ति। तस्मात्तत्सदृगेव। न मेद्यतोऽनु मेद्यति। न कृश्यतोऽनु कृश्यति। पञ्चदशोऽन्यः पक्षो भवति। सप्तदशोऽन्यः। तस्माद्वयाङ्स्यन्यतरमर्धमभि पर्यावर्तन्ते। अन्यतरतो हि तद्वरीयः क्रियते॥४६॥

पञ्चविंश आत्मा भवति। तस्मान्मध्यतः पशवो वरिष्ठाः। एकविंशं पुच्छम्। द्विपदासु स्तुवन्ति प्रतिष्ठित्यै। सर्वेण सह स्तुवन्ति। सर्वेण ह्यात्मनाऽऽत्मन्वी। सहोत्पतन्ति। एकैकामुच्छिषन्ति। आत्मन् ह्यङ्गानि बद्धानि। न वा एतेन सर्वः पुरुषः॥४७॥

यदित इतो लोमानि दतो नखान्। परिमादः क्रियन्ते। तान्येव तेन प्रत्युप्यन्ते।  
औदुम्बरस्तल्पो भवति। ऊर्ग्व अन्नमुदुम्बरः। ऊर्ज एवान्नाद्यस्यावरुद्धौ। यस्य  
तल्पसद्यमनभिजितः स्यात्। स देवानां साम्यक्षे। तल्पसद्यमभिजयानीति  
तल्पमारुह्योद्गायेत्। तल्पसद्यमेवाभि जयति॥४८॥

यस्य तल्पसद्यमभिजितः स्यात्। स देवानां साम्यक्षे। तल्पसद्यं मा  
पराजेषीति तल्पमारुह्योद्गायेत्। न तल्पसद्यं पराजयते। प्लेङ्खे शंसति। महो  
वै प्लेङ्खः। महस एवान्नाद्यस्यावरुद्धौ। देवासुराः संयत्ता आसन्। त आदित्ये  
व्यायच्छन्त। तं देवाः समजयन्॥४९॥

ब्राह्मणश्च शूद्रश्च चर्मकर्ते व्यायच्छेते। दैव्यो वै वर्णो ब्राह्मणः। असुर्यः  
शूद्रः। इमेऽराथ्सुरिमे सुभूतमक्रन्नित्यन्यतरो ब्रूयात्। इम उद्वासीकारिणं  
इमे दुर्भूतमक्रन्नित्यन्यतरः। यदेवैषां सुकृतं या राद्धिः। तदन्यतरोऽभि  
श्रीणाति। यदेवैषां दुष्कृतं याऽराद्धिः। तदन्यतरोऽपि हन्ति। ब्राह्मणः सं जयति।  
अमुमेवाऽऽदित्यं भ्रातृव्यस्य संविन्दन्ते॥५०॥ भवति भवति क्रियते पुरुषो जयत्यजयन्नयत्येकं च॥—[६]



उद्धन्यमानं नवैतानि सन्ततिरेकविंश एषोऽप्रतिष्ठां प्रजापतिर्वृत्तः षट्॥६॥  
 उद्धन्यमानं शोचिष्केशोऽग्नें सुपत्नानतिग्राह्यां वैश्वदेवमालभन्ते पश्चात्॥७॥  
 उद्धन्यमानं संविन्दन्ते॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके द्वितीयः प्रपाठकः समाप्तः॥

॥तृतीयः प्रश्नः॥

॥तैत्तिरीयब्राह्मणे प्रथमाष्टके तृतीयः प्रपाठकः॥

दे॒वा॒सु॒राः संय॑त्ता आसन्। ते दे॒वा वि॑ज॒यमु॑प॒यन्तः॑। अ॒ग्नी॒षोम॑योस्तेज॒स्विनी॑स्त॒नूः  
सन्त्य॑दधत। इ॒दमु॑ नो भविष्यति। यदि॑ नो जे॒ष्यन्ती॑ति। तेना॒ग्नी॒षोमा॒वपा॑क्रामताम्।  
ते दे॒वा वि॒जित्य॑। अ॒ग्नी॒षोमा॒वन्वै॑च्छन्। तेऽग्नि॑मन्व॒विन्द॑न्। तेषू॒ष॒सन्न॑म्। तस्य॒  
विभ॑क्तीभिस्तेज॒स्विनी॑स्त॒नूरवा॑रुन्धत॥१॥

ते सोम॑मन्व॒विन्द॑न्। तम॑घ्नन्। तस्य॑ यथाऽभि॒ज्ञाय॑ त॒नूर्व्य॑गृह्णत। ते ग्रहा॑ अभवन्।  
तद्ग्रहा॑णां ग्रह॒त्वम्। यस्यै॒वं वि॒दुषो॑ ग्रहा॑ गृह्यन्ते। तस्य॒ त्वे॒व गृ॑ही॒ताः। नाना॑ऽऽग्नेयं  
पुनरा॒धेये॑ कुर्यात्। यदना॑ग्नेयं पुनरा॒धेये॑ कुर्यात्। व्यृ॒द्धमे॒व तत्॥२॥

अना॑ग्नेयं वा ए॒तत्क्रि॑यते। यत्स॒मिध॒स्तनू॑नपा॒तमि॒डो ब॒र्हिर्य॑जति।  
उ॒भावा॑ग्नेयावाज्य॑भागौ स्याताम्। अना॑ज्यभागौ भवतु॒ इत्या॑हुः। यदु॒भावा॑ग्नेयाव॒न्वश्चा॑पि  
अ॒ग्नये॒ पव॑माना॒योत्तरः॑ स्यात्। यत्पव॑मानाय। तेनाऽऽज्य॑भागः। तेन॑ सौ॒म्यः।

बुधन्वत्याग्नेयस्याऽऽज्यभागस्य पुरोऽनुवाक्या भवति॥३॥

यथा सुप्तं बोधयति। तादृगेव तत्। अग्निन्यक्ताः पत्नीसंयाजानामृचः स्युः। तेनोऽऽग्नेयः सर्वं भवति। एकधा तेजस्विनीं देवतामुपैतीत्याहुः। सैनमीश्वरा प्रदह इति। नेति ब्रूयात्। प्रजननं वा अग्निः। प्रजननमेवोपैतीति। कृतयजुः सम्भृतसम्भार इत्याहुः॥४॥

न सम्भृत्याः सम्भाराः। न यजुः कार्यमिति। अथो खलु। सम्भृत्या एव सम्भाराः। कार्यं यजुः। पुनराधेयस्य समृद्धौ। तेनोपांशु प्रचरति। एष्यं इव वा एषः। यत्पुनराधेयः। यथोपांशु नष्टमिच्छति॥५॥

तादृगेव तत्। उच्चैः स्विष्टकृतमुत्सृजति। यथा नष्टं वित्त्वा प्राहायमिति। तादृगेव तत्। एकधा तेजस्विनीं देवतामुपैतीत्याहुः। सैनमीश्वरा प्रदह इति। तत्तथा नोपैति। प्रयाजानूयाजेष्वेव विभक्तीः कुर्यात्। यथापूर्वमाज्यभागौ स्याताम्। एवं पत्नीसंयाजाः॥६॥

तद्वैश्वानरवत्प्रजननवत्तरमुपैतीति। तदाहुः। व्यृद्धं वा एतत्। अनाग्नेयं वा एतत्क्रियत् इति। नेति ब्रूयात्। अग्निं प्रथमं विभक्तीनां यजति। अग्निमुत्तमं पत्नीसंयाजानाम्। तेनाऽऽग्नेयम्। तेन समृद्धं क्रियत् इति॥७॥ अरुन्धतैव तद्वद्वति सम्भृतसम्भार इत्याहुर्च्छति पत्नीसंयाजा नवं च॥ [१]

देवा वै यथादर्शं यज्ञानाहरन्त। योऽग्निष्टोमम्। य उक्थ्यम्। योऽतिरात्रम्। ते सहैव सर्वे वाजपेयमपश्यन्। ते। अन्योऽन्यस्मै नातिष्ठन्त। अहमनेन यजा इति। तेऽब्रुवन्। आजिमस्य धावामेति॥८॥

तस्मिन्नाजिमधावन्। तं बृहस्पतिरुदजयत्। तेनायजत। स स्वाराज्यमगच्छत्। तमिन्द्रोऽब्रवीत्। मामनेन याजयेति। तेनेन्द्रमयाजयत्। सोऽग्रं देवतानां पर्येत। अगच्छत्स्वाराज्यम्। अतिष्ठन्तास्मै ज्यैष्ठ्याय॥९॥

य एवं विद्वान् वाजपेयेन यजते। गच्छति स्वाराज्यम्। अग्रं समानानां पर्येति। तिष्ठन्तेऽस्मै ज्यैष्ठ्याय। स वा एष ब्राह्मणस्य चैव राजन्यस्य च यज्ञः। तं वा एतं वाजपेय इत्याहुः। वाजाप्यो वा एषः। वाजं ह्येतेन देवा ऐप्सन्।

सोमो वै वाजपेयः। यो वै सोमं वाजपेयं वेद॥१०॥

वाज्येवैनं पीत्वा भवति। आऽस्य वाजी जायते। अन्नं वै वाजपेयः। य एवं वेद। अत्यन्नम्। आऽस्यान्नादो जायते। ब्रह्म वै वाजपेयः। य एवं वेद। अत्ति ब्रह्मणाऽन्नम्। आऽस्य ब्रह्मा जायते॥११॥

वाग्वै वाजस्य प्रसवः। य एवं वेद। करोति वाचा वीर्यम्। ऐनं वाचा गच्छति। अपिवर्ती वाचं वदति। प्रजापतिर्देवेभ्यो यज्ञान्व्यादिशत्। स आत्मन्वाजपेयमधत्त। तं देवा अब्रुवन्। एष वाव यज्ञः। यद्वाजपेयः॥१२॥

अप्येव नोऽत्रास्त्विति। तेभ्य एता उज्जितीः प्रायच्छत्। ता वा एता उज्जितयो व्याख्यायन्ते। यज्ञस्य सर्वत्वाय। देवतानामनिर्भागाय। देवा वै ब्रह्मणश्चान्नस्य च शमलमपाघ्नन्। यद्ब्रह्मणः शमलमासीत्। सा गाथा नाराशस्यभवत्। यदन्नस्य। सा सुरा॥१३॥

तस्माद्वायतश्च मत्तस्य च न प्रतिगृह्यम्। यत्प्रतिगृहीयात्। शमलं प्रतिगृहीयात्।

सर्वा वा ए॒तस्य॒ वाचोऽव॑रुद्धाः। यो वा॑जपेयया॒जी। या पृ॑थिव्यां याऽग्नौ या  
 र॑थन्तरे। याऽन्तरि॑क्षे या वा॒यौ या वा॑मदे॒व्ये। या दि॒वि याऽऽदि॑त्ये या बृ॒हति।  
 याऽप्सु यौष॑धीषु या वन॒स्पति॑षु। तस्मा॑द्वाजपेयया॒ज्यात्वि॑जीनः। सर्वा ह्य॑स्य  
 वाचोऽव॑रुद्धाः॥१४॥ धा॒वामेति॑ ज्येष्ठा॒य वेदं॑ ब्र॒ह्मा जा॑यते वाज॒पेयः॑ सुराऽऽत्वि॑जीन् एकं च॥\_\_\_\_\_ [२]

दे॒वा वै यद॒न्यैर्ग्र॑हैर्य॒ज्ञस्य॒ नावा॑रुन्धत। तद॑ति॒ग्राह्यै॑रति॒गृह्या॑वा॒रुन्धत।  
 तद॑ति॒ग्राह्या॑णामति॒ग्राह्य॑त्वम्। यद॑ति॒ग्राह्या॑ गृह्यन्ते॑। यदे॒वान्यै॑र्ग्र॒हैर्य॒ज्ञस्य॒ नाव॑  
 रुन्धे। तदे॒व तैर॑ति॒गृह्या॑व॒ रुन्धे। प॒ञ्च गृह्य॑न्ते। पाङ्क्तौ॑ य॒ज्ञः। यावा॑ने॒व य॒ज्ञः।  
 तमा॒प्त्वाऽव॑ रुन्धे॥१५॥

सर्व॑ ऐ॒न्द्रा भ॑वन्ति। ए॒क॒धैव॑ यज॑मान इन्द्रि॒यं द॑धति। स॒प्तद॑श प्राजाप॒त्या ग्र॑हा  
 गृह्यन्ते। स॒प्तद॑शः प्र॒जाप॑तिः। प्र॒जाप॑ते॒राप्त्यै॑। ए॒क॒य॒र्चा गृ॑ह्णाति। ए॒क॒धैव॑ यज॑माने  
 वी॒र्यं॑ दधाति। सो॒म॒ग्र॒हाश्च॑ सुरा॒ग्र॒हाश्च॑ गृह्णाति। ए॒तद्वै दे॒वानां॑ प॒र॒म॒म॒न्नम्॑।  
 यथ्सोमः॥१६॥

ए॒तन्म॑नु॒ष्या॑णाम्। य॒थ्सुरा॑। प॒र॒मे॒णै॒वास्मा॑ अ॒न्नाद्ये॑नाव॒रम॒न्नाद्य॑मव॒ रुन्धे॑।  
 सो॒म॒ग्र॒हा॒न्गृ॒ह्णा॒ति। ब्र॒ह्म॑णो॒ वा ए॒तत्ते॑जः। य॒थ्सोमः॑। ब्र॒ह्म॑ण ए॒व ते॑जसा॒ तेजो॑  
 यज॑माने दधाति। सु॒रा॒ग्र॒हा॒न्गृ॒ह्णा॒ति। अन्न॑स्य॒ वा ए॒तच्छ॑म॒लम्। य॒थ्सुरा॑॥१७॥

अन्न॑स्यै॒व श॑म॒लेन॒ शम॑लं॒ यज॑मानादप॑हन्ति। सो॒म॒ग्र॒हाः॑श्च॒ सु॒रा॒ग्र॒हाः॑श्च  
 गृ॒ह्णा॒ति। पु॒मा॒न् वै सोमः॑। स्त्री॒ सुरा॑। तन्मि॑थुनम्। मि॒थु॒नमे॒वास्य॑ तद्य॒ज्ञे  
 क॑रोति प्र॒जन॑नाय। आ॒त्मान॑मे॒व सोम॑ग्र॒हैः स्पृ॑णोति। जा॒याः॑ सु॒रा॒ग्र॒हैः।  
 तस्मा॑द्वाज॒पेय॑या॒ज्यमु॑ष्मि॒ल्लो॒के स्त्रिय॑ः स॒म्भ॑वति। वा॒ज॒पेया॑भिजि॒तः॑ ह्य॒स्य॥१८॥

पूर्वे॑ सोम॒ग्र॒हा गृ॑ह्यन्ते। अप॑रे सु॒रा॒ग्र॒हाः। पु॒रोऽक्षः॑ सोम॒ग्र॒हान्त्सा॑दयति।  
 प॒श्चा॒दक्षः॑ सु॒रा॒ग्र॒हान्। पा॒प॒व॒स्य॒सस्य॑ विधृ॒त्यै। ए॒ष वै यज॑मानः। य॒थ्सोमः॑। अन्नः॑  
 सुरा॑। सो॒म॒ग्र॒हाः॑श्च॒ सु॒रा॒ग्र॒हाः॑श्च॒ व्यति॑षजति। अ॒न्नाद्ये॑नै॒वैनं॑ व्यति॑षजति॥१९॥

स॒म्पृ॒चः स्थ॒ सं मा॑ भ॒द्रेण॑ पृ॒ङ्गेत्या॑ह। अन्नं॑ वै भ॒द्रम्। अ॒न्नाद्ये॑नै॒वैनः॑ सः॑ सृ॒जति॑।  
 अन्न॑स्य॒ वा ए॒तच्छ॑म॒लम्। य॒थ्सुरा॑। पा॒प्मे॒व ख॒लु वै श॑म॒लम्। पा॒प्म॒ना वा

ए॒नमे॒तच्छ॒म॒लेन॒ व्य॒तिष॑जति। य॒त्सो॑म॒ग्रहा॑ः॒श्च॑ सु॒राग्र॑हाः॒श्च॑ व्य॒तिष॑जति। वि॒पृचः॑  
स्थ॒ वि मां पा॒प्मना॑ पृ॒ङ्केत्या॑ह। पा॒प्मनै॒वैन॒ः श॒म॒लेन॒ व्याव॑र्तयति॥२०॥

तस्मा॑द्वाजपेययाजी पूतो मेध्यो दक्षिण्यः। प्राडु॑द्ववति सोमग्रहैः। अ॒मुमे॒व  
तैर्लो॒कम॒भिज॑यति। प्र॒त्यङ्ख॑सुराग्रहैः। इ॒ममे॒व तैर्लो॒कम॒भिज॑यति। प्र॒तिष्ठ॑न्ति  
सोमग्रहैः। याव॑दे॒व स॒त्यम्। तेन॑ सूयते। वा॒ज॒सृ॒द्ध्यः सु॒राग्र॑हान् ह॑रन्ति। अ॒नृते॒नैव॑  
वि॒शः स॑सृ॒जति। हि॒र॒ण्य॒पात्रं॑ म॒धोः पूर्णं॑ द॑दाति। म॒ध॒व्योऽसा॒नीति॑। ए॒क॒धा  
ब्र॒ह्मण॑ उप॑ हरति। ए॒क॒धैव॑ यज॑मान् आयु॒स्तेजो॑ दधाति॥२१॥

आ॒त्वाऽव॑ रु॒न्धे सोमः॑ श॒मलं॑ य॒त्सुरा॑  
ह्य॒स्येनं॑ व्य॒तिष॑जति व्याव॑र्तयति सृजति च॒त्वारि॑ च॥

[३]

ब्र॒ह्मवा॑दिनो॑ वदन्ति। ना॒ग्नि॒ष्टोमो॑ नोक्थ्यः। न षोड॒शी नाति॑रात्रः। अथ॒  
कस्मा॑द्वाजपेये॒ सर्वे॑ यज्ञ॒क्रतवो॑ऽव॒रुध्य॑न्त इति॑। प॒शुभि॑रिति॒ ब्रूयात्। आ॒ग्नेयं॑  
प॒शुमा॑ल॒भते। अ॒ग्नि॒ष्टोममे॒व तेना॑व॒ रुन्धे। ऐ॒न्द्रा॒ग्नेनो॑क्थ्यम्। ऐ॒न्द्रेण॑ षोड॒शिनः॑  
स्तो॒त्रम्। सा॒र॒स्वत्या॑ऽति॒रात्रम्॥२२॥

मा॒रु॒त्या बृ॑ह॒तः स्तो॒त्रम्। ए॒ताव॑न्तो॒ वै य॑ज्ञ॒क्रतवः॑। ता॒न्य॒शुभि॑रे॒वाव॑ रुन्धे।



आत्मानमेव स्पृणोत्यग्निष्टोमेन। प्राणापानावुक्थ्येन। वीर्यं षोडशिनः स्तोत्रेण।  
वाचमतिरात्रेण। प्रजां बृहतः स्तोत्रेण। इममेव लोकमभिजयत्यग्निष्टोमेन।  
अन्तरिक्षमुक्थ्येन॥ २३॥

सुवर्गं लोकं षोडशिनः स्तोत्रेण। देवयानानेव पथ आरोहत्यतिरात्रेण। नाकं  
रोहति बृहतः स्तोत्रेण। तेज एवाऽऽत्मन्धत्त आग्नेयेन पशुना। ओजो बलमैन्द्राग्नेन।  
इन्द्रियमैन्द्रेण। वाचं सारस्वत्या। उभावेव देवलोकं च मनुष्यलोकं चाभिजयति  
मारुत्या वशया। सप्तदश प्राजापत्यान्पशूनालभते। सप्तदशः प्रजापतिः॥ २४॥

प्रजापतेराष्टौ। श्यामा एकंरूपा भवन्ति। एवमिव हि प्रजापतिः समृद्धौ।  
तान्पर्यग्निकृतानुत्सृजति। मरुतो यज्ञमजिघांसन्प्रजापतेः। तेभ्य एतां मारुतीं  
वशामालभत। तयैवैनानशमयत्। मारुत्या प्रचर्य। एतान्त्संज्ञपयेत्। मरुत एव  
शमयित्वा॥ २५॥

एतैः प्रचरति। यज्ञस्याघाताय। एकधा वपा जुहोति। एकदेवत्या हि।

ए॒ते। अथो॑ ए॒क॒धै॒व यज॑माने वी॒र्यं॑ दधाति। नै॒वा॒रेण॑ स॒प्तद॑शशरावेणै॒तर॒हि  
प्रच॑रति। ए॒तत्पु॑रोडाशा॒ ह्ये॒ते। अथो॑ पशूनामे॒व छि॒द्रम॑पि॒दधा॑ति। सा॒र॒स्व॒त्यो॒त्त॒मया॑  
प्रच॑रति। वा॒ग्वै सर॑स्वती। तस्मा॑त्प्रा॒णानां॑ वा॒गु॒त्त॒मा। अथो॑ प्र॒जाप॑तावे॒व य॒ज्ञं  
प्रति॑ष्ठापयति। प्र॒जाप॑तिर॒हि वाक्। अप॑न्नदती भवति। तस्मा॑न्मनु॒ष्याः सर्वा॑ वाचं  
वद॑न्ति॥ २६॥ अतिरात्रमुन्तरिक्षमुक्थ्येन प्रजापतिः शमयित्वोत्तमया प्रचरति षट् चं॥ [४]

सा॒वि॒त्रं जु॑होति॒ कर्म॑णः कर्मणः पु॒रस्ता॑त्। कस्त॒द्वेदे॒त्याहुः॑। यद्वा॑ज॒पेय॑स्य  
पूर्वं॑ यदप॑र॒मिति॑। स॒वि॒तृप्र॑सूत ए॒व य॑थापूर्वं कर्मा॑णि करोति। स॒र्व॒ने॒स॒र्व॒ने  
जु॑होति। आ॒क्रम॑णमे॒व तथ्से॑तुं यज॑मानः कुरुते। सु॒व॒र्गस्य॑ लो॒कस्य॑ स॒म॑ष्ट्यै।  
वा॒च॒स्पति॑र्वाचं॒मुद्य॑ स्वंदाति न॒ इत्या॑ह। वा॒ग्वै दे॒वानां॑ पु॒राऽन्न॑मासीत्। वाचं॑मे॒वास्मा॑  
अन्नं॑ स्वदयति॥ २७॥

इन्द्र॑स्य॒ वज्रो॑ऽसि॒ वार्त्रघ्न॑ इति॒ रथं॑मुपाव॑हरति॒ विजि॑त्यै। वाज॑स्य॒ नु प्र॑स॒वे  
मा॒तरं॑ म॒हीमि॒त्याह॑। यच्चै॒वेयम्। यच्चा॒स्याम॑धि। तदे॒वाव॑ रुन्धे। अथो॑ तस्मि॑न्ने॒वोभ॑ये-

ऽभिषिच्यते। अ॒प्स्वन्तर॒मृतं॑म॒प्सु भेष॑जमित्यश्वान्प॒ल्पूल॑यति। अ॒प्सु वा अश्व॑स्य॒  
तृतीयं॑ प्रविष्टम्। तद॑नु॒वेन॒न्वव॑प्लवते। यद॒प्सु प॑ल्पूलयति॥२८॥

यदे॒वास्या॒प्सु प्रवि॑ष्टम्। तदे॒वाव॑ रुन्धे। ब॒हु वा अश्वो॑ऽमे॒ध्यमु॑पंगच्छति। यद॒प्सु  
प॑ल्पूलयति। मे॒ध्याने॒वैनान्॑ न्करोति। वा॒युर्वा॑ त्वा॒ मनु॑र्वा॒ त्वेत्या॑ह। ए॒ता वा ए॒तं  
दे॒वता॑ अ॒ग्रे अश्व॑मयुञ्जन्। ताभि॑रे॒वैनान्॑ युनक्ति। स॒वस्यो॑ज्जित्यै। यजु॑षा युनक्ति॒  
व्यावृ॑त्त्यै॥२९॥

अपा॑न्नपादाशुहेम॒न्निति॑ सम्म॑र्ष्टि। मे॒ध्याने॒वैनान्॑ न्करोति। अथो॒ स्तौत्ये॒वैनाना॑जि॒  
स॑रिष्यतः। वि॒ष्णुक्र॑मान्क्रमते। वि॒ष्णुरे॒व भू॒त्वेमाँ॑ल्लो॒कान॒भिजे॑यति। वैश्व॑दे॒वो वै  
रथः॑। अ॒ङ्गौ न्य॒ङ्काव॑भितो॒ रथं॑ यावित्या॑ह। या ए॒व दे॒वता॑ रथे॒ प्रवि॑ष्टाः। ताभ्य॑  
ए॒व नम॑स्करोति। आ॒त्मनो॑ऽना॒त्यै। अश॑मरथं भावु॒कोऽस्य॑ रथो॑ भवति। य ए॒वं  
वेद॑॥३०॥ स्व॒दय॑ति प॒ल्पूल॑यति व्यावृ॑त्त्या अना॑त्यै द्वे च॥\_\_\_\_\_ [५]

दे॒वस्या॒ह॑ स॒वितुः॑ प्र॒सवे॑ बृह॒स्पति॑ना वाज॒जिता॑ वाजं॑ जेष॒मित्या॑ह।  
स॒वि॒तृप्र॑सूत ए॒व ब्र॒ह्म॑णा॒ वाज॒मुज्ज॑यति। दे॒वस्या॒ह॑ स॒वितुः॑ प्र॒सवे॑ बृह॒स्पति॑ना

वाज॒जिता॒ वर्षि॑ष्ठं॒ नाक॑ꣳ रुहेय॒मित्या॑ह। सु॒वि॒तृ॒प्र॒सूत॑ ए॒व ब्र॒ह्म॑णा॒ वर्षि॑ष्ठं  
नाक॑ꣳ रो॒हति॑। चा॒त्वा॒ले रथ॑च॒क्रं नि॒र्मित॑ꣳ रो॒हति॑। अतो॒ वा अङ्गि॑रस॒ उत्त॒माः  
सु॒व॒र्गं लो॒कमा॑यन्। सा॒क्षादे॒व यज॑मानः सु॒व॒र्गं लो॒कमे॑ति। आ॒वेष्ट॑यति। वज्रो॒ वै  
रथः॑। वज्रे॒णैव॑ दि॒शोऽभि॑ज॒यति॥३१॥

वा॒जिना॑ꣳ सा॒मं गा॑यते। अ॒न्नं वै वाजः॑। अ॒न्नमे॒वाव॑ रु॒न्धे। वा॒चो व॒र्ष्म  
दे॒वेभ्योऽपा॑क्रामत्। तद्व॒न॒स्पती॒न्प्रावि॑शत्। सैषा वा॒ग्वन॒स्पति॑षु व॒दति॑। या  
दु॒न्दु॒भौ। तस्मा॑दु॒न्दुभिः॑ सर्वा॒ वाचोऽति॑व॒दति॑। दु॒न्दुभी॒न्त्समा॑घ्नन्ति। प॒र॒मा वा ए॒षा  
वाक्॑॥३२॥

या दु॒न्दु॒भौ। प॒र॒मयै॒व वा॒चाऽव॑रां॒ वाच॑म॒व रु॒न्धे। अथो॑ वा॒च ए॒व व॒र्ष्म यज॑मानो-  
ऽव॑ रु॒न्धे। इन्द्रा॑य॒ वाचं॑ व॒दते॒न्द्रं वाजं॑ जा॒पय॑तेन्द्रो वाज॑मजयि॒दित्या॑ह। एष  
वा ए॒तर्ही॒न्द्रः। यो यज॑ते। यज॑मान ए॒व वाज॑मु॒ञ्जय॑ति। स॒प्तद॑श प्र॒व्या॒धाना॒जिं  
धा॑वन्ति। स॒प्तद॑शꣳ स्तो॒त्रं भ॑वति। स॒प्तद॑शसप्तदश दी॒यन्ते॥३३॥

स॒प्तद॑शः प्र॒जाप॑तिः। प्र॒जाप॑ते॒राप्त्यै॑। अ॒र्वाऽसि॑ स॒प्तिर॑सि वा॒ज्यंसी॑त्याह। अ॒ग्नि॒र्वा

अर्वा॑। वा॒युः स॒प्तिः॑। आ॒दि॒त्यो वा॒जी। ए॒ताभि॑रे॒वास्मै॑ दे॒वता॑भिर्दे॒वर॑थं यु॒नक्ति॑।  
प्र॒ष्टि॒वा॒हि॒नं यु॒नक्ति॑। प्र॒ष्टि॒वा॒ही वै दे॑वर॒थः। दे॒वर॒थमे॒वास्मै॑ यु॒नक्ति॑॥३४॥

वा॒जिनो॑ वा॒जं धा॒वत॑ का॒ष्ठां गच्छ॑तेत्या॒ह। सु॒व॒र्गो वै लो॒कः का॒ष्ठां। सु॒व॒र्गमे॒व  
लो॒कं य॑न्ति। सु॒व॒र्गं वा ए॒ते लो॒कं य॑न्ति। य आ॒जिं धा॒वन्ति॑। प्राश्चो॑ धावन्ति। प्राडि॑व  
हि सु॒व॒र्गो लो॒कः। च॒त॒सृभि॑रनु॒ मन्त्र॑यते। च॒त्वा॒रि॒ छन्दा॑ंसि। छन्दा॑भिरे॒वैनान्॑ सु॒व॒र्गं  
लो॒कं ग॑मयति॥३५॥

प्र वा ए॒तेऽस्मा॑लो॒काच्च॑वन्ते। य आ॒जिं धा॒वन्ति॑। उदं॑ च॒ आव॑र्तन्ते। अ॒स्मादे॒व  
तेन॑ लो॒कान्न॑यन्ति। र॒थवि॑मोचनीयं जुहोति॑ प्रति॑ष्ठित्यै। आ मा॒ वाज॑स्य प्रस॒वो  
ज॑गम्यादित्या॒ह। अन्नं॑ वै वा॒जः। अन्न॑मे॒वाव॑ रुन्धे। य॒था॒लो॒कं वा ए॒त उञ्ज॑यन्ति।  
य आ॒जिं धा॒वन्ति॑॥३६॥

कृ॒ष्णलं॑ कृ॒ष्णलं॑ वा॒ज॒सृद्भ्यः॑ प्रयच्छति॑। यमे॒व ते वा॒जं लो॒कमु॑ञ्जयन्ति। तं  
प॑रि॒क्रीया॑व॒ रुन्धे॑। ए॒क॒धा ब्र॒ह्मण॑ उ॒प॑हरति। ए॒क॒धैव॑ यज॑माने वी॒र्यं॑ दधाति। दे॒वा

वा ओषधीष्व॒जिम॑युः। ता बृ॒हस्पति॑रुद॑जयत्। स नी॒वार॒न्निर॑वृणीत। तन्नी॒वारा॑णां  
नी॒वार॒त्वम्। नै॒वार॒श्चरु॑र्भवति॥ ३७ ॥

ए॒तद्वै दे॒वानां॑ प॒रम॑मन्नम्। यन्नी॒वाराः॑। प॒रमे॑णै॒वास्मा॑ अ॒न्नाद्ये॑नाव॑रम॒न्नाद्य॑मव॑  
रुन्धे। स॒प्तद॑शशरावो भवति। स॒प्तद॑शः प्र॒जाप॑तिः। प्र॒जाप॑ते॒रात्यै॑। क्षी॒रे  
भ॑वति। रुच॑मे॒वास्मि॑न्दधाति। स॒र्पिष्व॑भ॒वति मे॑ध्य॒त्वाय॑। बा॒रु॒हस्प॑त्यो वा ए॒ष  
दे॒वत॑या॥ ३८ ॥

यो वा॑ज॒पेये॑न् यज॑ते। बा॒रु॒हस्प॑त्य ए॒ष च॒रुः। अश्व॑न्त्सरिष्य॒तः स॒स्रुष॑श्चाव॑  
घ्रापयति। यमे॒व ते वाजं॑ लो॒कमु॑ञ्जय॑न्ति। तमे॒वाव॑ रुन्धे। अजी॑जिप॒त वन॑स्पतय॒  
इन्द्रं॑ वाजं॒ विमु॑च्यध्व॒मिति॑ दुन्दु॒भीन् विमु॑ञ्चति। यमे॒व ते वाजं॑ लो॒कमिन्द्रि॑यं  
दुन्दु॒भयं॑ उ॒ञ्जय॑न्ति। तमे॒वाव॑ रुन्धे॥ ३९ ॥

अभिजयति वा एषा वाग्दीयन्तेऽस्मे युनक्ति गमयति य आजि धावन्ति भवति  
देवतयाऽष्टौ च॥

[६]

ता॒र्प्यं यज॑मानं॒ परि॑धापयति। य॒ज्ञो वै ता॒र्प्यम्। य॒ज्ञेनै॒वैन॑ सम॑र्धयति। द॒र्भम॑यं॒

परिधापयति। पवित्रं वै दुर्भाः। पुनात्येवैनम्। वाजं वा एषोऽवरुरुत्सते। यो वाजपेयेन यजते। ओषधयः खलु वै वाजः। यद्दुर्भमयं परिधापयति॥४०॥

वाजस्यावरुद्धौ। जाय एहि सुवो रोहावेत्याह। पत्न्या एवैष यज्ञस्यान्वारम्भोऽनवच्छित्यै। सप्तदशारत्निर्यूपो भवति। सप्तदशः प्रजापतिः। प्रजापतेरात्यै। तूपरश्चतुरश्रिर्भवति। गौधूमं चषालम्। न वा एते व्रीहयो न यवाः। यद्गोधूमाः॥४१॥

एवमिव हि प्रजापतिः समृद्धौ। अथो अमुमेवास्मै लोकमन्नवन्तं करोति। वासोभिर्वेष्टयति। एष वै यजमानः। यद्यूपः। सर्वदेवत्यं वासः। सर्वाभिरेवैनं देवताभिः समर्धयति। अथो आक्रमणमेव तत्सेतुं यजमानः कुरुते। सुवर्गस्य लोकस्य समष्ट्यै। द्वादश वाजप्रसूवीयानि जुहोति॥४२॥

द्वादश मासाः संवत्सरः। संवत्सरमेव प्रीणाति। अथो संवत्सरमेवास्मा उपदधाति। सुवर्गस्य लोकस्य समष्ट्यै। दशभिः कल्पै रोहति। नव वै पुरुषे प्राणाः। नाभिर्दशमी। प्राणानेव यथास्थानं कल्पयित्वा। सुवर्गं लोकमेति। एतावद्वै

पुरुषस्य स्वम् ॥ ४३ ॥

यावत्प्राणाः। यावद्देवास्यास्ति। तेन सह सुवर्गं लोकमेति। सुवर्देवाः  
अङ्गमेत्याह। सुवर्गमेव लोकमेति। अमृता अमृमेत्याह। अमृतमिव हि सुवर्गो  
लोकः। प्रजापतेः प्रजा अमृमेत्याह। प्राजापत्यो वा अयं लोकः। अस्मादेव तेन  
लोकात्रैति ॥ ४४ ॥

समहं प्रजया सं मया प्रजेत्याह। आमेवैतामा शास्ते। आसपुटैर्घ्नन्ति। अन्नं  
वा इयम्। अन्नाद्यैर्नैवैनः समर्धयन्ति। ऊषैर्घ्नन्ति। एते हि साक्षादन्नम्। यदूषाः।  
साक्षादेवैनमन्नाद्यैर्न समर्धयन्ति। पुरस्तात्प्रत्यश्च घ्नन्ति ॥ ४५ ॥

पुरस्ताद्धि प्रतीचीनमन्नमद्यते। शीरूषतो घ्नन्ति। शीरूषतो ह्यन्नमद्यते। दिग्भ्यो  
घ्नन्ति। दिग्भ्य एवास्मा अन्नाद्यमवरुन्धते। ईश्वरो वा एष पराङ्मुदधः। यो यूपः  
रोहति। हिरण्यमध्यवरोहति। अमृतं वै हिरण्यम्। अमृतं सुवर्गो लोकः ॥ ४६ ॥

अमृतं एव सुवर्गे लोके प्रति तिष्ठति। शतमानं भवति। शतायुः पुरुषः



शतेन्द्रियः। आयुष्येवेन्द्रिये प्रति तिष्ठति। पुष्ट्यै वा एतद्रूपम्। यदजा। त्रिः  
 संवत्सरस्यान्यान्पशून्परि प्रजायते। वस्ताजिनमध्यव रोहति। पुष्ट्यामेव प्रजनने  
 प्रति तिष्ठति॥४७॥ परिधापयति गोधूमा जुहोति स्वं नैति प्रत्यञ्चं घ्नन्ति लोको नवं च॥ [७]

सप्तान्नहोमाञ्जुहोति। सप्त वा अन्नानि। यावन्त्येवान्नानि। तान्येवाव रुन्धे।  
 सप्त ग्राम्या ओषधयः। सप्तारण्याः। उभर्याषामवरुद्धौ। अन्नस्यान्नस्य जुहोति।  
 अन्नस्यान्नस्यावरुद्धौ। यद्वाजपेययाज्यनवरुद्धस्याश्नीयात्॥४८॥

अवरुद्धेन व्यृद्धेत। सर्वस्य समवदाय जुहोति। अनवरुद्धस्यावरुद्धौ।  
 औदुम्बरेण सुवेण जुहोति। ऊर्वा अन्नमुदुम्बरः। ऊर्ज एवान्नाद्यस्यावरुद्धौ।  
 देवस्य त्वा सवितुः प्रसव इत्याह। सवितृप्रसूत एवैनं ब्रह्मणा देवताभिरभिषिञ्चति।  
 अन्नस्यान्नस्याभिषिञ्चति। अन्नस्यान्नस्यावरुद्धौ॥४९॥

पुरस्तात्प्रत्यञ्चमभिषिञ्चति। पुरस्ताद्धि प्रतीचीनमन्नमद्यतै। शीर्षतोऽभिषिञ्चति।  
 शीर्षतो ह्यन्नमद्यतै। आ मुखादन्ववस्त्रावयति। मुखत एवास्मा अन्नाद्यं दधाति।

अ॒ग्नेस्त्वा॒ साम्रा॑ज्येना॒भिषि॑श्चामीत्या॒ह। ए॒ष वा अ॒ग्नेः स॒वः। तेनै॒वैन॑म॒भिषि॑श्चति।  
इन्द्र॑स्य त्वा॒ साम्रा॑ज्येना॒भिषि॑श्चामीत्या॒ह॥५०॥

इन्द्रि॒यमे॒वास्मि॑न्नेतेन॑ दधाति। बृह॒स्पते॑स्त्वा॒ साम्रा॑ज्येना॒भिषि॑श्चामीत्या॒ह। ब्रह्म॑  
वै दे॒वानां॑ बृह॒स्पतिः॑। ब्रह्म॑णै॒वैन॑म॒भिषि॑श्चति। सोम॒ग्रहा॑श्चा॒वदानी॑यानि च॒र्त्विग्भ्य॑  
उप॑हरन्ति। अ॒मुमे॒व तैर्लो॒कमन्न॑वन्तं करोति। सुरा॒ग्रहा॑श्चा॒नवदानी॑यानि च  
वाज॒सृद्ध्यः॑। इ॒ममे॒व तैर्लो॒कमन्न॑वन्तं करोति। अथो॑ उ॒भयी॑ष्वे॒वाभिषि॑च्यते। वि॒माथं  
कुर्व॑ते वाज॒सृतः॑॥५१॥

इन्द्रि॒यस्याव॑रुद्धौ। अनि॑रुक्ताभिः प्रातः स॒वने स्तु॑वते। अनि॑रुक्तः प्र॒जाप॑तिः।  
प्र॒जाप॑ते॒रास्यै॑। वाज॑वतीभि॒र्माध्यं॑ दिने। अन्नं॑ वै वाजः॑। अन्न॑मे॒वाव॑ रुन्धे। शि॒पिविष्ट॑-  
वतीभिस्तृतीयस॒वने। य॒ज्ञो वै विष्णुः॑। प॒शवः॑ शि॒पिः। य॒ज्ञ ए॒व प॒शुषु॑ प्रति॑ तिष्ठति।  
बृह॑दन्त्यं भवति। अन्त॑मे॒वैन॑श्चि॒र्यै ग॑मयति॥५२॥

अ॒श्वीयाद॑न्नस्यान्नस्याव॑रुद्धा इन्द्र॑स्य त्वा॒ साम्रा॑ज्येना॒भिषि॑श्चामीत्या॒ह  
वाज॒सृतः॑ शि॒पिस्त्रीणि॑ च॥

[८]

नृष॑दं त्वेत्या॒ह। प्र॒जा वै नृन्। प्र॒जाना॑मे॒वैतेन॑ सूयते। द्रुष॑दमित्या॒ह। वन॑स्पतयो॒

वै द्रु। वनस्पतीनामेवैतेन सूयते। भुवनसदमित्याह। यदा वै वसीयान्भवति। भुवनमगन्निति वै तमाहुः। भुवनमेवैतेन गच्छति॥५३॥

अप्सुषदं त्वा घृतसदमित्याह। अपामेवैतेन घृतस्य सूयते। व्योमसदमित्याह। यदा वै वसीयान्भवति। व्योमागन्निति वै तमाहुः। व्योमेवैतेन गच्छति। पृथिविषदं त्वाऽन्तरिक्षसदमित्याह। एषामेवैतेन लोकानां सूयते। तस्माद्वाजपेययाजी न कश्चन प्रत्यवरोहति। अपीव हि देवतांनां सूयते॥५४॥

नाकसदमित्याह। यदा वै वसीयान्भवति। नाकमगन्निति वै तमाहुः। नाकमेवैतेन गच्छति। ये ग्रहाः पञ्चजनीना इत्याह। पञ्चजनानामेवैतेन सूयते। अपां रसमुद्वयसमित्याह। अपामेवैतेन रसस्य सूयते। सूर्यरश्मिं समाभृतमित्याह सशुक्रत्वाय॥५५॥ गच्छति सूयते नव च॥—————[१]

इन्द्रो वृत्रं हत्वा। असुरान्पराभाव्य। सोऽमावास्यां प्रत्यागच्छत्। ते पितरः पूर्वेद्युरागच्छन्। पितृन् यज्ञोऽगच्छत्। तं देवाः पुनरयाचन्त। तमेभ्यो न पुनरददुः।

तैऽब्रुवन्वरं वृणामहे। अथ वः पुनर्दास्यामः। अस्मभ्यमेव पूर्वेद्युः क्रियाता  
इति॥५६॥

तमेभ्यः पुनरददुः। तस्मात्पितृभ्यः पूर्वेद्युः क्रियते। यत्पितृभ्यः पूर्वेद्युः करोति।  
पितृभ्य एव तद्यज्ञं निष्क्रीय यजमानः प्रतनुते। सोमाय पितृपीताय स्वधा नम  
इत्याह। पितुरेवाधि सोमपीथमव रुन्धे। न हि पिता प्रमीयमाण आहृष सोमपीथ  
इति। इन्द्रियं वै सोमपीथः। इन्द्रियमेव सोमपीथमव रुन्धे। तेनेन्द्रियेण द्वितीयां  
जायामभ्यश्नुते॥५७॥

एतद्वै ब्राह्मणं पुरा वाजवश्रवसा विदामक्रन्। तस्मात्ते द्वेद्वे जाये अभ्याक्षत।  
य एवं वेद। अभि द्वितीयां जायामश्नुते। अग्नये कव्यवाहनाय स्वधा नम  
इत्याह। य एव पितृणामग्निः। तं प्रीणाति। तिस्र आहुतीर्जुहोति। त्रिर्निदधाति।  
षट्सम्पद्यन्ते॥५८॥

षड्वा ऋतवः। ऋतूनेव प्रीणाति। तूष्णीं मेक्षणमादधाति। अस्ति वा हि षष्ठ ऋतुर्न  
वा। देवान् वै पितृन्प्रीतान्। मनुष्याः पितरोऽनु प्रपिपते। तिस्र आहुतीर्जुहोति।

त्रिर्निदधाति। षट्थसम्पद्यन्ते। षड्वा ऋतवः॥५९॥

ऋतवः खलु वै देवाः पितरः। ऋतूनेव देवान्पितृन्प्रीणाति। तान्प्रीतान्। मनुष्याः पितरोऽनु प्रपिपते। सकृदाच्छिन्नं बर्हिर्भवति। सकृदिव हि पितरः। त्रिर्निदधाति। तृतीये वा इतो लोके पितरः। तानेव प्रीणाति। पराडावर्तते॥६०॥

ह्रीका हि पितरः। ओष्मणो व्यावृत उपास्ते। ऊष्मभागा हि पितरः। ब्रह्मवादिनो वदन्ति। प्राश्या (३) न प्राश्या (३) मिति। यत्प्राश्नीयात्। जन्यमन्नमद्यात्। प्रमायुकः स्यात्। यन्न प्राश्नीयात्। अहविः स्यात्॥६१॥

पितृभ्य आवृश्चेत। अवघ्रेयमेव। तन्नेव प्राशितं नेवाप्राशितम्। वीरं वा वै पितरः प्रयन्तो हरन्ति। वीरं वा ददति। दशां छिनत्ति। हरणभागा हि पितरः। पितृनेव निरवन्दयते। उत्तर आयुषि लोमं छिन्दीत। पितृणां ह्येतरहि नेदीयः॥६२॥

नमस्करोति। नमस्कारो हि पितृणाम्। नमो वः पितरो रसाय। नमो वः पितरः शुष्माय। नमो वः पितरो जीवाय। नमो वः पितरः स्वधायै। नमो वः पितरो

मन्यवे॑। नमो॑ वः पितरो॑ घोराय॑। पितरो॑ नमो॑ वः। य ए॒तस्मिँल्लो॒के स्थ॥६३॥

युष्मा॑स्तेऽनु॑। ये॑ऽस्मिँल्लो॒के। मां तेऽनु॑। य ए॒तस्मिँल्लो॒के स्थ। यूयं॑ तेषां॒ वसि॑ष्ठा  
भूयास्त॑। ये॑ऽस्मिँल्लो॒के। अ॒हं तेषां॒ वसि॑ष्ठो भूयास॒मित्या॑ह। वसि॑ष्ठः समा॒नाना॑  
भवति॑। य ए॒वं वि॒द्वान्पि॒तृभ्यः॑ क॒रोति॑। ए॒ष वै म॑नु॒ष्याणां॑ य॒ज्ञः॥६४॥

दे॒वानां॑ वा इ॒तरे॑ य॒ज्ञाः। तेन॑ वा ए॒तत्पि॑तृलो॒के च॑रति। यत्पि॑तृभ्यः॑ क॒रोति॑। स  
ई॒श्वरः॑ प्रमे॑तोः। प्रा॒जाप॑त्यय॒र्चा पुन॑रैति॑। य॒ज्ञो वै प्र॑जाप॑तिः। य॒ज्ञेनै॒व स॒ह पुन॑रैति॑।  
न प्र॒मायु॑को भवति॑। पि॒तृलो॒के वा ए॒तद्य॑ज॒मानश्च॑रति। यत्पि॑तृभ्यः॑ क॒रोति॑। स  
ई॒श्वर आ॑र्ति॒मार्तोः॑। प्र॒जाप॑ति॒स्त्वावैनं॑ तत् उ॒न्नैतु॑म॒र्हतीत्या॑हुः। यत्प्रा॑जाप॒त्यय॒र्चा  
पुन॑रैति॑। प्र॒जाप॑तिरे॒वैनं॑ तत् उ॒न्नय॑ति। ना॒र्तिमा॑च्छति॒ यज॑मानः॥६५॥

इत्यंशुते पद्यन्ते पद्यन्ते

पङ्क्तिः ऋतवो वर्ततेऽहंविः स्यान्नेदीयः स्थ यज्ञो यजमानश्चरति यत्पितृभ्यः करोति पञ्च च॥ [१०]

दे॒वासुरा अ॒ग्नीषो॑म॒योर्दे॒वा वै यथा॑दर्शं दे॒वा वै यद॒न्येग्र॑हैर्ब्रह्म॒वादि॑नो नाग्नि॑ष्टोमो न सा॒वित्रं दे॒वस्या॑हं ता॒प्यं स॒त्तात्र॑होमावृषदं त्वेन्द्रो॑ वृत्रं ह॒त्वा दश॑॥१०॥  
दे॒वासुरा वा॒ज्येवैनं॑ तस्मा॑द्वाजपेयया॒जी दे॒वस्या॑हं वा॒जस्या॑व॒रुद्धा इन्द्रि॑यमे॒वास्मिन् ह्रीका॑ हि पि॒तरः पञ्च॑षष्टिः॥६५॥  
दे॒वासुरा यज॑मानः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके तृतीयः प्रपाठकः समाप्तः॥

॥चतुर्थः प्रश्नः॥

॥तैत्तिरीयब्राह्मणे प्रथमाष्टके चतुर्थः प्रपाठकः॥

उभये वा एते प्रजापतेरध्यसृज्यन्त। देवाश्चासुराश्च। तान्न व्यजानात्। इमेऽन्य इमेऽन्य इति। स देवान् शूनकरोत्। तान्भ्यषुणोत्। तान्पवित्रेणापुनात्। तान्परस्तात्पवित्रस्य व्यगृह्णात्। ते ग्रहा अभवन्। तद्ग्रहाणां ग्रहत्वम्॥१॥

देवता वा एता यजमानस्य गृहे गृह्यन्ते। यद्ग्रहाः। विदुरेन देवाः। यस्यैवं विदुष एते ग्रहा गृह्यन्ते। एषा वै सोमस्याऽऽहुतिः। यदुपाशुः। सोमेन देवाऽस्तर्पयाणीति खलु वै सोमेन यजते। यदुपाशुं जुहोति। सोमेनैव तद्देवाऽस्तर्पयति। यद्ग्रहा जुहोति॥२॥

देवा एव तद्देवान्गच्छन्ति। यच्चमसां जुहोति। तेनैवानुरूपेण यजमानः सुवर्गं लोकमेति। किं न्वेतदग्रं आसीदित्याहुः। यत्पात्राणीति। इयं वा एतदग्रं आसीत्। मृन्मयानि वा एतान्यासन्। तैर्देवा न व्यावृतमगच्छन्। त एतानि दारुमयाणि



पात्राण्यपश्यन्। तान्यकुर्वत॥३॥

तैर्वै ते व्यावृत्तमगच्छन्। यद्दारुमयाणि पात्राणि भवन्ति। व्यावृत्तमेव तैर्यजमानो गच्छति। यानि दारुमयाणि पात्राणि भवन्ति। अमुमेव तैर्लोकमभिजयति। यानि मृन्मयाणि। इममेव तैर्लोकमभिजयति। ब्रह्मवादिनो वदन्ति। काश्चतस्रः स्थालीर्वायव्याः सोमग्रहणीरिति। देवा वै पृश्निमदुहन्॥४॥

तस्या एते स्तना आसन्। इयं वै पृश्निः। तामादित्या आदित्यस्थाल्या चतुष्पदः पशून्दुहन्। यदादित्यस्थाली भवति। चतुष्पद एव तया पशून् यजमान इमां दुहे। तामिन्द्र उक्थ्यस्थाल्येन्द्रियमदुहत्। यदुक्थ्यस्थाली भवति। इन्द्रियमेव तया यजमान इमां दुहे। तां विश्वे देवा आग्रयणस्थाल्योर्जमदुहन्। यदाग्रयणस्थाली भवति॥५॥

ऊर्जमेव तया यजमान इमां दुहे। तां मनुष्या ध्रुवस्थाल्याऽऽयुरदुहन्। यद्ध्रुवस्थाली भवति। आयुरेव तया यजमान इमां दुहे। स्थाल्या गृह्णाति। वायव्येन जुहोति। तस्मादन्येन पात्रेण पशून्दुहन्ति। अन्येन प्रतिगृह्णन्ति। अथो

व्यावृ॒तमे॒व तद्य॑ज॒मानो गच्छ॑ति॥६॥ ग्र॒हत्वं ग्र॒हां जु॒होत्य॑ कुर्वतादुहन्नाग्रयणस्थाली भव॑न्ति न॒वं च॥—————[१]

यु॒वꣳ सु॒राम॑म॒श्विना॑ । नमु॑चा॒वासुरे॑ स॒चा॑ । वि॒पिपा॑ना शु॒भस्प॑ती । इन्द्रं॑ कर्म  
स्वा॒वत॑म् । पु॒त्रमि॑व पि॒तरा॑व॒श्विनो॒भा । इन्द्रा॑व॒तं क॑र्मणा द॒ꣳसना॑भिः । यथ्सु॒रामं  
व्य॒पिबः॑ श॒चीभिः॑ । सर॑स्वती त्वा मघ॒वन्न॑भीष्णात् । अहा॑व्य॒ग्रे ह॒विरा॒स्येते॑ । सु॒चीव॑  
घृ॒तं च॒मू इ॒व सोमः॑॥७॥

वा॒ज॒सनिꣳ र॒यिम॒स्मे सु॒वीर॑म् । प्र॒श॒स्तं धे॑हि य॒शसं॑ बृ॒हन्त॑म् । यस्मि॒न्नश्वा॑स  
ऋष॑भासं उ॒क्षणः॑ । व॒शा मे॒षा अ॑वसृष्टास॒ आहु॑ताः । की॒ला॒ल॒पे सोम॑पृष्ठाय  
वे॒धसै॑ । हृ॒दा म॒तिं ज॑नय॒ चारु॑म॒ग्नयै॑ । नाना॑ हि वां दे॒वहि॑तꣳ स॒दो मि॑तम् । मा  
सꣳसृ॑क्षाथां पर॒मे व्यो॑मन् । सुरा॒ त्वम॑सिं शु॒ष्मिणी॑ सोमं॑ ए॒षः । मा मां हिꣳसीः  
स्वां योनि॑मावि॒शन्॥८॥

यदत्र॑ शि॒ष्टꣳ र॒सिनः॑ सु॒तस्य॑ । यदिन्द्रो॑ अपि॒बच्छ॑चीभिः । अ॒हं तद॑स्य॒ मन॑सा  
शि॒वेन॑ । सोमꣳ राजा॑नमि॒ह भ॑क्षयामि । द्वे सु॒ती अ॑शृण॒वं पि॒तृणा॑म् । अ॒हं दे॒वाना॑मु॒त

मर्त्यानाम्। ताभ्यामिदं विश्वं भुवन् ९ समेति। अन्तरा पूर्वमपरं च केतुम्। यस्ते देव वरुण गायत्रेच्छन्दाः पाशः। तं तं एतेनावं यजे॥१॥

यस्ते देव वरुण त्रिष्टुप्छन्दाः पाशः। तं तं एतेनावं यजे। यस्ते देव वरुण जगतीछन्दाः पाशः। तं तं एतेनावं यजे। सोमो वा एतस्य राज्यमादत्ते। यो राजा सत्राज्यो वा सोमेन यजते। देवसुवामेतानि हवींषि भवन्ति। एतावन्तो वै देवानां सवाः। त एवास्मै सवान्प्रयच्छन्ति। त एनं पुनः सुवन्ते राज्याय। देवसू राजा भवति॥१०॥ सोमं आविशन् यजे राज्यायैकं च॥ [२]

उदस्थाद्देव्यदितिर्विश्वरूपी। आयुर्यज्ञपतावधात्। इन्द्राय कृण्वती भागम्। मित्राय वरुणाय च। इयं वा अग्निहोत्री। इयं वा एतस्य निषीदति। यस्याग्निहोत्री निषीदति। तामुत्थापयेत्। उदस्थाद्देव्यदितिरिति। इयं वै देव्यदितिः॥११॥

इमामेवास्मा उत्थापयति। आयुर्यज्ञपतावधादित्याह। आयुरेवास्मिन्दधाति। इन्द्राय कृण्वती भागं मित्राय वरुणाय चेत्याह। यथायजुरेवैतत्। अवर्ति वा एषैतस्य पाप्मानं प्रतिख्याय निषीदति। यस्याग्निहोत्र्युपसृष्टा निषीदति। तां दुग्ध्वा

ब्राह्मणाय दद्यात्। यस्यान्नं नाद्यात्। अवर्तिमेवास्मिन्पाप्मानं प्रतिमुञ्चति॥१२॥

दुग्ध्वा ददाति। न ह्यदृष्टा दक्षिणा दीयते। पृथिवीं वा एतस्य पयः प्रविशति। यस्याग्निहोत्रं दुह्यमानं॑ स्कन्दति। यदद्य दुग्धं पृथिवीमसक्तं। यदोषधीरप्यसंरद्यदापः। पयो गृहेषु पयो अघ्नियासु। पयो वृथ्सेषु पयो अस्तु तन्मयीत्याह। पय एवाऽऽत्मन्गृहेषु पशुषु धत्ते। अप उपसृजति॥१३॥

अद्विरेवैनदाप्रोति। यो वै यज्ञस्यार्ते नानार्तं॑ स॑ सृजति। उभे वै ते तर्ह्यार्च्छतः। आर्च्छति खलु वा एतदग्निहोत्रम्। यद्दुह्यमानं॑ स्कन्दति। यदभिदुह्यात्। आर्ते नानार्तं यज्ञस्य स॑ सृजेत्। तदेव यादृक्कीदृक्कं होतव्यम्। अथान्यां दुग्ध्वा पुनर्होतव्यम्। अनार्तेनैवार्तं यज्ञस्य निष्करोति॥१४॥

यद्यद्वुतस्य स्कन्देत्। यत्ततोऽहुत्वा पुनरेयात्। यज्ञं विच्छिन्द्यात्। यत्र स्कन्देत्। तन्निषद्य पुनर्गृहीयात्। यत्रैव स्कन्दति। तत एवैनत्पुनर्गृह्णाति। तदेव यादृक्कीदृक्कं होतव्यम्। अथान्यां दुग्ध्वा पुनर्होतव्यम्। अनार्तेनैवार्तं यज्ञस्य निष्करोति॥१५॥

वि वा एतस्य यज्ञश्छिद्यते। यस्याग्निहोत्रेऽधिश्चिते श्वाऽन्तरा धावति।  
 रुद्रः खलु वा एषः। यदग्निः। यद्गामन्वत्या वर्तयेत्। रुद्राय पशूनपि  
 दध्यात्। अपशुर्यजमानः स्यात्। यदपोऽन्वतिषिञ्चेत्। अनाद्यमग्नेरापः।  
 अनाद्यमाभ्यामपि दध्यात्। गार्हपत्याद्भस्मादाय। इदं विष्णुर्विचक्रम इति  
 वैष्णव्यर्चाऽऽहवनीयाद्ध्वंसयन्नुद्धरेत्। यज्ञो वै विष्णुः। यज्ञेनैव यज्ञः  
 सन्तनोति। भस्मना पदमपि वपति शान्त्यै॥१६॥

वे देव्यदितिर्मुञ्चति सृजति करोति करोत्याभ्यामपि दध्यात् पञ्च

च॥

[३]

नि वा एतस्याऽऽहवनीयो गार्हपत्यं कामयते। निगार्हपत्य आहवनीयम्।  
 यस्याग्निमनुद्धृतं सूर्योऽभि निम्रोचति। दर्भेण हिरण्यं प्रबद्धं पुरस्ताद्धरेत्।  
 अथाग्निम्। अथाग्निहोत्रम्। यद्धिरण्यं पुरस्ताद्धरति। ज्योतिर्वै हिरण्यम्।  
 ज्योतिरेवैनं पश्यन्नुद्धरति। यदग्निं पूर्वं हरत्यथाग्निहोत्रम्॥१७॥

भागधेयेनैवैनं प्रणयति। ब्राह्मण आर्षेय उद्धरेत्। ब्राह्मणो वै सर्वा देवताः।  
 सर्वाभिरेवैनं देवताभिरुद्धरति। अग्निहोत्रमुपसाद्यातमितोरासीत्। व्रतमेव हृतमनु

म्रियते। अन्तं वा ए॒ष आ॒त्मनो॑ गच्छति। यस्ताम्यति। अन्त॑मेष य॒ज्ञस्य॑ गच्छति।  
यस्या॒ग्निमनु॑द्धृत॒ः सूर्यो॑ऽभि नि॒म्रोच॑ति॥१८॥

पुनः॑ स॒मन्य॑ जुहोति। अन्ते॑नै॒वान्तं॑ य॒ज्ञस्य॑ निष्करोति। वरु॑णो वा ए॒तस्य॑  
य॒ज्ञं गृ॑ह्णाति। यस्या॒ग्निमनु॑द्धृत॒ः सूर्यो॑ऽभि नि॒म्रोच॑ति। वारु॑णं च॒रुं निर्व॑पेत्।  
तेनै॒व य॒ज्ञं निष्क्री॑णीते। नि वा ए॒तस्या॑ऽऽह॒वनीयो॑ गार्ह॒पत्यं॑ कामयते। नि  
गार्ह॑पत्य आह॒वनीयम्। यस्या॒ग्निमनु॑द्धृत॒ः सूर्यो॑ऽभ्यु॒देति॑। च॒तुर्गृ॑ही॒तमाज्यं॑  
पु॒रस्ता॑द्धरेत्॥१९॥

अथा॒ग्निम्। अथा॒ग्निहो॒त्रम्। यदाज्यं॑ पु॒रस्ता॑द्धरति। ए॒तद्वा अ॒ग्नेः प्रि॒यं धाम्।  
यदाज्यम्। प्रि॒येणै॒वैनं॑ धाम्ना॒ सम॑र्धयति। यद॒ग्निं पूर्वं॑ ह॒रत्यथा॑ग्निहोत्रम्।  
भा॒गधे॒येनै॒वैनं॑ प्रणयति। ब्रा॒ह्म॒ण आ॑र्षेय उद्धरेत्। ब्रा॒ह्म॒णो वै सर्वा॑ दे॒वताः॑॥२०॥

सर्वा॑भिरे॒वैनं॑ दे॒वता॑भि॒रुद्ध॑रति। परा॑ची वा ए॒तस्मै॑ व्युच्छन्ती व्युच्छति।  
यस्या॒ग्निमनु॑द्धृत॒ः सूर्यो॑ऽभ्यु॒देति॑। उ॒षाः के॒तुना॑ जुषताम्। य॒ज्ञं दे॒वेभि॑रि॒न्वितम्।

देवेभ्यो मधुमत्तम्ꣳ स्वाहेति प्रत्यङ्गिषद्याज्येन जुहुयात्। प्रतीचीमेवास्मै  
 विवांसयति। अग्निहोत्रमुपसाद्यातमितोरासीत्। व्रतमेव हृतमनु म्रियते। अन्तं वा  
 एष आत्मनो गच्छति॥ २१ ॥

यस्ताम्यति। अन्तमेष यज्ञस्य गच्छति। यस्याग्निमनुद्धृतꣳ सूर्योऽभ्युदेति। पुनः  
 समन्य जुहोति। अन्तेनैवान्तं यज्ञस्य निष्करोति। मित्रो वा एतस्य यज्ञं गृह्णाति।  
 यस्याग्निमनुद्धृतꣳ सूर्योऽभ्युदेति। मैत्रं चरुं निर्वपेत्। तेनैव यज्ञं निष्क्रीणीते।  
 यस्याऽऽहवनीयेऽनुद्वाते गार्हपत्य उद्वायेत्॥ २२ ॥

यदाहवनीयमनुद्वाप्य गार्हपत्यं मन्येत्। विच्छिन्द्यात्। भ्रातृव्यमस्मै जनयेत्।  
 यद्वै यज्ञस्य वास्तव्यं क्रियते। तदनु रुद्रोऽवचरति। यत्पूर्वमन्ववस्येत्।  
 वास्तव्यमग्निमुपासीत्। रुद्रोऽस्य पशून्धातुकः स्यात्। आहवनीयमुद्वाप्य।  
 गार्हपत्यं मन्येत्॥ २३ ॥

इतः प्रथमं जज्ञे अग्निः। स्वाद्योनेरधि जातवैदाः। स गांयत्रिया त्रिष्टुभा जगत्या।

देवेभ्यो हव्यं वहतु प्रजानन्निति। छन्दोभिरेवैनं स्वाद्योनेः प्रजनयति। गार्हपत्यं मन्थति। गार्हपत्यं वा अन्वाहिताग्नेः पशव उप तिष्ठन्ते। स यदुद्वायति। तदनु पशवोऽप क्रामन्ति। इषे रय्यै रमस्व॥२४॥

सहसे द्युम्राय। ऊर्जेऽपत्यायेत्याह। पशवो वै रयिः। पशूनेवास्मै रमयति। सारस्वतौ त्वोथ्सौ समिन्धातामित्याह। ऋक्सामे वै सारस्वतावुथ्सौ। ऋक्सामाभ्यामेवैनं समिन्धे। सम्राडसि विराडसीत्याह। रथन्तरं वै सम्राट्। बृहद्विराट्॥२५॥

ताभ्यामेवैनं समिन्धे। वज्रो वै चक्रम्। वज्रो वा एतस्य यज्ञं विच्छिनत्ति। यस्यानो वा रथो वाऽन्तराऽग्नी याति। आहवनीयमुद्वाप्य। गार्हपत्यादुद्धरेत्। यदग्ने पूर्वं प्रभृतं पदं हि तै। सूर्यस्य रश्मीनन्वाततानं। तत्र रयिष्ठामनु सं भरैतम्। सं नः सृज सुमत्या वाजवत्येति॥२६॥

पूर्वणैवास्यं यज्ञेन यज्ञमनु सन्तनोति। त्वमग्ने सप्रथां असीत्याह। अग्निः



सर्वा देवताः। देवताभिरेव यज्ञः सन्तनोति। अग्नये पथिकृते पुरोडाशमष्टा-  
 कपालं निर्वपेत्। अग्निमेव पथिकृतं स्वेन भागधेयेनोपधावति। स एवैनं यज्ञियं  
 पन्थामपि नयति। अनङ्गान्दक्षिणा। वही ह्येष समृद्धौ॥२७॥ हृत्यथाग्निहोत्रं निमोचति हरेद्देवतां  
 गच्छत्युद्धार्यन्त्येद्रमस्व बृहद्विराडिति नवं च (नि वै पूर्वं त्रीणि निमोचति दर्भेण यद्विरण्यमग्निहोत्रं पुनर्वर्कणो वारुणं नि वा एतस्याभ्युदेति चतुर्गृहीतमाज्यं  
 यदाज्यं पराच्युषाः पुनर्मित्रं मैत्रं यस्याऽऽहवनीयेऽनुद्वाते गार्हपत्यो यद्वे मन्थेदुद्धरेत्॥) [४]

यस्य प्रातः सवने सोमोऽतिरिच्यते। माध्यं दिनं सवनं कामयमानो-  
 ऽभ्यतिरिच्यते। गौर्धयति मरुतामिति धयद्वतीषु कुर्वन्ति। हिनस्ति वै सन्ध्यधीतम्।  
 सन्धीव खलु वा एतत्। यत्सवनस्यातिरिच्यते। यद्धयद्वतीषु कुर्वन्ति। सन्धेः  
 शान्त्यै। गायत्रः सामं भवति पञ्चदशः स्तोमः। तेनैव प्रातः सवनान्नयन्ति॥२८॥

मरुत्वन्तीषु कुर्वन्ति। तेनैव माध्यं दिनात्सवनान्नयन्ति। होतुश्चमसमनून्नयन्ते।  
 होताऽनु शंसति। मध्यत एव यज्ञः समादधाति। यस्य माध्यं दिने सवने  
 सोमोऽतिरिच्यते। आदित्यं तृतीयसवनं कामयमानोऽभ्यतिरिच्यते। गौरिवीतः  
 सामं भवति। अतिरिक्तं वै गौरिवीतम्। अतिरिक्तं यत्सवनस्यातिरिच्यते॥२९॥

अतिरिक्तस्य शान्त्यै। बण्महा५ असि सूर्येति कुर्वन्ति। यस्यैवाऽऽदित्यस्य  
सर्वनस्य कामेनातिरिच्यते। तेनैवैनं कामेन समर्धयन्ति। गौरिवीत५ सामं भवति।  
तेनैव माध्यं दिनात्सर्वनान्नयन्ति। सप्तदशः स्तोमः। तेनैव तृतीयसर्वनान्नयन्ति।  
होतुश्चमसमनून्नयन्ते। होताऽनु श५सति॥३०॥

मध्यत एव यज्ञ५ समादधाति। यस्य तृतीयसर्वने सोमोऽतिरिच्येत। उक्थ्यं  
कुर्वीत। यस्योक्थ्येऽतिरिच्येत। अतिरात्रं कुर्वीत। यस्यातिरात्रेऽतिरिच्येत। तत्त्वे  
दुष्प्रज्ञानम्। यजमानं वा एतत्पशवं आसाहयन्ति। बृहत्सामं भवति। बृहद्वा  
इमाँल्लोकान्दाधार। बारहताः पशवः। बृहतैवास्मै पशून्दाधार। शिपिविष्टवतीषु  
कुर्वन्ति। शिपिविष्टो वै देवानां पुष्टम्। पुष्ट्यैवैनं५ समर्धयन्ति। होतुश्चमसमनून्नयन्ते।  
होताऽनुश५सति। मध्यत एव यज्ञ५ समादधाति॥३१॥ यन्ति सर्वनस्यातिरिच्यते श५सति दाधाराष्टौ च॥[५]

एकैको वै जनतायामिन्द्रः। एकं वा एताविन्द्रमभि स५सुनुतः। यौ द्वौ  
स५सुनुतः। प्रजापतिर्वा एष वितायते। यद्यज्ञः। तस्य ग्रावाणो दन्ताः। अन्यतरं

वा ए॒ते स॑सु॒न्वतो॑र्निर्ब॒प्सति॑ । पू॒र्वेणो॑प॒सृत्या॑ दे॒वता॑ इत्या॒हुः । पू॒र्वोप॒सृत॑स्य॒ वै  
श्रेया॑न्भवति । ए॒ति॒व॒न्त्याज्या॑नि भवन्त्य॒भिजि॑त्यै ॥ ३२ ॥

म॒रुत्वंतीः॑ प्र॒तिप॑दः । म॒रुतो॑ वै दे॒वाना॑मप॒राजि॑तमा॒यत॑नम् । दे॒वाना॑मे॒वाप॑राजित  
आ॒यत॑ने यतते । उ॒भे बृ॒हद्र॑थन्त॒रे भ॑वतः । इ॒यं वा॒व र॑थन्त॒रम् । अ॒सौ बृ॒हत् ।  
आ॒भ्यामे॒वैन॑मन्त॒रेति॑ । वा॒चश्च॒ मन॑सश्च । प्रा॒णाच्चा॑पा॒नाच्च॑ । दि॒वश्च॑ पृ॒थिव्या॑श्च ॥ ३३ ॥

सर्व॑स्माद्वि॒त्ताद्वेद्या॑त् । अ॒भि॒व॒र्तो ब्र॑ह्मसा॒मं भ॑वति । सु॒व॒र्गस्य॑ लो॒कस्या॑भि॒वृ॒त्यै ।  
अ॒भि॒जि॒द्भव॑ति । सु॒व॒र्गस्य॑ लो॒कस्या॑भि॒जि॒त्यै । वि॒श्वजि॒द्भव॑ति । वि॒श्वस्य॑ जि॒त्यै ।  
यस्य॑ भूया॑सो यज्ञ॒क्र॒तव॑ इत्या॒हुः । स दे॒वता॑ वृ॒द्ध इति॑ । यद्य॑ग्नि॒ष्टोमः॑ सोमः  
प॒रस्ता॑त्स्यात् ॥ ३४ ॥

उ॒क्थ्यं॑ कु॒र्वीत॑ । यद्यु॒क्थः॑ स्यात् । अ॒ति॒रा॒त्रं कु॑र्वीत । यज्ञ॒क्र॒तुभि॑रे॒वास्य॑ दे॒वता॑  
वृ॒द्धे । यो वै छ॒न्दा॑भि॒रभि॑भवति । स स॑सु॒न्वतो॑र॒भि॒भव॑ति । सं॒वे॒शाय॑ त्वोप॒वे॒शाय॑  
त्वेत्या॑ह । छ॒न्दा॑सि॒ वै सं॒वे॒श उ॑प॒वे॒शः । छ॒न्दा॑भि॒रे॒वास्य॑ छ॒न्दा॑स्य॒भि॒भव॑ति ।

इष्टर्गो वा ऋत्विजामध्वर्युः॥३५॥

इष्टर्गः खलु वै पूर्वोऽष्टः क्षीयते। प्राणापानौ मृत्योर्मा पातमित्याह। प्राणापानयोरेव श्रयते। प्राणापानौ मा मां हासिष्टमित्याह। नैनं पुराऽऽयुषः प्राणापानौ जहितः। आर्तिं वा एते नियन्ति। येषां दीक्षितानां प्रमीयते। तं यदववर्ज्युः। क्रूरकृतमिवेषां लोकः स्यात्। आहर दहेति ब्रूयात्॥३६॥

तं दक्षिणतो वेद्यै निधाय। सर्पराज्ञियां ऋग्भिः स्तुयुः। इयं वै सर्पतो राज्ञी। अस्या एवैनं परिददति। व्यृद्धं तदित्याहुः। यथस्तुतमननुशस्तमिति। होता प्रथमः प्राचीनावीती मार्जालीयं परीयात्। यामीरनुब्रुवन्। सर्पराज्ञीनां कीर्तयेत्। उभयोरेवैनं लोकयोः परिददति॥३७॥

अथो धुवन्त्येवैनम्। अथो न्येवास्मै हुवते। त्रिः परियन्ति। त्रयं इमे लोकाः। एभ्य एवैनं लोकेभ्यो धुवते। त्रिः पुनः परियन्ति। षट्थसम्पद्यन्ते। षड्वा ऋतवः।

ऋतुभिरेवैनं धुवते। अग्न आयूँषि पवस इति प्रतिपदं कुर्वीरन्। रथन्तरसामैषाँ  
 सोमः स्यात्। आयुरेवाऽऽत्मन्दधते। अथो पाप्मानमेव विजहतो यन्ति॥ ३८॥ अभिजित्ये  
 पृथिव्याश्च स्यादध्वर्युर्द्वयाल्लोकयोः परिददति कुर्वीरुञ्जीणि च॥ [६]

असुर्यं वा एतस्माद्वर्णं कृत्वा। पशवो वीर्यमपं क्रामन्ति। यस्य यूपो विरोहति।  
 त्वाष्ट्रं बहुरूपमालभेत। त्वष्टा वै रूपाणामीशे। य एव रूपाणामीशे। सोऽस्मिन्पशून्  
 वीर्यं यच्छति। नास्मात्पशवो वीर्यमपं क्रामन्ति। आर्तिं वा एते नियन्ति। येषां  
 दीक्षितानामग्निरुद्धारयति॥ ३९॥

यदाहवनीयं उद्धारयेत्। यत्तं मन्थेत्। विच्छिन्द्यात्। भ्रातृव्यमस्मै जनयेत्।  
 यदाहवनीयं उद्धारयेत्। आग्नीध्रादुद्धरेत्। यदाग्नीध्र उद्धारयेत्। गार्हपत्यादुद्धरेत्।  
 यद्गार्हपत्य उद्धारयेत्। अत एव पुनर्मन्थेत्॥ ४०॥

अत्र वाव स निलयते। यत्र खलु वै निलीनमुत्तमं पश्यन्ति। तदेनमिच्छन्ति।  
 यस्माद्दारौरुद्धारयेत्। तस्यारणीं कुर्यात्। क्रुमुकमपि कुर्यात्। एषा वा अग्नेः प्रिया

त॒नूः। यत्क्रु॑मु॒कः। प्रि॒ययै॒वैनं॑ त॒नुवा॒ सम॑र्धयति। गार्ह॑पत्यं मन्थति॥४१॥

गार्ह॑पत्यो वा अ॒ग्रेयो॑निः। स्वादे॒वैनं॑ योने॑र्जनयति। नास्मै॒ भ्रातृ॑व्यं जनयति।  
यस्य॒ सोमं॑ उ॒पद॑स्येत्। सु॒वर्णं॑ हिर॑ण्यं द्वेधा वि॒च्छिद्य॑। ऋ॒जीषे॑ऽन्यदा॑धूनुयात्।  
जुहु॑यादन्यत्। सोमं॑मे॒वाभि॑षु॒णोति॑। सोमं॑ जुहोति। सोम॑स्य॒ वा अ॑भिषूयमाणस्य  
प्रि॒या त॒नूरु॑दक्रामत्॥४२॥

तथ्सु॒वर्णं॑ हिर॑ण्यमभवत्। यथ्सु॒वर्णं॑ हिर॑ण्यं कुर्वन्ति। प्रि॒ययै॒वैनं॑ त॒नुवा॒  
सम॑र्धयन्ति। यस्या॒क्रीत॑ः सोमं॑म॒पहरे॑युः। क्री॒णीया॑दे॒व। सैव॑ ततः प्रायश्चित्तिः।  
यस्य॑ क्री॒तम॑प॒हरे॑युः। आ॒दारा॑श्च॒ फाल्गु॑नानि चा॒भिषु॑णुयात्। गा॒यत्री॑ यः  
सोम॑मा॒हरत्। तस्य॒ योऽंशुः॑ प॒राऽप॑तत्॥४३॥

त आ॒दारा॑ अ॒भवन्। इन्द्रो॑ वृ॒त्रम॑हन्। तस्य॑ व॒ल्कः प॒राऽप॑तत्। तानि॑  
फाल्गु॑नान्य॒भवन्। प॒शवो॑ वै फाल्गु॑नानि। प॒शवः॑ सोमो॒ राजा॑। यदा॑दारा॑श्च॒  
फाल्गु॑नानि चा॒भिषु॑णोति। सोमं॑मे॒व राजा॑नम॒भिषु॑णोति। शृ॒तेन॑ प्रातः स॒वने॑

श्रीणीयात्। दध्ना मध्यं दिने॥४४॥

नीतमिश्रेण तृतीयसवने। अग्निष्टोमः सोमः स्याद्रथन्तरसामा। य एवर्त्विजो वृताः स्युः। त एनं याजयेयुः। एकां गां दक्षिणां दद्यात्तेभ्य एव। पुनः सोमं क्रीणीयात्। यज्ञेनैव तद्यज्ञमिच्छति। सैव ततः प्रायश्चित्तिः। सर्वाभ्यो वा एष देवताभ्यः सर्वेभ्यः पृष्ठेभ्य आत्मानमागुरते। यः सत्रायागुरते। एतावान्खलु वै पुरुषः। यावदस्य वित्तम्। सर्ववेदसेनं यजेत। सर्वपृष्ठोऽस्य सोमः स्यात्। सर्वाभ्य एव देवताभ्यः सर्वेभ्यः पृष्ठेभ्य आत्मानं निष्क्रीणीते॥४५॥

आगुरते पञ्च च॥

उद्धारयति मन्थेन्मन्थत्यक्रामत्पराऽपंतन्मध्यन्दिन

[७]

पवमानः सुवर्जनः। पवित्रेण विचर्षणिः। यः पोता स पुनातु मा। पुनन्तु मा देवजनाः। पुनन्तु मनवो धिया। पुनन्तु विश्वं आयवः। जातवेदः पवित्रवत्। पवित्रेण पुनाहि मा। शुक्लेण देव दीद्यत्। अग्ने क्रत्वा क्रतूँ रनु॥४६॥

यत्ते पवित्रमर्चिषि। अग्ने विततमन्तरा। ब्रह्म तेन पुनीमहे। उभाभ्यां देव सवितः।

पवित्रेण सवेन च। इदं ब्रह्म पुनीमहे। वैश्वदेवी पुनती देव्यागात्। यस्यै बह्वीस्तनुवो  
वीतपृष्ठाः। तया मदन्तः सधमाद्येषु। वयं स्याम पतयो रयीणाम्॥४७॥

वैश्वानरो रश्मिभिर्मा पुनातु। वातः प्राणेनेषिरो मयोभूः। द्यावापृथिवी पयसा  
पयोभिः। ऋतावरी यज्ञिये मा पुनीताम्। बृहद्भिः सवितस्तृभिः। वर्षिष्ठैर्देव  
मन्मभिः। अग्ने दक्षैः पुनाहि मा। येन देवा अपुनत। येनाऽऽपो दिव्यं कशः। तेन  
दिव्येन ब्रह्मणा॥४८॥

इदं ब्रह्म पुनीमहे। यः पावमानीरध्येति। ऋषिभिः सम्भृतं रसम्। सर्वं  
स पूतमश्नाति। स्वदितं मातरिश्चना। पावमानीर्यो अध्येति। ऋषिभिः सम्भृतं  
रसम्। तस्मै सरस्वती दुहे। क्षीरं सर्पिर्मधूदकम्। पावमानीः स्वस्त्ययनीः॥४९॥

सुदुघा हि पयस्वतीः। ऋषिभिः सम्भृतो रसः। ब्राह्मणेष्वमृतं हितम्।  
पावमानीर्दिशन्तु नः। इमं लोकमथो अमुम्। कामान्त्समर्धयन्तु नः। देवीर्देवैः  
समाभृताः। पावमानीः स्वस्त्ययनीः। सुदुघा हि घृतश्रुतः। ऋषिभिः सम्भृतो  
रसः॥५०॥



ब्राह्मणेष्वमृतं हितम्। येन देवाः पवित्रेण। आत्मानं पुनते सदा। तेन सहस्रधारेण। पावमान्यः पुनन्तु मा। प्राजापत्यं पवित्रम्। शतोद्यामं हिरण्मयम्। तेन ब्रह्मविदो वयम्। पूतं ब्रह्म पुनीमहे। इन्द्रः सुनीती सह मा पुनातु। सोमः स्वस्त्या वरुणः समीच्या। यमो राजा प्रमृणाभिः पुनातु मा। जातवेदा मोर्जयन्त्या पुनातु॥५१॥ अन् रयीणां ब्रह्मणा स्वस्त्ययनीः सुदुघा हि घृतश्चत ऋषिभिः सम्भृतो रसः पुनातु त्रीणि च॥ [८]

प्रजा वै सत्रमासत तपस्तप्यमाना अजुह्वतीः। देवा अपश्यश्चमसं घृतस्य पूर्णं स्वधाम्। तमुपोदतिष्ठन्तमजुहवुः। तेनार्धमास ऊर्जमवारुन्धत। तस्माद्वर्धमासे देवा इज्यन्ते। पितरोऽपश्यश्चमसं घृतस्य पूर्णं स्वधाम्। तमुपोदतिष्ठन्तमजुहवुः। तेन मास्यूर्जमवारुन्धत। तस्मान्मासि पितृभ्यः क्रियते। मनुष्या अपश्यश्चमसं घृतस्य पूर्णं स्वधाम्॥५२॥

तमुपोदतिष्ठन्तमजुहवुः। तेन द्वयीमूर्जमवारुन्धत। तस्माद्विरहो मनुष्येभ्य उपह्रियते। प्रातश्च सायं च। पशवोऽपश्यश्चमसं घृतस्य पूर्णं स्वधाम्। तमुपोदतिष्ठन्तमजुहवुः। तेन त्रयीमूर्जमवारुन्धत। तस्मात्रिरहः पशवः प्रेरते।

प्रातः सङ्गुवे सायम्। असुरा अपश्यञ्चमसं घृतस्य पूर्णं स्वधाम्॥५३॥

तमुपोदतिष्ठन्तमंजुहवुः। तेन संवत्सर ऊर्जमवारुन्धत। ते देवा अमन्यन्त।  
अमी वा इदमभूवन्। यद्वयं स्म इति। त एतानि चातुर्मास्यान्यपश्यन्। तानि  
निरवपन्। तैरेवैषां तामूर्जमवृञ्जत। ततो देवा अभवन्। पराऽसुराः॥५४॥

यद्यजते। यामेव देवा ऊर्जमवारुन्धत। तान्तेनाव रुन्धे। यत्पितृभ्यः कुरोति।  
यामेव पितर ऊर्जमवारुन्धत। तान्तेनाव रुन्धे। यदावसथेऽन्नं हरन्ति। यामेव  
मनुष्या ऊर्जमवारुन्धत। तान्तेनाव रुन्धे। यद्वक्षिणां ददाति॥५५॥

यामेव पशव ऊर्जमवारुन्धत। तान्तेनाव रुन्धे। यच्चातुर्मास्यैर्यजते।  
यामेवासुरा ऊर्जमवारुन्धत। तान्तेनाव रुन्धे। भवत्यात्मना। परास्य भ्रातृव्यो  
भवति। विराजो वा एषा विक्रान्तिः। यच्चातुर्मास्यानि। वैश्वदेवेनास्मिंल्लोके  
प्रत्यतिष्ठत्। वरुणप्रघासैरन्तरिक्षे। साकमेधैरमुष्मिंल्लोके। एष ह त्वावैतत्सर्वं  
भवति। य एवं विद्वांश्चातुर्मास्यैर्यजते॥५६॥

मनुष्या अपश्यञ्चमसं घृतस्य पूर्णं स्वधामसुरा अपश्यञ्चमसं घृतस्य

पूर्णं स्वधामसुरा ददात्यतिष्ठच्चत्वारि च॥ ————— [१]

अग्निर्वाव संवत्सरः। आदित्यः परिवत्सरः। चन्द्रमा इदावत्सरः।  
वायुरनुवत्सरः। यद्वैश्वदेवेन यजते। अग्निमेव तत्संवत्सरमाप्नोति। तस्माद्वैश्वदेवेन  
यजमानः। संवत्सरीणां स्वस्तिमा शास्तु इत्याशासीत। यद्वरुणप्रघासैर्यजते।  
आदित्यमेव तत्परिवत्सरमाप्नोति॥ ५७ ॥

तस्माद्वरुणप्रघासैर्यजमानः। परिवत्सरीणां स्वस्तिमा शास्तु इत्याशासीत।  
यत्साकमेधैर्यजते। चन्द्रमसमेव तदिदावत्सरमाप्नोति। तस्मात्साकमेधैर्यजमानः।  
इदावत्सरीणां स्वस्तिमा शास्तु इत्याशासीत। यत्पितृयज्ञेन यजते। देवानेव  
तदन्ववस्यति। अथवा अस्य वायुश्चानुवत्सरश्चाप्रीतावुच्छिष्येते। यच्छुनासीरीयेण  
यजते॥ ५८ ॥

वायुमेव तदनुवत्सरमाप्नोति। तस्माच्छुनासीरीयेण यजमानः। अनुवत्सरीणां  
स्वस्तिमा शास्तु इत्याशासीत। संवत्सरं वा एष ईप्सतीत्याहुः। यश्चातुर्मासैर्यजतु  
इति। एष ह त्वै संवत्सरमाप्नोति। य एवं विद्वाश्चातुर्मासैर्यजते। विश्वे देवाः

समयजन्त। तैऽग्निमेवायजन्त। त एतं लोकमजयन्॥५९॥

यस्मिन्नाग्निः। यद्वैश्वदेवेन यजते। एतमेव लोकं जयति। यस्मिन्नाग्निः। अग्नेरेव सायुज्यमुपैति। यदा वैश्वदेवेन यजते। अथ संवत्सरस्य गृहपतिमाप्नोति। यदा संवत्सरस्य गृहपतिमाप्नोति। अथ सहस्रयाजिनमाप्नोति। यदा सहस्रयाजिनमाप्नोति॥६०॥

अथ गृहमेधिनमाप्नोति। यदा गृहमेधिनमाप्नोति। अथाग्निर्भवति। यदाग्निर्भवति। अथ गौर्भवति। एषा वै वैश्वदेवस्य मात्रा। एतद्वा एतेषामवमम्। अतोतो वा उत्तराणि श्रेयांसि भवन्ति। यद्विश्वे देवाः समयजन्त। तद्वैश्वदेवस्य वैश्वदेवत्वम्॥६१॥

अथाऽऽदित्यो वरुणः राजानं वरुणप्रघासैरयजत। स एतं लोकमजयत्। यस्मिन्नादित्यः। यद्वरुणप्रघासैर्यजते। एतमेव लोकं जयति। यस्मिन्नादित्यः। आदित्यस्यैव सायुज्यमुपैति। यदादित्यो वरुणः राजानं वरुणप्रघासै-

रयजत। तद्वरुणप्रघासानां वरुणप्रघासत्वम्। अथ सोमो राजा छन्दांसि साकमेधैरयजत॥६२॥

स एतं लोकमजयत्। यस्मिंश्चन्द्रमा विभाति। यत्साकमेधैरयजते। एतमेव लोकं जयति। यस्मिंश्चन्द्रमा विभाति। चन्द्रमस एव सायुज्यमुपैति। सोमो वै चन्द्रमाः। एष ह त्वे साक्षात्सोमं भक्षयति। य एवं विद्वान्साकमेधैरयजते। यत्सोमश्च राजा छन्दांसि च समैधन्त॥६३॥

तत्साकमेधानां साकमेधत्वम्। अथर्तवः पितरः प्रजापतिं पितरं पितृयज्ञेनायजन्त। त एतं लोकमजयन्। यस्मिन्नृतवः। यत्पितृयज्ञेन यजते। एतमेव लोकं जयति। यस्मिन्नृतवः। ऋतूनामेव सायुज्यमुपैति। यदृतवः पितरः प्रजापतिं पितरं पितृयज्ञेनायजन्त। तत्पितृयज्ञस्य पितृयज्ञत्वम्॥६४॥

अथौषधय इमं देवं त्र्यम्बकैरयजन्त प्रथेमहीति। ततो वै ता अप्रथन्त। य एवं विद्वान्त्र्यम्बकैरयजते। प्रथते प्रजयां पशुभिः। अथ वायुः परमेष्ठिनं

शुनासीरीयेणायजत। स एतं लोकमजयत्। यस्मिन्वायुः। यच्छुनासीरीयेण यजते।  
एतमेव लोकं जयति। यस्मिन्वायुः॥६५॥

वायोरेव सायुज्यमुपैति। ब्रह्मवादिनो वदन्ति। प्र चातुर्मास्ययाजी मीयता  
(३) न प्रमीयता (३) इति। जीवन्वा एष ऋतूनप्येति। यदि वसन्तो प्रमीयते।  
वसन्तो भवति। यदि ग्रीष्मे ग्रीष्मः। यदि वर्षासु वर्षाः। यदि शरदि  
शरत्। यदि हेमन् हेमन्तः। ऋतुर्भूत्वा संवत्सरमप्येति। संवत्सरः प्रजापतिः।  
प्रजापतिर्वैषः॥६६॥

परिवत्सरमाप्नोति शुनासीरीयेण यजतेऽजयन्सहस्रयजिनमाप्नोति वैश्वदेवत्व९ सांकमेधेरयजत स्मैधन्त पितृयज्ञत्वं जयति  
यस्मिन्वायुरहेमन्तस्त्रीणि च॥

[१०]

उभये युव९ सूरामुदस्थान्नि वै यस्य प्रातः सवन एकैकोऽसुर्यं पवमानः प्रजा वै सत्रमासताग्निर्वाव संवत्सरो दश॥१०॥  
उभये वा उदस्थाध्मर्वाभिर्मध्यतोऽत्र वाव ब्राह्मणेज्यं गृहमेधिन९ षट्धृष्टिः॥६६॥  
उभये वा वैषः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके चतुर्थः प्रपाठकः समाप्तः॥

॥ पञ्चमः प्रश्नः ॥

॥ तैत्तिरीयब्राह्मणे प्रथमाष्टके पञ्चमः प्रपाठकः ॥

अग्नेः कृत्तिकाः। शुक्रं परस्ताज्ज्योतिरवस्तात्। प्रजापते रोहिणी। आपः  
 परस्तादोषधयोऽवस्तात्। सोमस्येन्वका विततानि। परस्ताद्वयन्तोऽवस्तात्।  
 रुद्रस्य बाहू। मृगयवः परस्ताद्विक्षारोऽवस्तात्। अदित्यै पुनर्वसू। वातः  
 परस्तादार्द्रमवस्तात्॥१॥

बृहस्पतेस्तिष्यः। जुह्वतः परस्ताद्यजमाना अवस्तात्। सर्पाणामाश्रेषाः।  
 अभ्यागच्छन्तः परस्तादभ्यानृत्यन्तोऽवस्तात्। पितृणां मघाः। रुदन्तः  
 परस्तादपभ्रंशोऽवस्तात्। अर्यम्णः पूर्वे फल्गुनी। जाया परस्तादृषभोऽवस्तात्।  
 भगस्योत्तरे। बृहतवः परस्ताद्वहमाना अवस्तात्॥२॥

देवस्य सवितुरहस्तः। प्रसवः परस्तात्सुनिरवस्तात्। इन्द्रस्य चित्रा।  
 ऋतं परस्तात्सत्यमवस्तात्। वायोर्निष्ठा व्रततिः। परस्तादसिद्धिरवस्तात्।  
 इन्द्राग्नियोर्विशाखे। युगानि परस्तात्कृषमाणा अवस्तात्। मित्रस्यानूराधाः।

अभ्या॒रोह॑त्प॒रस्ता॑द्भ्या॒रूढ॑म॒वस्ता॑त् ॥ ३ ॥

इन्द्र॑स्य रोहि॒णी। शृ॒णत्प॒रस्ता॑त्प्रतिशृ॒णद॑वस्ता॑त्। निर्ऋ॑त्यै मूल॒वर्ह॑णी।  
प्र॒तिभ॒ञ्जन्तः॑ प॒रस्ता॑त्प्रतिशृ॒णन्तो॑ऽवस्ता॑त्। अ॒पां पूर्वा॑ अषा॒ढाः। वर्चः॑  
प॒रस्ता॑त्समि॒तिर॑वस्ता॑त्। वि॒श्वेषां॑ दे॒वाना॑मुत्त॑राः। अ॒भिज॑य॒त्प॒रस्ता॑द्भिजि॑तम॒वस्ता॑त्  
वि॒ष्णोः॑ श्रो॒णा पृ॒च्छमा॑नाः। प॒रस्ता॑त्पन्था॑ अ॒वस्ता॑त् ॥ ४ ॥

वसू॑नां॒ऽश्रवि॑ष्ठाः। भू॒तं प॒रस्ता॑द्भूति॑र॒वस्ता॑त्। इन्द्र॑स्य श॒तभि॑षक्।  
वि॒श्वव्य॑चाः प॒रस्ता॑द्वि॒श्वक्षि॑तिर॒वस्ता॑त्। अ॒जस्यै॑कप॒दः पूर्वे॑ प्रोष्ठप॒दाः। वै॒श्वान॑रं  
प॒रस्ता॑द्वै॒शवा॑वस॒वम॑वस्ता॑त्। अहे॑र्बु॒ध्रिय॑स्योत्त॑रे। अ॒भिषि॑ञ्चन्तः प॒रस्ता॑दभिषु॒ण्वन्तो॑-  
ऽवस्ता॑त्। पू॒ष्णो रे॒वती॑। गा॒वंः प॒रस्ता॑द्वि॒था अ॒वस्ता॑त्। अ॒श्विनो॑र॒श्वयु॑जौ। ग्रामः॑  
प॒रस्ता॑त्सेना॒ऽवस्ता॑त्। य॒मस्या॑प॒भर॑णीः। अ॒प॒कर्ष॑न्तः प॒रस्ता॑दप॒वह॑न्तो॒ऽवस्ता॑त्।  
पूर्णा॑ प॒श्चाद्य॑त्तै दे॒वा अ॒दधुः॑ ॥ ५ ॥ आ॒र्द्रम॑वस्ता॒द्ब्रह्मा॑ना अवस्ता॑द्भ्या॒रूढम॑वस्ता॒त्पन्था॑ अवस्ता॑द्वि॒था अवस्ता॑त्प॒ञ्च च॑ ॥ — [१]

यत्पु॒ण्यं नक्ष॑त्रम्। तद्व॒द्धुर्वी॑तोपव्युषम्। य॒दा वै सूर्य॑ उ॒देति॑। अथ॒ नक्ष॑त्रं नैति॑।



याव॑न्ति॒ तत्र॒ सूर्यो॑ गच्छे॑त्। यत्र॑ जघ्न्यं॑ पश्ये॑त्। ताव॑न्ति कुर्वीत॑ यत्का॒री स्यात्।  
पु॒ण्या॒ह ए॒व कु॑रुते। ए॒व॒ ह वै य॒ज्ञेषु॑ च श॒तद्यु॑म्नं च मा॒थ्स्यो नि॑रवसाय॒यां  
च॑कार॥६॥

यो वै न॑क्ष॒त्रियं॑ प्र॒जाप॑तिं वेद॑। उ॒भयो॑रेनं लो॒कयो॑र्विदुः। हस्तं॑ ए॒वास्य॒ हस्तः॑।  
चि॒त्रा शि॑रः। नि॒ष्ट्या हृ॑दयम्। ऊ॒रू वि॑शा॒खे। प्र॒तिष्ठा॑ऽनू॒राधाः॑। ए॒ष वै न॑क्ष॒त्रियः॑  
प्र॒जाप॑तिः। य ए॒वं वेद॑। उ॒भयो॑रेनं लो॒कयो॑र्विदुः॥७॥

अ॒स्मि॒श्चामु॑ष्मि॒श्च। यां का॒मये॑त दु॒हितरं॑ प्रि॒या स्या॑दिति॑। तां नि॒ष्ट्यायां॑  
दद्यात्। प्रि॒यैव भ॑वति। ने॒व तु पु॑न॒राग॑च्छति। अ॒भिजि॑न्नाम॒ नक्ष॑त्रम्।  
उ॒परि॑ष्ठाद॒षाढा॑नाम्। अ॒वस्ता॑च्छ्रो॒णायै॑। दे॒वा॒सुराः॑ संय॑त्ता आसन्। ते  
दे॒वास्तस्मि॑न्नक्ष॒त्रेऽभ्य॑जयन्॥८॥

यद॒भ्यज॑यन्। तद॑भि॒जितो॑ऽभिजि॒त्वम्। यं का॒मये॑तानप॒ज्यं ज॑ये॒दिति॑।  
तमे॒तस्मि॑न्नक्ष॒त्रे या॑तयेत्। अन॒प॒ज्यमे॒व ज॑यति। पा॒पप॑राजितमि॒व तु। प्र॒जा॒प॑तिः  
प॒शून॑सृजत। ते नक्ष॑त्रं नक्ष॒त्रमु॑पातिष्ठन्त। ते स॒माव॑न्त ए॒वाभ॑वन्। ते

रेवतीमुपातिष्ठन्त॥९॥

ते रेवत्यां प्राभवन्। तस्माद्देवत्यां पशूनां कुर्वीत। यत्किं चावाचीनः सोमात्।  
प्रेव भवन्ति। सुलिलं वा इदमन्तरासीत्। यदतरन्। तत्तारकाणां तारकत्वम्। यो  
वा इह यजते। अमुं स लोकं नक्षते। तन्नक्षत्राणां नक्षत्रत्वम्॥१०॥

देवगृहा वै नक्षत्राणि। य एवं वेद। गृह्यैव भवति। यानि वा इमानि  
पृथिव्याश्चित्राणि। तानि नक्षत्राणि। तस्मादक्षीलनामश्चित्रे। नावस्येन्न यजेत।  
यथा पापाहे कुरुते। तादृगेव तत्। देवनक्षत्राणि वा अन्यानि॥११॥

यमनक्षत्राण्यन्यानि। कृत्तिकाः प्रथमम्। विशाखे उत्तमम्। तानि देवनक्षत्राणि।  
अनूराधाः प्रथमम्। अपभरणीरुत्तमम्। तानि यमनक्षत्राणि। यानि देवनक्षत्राणि।  
तानि दक्षिणेन परियन्ति। यानि यमनक्षत्राणि॥१२॥

तान्युत्तरेण। अन्वेषामराध्मेति। तदनूराधाः। ज्येष्ठमेषामवधिष्मेति। तज्येष्ठघ्नी।  
मूलमेषामवृक्षामेति। तन्मूलवर्हणी। यन्नासहन्त। तदषाढाः। यदश्लोणत्॥१३॥

तच्छ्रोणा। यदशृणोत्। तच्छ्रविष्ठाः। यच्छ्रुतमभिषज्यन्। तच्छ्रुतमभिषक्।  
 प्रोष्ठपदेषूदयच्छन्त। रेवत्यामरवन्त। अश्वयुजोरयुञ्जत। अपभरणीष्वपावहन्।  
 तानि वा एतानि यमनक्षत्राणि। यान्येव दैवनक्षत्राणि। तेषु कुर्वीत यत्कारी स्यात्।  
 पुण्याह एव कुरुते॥१४॥

च॥ चकारिवं वेदोभयोरनं लोकयोर्विदुरजयत्रेवतीमुपातिष्ठन्त नक्षत्रत्वमुन्यानि यानि यमनक्षत्राण्यश्लोणद्यमनक्षत्राणि त्रीणि

[२]

देवस्य सवितुः प्रातः प्रसवः प्राणः। वरुणस्य सायमासवोऽपानः। यत्प्रतीचीनं  
 प्रातस्तनात्। प्राचीनं सङ्गवात्। ततो देवा अग्निष्टोमं निरमिमत। तत्तदात्तवीर्यं  
 निर्मार्गः। मित्रस्य सङ्गवः। तत्पुण्यं तेजस्व्यहः। तस्मात्तर्हि पशवः समायन्ति।  
 यत्प्रतीचीनं सङ्गवात्॥१५॥

प्राचीनं मध्यं दिनात्। ततो देवा उक्थ्यं निरमिमत। तत्तदात्तवीर्यं निर्मार्गः।  
 बृहस्पतेर्मध्यं दिनः। तत्पुण्यं तेजस्व्यहः। तस्मात्तर्हि तेक्षिणं तपति। यत्प्रतीचीनं  
 मध्यं दिनात्। प्राचीनमपराह्णात्। ततो देवाः षोडशिनं निरमिमत। तत्तदात्तवीर्यं  
 निर्मार्गः॥१६॥

भग॑स्यापरा॒ह्णः। तत्पु॑ण्यं तेज॒स्व्यहः॑। तस्मा॑दपरा॒ह्णे कु॑मा॒र्यो भग॑मिच्छ॒मानाश्चर॑न्ति।  
यत्प्र॑तीचीन॑मपरा॒ह्णात्। प्रा॒चीनं॑ सा॒यात्। ततो॑ दे॒वा अ॑तिरा॒त्रं निर॑मिमत्।  
तत्तदा॑त्तवी॒र्यं निर्मा॑र्गः। वरु॑णस्य सा॒यम्। तत्पु॑ण्यं तेज॒स्व्यहः॑। तस्मा॑त्तर्हि नानृ॑तं  
वदेत्॥१७॥

ब्रा॒ह्म॒णो वा अ॑ष्टावि॒ंशो नक्ष॑त्राणाम्। स॒मा॒नस्या॒हः पञ्च॑ पु॒ण्यानि॑ नक्ष॑त्राणि।  
च॒त्वार्य॑श्च॒ली॒लानि॑। तानि॑ नव॑। यच्च॑ प॒रस्ता॒न्नक्ष॑त्राणां यच्चा॒वस्ता॑त्। तान्येका॑दश।  
ब्रा॒ह्म॒णो द्वा॑दशः। य ए॒वं वि॒द्वान्त्सं॑व॒त्सरं॑ व्र॒तं चर॑ति। सं॒व॒त्सरे॑णै॒वास्य॑ व्र॒तं गुप्तं॑  
भ॑वति। स॒मा॒नस्या॒हः पञ्च॑ पु॒ण्यानि॑ नक्ष॑त्राणि। च॒त्वार्य॑श्च॒ली॒लानि॑। तानि॑ नव॑। आ॒ग्नेयी॑  
रात्रिः॑। ऐ॒न्द्रम॑हः। तान्येका॑दश। आ॒दित्यो॑ द्वा॑दशः। य ए॒वं वि॒द्वान्त्सं॑व॒त्सरं॑ व्र॒तं  
चर॑ति। सं॒व॒त्सरे॑णै॒वास्य॑ व्र॒तं गुप्तं॑ भ॑वति॥१८॥

पञ्च पुण्यानि नक्षत्राण्यष्टौ च॥

सङ्गुवाथ्योऽशिनं निरमिमत् तत्तदात्तवीर्यं निर्मार्गो वंदेद्ववति समानस्याहः

[३]

ब्र॒ह्म॒वा॒दिनो॑ वदन्ति। कति॑ पात्राणि य॒ज्ञं वह॑न्तीति॑। त्रयो॑दशेति॑ ब्रूयात्। स

यद्व्यात्। कस्तानि निरमिमीतेति। प्रजापतिरिति ब्रूयात्। स यद्व्यात्। कुतस्तानि  
निरमिमीतेति। आत्मन इति। प्राणापानाभ्यामेवोपाऽश्वन्तर्यामौ निरमिमीत॥१९॥

व्यानादुपाऽशुसवनम्। वाच ऐन्द्रवायवम्। दक्षऋतुभ्यां मैत्रावरुणम्।  
श्रोत्रादाश्विनम्। चक्षुषः शुक्रामन्थिनौ। आत्मन आग्रयणम्। अङ्गेभ्य उक्थ्यम्।  
आयुषो ध्रुवम्। प्रतिष्ठायां ऋतुपात्रे। यज्ञं वाव तं प्रजापतिर्निरमिमीत। स निर्मितो  
नाद्धियत् समंवीयत। स एतान्प्रजापतिरपिवापानपश्यत्। तां निरवपत्। तैर्वै  
स यज्ञमप्यवपत्। यदपिवापा भवन्ति। यज्ञस्य धृत्या असंल्लयाय॥२०॥

उपाऽश्वन्तर्यामौ

निरमिमीतामिमीत् षट्॥

[४]

ऋतमेव परमेष्ठि। ऋतं नात्येति किञ्चन। ऋते समुद्र आहितः।  
ऋते भूमिरियऽश्रिता। अग्निस्तिग्मेन शोचिषा। तप आक्रान्तमुष्णिहा।  
शिरस्तपस्याहितम्। वैश्वानरस्य तेजसा। ऋतेनास्य नि वर्तये। सत्येन परि  
वर्तये। तपसाऽस्यानु वर्तये। शिवेनास्योप वर्तये। शग्मेनास्याभि वर्तये। तदृतं  
तत्सत्यम्। तदृतं तच्छुकेयम्। तेन शकेयं तेन राध्यासम्॥२१॥

यद्घर्मः पर्यवर्तयत्। अन्तान्पृथिव्या दिवः। अग्निरीशान् ओजसा। वरुणो  
 धीतिभिः सह। इन्द्रो मरुद्भिः सखिभिः सह। अग्निस्तिग्मेन शोचिषा। तप  
 आक्रान्तमुष्णिहा। शिरस्तपस्याहितम्। वैश्वानरस्य तेजसा। ऋतेनास्य नि वर्तये।  
 सत्येन परि वर्तये। तपसाऽस्यानु वर्तये। शिवेनास्योप वर्तये। शग्मेनास्याभि  
 वर्तये। तदृतं तथ्सत्यम्। तद्वृतं तच्छुकेयम्। तेन शकेयं तेन राध्यासम्॥२२॥

यो अस्याः पृथिव्यास्त्वचि। निवर्तयत्योषधीः। अग्निरीशान् ओजसा। वरुणो  
 धीतिभिः सह। इन्द्रो मरुद्भिः सखिभिः सह। अग्निस्तिग्मेन शोचिषा। तप  
 आक्रान्तमुष्णिहा। शिरस्तपस्याहितम्। वैश्वानरस्य तेजसा। ऋतेनास्य नि वर्तये।  
 सत्येन परि वर्तये। तपसाऽस्यानु वर्तये। शिवेनास्योप वर्तये। शग्मेनास्याभि  
 वर्तये। तदृतं तथ्सत्यम्। तद्वृतं तच्छुकेयम्। तेन शकेयं तेन राध्यासम्॥२३॥

एकं मासमुदसृजत्। परमेष्ठी प्रजाभ्यः। तेनाभ्यो मह आवहत्। अमृतं  
 मर्त्याभ्यः। प्रजामनु प्र जायसे। तदु ते मर्त्यामृतम्। येन मासा अर्धमासाः।  
 ऋतवः परिवत्सराः। येन ते ते प्रजापते। ईजानस्य न्यवर्तयन्। तेनाहमस्य

ब्रह्मणा। निर्वर्तयामि जीवसे। अग्निस्तिग्मेन शोचिषा। तप आक्रान्तमुष्णिहा।  
 शिरस्तपस्याहितम्। वैश्वानरस्य तेजसा। ऋतेनास्य नि वर्तये। सत्येन परि  
 वर्तये। तपसाऽस्यानु वर्तये। शिवेनास्योप वर्तये। शग्मेनास्याभि वर्तये। तद्वृतं  
 तत्सत्यम्। तद्वृतं तच्छुकेयम्। तेन शकेयं तेन राध्यासम्॥२४॥  
 राध्यासं न्यवर्तयन्नुपवर्तये चत्वारि च। (ऋतमेव षोडश। यद्घर्मो यो अस्याः सप्तदशसप्तदश। एकं मासं चतुर्विंशतिः)॥ [५]

देवा वै यद्यज्ञेऽकुर्वता। तदसुरा अकुर्वता। तेऽसुरा ऊर्ध्वं पृष्ठेभ्यो नापश्यन्। ते  
 केशानग्रेऽवपन्ता। अथ श्मश्रूणि। अथोपपक्षौ। ततस्तेऽवाञ्च आयन्। पराऽभवन्।  
 यस्यैवं वपन्ति। अवाङ्मेति॥२५॥

अथो परैव भवति। अथ देवा ऊर्ध्वं पृष्ठेभ्योऽपश्यन्। त उपपक्षावग्रेऽवपन्ता।  
 अथ श्मश्रूणि। अथ केशान्। ततस्तेऽभवन्। सुवर्गं लोकमायन्। यस्यैवं वपन्ति।  
 भवत्यात्मना। अथो सुवर्गं लोकमेति॥२६॥

अथैतन्मनुर्वप्रे मिथुनमपश्यत्। स श्मश्रूण्यग्रेऽवपत्। अथोपपक्षौ। अथ  
 केशान्। ततो वै स प्राजायत प्रजया पशुभिः। यस्यैवं वपन्ति। प्र प्रजया

प॒शुभिर्मि॑थुनैर्जा॒यते। दे॒वा॒सु॒राः संय॑त्ता आसन्। ते सं॒वत्स॒रे व्याय॑च्छन्त।  
तान्दे॒वाश्चा॑तुर्मा॒स्यैरे॒वाभि प्रायु॑ञ्जत॥२७॥

वै॒श्वदे॒वेन॑ च॒तुरो॑ मा॒सोऽवृ॑ञ्जतेन्द्रा॒जानः। ताञ्छी॒रुषं॑ नि चाव॑र्तयन्त॒ परि॑ च।  
व॒रुण॑प्र॒घासै॑श्चतुरो॑ मा॒सोऽवृ॑ञ्जत॒ वरु॑णरा॒जानः। ताञ्छी॒रुषं॑ नि चाव॑र्तयन्त॒ परि॑ च।  
सा॒क॒मे॒धैश्चतुरो॑ मा॒सोऽवृ॑ञ्जत॒ सोम॑रा॒जानः। ताञ्छी॒रुषं॑ नि चाव॑र्तयन्त॒ परि॑ च। या  
सं॒वत्स॒र उ॑पजी॒वाऽऽसी॑त्। तामे॑षामवृ॒ञ्जत। ततो॑ दे॒वा अभ॑वन्। परा॑ऽसु॒राः॥२८॥

य ए॒वं वि॒द्वाऽश्चा॑तुर्मा॒स्यैर्य॑जते। भ्रातृ॑व्यस्यै॒व मा॒सो वृ॑क्त्वा। शी॒रुषं॑ नि च  
व॒र्तय॑ते॒ परि॑ च। यैषा सं॒वत्स॒र उ॑पजी॒वा। वृ॒द्धे तां॑ भ्रातृ॑व्यस्य। क्षु॒धाऽस्य॑ भ्रातृ॑व्यः  
परा॑ भवति। लो॒हिता॒य॒सेन॑ नि व॑र्तयते। यद्वा इ॒माम॒ग्नि॒ऋता॒वाग॑ते निव॒र्तय॑ति।  
ए॒तदे॒वैना॑रू॒पं कृ॑त्वा निव॑र्तयति। सा ततः॒ श्वश्वो॑ भूय॑सी॒ भव॑न्त्येति॥२९॥

प्र जा॒यते। य ए॒वं वि॒द्वाँल्लो॑हिता॒य॒सेन॑ निव॑र्तयते। ए॒तदे॒व रू॒पं कृ॑त्वा नि  
व॑र्तयते। स ततः॒ श्वश्वो॑ भूयान्भ॒वन्ने॒ति। प्रै॒व जा॑यते। त्रे॒ण्या श॑ल॒ल्या नि व॑र्तयेत।



त्रीणि त्रीणि वै देवानांमृद्धानि। त्रीणि छन्दांसि। त्रीणि सर्वानानि। त्रयं इमे  
लोकाः॥ ३०॥

ऋध्यामेव तद्वीर्यं एषु लोकेषु प्रति तिष्ठति। यच्चातुर्मास्ययाज्यात्मनो नावद्येत्।  
देवेभ्य आवृश्चेत्। चतृषु चतृषु मासेषु नि वर्तयेत्। परोक्षमेव तद्देवेभ्य आत्मनो-  
ऽवद्यत्यनात्रस्काय। देवानां वा एष आनीतः। यश्चातुर्मास्ययाजी। य एवं विद्वान्नि च  
वर्तयते परि च। देवता एवाप्येति। नास्य रुद्रः प्रजां पशून्भि मन्यते॥ ३१॥ एत्येत्ययुञ्जतासुरा  
एति लोका मन्यते॥ [६]

आयुषः प्राणं सन्तनु। प्राणादपानं सन्तनु। अपानाद्व्यानं सन्तनु।  
व्यानाच्चक्षुः सन्तनु। चक्षुषः श्रोत्रं सन्तनु। श्रोत्रान्मनः सन्तनु। मनसो वाचं  
सन्तनु। वाच आत्मानं सन्तनु। आत्मनः पृथिवीं सन्तनु। पृथिव्या अन्तरिक्षं  
सन्तनु। अन्तरिक्षादिवं सन्तनु। दिवः सुवः सन्तनु॥ ३२॥ अन्तरिक्षं सन्तनु द्वे च॥—[७]

इन्द्रो दधीचो अस्थभिः। वृत्राण्यप्रतिष्कुतः। जघान नवतीर्नवा। इच्छन्नश्वस्य  
यच्छिरः। पर्वतेष्वपश्रितम्। तद्विदच्छर्यणावति। अत्राह गोरमन्वत। नाम

त्वष्टुरपीच्यम्। इत्था चन्द्रमंसो गृहे। इन्द्रमिद्राथिनो बृहत्॥३३॥

इन्द्रमर्केभिरर्किणः। इन्द्रं वाणीरनूषत। इन्द्र इद्धर्योः सचा। सम्मिश्र आवचो  
युजा। इन्द्रो वज्री हिरण्ययः। इन्द्रो दीर्घाय चक्षसे। आ सूर्यः रोहयद्विवि। वि  
गोभिरद्रिमैरयत्। इन्द्र वाजेषु नो अवा। सहस्रप्रधनेषु च॥३४॥

उग्र उग्राभिरूतिभिः। तमिन्द्रं वाजयामसि। महे वृत्राय हन्तवे। स वृषा वृषभो  
भुवत्। इन्द्रः स दामने कृतः। ओजिष्ठः स बलं हितः। द्युम्नी श्लोकी स सौम्यः।  
गिरा वज्रो न सम्भृतः। सबलो अनपच्युतः। ववक्षुरुग्रो अस्तृतः॥३५॥ बृहच्चास्तृतः॥ [८]

देवासुराः संयत्ता आसन्। स प्रजापतिरिन्द्रं ज्येष्ठं पुत्रमप न्यधत्। नेदेनमसुरा  
बलीयांसोऽहनन्निति। प्रहादो ह वै कायाधवः। विरोचनः स्वं पुत्रमप न्यधत्।  
नेदेनं देवा अहनन्निति। ते देवाः प्रजापतिमुपसमेत्योचुः। नाराजकस्य युद्धमस्ति।  
इन्द्रमन्विच्छामेति। तं यज्ञक्रतुभिरन्वैच्छन्॥३६॥

तं यज्ञक्रतुभिर्नान्वविन्दन्। तमिष्टिभिरन्वैच्छन्। तमिष्टिभिरन्वविन्दन्।

तदिष्टीनामिष्टित्वम्। एष्टयो ह वै नाम। ता इष्टयु इत्याचक्षते पुरोक्षेण।  
पुरोक्षप्रिया इव हि देवाः। तस्मा एतमाग्नावैष्णवमेकादशकपालं दीक्षणीयं  
निरवपन्। तदपद्रुत्यातन्वत। तान्पत्नीसंयाजान्तु उपानयन्॥३७॥

ते तदन्तमेव कृत्वोदद्रवन्। ते प्रायणीयमभि समारोहन्। तदपद्रुत्यातन्वत।  
ताञ्छ्रय्वन्तु उपानयन्। ते तदन्तमेव कृत्वोदद्रवन्। त आतिथ्यमभि समारोहन्।  
तदपद्रुत्यातन्वत। तानिडान्तु उपानयन्। ते तदन्तमेव कृत्वोदद्रवन्। तस्मादेता  
एतदन्ता इष्टयुः सन्तिष्ठन्ते॥३८॥

एव९ हि देवा अकुर्वत। इति देवा अकुर्वत। इत्यु वै मनुष्याः कुर्वते। ते देवा  
ऊचुः। यद्वा इदमुच्चैर्यज्ञेन चराम। तन्नोऽसुराः पाप्माऽनुविन्दन्ति। उपा९शूपसदा  
चराम। तथा नोऽसुराः पाप्मा नानुवेत्स्यन्तीति। त उपा९शूपसदमतन्वत। तिस्र  
एव सामिधेनीरनूच्य॥३९॥

स्रुवेणाघारमाघार्य। तिस्रः पराचीराहुतीरहुत्वा। स्रुवेणोपसदं जुह्वां चक्रुः। उग्रं

वचो॒ अपा॑वधी॒न्त्वेषं॑ वचो॒ अपा॑वधी॒ऽ स्वाहेति॑। अ॒श॒न॒या॒पिपा॑से ह॒ वा उ॒ग्रं वचः॑।  
 ए॒नंश्च॒ वैर॑ह॒त्यं च त्वे॒षं वचः॑। ए॒त॒ ९ ह॒ वाव॑ तच्च॑तु॒र्धावि॑हितं पा॒प्मानं॑ दे॒वा अप॑जघ्निरे।  
 तथो॑ ए॒वैतदे॑वंवि॒द्यज॑मानः। ति॒स्र ए॒व सा॑मि॒धेनी॒र॒नूच्य॑। सु॒वेणा॑घा॒रमा॑घार्य॥४०॥

ति॒स्रः परा॑ची॒राहु॑ती॒रुह॑त्वा। सु॒वेणो॑प॒सदं॑ जुहोति। उ॒ग्रं वचो॒ अपा॑वधी॒न्त्वेषं॑  
 वचो॒ अपा॑वधी॒ऽ स्वाहेति॑। अ॒श॒न॒या॒पिपा॑से ह॒ वा उ॒ग्रं वचः॑। ए॒नंश्च॒ वैर॑ह॒त्यं च  
 त्वे॒षं वचः॑। ए॒तमे॒व तच्च॑तु॒र्धावि॑हितं पा॒प्मानं॑ यज॑मानोऽप॑ हते। तेऽभि॒नीये॑वाहः  
 प॒शुमा॑ऽल॒भन्त। अहं॑ ए॒व तद्दे॒वा अव॑र्ति पा॒प्मानं॑ मृ॒त्युमप॑जघ्निरे। तेना॑भि॒नीये॑व  
 रा॒त्रेः प्राच॑रन्। रा॒त्रिया॑ ए॒व तद्दे॒वा अव॑र्ति पा॒प्मानं॑ मृ॒त्युमप॑जघ्निरे॥४१॥

तस्मा॑दभि॒नीये॑वाहः प॒शुमा॑ ल॒भेत। अहं॑ ए॒व तद्यज॑मानोऽव॑र्ति पा॒प्मानं॑  
 भ्रातृ॑व्या॒नपं॑ नुदते। तेना॑भि॒नीये॑व रा॒त्रेः प्रच॑रेत्। रा॒त्रिया॑ ए॒व तद्यज॑मानोऽव॑र्ति  
 पा॒प्मानं॑ भ्रातृ॑व्या॒नपं॑ नुदते। स ए॒ष उ॑पवस॒थीये॑ऽहं द्वि॒देव॑त्यः प॒शुरा॑ ल॒भ्यते।  
 द्वयं॑ वा अ॒स्मिँल्लो॒के यज॑मानः। अ॒स्थिं च मा॒९सं च॑। अ॒स्थिं चै॒व तेन॑ मा॒९सं च॑

यजमानः सः स्फुरते। ता वा एताः पञ्च देवताः। अग्नीषोमावग्निर्मित्रावरुणौ॥४२॥

पञ्चपञ्ची वै यजमानः। त्वङ्मांसः स्नावाऽस्थि मज्जा। एतमेव  
तत्पञ्चधाविहितमात्मानं वरुणपाशान्मुञ्चति। भेषजतायै निर्वरुणत्वाय। तः  
सप्तभिश्छन्दाभिः प्रातरह्वयन्। तस्मात्सप्त चतुरुत्तराणि छन्दांसि प्रातरनुवाके-  
ऽनूच्यन्ते। तमेतयोपसमेत्योपासीदन्। उपास्मै गायता न इति। तस्मादेतया  
बहिष्पवमान उपसद्यः॥४३॥

एच्छन्नयः स्तिष्ठन्तेऽनूच्यानूच्यं सुवेणाधारमाधार्य रात्रिया एव तद्देवा अवर्ति पाप्मानं मृत्युमपजग्निरे  
मित्रावरुणौ नवं च (देवा यजमानो देवा देवा यजमानो यजमानः प्राचरं प्रचरदालंभन्तालंभेत मृत्युमपजग्निरे भ्रातृव्यान्॥)॥ [१]

स संमुद्र उत्तरतः प्राज्वलद्भूम्यन्तेन। एष वाव स संमुद्रः। यच्चात्वालः। एष  
उवेव स भूम्यन्तः। यद्वेद्यन्तः। तदेतत्रिशलं त्रिपूरुषम्। तस्मात्तं त्रिवितस्तं खनन्ति।  
स सुवर्णरजताभ्यां कुशीभ्यां परिगृहीत आसीत्। तं यदस्या अध्यजनयन्।  
तस्मादादित्यः॥४४॥

अथ यथसुवर्णरजताभ्यां कुशीभ्यां परिगृहीत आसीत्। साऽस्य कौशिकता।  
तं त्रिवृताऽभि प्रास्तुवत। तं त्रिवृताऽददत। तं त्रिवृताऽहरन्। यावती त्रिवृतो

मात्रा॥ तं पञ्चदशेनाभि प्रास्तुवत। तं पञ्चदशेनाददत। तं पञ्चदशेनाहरन्। यावती  
पञ्चदशस्य मात्रा॥४५॥

त९ सप्तदशेनाभि प्रास्तुवत। त९ सप्तदशेनाददत। त९ सप्तदशेनाहरन्।  
यावती सप्तदशस्य मात्रा॥ तस्य सप्तदशेन ह्रियमाणस्य तेजो हरोऽपतत्।  
तमेकविंशेनाभि प्रास्तुवत। तमेकविंशेनाददत। तमेकविंशेनाहरन्।  
यावत्येकविंशस्य मात्रा॥ ते यत्रिवृता स्तुवते॥४६॥

त्रिवृतैव तद्यजमानमाददते। तं त्रिवृतैव हरन्ति। यावती त्रिवृतो मात्रा॥  
अग्निर्वै त्रिवृत्। यावद्वा अग्नेर्दहतो धूम उदेत्यानु व्येति। तावती त्रिवृतो मात्रा॥  
अग्नेरेवैनं तत्। मात्रा९ सायुज्य९ सलोकतां गमयन्ति। अथ यत्पञ्चदशेन  
स्तुवते। पञ्चदशेनैव तद्यजमानमाददते॥४७॥

तं पञ्चदशेनैव हरन्ति। यावती पञ्चदशस्य मात्रा॥ चन्द्रमा वै पञ्चदशः। एष हि  
पञ्चदश्यामपक्षीयते। पञ्चदश्यामापूर्यते। चन्द्रमस एवैनं तत्। मात्रा९ सायुज्य९

सलो॒कतां॑ गमयन्ति। अथ॒ यत्सप्त॑द॒शेन॑ स्तुवते॑। स॒प्तद॒शेनै॒व तद्यज॑मान॒माद॑दते।  
त॒ ५ स॑प्तद॒शेनै॒व ह॑रन्ति॥४८॥

याव॑न्ती सप्तद॒शस्य॑ मा॒त्रा॑। प्र॒जाप॑तिर्वै स॑प्तद॒शः। प्र॒जाप॑तेरे॒वैनं॑ तत्। मा॒त्रा॒ ५  
सायु॑ज्य॒ ५ सलो॒कतां॑ गमयन्ति। अथ॒ यदे॑कवि॒ंशेन॑ स्तुवते॑। ए॒कवि॒ंशेनै॒व  
तद्यज॑मान॒माद॑दते। तमे॑कवि॒ंशेनै॒व ह॑रन्ति। याव॑त्येकवि॒ंशस्य॑ मा॒त्रा॑। अ॒सौ  
वा आ॑दित्य ए॒कवि॒ंशः। आ॒दित्यस्यै॒वैनं॑ तत्॥४९॥

मा॒त्रा॒ ५ सायु॑ज्य॒ ५ सलो॒कतां॑ गमयन्ति। ते कु॒श्यौ॑। व्य॒घ्नन्। ते अ॑होरा॒त्रे  
अ॑भवताम्। अह॑रे॒व सु॒वर्णा॑ऽभवत्। र॒ज॒ता रा॒त्रिः। स यदा॑दित्य उ॒देति॑।  
ए॒तामे॒व तत्सु॒वर्णां॑ कु॒शीम॑नु॒ समै॑ति। अथ॒ यद॑स्त॒मेति॑। ए॒तामे॒व तद्र॑ज॒तां  
कु॒शीम॑नु॒संवि॑शति। प्र॒ह्लादो॑ ह॒ वै का॑याध॒वः। वि॒रोच॑न॒ ५ स्वं पु॒त्रमु॑दा॒स्यत्। स  
प्र॑द॒रोऽभव॑त्। तस्मा॑त्प्र॒दरा॑दु॒दकं॑ नाचा॑मेत्॥५०॥

आ॒दित्यः पञ्च॑द॒शस्य॑ मा॒त्रा॑ स्तुवते॑ पञ्च॑द॒शेनै॒व तद्यज॑मान॒माद॑दते  
सप्त॑द॒शेनै॒व ह॑रन्त्यादित्यस्यै॒वैनं॑ तद्वि॑शति च॒त्वारि॑ च॥

ये वै च॒त्वारः स्तोमाः॑। कृतं तत्। अथ॒ ये पञ्च॑। कलिः सः। तस्माच्चतुष्टोमः।  
तच्चतुष्टोमस्य चतुष्टोमत्वम्। तदाहुः। क॒त॒मानि॒ तानि॒ ज्योती॑ऽषि। य ए॒तस्य॒ स्तोमा॒  
इति॑। त्रि॒वृत्पञ्चद॒शः सप्त॑द॒श ए॒कवि॑ऽशः॥५१॥

ए॒तानि॒ वाव॒ तानि॒ ज्योती॑ऽषि। य ए॒तस्य॒ स्तोमाः॑। सोऽब्र॑वीत्। स॒प्तद॒शेन॑  
ह्रिय॑माणो व्य॒लेशि॑षि। भि॒षज्य॑त॒ मेति॑। तम॒श्विनौ॑ धा॒नाभि॑रभिषज्यताम्। पू॒षा  
क॑र॒म्भेण॑। भा॒रती॑ परिवा॒पेण॑। मि॒त्रावरु॑णौ पय॒स्यया॑। तदाहुः॥५२॥

यद॒श्विभ्या॑ धा॒नाः। पू॒ष्णः क॑र॒म्भः। भा॒रत्यै॑ परिवा॒पः। मि॒त्रावरु॑णयोः  
पय॒स्याऽथ॑। कस्मा॑दे॒तेषां॑ ह॒विषा॒मिन्द्र॑मेव य॒जन्तीति॑। ए॒ता ह्ये॒नं दे॒वता॒ इति॑  
ब्रू॒यात्। ए॒तैर्ह॒विर्भि॑रभिषज्य॒ऽस्तस्मा॑दिति॑। तं वस॑वोऽष्टाक॑पालेन प्रातः सव॒ने-  
ऽभिष॑ज्यन्। रु॒द्रा एका॑दशकपालेन॒ माध्यं॑ दिने॒ सव॑ने। वि॒श्वे दे॒वा द्वा॑दशकपालेन  
तृतीय॑सव॒ने॥५३॥

स यद॒ष्टाक॑पालान्प्रातः सव॒ने कुर्या॑त्। एका॑दशकपालान्माध्यं॑ दिने॒ सव॑ने।



द्वादशकपालां॑ स्तृतीयसव॒ने। विलो॑म॒ तद्य॒ज्ञस्य॑ क्रियेत। एका॑दशकपालाने॒व  
 प्रा॒तः सव॒ने कुर्या॑त्। एका॑दशकपाला॒न्माध्यं॑ दिने॒ सव॑ने। एका॑दशकपालां॑-  
 स्तृतीयसव॒ने। य॒ज्ञस्य॑ सलो॒म॒त्वाय॑। तदा॑हुः। यद्व॒सूनां॑ प्रा॒तः सव॑नम्। रु॒द्राणां॑  
 माध्यं॑ दि॒न॒ः सव॑नम्। विश्वे॑षां दे॒वानां॑ तृतीयसव॑नम्। अथ॒ कस्मा॑दितेषां॑  
 ह॒विषा॑मिन्द्र॒मे॒व य॑ज॒न्तीति॑। ए॒ता ह्ये॑नं दे॒वता॒ इति॑ ब्रूयात्। ए॒तैर्ह॒विर्भि॑रभि॒-  
 ष॒ज्य॒ः स्तस्मा॑दिति॑॥५४॥ एक॒विं॒श आ॑हुस्तृतीयसव॒ने प्रा॒तः सव॑नं पञ्च॒ च॥ [११]

तस्यावा॑चोऽवपा॒दाद॑बिभयुः। तमे॒तेषु॑ स॒प्तसु॑ छन्दः॒ स्वश्र॑यन्। यदश्र॑यन्।  
 तच्छ्रा॑य॒न्तीय॑स्य श्राय॒न्तीय॑त्वम्। यदवा॑रयन्। तद्वा॑रव॒न्तीय॑स्य वा॒रव॑न्तीय॒त्वम्।  
 तस्यावा॑च ए॒वाव॑पा॒दाद॑बिभयुः। तस्मा॑ ए॒तानि॑ स॒प्त च॑तु॒रुत्तरा॑णि छन्दा॒ः स्यु॑पा॒दधुः।  
 तेषा॑मति॒ त्री॒ण्य॑रिच्यन्त। न त्री॒ण्युद॑भवन्॥५५॥

स बृ॒हती॑मे॒वास्पृ॑शत्। द्वाभ्या॑म॒क्षरा॑भ्याम्। अ॒होरा॒त्राभ्या॑मे॒व। तदा॑हुः। क॒त॒मा  
 सा दे॒वाक्ष॑रा बृ॒हती॑। यस्या॒न्तत्प्र॑त्यतिष्ठत्। द्वाद॑श पौ॒र्णमा॒स्यः। द्वाद॑शाष्ट॒काः।  
 द्वाद॑शामावा॒स्याः। ए॒षा वा॒व सा दे॒वाक्ष॑रा बृ॒हती॑॥५६॥

यस्यां तत्प्रत्यतिष्ठदिति। यानि च छन्दांस्यत्यरिच्यन्त। यानि च नोदभवन्। तानि निर्वीर्याणि हीनान्यमन्यन्त। साऽब्रवीद्बृहती। मामेव भूत्वा। मामुप सः श्रयतेति। चतुर्भिरक्षरैरनुष्टुग्बृहतीं नोदभवत्। चतुर्भिरक्षरैः पङ्क्तिर्बृहती- मत्यरिच्यत। तस्यामेतानि चत्वार्यक्षराण्यपच्छिद्यादधात्॥ ५७ ॥

ते बृहती एव भूत्वा। बृहतीमुप समश्रयताम्। अष्टाभिरक्षरैरुष्णिग्बृहतीं नोदभवत्। अष्टाभिरक्षरैस्त्रिष्टुग्बृहतीमत्यरिच्यत। तस्यामेतान्यष्टावक्षराण्यपच्छिद्या- दधात्। ते बृहती एव भूत्वा। बृहतीमुप समश्रयताम्। द्वादशभिरक्षरैर्गायत्री बृहतीं नोदभवत्। द्वादशभिरक्षरैर्जगती बृहतीमत्यरिच्यत। तस्यामेतानि द्वादशाक्षराण्यपच्छिद्यादधात्॥ ५८ ॥

ते बृहती एव भूत्वा। बृहतीमुप समश्रयताम्। सोऽब्रवीत्प्रजापतिः। छन्दांसि रथो मे भवत। युष्माभिरहमेतमध्वानमनु सञ्चराणीति। तस्य गायत्री च जगती च पक्षावभवताम्। उष्णिक् त्रिष्टुप् प्रष्ट्यौ। अनुष्टुप् पङ्क्तिश्च धुर्यौ। बृहत्येवोद्धिरभवत्।

स ए॒तं छ॑न्दो॒र॒थमा॒स्थाय॑। ए॒तम॑ध्वा॒न॒मनु॑ सम॑चरत्। ए॒त॒ ह॒ वै छ॑न्दो॒र॒थमा॒स्थाय॑।  
 ए॒तम॑ध्वा॒न॒मनु॑ स॒ञ्चर॑ति। येनै॒ष ए॒तत्स॒ञ्चर॑ति। य ए॒वं वि॒द्वान्त्सोमे॑न॒ यज॑ते। य उ॑  
 चै॒नमे॒वं वेद॑॥५९॥ अ॒भ॒व॒न्वाव॑ सा दे॒वाक्ष॑रा बृ॒ह॒त्य॒दधा॑द्वा॒द॒शाक्ष॑रा॒ण्य॒प॒च्छि॒द्या॒दधा॑दा॒स्याय॑ प॒द्व॥ [१२]

अ॒ग्नेः क॑र्त्तिका॒ यत्पु॑ण्यं दे॒वस्य॑ स॒वितु॑र्ब्र॒ह्मवा॑दि॒नः क॑त्यु॒तमे॒व दे॒वा वा आ॑युषः प्रा॒णमि॒न्द्रो॑ द॒धी॒चो दे॒वासुराः॑ स प्र॒जाप॑तिः स सं॒मुद्रो॑ ये वै च॒त्वार॑स्त॒स्यावा॑चो  
 द्वा॒द॒श॥१२॥

अ॒ग्नेः क॑र्त्तिका दे॒वगृ॑हा ऋ॒तमे॒वर्ध्या॑मे॒व ति॒स्रः परा॑चीर्ये॒ वै च॒त्वारो॑ न॒वप॑ञ्चा॒शत्॥५९॥

अ॒ग्नेः क॑र्त्तिका॒ य उ॑ चै॒नमे॒वं वेद॑॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके पञ्चमः प्रपाठकः समाप्तः॥

॥ षष्ठमः प्रश्नः ॥

॥ तैत्तिरीयब्राह्मणे प्रथमाष्टके षष्ठः प्रपाठकः ॥

अनुमत्यै पुरोडाशमष्टाकपालं निर्वपति। ये प्रत्यञ्चः शम्याया अवशीयन्ते। तन्नैर्ऋतमेककपालम्। इयं वा अनुमतिः। इयं निर्ऋतिः। नैर्ऋतेन पूर्वेण प्रचरति। पाप्मानमेव निर्ऋतिं पूर्वां निरवदयते। एककपालो भवति। एकधैव निर्ऋतिं निरवदयते। यदहुत्वा गार्हपत्य ईयुः॥१॥

रुद्रो भूत्वाऽग्निरनूत्थाय। अध्वर्युं च यजमानं च हन्यात्। वीहि स्वाहा-  
ऽऽहुतिं जुषाण इत्याह। आहुत्यैवैनं शमयति। नार्तिमाच्छत्यध्वर्युर्न यजमानः। एकोल्मुकेन यन्ति। तद्धि निर्ऋत्यै भागधेयम्। इमान्दिशं यन्ति। एषा वै निर्ऋत्यै दिक्। स्वायामेव दिशि निर्ऋतिं निरवदयते॥२॥

स्वकृतं इरिणे जुहोति प्रदरे वा। एतद्वै निर्ऋत्या आयतनम्। स्व एवायतने निर्ऋतिं निरवदयते। एष ते निर्ऋते भाग इत्याह। निर्दिशत्यैवैनम्। भूते

ह॒विष्म॑त्य॒सीत्या॑ह। भू॒तिमे॒वोपा॑वर्तते। मु॒ञ्चेम॑म॒हंस॒ इत्या॑ह। अ॒हंस॒ ए॒वैनं॑  
मुञ्च॑ति। अ॒ङ्गुष्ठा॑भ्यां जुहोति॥३॥

अ॒न्त॒त ए॒व नि॒र्ऋ॑तिं नि॒रव॑दयते। कृ॒ष्णं वा॑सः कृ॒ष्णातू॑षं दक्षि॑णा। ए॒तद्वै  
नि॒र्ऋ॑त्यै रू॒पम्। रू॒पेणै॒व नि॒र्ऋ॑तिं नि॒रव॑दयते। अ॒प्र॒तीक्ष॑माय॑न्ति। नि॒र्ऋ॑त्या  
अ॒न्त॒र्हि॒त्यै। स्वा॒हा नमो॑ य इ॒दं च॑का॒रेति॑ पुन॒रेत्य॑ गा॒र्ह॒पत्ये॑ जुहोति। आ॒हु॒त्यै॒व  
न॑म॒स्यन्तो॒ गा॒र्ह॒पत्य॑मु॒पाव॑र्तन्ते। आ॒नु॒म॒तेन॒ प्रच॑रति। इ॒यं वा अ॒नु॒म॒तिः॥४॥

इ॒यमे॒वास्मै॑ रा॒ज्यम॑नु॒ मन्य॑ते। धे॒नु॒र्दक्षि॑णा। इ॒मामे॒व धे॒नुं कु॑रुते। आ॒दि॒त्यं च॒रुं  
नि॒र्व॑पति। उ॒भयी॑ष्वे॒व प्र॒जास्व॑भिषि॑च्यते। दै॒वीषु॑ च॒ मानु॑षीषु च। व॒रो दक्षि॑णा।  
व॒रो हि रा॒ज्यं॑ स॒मृद्धौ॑। आ॒ग्ना॒वैष्ण॑वमेका॑दशक॒पालं॑ नि॒र्व॑पति। अ॒ग्निः सर्वा॑  
दे॒वताः॥५॥

विष्णु॑र्य॒ज्ञः। दे॒वता॑श्चै॒व य॒ज्ञं चा॒व रु॒न्धे। वा॒म॒नो व॒ही दक्षि॑णा। यद्व॒ही।  
तेना॑ऽऽग्ने॒यः। यद्वा॑म॒नः। तेन॑ वैष्ण॒वः स॒मृद्धौ॑। अ॒ग्नी॒षोमी॒यमे॑का॑दशक॒पालं॑

निर्वपति। अ॒ग्नी॒षो॒माभ्यां॑ वा इन्द्रो वृ॒त्रम॑ह॒न्निति॑। यद॑ग्नी॒षो॒मी॒य॒मेका॑दशकपालं  
निर्वपति॥६॥

वा॒र्त्र॒घ्नमे॒व विजि॑त्यै। हि॒र॒ण्यं दक्षि॑णा॒ समृ॑द्धौ। इन्द्रो वृ॒त्रं ह॒त्वा।  
दे॒वता॑भिश्चेन्द्रि॒येण॑ च॒ व्या॑र्ध्यत। स ए॒तमै॑न्द्रा॒ग्रमे॑का॒दश॑कपालमपश्यत्।  
तन्नि॑रवपत्। तेन॒ वै स दे॒वता॑श्चेन्द्रि॒यं चावा॑रुन्ध। यदै॑न्द्रा॒ग्रमे॑का॒दश॑कपालं  
निर्वपति। दे॒वता॑श्चै॒व तेनै॑न्द्रि॒यं च॒ यज॑मा॒नोऽव॑ रुन्धे। ऋ॒षभो॒ वही॒ दक्षि॑णा॥७॥

यद्व॒ही। तेना॑ऽऽग्ने॒यः। यदृ॑षभः। तेनै॒न्द्रः समृ॑द्धौ। आ॒ग्ने॒यम॒ष्टाक॑पालं॒ निर्व॑पति।  
ऐ॒न्द्रं दधि॑। यदा॑ग्ने॒यो भव॑ति। अ॒ग्निर्वै य॑ज्ञमु॒खम्। य॒ज्ञमु॒खमे॒वर्द्धि॑ पुरस्ता॑द्धत्ते।  
यदै॒न्द्रं दधि॑॥८॥

इन्द्रि॒यमे॒वाव॑ रुन्धे। ऋ॒षभो॒ वही॒ दक्षि॑णा। यद्व॒ही। तेना॑ऽऽग्ने॒यः। यदृ॑षभः।  
तेनै॒न्द्रः समृ॑द्धौ। याव॑ती॒र्वै प्र॒जा ओष॑धीना॒महु॑ताना॒माश्जन्। ताः परा॑ऽभवन्।  
आ॒ग्र॒यणं॑ भवति हु॒ताद्या॑य। यज॑मान॒स्याप॑राभावाय॥९॥

दे॒वा वा ओष॑धीष्वा॒जिम॑युः। ता इन्द्रा॑ग्नी उद॑जयताम्। तावे॒तमैन्द्रा॑ग्रं  
द्वा॒द॒श॒क॒पा॒लं नि॒र॒वृ॒णा॒ताम्। यदैन्द्रा॑ग्नो भव॒त्यु॒ज्जित्यै॑। द्वा॒द॒श॒क॒पा॒लो भव॑ति।  
द्वा॒द॒श॒ मा॒साः सं॒व॒त्स॒रः। सं॒व॒त्स॒रेणै॒वास्मा॑ अन्न॒मव॑ रुन्धे। वै॒श्व॒दे॒वश्च॒रुर्भ॑वति।  
वै॒श्व॒दे॒वं वा अन्न॑म्। अन्न॑मे॒वास्मै॑ स्व॒दय॑ति॥१०॥

प्र॒थ॒म॒जो व॒त्सो दक्षि॑णा॒ समृ॑द्धौ। सौ॒म्यः३ श्या॑मा॒कं च॒रुं निर्व॑पति। सोमो॒ वा  
अ॒कृ॒ष्ट॒प॒च्यस्य॑ रा॒जा॑। अ॒कृ॒ष्ट॒प॒च्यमे॒वास्मै॑ स्व॒दय॑ति। वा॒सो दक्षि॑णा। सौ॒म्यः३ हि  
दे॒वता॑या॒ वा॒सः समृ॑द्धौ। सर॑स्वत्यै च॒रुं निर्व॑पति। सर॑स्वते च॒रुम्। मि॒थु॒नमे॒वाव॑  
रुन्धे। मि॒थु॒नौ गा॒वौ दक्षि॑णा॒ समृ॑द्धौ। ए॒ति वा ए॒ष य॑ज्ञमु॒खाद॒ध्याः॑। योऽ॒ग्नेर्दे॒वता॑या॒  
ए॒ति। अ॒ष्टावे॒तानि॑ ह॒वीः३ षि॑ भवन्ति। अ॒ष्टाक्ष॑रा गाय॒त्री। गा॒य॒त्रौऽग्निः॑। तेनै॒व  
य॑ज्ञमु॒खाद॒ध्या अ॒ग्नेर्दे॒वता॑यै नै॒ति॥११॥

इ॒युर्नि॒र॒व॒दय॑तेऽङ्ग॒ष्ठाभ्या॑ जु॒होत्य॑नु॒मति॑र्दे॒वता॑ निर्व॑पति व॒ही दक्षि॑णा यदैन्द्रं॑ दध्य॒परा॑भावाय  
स्व॒दय॑ति गा॒वौ दक्षि॑णा॒ समृ॑द्धौ ष॒ट्॥

[१]

वै॒श्व॒दे॒वेन॒ वै प्र॒जाप॑तिः प्र॒जा अ॑सृजत। ताः सृ॒ष्टा न प्रा॒जाय॑न्त।  
सोऽ॒ग्निर॑का॒मय॑त। अ॒हमि॒माः प्र॒ज॑नये॒यमि॑ति। स प्र॒जाप॑तये शुच॑म॒दधा॑त्।

सोऽशोचत्प्रजामिच्छमानः। तस्माद्यं च प्रजा भुनक्ति यं च न। तावुभौ शोचतः  
प्रजामिच्छमानौ। तास्वग्निमप्यसृजत्। ता अग्निरध्यैत्॥१२॥

सोमो रेतोऽदधात्। सविता प्राजंनयत्। सरस्वती वाचंमदधात्। पूषाऽपोषयत्।  
ते वा एते त्रिः संवत्सरस्य प्रयुज्यन्ते। ये देवाः पुष्टिपतयः। संवत्सरो वै प्रजापतिः।  
संवत्सरेणैवास्मै प्रजाः प्राजंनयत्। ताः प्रजा जाता मरुतोऽघ्नन्। अस्मानपि न  
प्रायुक्षतेति॥१३॥

स एतं प्रजापतिर्मरुतं सप्तकंपालमपश्यत्। तन्निरवपत्। ततो वै  
प्रजाभ्योऽकल्पत। यन्मारुतो निरुप्यते। यज्ञस्य क्लृप्त्यै। प्रजानामर्घाताय।  
सप्तकंपालो भवति। सप्तगणा वै मरुतः। गणश एवास्मै विशं कल्पयति। स  
प्रजापतिरशोचत्॥१४॥

याः पूर्वाः प्रजा असृक्षि। मरुतस्ता अवधिषुः। कथमपराः सृजेयेति। तस्य  
शुष्मं आण्डं भूतं निर्वर्तत। तद्व्युदहरत्। तदपोषयत्। तत्प्राजायत। आण्डस्य वा



एतद्रूपम्। यदामिक्षां। यद्व्युद्धरति॥१५॥

प्रजा एव तद्यजमानः पोषयति। वैश्वदेव्यामिक्षां भवति। वैश्वदेव्यो वै प्रजाः। प्रजा एवास्मै प्रजनयति। वाजिनमानयति। प्रजास्वेव प्रजातासु रेतो दधाति। द्यावापृथिव्यं एकंकपालो भवति। प्रजा एव प्रजाता द्यावापृथिवीभ्यामुभयतः परिगृह्णाति। देवासुराः संयत्ता आसन्। सोऽग्निरब्रवीत्॥१६॥

मामग्रे यजत। मया मुखेनासुराञ्जेष्यथेति। मां द्वितीयमिति सोमोऽब्रवीत्। मया राज्ञां जेष्यथेति। मां तृतीयमिति सविता। मया प्रसूता जेष्यथेति। मां चतुर्थीमिति सरस्वती। इन्द्रियं वोऽहं धास्यामीति। मां पञ्चममिति पूषा। मया प्रतिष्ठया जेष्यथेति॥१७॥

तैऽग्निना मुखेनासुरानजयन्। सोमेन राज्ञां। सवित्रा प्रसूताः। सरस्वतीन्द्रियमदधा। पूषा प्रतिष्ठाऽऽसीत्। ततो वै देवा व्यजयन्त। यदेतानि हवींषि निरूप्यन्ते विजित्यै। नोत्तरवेदिमुपवपति। पशवो वा उत्तरवेदिः। अजाता इव ह्येतर्हि

पशवः॥१८॥ ऐदित्यंशोचद्व्युद्धरंत्यब्रवीत्प्रतिष्ठयां जेष्यथेत्येतरहिं पशवः॥ \_\_\_\_\_[२]

त्रिवृद्धरहिर्भवति। माता पिता पुत्रः। तदेव तन्मिथुनम्। उल्बं गर्भो जरायुः।  
तदेव तन्मिथुनम्। त्रेधा बरुहिः सन्नद्धं भवति। त्रयं इमे लोकाः। एष्वेव लोकेषु  
प्रति तिष्ठति। एकधा पुनः सन्नद्धं भवति। एकं इव ह्ययं लोकः॥१९॥

अस्मिन्नेव तेन लोके प्रति तिष्ठति। प्रसुवो भवन्ति। प्रथमजामेव पुष्टिमव  
रुन्धे। प्रथमजो वत्सो दक्षिणा समृद्धौ। पृषदाज्यं गृह्णाति। पशवो वै पृषदाज्यम्।  
पशूनेवाव रुन्धे। पञ्चगृहीतं भवति। पाङ्गा हि पशवः। बहुरूपं भवति॥२०॥

बहुरूपा हि पशवः समृद्धौ। अग्निं मन्थन्ति। अग्निमुखा वै प्रजापतिः प्रजा  
असृजत। यदग्निं मन्थन्ति। अग्निमुखा एव तत्प्रजा यजमानः सृजते। नव प्रयाजा  
इज्यन्ते। नवानूयाजाः। अष्टौ हवीर्षिः। द्वावाघारौ। द्वावाज्यभागौ॥२१॥

त्रिंशत्सम्पद्यन्ते। त्रिंशदक्षरा विराट्। अन्नं विराट्। विराजैवान्नाद्यमव  
रुन्धे। यजमानो वा एककपालः। तेज आज्यम्। यदेककपाल आज्यमानयति।

यजमानमेव तेजसा समर्धयति। यजमानो वा एकंकपालः। पशव आज्यम्॥२२॥

यदेकंकपाल आज्यमानयति। यजमानमेव पशुभिः समर्धयति। यदल्पमानयेत्। अल्पा एनं पशवो भुञ्जन्त उपतिष्ठेरन्। यद्वह्मनयेत्। बहव एनं पशवोऽभुञ्जन्त उपतिष्ठेरन्। बह्मानीयाविः पृष्ठं कुर्यात्। बहव एवैनं पशवो भुञ्जन्त उपतिष्ठन्ते। यजमानो वा एकंकपालः। यदेकंकपालस्यावद्येत्॥२३॥

यजमानस्यावद्येत्। उद्धा माद्येद्यजमानः। प्र वा मीयेत। सकृदेव होतव्यः। सकृदिव हि सुवर्गो लोकः। हुत्वाऽभि जुहोति। यजमानमेव सुवर्गं लोकं गमयित्वा। तेजसा समर्धयति। यजमानो वा एकंकपालः। सुवर्गो लोक आहवनीयः॥२४॥

यदेकंकपालमाहवनीये जुहोति। यजमानमेव सुवर्गं लोकं गमयति। यद्वस्तेन जुहुयात्। सुवर्गाल्लोकाद्यजमानमवविध्येत्। स्रुचा जुहोति। सुवर्गस्य लोकस्य समष्ट्यै। यत्प्राङ्द्येत्। देवलोकमभिजयेत्। यदक्षिणा पितृलोकम्। यत्प्रत्यक्॥२५॥

रक्षांसि यज्ञं हन्युः। यदुदङ्घ्रिः। मनुष्यलोकमभिजयेत्। प्रतिष्ठितो होतव्यः।  
एकंकपालं वै प्रतितिष्ठन्तं द्यावापृथिवी अनु प्रति तिष्ठतः। द्यावापृथिवी ऋतवः।  
ऋतून् यज्ञः। यज्ञं यजमानः। यजमानं प्रजाः। तस्मात्प्रतिष्ठितो होतव्यः॥२६॥

वाजिनो यजति। अग्निर्वायुः सूर्यः। ते वै वाजिनः। तानेव तद्यजति। अथो  
खल्वाहुः। छन्दांसि वै वाजिन इति। तान्येव तद्यजति। ऋक्सामे वा इन्द्रस्य  
हरी सोमपानौ। तयोः परिधय आधानम्। वाजिनं भागधेयम्॥२७॥

यदप्रहृत्य परिधीं जुहुयात्। अन्तराधानाभ्यां घासं प्रयच्छेत्। प्रहृत्य परिधीं  
जुहोति। निराधानाभ्यामेव घासं प्रयच्छति। बर्हिषि विषिञ्चन्वाजिनमा नयति।  
प्रजा वै बर्हिः। रेतो वाजिनम्। प्रजास्वेव रेतो दधाति। समुपहूय भक्षयन्ति।  
एतत्सोमपीथा ह्येते। अथो आत्मन्नेव रेतो दधते। यजमान उत्तमो भक्षयति।  
पशवो वै वाजिनम्। यजमान एव पशून्प्रतिष्ठापयन्ति॥२८॥

आज्यमवधेदाहवनीयः प्रत्यक्तस्मात्प्रतिष्ठितो होतव्यो भागधेयमेते चत्वारि च॥

[३]

प्रजापतिः सविता भूत्वा प्रजा असृजत। ता एनमत्यमन्यन्त। ता

अस्मादपाक्रामन्। ता वरुणो भूत्वा प्रजा वरुणेनाग्राहयत्। ताः प्रजा वरुणगृहीताः। प्रजापतिं पुनरुपाधावन्नाथमिच्छमानाः। स एतान्प्रजापतिर्वरुण-  
प्रघासानपश्यत्। तां निरवपत्। तैर्वै स प्रजा वरुणपाशादमुञ्चत्। यद्वरुणप्रघासा निरुप्यन्ते॥ २९॥

प्रजानामवरुणग्राहाय। तासां दक्षिणो बाहुर्न्यक्र आसीत्। सव्यः प्रसृतः। स एतां द्वितीयां दक्षिणतो वेदिमुदहन्। ततो वै स प्रजानां दक्षिणं बाहुं प्रासारयत्। यद्वितीयां दक्षिणतो वेदिमुद्धन्ति। प्रजानामेव तद्यजमानो दक्षिणं बाहुं प्रसारयति। तस्माच्चातुर्मास्ययाज्यमुष्मिल्लोक उभयाबाहुः। यज्ञाभिजितुः ह्यस्य। पृथमात्राद्वेदी असम्भिन्ने भवतः॥ ३०॥

तस्मात्पृथमात्रं व्यसौ। उत्तरस्यां वेद्यामुत्तरवेदिमुप वपति। पशवो वा उत्तरवेदिः। पशून्वाव रुन्धे। अथो यज्ञपुरुषोऽनन्तरित्यै। एतद्वाह्मणान्येव पञ्च हवीर्षि। अथैष ऐन्द्राग्नो भवति। प्राणापानौ वा एतौ देवानाम्। यदिन्द्राग्नी।

यदैन्द्राग्रो भवति॥३१॥

प्राणापानावेवाव रुन्धे। ओजो बलं वा एतौ देवानाम्। यदैन्द्राग्नी। यदैन्द्राग्रो भवति। ओजो बलमेवाव रुन्धे। मारुत्यामिक्षा भवति। वारुण्यामिक्षा। मेषी च मेषश्च भवतः। मिथुना एव प्रजा वरुणपाशान्मुञ्चति। लोमशौ भवतो मेध्यत्वाय॥३२॥

शमीपर्णान्युप वपति। घासमेवाभ्यामपि यच्छति। प्रजापतिमन्नाद्यं नोपानमत्। स एतेन शतेध्मेन हविषाऽन्नाद्यमवारुन्ध। यत्परः शतानि शमीपर्णानि भवन्ति। अन्नाद्यस्यावरुद्धौ। सौम्यानि वै करीराणि। सौम्या खलु वा आहुतिर्दिवो वृष्टिं च्यावयति। यत्करीराणि भवन्ति। सौम्ययैवाहुत्या दिवो वृष्टिमव रुन्धे। काय एकंकपालो भवति। प्रजानां कन्त्वाय। प्रतिपूरुषं करम्भपात्राणि भवन्ति। जाता एव प्रजा वरुणपाशान्मुञ्चति। एकमतिरिक्तम्। जनिष्यमाणा एव प्रजा वरुणपाशान्मुञ्चति॥३३॥ निरुप्यन्तं भवतो भवति मेध्यत्वाय रुन्धे षट्॥

उत्तरस्यां वेद्यामन्यानि हवींषि सादयति। दक्षिणायां मारुतीम्। अपधुरमेवैनां युनक्ति। अथो ओजं एवासांमवं हरति। तस्माद्ब्रह्मणश्च क्षत्राच्च विशोऽन्यतोऽपक्रमिणीः। मारुत्या पूर्वया प्रचरति। अनृतमेवाव यजते। वारुण्योत्तरया। अन्तत एव वरुणमवं यजते। यदेवाध्वर्युः करोति॥३४॥

तत्प्रतिप्रस्थाता करोति। तस्माद्यच्छ्रेयान्करोति। तत्पापीयान्करोति। पत्नीं वाचयति। मेध्यामेवैनां करोति। अथो तपं एवैनामुप नयति। यज्ञारं सन्तन्न प्रब्रूयात्। प्रियं ज्ञातिं रुन्ध्यात्। असौ मे जार इति निर्दिशेत्। निर्दिश्यैवैनं वरुणपाशेन ग्राहयति॥३५॥

प्रधास्यान् हवामह इति पत्नीमुदानयति। अह्वतैवैनाम्। यत्पत्नीं पुरोनुवाक्यामनुब्रूयात्। निर्वीर्यो यजमानः स्यात्। यजमानोऽन्वाह। आत्मन्नेव वीर्यं धत्ते। उभौ याज्यां सवीर्यत्वाय। यद्भामे यदरण्य इत्याह। यथोदितमेव वरुणमवं यजते। यजमानदेवत्यो वा आहवनीयः॥३६॥

भ्रातृव्यदेवत्यो दक्षिणः। यदाहवनीये जुहुयात्। यजमानं वरुणपाशेन ग्राहयेत्। दक्षिणेऽग्नौ जुहोति। भ्रातृव्यमेव वरुणपाशेन ग्राहयति। शूर्पेण जुहोति। अन्यमेव वरुणमव यजते। शीर्षन्नधि निधाय जुहोति। शीर्षत एव वरुणमव यजते। प्रत्यङ्घ्रिं जुहोति॥ ३७॥

प्रत्यङ्घ्रिः वरुणपाशान्निर्मुच्यते। अक्रन्कर्म कर्मकृत इत्याह। देवाऽनृणं निरवदाय। अनृणा गृहानुप प्रेतेति वावैतदाह। वरुणगृहीतं वा एतद्यज्ञस्य। यद्यजुषा गृहीतस्यातिरिच्यते। तुषाश्च निष्कासश्च। तुषैश्च निष्कासेन चावभृथमवैति। वरुणगृहीतेनैव वरुणमवयजते। अपोऽवभृथमवैति॥ ३८॥

अप्सु वै वरुणः। साक्षादेव वरुणमवयजते। प्रतियुतो वरुणस्य पाश इत्याह। वरुणपाशादेव निर्मुच्यते। अप्रतीक्षमा यन्ति। वरुणस्यान्तरहित्यै। एधोऽस्येधिषीमहीत्याह। समिधैवाग्निं नमस्यन्त उपायन्ति। तेजोऽसि तेजो मयि धेहीत्याह। तेज एवाऽऽत्मन्धत्ते॥ ३९॥ करोति ग्राहयत्याहवनीयस्तिष्ठ जुहोत्यपोऽवभृथमवैति धत्ते॥ [५]



दे॒वा॒सु॒राः संय॑त्ता आसन्। सो॑ऽग्निर॑ब्रवीत्। ममे॒यम॑नी॒कव॑ती त॒नूः। तां  
प्री॑णीत। अथा॒सु॒रान॒भि भ॑विष्य॒थेति॑। ते दे॒वा अ॒ग्नये॑ऽनी॒कव॑ते पुरो॒डाश॑म॒ष्टाक॑पालं  
निर॑वपन्। सो॑ऽग्निर॑नी॒कवा॒न्थस्वेन॑ भाग॒धेये॑न प्री॒तः। च॒तु॒र्धाऽनी॑कान्यजनयत्।  
ततो॑ दे॒वा अभ॑वन्। परा॑ऽसु॒राः॥४०॥

यद॒ग्नये॑ऽनी॒कव॑ते पुरो॒डाश॑म॒ष्टाक॑पालं निर्व॑पति। अ॒ग्निमे॒वा॒नी॒कव॑न्तु॒ः स्वेन॑  
भाग॒धेये॑न प्रीणाति। सो॑ऽग्निर॑नी॒कवा॒न्थस्वेन॑ भाग॒धेये॑न प्री॒तः। च॒तु॒र्धाऽनी॑कानि  
जनयते। अ॒सौ वा आ॑दि॒त्योऽग्निर॑नी॒कवा॑न्। तस्य॑ र॒श्मयो॑ऽनी॒कानि॑। सा॒क॒ः  
सूर्ये॑णोद्य॒ता निर्व॑पति। सा॒क्षादे॒वास्मा॑ अनी॒कानि॑ जनयति। तेऽसु॒राः परा॑जिता  
यन्तः॑। द्यावा॑पृथि॒वी उपा॑श्रयन्॥४१॥

ते दे॒वा म॒रुद्भ्यः॑ सान्तप॒नेभ्य॑श्च॒रुं निर॑वपन्। तान्द्यावा॑पृथि॒वीभ्या॑मे॒वोभ॑यतः  
सम॑तपन्। यन्म॒रुद्भ्यः॑ सान्तप॒नेभ्य॑श्च॒रुं निर्व॑पति। द्यावा॑पृथि॒वीभ्या॑मे॒व तदु॑भयतो  
यज॑मानो भ्रातृ॒व्यान्थ॑सन्तपति। म॒ध्यन्दि॑ने निर्व॑पति। तर्हि॑ हि तेक्षि॑ष्ठं तप॑ति।

चरुर्भवति। सर्वत एवैनान्त्सन्तपति। ते देवाः श्रौविजयिनः सन्तः। सर्वासां दुग्धे  
गृहमेधीयं चरुं निरवपन्॥४२॥

आशिता एवाद्योपवसाम। कस्य वाऽहेदम्। कस्य वा श्वो भवितेति। स श्रुतो-  
ऽभवत्। तस्याहुतस्य नाश्नन्। न हि देवा अहुतस्याश्नन्ति। तैऽब्रुवन्। कस्मा  
इमं होष्याम इति। मरुद्भ्यो गृहमेधिभ्य इत्यब्रुवन्। तं मरुद्भ्यो गृहमेधिभ्यो-  
ऽजुहवुः॥४३॥

ततो देवा अभवन्। पराऽसुराः। यस्यैवं विदुषो मरुद्भ्यो गृहमेधिभ्यो गृहे जुह्वति।  
भवत्यात्मना। पराऽस्य भ्रातृव्यो भवति। यद्वै यज्ञस्य पाकत्रा क्रियते। पशव्यं  
तत्। पाकत्रा वा एतत्क्रियते। यन्नेध्माबर्हिर्भवति। न सामिधेनीरन्वाहं॥४४॥

न प्रयाजा इज्यन्ते। नानूयाजाः। य एवं वेद। पशुमान्भवति।  
आज्यभागौ यजति। यज्ञस्यैव चक्षुषी नान्तरिति। मरुतो गृहमेधिनां यजति।  
भागधेयेनैवैनान्त्समर्धयति। अग्निं स्विष्टकृतं यजति प्रतिष्ठित्यै। इडांतो भवति।

प॒शवो॑ वा इडा॑। प॒शुष्वे॒वोपरि॑ष्ठात्प्रति॑ तिष्ठति॥४५॥ असुरा अश्रयन्गृहमेधीयं चरुं निरवपन्नजुहवुर्वाहेडान्तो  
भवति द्वे च॥ [६]

यत्पत्नी॑ गृहमे॒धीय॑स्याश्जीयात्। गृहमे॒ध्ये॒व स्या॑त्। वि त्वस्य॑ य॒ज्ञ ऋ॑ध्येत।  
यन्नाश्जीयात्। अगृहमे॒धी स्या॑त्। नास्य॑ य॒ज्ञो व्यृ॑द्धेत। प्रति॑वेशं पचेयुः।  
तस्या॑श्जीयात्। गृहमे॒ध्ये॒व भ॑वति। नास्य॑ य॒ज्ञो व्यृ॑द्धते॥४६॥

ते दे॒वा गृहमे॒धीये॑ने॒ष्ट्वा। आशि॑ता अभवन्। आञ्ज॑ताभ्यञ्जत। अनु॑  
व॒त्स॒न॒वा॒स॒यन्। तेभ्योऽसुराः॑ क्षुधं प्राहि॑ण्वन्। सा दे॒वेषु॑ लो॒कम॑वि॒त्वा।  
असुरा॑न्पुनरगच्छत्। गृहमे॒धीये॑ने॒ष्ट्वा। आशि॑ता भवन्ति। आञ्ज॑तेऽभ्यञ्जते॥४७॥

अनु॑ व॒त्स॒ान् वा॑सयन्ति। भ्रातृ॑व्यायैव तद्यज॑मानः क्षुधं प्राहि॑णोति। ते दे॒वा  
गृहमे॒धीये॑ने॒ष्ट्वा। इन्द्रा॑य निष्का॒सं न्य॑दधुः। अ॒स्माने॒व श्व इन्द्रो॑ निहि॑तभाग  
उपाव॑र्तितेति। तानिन्द्रो॑ निहि॑तभाग उ॒पाव॑र्तत। गृहमे॒धीये॑ने॒ष्ट्वा। इन्द्रा॑य निष्का॒सं  
निद॑ध्यात्। इन्द्र॑ ए॒वैनं॑ निहि॑तभाग उ॒पाव॑र्तते। गार्ह॑पत्ये जुहोति॥४८॥

भा॒ग॒धेये॑नै॒वैनं॑ सम॑र्धयति। ऋष॑भमाह्वयति। व॒ष॒ट्कार॑ ए॒वास्य॑ सः। अथो॑

इन्द्रियमेव तद्वीर्यं यजमानो भ्रातृव्यस्य वृद्धे। इन्द्रो वृत्रं हत्वा। परां  
परावतमगच्छत्। अपाराधमिति मन्यमानः। सोऽब्रवीत्। क इदं वेदिष्यतीति।  
तेऽब्रुवन्मरुतो वरं वृणामहे॥४९॥

अथ वयं वेदाम। अस्मभ्यमेव प्रथमं हविर्निरुप्याता इति। त एनमध्यं क्रीडन्।  
तत्क्रीडिनां क्रीडित्वम्। यन्मरुद्भ्यः क्रीडिभ्यः प्रथमं हविर्निरुप्यते विजित्यै।  
साकं सूर्येणोद्यता निर्वपति। एतस्मिन्वै लोक इन्द्रो वृत्रमहन्त्समृद्धौ।  
एतद्वाह्मणान्येव पञ्च हवींषि। एतद्वाह्मण ऐन्द्राग्रः। अथैष ऐन्द्रश्चरुर्भवति॥५०॥

उद्धारं वा एतमिन्द्र उदहरत। वृत्रं हत्वा। अन्यासु देवतास्वधि। यदेष  
ऐन्द्रश्चरुर्भवति। उद्धारमेव तं यजमान उद्धरते। अन्यासु प्रजास्वधि। वैश्वकर्मण  
एकंकपालो भवति। विश्वान्येव तेन कर्माणि यजमानोऽव रुन्धे॥५१॥

कृच्छतेऽभ्यञ्जते जुहोति

वृणामहे भवत्युष्टौ च॥

[७]

वैश्वदेवेन वै प्रजापतिः प्रजा असृजत। ता वरुणप्रघासैर्वरुणपाशादमुञ्चत्।

सा॒क॒मे॒धैः प्रत्य॑स्थापयत्। त्र्य॒म्ब॒कै रु॒द्रं नि॒रवा॑दयत्। पि॒तृ॒य॒ज्ञेन॑ सु॒व॒र्गं  
लो॒कम॑गमयत्। यद्वै॑श्वदे॒वेन॒ यज॑ते। प्र॒जा ए॒व तद्य॑जमानः सृजते। ता  
व॑रुणप्रघा॒सैर्व॑रुणपा॒शान्मु॑ञ्चति। सा॒क॒मे॒धैः प्र॒तिष्ठा॑पयति। त्र्य॒म्ब॒कै रु॒द्रं  
नि॒रवा॑दयते॥५२॥

पि॒तृ॒य॒ज्ञेन॑ सु॒व॒र्गं लो॒कं ग॑मयति। द॒क्षि॒णतः॑ प्रा॒चीना॑वी॒ती नि॒र्व॒पति॑।  
द॒क्षि॒णावृ॑द्धि पि॒तृणा॑म्। अना॑दृत्य॒ तत्। उ॒त्तर॑त ए॒वोप॑वीय॒ निर्व॑पेत्। उ॒भये॒ हि  
दे॒वाश्च॑ पि॒तर॑श्चे॒ज्यन्ते॑। अथो॒ यदे॒व द॑क्षिणा॒र्धेऽधि॑ श्रय॑ति। तेन॑ दक्षिणावृत्। सोमा॑य  
पि॒तृम॑ते॒ पुरो॑डाशः॒ षट्क॑पालं॒ निर्व॑पति। स॒ंव॒त्स॒रो वै सोमः॑ पि॒तृमा॑न्॥५३॥

स॒ंव॒त्स॒रमे॒व प्री॑णाति। पि॒तृभ्यो॑ ब॒र्हिष॑ज्यो॒ धा॒नाः। मा॒सा वै पि॒तरो॑ ब॒र्हिष॑दः।  
मा॒साने॒व प्री॑णाति। यस्मि॒न्वा ऋ॒तौ पु॑रुषः प्र॒मीय॑ते। सो॑ऽस्या॒मुष्मि॑ल्लो॒के भ॑वति।  
ब॒हुरू॒पा धा॒ना भ॑वन्ति। अ॒होरा॒त्राणा॑म॒भिजि॑त्यै। पि॒तृभ्यो॑ऽग्नि॒ष्वात्तेभ्यो॑ म॒न्थम्।  
अ॒र्धमा॒सा वै पि॒तरो॑ऽग्नि॒ष्वात्ताः॥५४॥

अर्धमासानेव प्रीणाति। अभिवा॒न्या॒यै दु॒ग्धे भ॑वति। सा हि पि॒तृदे॒वत्यं॑ दु॒हे।  
यत्पूर्ण॑म्। तन्म॑नु॒ष्या॑णाम्। उप॒र्य॒र्धो दे॒वाना॑म्। अ॒र्धः पि॒तृणा॑म्। अ॒र्ध उप॑म॒न्यति॑।  
अ॒र्धो हि पि॒तृणा॑म्। एक॒योप॑म॒न्यति॑॥५५॥

एका हि पि॒तृणा॑म्। द॒क्षि॒णोप॑म॒न्यति॑। द॒क्षि॒णावृ॑द्धि पि॒तृणा॑म्। अना॑र॒भ्योप॑म॒न्यति॑।  
तद्धि पि॒तृन्गच्छ॑ति। इ॒मान्दि॒शं वेदि॑मुद्ध॒न्ति। उ॒भये॑ हि दे॒वाश्च पि॒तरं॑श्चे॒ज्यन्ते॑।  
चतुः॑ स्र॒क्तिर्भ॑वति। सर्वा॑ ह्यनु दि॒शः पि॒तरः॑। अखा॑ता भवति॥५६॥

खा॒ता हि दे॒वाना॑म्। म॒ध्यतो॑ऽग्निराधी॑यते। अ॒न्ततो॑ हि दे॒वाना॑माधी॑यते।  
व॒र्षीया॑नि॒ध्म इ॒ध्माद्भव॑ति व्यावृ॒त्त्यै। परि॑श्रयति। अ॒न्तर्हि॑तो हि पि॒तृलो॒को  
म॑नु॒ष्यलो॒कात्। यत्प॑रु॒षि दि॒नम्। तद्दे॒वाना॑म्। यद॑न्त॒रा। तन्म॑नु॒ष्या॑णाम्॥५७॥

यथ्स॑मूलम्। तत्पि॒तृणा॑म्। स॑मूलं ब॒र्हिर्भ॑वति व्यावृ॒त्त्यै। द॒क्षि॒णा स्तृ॑णाति।  
द॒क्षि॒णावृ॑द्धि पि॒तृणा॑म्। त्रिः प॑र्येति। तृती॒ये वा इ॒तो लो॒के पि॒तरः॑। ताने॒व प्री॑णाति।  
त्रिः पुनः॑ प॑र्येति। षट्थ॑सम्प॒द्यन्ते॑॥५८॥

षड्वा ऋतवः। ऋतूनेव प्रीणाति। यत्प्रस्तुरं यजुषा गृहीयात्। प्रमायुको यजमानः स्यात्। यन्न गृहीयात्। अनायतनः स्यात्। तूष्णीमेव न्यस्येत्। न प्रमायुको भवति। नानायतनः। यत्रीन्परिधीन्परिदध्यात्॥५९॥

मृत्युना यजमानं परिगृहीयात्। यन्न परिदध्यात्। रक्षांसि यज्ञं हन्युः। द्वौ परिधीं परिदधाति। रक्षसामपहत्यै। अथो मृत्योरेव यजमानमुध्मृजति। यत्रीणि त्रीणि हवींष्युदाहरैर्युः। त्रयस्त्रय एषां साकं प्रमीयेरन्। एकैकमनूचीनान्युदाहरन्ति। एकैक एवैषामन्वश्चः प्रमीयते। कशिपुं कशिपव्याय। उपबर्हणमुपबर्हण्याय। आञ्जनमाञ्जन्याय। अभ्यञ्जनमभ्यञ्जन्याय। यथाभागमेवैनान्प्रीणाति॥६०॥ निरवदयते पितृमानंशिष्यात्ता एकयोपं मन्थत्यखांता भवति मनुष्याणां पद्यन्ते परिदध्यान्मीयते पञ्च च॥—[८]

अग्नये देवेभ्यः पितृभ्यः समिध्यमानायानुं ब्रूहीत्याह। उभये हि देवाश्च पितरश्चेज्यन्ते। एकामन्वाह। एका हि पितृणाम्। त्रिरन्वाह। त्रिर्हि देवानाम्। आघारावाधारयति। यज्ञपरुषोरनन्तरित्यै। नार्षेयं वृणीते। न होतारम्॥६१॥

यदा॑र्षेयं वृ॑णीत। यद्धो॑ता॒रम्। प्र॒मायु॑को यज॑मानः स्यात्। प्र॒मायु॑को हो॒ता।  
तस्मा॑न्न वृ॑णीते। यज॑मानस्य हो॒तुर्गो॑पी॒थाय॑। अपं॑ ब॒र्हिषः॑ प्रया॒जान् य॑जति।  
प्र॒जा वै ब॒र्हिः। प्र॒जा ए॒व मृ॒त्योरु॒थ्सृ॑जति। आ॒ज्य॑भागौ यजति॥६२॥

य॒ज्ञस्यै॒व चक्षु॑षी॒ नान्तरे॑ति। प्रा॒चीना॒वीती॑ सोमं॑ यजति। पि॒तृदे॒वत्यां॑ हि।  
ए॒षाऽऽहु॑तिः। प॒ञ्चकृ॒त्वोऽव॑ द्यति। प॒ञ्च ह्ये॒ता दे॒वताः॑। द्वे पु॑रोऽनुवा॒क्ये। या॒ज्यां  
दे॒वतां॑ वष॒ट्कारः॑। ता ए॒व प्री॑णाति। सन्त॑त॒मव॑ द्यति॥६३॥

ऋ॒तूनां॑ सन्त॑त्ये। प्रै॒वैभ्यः॑ पूर्॒वया॑ पु॒रोऽनुवा॒क्यया॑ऽऽह। प्रण॑यति द्वितीय॑या।  
ग॒मय॑ति या॒ज्यया॑। तृ॒तीये॒ वा इ॒तो लो॒के पि॒तरः॑। अ॒हं ए॒वैना॒न्पूर्व॑या पु॒रो-  
ऽनुवा॒क्यया॑ऽत्यान॑यति। रात्रि॑यै द्वितीय॑या। ऐ॒वैना॒न् या॒ज्यया॑ गमयति। द॒क्षिण॒तो-  
ऽव॑दाय॑। उ॒दङ्मु॒क्तिं॑ क्रा॒मति॑ व्यावृ॑त्यै॥६४॥

आ स्व॒धेत्या॑श्रावयति। अस्तु॑ स्व॒धेति॑ प्र॒त्याश्रा॑वयति। स्व॒धा नम॑ इति॒  
वष॑ट्करोति। स्व॒धाका॒रो हि पि॑तृ॒णाम्। सोम॑म॒ग्रे य॑जति। सोम॑प्रया॒जा हि पि॒तरः॑।



सोमं पितृमन्तं यजति। संवत्सरो वै सोमः पितृमान्। संवत्सरमेव तद्यजति।  
पितृन्बर्हिषदो यजति॥६५॥

ये वै यज्वानः। ते पितरो बर्हिषदः। तानेव तद्यजति। पितृन्ग्निष्वात्तान्  
यजति। ये वा अयज्वानो गृहमेधिनः। ते पितरोऽग्निष्वात्ताः। तानेव तद्यजति।  
अग्निं कव्यवाहनं यजति। य एव पितृणामग्निः। तमेव तद्यजति॥६६॥

अथो यथाऽग्निः स्विष्टकृतं यजति। तादृगेव तत्। एतत्तै तत् ये च त्वामन्विति  
तिसृषु स्रक्तीषु निदधाति। तस्मादा तृतीयात्पुरुषान्नाम न गृह्णन्ति। एतावन्तो  
हीज्यन्ते। अत्र पितरो यथाभागं मन्दध्वमित्याह। ह्रीका हि पितरः। उदश्चो  
निष्क्रामन्ति। एषा वै मनुष्याणां दिक्। स्वामेव तद्विशमनु निष्क्रामन्ति॥६७॥

आहवनीयमुपतिष्ठन्ते। न्येवास्मै तद्धवते। यत्सत्याहवनीये। अथान्यत्र चरन्ति।  
आतमितोरुपतिष्ठन्ते। अग्निमेवोपद्रष्टारं कृत्वा। पितृन्निरवदयन्ते। अन्तं वा एते  
प्राणानां गच्छन्ति। य आतमितोरुपतिष्ठन्ते। सुसन्दृशं त्वा वयमित्याह॥६८॥

प्राणो वै सुसुन्दक्। प्राणमेवाऽऽत्मन्दधते। योजा न्विन्द्र ते हरी इत्याह।  
 प्राणमेव पुनरयुक्त। अक्षन्नमीमदन्त हीति गार्हपत्यमुपेतिष्ठन्ते। अक्षन्नमीमदन्ताथ  
 त्वोपेतिष्ठामहु इति वावैतदाह। अमीमदन्त पितरः सोम्या इत्यभि प्रपद्यन्ते।  
 अमीमदन्त पितरोऽथ त्वाऽभि प्रपद्यामहु इति वावैतदाह। अपः परिषिञ्चति।  
 मार्जयत्येवैनान्॥६९॥

अथो तर्पयत्येव। तृप्यति प्रजयां पशुभिः। य एवं वेद। अपं बर्हिषावनूयाजौ  
 यजति। प्रजा वै बर्हिः। प्रजा एव मृत्योरुत्सृजति। चतुरः प्रयाजान् यजति।  
 द्वावनूयाजौ। षट्त्सम्पद्यन्ते। षड्वा ऋतवः। ऋतूनेव प्रीणाति। न पत्यन्वास्ते। न  
 संयाजयन्ति। यत्पत्यन्वासीत। यत्संयाजयेयुः। प्रमायुका स्यात्। तस्मान्नान्वास्ते।  
 न संयाजयन्ति। पत्नियै गोपीथाय॥७०॥  
 होतारमाज्यभागो यजति सन्ततमवधति व्यावृत्त्यै बर्हिषदो यजति तमेव तद्यजत्यनु  
 निष्क्रामन्त्याहैनानृतवो नवं च॥

[१]

प्रतिपूरुषमेकंकपालां निर्वपति। जाता एव प्रजा रुद्रान्निरवदयते।  
 एकमतिरिक्तम्। जनिष्यमाणा एव प्रजा रुद्रान्निरवदयते। एकंकपाला भवन्ति।

एक॒धैव रु॒द्रं नि॒रव॑दयते। नाभि॑घारयति। यद॑भि॒घार॑येत्। अ॒न्त॒र॒व॒चा॒रिणः॑ रु॒द्रं  
कु॑र्यात्। ए॒को॒ल्मु॒केन॑ यन्ति॥ ७१॥

तद्धि रु॒द्रस्य॑ भा॒ग॒धेय॑म्। इ॒मान्दि॑शं यन्ति। ए॒षा वै रु॒द्रस्य॑ दिक्। स्वा॒या॑मे॒व  
दि॒शि रु॒द्रं नि॒रव॑दयते। रु॒द्रो वा अ॑प॒शुका॑या॒ आ॒हु॒त्यै नाति॑ष्ठत। अ॒सौ ते॑ प॒शुरि॑ति  
निर्दि॑शेद्यं द्वि॒ष्यात्। यमे॒व द्वेष्टि॑। तम॑स्मै प॒शुं निर्दि॑शति। यदि॒ न द्वि॒ष्यात्। आ॒खु॒स्ते  
प॒शुरि॑ति ब्रूयात्॥ ७२॥

न ग्रा॒म्यान्प॒शून् हि॑नस्ति। ना॒र॒ण्यान्। च॒तु॒ष्प॒थे जु॑होति। ए॒ष वा अ॑ग्नी॒नां  
प॒द्भी॑शो॒ नाम॑। अ॒ग्नि॒व॒त्येव॑ जु॑होति। म॒ध्य॒मेन॑ प॒र्णेन॑ जु॑होति। स्नु॒ग्ये॑षा। अथो॒  
खलु॑। अ॒न्त॒मेनै॒व हो॑त॒व्यम्। अ॒न्त॒त ए॒व रु॒द्रं नि॒रव॑दयते॥ ७३॥

ए॒ष ते॑ रु॒द्र भा॒गः स॒ह स्व॑स्राऽम्बि॑क॒येत्या॑ह। श॒र॒द्वा अ॒स्याम्बि॑का॒ स्वसा॑। तया॒  
वा ए॒ष हि॑नस्ति। य॒ः हि॑नस्ति। तयै॒वैनः॑ स॒ह श॑मयति। भे॒ष॒ज॒ङ्ग॒व इ॒त्या॑ह।  
याव॑न्त ए॒व ग्रा॒म्याः प॒शवः॑। तेभ्यो॑ भे॒ष॒जं क॑रोति। अवा॑म्ब रु॒द्रम॑दिम॒हीत्या॑ह।

आ॒मे॒वैता॒मा शा॑स्ते॥ ७४॥

त्र्य॑म्बकं यजाम॒ह इत्या॑ह। मृ॒त्योर्मु॑क्षीय॒ माऽमृ॑ता॒दिति॑ वावैतदा॑ह। उत्कि॑रन्ति। भग॑स्य लीप्सन्ते। मू॒तेकृ॑त्वाऽऽस॑जन्ति। यथा॒ जनं॑ य॒तेऽव॑सं क॒रोति॑। ता॒दृगे॒व तत्। ए॒ष ते॑ रु॒द्र भा॒ग इत्या॑ह नि॒रव॑त्यै। अ॒प्रती॑क्ष॒मा य॑न्ति। अ॒पः परि॑षिञ्चति। रु॒द्रस्या॒न्तर्हि॑त्यै। प्र॒ वा ए॒तेऽस्मा॑ल्लो॒काच्च॑वन्ते। ये त्र्य॑म्बकै॒श्चर॑न्ति। आ॒दि॒त्यं च॒रुं पुन॑रेत्य॒ निर्व॑पति। इ॒यं वा अ॒दि॒तिः। अ॒स्यामे॒व प्र॒ति ति॑ष्ठन्ति॥ ७५॥ यन्ति ब्रूयान्निर्वन्दयते

शास्ते सिञ्चति षट्॥

[१०]

अ॒नु॒मत्ये॑ वैश्व॒देवे॑न् ताः सृ॒ष्टास्त्रि॑वृ॒त्त॒जाप॑तिः स॒वितो॑त्तर॒स्यान्दे॑वासुराः सो॑ऽग्नि॒र्यत्प॑र्णी वैश्व॒देवे॑न् ता व॑रुणप्रघा॒सैर॒ग्नये॑ दे॒वेभ्यः॑ प्रति॒पूरुषं॑ दश॥ १०॥  
अ॒नु॒मत्ये॑ प्रथ॒म॒जो वृ॒थ्सो ब॑हुरू॒पा हि प॑शव॒स्तस्मा॑त्पृथ॒म॒त्रं यद॒ग्नये॑ऽनी॒कव॑त उ॒द्धारं॑ वा अ॒ग्नये॑ दे॒वेभ्यः॑ प्रति॒पूरुषं॑ पञ्च॑सप्ततिः॥ ७५॥  
अ॒नु॒मत्ये॑ प्र॒ति ति॑ष्ठन्ति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके षष्ठः प्रपाठकः समाप्तः॥

॥सप्तमः प्रश्नः॥

॥तैत्तिरीयब्राह्मणे प्रथमाष्टके सप्तमः प्रपाठकः॥

ए॒तद्वा॑ह्म॒णान्ये॒व प॒ञ्च ह॒वी॑ऽषि॑। अ॒थेन्द्रा॑य॒ शुना॒सीरा॑य॒ पुरो॒डाशं॑ द्वा॒दश॑क॒पालं॑  
निर्व॑पति। सं॒व॒त्स॒रो वा इन्द्रा॑शुना॒सीरः॑। सं॒व॒त्स॒रेणै॒वास्मा॑ अ॒न्नम॑व॒ रुन्धे॑।  
वा॒य॒व्यं प॒यो भ॑वति। वा॒युर्वै वृ॒ष्ट्यै॑ प्र॒दाप॑यि॒ता। स ए॒वास्मै॑ वृ॒ष्टिं प्र॒दाप॑यति।  
सौ॒र्य ए॒क॒क॒पालो॑ भ॒वति॑। सूर्ये॑ण॒ वा अ॒मुष्मि॑ल्लो॒के वृ॒ष्टिर्धृ॑ता। स ए॒वास्मै॑ वृ॒ष्टिं  
निय॑च्छति॥१॥

द्वा॒द॒श॒ग॒वः॑ सी॒रं दक्षि॑णा॒ समृ॑द्ध्यौ। दे॒वा॒सु॒राः संय॑त्ता आ॒सन्। ते दे॒वा  
अ॒ग्निम॑ब्रुवन्। त्वया॑ वी॒रेणा॑सु॒रान॒भिभ॑वामेति। सोऽब्र॑वीत्। त्रे॒धाऽह॑मा॒त्मानं॑  
वि॒क॒रि॒ष्य इति॑। स त्रे॒धाऽऽत्मा॑नं॒ व्य॑कुरुत। अ॒ग्निं तृ॒तीय॑म्। रु॒द्रं तृ॒तीय॑म्। वरु॑णं  
तृ॒तीय॑म्॥२॥

सोऽब्र॑वीत्। क इ॒दं तुरी॑यमिति। अ॒हमि॒तीन्द्रो॑ऽब्रवीत्। सन्तु सृ॑जावहा इति। तौ  
सम॑सृजेताम्। स इन्द्र॑स्तुरीयमभवत्। यदिन्द्र॑स्तुरीयमभवत्। तदिन्द्र॑तुरीयस्येन्द्र॑-

तुरीयत्वम्। ततो वै देवा व्यंजयन्त। यदिन्द्रतुरीयं निरूप्यते विजित्यै॥३॥

वहिनीं धेनुर्दक्षिणा। यद्वहिनीं। तेनाऽऽग्नेयी। यद्वौः। तेन रौद्री। यद्धेनुः। तेनैन्द्री। यथ्स्त्री सती दान्ता। तेन वारुणी समृद्धौ। प्रजापतिर्यज्ञमसृजत॥४॥

त९ सृष्ट९ रक्षाऽस्यजिघा९सन्। स एताः प्रजापतिरात्मनो देवता निरमिमीत। ताभिर्वै स दिग्भ्यो रक्षा९सि प्राणुदत। यत्पञ्चावत्तीयं जुहोति। दिग्भ्य एव तद्यजमानो रक्षा९सि प्रणुदते। समूढ९ रक्षः सन्दग्ध९ रक्ष इत्याह। रक्षाऽस्येव सन्दहति। अग्नये रक्षोग्ने स्वाहेत्याह। देवताभ्य एव विजिग्यानाभ्यो भागधेयं करोति। प्रष्टिवाही रथो दक्षिणा समृद्धौ॥५॥

इन्द्रो वृत्र९ हत्वा। असुरान्पराभाव्य। नमुचिमासुरं नालभत। त९ शच्याऽगृह्णात्। तौ समलभेताम्। सोऽस्मादभिश्नुतरोऽभवत्। सोऽब्रवीत्। सन्धा९ सन्दधावहै। अथ त्वाऽव स्रक्ष्यामि। न मा शुष्केण नार्द्रेण हनः॥६॥

न दिवा न नक्तमिति। स एतम्पां फेनमसिञ्चत्। न वा एष शुष्को नार्द्रो

व्युष्टाऽऽसीत्। अनुदितः सूर्यः। न वा एतद्विवा न नक्तम्। तस्यैतस्मिंल्लोके। अपां  
फेनेन शिर उदवर्तयत्। तदेनमन्ववर्तत। मित्रद्रुगिति॥७॥

स एतानपामार्गानजनयत्। तानजुहोत्। तैर्वै स रक्षाऽस्यपाहत।  
यदपामार्गहोमो भवति। रक्षसामपहत्यै। एकोल्मुकेन यन्ति। तद्धि रक्षसां  
भागधेयम्। इमान्दिशं यन्ति। एषा वै रक्षसां दिक्। स्वायामेव दिशि रक्षांसि  
हन्ति॥८॥

स्वकृत इरिणे जुहोति प्रदरे वा। एतद्वै रक्षसामायतनम्। स्व एवायतने रक्षांसि  
हन्ति। पूर्णमयेन सुवेण जुहोति। ब्रह्म वै पूर्णः। ब्रह्मणैव रक्षांसि हन्ति। देवस्य  
त्वा सवितुः प्रसव इत्याह। सवितृप्रसूत एव रक्षांसि हन्ति। हुतं रक्षोऽवधिष्म  
रक्ष इत्याह। रक्षसाऽस्तृत्यै। यद्वस्ते तद्वक्षिणा निरवत्यै। अप्रतीक्षमायन्ति।  
रक्षसामन्तरहित्यै॥९॥ यच्छ्रुति वरुणं तृतीयं विजित्या असृजत् समृद्धे हनो मित्रद्रुगिति हन्ति स्तृत्यै त्रीणि च॥——[१]

धात्रे पुरोडाशं द्वादशकपालं निर्वपति। संवत्सरो वै धाता। संवत्सरेणैवास्मै

प्रजाः प्रजंनयति। अन्वेवास्मा अनुमतिर्मन्यते। राते राका। प्र सिनीवाली  
जंनयति। प्रजास्वेव प्रजातासु कुहा वाचं दधाति। मिथुनौ गावौ दक्षिणा समृद्धौ।  
आग्नावैष्णवमेकादशकपालं निर्वपति। ऐन्द्रावैष्णवमेकादशकपालम्॥१०॥

वैष्णवं त्रिकपालम्। वीर्यं वा अग्निः। वीर्यमिन्द्रः। वीर्यं विष्णुः। प्रजा एव  
प्रजाता वीर्यं प्रतिष्ठापयति। तस्मात्प्रजा वीर्यावतीः। वामन ऋषभो वही दक्षिणा।  
यद्वही। तेनाऽऽग्नेयः। यदृषभः॥११॥

तेनैन्द्रः। यद्वामनः। तेन वैष्णवः समृद्धौ। अग्नीषोमीयमेकादशकपालं निर्वपति।  
इन्द्रासोमीयमेकादशकपालम्। सौम्यं चरुम्। सोमो वै रेतोधाः। अग्निः प्रजानां  
प्रजनयिता। वृद्धानामिन्द्रः प्रदापयिता। सोमं एवास्मै रेतो दधाति॥१२॥

अग्निः प्रजां प्रजंनयति। वृद्धामिन्द्रः प्रयच्छति। बभ्रुर्दक्षिणा समृद्धौ। सोमापौष्णं  
चरुं निर्वपति। ऐन्द्रापौष्णं चरुम्। सोमो वै रेतोधाः। पूषा पशूनां प्रजनयिता।  
वृद्धानामिन्द्रः प्रदापयिता। सोमं एवास्मै रेतो दधाति। पूषा पशून्प्रजंनयति॥१३॥



वृद्धानिन्द्रः प्रयच्छति। पौष्णश्चरुर्भवति। इयं वै पूषा। अस्यामेव प्रति तिष्ठति। श्यामो दक्षिणा समृद्धौ। बहु वै पुरुषो मेध्यमुपगच्छति। वैश्वानरं द्वादशकपालं निर्वपति। संवत्सरो वा अग्निर्वैश्वानरः। संवत्सरेणैवैनं स्वदयति। हिरण्यं दक्षिणा॥१४॥

पवित्रं वै हिरण्यम्। पुनात्येवैनम्। बहु वै राजन्योऽनृतं करोति। उपं जाम्यै हरते। जिनाति ब्राह्मणम्। वदत्यनृतम्। अनृते खलु वै क्रियमाणे वरुणो गृह्णाति। वारुणं यवमयं चरुं निर्वपति। वरुणपाशादेवैनं मुञ्चति। अश्वो दक्षिणा। वारुणो हि देवतयाऽश्वः समृद्धौ॥१५॥ऐन्द्रावेष्णवमेकादशकपालं यदृषभो दधाति पूषा पृश्न्यज्जनयति हिरण्यं दक्षिणा दक्षिणेकं च॥[२]

रत्निनामेतानि हवींषि भवन्ति। एते वै राष्ट्रस्य प्रदातारः। एतेऽपादातारः। य एव राष्ट्रस्य प्रदातारः। येऽपादातारः। त एवास्मै राष्ट्रं प्रयच्छन्ति। राष्ट्रमेव भवति। यथ्समाहृत्य निर्वपेत्। अरत्निनः स्युः। यथायथं निर्वपति रत्नित्वाय॥१६॥

यथ्सद्यो निर्वपेत्। यावतीमेकेन हविषाऽऽशिषमव रुन्धे। तावतीमवरुन्धीत।

अ॒न्व॒हन्निर्व॑पति। भूय॑सीमे॒वाशिष॑मव॒ रुन्धे। भूय॑सो यज्ञ॒क्रतू॑नुपैति। बा॒रु॒हस्प॑त्यं  
च॒रुं निर्व॑पति ब्र॒ह्मणो॑ गृहे। मुख॑त ए॒वास्मै॑ ब्रह्म॒ सऽश्न॑ति। अथो॒ ब्रह्म॑न्नेव  
क्ष॒त्रम॒न्वार॑म्भयति। शि॒ति॒पृ॒ष्ठो दक्षि॑णा॒ समृ॑द्ध्यै॥१७॥

ऐ॒न्द्रमे॒काद॑शकपाल५ राज॒न्य॑स्य गृहे। इन्द्रि॒यमे॒वाव॑ रुन्धे। ऋष॑भो दक्षि॑णा॒  
समृ॑द्ध्यै। आ॒दि॒त्यं च॒रुं महि॑ष्यै गृहे। इ॒यं वा अ॑दि॒तिः। अ॒स्यामे॒व प्र॑ति॒तिष्ठ॑ति।  
धे॒नुर्दक्षि॑णा॒ समृ॑द्ध्यै। भगा॑य च॒रुं वा॒वाता॑यै गृहे। भग॑मे॒वास्मि॑न्दधाति। विचि॑त्तगर्भा  
प॒ष्ठौही॑ दक्षि॑णा॒ समृ॑द्ध्यै॥१८॥

नै॒र॒ऋतं॑ च॒रुं प॑रिवृ॒त्तयै॑ गृहे कृ॒ष्णानां॑ व्री॒हीणां॑ न॒खनि॑र्भिन्नम्। पा॒प्मान॑मे॒व  
नि॒र॒ऋतिं॑ नि॒रव॑दयते। कृ॒ष्णा कू॒टा दक्षि॑णा॒ समृ॑द्ध्यै। आ॒ग्नेय॑म॒ष्टाक॑पाल५ सेना॒न्यो  
गृहे। सेना॑मे॒वास्य॑ सऽश्न॑ति। हि॒र॒ण्यं दक्षि॑णा॒ समृ॑द्ध्यै। वा॒रु॒णं दश॑कपाल५ सू॒तस्य॑  
गृहे। व॒रु॒णस॑वमे॒वाव॑ रुन्धे। म॒हानि॑र॒ष्टो दक्षि॑णा॒ समृ॑द्ध्यै। मा॒रु॒तः स॒प्तक॑पालं  
ग्रा॒म॒ण्यो गृ॑हे॥१९॥

अन्नं वै मरुतः। अन्नमेवाव रुन्धे। पृश्निर्दक्षिणा समृद्धौ। सावित्रं द्वादशकपालं क्षत्तुर्गृहे प्रसूत्यै। उपध्वस्तो दक्षिणा समृद्धौ। आश्विनं द्विकपालं सङ्ग्रहीतुर्गृहे। अश्विनौ वै देवानां भिषजौ। ताभ्यामेवास्मै भेषजं करोति। सवात्यौ दक्षिणा समृद्धौ। पौष्णं चरुं भागदुघस्य गृहे॥२०॥

अन्नं वै पूषा। अन्नमेवाव रुन्धे। श्यामो दक्षिणा समृद्धौ। रौद्रं गावीधुकं चरुमक्षावापस्य गृहे। अन्तत एव रुद्रं निरवदयते। शबल उद्धारो दक्षिणा समृद्धौ। द्वादशैतानि हवींषि भवन्ति। द्वादश मासाः संवत्सरः। संवत्सरेणैवास्मै राष्ट्रमव रुन्धे। राष्ट्रमेव भवति॥२१॥

यन्न प्रति निर्वपेत्। रत्निनं आशिषोऽवरुन्धीरन्। प्रतिनिर्वपति। इन्द्राय सुत्राम्णं पुरोडाशमेकादशकपालम्। इन्द्रायां होमुचै। आशिष एवाव रुन्धे। अयं नो राजा वृत्रहा राजा भूत्वा वृत्रं वध्यादित्याह। आमेवैतामा शास्ते। मैत्राबारुहस्पत्यं भवति। श्वेतायै श्वेतवत्सायै दुग्धे॥२२॥

बा॒रु॒ह॒स्प॒त्ये मै॒त्रम॑पि॒ दधा॑ति। ब्रह्म॑ चै॒वास्मै॑ क्ष॒त्रं च॑ स॒मीची॑ दधाति। अथो॒  
 ब्रह्म॑न्ने॒व क्ष॒त्रं प्र॑ति॒ष्ठाप॑यति। बा॒रु॒ह॒स्प॒त्येन॒ पूर्वे॑ण॒ प्रच॑रति। मुख॑त ए॒वास्मै॑ ब्रह्म॒  
 स॒ञ्जय॑ति। अथो॒ ब्रह्म॑न्ने॒व क्ष॒त्रम॒न्वार॑म्भयति। स्व॒यं कृ॑ता वेदि॑र्भवति। स्व॒यं दि॑नं  
 ब॒रु॒हिः। स्व॒यं कृ॑त इ॒ध्मः। अ॒न॒भिजि॑तस्या॒भिजि॑त्यै। तस्मा॒द्राज्ञा॑म॒रण्यम॒भिजि॑तम्।  
 सै॒व श्वे॑ता श्वे॒तव॑त्सा॒ दक्षि॑णा॒ समृ॑द्धौ॥ २३॥

रु॒न्नि॒त्वाय॒ समृ॑द्धौ प॒ष्ठोही॒ दक्षि॑णा॒ समृ॑द्धौ ग्रा॒म॒ण्यो गृ॒हे भा॑गदु॒घस्य॑ गृ॒हे  
 भ॑वति दु॒ग्धेऽभिजि॑त्यै द्वे च॥

[३]

दे॒व॒सु॒वा॒मे॒तानि॑ ह॒वी॒ऽषि॑ भवन्ति। ए॒ताव॑न्तो॒ वै दे॒वाना॑ः स॒वाः। त ए॒वास्मै॑  
 स॒वान्प्र॑यच्छन्ति। त ए॒न॑ः सु॒वन्ते। अ॒ग्निरे॒वेन॑ गृ॒हप॑तीनाः सु॒वते। सोमो॒  
 व॒न॒स्पती॑नाम्। रु॒द्रः प॑शूनाम्। बृ॒ह॒स्पति॑र्वा॒चाम्। इन्द्रो॑ ज्ये॒ष्ठाना॑म्। मि॒त्रः  
 स॒त्याना॑म्॥ २४॥

वरु॑णो॒ धर्म॑पतीनाम्। ए॒तदे॒व सर्वं॑ भवति। स॒वि॒ता त्वा॑ प्रस॒वाना॑ः सु॒वता॑मिति॒  
 हस्तं॑ गृह्णाति प्रसू॑त्यै। ये दे॒वा दे॒वः सु॒वः स्थे॑त्या॒ह। य॒थाय॑जु॒रेवै॒तत्। म॒ह॒ते क्ष॑त्राय॑

मह॒त आधि॑पत्याय मह॒ते जान॑राज्यायेत्या॒ह। आ॒मे॒वैता॒मा शा॑स्ते। ए॒ष वो॑ भरता॒  
राजा॒ सोमो॑ऽस्माकं ब्राह्म॒णाना॑ ५ राजेत्या॒ह। तस्मा॒त्सोम॑राजानो ब्राह्म॒णाः। प्रति॒  
त्यन्नाम॑ रा॒ज्यम॑धा॒यीत्या॑ह॥ २५॥

रा॒ज्यमे॒वास्मिन्प्रति॑दधाति। स्वां त॒नुवं वरु॑णो अशि॒श्रेदि॒त्याह॑। व॒रुण॒स॒वमे॒वाव॑  
रुन्धे। शुचै॑र्मि॒त्रस्य॒ व्रत्या॑ अभू॒मेत्या॑ह। शुचि॑मे॒वैनं॒ व्रत्यं॑ करोति। अम॑न्महि मह॒त  
ऋ॒तस्य॒ नामे॒त्याह॑। म॒नुत ए॒वैनम्। सर्वे॑ व्रा॒ता वरु॑णस्याभू॒वन्नि॒त्याह॑। सर्व॑व्रा॒तमे॒वैनं॑  
करोति। वि मि॒त्र ए॒वैररा॑तिम॒तारी॑दि॒त्याह॑॥ २६॥

अरा॑तिमे॒वैनं॑ तारयति। असू॑षुदन्त य॒ज्ञिया॑ ऋ॒तेने॒त्याह॑। स्व॒दय॑त्ये॒वैनम्।  
व्यु॑ त्रि॒तो ज॑रि॒माणं॑ न आ॒नडि॒त्याह॑। आयु॑रे॒वास्मिन्प्र॑दधाति। द्वाभ्यां॒ विमृ॑ष्टे।  
द्वि॒पाद्यज॑मानः॒ प्रति॑ष्ठित्यै। अ॒ग्नीषो॑मीय॑स्य॒ चैका॑दशकपालस्य॒ देव॑सु॒वां  
च॑ ह॒विषा॑म॒ग्नये॑ स्विष्ट॒कृते॑ स॒मव॑द्यति। दे॒वता॑भिरे॒वैनं॑मु॒भय॑तः॒ परि॑गृह्णाति।  
वि॒ष्णुक्र॒मान्क्रम॑ते। वि॒ष्णुरे॒व भू॒त्वेमाँल्लो॒कान्भिज॑यति॥ २७॥ सु॒त्याना॑म॒धायी॒त्याहा॒तारी॑दि॒त्याह॑ क्रम॒त एकं॑

च॥

[४]

अ॒र्थे॒तः॒ स्थे॒तिं जु॒होति॑। आ॒हु॒त्यै॒वैना॑ नि॒ष्क्रीय॑ गृ॒ह्णाति॑। अथो॑ ह॒विष्कृताना॑मे॒वाभिघृ॑तं  
गृ॒ह्णाति॑। वह॑न्तीनां गृ॒ह्णाति॑। ए॒ता वा अ॒पां राष्ट्र॑म्। रा॒ष्ट्रमे॒वास्मै॑ गृ॒ह्णाति॑।  
अथो॑ श्रि॒यमे॒वैन॑म॒भिव॑हन्ति। अ॒पां पति॑र॒सीत्या॑ह। मि॒थुन॑मे॒वाकः॑। वृषा॑-  
ऽस्य॒र्मिरि॑त्या॒ह॥ २८॥

ऊ॒र्मि॒मन्त॑मे॒वैन॑ करोति। वृष॒सेनो॑ऽसीत्या॒ह। सेना॑मे॒वास्य॒ सऽश्य॑ति। ब्र॒ज॒क्षितः॒  
स्थे॒त्या॒ह। ए॒ता वा अ॒पां वि॒शः। वि॒शमे॒वास्मै॑ पर्यू॒हति॑। म॒रुता॒मोजः॒ स्थे॒त्या॒ह।  
अन्नं॒ वै म॒रुतः॑। अन्न॑मे॒वाव॑ रुन्धे। सूर्य॑वर्च॒सः स्थे॒त्या॒ह॥ २९॥

रा॒ष्ट्रमे॒व वर्च॑स्व्य॒कः। सूर्य॑त्वच॒सः स्थे॒त्या॒ह। सत्यं॑ वा ए॒तत्। यद्व॑र्ष॒ति। अनृ॑तं  
यदा॒तप॑ति॒ वर्ष॑ति। स॒त्या॒नृते॑ ए॒वाव॑ रुन्धे। नैन॑ऽस॒त्या॒नृते॑ उ॒दिते॑ हि॒ऽस्तः। य  
ए॒वं वेद॑। मान्दाः॒ स्थे॒त्या॒ह। रा॒ष्ट्रमे॒व ब्र॑ह्मवर्च॒स्य॒कः॥ ३०॥

वाशाः॒ स्थे॒त्या॒ह। रा॒ष्ट्रमे॒व व॒श्य॒कः। श॒क्र॒रीः स्थे॒त्या॒ह। प॒शवो॑ वै श॒क्र॒रीः।

प॒शूने॒वाव॑ रु॒न्धे। वि॒श्वभृ॒तः स्वे॒त्याह॑। रा॒ष्ट्रमे॒व प॑य॒स्व्यंकः॑। ज॒नभृ॒तः स्वे॒त्याह॑।  
रा॒ष्ट्रमे॒वेन्द्रि॑या॒व्यंकः॑। अ॒ग्नेस्ते॑ज॒स्याः स्वे॒त्याह॑॥ ३१॥

रा॒ष्ट्रमे॒व ते॑ज॒स्व्यंकः॑। अ॒पामोष॑धीना॒ः रसः॑ स्वे॒त्याह॑। रा॒ष्ट्रमे॒व म॑ध॒व्यम॑कः।  
सा॒रस्व॑तं ग्र॒हं गृ॑ह्णाति। ए॒षा वा अ॒पां पृ॑ष्ठम्। य॒त्सर॑स्वती। पृ॒ष्ठमे॒वैन॑ः॒ समा॒नाना॑  
करोति। षो॒ड॒शभि॑र्गृह्णाति। षोड॑शकलो॒ वै पु॑रुषः। यावा॑ने॒व पु॑रुषः। तस्मि॑न्वी॒र्यं  
दधा॑ति। षो॒ड॒शभि॑र्जुहोति॑ षोड॑शभिर्गृह्णाति। द्वात्रि॑ंश॒त्सम्प॑द्यन्ते। द्वात्रि॑ंशदक्षरा-  
ऽनु॑ष्टुक्। वाग॑नु॒ष्टुप्सर्वा॑णि छ॒न्दाः॒॑सि। वा॒चैवैन॑ः॒ सर्वे॑भि॒श्छन्दा॑भिर॒भिषि॑ञ्चति॥ ३२॥

सूर्यवर्चसुः स्वेत्याह ब्रह्मवर्चस्यकस्तेजस्याः स्वेत्याहैव पुरुषः षट् च॥ [५]

दे॒वीरा॑पः॒ सं म॑धु॒मती॑र्मधु॒मती॑भिः सृ॒ज्यध्व॑मित्याह। ब्रह्म॑णै॒वैनाः॑ स॒ः सृ॑जति।  
अना॑धृष्टाः सीद॑तेत्याह। ब्रह्म॑णै॒वैनाः॑ सादयति। अ॒न्तरा॑ होतु॑श्च धि॒ष्णि॑यं  
ब्राह्म॑णाच्छ॒ःसिने॑श्च सादयति। आ॒ग्नेयो॑ वै होता॑। ऐ॒न्द्रो ब्रा॑ह्मणाच्छ॒ःसी।  
तेज॑सा चै॒वेन्द्रि॑येण॑ चोभ॒यतो॑ रा॒ष्ट्रं परि॑गृह्णाति। हि॒रण्ये॒नोत्पु॑नाति। आहु॑त्यै हि  
प॒वित्रा॑भ्यामुत्पुनन्ति॒ व्यावृ॑त्त्यै॥ ३३॥

श॒त॒मा॒नं॑ भ॒वति॑ । श॒ता॒युः॑ पु॒रु॒षः॑ श॒ते॒न्द्रि॒यः॑ । आ॒यु॒ष्ये॒वेन्द्रि॒ये॑ प्र॒ति॑ तिष्ठति ।  
अ॒नि॒भृ॒ष्ट॒म॒सीत्या॑ह । अ॒नि॒भृ॒ष्टः॑ ह्ये॒तत् । वा॒चो॑ ब॒न्धुरि॑त्या॒ह । वा॒चो॑ ह्ये॒ष ब॒न्धुः॑ ।  
त॒पो॒जा इत्या॑ह । त॒पो॒जा ह्ये॒तत् । सोम॑स्य द्वा॒त्र॒म॒सीत्या॑ह ॥ ३४ ॥

सोम॑स्य ह्ये॒तद्वा॒त्र॒म् । शु॒क्रा वः॑ शु॒क्रे॒णोत्पु॑ना॒मीत्या॑ह । शु॒क्रा ह्यापः॑ । शु॒क्रः॑  
हि॒र॒ण्य॒म् । च॒न्द्राश्च॒न्द्रे॒णेत्या॑ह । च॒न्द्रा ह्यापः॑ । च॒न्द्रः॑ हि॒र॒ण्य॒म् । अ॒मृता॑ अ॒मृते॒नेत्या॑ह ।  
अ॒मृता॑ ह्यापः॑ । अ॒मृतः॑ हि॒र॒ण्य॒म् ॥ ३५ ॥

स्वाहा॑ रा॒ज॒सूया॒येत्या॑ह । रा॒ज॒सूया॒य ह्ये॒ना उत्पु॑नाति । स॒ध॒मादौ॑ द्यु॒मि॒नी॒रू॒र्ज  
ए॒ता इति॑ वा॒रु॒ण्य॒र्चा गृ॑ह्णाति । व॒रु॒ण॒स॒वमे॒वाव॑ रुन्धे । ए॒क॒या गृ॑ह्णाति । ए॒क॒धै॒व  
य॒ज॒माने॑ वी॒र्यं॑ दधाति । क्ष॒त्र॒स्यो॒ल्ब॒म॒सि क्ष॒त्र॒स्य॒ योनि॑र॒सीति॑ ता॒प्यं चो॒ष्णीषं॑ च  
प्र॒यच्छ॑ति स॒योनि॑त्वाय । ए॒क॒शते॑न दर्भ॒पु॒ञ्जी॒लैः प॑वयति । श॒ता॒युर्वै॑ पु॒रु॒षः॑ श॒तवी॑र्यः ।  
आ॒त्मै॒क॒शतः॑ ॥ ३६ ॥

यावा॑ने॒व पु॒रु॒षः॑ । तस्मि॑न्वी॒र्यं॑ दधाति । द॒ध्या॑शयति । इ॒न्द्रि॒यमे॒वाव॑ रुन्धे ।



उ॒दु॒म्बरं॑ मा॒शय॑ति। अ॒न्नाद्य॑स्याव॒रुद्धौ॑। श॒ष्पा॑ण्या॒शय॑ति। सु॒रा॑ब॒लिमे॒वैनं॑ करोति।  
आ॒विदं॑ ए॒ता भ॑वन्ति। आ॒विदं॑मे॒वैनं॑ गमयन्ति॥ ३७॥

अ॒ग्निरे॒वैनं॑ गा॒रुह॑पत्येनावति। इन्द्रं॑ इन्द्रि॒येण॑। पू॒षा प॒शुभिः॑। मि॒त्रावरु॑णौ  
प्रा॒णापा॒नाभ्या॑म्। इन्द्रो॑ वृ॒त्राय॑ वज्रमुदयच्छत्। स दि॒वंम॑लिखत्। सो॑ऽर्य॒म्णः  
पन्था॑ अभवत्। स आ॒वि॒त्रे द्यावा॑पृथि॒वी धृ॒तव्र॑ते इति द्यावा॑पृथि॒वी उपा॑धावत्।  
स आ॒भ्यामे॒व प्र॑सूत॒ इन्द्रो॑ वृ॒त्राय॑ वज्रं प्रा॒हर॑त्। आ॒वि॒त्रे द्यावा॑पृथि॒वी धृ॒तव्र॑ते  
इति॑ यदाह॑॥ ३८॥

आ॒भ्यामे॒व प्र॑सूतो॒ यज॑मानो॒ वज्रं॑ भ्रातृ॒व्याय॑ प्र॒हर॑ति। आ॒वि॒त्रा  
दे॒व्यदि॑तिर्वि॒श्वरू॑पीत्या॒ह। इ॒यं वै दे॒व्यदि॑तिर्वि॒श्वरू॑पी। अ॒स्यामे॒व प्र॑ति  
तिष्ठ॑ति। आ॒वि॒त्रोऽय॑म॒सावा॑मु॒ष्याय॑णो॑ऽस्यां वि॒श्यस्मि॑न्ना॒ष्ट्र इत्या॑ह। वि॒शैवे॒न  
रा॒ष्ट्रेण॑ स॒मर्ध॑यति। म॒ह॒ते क्ष॒त्राय॑ म॒हत॑ आधि॒पत्या॑य म॒ह॒ते जा॒न॑रा॒ज्याये॒त्याह॑।  
आ॒मे॒वैता॑मा शा॒स्ते। ए॒ष वो॑ भ॒रता॑ राजा॒ सोमो॑ऽस्माकं ब्राह्म॒णाना॑ः राजे॒त्याह॑।  
तस्मा॑त्सोम॑रा॒जानो॑ ब्राह्म॒णाः॥ ३९॥

इन्द्रस्य वज्रोऽसि वार्त्रघ्न इति धनुः प्रयच्छति विजित्यै। शत्रुबाधनाः स्थेतीषून्।  
 शत्रून्नेवास्य बाधन्ते। पात मां प्रत्यश्च पात मां तिर्यश्चमन्वश्च मा पातेत्याह। तिस्रो  
 वै शरव्याः। प्रतीची तिरश्च्यनूची। ताभ्य एवैनं पान्ति। दिग्भ्यो मां पातेत्याह।  
 दिग्भ्य एवैनं पान्ति। विश्वाभ्यो मा नाष्ट्राभ्यः पातेत्याह। अपरिमितादेवैनं पान्ति।  
 हिरण्यवर्णावुषसां विरोक इति त्रिष्टुभा बाहू उद्गृह्णाति। इन्द्रियं वै वीर्यं त्रिष्टुक्।  
 इन्द्रियमेव वीर्यमुपरिष्ठादात्मन्धत्ते॥४०॥

व्यावृत्त्यै दात्रमसीत्याहामृतं९ हिरण्यमेकशतो गमयन्त्याहं ब्राह्मणा नाष्ट्राभ्यः पातेत्याह  
 चत्वारि च॥

[६]

दिशो व्यास्थापयति। दिशामभिजित्यै। यदनु प्रक्रामेत्। अभि दिशो जयेत्।  
 उत्तु माद्येत्। मनसाऽनु प्रक्रामति। अभि दिशो जयति। नोन्माद्यति। समिधमा  
 तिष्ठेत्याह। तेज एवाव रुन्धे॥४१॥

उग्रामा तिष्ठेत्याह। इन्द्रियमेवाव रुन्धे। विराजमातिष्ठेत्याह। अन्नाद्यमेवाव  
 रुन्धे। उदीचीमा तिष्ठेत्याह। पशून्नेवाव रुन्धे। ऊर्ध्वामातिष्ठेत्याह। सुवर्गमेव

लो॒कम्भि॒जय॑ति। अनू॒ज्जिही॑ते। सु॒व॒र्गस्य॑ लो॒कस्य॑ स॒मंष्ट्यै॑॥४२॥

मा॒रु॒त ए॒ष भ॑वति। अन्नं॒ वै म॒रुतः॑। अन्नमे॒वाव॑ रुन्धे। एक॑विंश॒तिक॑पालो  
भवति॑ प्र॒ति॒ष्ठित्यै॑। योऽर॒ण्येऽनु॒वाक्यो॑ ग॒णः। तं म॑ध्यत॒ उप॑दधाति। ग्रा॒म्यैरे॒व  
प॒शुभि॑रा॒ण्यान्प॒शून्परि॑ गृह्णाति। तस्मा॑द्ग्रा॒म्यैः प॒शुभि॑रा॒ण्याः प॒शवः॑ परि॑गृहीताः।  
पृथि॑वै॒न्यः। अ॒भ्य॑षिच्यत॥४३॥

स रा॒ष्ट्रं ना॑भवत्। स ए॒तानि॑ पा॒र्थान्य॑पश्यत्। तान्य॑जुहोत्। तैर्वै स रा॒ष्ट्रम॑भवत्।  
यत्पा॒र्थानि॑ जुहोति॑। रा॒ष्ट्रमे॒व भ॑वति। बा॒र॒ह॒स्प॒त्यं पूर्वे॑षामुत्त॒मं भ॑वति। ऐ॒न्द्रमु॑त्तरेषां  
प्रथ॑मम्। ब्र॒ह्म चै॒वास्मै॑ क्ष॒त्रं च॑ स॒मीची॑ दधाति। अथो ब्र॒ह्मन्ने॒व क्ष॒त्रं प्र॒ति॒-  
ष्ठा॑पयति॥४४॥

ष॒ट्प॒रस्ता॑दभिषे॒कस्य॑ जुहोति। षडु॒परि॑ष्ठात्। द्वा॒द॒श॒ सम्प॑द्यन्ते। द्वा॒द॒श॒ मासाः॑  
सं॒व॒त्स॒रः। सं॒व॒त्स॒रः ख॒लु वै दे॒वानां॑ पूः। दे॒वाना॑मे॒व पु॒रं म॑ध्यतो॒ व्य॒वंस॑र्पति।  
तस्य॑ न कु॒तश्च॒नोपा॑व्या॒धो भ॑वति। भू॒ताना॑मवे॒ष्टीर्जु॑होति। अत्रा॑त्र॒ वै मृ॒त्युर्जा॑यते।

यत्रयत्रैव मृत्युर्जायते। तत एवैनमवयजते। तस्माद्राजसूयेनेजानो नाभिचरितवै।  
प्रत्यगेनमभिचारः स्तृणुते॥४५॥ रुन्धे समंष्ट्रा असिच्यत स्थापयति जायते पञ्च च॥—————[७]

सोमस्य त्विषिरसि तवेव मे त्विषिर्भूयादिति शार्दूलचर्मोपस्तृणाति। यैव सोमे  
त्विषिः। या शार्दूले। तामेवाव रुन्धे। मृत्योर्वा एष वर्णः। यच्छार्दूलः। अमृतं  
हिरण्यम्। अमृतमसि मृत्योर्मा पाहीति हिरण्यमुपास्यति। अमृतमेव मृत्योरन्तर्धत्ते।  
शतमानं भवति॥४६॥

शतायुः पुरुषः शतेन्द्रियः। आयुष्येवेन्द्रिये प्रति तिष्ठति। दिद्योन्मा  
पाहीत्युपरिष्टादधि निदधाति। उभयत एवास्मै शर्म दधाति। अवैष्टा दन्दशूका  
इति क्लीबं सीसेन विध्यति। दन्दशूकानेवावयजते। तस्मात्क्लीबं दन्दशूका  
दंशुकाः। निरस्तं नमुचेः शिर इति लोहितायसं निरस्यति। पाप्मानमेव नमुचिं  
निरवदयते। प्राणा आत्मनः पूर्वेऽभिषिच्या इत्याहुः॥४७॥

सोमो राजा वरुणः। देवा धर्मसुवश्च ये। ते ते वाचं सुवन्तां ते ते

प्रा॒णं सु॒वन्ता॒मित्या॑ह। प्रा॒णाने॒वाऽऽत्म॑नः पूर्वा॑न॒भिषि॑ञ्चति। यद्व्या॒त् अ॒ग्नेस्त्वा॒  
तेज॑सा॒भिषि॑ञ्चामी॒ति। तेज॑स्यै॒व स्या॑त्। दु॒श्च॒र्मा तु भ॑वेत्। सोम॑स्य त्वा  
द्यु॒म्नेना॒भिषि॑ञ्चामी॒त्याह। सौ॒म्यो वै दे॒वता॑या पु॒रुषः॥४८॥

स्वयै॒वैनं॑ दे॒वता॑या॒भिषि॑ञ्चति। अ॒ग्नेस्तेज॑सेत्या॑ह। तेज॑ ए॒वास्मि॑न्दधाति। सू॒र्यस्य॑  
वर्च॑सेत्या॑ह। वर्च॑ ए॒वास्मि॑न्दधाति। इन्द्र॑स्येन्द्रि॒येणे॑त्या॑ह। इन्द्रि॒यमे॒वास्मि॑न्दधाति।  
मि॒त्रावरु॑णयोर्वी॒र्येणे॑त्या॑ह। वी॒र्यमे॒वास्मि॑न्दधाति। म॒रुता॒मोज॑सेत्या॑ह॥४९॥

ओज॑ ए॒वास्मि॑न्दधाति। क्ष॒त्राणां॑ क्ष॒त्रप॑तिरसीत्या॑ह। क्ष॒त्राणा॑मे॒वैनं॑  
क्ष॒त्रप॑तिं करोति। अति॑ दि॒वस्पा॒हीत्या॑ह। अत्य॑न्यान्पा॒हीति॑ वावैतदा॑ह।  
स॒माव॑वृ॒त्रन्नध॑रागुदी॒चीरि॑त्या॑ह। रा॒ष्ट्रमे॒वास्मि॑न्ध्रुवम॑कः। उ॒च्छे॒षणे॑न जुहोति।  
उ॒च्छे॒षण॑भागो वै रु॒द्रः। भा॒गधे॑र्ये॒नैव रु॒द्रं नि॒रव॑दयते॥५०॥

उद॑ङ्ग॒रेत्या॒ग्नीद्धे॑ जुहोति। ए॒षा वै रु॒द्रस्य॑ दिक्। स्वा॒या॑मे॒व दि॒शि रु॒द्रं नि॒रव॑दयते।  
रु॒द्र य॑त्ते॒ क्रयी॑ परं॒ नामे॑त्या॑ह। यद्वा अ॑स्य॒ क्रयी॑ परं॒ नाम॑। तेन॒ वा ए॒ष हि॑नस्ति। य॑

हि॒नस्ति॑। ते॒नै॒वैन॑ꣳ स॒ह श॑मयति। तस्मै॑ हु॒तम॑सि य॒मेष्ट॑म॒सीत्या॑ह। य॒मादे॒वास्य॑  
मृ॒त्युम॑वयजते॥५१॥

प्रजा॑पते॒ न त्वदे॒तान्य॒न्य इति॑ तस्यै॑ गृ॒हे जु॑हुयात्। यां का॒मये॑त रा॒ष्ट्रम॑स्यै प्र॒जा  
स्या॒दिति॑। रा॒ष्ट्रमे॒वास्यै॑ प्र॒जा भ॑वति। प॒र्णम॑ये॒नाध्व॑र्युर॒भिषि॑ञ्चति। ब्र॒ह्मव॑र्च॒समे॒वा-  
स्मि॒न्त्विषि॑ दधाति। औदु॑म्बरेण राज॒न्यः। ऊ॒र्जमे॒वास्मि॑न्न॒न्नाद्यं॑ दधाति। आश्व॑त्थेन॒  
वैश्यः॑। वि॒शमे॒वास्मि॑न्पु॒ष्टिं दधाति॑। नैय॑ग्रोधेन॒ जन्यः॑। मि॒त्राण्ये॒वास्मै॑ कल्पयति।  
अथो॒ प्रति॑ष्ठित्यै॥५२॥ भ॒वत्याहुः॑ पुरुष॒ ओज॑सेत्या॒ह नि॒रव॑दयते यजते॒ जन्यो॑ द्वे च॥ [८]

इन्द्र॑स्य॒ वज्रो॑ऽसि॒ वार्त्रघ्न॑ इति॒ रथ॑मुपाव॑हरति॒ विजि॑त्यै। मि॒त्रावरु॑णयोस्त्वा  
प्रशा॒स्त्रोः प्र॑शिषा॒ युन॑ज्मीत्या॒ह। ब्र॒ह्मणै॒वैन॑ दे॒वता॑भ्यां युनक्ति। प्र॒ष्टिवा॒हिनं॑ युनक्ति।  
प्र॒ष्टिवा॒ही वै दे॒वर॑थः। दे॒वर॑थमे॒वास्मै॑ युनक्ति। त्रयो॑ऽश्वा॒ भव॑न्ति। रथ॑श्चतुर्थः। द्वौ  
सं॒व्येष्ट॑सारथी। षट्थ॑सम्पद्यन्ते॥५३॥

षड्वा ऋ॒तवः॑। ऋ॒तुभि॑रे॒वैनं॑ युनक्ति। वि॒ष्णु॒क्रमा॑न्क्र॒मते॑। वि॒ष्णुरे॒व

भूत्वेमाँल्लोकानुभिजयति। यः क्षत्रियः प्रतिहितः। सौऽन्वारंभते। राष्ट्रमेव  
भवति। त्रिष्टुभाऽन्वारंभते। इन्द्रियं वै त्रिष्टुक्। इन्द्रियमेव यजमाने दधाति॥५४॥

मरुताँ प्रसवे जैषमित्याह। मरुद्विरेव प्रसूत उज्जयति। आप्तं मन इत्याह।  
यदेव मनसैप्सीत्। तदापत्। राजन्यं जिनाति। अनाक्रान्त एवाक्रमते। वि वा एष  
इन्द्रियेण वीर्येणर्ध्यते। यो राजन्यं जिनाति। समहमिन्द्रियेण वीर्येणेत्याह॥५५॥

इन्द्रियमेव वीर्यमात्मन्धत्ते। पशूनां मन्युरसि तवेव मे मन्युर्भूयादिति  
वाराही उपानहावुपं मुञ्चते। पशूनां वा एष मन्युः। यद्वराहः। तेनैव पशूनां  
मन्युमात्मन्धत्ते। अग्नि वा इयं सुषुवाणं कामयते। तस्यैश्वरेन्द्रियं वीर्यमादातोः।  
वाराही उपानहावुपंमुञ्चते। अस्या एवान्तर्धत्ते। इन्द्रियस्य वीर्यस्यानात्यै॥५६॥

नमो मात्रे पृथिव्या इत्याहाहिंसायै। इयं दस्यायुरस्यायुर्मे धेहीत्याह।  
आयुरेवाऽऽत्मन्धत्ते। ऊर्गस्यूर्जं मे धेहीत्याह। ऊर्जमेवाऽऽत्मन्धत्ते। युङ्क्षि

वर्चोऽसि॑ वर्चो॑ मयि॑ धे॒हीत्या॑ह। वर्च॑ ए॒वाऽऽत्म॑न्धत्ते। ए॒क॒धा ब्र॑ह्मण॒ उप॑हरति।  
ए॒क॒धै॒व यज॑मान॒ आयु॑रूर्जं॒ वर्चो॑ दधाति। र॒थ॒वि॒मो॒च॒नीया॑ जुहोति॒ प्रति॑-  
ष्ठित्यै॥५७॥

त्रयोऽश्वा॑ भवन्ति। रथ॑श्चतुर्थः। तस्मा॑च्चतुर्जुहोति। यदु॒भौ स॒हाव॑तिष्ठेताम्।  
स॒मा॒नं लो॒कमि॑याताम्। स॒ह स॒ङ्ग॒ही॒त्रा र॑थ॒वाह॑ने रथ॒माद॑धाति। सु॒व॒र्गादि॒वैनं॑  
लो॒काद॑न्तर्दधाति। ह॒सः शु॒चि॒षदि॒त्याद॑धाति। ब्रह्म॑णै॒वैन॑मुपाव॒हरति॑। ब्रह्म॑णा-  
ऽऽद॑धाति। अति॑च्छन्द्साऽऽद॑धाति। अति॑च्छन्दा॒ वै सर्वा॑णि छन्दा॑सि।  
सर्वे॑भिरे॒वैनं॑ छन्दा॑भिराद॑धाति। वर्ष॑ वा ए॒षा छन्द्॑साम्। यदति॑च्छन्दाः।  
यदति॑च्छन्द्सा॒ दधा॑ति। वर्ष॑मै॒वैनं॑ स॒माना॑नां करोति॥५८॥

पृथन्ते दधाति वीर्येणेत्याहानांत्ये प्रतिष्ठित्ये  
ब्रह्मणाऽऽदधाति सप्त च॥

[१]

मि॒त्रोऽसि॑ वरु॑णोऽसीत्या॑ह। मै॒त्रं वा अ॒हः। वा॒रु॒णी रा॒त्रिः। अ॒हो॒रा॒त्राभ्या॑मे॒वैन॑मुपाव॒  
मि॒त्रोऽसि॑ वरु॑णोऽसीत्या॑ह। मै॒त्रो वै दक्षि॑णः। वा॒रु॒णः स॒व्यः। वै॒श्व॒दे॒व्यामि॑क्षा॑।



स्वमेवैनौ भागधेयमुपावहरति। समहं विश्वैर्देवैरित्याह॥५९॥

वैश्वदेव्यो वै प्रजाः। ता एवाद्याः कुरुते। क्षत्रस्य नाभिरसि क्षत्रस्य योनिरसीत्यधीवासमास्तृणाति सयोनित्वाय। स्योनामा सीद सुषदामा सीदेत्याह। यथायजुरेवैतत्। मा त्वा हिंसीन्मा मां हिंसीदित्याहाहिंसायै। निषसाद धृतव्रतो वरुणः पुस्त्यास्वा साम्राज्याय सुक्रतुरित्याह। साम्राज्यमेवैनं सुक्रतुं करोति। ब्रह्मा(३)न्त्वं राजन्ब्रह्माऽसि सविताऽसि सत्यसंव इत्याह। सवितारमेवैनं सत्यसवं करोति॥६०॥

ब्रह्मा(३)न्त्वं राजन्ब्रह्माऽसीन्द्रोऽसि सत्यौजा इत्याह। इन्द्रमेवैनं सत्यौजसं करोति। ब्रह्मा(३)न्त्वं राजन्ब्रह्माऽसि मित्रोऽसि सुशेव इत्याह। मित्रमेवैनं सुशेवं करोति। ब्रह्मा(३)न्त्वं राजन्ब्रह्मासि वरुणोऽसि सत्यधर्मेत्याह। वरुणमेवैनं सत्यधर्माणं करोति। सविताऽसि सत्यसंव इत्याह। गायत्रीमेवैतेनाभि व्याहरति। इन्द्रोऽसि सत्यौजा इत्याह। त्रिष्टुभमेवैतेनाभि

व्याह॑रति॥६१॥

मि॒त्रोऽसि॑ सु॒शेव॑ इत्या॑ह। जग॑तीमे॒वैतेना॑भि॒ व्याह॑रति। स॒त्यमे॒ता दे॒वताः॑।  
स॒त्यमे॒तानि॑ छन्दा॑सि। स॒त्यमे॒वाव॑ रुन्धे। वरु॑णोऽसि स॒त्यध॑र्मेत्या॑ह।  
अ॒नुष्टु॒भमे॒वैतेना॑भि॒ व्याह॑रति। स॒त्या॒नृ॒ते वा अ॑नुष्टुप्। स॒त्या॒नृ॒ते वरु॑णः। स॒त्या॒नृ॒ते  
ए॒वाव॑ रुन्धे॥६२॥

नैन॑ स॒त्या॒नृ॒ते उ॑दि॒ते हि॑ऽस्तः। य ए॒वं वेद॑। इन्द्र॑स्य॒ वज्रो॑ऽसि॒ वार्त्रघ्न॑ इति॒  
स्फ्यं॑ प्रय॑च्छति। वज्रो॒ वै स्फ्यः॑। वज्रे॑णै॒वास्मा॑ अ॒वर॒प॒रं र॑न्धयति। ए॒वं हि॑  
तच्छ्रे॑यः। यद॑स्मा ए॒ते र॑ध्यैयुः। दि॒शोऽभ्य॑यं॒ राजा॑ऽभू॒दिति॑ पश्चा॒क्षान्प्रय॑च्छति।  
ए॒ते वै स॑र्वेऽयाः॑। अ॒प॒रा॒जायि॑नमे॒वैनं॑ करोति॥६३॥

ओ॒दन॑मुद्ध॒वते। प॒रमे॒ष्टी वा ए॒षः। यदो॑दनः। प॒र॒मा॒मे॒वैनं॑ श्रियं॑ गमयति।  
सु॒श्लो॒काँ(४) सु॒मङ्ग॒लाँ(४) सत्य॑रा॒जा(३)नित्या॑ह। आ॒मे॒वैता॑मा शा॑स्ते। शौ॒नः  
शे॒पमा॑ख्यापयते। व॒रु॒णपा॒शादे॒वैनं॑ मुञ्चति। प॒रः श॒तं भ॑वति। श॒तायुः॑ पुरु॑षः

श॒तेन्द्रि॑यः। आ॒यु॒ष्येवेन्द्रि॑ये प्र॒ति ति॑ष्ठति। मा॒रु॒तस्य॑ चैक॑विंश॒तिक॑पालस्य  
 वैश्व॑दे॒व्यै चा॒मिक्षा॑या अ॒ग्नये॑ स्विष्ट॒कृते॑ स॒मव॑द्यति। दे॒वता॑भिरे॒वैन॑मु॒भय॑तुः  
 परि॑ गृह्णाति। अ॒पान्न॑त्रे स्वा॒होर्जो॑ न॒त्रे स्वा॒हाऽग्नये॑ गृह॑प॒तये॑ स्वा॒हेति॑ ति॒स्र  
 आहु॑तीर्जुहोति। त्रय॑ इ॒मे लो॒काः। ए॒ष्वेव॑ लो॒केषु॑ प्र॒ति ति॑ष्ठति॥६४॥

देवैरित्याह सत्यसंव

करोति त्रिष्टुभमेवैतेनाभि व्याहरति सत्यानुते एवाव रुन्धे करोति शतेन्द्रियः षट् चं॥

[१०]

एतद्ब्राह्मणानि धात्रे रत्निनान्देवसुवामर्थतो देवीर्दिशः सोमस्येन्द्रस्य मित्रो दश॥१०॥

एतद्ब्राह्मणानि वैष्णवं त्रिकपालमन्त्रं वै पूषा वाशाः स्थेत्याहु दिशो व्यास्थापयत्युदङ्गरेत्य ब्रह्मा(३)न्त्व२ राजञ्चतुष्पष्टिः॥६४॥

एतद्ब्राह्मणानि प्रति तिष्ठति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके सप्तमः प्रपाठकः समाप्तः॥

॥ अष्टमः प्रश्नः ॥

॥ तैत्तिरीयब्राह्मणे प्रथमाष्टके अष्टमः प्रपाठकः ॥

वरुणस्य सुषुवाणस्य दशधेन्द्रियं वीर्यं पराऽपतत्। तथ्सृष्टिरनु समंसर्पत्।  
 तथ्सृपां ससृत्त्वम्। अग्निना देवेन प्रथमेऽहन्ननु प्रायुङ्क्त। सरस्वत्या वाचा  
 द्वितीयै। सवित्रा प्रसवेन तृतीयै। पूष्णा पशुभिश्चतुर्थै। बृहस्पतिना ब्रह्मणा पञ्चमे।  
 इन्द्रेण देवेन षष्ठे। वरुणेन स्वयां देवतया सप्तमे॥१॥

सोमेन राज्ञाऽष्टमे। त्वष्टा रूपेण नवमे। विष्णुना यज्ञेनाऽऽप्रोत्। यथ्सृपो  
 भवन्ति। इन्द्रियमेव तद्वीर्यं यजमान आप्रोति। पूर्वापूर्वा वेदिर्भवति। इन्द्रियस्य  
 वीर्यस्यावरुद्धौ। पुरस्तादुपसदाः सौम्येन प्रचरति। सोमो वै रेतोधाः। रेत  
 एव तदधाति। अन्तरा त्वाष्ट्रेण। रेत एव हितं त्वष्टा रूपाणि विकरोति।  
 उपरिष्टाद्वैष्णवेन। यज्ञो वै विष्णुः। यज्ञ एवान्ततः प्रति तिष्ठति॥२॥

सप्तमे दधाति पञ्च

जामि वा एतत्कुर्वन्ति। यथ्सद्यो दीक्षयन्ति सद्यः सोमं क्रीणन्ति। पुण्डरिस्रजां प्रयच्छत्यजामित्वाय। अङ्गिरसः सुवर्गं लोकं यन्तः। अप्सु दीक्षातपसी प्रावेशयन्। तत्पुण्डरीकमभवत्। यत्पुण्डरिस्रजां प्रयच्छति। साक्षादेव दीक्षातपसी अव रुन्धे। दशभिर्वथ्सतरैः सोमं क्रीणाति। दशाक्षरा विराट्॥३॥

अन्नं विराट्। विराजैवान्नाद्यमव रुन्धे। मुष्कुरा भवन्ति सेन्द्रत्वाय। दशपेयो भवति। अन्नाद्यस्यावरुद्धौ। शतं ब्राह्मणाः पिबन्ति। शतायुः पुरुषः शतेन्द्रियः। आयुष्येवेन्द्रिये प्रति तिष्ठति। सप्तदशः स्तोत्रं भवति। सप्तदशः प्रजापतिः॥४॥

प्रजापतेराप्त्यै। प्राकाशावध्वर्यवे ददाति। प्रकाशमेवैनं गमयति। स्रजमुद्रात्रे। व्यैवास्मै वासयति। रुक्मः होत्रे। आदित्यमेवास्मा उन्नयति। अश्वं प्रस्तोतृप्रतिहर्तृभ्याम्। प्राजापत्यो वा अश्वः। प्रजापतेराप्त्यै॥५॥

द्वादश पष्ठौहीर्ब्रह्मणै। आयुरेवाव रुन्धे। वशां मैत्रावरुणाय। राष्ट्रमेव वश्यकः। ऋषभं ब्राह्मणाच्छःसिनै। राष्ट्रमेवेन्द्रियाव्यकः। वासंसी नेष्टापोतृभ्याम्। पवित्रे

ए॒वास्यै॒ते। स्थू॒रि॑ यवा॒चित॑म॒च्छावा॒काय॑। अ॒न्त॒त ए॒व वरु॑ण॒मव॑ यज॒ते॥६॥

अ॒न॒ङ्वाह॑म॒ग्नीधे॑। वह्नि॒र्वा अ॑न॒ङ्वान्। वह्नि॒र॒ग्नीत्। वह्नि॒नैव॑ वह्नि॒ य॒ज्ञस्या॑व॒  
रुन्धे॑। इन्द्र॑स्य सुषु॒वाण॑स्य॒ त्रेधे॑न्द्रि॒यं वी॒र्यं॑ प॒राऽप॑तत्। भृ॒गुस्तृ॑तीयमभवत्।  
श्रा॒य॒न्ती॒यं तृ॑तीयम्। सर॑स्वती॒ तृ॑तीयम्। भा॒र्गवो॑ होता॒ भव॑ति। श्रा॒य॒न्ती॒यं  
ब्र॒ह्मसा॑मं भ॒वति॑। वा॒र॒व॒न्ती॒यंम॒ग्निष्टो॑मसा॒मम्। सा॒र॒स्वती॒रपो॑ गृ॒ह्णाति॑। इन्द्रि॒यस्य॑  
वी॒र्य॑स्याव॒रुद्धौ॑। श्रा॒य॒न्ती॒यं ब्र॒ह्मसा॑मं भ॒वति॑। इन्द्रि॒यमे॒वास्मि॑न्वी॒र्यं॑ श्रय॒ति।  
वा॒र॒व॒न्ती॒यंम॒ग्निष्टो॑मसा॒मम्। इन्द्रि॒यमे॒वास्मि॑न्वी॒र्यं॑ वा॒रय॑ति॥७॥

विराट्प्रजापतिरश्वः प्रजापतेरास्यै यजते

ब्रह्मसामं भवति सुप्तं च॥

[२]

ई॒श्वरो॒ वा ए॒ष दि॒शोऽनु॑न्म॒दितोः॑। यं दि॒शोऽनु॑ व्या॒स्थाप॑यन्ति। दि॒शाम॑वैष्टयो॒  
भव॑न्ति। दि॒क्ष्वैव॑ प्र॒ति ति॒ष्ठत्यनु॑न्मादाय। प॒ञ्च दे॒वता॑ यज॒ति। प॒ञ्च दि॒शः। दि॒क्ष्वैव॑  
प्र॒ति ति॒ष्ठति॑। ह॒विषो॑हविष इ॒ष्ट्वा बा॑र॒हस्प॑त्यम॒भिघा॑रयति। य॒ज्ञमा॑न॒दे॒वत्यो॑ वै  
बृ॒हस्प॑तिः। य॒ज्ञमा॑नमे॒व तेज॑सा॒ सम॑र्धयति॥८॥

आ॒दि॒त्यां म॒ल्हां ग॒र्भिणी॒मा ल॑भते। मा॒रु॒तीं पृ॒श्निं प॒ष्ठौही॒म्। वि॒शं चै॒वास्मै॑  
 रा॒ष्ट्रं च॑ स॒मीची॑ दधाति। आ॒दि॒त्यया॒ पूर्व॑या प्रच॑रति। मा॒रु॒त्योत्त॑रया। रा॒ष्ट्र  
 ए॒व वि॒शम॑नु॒बध्ना॑ति। उ॒च्चैरा॑दि॒त्याया॒ आ॒श्राव॑यति। उ॒पा॒ंशु मा॑रु॒त्यै। तस्मा॑द्रा॒ष्ट्रं  
 वि॒शम॑तिवदति। ग॒र्भिण्या॑दि॒त्या भ॑वति॥९॥

इन्द्रि॑यं वै गर्भः। रा॒ष्ट्रमे॒वेन्द्रि॑याव्य॒कः। अ॒ग॒र्भा मा॑रु॒ती। वि॒द्वै म॑रु॒तः। वि॒शमे॒व  
 निरि॑न्द्रि॒याम॑कः। दे॒वा॒सु॒राः संय॑त्ता आसन्। ते दे॒वा अ॒श्विनोः॑ पू॒षन्वा॒चः स॒त्यं  
 स॑न्नि॒धाय॑। अ॒नृ॒ते॒नासु॑रान॒भ्य॑भवन्। ते॑ऽश्वि॒भ्यां॑ पू॒ष्णे पु॑रो॒डाशं॑ द्वा॒दश॑कपालं  
 निर॑वपन्। ततो॒ वै ते वा॒चः स॒त्यम॑वा॒रुन्ध॑त॥१०॥

यद॒श्वि॒भ्यां॑ पू॒ष्णे पु॑रो॒डाशं॑ द्वा॒दश॑कपालं निर्व॑पति। अ॒नृ॒ते॒नैव॑ भ्रातृ॒व्यान॑भि॒भूय॑।  
 वा॒चः स॒त्यम॑व॒ रुन्धे॑। सर॑स्वते सत्य॒वाचे॑ च॒रुम्। पू॒र्वमे॒वोदि॑तम्। उ॒त्त॑रेणा॒भि  
 गृ॑णाति। स॒वि॒त्रे स॒त्यप्र॑सवाय पु॒रो॒डाशं॑ द्वा॒दश॑कपालं प्रसू॑त्यै। दू॒तान्प्र॑हि॒णोति॑।  
 आ॒वि॒द ए॒ता भ॑वन्ति। आ॒वि॒दमे॒वैनं॑ गमयन्ति। अथो॑ दू॒तेभ्य॑ ए॒व न छि॑द्यते।

तिसृधन्व९ शुष्कदृतिर्दक्षिणा समृद्धौ॥११॥ अर्धयति भवत्यरुन्धत गमयन्ति द्वे च॥ [३]

आग्नेयमष्टाकपालं निर्वपति। तस्माच्छिशिरे कुरुपश्चालाः प्राञ्चौ यान्ति।  
सौम्यं चरुम्। तस्माद्वसन्तं व्यवसायादयन्ति। सवित्रं द्वादशकपालम्।  
तस्मात्पुरस्ताद्यवाना९ सवित्रा विरुन्धते। बारुहस्पत्यं चरुम्। सवित्रैव विरुध्य।  
ब्रह्मणा यवानादधते। त्वाष्ट्रमष्टाकपालम्॥१२॥

रूपाण्येव तेन कुर्वते। वैश्वानरं द्वादशकपालम्। तस्माज्जघन्ये नैदाघे प्रत्यञ्चः  
कुरुपश्चाला यान्ति। सारस्वतं चरुं निर्वपति। तस्मात्प्रावृषि सर्वा वाचो वदन्ति।  
पौष्णेन व्यवस्यन्ति। मैत्रेण कृषन्ते। वारुणेन विधृता आसते। क्षैत्रपत्येन पाचयन्ते।  
आदित्येनादधते॥१३॥

मासिमास्येतानि हवी९षि निरुप्याणीत्याहुः। तेनैवर्तून्प्रयुङ्क्त इति। अथो  
खल्वाहुः। कः संवत्सरं जीविष्यतीति। षडेव पूर्वेद्युर्निरुप्याणि। षडुत्तरेद्युः।  
तेनैवर्तून्प्रयुङ्क्ते। दक्षिणो रथवाहनवाहः पूर्वेषां दक्षिणा। उत्तर उत्तरेषाम्।



संवत्सरस्यैवान्तौ युनक्ति। सुवर्गस्य लोकस्य समष्ट्यै॥१४॥ त्वाष्ट्रमुष्टाकपालं दधते युनक्त्येकं  
च॥ [४]

इन्द्रस्य सुषुवाणस्य दशधेन्द्रियं वीर्यं पराऽपतत्। स यत्प्रथमं निरर्णीवत्।  
तत्क्लमभवत्। यद्वितीयम्। तद्वदरम्। यत्तृतीयम्। तत्कर्कन्धु। यन्नस्तः। स  
सिंहः। यदक्ष्योः॥१५॥

स शार्दूलः। यत्कर्णयोः। स वृकः। य ऊर्ध्वः। स सोमः। याऽवाची। सा सुरा।  
त्रयाः सक्तवो भवन्ति। इन्द्रियस्यावरुद्धौ। त्रयाणि लोमानि॥१६॥

त्विषिमेवाव रुन्धे। त्रयो ग्रहाः। वीर्यमेवाव रुन्धे। नाम्ना दशमी। नव वै  
पुरुषे प्राणाः। नाभिर्दशमी। प्राणा इन्द्रियं वीर्यम्। प्राणानेवेन्द्रियं वीर्यं यजमान  
आत्मन्धत्ते। सीसेन क्लीबाच्छष्पाणि क्रीणाति। न वा एतदयो न हिरण्यम्॥१७॥

यथसीसम्। न स्त्री न पुमान्। यत्क्लीबः। न सोमो न सुरा। यथसौत्रामणी  
समृद्धौ। स्वाद्वीं त्वा स्वादुनेत्याह। सोममेवैनां करोति। सोमोऽस्यश्विभ्यां पच्यस्व

सरस्वत्यै पच्यस्वेन्द्राय सुत्राम्णे पच्यस्वेत्याह। एताभ्यो ह्येषा देवताभ्यः पच्यते।  
तिस्रः स२सृष्टा वसति॥१८॥

तिस्रो हि रात्रीः क्रीतः सोमो वसति। पुनातु ते परिस्नुतमिति यजुषा पुनाति  
व्यावृत्त्यै। पवित्रेण पुनाति। पवित्रेण हि सोमं पुनन्ति। वारेण शश्वता तनेत्याह।  
वारेण हि सोमं पुनन्ति। वायुः पूतः पवित्रेणेति नैतया पुनीयात्। व्यृद्धा ह्येषा।  
अतिपवितस्यैतया पुनीयात्। कुविदङ्गेत्यनिरुक्तया प्राजापत्यया गृह्णाति॥१९॥

अनिरुक्तः प्रजापतिः। प्रजापतेरास्यै। एकयर्चा गृह्णाति। एकधैव यजमाने वीर्यं  
दधाति। आश्विनं धूम्रमालभते। अश्विनौ वै देवानां भिषजौ। ताभ्यामेवास्मै भेषजं  
करोति। सारस्वतं मेषम्। वाग्वै सरस्वती। वाचैवैनं भिषज्यति। ऐन्द्रमृषभ२  
सैन्द्रत्वाय॥२०॥ अक्ष्योर्लोमानि हिरण्यं वसति गृह्णाति भिषज्यत्येकं च॥\_\_\_\_\_ [५]

यत्रिषु यूपेष्वालभेत। बहिर्धाऽस्मादिन्द्रियं वीर्यं दध्यात्। भ्रातृव्यमस्मै जनयेत्।

ए॒क॒यू॒प आ॒ल॒भ॒ते। ए॒क॒धै॒वास्मि॑न्नि॒न्द्रि॒यं वी॒र्यं॑ द॒धा॒ति। नास्मै॑ भ्रातृ॒व्यं ज॒न॒य॒ति।  
नैतेषां॑ प॒शूनां॑ पु॒रो॒डा॒शा भ॒व॒न्ति। ग्र॒हपु॒रो॒डा॒शा ह्ये॒ते। यु॒वः सु॒राम॑म॒श्वि॒नेति॑  
सर्व॑दे॒वत्ये॑ या॒ज्यानु॒वा॒क्ये भ॒व॒तः। सर्वा॑ ए॒व दे॒वताः॑ प्री॒णा॒ति॥ २१॥

ब्रा॒ह्म॒णं परि॑क्रीणीयादु॒च्छे॒षण॑स्य पा॒तार॑म्। ब्रा॒ह्म॒णो ह्याहु॑त्या उ॒च्छे॒षण॑स्य पा॒ता।  
यदि॑ ब्रा॒ह्म॒णं न वि॒न्देत्। व॒ल्मी॒क॒व॒पा॒याम॑व॒ नये॑त्। सैव॑ ततः प्रायश्चि॒त्तिः। यद्वै  
सौ॒त्राम॑ण्यै व्यृद्धम्। तद॑स्यै॒ समृ॑द्धम्। ना॒ना॒दे॒व॒त्याः प॒शव॑श्च पु॒रो॒डा॒शाश्च॑ भ॒व॒न्ति  
समृ॑द्धौ। ऐ॒न्द्रः प॑शूनामु॒त्त॒मो भ॑वति। ऐ॒न्द्रः पु॑रो॒डा॒शानां॑ प्रथ॒मः॥ २२॥

इ॒न्द्रि॒ये ए॒वास्मै॑ सु॒मी॒ची द॒धा॒ति। पु॒रस्ता॑दनू॒या॒जानां॑ पु॒रो॒डा॒शैः प्र॑चरति। प॒शवो॑  
वै पु॒रो॒डा॒शाः। प॒शूने॒वाव॑ रुन्धे। ऐ॒न्द्रमे॒का॑द॒श॒क॒पालं॑ निर्वपति। इ॒न्द्रि॒यमे॒वाव॑ रुन्धे।  
सा॒वि॒त्रं द्वा॑द॒श॒क॒पालं॑ प्रसू॒त्यै। वा॒रु॒णं द॑श॒क॒पाल॑म्। अ॒न्त॒त ए॒व व॑रु॒णम॑व॒ यज॑ते।  
वड॑बा दक्षि॒णा॥ २३॥

उ॒त वा ए॒षाऽश्व॑ः सू॒ते। उ॒ताऽश्व॑त॒रम्। उ॒त सो॒मं उ॒त सु॒रा। यथ्सौ॒त्राम॑णी

समृद्धौ। बार्हस्पत्यं पशुं चतुर्थमतिपवितस्या लभते। ब्रह्म वै देवानां बृहस्पतिः।  
ब्रह्मणैव यज्ञस्य व्यद्धमपि वपति। पुरोडाशवानेष पशुर्भवति। न ह्येतस्य ग्रहं  
गृह्णन्ति। सोमप्रतीकाः पितरस्तृष्णुतेति शतातृष्णायाः समवनयति॥२४॥

शतायुः पुरुषः शतेन्द्रियः। आयुष्येवेन्द्रिये प्रति तिष्ठति। दक्षिणेऽग्नौ जुहोति।  
पापवस्यसस्य व्यावृत्त्यै। हिरण्यमन्तरा धारयति। पूतामेवैनं जुहोति। शतमानं  
भवति। शतायुः पुरुषः शतेन्द्रियः। आयुष्येवेन्द्रिये प्रति तिष्ठति। यत्रैव शतातृष्णां  
धारयति॥२५॥

तन्निदधाति प्रतिष्ठित्यै। पितृन् वा एतस्येन्द्रियं वीर्यं गच्छति। यः सोमोऽति  
पवते। पितृणां याज्यानुवाक्याभिरुपं तिष्ठते। यदेवास्य पितृनिन्द्रियं वीर्यं गच्छति।  
तदेवाव रुन्धे। तिसृभिरुपं तिष्ठते। तृतीये वा इतो लोके पितरः। तानेव प्रीणाति।  
अथो त्रीणि वै यज्ञस्येन्द्रियाणि। अध्वर्युरहोता ब्रह्मा। त उपतिष्ठन्ते। यान्येव  
यज्ञस्येन्द्रियाणि। तैरेवास्मै भेषजं करोति॥२६॥

प्रीणाति प्रथमो दक्षिणा समवनयति धारयतीन्द्रियाणि चत्वारि

च॥

[६]

अ॒ग्नि॒ष्टोमम॒ग्र आ॒हर॑ति। य॒ज्ञ॒मुखं॑ वा अ॒ग्नि॒ष्टोमः॑। य॒ज्ञ॒मुखमे॒वारभ्य॑ स॒वमा  
 क्र॑मते। अथै॒षोऽभिषे॑चनीयश्चतु॒स्त्रिंश॑प॒वमानो॑ भवति। त्रयं॒स्त्रिंश॑द्वे दे॒वताः॑। ता  
 ए॒वाऽऽप्रो॑ति। प्र॒जाप॑तिश्चतु॒स्त्रिंशः॑। तमे॒वाऽऽप्रो॑ति। स॒ंश॒र ए॒ष स्तोमा॑नामयथा-  
 पूर्॒वम्। यद्विष॑माः स्तोमाः॑॥२७॥

ए॒तावा॒न् वै य॒ज्ञः। यावा॒न्पव॑मानाः। अ॒न्तः श्ले॑षणं त्वा अ॒न्यत्। यथ्स॒माः  
 पव॑मानाः। तेना॒ऽसंश॑रः। तेन॑ यथापूर्॒वम्। आ॒त्मनै॒वाग्नि॑ष्टोमेन॒र्ध्नोति॑। आ॒त्मना॒  
 पु॒ण्यो भ॑वति। प्र॒जा वा उ॒क्थानि॑। प॒शव॑ उ॒क्थानि॑। यदु॒क्थ्यो भ॑वत्यनु॒  
 सन्त॑त्यै॥२८॥ स्तोमाः प॒शव॑ उ॒क्थान्येकं॑ च॥

[७]

उप॑ त्वा जा॒मयो॒ गिर॒ इति॑ प्रति॒पद्भव॑ति। वा॒ग्वै वा॒युः। वा॒च ए॒वैषो॑ऽभिषे॒कः।  
 सर्वा॑सामे॒व प्र॒जाना॑ं सू॒यते। सर्वा॑ ए॒नं प्र॒जा राजे॑ति वदन्ति। ए॒तमु॒ त्यन्द॑श्च क्षिप॒  
 इत्या॑ह। आ॒दि॒त्या वै प्र॒जाः। प्र॒जाना॑मे॒वैतेन॑ सू॒यते। यन्ति॒ वा ए॒ते य॑ज्ञ॒मुखा॑त्।  
 ये सं॒भार्या॑ अ॒क्रन्॑॥२९॥

यदाह पवस्व वाचो अंग्रिय इति। तेनैव यज्ञमुखान्नयन्ति। अनुष्टुक्प्रथमा भवति। अनुष्टुगुत्तमा। वाग्वा अनुष्टुक्। वाचैव प्रयन्ति। वाचोद्यन्ति। उद्वतीर्भवन्ति। उद्वद्वा अनुष्टुभौ रूपम्। आनुष्टुभो राजन्यः॥३०॥

तस्मादुद्वतीर्भवन्ति। सौर्यनुष्टुगुत्तमा भवति। सुवर्गस्य लोकस्य सन्तत्यै। यो वै सुवादेति। नैनः सुव उपनमति। यः सामभ्य एति। पापीयान्सुषुवाणो भवति। एतानि खलु वै सामानि। यत्पृष्ठानि। यत्पृष्ठानि भवन्ति॥३१॥

तैरेव सुवान्नेति। यानि देवराजानां सामानि। तैरमुष्मिल्लोक ऋध्नोति। यानि मनुष्यराजानां सामानि। तैरस्मिल्लोक ऋध्नोति। उभयोरेव लोकयोर् ऋध्नोति। देवल्लोके च मनुष्यलोके च। एकविंशोऽभिषेचनीयस्योत्तमो भवति। एकविंशः केशवपनीयस्य प्रथमः। सप्तदशो दशपेयः॥३२॥

विद्वा एकविंशः। राष्ट्रं सप्तदशः। विश एवैतन्मध्यतोऽभिषिच्यते। तस्माद्वा एष विशां प्रियः। विशो हि मध्यतोऽभिषिच्यते। यद्वा एनमदो दिशोऽनु

व्यास्थापयन्ति। तत्सुवर्गं लोकमभ्या रोहति। यदिमं लोकं न प्रत्यवरोहेत्।  
अतिजुनं वेयात्। उद्धा माद्येत्। यदेष प्रतीचीनः स्तोमो भवति। इममेव तेन  
लोकं प्रत्यवरोहति। अथो अस्मिन्नेव लोके प्रति तिष्ठत्यनुन्मादाय॥ ३३॥ अक्रत्राजुन्यो

भवन्ति दशपेयो माद्येन्नीणि च॥

[८]

इयं वै रंजता। असौ हरिणी। यद्रुक्मौ भवतः। आभ्यामेवैनमुभयतः परि  
गृह्णाति। वरुणस्य वा अभिषिच्यमानस्याऽऽपः। इन्द्रियं वीर्यं निरघ्नन्। तत्सुवर्णं  
हिरण्यमभवत्। यद्रुक्ममन्तर्दधाति। इन्द्रियस्य वीर्यस्यानिर्घाताय। शतमानो भवति  
शतक्षरः। शतायुः पुरुषः शतेन्द्रियः। आयुष्येवेन्द्रिये प्रति तिष्ठति। आयुर्वै हिरण्यम्।  
आयुष्या एवैनमभ्यति क्षरन्ति। तेजो वै हिरण्यम्। तेजस्या एवैनमभ्यति क्षरन्ति।  
वर्चो वै हिरण्यम्। वर्चस्या एवैनमभ्यति क्षरन्ति॥ ३४॥ शतक्षरोऽष्टौ च॥

[९]

अप्रतिष्ठितो वा एष इत्याहुः। यो रंजसूयेन यजत इति। यदा वा  
एष एतेन द्विरात्रेण यजते। अथ प्रतिष्ठा। अथ संवत्सरमाप्नोति। यावन्ति  
संवत्सरस्याहोरात्राणि। तावतीरेतस्य स्तोत्रीयाः। अहोरात्रेष्वेव प्रति तिष्ठति।

अ॒ग्नि॒ष्टो॒मः पू॒र्व॒म॒ह॒र्भव॑ति। अ॒ति॒रा॒त्र उत्त॑रम्॥३५॥

नानै॒वाहो॑रा॒त्रयोः॑ प्र॒ति ति॑ष्ठति। पौ॒र्ण॒मा॒स्यां पू॒र्व॒म॒ह॒र्भव॑ति। व्य॑ष्टका॒यामु॑त्तरम्।  
नानै॒वार्ध॑मा॒सयोः॑ प्र॒ति ति॑ष्ठति। अ॒मा॒वा॒स्यायां॑ पू॒र्व॒म॒ह॒र्भव॑ति। उ॒द्दृष्ट॑ उत्तरम्। नानै॒व  
मा॒सयोः॑ प्र॒ति ति॑ष्ठति। अथो॒ खलु॑। ये ए॒व सं॑मानप॒क्षे पु॑ण्या॒हे स्या॑ताम्। तयोः  
का॒र्यं प्र॑ति॒ष्ठित्यै॑॥३६॥

अ॒प॒श॒व्यो द्वि॑रा॒त्र इ॒त्याहुः॑। द्वे ह्ये॑ते छ॒न्द॑सी। गा॒य॒त्रं च॒ त्रैष्टु॑भं च।  
जग॑तीम॒न्तर्य॑न्ति। न तेन॒ जग॑ती कृ॒तेत्या॑हुः। यदे॑नान्तृ॒तीय॑स॒वने॑ कुर्वन्तीति।  
य॒दा वा ए॒षाऽही॑न॒स्याह॒र्भज॑ते। सा॒ह॒स्यं वा॒ स॒व॒नम्। अथै॒व जग॑ती कृ॒ता।  
अथ॑ प॒श॒व्यः। व्यु॑ष्टि॒र्वा ए॒ष द्वि॑रा॒त्रः। य ए॒वं वि॒द्वान्द्वि॑रा॒त्रेण॑ यज॑ते। व्ये॒वास्मा॑  
उच्छ॑ति। अथो॒ तम॑ ए॒वाप॑ ह॒ते। अ॒ग्नि॒ष्टो॒मम॑न्त॒त आ ह॑रति। अ॒ग्निः सर्वा॑ दे॒वताः॑।  
दे॒वता॑स्वे॒व प्र॑ति॒ ति॑ष्ठति॥३७॥ उत्तरं॒ प्र॑ति॒ष्ठित्यै॑ प॒श॒व्यः सप्त॑ च॥

[१०]

वरु॑णस्य जा॒मि वा ई॒श्वर॑ औ॒ग्नेय॑मिन्द्र॒स्य य॒ज्ञिष्व॑ग्नि॒ष्टोम॑मुप॒ त्वेयं॑ वै रंज॒ताऽप्र॑ति॒ष्ठितो॑ दश॥१०॥  
वरु॑णस्य॒ यद॑ग्नि॒भ्यां य॒ज्ञिषु॑ तस्मा॒दुद्ध॑तीः सप्तत्रि॒ंशत्॥३७॥



वरुणस्य प्रति तिष्ठति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे प्रथमाष्टके अष्टमः प्रपाठकः समाप्तः॥

॥ अष्टकम् २ ॥

॥ प्रथमः प्रश्नः ॥

॥ तैत्तिरीयब्राह्मणे द्वितीयाष्टके प्रथमः प्रपाठकः ॥

अङ्गिरसो वै स॒त्रमा॑सत। तेषां पृश्नि॑र्धर्म॒धुगा॑सीत्। सर्जी॑षेणाजीवत्। तेऽब्रुवन्।  
कस्मै॒ नु स॒त्रमा॑स्महे। येऽस्या ओष॑धीर्न॒ जनया॑म् इति॑। ते दि॒वो वृष्टि॑मसृजन्त।  
याव॑न्तः स्तो॒का अ॒वाप॑द्यन्त। ताव॑ती॒रोष॑धयोऽजायन्त। ता जा॒ताः पि॒तरो॑  
वि॒षेणा॑लिम्पन्॥१॥

तासां॑ ज॒ग्ध्वा रु॒प्यन्त्यै॑त्। तेऽब्रुवन्। क इ॒दमि॒त्थम॑क॒रिति॑। व॒यं  
भा॒ग॒धेय॑मिच्छ॒माना॒ इति॑ पि॒तरो॑ऽब्रुवन्। किं वो॑ भा॒ग॒धेय॑मिति॑। अ॒ग्नि॒होत्र॑  
ए॒व नोऽप्य॒स्त्वित्य॑ब्रुवन्। तेभ्य॑ ए॒तद्भा॑ग॒धेयं॑ प्राय॑च्छन्। यद्धु॒त्वा नि॒मार्ष्टि॑। ततो॒ वै  
त ओष॑धीरस्वदयन्। य ए॒वं वेद॑॥२॥

स्वद॑न्तेऽस्मा॒ ओष॑धयः। ते व॒त्समु॑पावा॑सृजन्। इ॒दं नो॑ ह॒व्यं प्रदा॑प॒येति॑।

सोऽब्रवीद्वरं वृणै। दशं मा रात्रीर्जातं न दोहन्। आसङ्गवं मात्रा सह चराणीति।  
 तस्माद्वत्सं जातं दश रात्रीर्न दुहन्ति। आसङ्गवं मात्रा सह चरति। वारेवृतुः ह्यस्य।  
 तस्माद्वत्सं सः सृष्टधयं रुद्रो घातुकः। अति हि सन्धान्धयति॥३॥ अलिम्बन्वेद घातुक  
 एकं च॥

[१]

प्रजापतिरग्निमसृजत। तं प्रजा अन्वसृज्यन्त। तमभाग उपास्त। सोऽस्य  
 प्रजाभिरपाक्रामत्। तमवरुरुत्समानोऽन्वैत्। तमवरुधं नाशक्रोत्। स तपोऽतप्यत।  
 सोऽग्निरुपांरमतातापि वै स्य प्रजापतिरिति। स रराटादुदमृष्ट॥४॥

तद्घृतमभवत्। तस्माद्यस्य दक्षिणतः केशा उन्मृष्टाः। ताभ्यैष्ठलक्ष्मी  
 प्राजापत्येत्याहुः। यद्रराटादुदमृष्ट। तस्माद्रराटे केशा न सन्ति। तद्ग्नौ प्रागृह्णात्।  
 तद्विचिकित्सत्। जुह्वानी(३) मा हौषा(३)मिति। तद्विचिकित्सायै जन्मं। य एवं  
 विद्वान् विचिकित्सति॥५॥

वसीय एव चेतयते। तं वाग्भ्यवदञ्जुहूधीति। सोऽब्रवीत्। कस्त्वमसीति। स्वैव ते  
 वागित्यब्रवीत्। सोऽजुहोत्स्वाहेति। तत्स्वाहाकारस्य जन्मं। य एवः स्वाहाकारस्य

जन्म वेदं। क॒रोति॑ स्वा॒हाका॒रेण॑ वी॒र्यम्॑। यस्यै॒वं वि॒दुषः॑ स्वा॒हाका॒रेण॑ जु॒ह्वति॑॥६॥

भो॒गा॒यै॒वास्य॑ हु॒तं भ॑वति। तस्या॒ आहु॑त्यै पु॒रुष॑मसृजत। द्वितीयंमजुहोत्।  
सोऽश्व॑मसृजत। तृतीयंमजुहोत्। स गाम॑सृजत। च॒तुर्थ॑मजुहोत्। सोऽवि॑मसृजत।  
प॒ञ्चम॑मजुहोत्। सोऽजाम॑सृजत॥७॥

सोऽग्नि॑र॒बिभेत्। आहु॑तीभि॒र्वै माँऽऽप्रो॑तीति। स प्र॒जाप॑तिं पुनः प्रावि॑शत्।  
तं प्र॒जाप॑तिरब्रवीत्। जाय॒स्वेति॑। सोऽब्र॑वीत्। किं भा॒ग॒धेय॑म॒भि ज॑निष्य॒ इति॑।  
तुभ्य॑मे॒वेदः॑ हू॒याता॒ इत्य॑ब्रवीत्। स ए॒तद्भा॑ग॒धेय॑म॒भ्यजा॑यत। यद॑ग्निहोत्रम्॥८॥

तस्मा॑द॒ग्निहो॑त्रमुच्यते। तद्धू॒यमा॑नमादित्योऽब्र॑वीत्। मा हौ॑षीः। उ॒भयो॒र्वै  
ना॑वे॒तदि॑ति। सोऽग्नि॑र॒ब्रवीत्। क॒थं नौ॑ होष्य॒न्तीति॑। सा॒यमे॒व तुभ्य॑ जुहवन्।  
प्रा॒तर्म॑ह्यमित्य॑ब्रवीत्। तस्मा॑द॒ग्नये॑ सा॒यः॑ हू॒यते। सू॒र्याय॑ प्रा॒तः॥९॥

आ॒ग्नेयी॒ वै रा॒त्रिः। ऐ॒न्द्रम॑हः। यदनु॑दि॒ते सू॒र्ये प्रा॒तर्जु॑हुयात्। उ॒भय॑मे॒वाग्ने॒यः॑

स्यात्। उदिते सूर्ये प्रातर्जुहोति। तथाऽग्नये सायं हूयते। सूर्याय प्रातः। रात्रिं वा अनु प्रजाः प्र जायन्ते। अह्ना प्रति तिष्ठन्ति। यत्सायं जुहोति॥१०॥

प्रैव तेन जायते। उदिते सूर्ये प्रातर्जुहोति। प्रत्येव तेन तिष्ठति। प्रजापतिरकामयत् प्रजायेयेति। स एतदग्निहोत्रं मिथुनमपश्यत्। तदुदिते सूर्येऽजुहोत्। यजुषाऽन्यत्। तूष्णीमन्यत्। ततो वै स प्राजायत। यस्यैवं विदुष उदिते सूर्येऽग्निहोत्रं जुहोति॥११॥

प्रैव जायते। अथो यथा दिवा प्रजानन्नेति। तादृगेव तत्। अथो खल्वाहुः। यस्य वै द्वौ पुण्यौ गृहे वसंतः। यस्तयोरन्यं राधयत्यन्यं ना उभौ वाव स तावृच्छतीति। अग्निं वावाऽऽदित्यः सायं प्र विशति। तस्मादग्निर्दूरान्नक्तं ददृशे। उभे हि तेजसी सम्पद्येते॥१२॥

उद्यन्तं वावाऽऽदित्यमग्निरनु समारोहति। तस्माद्धूम एवाग्नेर्दिवा ददृशे। यदग्नये

सायं जुहुयात्। आ सूर्याय वृश्चेत्। यथ्सूर्याय प्रातर्जुहुयात्। आऽग्नये वृश्चेत्।  
 देवताभ्यः समदं दध्यात्। अग्निर्ज्योतिर्ज्योतिः सूर्यः स्वाहेत्येव सायं होतव्यम्।  
 सूर्यो ज्योतिर्ज्योतिरग्निः स्वाहेति प्रातः। तथोभाभ्यां सायं हूयते॥१३॥

उभाभ्यां प्रातः। न देवताभ्यः समदं दधाति। अग्निर्ज्योतिरित्याह। अग्निर्वै  
 रेतोधाः। प्रजा ज्योतिरित्याह। प्रजा एवास्मै प्र जनयति। सूर्यो ज्योतिरित्याह।  
 प्रजास्वेव प्रजातासु रेतो दधाति। ज्योतिरग्निः स्वाहेत्याह। प्रजा एव प्रजाता  
 अस्यां प्रतिष्ठापयति॥१४॥

तूष्णीमुत्तरामाहुतिं जुहोति। मिथुनत्वाय प्रजात्यै। यदुदिते सूर्ये प्रातर्जुहुयात्।  
 यथाऽतिथये प्रद्वृताय शून्यायावस्थायाहार्यं हरन्ति। तादृगेव तत्। काऽऽह  
 ततस्तद्भवतीत्याहुः। यथ्स न वेद। यस्मै तद्धरन्तीति। तस्माद्यदौषसं जुहोति।  
 तदेव सम्प्रति। अथो यथा प्रार्थमौषसं परिवेवेष्टि। तादृगेव तत्॥१५॥

जुह्वत्यजामंसजताग्निहोत्रं सूर्याय प्रातर्जुहोति जुह्वति सम्यद्येते हूयते स्थापयति सम्प्रति द्वे च॥

अमृष्टं विचिकित्सति

[२]

रुद्रो वा ए॒षः। यद॒ग्निः। पत्नीं॑ स्था॒ली। यन्मध्ये॑ऽग्नेर॑धि॒श्रये॑त्। रुद्राय॑ पत्नीम॒पि  
दध्यात्। प्र॒मायु॑का स्यात्। उदी॒चोऽङ्गारान्नि॒रूह्याधि॑ श्रयति। पत्न्यै॑ गोपी॒थाय॑।  
व्य॑न्तान्करोति। तथा॑ पत्न्यप्र॒मायु॑का भवति॥१६॥

घ॒र्मो वा ए॒षोऽशान्तः॑। अह॑रहः प्र वृ॒ज्यते। यद॒ग्निहो॑त्रम्। प्रति॑षिञ्चेत्प॒शुकाम॑स्य।  
शान्तमि॑व हि प॒शव्यम्। न प्रति॑षिञ्चेद्ब्र॒ह्मवर्च॑सकामस्य। समि॑द्धमि॒व हि  
ब्र॑ह्मवर्च॒सम्। अथो॑ खलु॑। प्र॒तिषि॑च्यमे॒व। यत्प्र॑तिषिञ्चति॥१७॥

तत्प॑शव्यम्। य॒ज्ञुहो॑ति। तद्ब्र॑ह्मवर्च॒सि। उ॒भय॑मे॒वाकः॑। प्रच्यु॑तं वा  
ए॒तद॒स्माल्लो॒कात्। अ॒गतं॑ दे॒वलो॒कम्। यच्छ्रु॑तं ह॒विरन॑भिघारितम्। अ॒भि  
द्यो॑तयति। अ॒भ्यैवैन॑द्धारयति। अथो॑ दे॒वत्रै॒वैन॑द्गमयति॥१८॥

पर्य॑ग्नि करोति। रक्ष॑सामप॒हत्यै। त्रिः पर्य॑ग्नि करोति। त्र्या॑वृद्धि य॒ज्ञः। अथो॑  
मे॒ध्यत्वाय॑। यत्प्रा॒चीन॑मुद्वा॒सये॑त्। यज॑मानं शु॒चाऽर्प॑येत्। यद॑क्षिणा। पि॒तृदे॒वत्य॑  
स्यात्। यत्प्र॒त्यक्॥१९॥

पत्नीः शुचाऽर्पयेत्। उदीचीनमुद्वासयति। एषा वै देवमनुष्याणां शान्ता दिक्।  
तामेवैनदनुद्वासयति शान्त्यै। वर्त्म करोति। यज्ञस्य सन्तत्यै। निष्टपति। उपैव  
तथ्स्तृणाति। चतुरुन्नयति। चतुष्पादः पशवः॥२०॥

पशून्वाव रुन्धे। सर्वान्पूर्णानुन्नयति। सर्वे हि पुण्यां राद्धाः। अनूच उन्नयति।  
प्रजायां अनूचीनत्वाय। अनूच्येवास्य प्रजाऽर्धुका भवति। सम्मृशति व्यावृत्यै।  
नाहोष्यन्नुप सादयेत्। यदहोष्यन्नुपसादयेत्। यथाऽन्यस्मां उपनिधाय॥२१॥

अन्यस्मै प्रयच्छति। तादृगेव तत्। आऽस्मै वृश्चेत। यदेव गार्हपत्येऽधि-  
श्रयति। तेन गार्हपत्यं प्रीणाति। अग्निरबिभेत्। आहुतयो माऽत्येष्यन्तीति। स  
एतां समिधमपश्यत्। तामाऽधत्त। ततो वा अग्नावाहुतयोऽधियन्त॥२२॥

यदेनं समयच्छत्। तथ्समिधः समित्वम्। समिधमा दधाति। समेवैनं  
यच्छति। आहुतीनां धृत्यै। अथो अग्निहोत्रमेवेध्मवत्करोति। आहुतीनां प्रतिष्ठित्यै।  
ब्रह्मवादिनो वदन्ति। यदेकां समिधमाधाय द्वे आहुती जुहोति। अथ कस्यां



स॒मिधिं द्वितीया॒माहु॑तिं जुहोतीति॥२३॥

यद्वे समिधा॑वा द॒ध्यात्। भ्रातृ॑व्यमस्मै जनयेत्। एका॑ः समिधमा॒धाय॑। यजु॑षा-  
ऽन्यामाहु॑तिं जुहोति। उ॒भे ए॒व स॒मिध्व॑ती आहु॑ती जुहोति। नास्मै॒ भ्रातृ॑व्यं जनयति।  
आदी॑तायां जुहोति। समि॑द्धमिव॒ हि ब्र॑ह्मवर्च॒सम्। अथो॒ यथाऽति॑थिं॒ ज्योति॑ष्कृत्वा  
प॑रि वेवे॑ष्टि। ता॒दृगे॒व तत्। च॒तुरु॑न्नयति। द्विर्जु॑होति। तस्मा॑द्वि॒पाच्चतु॑ष्पादमत्ति।  
अथो॑ द्वि॒पद्ये॒व चतु॑ष्पदः॒ प्रति॑ष्ठापयति॥२४॥ भ॒वति॒ प्रति॑षिञ्चति॒ गम॑यति॒ प्रत्य॑क्पुशवं॒ उपनि॑धायार्ध्रियन्तेति॒ तच्च॑त्वारि॒

च॥ [३]

उ॒त्तरा॑व॒न्तीं वै दे॒वा आहु॑तिमजु॑हवुः। अवा॑चीमसु॑राः। ततो॑ दे॒वा अ॒भ॒वन्।  
परा॑ऽसु॒राः। यं का॒मये॑त् वसी॑यान्थस्या॒दिति॑। कनी॑य॒स्तस्य॒ पूर्वं॑ हु॒त्वा। उ॒त्तरं॒  
भूयो॑ जुहुयात्। ए॒षा वा उ॑त्तराव॒त्याहु॑तिः। तान्दे॒वा अ॑जुहवुः। तत॒स्तेऽभ॑वन्॥२५॥

यस्यै॒वं जुह॑ति। भव॑त्ये॒व। यं का॒मये॑त् पापी॑यान्थस्या॒दिति॑। भूय॒स्तस्य॒ पूर्वं॑ हु॒त्वा। उ॒त्तरं॒ कनी॑यो जुहुयात्। ए॒षा वा अ॒वाच्याहु॑तिः। तामसु॑रा अजुहवुः। तत॒स्ते  
परा॑ऽभ॒वन्। यस्यै॒वं जुह॑ति। परै॒व भ॑वति॥२६॥

हुत्वोपं सादयत्यजामित्वाय। अथो व्यावृत्त्यै। गार्हपत्यं प्रतीक्षते।  
 अननुध्यायिनमेवैनं करोति। अग्निहोत्रस्य वै स्थाणुरस्ति। तं य ऋच्छेत्।  
 यज्ञस्थाणुमृच्छेत्। एष वा अग्निहोत्रस्य स्थाणुः। यत्पूर्वाऽऽहुतिः। तां  
 यदुत्तरयाऽभि जुहुयात्॥२७॥

यज्ञस्थाणुमृच्छेत्। अतिहाय पूर्वमाहुतिं जुहोति। यज्ञस्थाणुमेव परि वृणक्ति।  
 अथो भ्रातृव्यमेवास्वाऽति क्रामति। अवाचीनः सायमुपमार्ष्टि। रेत एव तदधाति।  
 ऊर्ध्वं प्रातः। प्र जनयत्येव तत्। ब्रह्मवादिनो वदन्ति। चतुरुन्नयति॥२८॥

द्विर्जुहोति। अथ कं द्वे आहुती भवतु इति। अग्नौ वैश्वानुर इति ब्रूयात्। एष  
 वा अग्निर्वैश्वानुरः। यद्वाह्मणः। हुत्वा द्विः प्राश्नाति। अग्नावेव वैश्वानुरे द्वे आहुती  
 जुहोति। द्विर्जुहोति। द्विर्निमार्ष्टि। द्विः प्राश्नाति॥२९॥

षट्त्सम्पद्यन्ते। षड्वा ऋतवः। ऋतूनेव प्रीणाति। ब्रह्मवादिनो वदन्ति। किं  
 देवत्यमग्निहोत्रमिति। वैश्वदेवमिति ब्रूयात्। यद्यजुषा जुहोति। तदैन्द्राग्रम्।

यत्तूष्णीम्। तत्प्राजापत्यम्॥३०॥

यन्निमार्ष्टि। तदोषधीनाम्। यद्वितीयम्। तत्पितृणाम्। यत्प्राश्नाति।  
तद्गर्भाणाम्। तस्माद्गर्भा अनंश्जन्तो वर्धन्ते। यदाचामति। तन्मनुष्याणाम्।  
उदङ्घ्र्यावृत्याचामति॥३१॥

आत्मनो गोपीथाय। निर्णेनेक्ति शुद्धौ। निष्टपति स्वगाकृत्यै। उद्दिशति।  
सप्तर्षीनेव प्रीणाति। दक्षिणा पर्यावर्तते। स्वमेव वीर्यमनु पर्यावर्तते।  
तस्मादक्षिणोऽर्ध आत्मनो वीर्यावत्तरः। अथो आदित्यस्यैवावृतमनु पर्यावर्तते।  
हुत्वोप समिन्धे॥३२॥

ब्रह्मवर्चसस्य समिद्धौ। न बरुहिरनु प्र हरेत्। असङ्स्थितो वा एष यज्ञः।  
यदग्निहोत्रम्। यदनु प्रहरेत्। यज्ञं विच्छिन्द्यात्। तस्मान्नानु प्रहृत्यम्। यज्ञस्य  
सन्तत्यै। अपो नि नयति। अवभृथस्यैव रूपमंकः॥३३॥

अभवन्भवति जुहुयान्नयति मार्ष्टि द्विः प्राश्नाति

ब्रह्मवादिनो वदन्ति। अग्निहोत्रप्रायणा यज्ञाः। किं प्रायणमग्निहोत्रमिति।  
 वत्सो वा अग्निहोत्रस्य प्रायणम्। अग्निहोत्रं यज्ञानाम्। तस्य पृथिवी सदः।  
 अन्तरिक्षमाग्नीद्धम्। द्यौरहविर्धानम्। दिव्या आपः प्रोक्षणयः। ओषधयो  
 बर्हिः॥ ३४॥

वनस्पतय इध्मः। दिशः परिधयः। आदित्यो यूपः। यजमानः पशुः। समुद्रो-  
 ऽवभृथः। संवत्सरः स्वंगाकारः। तस्मादाहिताग्नेः सर्वमेव बर्हिष्यं दत्तं भवति।  
 यत्सायं जुहोति। रात्रिमेव तेन दक्षिण्यां कुरुते। यत्प्रातः॥ ३५॥

अहरेव तेन दक्षिण्यं कुरुते। यत्ततो ददाति। सा दक्षिणा। यावन्तो वै  
 देवा अहुतमादन्। ते पराऽभवन्। त एतदग्निहोत्रं सर्वस्यैव संमवदायां जुहवुः।  
 तस्मादाहुः। अग्निहोत्रं वै देवा गृहाणां निष्कृतिमपश्यन्निति। यत्सायं जुहोति।  
 रात्रिया एव तद्धुताद्याय॥ ३६॥

यजमानस्यापराभावाय। यत्प्रातः। अहं एव तद्धुताद्याय। यजमानस्यापराभावाय।

यत्ततोऽश्नाति। हुतमेव तत्। द्वयोः पयसा जुहुयात्पशुकामस्य। एतद्वा अग्निहोत्रं मिथुनम्। य एवं वेद। प्र प्रजयां पशुभिर्मिथुनैर्जायते॥३७॥

इमामेव पूर्वया दुहे। अमूमुत्तरया। अधिश्रित्योत्तरमा नयति। योनावेव तद्रेतः सिञ्चति प्रजनने। आज्येन जुहुयात्तेजस्कामस्य। तेजो वा आज्यम्। तेजस्व्येव भवति। पयसा पशुकामस्य। एतद्वै पशूनां रूपम्। रूपेणैवास्मै पशूनव रुन्धे॥३८॥

पशुमानेव भवति। दध्नेन्द्रियकामस्य। इन्द्रियं वै दधि। इन्द्रियाव्येव भवति। यवाग्वां ग्रामकामस्यौषधा वै मनुष्याः। भागधेयेनैवास्मै सजातानव रुन्धे। ग्राम्येव भवति। अयंज्ञो वा एषः। योऽसामा॥३९॥

चतुरुन्नयति। चतुरक्षरं रथन्तरम्। रथन्तरस्यैष वर्णः। उपरीव हरति। अन्तरिक्षं वामदेव्यम्। वामदेव्यस्यैष वर्णः। द्विर्जुहोति। द्व्यक्षरं बृहत्। बृहत् एष वर्णः। अग्निहोत्रमेव तत्सामन्वत्करोति॥४०॥

यो वा अग्निहोत्रस्योपसदो वेद। उपैनमुपसदो नमन्ति। विन्दत उपसत्तारम्।  
उन्नीयोप सादयति। पृथिवीमेव प्रीणाति। होष्यन्नुपसादयति। अन्तरिक्षमेव  
प्रीणाति। हुत्वोप सादयति। दिवमेव प्रीणाति। एता वा अग्निहोत्रस्योपसदः॥४१॥

य एवं वेद। उपैनमुपसदो नमन्ति। विन्दत उपसत्तारम्। यो वा  
अग्निहोत्रस्याश्रावितं प्रत्याश्रावितुं होतारं ब्रह्माणं वषट्कारं वेद। तस्य त्वेव  
हुतम्। प्राणो वा अग्निहोत्रस्याश्रावितम्। अपानः प्रत्याश्रावितम्। मनो होता।  
चक्षुर्ब्रह्मा। निमेषो वषट्कारः॥४२॥

य एवं वेद। तस्य त्वेव हुतम्। सायं यावानश्च वै देवाः प्रातर्यावाणश्चाग्निहोत्रिणो  
गृहमागच्छन्ति। तान् यन्न तर्पयेत्। प्रजयाऽस्य पशुभिर्वि तिष्ठेरन्। यत्तर्पयेत्।  
तृप्ता एनं प्रजया पशुभिस्तर्पयेयुः। सजूर्देवैः सायं यावभिरिति सायं  
सम्मृशति। सजूर्देवैः प्रातर्यावभिरिति प्रातः। ये चैव देवाः सायं यावानो ये च  
प्रातर्यावाणः॥४३॥

तानेवोभयाऽस्तर्पयति। त ए॑नं तृ॒प्ताः प्र॒जया॑ प॒शुभि॑स्तर्पयन्ति। अ॒रु॒णो  
 ह॑ स्मा॒हौप॑वेशिः। अ॒ग्नि॒होत्र॑ ए॒वाह॑ꣳ सा॒यं प्रा॑त॒र्वज्रं॑ भ्रातृ॒व्येभ्यः॑ प्र ह॑रामि।  
 तस्मा॑न्मत्पापी॒याꣳसो॑ भ्रातृ॒व्या इति॑। च॒तुरु॑न्नयति। द्वि॒र्जुहोति॑। स॒मिथ्सं॑समी।  
 स॒प्तप॑दा श॒क्र॒री। शा॒क्र॒रो वज्रः॑। अ॒ग्नि॒होत्र॑ ए॒व तथ्सा॑यं प्रा॑त॒र्वज्रं॑ यज॑मानो  
 भ्रातृ॒व्याय॑ प्र ह॑रति। भव॑त्यात्म॒ना। परा॑ऽस्य॒ भ्रातृ॑व्यो भवति॥ ४४॥ ब॒र्हिः प्रा॑तर॒हुता॑द्याय जायते  
 रुन्धेऽस्मा॑ क॒रोत्ये॒ता वा अ॑ग्निहोत्रस्यो॒पसदो॑ वष॒ट्कार॑श्च प्रा॒तर्या॑वाणो वज्र॒स्त्रीणि॑ च॥ [५]

प्र॒जाप॑तिरकामयताऽऽत्म॒न्वन्मे॑ जाये॒तेति॑। सोऽजु॑होत्। तस्या॑ऽऽत्म॒न्वद॑जायत।  
 अ॒ग्निर्वा॒युरा॑दित्यः। ते॑ऽब्रुवन्। प्र॒जाप॑तिरहौषीदात्म॒न्वन्मे॑ जाये॒तेति॑। तस्य॑  
 वयम॑जनिष्महि। जाय॑तान्न आत्म॒न्वदिति॑ ते॑ऽजु॒हवुः। प्रा॒णाना॑म॒ग्निः। त॒नुवै॑  
 वा॒युः॥ ४५॥

चक्षु॑ष आ॒दित्यः॑। तेषा॑ꣳ हु॒ताद॑जायत॒ गौरे॒व। तस्यै॑ पय॑सि॒ व्याय॑च्छन्त। मम॑  
 हु॒ताद॑जनि॒ ममेति॑। ते प्र॒जाप॑तिं प्र॒श्नमा॑यन्। स आ॑दित्यो॑ऽग्निम॑ब्रवीत्। य॒त॒रो नौ॑  
 जया॑त्। तन्नौ॑ स॒हास॑दिति॑। कस्यै॑ कोऽहौ॑षी॒दिति॑ प्र॒जाप॑तिरब्रवी॒त्कस्यै॑ क॒ इति॑।

प्राणानामहमित्यग्निः॥४६॥

तनुवा अहमिति वायुः। चक्षुषोऽहमित्यादित्यः। य एव प्राणानामहौषीत्। तस्य हुतादजनीति। अग्नेरहुतादजनीति। तदग्निहोत्रस्याग्निहोत्रत्वम्। गौर्वा अग्निहोत्रम्। य एवं वेद गौरग्निहोत्रमिति। प्राणापानाभ्यामेवाग्निः समर्धयति। अव्यर्धुकः प्राणापानाभ्यां भवति॥४७॥

य एवं वेद। तौ वायुरब्रवीत्। अनु मा भजतमिति। यदेव गार्हपत्ये-  
ऽधिश्रित्याहवनीयमभ्युद्ववान्। तेन त्वां प्रीणानित्यब्रूताम्। तस्माद्यद्गार्हपत्ये-  
ऽधिश्रित्याहवनीयमभ्युद्ववति। वायुमेव तेन प्रीणाति। प्रजापतिर्देवताः सृजमानः।  
अग्निमेव देवतानां प्रथममसृजत। सोऽन्यदालम्भ्यमवित्वा॥४८॥

प्रजापतिमभि पर्यावर्तत। स मृत्योरबिभेत्। सोऽमुमादित्यमात्मनो निरमिमीत।  
तं हुत्वा पराङ्मर्यावर्तत। ततो वै स मृत्युमपाजयत्। अपं मृत्युं जयति। य एवं  
वेद। तस्माद्यस्यैवं विदुषः। उतैकाहमुत द्वहं न जुहति। हुतमेवास्य भवति। असौ



ह्यादित्योऽग्निहोत्रम्॥४९॥ तनुर्वै वायुरग्निर्भवत्यवित्वा भवत्येकं च॥ [६]

रौद्रं गविं। वायव्यमुपसृष्टम्। आश्विनं दुह्यमानम्। सौम्यं दुग्धम्। वारुणमधि-  
श्रितम्। वैश्वदेवा भिन्दवः। पौष्णमुदन्तम्। सारस्वतं विष्यन्दमानम्। मैत्रं शरः।  
धातुरुद्धासितम्। बृहस्पतेरुन्नीतम्। सवितुः प्रक्रान्तम्। द्यावापृथिव्यः ह्रियमाणम्।  
ऐन्द्राग्रमुपसन्नम्। अग्नेः पूर्वाऽऽहुतिः। प्रजापतेरुत्तरा। ऐन्द्रं हुतम्॥५०॥ उद्धासितं सुप्तं च॥ [७]

दक्षिणत उप सृजति। पितृलोकमेव तेन जयति। प्राचीमा वर्तयति। देवलोकमेव  
तेन जयति। उदीचीमावृत्य दोग्धि। मनुष्यलोकमेव तेन जयति। पूर्वीं दुह्याज्येष्ठस्य  
ज्यैष्ठिनेयस्य। यो वा गतश्रीः स्यात्। अपरौ दुह्यात्कनिष्ठस्य कानिष्ठिनेयस्य। यो  
वा बुभूषेत्॥५१॥

न सं मृशति। पापवस्यसस्य व्यावृत्त्यै। वायव्यं वा एतदुपसृष्टम्।  
आश्विनं दुह्यमानम्। मैत्रं दुग्धम्। अर्यम्णा उद्धास्यमानम्। त्वाष्ट्रमुन्नीयमानम्।  
बृहस्पतेरुन्नीतम्। सवितुः प्रक्रान्तम्। द्यावापृथिव्यः ह्रियमाणम्॥५२॥

ऐन्द्राग्रमुप सादितम्। सर्वाभ्यो वा एष देवताभ्यो जुहोति। योऽग्निहोत्रं जुहोति।  
 यथा खलु वै धेनुं तीर्थे तर्पयति। एवमग्निहोत्री यजमानं तर्पयति। तृप्यति  
 प्रजयां पशुभिः। प्र सुवर्गं लोकं जानाति। पश्यति पुत्रम्। पश्यति पौत्रम्।  
 प्र प्रजयां पशुभिर्मिथुनैर्जायते। यस्यैवं विदुषोऽग्निहोत्रं जुह्वति। य उ चैनदेवं  
 वेद॥ ५३ ॥ बुभूषेद्वियमाणञ्जायते द्वे च॥ [८]

त्रयो वै प्रैयमेधा आसन्। तेषां त्रिरेकोऽग्निहोत्रमजुहोत्। द्विरेकः। सकृदेकः।  
 तेषां यस्त्रिरजुहोत्। स ऋचाऽजुहोत्। यो द्विः। स यजुषा। यः सकृत्। स  
 तूष्णीम्॥ ५४ ॥

यश्च यजुषाऽजुहोद्यश्च तूष्णीम्। तावुभावाधृताम्। तस्माद्यजुषाऽऽहुतिः पूर्वा  
 होतव्या। तूष्णीमुत्तरा। उभे एवर्धी अव रुन्धे। अग्निर्ज्योतिर्ज्योतिरग्निः स्वाहेति  
 सायं जुहोति। रेत एव तद्वधाति। सूर्यो ज्योतिर्ज्योतिः सूर्यः स्वाहेति प्रातः। रेत  
 एव हितं प्र जनयति। रेतो वा एतस्य हितं न प्र जायते॥ ५५ ॥

यस्याग्निहोत्रमहुतं॑ सूर्योऽभ्युदेति॑। यद्यन्ते॒ स्यात्। उ॒न्नीय॑ प्राडु॒दाद्र॑वेत्। स  
 उप॒साद्या॑तमितोरासीत्। स य॒दा ताम्ये॑त्। अथ॒ भूः स्वाहे॑ति जुहुयात्। प्र॒जाप॑तिर्वै  
 भूतः। तमे॒वोपा॑सरत्। स ए॒वैनं॑ तत् उन्नयति। नार्ति॒माच्छ॑ति यज॑मानः॥५६॥<sup>तृष्णी</sup>  
 जायते॑ यज॑मानः॥ [९]

यद॒ग्निमु॒द्धर॑ति। वस॑व॒स्तर्ह्य॑ग्निः। तस्मिन्॒ यस्य॑ तथा॑विधे जुह॑ति।  
 वसु॑ष्वे॒वास्या॑ग्निहोत्रं॑ हुतं भवति। निहि॑तो धूपा॒यञ्छे॑ते। रु॒द्रास्तर्ह्य॑ग्निः। तस्मिन्॒  
 यस्य॑ तथा॑विधे जुह॑ति। रु॒द्रेष्वे॒वास्या॑ग्निहोत्रं॑ हुतं भवति। प्र॒थम॑मि॒ध्मम॑र्चिरा  
 ल॑भते। आ॒दि॒त्यास्तर्ह्य॑ग्निः॥५७॥

तस्मिन्॒ यस्य॑ तथा॑विधे जुह॑ति। आ॒दि॒त्येष्वे॒वास्या॑ग्निहोत्रं॑ हुतं भवति। सर्व॑  
 ए॒व सर्व॑श इ॒ध्म आदी॑तो भवति। विश्वे॑ दे॒वास्तर्ह्य॑ग्निः। तस्मिन्॒ यस्य॑ तथा॑विधे  
 जुह॑ति। विश्वे॑ष्वे॒वास्य॑ दे॒वेष्व॑ग्निहोत्रं॑ हुतं भवति। नि॒तरा॑म॒र्चिरु॑पावैति लोहि॒नीके॑व  
 भवति। इन्द्र॑स्तर्ह्य॑ग्निः। तस्मिन्॒ यस्य॑ तथा॑विधे जुह॑ति। इन्द्र॑ ए॒वास्या॑ग्निहोत्रं॑

हुतं भवति॥५८॥

अङ्गारा भवन्ति। तेभ्योऽङ्गारेभ्योऽर्चिरुदेति। प्रजापतिस्तर्ह्यग्निः। तस्मिन् यस्य तथाविधे जुह्वति। प्रजापतावेवास्याग्निहोत्रं हुतं भवति। शरोऽङ्गारा अर्ध्यहन्ते। ब्रह्म तर्ह्यग्निः। तस्मिन् यस्य तथाविधे जुह्वति। ब्रह्मन्नेवास्याग्निहोत्रं हुतं भवति। वसुषु रुद्रेष्वादित्येषु विश्वेषु देवेषु। इन्द्रं प्रजापतौ ब्रह्मन्। अपरिवर्गमेवास्यैतासु देवतासु हुतं भवति। यस्यैवं विदुषोऽग्निहोत्रं जुह्वति। य उ चैनदेवं वेद॥५९॥

आदित्यास्तर्ह्यग्निर्द्रं एवास्याग्निहोत्रं हुतं भवति देवेषु चत्वारि च (यदग्निर्हितः प्रथमं सर्वं एव नितरामङ्गाराः शरोऽङ्गारा ब्रह्म वसुष्वष्टौ)॥

[१०]

ऋतं त्वा सत्येन परिषिञ्चामीति सायं परिषिञ्चति। सत्यं त्वर्तेन परिषिञ्चामीति प्रातः। अग्निर्वा ऋतम्। असावादित्यः सत्यम्। अग्निमेव तदादित्येन सायं परिषिञ्चति। अग्निनाऽऽदित्यं प्रातः सः। यावदहोरात्रे भवतः। तावदस्य लोकस्य। नार्तिर्न रिष्टिः। नान्तो न पर्यन्तोऽस्ति। यस्यैवं विदुषोऽग्निहोत्रं जुह्वति। य उ चैनदेवं वेद॥६०॥ अस्ति द्वे च॥

[११]

अङ्गिरसः प्रजापतिरग्निं रुद्र उत्तरावन्तीं ब्रह्मवादिनींऽग्निहोत्रप्रायणा यज्ञाः प्रजापतिरकामयताऽऽत्मन्वद्रौद्रङ्गविं दक्षिणतस्त्रयो वै यदग्निमुतं त्वां सत्येनैकादश॥११॥  
 अङ्गिरसः प्रैव तेनं पशूनेव यन्निमार्ष्टि यो वा अग्निहोत्रस्योपसदो दक्षिणतः पृष्टिः॥६०॥  
 अङ्गिरसो य उचैनदेवं वेदं॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके प्रथमः प्रपाठकः समाप्तः॥

॥द्वितीयः प्रश्नः॥

॥तैत्तिरीयब्राह्मणे द्वितीयाष्टके द्वितीयः प्रपाठकः॥

प्रजापतिरकामयत प्रजाः सृजेयेति। स एतं दशहोतारमपश्यत्। तं मनसा-  
ऽनुद्रुत्य दर्भस्तम्बेऽजुहोत्। ततो वै स प्रजा असृजत। ता अस्मात्सृष्टा  
अपाक्रामन्। ता ग्रहेणागृह्णात्। तद्ग्रहस्य ग्रहत्वम्। यः कामयेत् प्रजायेयेति। स  
दशहोतारं मनसाऽनुद्रुत्य दर्भस्तम्बे जुहुयात्। प्रजापतिर्वै दशहोता॥१॥

प्रजापतिरेव भूत्वा प्रजायते। मनसा जुहोति। मन इव हि प्रजापतिः।  
प्रजापतेरास्यै। पूर्णया जुहोति। पूर्ण इव हि प्रजापतिः। प्रजापतेरास्यै। न्यूनया  
जुहोति। न्यूनाद्धि प्रजापतिः प्रजा असृजत। प्रजानां सृष्ट्यै॥२॥

दर्भस्तम्बे जुहोति। एतस्माद्वै योनेः प्रजापतिः प्रजा असृजत। यस्मादेव योनेः  
प्रजापतिः प्रजा असृजत। तस्मादेव योनेः प्रजायते। ब्राह्मणो दक्षिणत उपास्ते।  
ब्राह्मणो वै प्रजानामुपद्रष्टा। उपद्रष्टुमत्येव प्रजायते। ग्रहो भवति। प्रजानां सृष्टानां  
धृत्यै। यं ब्राह्मणं विद्यां विद्वांसं यशो नर्च्छेत्॥३॥

सोऽरण्यं पुरेत्य। दर्भस्तम्बमुद्धृत्य। ब्राह्मणं दक्षिणतो निषाद्य। चतुर्होतृन्व्याचक्षीत।  
एतद्वै देवानां परमं गुह्यं ब्रह्म। यच्चतुर्होतारः। तदेव प्रकाशं गमयति। तदेनं  
प्रकाशं गतम्। प्रकाशं प्रजानां गमयति। दर्भस्तम्बमुद्धृत्य व्याचष्टे॥४॥

अग्निवान् वै दर्भस्तम्बः। अग्नित्येव व्याचष्टे। ब्राह्मणो दक्षिणत उपास्ते।  
ब्राह्मणो वै प्रजानामुपद्रष्टा। उपद्रष्टुमत्येवैनं यशं ऋच्छति। ईश्वरन्तं  
यशोर्तोरित्याहुः। यस्यान्ते व्याचष्ट इति। वरस्तस्मै देयः। यदेवैनं तत्रोपनमति।  
तदेवाव रुन्धे॥५॥

अग्निमादधानो दशहोत्राऽरणिमव दध्यात्। प्रजातमेवैनमा धत्ते। तेनैवोद्धृत्याग्निहोत्रं  
जुहुयात्। प्रजातमेवैनञ्जुहोति। हविर्निर्वप्स्यं दशहोतारं व्याचक्षीत। प्रजातमेवैनं  
निर्वपति। सामिधेनीरनुवक्ष्यं दशहोतारं व्याचक्षीत। सामिधेनीरेव सृष्ट्वाऽऽरभ्य  
प्रतनुते। अथो यज्ञो वै दशहोता। यज्ञमेव तनुते॥६॥

अभिचरं दशहोतारं जुहुयात्। नव वै पुरुषे प्राणाः। नाभिर्दशमी।

सप्राणमेवैनमभि चरति। एतावद्वै पुरुषस्य स्वम्। यावत्प्राणाः। यावदेवास्यास्ति।  
तदभि चरति। स्वकृत इरिणे जुहोति प्रदरे वा। एतद्वा अस्यै निर्ऋतिगृहीतम्।  
निर्ऋतिगृहीत एवैनं निर्ऋत्या ग्राहयति। यद्वाचः क्रूरम्। तेन वर्षद्वरोति। वाच  
एवैनं क्रूरेण प्र वृश्चति। ताजगार्तिमाच्छति॥७॥ दशहोता सृष्ट्यां ऋच्छेद्याचष्टे रुन्ध एव तनुते निर्ऋतिगृहीतं पञ्च  
च॥

[१]

प्रजापतिरकामयत दर्शपूर्णमासौ सृजेयेति। स एतं चतुर्होतारमपश्यत्।  
तं मनसाऽनुद्रुत्याऽऽहवनीयेऽजुहोत्। ततो वै स दर्शपूर्णमासाव-  
सृजत। तावस्मात्सृष्टावपाक्रामताम्। तौ ग्रहेणागृह्णात्। तद्ग्रहस्य ग्रहत्वम्।  
दर्शपूर्णमासावालभमानः। चतुर्होतारं मनसाऽनुद्रुत्याहवनीये जुहुयात्।  
दर्शपूर्णमासावेव सृष्ट्वाऽऽरभ्य प्रतनुते॥८॥

ग्रहो भवति। दर्शपूर्णमासयोः सृष्टयोर्धृत्यै। सोऽकामयत चातुर्मास्यानि  
सृजेयेति। स एतं पञ्चहोतारमपश्यत्। तं मनसाऽनुद्रुत्याऽऽहवनीयेऽजुहोत्। ततो  
वै स चातुर्मास्यान्यसृजत। तान्यस्मात्सृष्टान्यपाक्रामन्। तानि ग्रहेणागृह्णात्।



तद्ग्रहस्य ग्रहत्वम्। चातुर्मास्यान्यालभमानः॥९॥

पञ्चहोतारं मनसाऽनुद्रुत्याऽऽहवनीये जुहुयात्। चातुर्मास्यान्येव सृष्ट्वाऽऽरभ्य प्रतनुते। ग्रहो भवति। चातुर्मास्यानां सृष्टानां धृत्यै। सौऽकामयत पशुबन्धं सृजेयेति। स एतं षड्होतारमपश्यत्। तं मनसाऽनुद्रुत्याऽऽहवनीयेऽजुहोत्। ततो वै स पशुबन्धमसृजत। सौस्मात्सृष्टोऽपाक्रामत्। तं ग्रहेणागृह्णात्॥१०॥

तद्ग्रहस्य ग्रहत्वम्। पशुबन्धेन यक्ष्यमाणः। षड्होतारं मनसाऽनुद्रुत्याऽऽहवनीये जुहुयात्। पशुबन्धमेव सृष्ट्वाऽऽरभ्य प्र तनुते। ग्रहो भवति। पशुबन्धस्य सृष्टस्य धृत्यै। सौऽकामयत सौम्यमध्वरं सृजेयेति। स एतं सप्तहोतारमपश्यत्। तं मनसाऽनुद्रुत्याऽऽहवनीयेऽजुहोत्। ततो वै स सौम्यमध्वरमसृजत॥११॥

सौस्मात्सृष्टोऽपाक्रामत्। तं ग्रहेणागृह्णात्। तद्ग्रहस्य ग्रहत्वम्। दीक्षिष्यमाणः। सप्तहोतारं मनसाऽनुद्रुत्याऽऽहवनीये जुहुयात्। सौम्यमेवाध्वरं सृष्ट्वाऽऽरभ्य प्र तनुते। ग्रहो भवति। सौम्यस्याध्वरस्य सृष्टस्य धृत्यै। देवेभ्यो वै यज्ञो न प्राभवत्।

तमेतावच्छः समंभरन्॥१२॥

यथ्संम्भाराः। ततो वै तेभ्यो यज्ञः प्राभवत्। यथ्संम्भारा भवन्ति। यज्ञस्य प्रभूत्यै।  
आतिथ्यमासाद्य व्याचष्टे। यज्ञमुखं वा आतिथ्यम्। मुखत एव यज्ञः सम्भृत्य  
प्र तनुते। अयंज्ञो वा एषः। योऽपत्नीकः। न प्रजाः प्रजायेरन्। पत्नीर्व्याचष्टे।  
यज्ञमेवाकः। प्रजानां प्रजननाय। उपसत्सु व्याचष्टे। एतद्वै पत्नीनामायतनम्। स्व  
एवैना आयतनेऽवकल्पयति॥१३॥ तनुत आलभमानोऽगृह्णादसृजताभरञ्जायेरन्त्यद्व॥ [२]

प्रजापतिरकामयत् प्रजायेयेति। स तपोऽतप्यत। स त्रिवृतः स्तोममसृजत।  
तं पञ्चदशः स्तोमो मध्यत उदतृणत्। तौ पूर्वपक्षश्चापरपक्षश्चाभवताम्। पूर्वपक्षं देवा  
अन्वसृज्यन्त। अपरपक्षमन्वसुराः। ततो देवा अभवन्। पराऽसुराः। यं कामयेत्  
वसीयान्त्स्यादिति॥१४॥

तं पूर्वपक्षे याजयेत्। वसीयानेव भवति। यं कामयेत् पापीयान्त्स्यादिति।  
तमपरपक्षे याजयेत्। पापीयानेव भवति। तस्मात्पूर्वपक्षोऽपरपक्षात्करुण्यतरः।  
प्रजापतिर्वै दशहोता। चतुर्होता पञ्चहोता। षड्होता सप्तहोता। ऋतवः

संवत्सरः॥१५॥

प्रजाः पशव इमे लोकाः। य एवं प्रजापतिं बहोर्भूयांसं वेद। बहोरेव भूयान्भवति। प्रजापतिर्देवासुरानंसृजत। स इन्द्रमपि नांसृजत। तं देवा अब्रुवन्। इन्द्रं नो जनयेति। सोऽब्रवीत्। यथाऽहं युष्मास्तपसाऽसृक्षि। एवमिन्द्रं जनयध्वमिति॥१६॥

ते तपोऽतप्यन्त। त आत्मन्निन्द्रमपश्यन्। तमब्रुवन्। जायस्वेति। सोऽब्रवीत्। किं भागधेयमभि जनिष्य इति। ऋतून्त्संवत्सरम्। प्रजाः पशून्। इमाँल्लोकानित्यब्रुवन्। तं वै माऽऽहुत्या प्र जनयतेत्यब्रवीत्॥१७॥

तं चतुर्होत्रा प्राजनयन्। यः कामयेत वीरो म आज्ञायेतेति। स चतुर्होतारं जुहुयात्। प्रजापतिर्वै चतुर्होता। प्रजापतिरेव भूत्वा प्रजायते। जजनदिन्द्रमिन्द्रियाय स्वाहेति ग्रहेण जुहोति। आऽस्य वीरो जायते। वीरं हि देवा एतयाऽऽहुत्या प्राजनयन्। आदित्याश्चाङ्गिरसश्च सुवर्गे लोकेऽस्पर्धन्त। वयं

पूर्वे सुवर्गं लोकमियाम वयं पूर्वं इति॥१८॥

त आदित्या एतं पञ्चहोतारमपश्यन्। तं पुरा प्रातरनुवाकादाग्नीध्रेऽजुहवुः। ततो वै ते पूर्वे सुवर्गं लोकमायन्। यः सुवर्गकामः स्यात्। स पञ्चहोतारं पुरा प्रातरनुवाकादाग्नीध्रे जुहुयात्। संवत्सरो वै पञ्चहोता। संवत्सरः सुवर्गो लोकः। संवत्सर एवर्तुषु प्रतिष्ठाय। सुवर्गं लोकमेति। तेऽब्रुवन्नङ्गिरस आदित्यान्॥१९॥

क्व स्थ। क्व वः सद्भ्यो हव्यं वक्ष्याम इति। छन्दः स्वित्यंब्रुवन्। गायत्रियां त्रिष्टुभिर्जगत्यामिति। तस्माच्छन्दः सु सद्भ्य आदित्येभ्यः। आङ्गिरसीः प्रजा हव्यं वहन्ति। वहन्त्यस्मै प्रजा बलिम्। ऐनमप्रतिख्यातं गच्छति। य एवं वेद। द्वादश मासाः पञ्चर्तवः। त्रयं इमे लोकाः। असावादित्य एकविंशः। एतस्मिन्वा एष श्रितः। एतस्मिन्प्रतिष्ठितः। य एवमेतं श्रितं प्रतिष्ठितं वेद। प्रत्येव तिष्ठति॥२०॥

जनयध्वमितीत्यंब्रवीत्पूर्वं इत्यादित्यानुतवः षट्॥

[३]

प्रजापतिरकामयत् प्रजायेयेति। स एतं दशहोतारमपश्यत्। तेन दशधाऽऽत्मानं

विधायां दशहोत्राऽतप्यत। तस्य चित्तिः सुगासीत्। चित्तमाज्यम्। तस्यैतावत्येव वागासीत्। एतावान् यज्ञक्रतुः। स चतुर्होतारमसृजत। सोऽनन्दत्॥२१॥

असृक्षि वा इममिति। तस्य सोमो हविरासीत्। स चतुर्होत्राऽतप्यत। सोऽताम्यत्। स भूरिति व्याहरत्। स भूमिमसृजत। अग्निहोत्रं दर्शपूर्णमासौ यजूंषि। स द्वितीयमतप्यत। सोऽताम्यत्। स भुव इति व्याहरत्॥२२॥

सोऽन्तरिक्षमसृजत। चातुर्मास्यानि सामानि। स तृतीयमतप्यत। सोऽताम्यत्। स सुवरिति व्याहरत्। स दिवमसृजत। अग्निष्टोममुक्थ्यमतिरात्रमृचः। एता वै व्याहृतय इमे लोकाः। इमान्खलु वै लोकाननु प्रजाः पशवश्छन्दांसि प्राजायन्त। य एवमेताः प्रजापतेः प्रथमा व्याहृतीः प्रजाता वेद॥२३॥

प्र प्रजयां पशुभिर्मिथुनैर्जायते। स पञ्चहोतारमसृजत। स हविर्नाविन्दत। तस्मै सोमस्तनुवं प्रायच्छत्। एतत्तै हविरिति। स पञ्चहोत्राऽतप्यत। सोऽताम्यत्। स प्रत्यङ्मुखाऽतप्यत। सोऽसुरानसृजत। तदस्याप्रियमासीत्॥२४॥

तद्दुर्वर्णः५ हिरण्यमभवत्। तद्दुर्वर्णस्य हिरण्यस्य जन्म। स द्वितीयमतप्यत।  
सोऽताम्यत्। स प्राङ्बाधत। स देवानसृजत। तदस्य प्रियमासीत्। तत्सुवर्णः५  
हिरण्यमभवत्। तत्सुवर्णस्य हिरण्यस्य जन्म। य एव५ सुवर्णस्य हिरण्यस्य जन्म  
वेद॥२५॥

सुवर्ण आत्मना भवति। दुर्वर्णोऽस्य भ्रातृव्यः। तस्मात्सुवर्णः५ हिरण्यं भार्यम्।  
सुवर्ण एव भवति। ऐनं प्रियं गच्छति नाप्रियम्। स सप्तहोतारमसृजत। स सप्तहोत्रैव  
सुवर्णं लोकमैत्। त्रिणवेन स्तोमैर्नैभ्यो लोकेभ्योऽसुरान्प्राणुदत। त्रयस्त्रिंशेन  
प्रत्यतिष्ठत्। एकविंशेन रुचंमधत्॥२६॥

सप्तदशेन प्राजायत। य एवं विद्वान्सोमैर्न यजते। सप्तहोत्रैव सुवर्णं लोकमैति।  
त्रिणवेन स्तोमैर्नैभ्यो लोकेभ्यो भ्रातृव्यान्प्राणुदते। त्रयस्त्रिंशेन प्रति तिष्ठति।  
एकविंशेन रुचं धत्ते। सप्तदशेन प्र जायते। तस्मात्सप्तदशः स्तोमो न निरुह्यः।  
प्रजापतिर्वै सप्तदशः। प्रजापतिमेव मध्यतो धत्ते प्रजात्यै॥२७॥ अनन्दद्व इति व्याहृद्देवासीद्वेदाधत्

प्रजांत्ये॥

[४]

दे॒वा वै वरु॑णमयाजयन्। स यस्यै॑यस्यै दे॒वता॑यै दक्षि॑णामनयत्। ताम॑व्हीनात्।  
तै॑ऽब्रुवन्। व्या॒वृत्य॑ प्रति॑गृह्णाम। तथा॑ नो दक्षि॑णा न व्ले॑ष्यतीति। ते व्या॒वृत्य॑  
प्रत्य॑गृह्णन्। ततो॑ वै तान्दक्षि॑णा नाव्ही॑नात्। य ए॒वं वि॒द्वान्व्या॒वृत्य॑ दक्षि॑णां  
प्रति॑गृह्णाति। नैनं॑ दक्षि॑णा व्हीनाति॥२८॥

राजा॑ त्वा वरु॑णो नयतु दे॒वि दक्षि॑णेऽग्नये॑ हिर॑ण्यमित्या॑ह। आ॒ग्नेयं॑ वै  
हिर॑ण्यम्। स्वयै॑वैन॑दे॒वत॑या॒ प्रति॑गृह्णाति। सोमा॑य॒ वास॑ इत्या॑ह। सौ॒म्यं वै वासः॑।  
स्वयै॑वैन॑दे॒वत॑या॒ प्रति॑गृह्णाति। रु॒द्राय॑ गा॒मित्या॑ह। रौ॒द्री वै गौः॑। स्वयै॑वैना॑ दे॒वत॑या॒  
प्रति॑गृह्णाति। वरु॑णा॒याश्च॑मित्या॑ह॥२९॥

वा॒रु॒णो वा अश्वः॑। स्वयै॑वैनं॑ दे॒वत॑या॒ प्रति॑गृह्णाति। प्र॒जाप॑तये॒ पुरु॑ष॒मित्या॑ह।  
प्र॒जा॒प॒त्यो वै पुरु॑षः। स्वयै॑वैनं॑ दे॒वत॑या॒ प्रति॑ गृह्णाति। मन॑वे तल्प॒मित्या॑ह। मा॒न॒वो  
वै तल्पः॑। स्वयै॑वैनं॑ दे॒वत॑या॒ प्रति॑ गृह्णाति। उ॒त्ता॒नाया॑ङ्गीर॒सायान॑ इत्या॑ह। इ॒यं वा  
उ॒त्ता॒न आ॑ङ्गीर॒सः॥३०॥

अ॒न॒यै॒वैन॒त्प्रति॑ गृ॒ह्णाति॑। वै॒श्वान॒र्यर्चा॑ रथं॒ प्रति॑ गृ॒ह्णाति॑। वै॒श्वान॒रो वै दे॒वत॑या॒ रथः॑।  
स्व॒यै॒वैनं॑ दे॒वत॑या॒ प्रति॑ गृ॒ह्णाति॑। तेना॑मृ॒त॒त्वम॑श्या॒मित्या॑ह। अ॒मृत॑मे॒वाऽऽत्म॑न्ध॒त्ते।  
वयो॑ दा॒त्र इत्या॑ह। वयं॑ ए॒वैनं॑ कृ॒त्वा। सु॒व॒र्गं लो॒कं ग॑मयति। मयो॒ मह्य॑मस्तु  
प्रति॑ग्रही॒त्र इत्या॑ह॥ ३१॥

यद्वै शि॒वम्। तन्म॑यः। आ॒त्मन॑ ए॒वैषा॑ परी॒तिः। क इ॒दं कस्मा॑ अदा॒दित्या॑ह।  
प्र॒जाप॑तिर्वै कः। स प्र॒जाप॑तये ददाति। कामः॒ कामा॑येत्या॒ह। कामे॑न॒ हि ददा॑ति।  
कामे॑न॒ प्रति॑गृ॒ह्णाति॑। कामो॑ दा॒ता कामः॑ प्रति॑ग्रही॒तेत्या॑ह॥ ३२॥

कामो॑ हि दा॒ता। कामः॑ प्रति॑ग्रही॒ता। कामः॑ स॒मुद्र॑मावि॒शेत्या॑ह। स॒मुद्र इ॒व हि  
कामः॑। ने॒व हि काम॑स्यान्तोऽस्ति। न स॒मुद्र॑स्य। कामे॑न॒ त्वा प्रति॑गृ॒ह्णामी॒त्या॑ह। येन॑  
कामे॑न॒ प्रति॑गृ॒ह्णाति॑। स ए॒वैन॑म॒मुष्मि॑ल्लो॒के काम॑ आ॒गच्छ॑ति। कामै॒तत्त ए॒षा ते॑ काम॑  
दक्षि॑णेत्या॒ह। काम॑ ए॒व तद्य॑ज॒मानो॑ऽमुष्मि॑ल्लो॒के दक्षि॑णामिच्छति। न प्र॑तिग्रही॒तरि॑।  
य ए॒वं वि॒द्वान्दक्षि॑णां प्रति॑गृ॒ह्णाति॑। अ॒नृ॒णामे॒वैनां॑ प्रति॑ गृ॒ह्णाति॑॥ ३३॥



इत्याह प्रतिग्रहीतेत्याह दक्षिणेत्याह चत्वारि च॥ \_\_\_\_\_[५]

अन्तो वा एष यज्ञस्य। यदशममहः। दशमेऽहन्त्सर्पराज्ञिया ऋग्भिः स्तुवन्ति।  
यज्ञस्यैवान्तं गत्वा। अन्नाद्यमव रुन्धते। तिसृभिः स्तुवन्ति। त्रयं इमे लोकाः।  
एभ्य एव लोकेभ्योऽन्नाद्यमव रुन्धते। पृश्निर्वतीर्भवन्ति। अन्नं वै पृश्नि॥३४॥

अन्नमेवाव रुन्धते। मनसा प्रस्तौति। मनसोद्गायति। मनसा प्रति हरति। मन  
इव हि प्रजापतिः। प्रजापतेरास्यै। देवा वै सर्पाः। तेषामियं राज्ञी। यत्सर्पराज्ञिया  
ऋग्भिः स्तुवन्ति। अस्यामेव प्रति तिष्ठन्ति॥३५॥

चतुर्होतृन् होता व्याचष्टे। स्तुतमनुशंसति शान्त्यै। अन्तो वा एष यज्ञस्य।  
यदशममहः। एतत्खलु वै देवानां परमं गुह्यं ब्रह्म। यच्चतुर्होतारः। दशमेऽहंश्चतुर्-  
होतृन्व्याचष्टे। यज्ञस्यैवान्तं गत्वा। परमं देवानां गुह्यं ब्रह्माव रुन्धे। तदेव प्रकाशं  
गमयति॥३६॥

तदेनं प्रकाशं गतम्। प्रकाशं प्रजानां गमयति। वाचं यच्छति। यज्ञस्य

धृत्यै॑। य॒ज॒मा॒न॒दे॒व॒त्यं॑ वा अहः॑। भ्रा॒तृ॒व्य॒दे॒व॒त्यां॑ रात्रिः॑। अ॒ह्ना रात्रिं॑ ध्यायेत्।  
 भ्रा॒तृ॒व्य॒स्यै॒व त॒ल्लो॒कं वृ॑ङ्क्ते। यद्वि॒वा वाचं॑ वि॒सृ॒जेत्। अ॒हर्भ्रा॒तृ॒व्या॒योच्छि॑ःषेत्।  
 यन्न॑क्तं वि॒सृ॒जेत्। रात्रिं॑ भ्रा॒तृ॒व्या॒योच्छि॑ःषेत्। अ॒धिवृ॑क्ष॒सूर्ये॑ वाचं॑ वि॒सृ॒जति॑।  
 ए॒ताव॑न्तमे॒वास्मै॑ लो॒कमुच्छि॑ःषति। याव॑दादि॒त्योऽस्त॑मेति॥ ३७ ॥ पृ॒श्निं ति॒ष्ठन्ति ग॑मयति शि॒ःषेत्प॑ञ्च

च॥

[६]

प्र॒जाप॑तिः प्र॒जा अ॑सृजत। ताः सृ॒ष्टाः स॒मंश्लि॑ष्यन्। ता रू॒पेणा॑नु॒प्रावि॑शत्।  
 तस्मा॑दाहुः। रू॒पं वै प्र॒जाप॑तिरिति॑। ता नाम्ना॑ऽनु प्रावि॑शत्। तस्मा॑दाहुः। ना॒म॒ वै  
 प्र॒जाप॑तिरिति॑। तस्मा॑द॒प्यामि॑त्रौ सृ॒ङ्गत्य॑। ना॒म॒ना चे॒दध्व॑येते॥ ३८ ॥

मि॒त्रमे॒व भ॑वतः। प्र॒जाप॑तिर्दे॒वासु॑रान॑सृजत। स इन्द्र॑मपि॑ नासृ॑जत। तं  
 दे॒वा अ॑ब्रुवन्। इन्द्रं॑ नो ज॒नये॑ति। स आ॒त्मन्निन्द्र॑मपश्यत्। तम॑सृजत।  
 तं त्रि॒ष्टुग्वी॑र्यं भू॒त्वाऽनु॑ प्रावि॑शत्। तस्य॑ वज्रः॑ पञ्चद॒शो ह॑स्त॒ आप॑द्यत।  
 तेनो॑द॒य्यासु॑रान॒भ्यभ॑वत्॥ ३९ ॥

य एवं वेद। अ॒भि भ्रातृ॑व्यान्भवति। ते दे॒वा असुरैर्विजित्य॑। सु॒वर्गं लो॒कमा॑यन्।  
तै॑ऽमुष्मिँ॑ल्लो॒के व्य॑क्षुध्यन्। तै॑ऽब्रुवन्। अ॒मुतः प्र॑दानं वा उप॑जिजीविमेति॑। ते  
स॒प्तहो॑तारं य॒ज्ञं वि॒धाया॒यास्य॑म्। आ॒ङ्गीर॒सं प्राहि॑ण्वन्। ए॒तेना॒मुत्र॑ कल्प॒येति॑॥४०॥

तस्य॒ वा इ॒यं क्लृ॑तिः। यदि॒दं किं च॑। य एवं वेद। कल्प॑तेऽस्मै। स वा अ॒यं  
म॑नुष्येषु य॒ज्ञः स॒प्तहो॑ता। अ॒मुत्र॑ स॒द्भ्यो दे॒वेभ्यो॑ ह॒व्यं व॑हति। य एवं वेद। उपै॑नं  
य॒ज्ञो न॑मति। सोऽम॑न्यत। अ॒भि वा इ॒मेऽस्मा॑ल्लो॒काद॑मुं लो॒कं क॑मिष्यन्त॒ इति॑।  
स वाच॑स्पते॒ हृदि॑ति॒ व्याह॑रत्। तस्मा॑त्पु॒त्रो हृद॑यम्। तस्मा॑द॒स्माल्लो॒काद॑मुं लो॒कं  
नाभि॑ का॒मय॑न्ते। पु॒त्रो हि हृद॑यम्॥४१॥ हृयंते अभवत्कल्पयेतीति चत्वारि च॥ [७]

दे॒वा वै चतु॑र्होतृभि॒र्यज्ञ॑म॒तन्व॑त। ते वि पा॒प्मना॒ भ्रातृ॑व्ये॒णाज॑यन्त। अ॒भि सु॒वर्गं  
लो॒कम॑जयन्। य एवं वि॒द्वाऽश्च॑तु॒र्होतृ॑भि॒र्यज्ञं॑ त॒नुते॑। वि पा॒प्मना॒ भ्रातृ॑व्ये॒ण ज॑यते।  
अ॒भि सु॒वर्गं लो॒कं ज॑यति। षड्द्वो॑त्रा प्राय॑णीय॒मा सा॑दयति। अ॒मुष्मै॒ वै लो॒काय॑  
षड्द्वो॑ता। घ्नन्ति॒ खलु॒ वा ए॒तत्सो॑मम्। यदे॒भिषु॑ण्वन्ति॑॥४२॥

ऋजुधैवैनममुं लोकं गमयति। चतुर्होत्राऽऽतिथ्यम्। यशो वै चतुर्होता। यशं  
 एवाऽऽत्मन्धत्ते। पञ्चहोत्रा पशुमुपसादयति। सुवर्ग्यो वै पञ्चहोता। यजमानः पशुः।  
 यजमानमेव सुवर्गं लोकं गमयति। ग्रहान्गृहीत्वा सप्तहोतारं जुहोति। इन्द्रियं वै  
 सप्तहोता॥ ४३॥

इन्द्रियमेवाऽऽत्मन्धत्ते। यो वै चतुर्होतृननुसवनं तर्पयति। तृप्यति प्रजयां  
 पशुभिः। उपैनं सोमपीथो नमति। बहिष्पवमाने दशहोतारं व्याचक्षीत। माध्यं  
 दिने पवमाने चतुर्होतारम्। आर्भवे पवमाने पञ्चहोतारम्। पितृयज्ञे षड्होतारम्।  
 यज्ञायज्ञियस्य स्तोत्रे सप्तहोतारम्। अनुसवनमेवैनां स्तर्पयति॥ ४४॥

तृप्यति प्रजयां पशुभिः। उपैनं सोमपीथो नमति। देवा वै चतुर्होतृभिः  
 सत्रमांसत। ऋद्धिपरिमितं यशंस्कामाः। तैऽब्रुवन्। यन्नः प्रथमं यशं ऋच्छात्।  
 सर्वेषान्नस्तथ्सहासदिति। सोमश्चतुर्होत्रा। अग्निः पञ्चहोत्रा। धाता षड्होत्रा॥ ४५॥

इन्द्रः सप्तहोत्रा। प्रजापतिर्दशहोत्रा। तेषां सोमः राजानं यशं आर्च्छत्।

तन्त्र्यकामयत्। तेनापाक्रामत्। तेन प्रलायमचरत्। तं देवाः प्रैषैः प्रैषमैच्छन्।  
तत्प्रैषाणां प्रैषत्वम्। निविद्भिर्न्यवेदयन्। तन्निविदां निवित्त्वम्॥४६॥

आप्रीभिरापुवन्। तदाप्रीणांमाप्रित्वम्। तमघ्नन्। तस्य यशो व्यगृह्णत। ते ग्रहा  
अभवन्। तद्ग्रहाणां ग्रहत्वम्। यस्यैवं विदुषो ग्रहा गृह्यन्ते। तस्य त्वैव गृहीताः।  
तैऽब्रुवन्। यो वै नः श्रेष्ठोऽभूत्॥४७॥

तमवधिष्म। पुनरिमं सुवामहा इति। तं छन्दोभिरसुवन्त। तच्छन्दसां  
छन्दस्त्वम्। साम्ना समानयन्। तत्साम्नः सामत्वम्। उक्थैरुदस्थापयन्।  
तदुक्थानामुक्थत्वम्। य एवं वेद। प्रत्येव तिष्ठति॥४८॥

सर्वमायुरेति। सोमो वै यशः। य एवं विद्वान्त्सोममागच्छति। यश एवैनमृच्छति।  
तस्मादाहुः। यश्चैवं वेद यश्च न। तावुभौ सोममार्गच्छतः। सोमो हि यशः। तं  
त्वाऽव यश ऋच्छतीत्याहुः। यः सोमे सोमं प्राहेति। तस्मात्सोमे सोमः प्रोच्यः।  
यश एवैनमृच्छति॥४९॥ अभिपुण्वन्ति सुसहोता तर्पयति षड्भाना निवित्त्वमभूत्तिष्ठति प्राहेति द्वे च॥ [८]

इदं वा अग्रे नैव किं च नाऽऽसीत्। न द्यौरासीत्। न पृथिवी। नान्तरिक्षम्। तदसदेव सन्मनोऽकुरुत् स्यामिति। तदतप्यत। तस्मात्तेपा॒नाद्धूमोऽजायत। तद्धूयो-  
ऽतप्यत। तस्मात्तेपा॒नादग्निरजायत। तद्धूयोऽतप्यत॥५०॥

तस्मात्तेपा॒नाज्योतिरजायत। तद्धूयोऽतप्यत। तस्मात्तेपा॒नादर्चिरजायत। तद्धूयो-  
ऽतप्यत। तस्मात्तेपा॒नान्मरीचयोऽजायन्त। तद्धूयोऽतप्यत। तस्मात्तेपा॒नादुदारा  
अजायन्त। तद्धूयोऽतप्यत। तद्भ्रमिव॒ समहन्यत। तद्वस्तिम॑भिनत्॥५१॥

स संमुद्रोऽभवत्। तस्मात्समुद्रस्य॒ न पिबन्ति। प्र॒जननमिव॒ हि मन्यन्ते।  
तस्मात्प॒शोर्जायमाना॒दापः॒ पुरस्ता॑द्यन्ति। तद्दश॑होताऽन्व॑सृज्यत। प्र॒जाप॑तिर्वै  
दश॑होता। य ए॒वं तप॑सो वी॒र्यं वि॒द्वाऽस्तप्य॑ते। भव॑त्ये॒व। तद्वा इ॒दमापः॑  
सलि॒लमा॑सीत्। सोऽरोदी॑त्प्र॒जाप॑तिः॥५२॥

स कस्मा॑ अ॒ज्ञि। यद्य॒स्या अ॒प्रति॑ष्ठाया॒ इति॑। यद॒फ॒स्व॒वाप॑द्यत। सा  
पृथि॒व्य॒भवत्। यद्य॒मृष्ट॑। तद॒न्तरि॑क्षमभवत्। यद॒ध्व॒मुद॑मृष्ट॑। सा द्यौर॑भवत्।

यदरोदीत्। तदनयो रोदस्त्वम्॥५३॥

य एवं वेद। नास्य गृहे रुदन्ति। एतद्वा एषां लोकानां जन्म। य एवमेषां लोकानां जन्म वेद। नैषु लोकेष्वार्तिमाच्छति। स इमां प्रतिष्ठामविन्दत। स इमां प्रतिष्ठां वित्वाऽकामयत् प्रजायेयेति। स तपोऽतप्यत। सोऽन्तर्वानभवत्। स जघनादसुरानसृजत॥५४॥

तेभ्यो मृन्मये पात्रेऽन्नमदुहत्। याऽस्य सा तनूरासीत्। तामपाहत। सा तमिस्राऽभवत्। सोऽकामयत् प्रजायेयेति। स तपोऽतप्यत। सोऽन्तर्वानभवत्। स प्रजननादेव प्रजा असृजत। तस्मादिमा भूयिष्ठाः। प्रजननाद्धेना असृजत॥५५॥

ताभ्यो दारुमये पात्रे पयोऽदुहत्। याऽस्य सा तनूरासीत्। तामपाहत। सा जोत्स्नाऽभवत्। सोऽकामयत् प्रजायेयेति। स तपोऽतप्यत। सोऽन्तर्वानभवत्। स उपपक्षाभ्यामेवर्तूनसृजत। तेभ्यो रज्जते पात्रे घृतमदुहत्। याऽस्य सा तनूरासीत्॥५६॥

तामपां॑हत। सौ॑ऽहोरा॒त्रयोः॑ स॒न्धिर्भवत्। सौ॑ऽकामयत् प्रजा॑येयेति। स तपो॑-  
ऽतप्यत। सौ॑ऽन्तर्वा॒नभवत्। स मुखा॑द्वेवान॑सृजत। तेभ्यो॑ हरि॑ते पात्रे सोम॑मदुहत्।  
याऽस्य॑ सा त॒नूरासी॑त्। तामपां॑हत। तदह॑रभवत्॥५७॥

ए॒ते वै प्र॒जाप॑ते॒र्दोहाः॑। य ए॒वं वेद॑। दु॒ह ए॒व प्र॒जाः। दि॒वा वै नो॑ऽभू॒दिति॑।  
तद्वे॒वानां॑ दे॒वत्व॑म्। य ए॒वं दे॒वानां॑ दे॒वत्वं वेद॑। दे॒ववा॑ने॒व भ॑वति। ए॒तद्वा अ॑होरा॒त्राणां॑  
जन्म॑। य ए॒वम॑होरा॒त्राणां॑ जन्म॑ वेद॑। नाहो॑रा॒त्रेष्वार्ति॑माच्छति॥५८॥

अस॒तोऽधि॑ मनो॑ऽसृज्यत। मनः॑ प्र॒जाप॑तिमसृजत। प्र॒जाप॑तिः प्र॒जा अ॑सृजत।  
तद्वा इ॒दं मन॑स्ये॒व प॑र॒मं प्रति॑ष्ठितम्। यद्वि॒दं किं च॑। तदे॒तच्छो॑वस्य॑सन्नाम॑ ब्रह्म॑।  
व्युच्छ॑न्ती॒व्युच्छ॑न्त्यस्मै॒ वस्य॑सी॒वस्य॑सी॒ व्युच्छ॑ति। प्रजा॑यते प्र॒जया॑ प॒शुभिः॑। प्र  
प॑रमे॒ष्ठिनो॑ मा॒त्रा॒माप्रो॑ति। य ए॒वं वेद॑॥५९॥ अ॒ग्निर्जा॑यत् तद्व्यो॑ऽतप्यता॒भिनद॑रोदी॒त्य॒जाप॑तीरोद॒स्त्वम॑सृ॒जता॑सृजत घृतम॑दु॒हया॑ऽस्य  
सा त॒नूरासी॑दह॑रभवदृच्छति वेदं (इदं धूमो॑ऽग्निर्ज्योति॑र॒चिर्म॑रीचय उ॒दा॒रास्तद॑ब्धं स ज॒घना॑त्सा तमि॑न्सा स प्र॒जन॑ना॒त्सा जो॑त्सा स उ॒पप॑क्षाभ्यां सौ॑ऽहोरा॒त्रयोः  
सन्धिः स मु॒खात्तदह॑र्दे॒वान्मृ॑न्म॒र्ये दारु॑म॒र्ये रज॑ते हरि॑ते तेभ्य॑स्ताभ्यो द्वे तेऽन्नं पयो॑ घृतं सोमम्॥) [९]

प्र॒जाप॑तिरिन्द्रम॑सृजतानुजा॒वरं॑ दे॒वाना॑म्। तं प्राहि॑णोत्। प॒र॑हि। ए॒तेषां॑



देवाना॑मधि॑पति॒रे॒धीति॑ । तं दे॒वा अ॑ब्रुवन् । कस्त्वमसि॑ । व॒यं वै त्वच्छ्रेया॑ः सः  
स्म इति॑ । सोऽब्र॑वीत् । कस्त्वमसि॑ व॒यं वै त्वच्छ्रेया॑ः सः स्म इति॑ मा दे॒वा  
अ॒वोच॑न्निति॑ । अथ॒ वा इ॒दं तर्हि॑ प्र॒जाप॑तौ ह॒र आ॑सीत् ॥६०॥

यद॒स्मिन्ना॑दित्ये । तदे॒नम॑ब्रवीत् । ए॒तन्मे॑ प्रयच्छ । अथा॒हमे॒तेषां॑ दे॒वाना॑मधि॑पति॒र्भवि॑ष  
कोऽह॑ः स्या॒मित्य॑ब्रवीत् । ए॒तत्प्र॒दायेति॑ । ए॒तत्स्या॑ इत्य॑ब्रवीत् । यदे॒तद्वी॒षीति॑ ।  
को ह॒ वै नाम॑ प्र॒जाप॑तिः । य ए॒वं वेद॑ ॥६१॥

वि॒दुरे॑न॒ नाम्ना॑ । तद॑स्मै रु॒क्मं कृ॒त्वा प्र॒त्यमु॑ञ्चत् । ततो॒ वा इन्द्रो॑  
दे॒वाना॑मधि॑पति॒रभव॑त् । य ए॒वं वेद॑ । अधि॑पति॒रेव॑ स॒माना॑ भवति । सोऽम॑न्यत ।  
किं किं॑ वा अ॒कर॑मिति॑ । स च॒न्द्रं म॒ आह॑रेति॑ प्राल॑पत् । तच्च॒न्द्रम॑सश्चन्द्रम॒स्त्वम् ।  
य ए॒वं वेद॑ ॥६२॥

च॒न्द्रवा॑ने॒व भ॑वति । तं दे॒वा अ॑ब्रुवन् । सु॒वीर्यो॑ मर्या॒ यथा॑ गोपा॒यत॑ इति॑ ।  
तत्सूर्य॑स्य सूर्य॒त्वम् । य ए॒वं वेद॑ । नैनं॑ द॒भोति॑ । कश्च॒ नास्मि॒न्वा इ॒दमिन्द्रि॑यं

प्रत्य॑स्था॒दिति॑। तदिन्द्र॑स्येन्द्र॒त्वम्। य ए॒वं वेद॑। इन्द्रि॒याव्ये॑व भ॒वति॥६३॥

अ॒यं वा इ॒दं प॑र॒मोऽभू॑दिति॑। तत्प॑रमे॒ष्ठिनः॑ परमे॒ष्ठित्वम्। य ए॒वं वेद॑। प॒र॒मा॒मे॒व  
का॒ष्ठां गच्छ॑ति। तं दे॒वाः सं॒मु॒न्तं पर्य॑विशन्। वस॑वः पुर॒स्तात्। रु॒द्रा दक्षि॑ण॒तः।  
आ॒दि॒त्याः प॒श्चात्। वि॒श्वे दे॒वा उ॑त्तर॒तः। अङ्गि॑रसः प्र॒त्यश्च॑म्॥६४॥

सा॒ध्याः परा॑श्चम्। य ए॒वं वेद॑। उपै॑न॒ः स॒मा॒नाः संवि॑शन्ति। स प्र॒जाप॑तिरे॒व  
भू॒त्वा प्र॒जा आ॒व॑यत्। ता अ॑स्मै नाति॑ष्ठन्ता॒न्नाद्या॑य। ता मुखं॑ पुर॒स्तात्पश्य॑न्तीः।  
दक्षि॑ण॒तः पर्या॑यन्। स दक्षि॑ण॒तः पर्य॑वर्तयत। ता मुखं॑ पुर॒स्तात्पश्य॑न्तीः। मुखं॑  
दक्षि॑ण॒तः॥६५॥

प॒श्चात्प॑र्या॒यन्। स प॒श्चात्प॑र्यवर्तयत। ता मुखं॑ पुर॒स्तात्पश्य॑न्तीः। मुखं॑ दक्षि॑ण॒तः।  
मुखं॑ प॒श्चात्। उ॒त्तर॒तः पर्या॑यन्। स उ॑त्तर॒तः पर्य॑वर्तयत। ता मुखं॑ पुर॒स्तात्पश्य॑न्तीः।  
मुखं॑ दक्षि॑ण॒तः। मुखं॑ प॒श्चात्॥६६॥

मुखमुत्तरतः। ऊर्ध्वा उदायन्। स उपरिष्ठान्यवर्तयत। ताः सर्वतोमुखो भूत्वा-  
ऽऽवयत्। ततो वै तस्मै प्रजा अतिष्ठन्तान्नाद्याय। य एवं विद्वान्परि च वर्तयन्ते नि  
च। प्रजापतिरेव भूत्वा प्रजा अंति। तिष्ठन्तेऽस्मै प्रजा अन्नाद्याय। अन्नाद एव  
भवति॥६७॥ आसीद्वेदं चन्द्रमस्त्वं य एवं वेदोन्द्रियाव्येव भवति प्रत्यञ्चं मुखं दक्षिणतो मुखं पश्चान्नवं च॥—————[१०]

प्रजापतिरकामयत बहोर्भूयान्थस्यामिति। स एतं दशहोतारमपश्यत्। तं  
प्रायुङ्क्त। तस्य प्रयुक्ति बहोर्भूयानभवत्। यः कामयेत बहोर्भूयान्थस्यामिति। स  
दशहोतारं प्रयुञ्जीत। बहोरेव भूयान्भवति। सोऽकामयत वीरो म् आजायेतेति।  
स दशहोतुश्चतुर्होतारं निरमिमीत। तं प्रायुङ्क्त॥६८॥

तस्य प्रयुक्तीन्द्रोऽजायत। यः कामयेत वीरो म् आजायेतेति। स चतुर्होतारं  
प्रयुञ्जीत। आऽस्य वीरो जायते। सोऽकामयत पशुमान्थस्यामिति। स चतुर्होतुः  
पञ्चहोतारं निरमिमीत। तं प्रायुङ्क्त। तस्य प्रयुक्ति पशुमानभवत्। यः कामयेत  
पशुमान्थस्यामिति। स पञ्चहोतारं प्रयुञ्जीत॥६९॥

प॒शु॒मा॒ने॒व भ॑वति। सोऽका॒म॒य॒त॒र्त॒वो मे॑ क॒ल्पे॒र॒न्नि॒ति। स प॒ञ्च॒हो॒तुः ष॒ड्हो॒ता॒रं  
नि॒र॒मि॒मी॒त। तं प्रा॒यु॒ङ्क्त्वा तस्य॑ प्र॒यु॒क्त॒वृ॒त॒वोऽस्मा॑ अ॒क॒ल्प॒न्त। यः का॒म॒ये॒त॒र्त॒वो मे॑  
क॒ल्पे॒र॒न्नि॒ति। स ष॒ड्हो॒ता॒रं प्र॒यु॒ञ्जी॒त। क॒ल्प॒न्ते॒ऽस्मा॑ ऋ॒त॒वः। सोऽका॒म॒य॒त सो॒म॒पः  
सो॒म॒या॒जी स्या॑म्। आ मे॑ सो॒म॒पः सो॒म॒या॒जी जा॑ये॒तेति॑॥७०॥

स ष॒ड्हो॒तुः स॒प्त॒हो॒ता॒रं नि॒र॒मि॒मी॒त। तं प्रा॒यु॒ङ्क्त्वा तस्य॑ प्र॒यु॒क्ति॒ सो॒म॒पः  
सो॒म॒या॒ज्य॑भवत्। आऽस्य॑ सो॒म॒पः सो॒म॒या॒ज्य॑जा॒य॒त। यः का॒म॒ये॒त॒ सो॒म॒पः  
सो॒म॒या॒जी स्या॑म्। आ मे॑ सो॒म॒पः सो॒म॒या॒जी जा॑ये॒तेति॑। स स॒प्त॒हो॒ता॒रं प्र॒यु॒ञ्जी॒त।  
सो॒म॒प ए॒व सो॒म॒या॒जी भ॑वति। आऽस्य॑ सो॒म॒पः सो॒म॒या॒जी जा॑य॒ते। स वा ए॒ष  
प॒शुः प॑ञ्च॒धा प्र॒ति ति॑ष्ठति॥७१॥

प॒द्भिर्मु॒खेन॑। ते दे॒वाः प॒शून् वि॒त्वा। सु॒व॒र्गं लो॒क॒मा॑यन्। तेऽमु॒ष्मिँल्लो॒के  
व्य॑क्षु॒ध्यन्। तेऽब्रु॒वन्। अ॒मृतः॑ प्र॒दानं॑ वा उ॒प॒जि॒जी॒वि॒मेति॑। ते स॒प्त॒हो॒ता॒रं य॒ज्ञं  
वि॒धा॒या॒या॒स्य॑म्। आ॒ङ्गी॒र॒सं प्रा॑हि॒ण्वन्। ए॒तेना॒मु॒त्र क॒ल्प॑येति। तस्य॑ वा इ॒यं  
क्व॑प्तिः॥७२॥

यदिदं किं च। य एवं वेद। कल्पतेऽस्मै। स वा अयं मनुष्येषु यज्ञः  
 सप्तहोता। अमुत्र सद्ध्यो देवेभ्यो हव्यं वहति। य एवं वेद। उपैनं यज्ञो  
 नमति। यो वै चतुर्होतृणां निदानं वेद। निदानवान्भवति। अग्निहोत्रं वै  
 दशहोतुर्निदानम्। द्रश्शपूर्णमासौ चतुर्होतुः। चातुर्मास्यानि पञ्चहोतुः। पशुबन्धः  
 षड्होतुः। सौम्योऽध्वरः सप्तहोतुः। एतद्वै चतुर्होतृणां निदानम्। य एवं वेद।  
 निदानवान्भवति॥ ७३॥ अमिमीत तं प्रायुङ्क्त पञ्चहोतारं प्र युञ्जीत जायेतेति तिष्ठति कृत्तिर्दशहोतुर्निदानं सप्त च॥—[११]

प्रजापतिरकामयत प्रजाः संजुयेति प्रजापतिरकामयत द्रश्शपूर्णमासौ संजुयेति प्रजापतिरकामयत प्रजायुयेति स तपः स त्रिवृतं प्रजापतिरकामयत दशहोतारं  
 तेन दशधाऽऽत्मानं देवा वै वरुणमन्तो वै प्रजापतिस्ताः सृष्टाः समंश्लिष्यं देवा वै चतुर्होतृभिर्दिं वा अग्रे प्रजापतिरिन्द्रं प्रजापतिरकामयत ब्रह्मर्भूयानेकां दश॥ ११॥  
 प्रजापतिस्तद्ब्रह्मस्य प्रजापतिरकामयतान्येवैनत्तस्य वा इयं कृत्तिस्तस्मात्तेपानाञ्चोतिर्यदस्मिन्नादित्ये स षड्होतुः सप्तहोतारं त्रिसप्ततिः॥ ७३॥  
 प्रजापतिरकामयत निदानवान्भवति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके द्वितीयः प्रपाठकः समाप्तः॥

॥ तृतीयः प्रश्नः ॥

॥ तैत्तिरीयब्राह्मणे द्वितीयाष्टके तृतीयः प्रपाठकः ॥

ब्रह्मवादिनो वदन्ति। किं चतुर्होतृणां चतुर्होतृत्वमिति। यदेवेषु चतुर्धा होतारः। तेन चतुर्होतारः। तस्माच्चतुर्होतार उच्यन्ते। तच्चतुर्होतृणां चतुर्होतृत्वम्। सोमो वै चतुर्होता। अग्निः पञ्चहोता। धाता षड्होता। इन्द्रः सप्तहोता॥१॥

प्रजापतिर्दशहोता। य एवं चतुर्होतृणामृद्धिं वेद। ऋध्नोत्येव। य एषामेवं बन्धुतां वेद। बन्धुमान्भवति। य एषामेवं क्लृप्तिं वेद। कल्पन्तेऽस्मै। य एषामेवमायतनं वेद। आयतनवान्भवति। य एषामेवं प्रतिष्ठां वेद॥२॥

प्रत्येव तिष्ठति। ब्रह्मवादिनो वदन्ति। दशहोता चतुर्होता। पञ्चहोता षड्होता सप्तहोता। अथ कस्माच्चतुर्होतार उच्यन्त इति। इन्द्रो वै चतुर्होता। इन्द्रः खलु वै श्रेष्ठो देवतानामुपदेशनात्। य एवमिन्द्रः श्रेष्ठ देवतानामुपदेशनाद्वेद। वसिष्ठः समानानां भवति। तस्माच्छ्रेष्ठमायन्तं प्रथमेनैवानु बुध्यन्ते। अयमागन्।

अयमवासादिति। कीर्तिरस्य पूर्वाऽऽगच्छति जनतामायतः। अथो एनं प्रथमेनैवानु  
बुध्यन्ते। अयमागन्। अयमवासादिति॥३॥ सप्तहोता प्रतिष्ठां वेदं बुध्यन्ते षट्॥ [१]

दक्षिणां प्रतिग्रहीष्यन्त्सप्तदशकृत्वोऽपान्यात्। आत्मानमेव समिन्धे।  
तेजसे वीर्याय। अथो प्रजापतिरेवैनां भूत्वा प्रतिगृह्णाति। आत्मनो-  
ऽनार्त्यै। यद्येनमार्त्विज्यादृतं सन्तं निरुहरेरन्। आग्नीध्रे जुहुयाद्वशहोतारम्।  
चतुर्गृहीतेनाऽऽज्येन। पुरस्तात्प्रत्यङ्गिष्ठन्। प्रतिलोमं विग्राहम्॥४॥

प्राणानेवास्योपं दासयति। यद्येनं पुनरुप शिष्येयुः। आग्नीध्र एव  
जुहुयाद्वशहोतारम्। चतुर्गृहीतेनाऽऽज्येन। पश्चात्प्राडासीनः। अनुलोममविग्राहम्।  
प्राणानेवास्मै कल्पयति। प्रायश्चित्ती वाग्धोतेत्यृतुमुखऋतुमुखे जुहोति।  
ऋतूनेवास्मै कल्पयति। कल्पन्तेऽस्मा ऋतवः॥५॥

कृता अस्मा ऋतव आयन्ति। षड्होता वै भूत्वा प्रजापतिरिदं सर्वमसृजत। स  
मनोऽसृजत। मनसोऽधि गायत्रीमसृजत। तद्गायत्रीं यश आर्च्छत्। तामाऽलभत।

गा॒य॒त्रि॒या अ॒धि छ॒न्दाऽ॑स्यसृजत। छ॒न्दो॒भ्योऽधि॒ सामं॑। तथ्साम॒ यशं॑ आर्च्छत्।  
तदाऽल॑भत॥६॥

साम्नोऽधि॒ यजू॑ऽष्यसृजत। यजु॒भ्योऽधि॒ विष्णु॑म्। तद्विष्णुं॑ यशं॑ आर्च्छत्।  
तमाऽल॑भत। विष्णो॒रध्योष॑धीरसृजत। ओष॑धी॒भ्योऽधि॒ सोम॑म्। तथ्सोमं॑ यशं॑  
आर्च्छत्। तमाऽल॑भत। सोमा॒दधि॑ प॒शून्सृजत॑। प॒शु॒भ्योऽधीन्द्र॑म्॥७॥

तदिन्द्रं॑ यशं॑ आर्च्छत्। तदे॒न॒न्नाति॑ प्राच्य॑वत। इन्द्रं॑ इव यश॒स्वी भ॑वति।  
य ए॒वं वेद॑। नैनं॑ यशोऽति॑ प्रच्य॑वते। यद्वा इ॒दं किं॑ च॑। तथ्सर्व॑मुत्ता॒न  
ए॒वाऽऽङ्गी॑र॒सः प्रत्य॑गृह्णात्। तदे॒नं प्रति॑गृहीतं॒ नाहि॑नत्। यत्किं॑ च॑ प्रतिगृह्णीयात्।  
तथ्सर्व॑मुत्ता॒नस्त्वा॑ऽऽङ्गी॑र॒सः प्रति॑गृह्णा॒त्वित्ये॒व प्रति॑गृह्णीयात्। इ॒यं वा उ॑त्ता॒न  
आ॑ङ्गी॒र॒सः। अ॒नये॑वैन॒त्प्रति॑गृह्णाति। नैनं॑ हि॒नस्ति॑। ब॒र्हिषा॑ प्रती॒याद्वा॑ वाऽश्वं॑  
वा। ए॒तद्वै प॑शूनां प्रि॒यं धाम॑। प्रि॒येणै॒वैनं॑ धाम्ना॒ प्रत्ये॑ति॥८॥ वि॒ग्राह॑मृत॒वस्तदाऽल॑भतेन्द्रं॑ गृह्णीयाथ्यद्॥ [२]

यो वा अवि॑द्वान्निव॒र्तय॑ते। विशी॑र्षा सपा॑प्माऽमुष्मि॑लोके भ॑वति। अथ॒ यो



विद्वान्निर्वर्तयते। सशीर्षा विपाप्माऽमुष्मिल्लोके भवति। देवता वै सप्त पुष्टिकामा  
न्यवर्तयन्त। अग्निश्च पृथिवी च। वायुश्चान्तरिक्षं च। आदित्यश्च द्यौश्च चन्द्रमाः।  
अग्निर्न्यवर्तयत। स साहस्रमपुष्यत्॥१॥

पृथिवी न्यवर्तयत। सौषधीभिर्वनस्पतिभिरपुष्यत्। वायुर्न्यवर्तयत। स  
मरीचीभिरपुष्यत्। अन्तरिक्षं न्यवर्तयत। तद्वयोभिरपुष्यत्। आदित्यो न्यवर्तयत।  
स रश्मिभिरपुष्यत्। द्यौर्न्यवर्तयत। सा नक्षत्रैरपुष्यत्। चन्द्रमा न्यवर्तयत।  
सोऽहोरात्रैरर्धमासैर्मासैर्ऋतुभिः संवत्सरेणापुष्यत्। तान्पोषान्पुष्यति। याऽस्ते-  
ऽपुष्यन्। य एवं विद्वान्नि च वर्तयते परि च॥१०॥ अपुष्यन्नक्षत्रैरपुष्यत्यर्थं च॥ [३]

तस्य वा अग्नेरहिरण्यं प्रतिजग्रहुषः। अर्धमिन्द्रियस्यापक्रामत्। तदेतेनैव  
प्रत्यंगृह्णात्। तेन वै सोऽर्धमिन्द्रियस्याऽऽत्मन्नुपाधत्त। अर्धमिन्द्रियस्या-  
ऽऽत्मन्नुपाधत्ते। य एवं विद्वान् हिरण्यं प्रतिगृह्णाति। अथ योऽविद्वान्प्रतिगृह्णाति।  
अर्धमस्येन्द्रियस्यापक्रामति। तस्य वै सोमस्य वासः प्रतिजग्रहुषः। तृतीयमिन्द्रिय-

स्यापाक्रामत्॥११॥

तदेतेनैव प्रत्यगृह्णात्। तेन वै स तृतीयमिन्द्रियस्याऽऽत्मन्नुपाधत्त। तृतीयमिन्द्रियस्याऽऽत्मन्नुपाधत्ते। य एवं विद्वान् वासः प्रतिगृह्णाति। अथ योऽविद्वान्प्रतिगृह्णाति। तृतीयमस्येन्द्रियस्यापक्रामति। तस्य वै रुद्रस्य गां प्रतिजग्रहुषः। चतुर्थमिन्द्रियस्यापाक्रामत्। तामेतेनैव प्रत्यगृह्णात्। तेन वै स चतुर्थमिन्द्रियस्याऽऽत्मन्नुपाधत्त॥१२॥

चतुर्थमिन्द्रियस्याऽऽत्मन्नुपाधत्ते। य एवं विद्वान्गां प्रतिगृह्णाति। अथ योऽविद्वान्प्रतिगृह्णाति। चतुर्थमस्येन्द्रियस्यापक्रामति। तस्य वै वरुणस्याश्वं प्रतिजग्रहुषः। पञ्चममिन्द्रियस्यापाक्रामत्। तमेतेनैव प्रत्यगृह्णात्। तेन वै स पञ्चममिन्द्रियस्याऽऽत्मन्नुपाधत्त। पञ्चममिन्द्रियस्याऽऽत्मन्नुपाधत्ते। य एवं विद्वानश्वं प्रतिगृह्णाति॥१३॥

अथ योऽविद्वान्प्रतिगृह्णाति। पञ्चममस्येन्द्रियस्यापक्रामति। तस्य वै प्रजापतेः

पुरुषं प्रतिजग्रहुषः। षष्ठमिन्द्रियस्यापाक्रामत्। तमेतेनैव प्रत्यगृह्णात्। तेन वै स षष्ठमिन्द्रियस्याऽऽत्मन्नुपाधत्त। षष्ठमिन्द्रियस्याऽऽत्मन्नुपाधत्ते। य एवं विद्वान्पुरुषं प्रतिगृह्णाति। अथ योऽविद्वान्प्रतिगृह्णाति। षष्ठमस्येन्द्रियस्यापक्रामति॥१४॥

तस्य वै मनोस्तल्पं प्रतिजग्रहुषः। सप्तममिन्द्रियस्यापाक्रामत्। तमेतेनैव प्रत्यगृह्णात्। तेन वै स सप्तममिन्द्रियस्याऽऽत्मन्नुपाधत्त। सप्तममिन्द्रियस्याऽऽत्मन्नुपाधत्ते। य एवं विद्वांस्तल्पं प्रतिगृह्णाति। अथ योऽविद्वान्प्रतिगृह्णाति। सप्तममस्येन्द्रियस्यापक्रामति। तस्य वा उत्तानस्याऽऽङ्गीरसस्याप्राणत्प्रतिजग्रहुषः। अष्टममिन्द्रियस्यापाक्रामत्॥१५॥

तदेतेनैव प्रत्यगृह्णात्। तेन वै सोऽष्टममिन्द्रियस्याऽऽत्मन्नुपाधत्त। अष्टममिन्द्रियस्याऽऽत्मन्नुपाधत्ते। य एवं विद्वानप्राणत्प्रतिगृह्णाति। अथ योऽविद्वान्प्रतिगृह्णाति। अष्टममस्येन्द्रियस्यापक्रामति। यद्वा इदं किं च। तत्सर्वमुत्तान एवाऽऽङ्गीरसः प्रत्यगृह्णात्। तदेनं प्रतिगृहीतं नाहिनत्। यत्किं च प्रतिगृहीयात्।

तत्सर्वमुत्तानस्त्वाऽऽङ्गीरसः प्रतिगृह्णात्वित्येव प्रतिगृह्णीयात्। इयं वा उत्तान  
 आङ्गीरसः। अनयैवैनत्प्रतिगृह्णाति। नैनं हिनस्ति॥१६॥ तृतीयमिन्द्रियस्यापांक्रामच्चतुर्थमिन्द्रियस्यात्मब्रुपाधुताश्च  
 प्रतिगृह्णाति पृष्ठमस्येन्द्रियस्यापक्रामत्यष्टममिन्द्रियस्यापांक्रामत्यतिगृह्णीयाच्चत्वारि च (तस्य वा अग्नेर्हरिण्यं सोमस्य वासुस्तदेतेन रुद्रस्य गान्तामेतेन वरुणस्याश्च  
 प्रजापतेः पुरुषं मनोस्तल्पन्तमेतेनोत्तानस्य तदेतेनाप्राणद्यद्वे। अर्धं तृतीयमष्टमं तच्चतुर्थं तां पञ्चमं पृष्ठं संस्रमन्तम्। तदेतेन द्वे तामेतेनैकं तमेतेन त्रीणि  
 तदेतेनैकम्)॥

[४]

ब्रह्मवादिनो वदन्ति। यद्वशं होतारः सत्रमासंत। केन ते गृहपतिनाऽऽर्ध्वन्। केन  
 प्रजा असृजन्तेति। प्रजापतिना वै ते गृहपतिनाऽऽर्ध्वन्। तेन प्रजा असृजन्त।  
 यच्चतुर्होतारः सत्रमासंत। केन ते गृहपतिनाऽऽर्ध्वन्। केनौषधीरसृजन्तेति।  
 सोमेन वै ते गृहपतिनाऽऽर्ध्वन्॥१७॥

तेनौषधीरसृजन्त। यत्पञ्चहोतारः सत्रमासंत। केन ते गृहपतिनाऽऽर्ध्वन्।  
 केनैभ्यो लोकेभ्योऽसुरान्प्राणुदन्त। केनैषां पशूनवृञ्जतेति। अग्निना वै ते गृहपतिना-  
 ऽऽर्ध्वन्। तेनैभ्यो लोकेभ्योऽसुरान्प्राणुदन्त। तेनैषां पशूनवृञ्जत। यथ्यङ्गोतारः  
 सत्रमासंत। केन ते गृहपतिनाऽऽर्ध्वन्॥१८॥

केनतूनकल्पयन्तेति। धात्रा वै ते गृहपतिनाऽऽर्ध्वन्। तेनतूनकल्पयन्त।

यथ्सप्तहोतारः सत्रमासंत। केन ते गृहपतिनाऽऽर्ध्वन्। केन सुवरायन्।  
 केनेमाँल्लोकान्थ्समतन्वन्निति। अर्यम्णा वै ते गृहपतिनाऽऽर्ध्वन्। तेन सुवरायन्।  
 तेनेमाँल्लोकान्थ्समतन्वन्निति॥१९॥

एते वै देवा गृहपतयः। तान् य एवं विद्वान्। अप्यन्यस्य गार्हपते दीक्षते।  
 अवान्तरमेव सत्रिणामृध्नोति। यो वा अर्यमणं वेद। दानकामा अस्मै प्रजा भवन्ति।  
 यज्ञो वा अर्यमा। आर्यावसतिरिति वै तमाहुर्न्य प्रशंसन्ति। आर्यावसतिर्भवति।  
 य एवं वेद॥२०॥

यद्वा इदं किं च। तत्सर्वं चतुर्होतारः। चतुर्होतृभ्योऽधि यज्ञो निर्मितः। स य  
 एवं विद्वान् विवदेत। अहमेव भूयो वेद। यश्चतुर्होतृन् वेदेति। स ह्येव भूयो वेद।  
 यश्चतुर्होतृन् वेद। यो वै चतुर्होतृणां होतृन् वेद। सर्वासु प्रजास्वन्नमत्ति॥२१॥

सर्वा दिशोऽभि जयति। प्रजापतिर्वै दशहोतृणां होता। सोमश्चतुर्होतृणां  
 होता। अग्निः पञ्चहोतृणां होता। धाता षड्होतृणां होता। अर्यमा सप्तहोतृणां

होता॑। ए॒ते वै च॒तुर्हो॑तृणा॒ः होता॑रः। तान् य ए॒वं वेद॑। सर्वा॑सु प्र॒जास्व॑न्नम॒त्ति।  
सर्वा॑ दि॒शोऽभि॑ ज॒यति॥ २२ ॥ आध्रुवन्नाध्रुवन्नित्येवं वेदोति सर्वा दिशोऽभि जयति (वै तेन सत्रङ्केन॥) [५]

प्र॒जाप॑तिः प्र॒जाः सृ॒ष्ट्वा व्य॑स्र॒सत॑। स हृद॑यं भू॒तोऽश॑यत्। आ॒त्मन् हा (३)  
इत्य॑ह्वयत्। आ॒पः प्र॑त्य॒शृण्वन्। ता अ॑ग्नि॒होत्रे॑णै॒व य॑ज्ञ॒क्रतु॑नोप॒ पर्या॑वर्तन्त। ताः  
कु॒सिन्धु॑मु॒पौहन्। तस्मा॑दग्नि॒होत्र॑स्य॒ यज्ञ॑क्र॒तोः। ए॒कं ऋ॒त्विक्। च॒तुष्कृ॑त्वोऽह्वयत्।  
अ॒ग्निर्वा॒युरा॑दि॒त्यश्च॒न्द्रमा॑ः॥ २३ ॥

ते प्र॑त्य॒शृण्वन्। ते द॑र्शपूर्णमा॒साभ्या॑मे॒व य॑ज्ञ॒क्रतु॑नोप॒ पर्या॑वर्तन्त। त  
उ॒पौह॑ः॒श्चत्वार्य॑ङ्गा॒नि। तस्मा॑द॒र्शपूर्ण॑मा॒सयो॑र्य॒ज्ञक्र॑तोः। च॒त्वार॑ ऋ॒त्विजः॑।  
प॒ञ्चकृ॑त्वोऽह्वयत्। प॒शवः॑ प्र॑त्य॒शृण्वन्। ते चा॑तुर्मा॒स्यैरे॒व य॑ज्ञ॒क्रतु॑नोप॒ पर्या॑वर्तन्त।  
त उ॒पौहं॑ लोमं॒ छुर्वीं मा॒ऽसम॑स्थिं म॒ज्जान॑म्। तस्मा॑च्चातुर्मा॒स्याना॑ य॒ज्ञक्र॑तोः॥ २४ ॥

प॒ञ्च॒त्विजः॑। ष॒ट्कृ॑त्वोऽह्वयत्। ऋ॒तवः॑ प्र॑त्य॒शृण्वन्। ते प॑शुब॒न्धेनै॒व  
य॑ज्ञ॒क्रतु॑नोप॒ पर्या॑वर्तन्त। त उ॒पौह॑न्थस्तना॒वाण्डौ शि॒श्जम॑वाँश्च॒ प्राण॑म्।

तस्मात्पशुबन्धस्य यज्ञक्रतोः। षडृत्विजः। सप्तकृत्वोऽह्वयत्। होत्राः प्रत्यशृण्वन्।  
ताः सौम्येनैवाध्वरेण यज्ञक्रतुनोपपर्यावर्तन्त॥ २५॥

ता उपौहन्त्सप्त शीर्षण्यान्प्राणान्। तस्मात्सौम्यस्याध्वरस्य यज्ञक्रतोः। सप्त  
होत्राः प्राचीर्वषट्कुर्वन्ति। दशकृत्वोऽह्वयत्। तपः प्रत्यशृणोत्। तत्कर्मणैव संवत्सरेण  
सर्वैर्यज्ञक्रतुभिरुप पर्यावर्तत। तत्सर्वमात्मानमपरिवर्गमुपौहत्। तस्मात्संवत्सरे  
सर्वे यज्ञक्रतवोऽवरोध्यन्ते। तस्माद्दशहोता चतुर्होता। पञ्चहोता षड्होता सप्तहोता।  
एकहोत्रे बलिः हरन्ति। हरन्त्यस्मै प्रजा बलिम्। ऐनमप्रतिख्यातं गच्छति। य  
एवं वेद॥ २६॥ चन्द्रमाश्चातुर्मास्यानां यज्ञक्रतोरेध्वरेण यज्ञक्रतुनोप पर्यावर्तन्त सप्तहोता चत्वारि च॥ [६]

प्रजापतिः पुरुषमसृजत। सौऽग्निरब्रवीत्। ममायमन्नमस्त्विति। सौऽबिभेत्।  
सर्वं वै माऽयं प्र धक्ष्यतीति। स एताश्चतुर्होतृनात्मस्पर्णानपश्यत्।  
तानजुहोत्। तैर्वै स आत्मानमस्पृणोत्। यदग्निहोत्रं जुहोति। एकहोतारमेव  
तद्यज्ञक्रतुमाप्नोत्यग्निहोत्रम्॥ २७॥

कु॒सिन्धं॑ चा॒ऽऽत्मनः॑ स्पृ॒णोति॑। आ॒दि॒त्यस्य॑ च॒ सायु॑ज्यं गच्छति। च॒तु॒रुन्न॑यति।  
 चतु॑र्हो॒तारमे॒व तद्य॑ज्ञक्र॒तुमा॑प्नोति दर्शपूर्णमा॒सौ। च॒त्वारि॑ चा॒ऽऽत्मनो॑ऽङ्गानि  
 स्पृ॒णोति॑। आ॒दि॒त्यस्य॑ च॒ सायु॑ज्यं गच्छति। च॒तु॒रुन्न॑यति। स॒मित्प॑ञ्चमी।  
 पञ्च॑हो॒तारमे॒व तद्य॑ज्ञक्र॒तुमा॑प्नोति चातु॒र्मास्या॑नि। लोमं॑ छु॒र्वी मा॒३सम॑स्थिं  
 म॒ज्जान॑म्॥ २८॥

तानि॑ चा॒ऽऽत्मनः॑ स्पृ॒णोति॑। आ॒दि॒त्यस्य॑ च॒ सायु॑ज्यं गच्छति। च॒तु॒रुन्न॑यति।  
 द्वि॒र्जुहो॑ति। षड्द्वो॑तारमे॒व तद्य॑ज्ञक्र॒तुमा॑प्नोति पशुब॒न्धम्। स्तना॑वा॒ण्डौ शि॒श्नमवा॑ञ्चं  
 प्रा॒णम्। तानि॑ चा॒ऽऽत्मनः॑ स्पृ॒णोति॑। आ॒दि॒त्यस्य॑ च॒ सायु॑ज्यं गच्छति। च॒तु॒रुन्न॑यति।  
 द्वि॒र्जुहो॑ति॥ २९॥

स॒मि॒त्सप्त॑मी। स॒प्तहो॑तारमे॒व तद्य॑ज्ञक्र॒तुमा॑प्नोति सौ॒म्यम॑ध्व॒रम्। स॒प्त चा॒ऽऽत्मनः॑  
 शी॒र्षण्य॑न्प्रा॒णान्स्पृ॒णोति॑। आ॒दि॒त्यस्य॑ च॒ सायु॑ज्यं गच्छति। च॒तु॒रुन्न॑यति।  
 द्वि॒र्जुहो॑ति। द्वि॒र्निमा॑ष्टि। द्विः॑ प्राश्ना॑ति। दश॑हो॒तारमे॒व तद्य॑ज्ञक्र॒तुमा॑प्नोति



संवत्सरम्। सर्वं चाऽऽत्मानमपरिवर्गं स्पृणोति। आदित्यस्य च सायुज्यं गच्छति॥ ३० ॥ अग्निहोत्रं मज्जानन्दिरुहोत्यपरिवर्गं स्पृणोत्येकं च॥ [७]

प्रजापतिरकामयत् प्रजायेयेति। स तपोऽतप्यत। सोऽन्तर्वानभवत्। स हरितः श्यावोऽभवत्। तस्मात्त्र्यन्तर्वली। हरिणी सती श्यावा भवति। स विजायमानो गर्भेणाताम्यत्। स तान्तः कृष्णः श्यावोऽभवत्। तस्मात्तान्तः कृष्णः श्यावो भवति। तस्यासुरेवाजीवत्॥ ३१ ॥

तेनासुनाऽसुरानसृजत। तदसुराणामसुरत्वम्। य एवमसुराणामसुरत्वं वेद। असुमानेव भवति। नैनमसुर्जहाति। सोऽसुरान्सृष्ट्वा पितेवामन्यत। तदनु पितृन्सृजत। तत्पितृणां पितृत्वम्। य एवं पितृणां पितृत्वं वेद। पितेवैव स्वाना भवति॥ ३२ ॥

यन्त्यस्य पितरो हवम्। स पितृन्सृष्ट्वाऽऽमनस्यत्। तदनु मनुष्यान्सृजत। तन्मनुष्याणां मनुष्यत्वम्। य एवं मनुष्याणां मनुष्यत्वं वेद। मनुष्यैव भवति। नैनं

मनु॑र्जहाति। तस्मै॑ मनु॒ष्या॑न्त्ससृ॒जाना॑य। दिवा॑ दे॒वत्रा॑ऽभवत्। तदनु॑ दे॒वान॑सृजत।  
 तद्दे॒वाना॑ दे॒वत्व॑म्। य ए॒वं दे॒वाना॑ दे॒वत्वं वेद॑। दिवा॑ है॒वास्य॑ दे॒वत्रा॑ भवति। तानि॒  
 वा ए॒तानि॑ च॒त्वार्य॑म्भा॒सि। दे॒वा म॑नु॒ष्याः पि॒तरो॑ऽसुराः। तेषु॑ सर्वे॒ष्वम्भो॑ नभ॑ इव  
 भवति। य ए॒वं वेद॑॥ ३३॥ अजीवध्वानां भवति देवानसृजत सप्त च॥ [८]

ब्र॒ह्मवा॒दिनो॑ वदन्ति। यो वा इ॒मं वि॒द्यात्। यतो॒ऽयं प॑वते। यद॑भि प॑वते। यद॑भि  
 स॒म्प॑वते। सर्व॒मायु॑रियात्। न पु॒राऽऽयु॑षः प्र मी॑येत। प॒शुमा॑न्त्स्यात्। वि॒न्देत्  
 प्र॒जाम्। यो वा इ॒मं वेद॑॥ ३४॥

यतो॒ऽयं प॑वते। यद॑भि प॑वते। यद॑भि स॒म्प॑वते। सर्व॒मायु॑रेति। न पु॒राऽऽयु॑षः प्र  
 मी॑यते। प॒शुमा॑न्भवति। वि॒न्देत् प्र॒जाम्। अ॒द्ध्यः प॑वते। अ॒पोऽभि प॑वते। अ॒पोऽभि  
 स॒म्प॑वते॥ ३५॥

अ॒स्याः प॑वते। इ॒माम॑भि प॑वते। इ॒माम॑भि स॒म्प॑वते। अ॒ग्नेः प॑वते। अ॒ग्निम॑भि  
 प॑वते। अ॒ग्निम॑भि स॒म्प॑वते। अ॒न्तरि॑क्षात्प॑वते। अ॒न्तरि॑क्षम॑भि प॑वते। अ॒न्तरि॑क्षम॑भि  
 स॒म्प॑वते। आ॒दि॒त्यात्प॑वते॥ ३६॥

आ॒दि॒त्य॒म॒भि प॑वते। आ॒दि॒त्य॒म॒भि स॒म्प॑वते। द्योः प॑वते। दि॒वं॒म॒भि प॑वते। दि॒वं॒म॒भि स॒म्प॑वते। दि॒ग्भ्यः प॑वते। दि॒शोऽभि प॑वते। दि॒शोऽभि स॒म्प॑वते। स यत्पु॒रस्ता॑द्वा॒ति। प्रा॒ण ए॒व भू॒त्वा पु॒रस्ता॑द्वा॒ति॥३७॥

तस्मा॑त्पु॒रस्ता॑द्वा॒न्तम्। सर्वाः प्र॒जाः प्र॑ति नन्दन्ति। प्रा॒णो हि प्रि॒यः प्र॒जाना॑म्। प्रा॒ण इ॒व प्रि॒यः प्र॒जाना॑ भवति। य ए॒वं वेद॑। स वा ए॒ष प्रा॒ण ए॒व। अथ॒ यदक्षि॑णतो वा॒ति। मा॒त॒रि॒श्चै॒व भू॒त्वा दक्षि॑णतो वा॒ति। तस्मा॑दक्षि॑णतो वा॒न्तं वि॒द्यात्। सर्वा दि॒श आ वा॑ति॥३८॥

सर्वा दि॒शोऽनु॑ वि वा॒ति। सर्वा दि॒शोऽनु॑ सं वा॒तीति॑। स वा ए॒ष मा॒त॒रि॒श्चै॒व। अथ॒ यत्प॒श्चाद्वा॑ति। प॒व॒मान ए॒व भू॒त्वा प॒श्चाद्वा॑ति। पू॒तम॑स्मा॒ आह॑रन्ति। पू॒तमु॑प॒हर॑न्ति। पू॒तम॑श्चा॒ति। य ए॒वं वेद॑। स वा ए॒ष प॒व॒मान ए॒व॥३९॥

अथ॒ यदु॑त्तरतो वा॒ति। स॒वि॒तै॒व भू॒त्वोत्त॑रतो वा॒ति। स॒वि॒तै॒व स्व॑ाना॑ भवति। य ए॒वं वेद॑। स वा ए॒ष स॒वि॒तै॒व। ते य ए॒नं पु॒रस्ता॑दा॒यन्त॑मु॒प॒वद॑न्ति। य ए॒वा॒स्य॑

पुरस्तात्पाप्मानः। तांस्तेऽपं घ्नन्ति। पुरस्तादितरान्पाप्मनः सचन्ते। अथ य एनं दक्षिणत आयन्तमुपवदन्ति॥४०॥

य एवास्य दक्षिणतः पाप्मानः। तांस्तेऽपं घ्नन्ति। दक्षिणत इतरान्पाप्मनः सचन्ते। अथ य एनं पश्चादायन्तमुप वदन्ति। य एवास्य पश्चात्पाप्मानः। तांस्तेऽपं घ्नन्ति। पश्चादितरान्पाप्मनः सचन्ते। अथ य एनमुत्तरत आयन्तमुप वदन्ति। य एवास्योत्तरतः पाप्मानः। तांस्तेऽपं घ्नन्ति॥४१॥

उत्तरत इतरान्पाप्मनः सचन्ते। तस्मादेवं विद्वान्। वीवं नृत्येत्। प्रेवं चलेत्। व्यस्येवाक्ष्यौ भाषेत। मृण्टयेदिव। क्राथयेदिव। शृङ्गायेतेव। उत मोपं वदेयुः। उत मे पाप्मानमपं हन्युरिति। स यान्दिशं सनिमेष्यन्थस्यात्। यदा तान्दिशं वातो वायात्। अथ प्रवेयात्। प्र वां धावयेत्। सातमेव रदितं व्यूढं गन्धमभि प्रच्यवते। आऽस्य तं जनपदं पूर्वा कीर्तिर्गच्छति। दानकामा अस्मै प्रजा भवन्ति। य एवं वेद॥४२॥ वेदं सम्पवत आदित्यात्पवते वात्या वात्येष पवमान एव दक्षिणत आयन्तमुप वदन्त्युत्तरतः पाप्मानस्तां स्तेपं घ्नन्तीत्यष्टौ च॥-[९]

प्रजापतिः सोमं राजानमसृजत। तं त्रयो वेदा अन्वसृज्यन्त। तान् हस्ते-

ऽकुरुत। अथ ह सीता सावित्री। सोमं राजानं चकमे। श्रद्धामु स चकमे।  
साऽऽहं पितरं प्रजापतिमुपससारा। तं होवाच। नमस्ते अस्तु भगवः। उप  
त्वाऽयानि॥४३॥

प्र त्वां पद्ये। सोमं वै राजानं कामये। श्रद्धामु स कामयत इति। तस्यां उ ह  
स्थांगरमलङ्कारं कल्पयित्वा। दशहोतारं पुरस्ताद्वाख्याय। चतुरहोतारं दक्षिणतः।  
पञ्चहोतारं पश्चात्। षड्होतारमुत्तरतः। सप्तहोतारमुपरिष्ठात्। सम्भारैश्च पत्निभिश्च  
मुखेऽलङ्कृत्य॥४४॥

आऽस्यार्धं वव्राज। तां होदीक्ष्योवाच। उप मा वर्तस्वेति। तं होवाच। भोगं  
तु म आचक्ष्व। एतन्म आचक्ष्व। यत्तं पाणाविति। तस्यां उ ह त्रीन् वेदान्प्रददौ।  
तस्मादुह स्त्रियो भोगमेव हारयन्ते। स यः कामयेत प्रियः स्यामिति॥४५॥

यं वा कामयेत प्रियः स्यादिति। तस्मा एतं स्थांगरमलङ्कारं कल्पयित्वा।  
दशहोतारं पुरस्ताद्वाख्याय। चतुरहोतारं दक्षिणतः। पञ्चहोतारं पश्चात्।

षड्भूतारमुत्तरतः। सप्तहूतारमुपरिष्ठात्। सम्भारैश्च पत्निभिश्च मुखेऽलङ्कृत्य।  
आस्यार्धं व्रजेत्। प्रियो हैव भवति॥४६॥ अयान्यलङ्कृत्यं स्यामिति भवति॥ [१०]

ब्रह्मात्मन्वदसृजत। तदकामयत। समात्मना पद्येयेति। आत्मन्नात्मन्नित्यामन्त्रयत।  
तस्मै दशमं हूतः प्रत्यशृणोत्। स दशहूतोऽभवत्। दशहूतो ह वै नामैषः।  
तं वा एतं दशहूतं सन्तम्। दशहोतेत्याचक्षते पुरोक्षेण। पुरोक्षप्रिया इव हि  
देवाः॥४७॥

आत्मन्नात्मन्नित्यामन्त्रयत। तस्मै सप्तमं हूतः प्रत्यशृणोत्। स सप्तहूतोऽभवत्।  
सप्तहूतो ह वै नामैषः। तं वा एतं सप्तहूतं सन्तम्। सप्तहोतेत्याचक्षते पुरोक्षेण।  
पुरोक्षप्रिया इव हि देवाः। आत्मन्नात्मन्नित्यामन्त्रयत। तस्मै षष्ठं हूतः प्रत्यशृणोत्।  
स षड्भूतोऽभवत्॥४८॥

षड्भूतो ह वै नामैषः। तं वा एतं षड्भूतं सन्तम्। षड्भूतेत्याचक्षते पुरोक्षेण।  
पुरोक्षप्रिया इव हि देवाः। आत्मन्नात्मन्नित्यामन्त्रयत। तस्मै पञ्चमं हूतः

प्रत्यशृणोत्। स पञ्चहूतोऽभवत्। पञ्चहूतो ह वै नामैषः। तं वा एतं पञ्चहूतं  
सन्तम्। पञ्चहोतेत्याचक्षते पुरोक्षेण॥४९॥

पुरोक्षप्रिया इव हि देवाः। आत्मन्नात्मन्नित्यामन्त्रयत्। तस्मै चतुर्थं हूतः  
प्रत्यशृणोत्। स चतुर्हूतोऽभवत्। चतुर्हूतो ह वै नामैषः। तं वा एतं चतुर्हूतं  
सन्तम्। चतुर्होतेत्याचक्षते पुरोक्षेण। पुरोक्षप्रिया इव हि देवाः। तमब्रवीत्। त्वं वै  
मे नेदिष्ठं हूतः प्रत्यश्रोषीः। त्वयैनानाख्यातार इति। तस्मान्नु हैनाश्चतुर्होतार  
इत्याचक्षते। तस्माच्छुश्रूषुः पुत्राणां हृद्यतमः। नेदिष्ठो हृद्यतमः। नेदिष्ठो ब्रह्मणो  
भवति। य एवं वेद॥५०॥ देवाः पङ्क्तोऽभवत्यञ्चहोतेत्याचक्षते पुरोक्षेणाश्रोषीः पदं॥ [११]

ब्रह्मवादिनः किं दक्षिणां यो वा अविद्वान्तस्य वै ब्रह्मवादिनो यद्वशहोतारः प्रजापतिर्व्यसं प्रजापतिः पुरुषं प्रजापतिरकामयत् स तपः सौऽन्तर्बान्ब्रह्मवादिनो  
यो वा इमं विद्यात्प्रजापतिः सोमं राजानं ब्रह्मात्मन्वदेकादश॥११॥  
ब्रह्मवादिनस्तस्य वा अग्रेयद्वा इदं किं चं प्रजापतिरकामयत् य एवास्यं दक्षिणतः पञ्चाशत्॥५०॥  
ब्रह्मवादिनो य एवं वेद॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके तृतीयः प्रपाठकः समाप्तः॥

॥चतुर्थः प्रश्नः॥

॥तैत्तिरीयब्राह्मणे द्वितीयाष्टके चतुर्थः प्रपाठकः॥

जुष्टो दमूना अतिथिर्दुरोणे। इमं नो यज्ञमुप याहि विद्वान्। विश्वा अग्नेऽभियुजो  
विहत्य। शत्रूयतामा भरा भोजनानि। अग्ने शर्ध महते सौभगाय। तव द्युम्नान्युत्तमानि  
सन्तु। सञ्जास्पत्य९ सुयममा कृणुष्व। शत्रूयतामभि तिष्ठा महा९सि। अग्ने यो  
नोऽभितो जनः। वृको वारो जिघा९सति॥१॥

ता९स्त्वं वृत्रहं जहि। वस्वस्मभ्यमा भरा। अग्ने यो नोऽभिदासति। समानो  
यश्च निष्ठ्यः। इध्मस्येव प्रक्षार्यतः। मा तस्योच्छ्रैषि किञ्चन। त्वमिन्द्राभिभूरसि।  
देवो विज्ञातवीर्यः। वृत्रहा पुरुचेतनः। अप प्राच इन्द्र विश्वा९ अमित्रान्॥२॥

अपापांचो अभिभूते नुदस्व। अपोदींचो अपशूराधरा च ऊरौ। यथा तव  
शर्मन्मदेम। तमिन्द्रं वाजयामसि। महे वृत्राय हन्तवे। स वृषा वृषभो भुवत्।  
युजे रथं गवेषण९ हरिभ्याम्। उप ब्रह्माणि जुजुषाणमस्थुः। विबाधिष्ठास्य रोदसी



महित्वा। इन्द्रो वृत्राण्यप्रतीजघ्नवान्॥३॥

हव्यवाहमभिमातिषाहम्। रक्षोहणं पृतनासु जिष्णुम्। ज्योतिष्मन्तं दीद्यतं  
पुरन्धिम्। अग्निं स्विष्टकृतमा हुवेम। स्विष्टमग्ने अभि तत्पृणाहि। विश्वा देव  
पृतना अभि ष्या। उरुं नः पन्थां प्रदिशन्विभाहि। ज्योतिष्मद्धेह्यजरं न आयुः।  
त्वामग्ने हविष्मन्तः। देवं मर्तास ईडते॥४॥

मन्ये त्वा जातवेदसम्। स हव्या वक्ष्यानुषक्। विश्वानि नो दुर्गहा जातवेदः।  
सिन्धुं न नावा दुरिताऽतिं पर्षि। अग्ने अत्रिवन्मनसा गृणानः। अस्माकं बोध्यविता  
तनूनाम्। पूषा गा अन्वेतु नः। पूषा रक्षत्वर्वतः। पूषा वाजं सनोतु नः। पूषेमा  
आशा अनुवेद सर्वाः॥५॥

सो अस्मां अभयतमेन नेषत्। स्वस्तिदा अघृणिः सर्ववीरः। अप्रयुच्छन्पुर  
एतु प्रजानन्। त्वमग्ने सप्रथा असि। जुष्टो होता वरेण्यः। त्वया यज्ञं वितन्वते।

अ॒ग्नी रक्षा॑ंसि सेधति। शु॒क्रशो॑चिरम॒र्त्यः। शुचिः॑ पाव॒क ईड्यः॑। अ॒ग्ने रक्षा॑ णो  
अ॒हंसः॑॥६॥

प्रति॑ ष्म देव॒ रीष॑तः। तपि॑ष्ठैर॒जरो॑ दह। अ॒ग्ने ह॒सि न्य॑त्रिणम्। दी॒द्यन्म॒र्त्येष्वा॑।  
स्वे क्षये॑ शुचि॒व्रत॑। आ वा॑त वाहि भेष॒जम्। वि वा॑त वाहि यद्र॒पः। त्व॒ हि  
वि॒श्वभे॑षजः। दे॒वानां॑ दू॒त ईय॑से। द्वावि॒मौ वा॒तौ वा॒तः॥७॥

आ सि॒न्धो॒रा प॑रा॒वतः॑। दक्षं॑ मे अ॒न्य आ॒वातु॑। परा॒न्यो वा॑तु यद्र॒पः। यद्दो॑ वा॑त  
ते गृ॒हे। अ॒मृत॑स्य नि॒धिर्हि॒तः। ततो॑ नो देहि जी॒वसे॑। ततो॑ नो धेहि भेष॒जम्।  
ततो॑ नो॒ मह॑ आ॒वह॑। वा॒त आ॒वातु॑ भेष॒जम्। श॒म्भूर्म॑यो॒भूर्नो॑ हृ॒दे॥८॥

प्र ण॒ आयू॑षि तारिषत्। त्वम॑ग्ने अ॒यासि॑। अ॒या सन्मन॑सा हि॒तः। अ॒या सन्  
ह॒व्यमू॑हिषे। अ॒या नो॑ धेहि भेष॒जम्। इ॒ष्टो अ॒ग्निराहु॑तः। स्वाहा॑कृतः पिप॒र्तु नः॑।  
स्व॒गा दे॒वेभ्य॑ इ॒दं नमः॑। कामो॑ भू॒तस्य॑ भ॒व्यस्य॑। स॒म्राडे॑को विरा॑जति॥९॥

स इ॒दं प्रति॑ पप्रथे। ऋ॒तूनु॑त्सृजते व॒शी। काम॑स्तद॒ग्ने सम॑वर्त॒ताधि॑। मन॑सो

रेतः प्रथमं यदासीत्। सतो बन्धुमसंति निरविन्दन्। हृदि प्रतीष्या कवयो मनीषा।  
त्वया मन्यो सरथमारुजन्तः। हर्षमाणासो धृषता मरुत्वः। तिग्मेषव आयुधा  
सुशिशानाः। उप प्रयन्ति नरो अग्निरूपाः॥१०॥

मन्युर्भगो मन्युरेवास देवः। मन्युरहोता वरुणो विश्ववेदाः। मन्युं विशं  
ईडते देवयन्तीः। पाहि नो मन्यो तपसा श्रमेण। त्वमग्ने व्रतभृच्छुचिः। देवा  
आसादया इह। अग्ने हव्याय वोढवे। व्रतानुबिश्रद्वतपा अदाभ्यः। यजा नो  
देवा अजरः सुवीरः। दधद्रत्नानि सुविदानो अग्ने। गोपाय नो जीवसे  
जातवेदः॥११॥ जिघांसत्यमित्रांश्च घन्वा नीडते सर्वा अहंसो वातो हृदे राजत्यग्निरूपाः सुविदानो अग्ने एकं च॥—————[१]

चक्षुषो हेते मनसो हेते। वाचो हेते ब्रह्मणो हेते। यो मां ऽघायुरभिदासंति। तमग्ने  
मेन्या मेनिं कृणु। यो मा चक्षुषा यो मनसा। यो वाचा ब्रह्मणा ऽघायुरभिदासंति।  
तयां ऽग्ने त्वं मेन्या। अमुममेनिं कृणु। यत्किञ्चासौ मनसा यच्च वाचा। यज्ञैर्जुहोति  
यजुषा हविर्भिः॥१२॥

तन्मृत्युर्निर्ऋत्या संविदानः। पुरादिष्टादाहुतीरस्य हन्तु। यातुधाना  
निर्ऋतिरादुरक्षः। ते अस्य घन्त्वन्तेन सत्यम्। इन्द्रैषिता आज्यमस्य  
मध्नन्तु। मा तथ्समृद्धिं यदसौ करोति। हन्मि तेऽहं कृतं हविः। यो मे  
घोरमर्चीकृतः। अपाँश्चौ त उभौ बाहू। अपनह्याम्यास्यम्॥१३॥

अपं नह्यामि ते बाहू। अपं नह्याम्यास्यम्। अग्नेर्देवस्य ब्रह्मणा। सर्वं तेऽवधिषं  
कृतम्। पुराऽमुष्यं वषट्कारात्। यज्ञं देवेषु नस्कृधि। स्विष्टमस्माकं भूयात्।  
माऽस्मान्प्रापन्नरातयः। अन्ति दूरे सतो अग्ने। भ्रातृव्यस्याभिदासतः॥१४॥

वषट्कारेण वज्रेण। कृत्यां हन्मि कृतामहम्। यो मा नक्तं दिवा सायम्।  
प्रातश्चाहो निपीयति। अद्या तमिन्द्र वज्रेण। भ्रातृव्यं पादयामसि। इन्द्रस्य गृहोऽसि  
तन्त्वा। प्रपद्ये सगुः साश्वः। सह यन्मे अस्ति तेन। ईडे अग्निं विपश्चितम्॥१५॥

गिरा यज्ञस्य साधनम्। श्रुष्टीवानन्धितावानम्। अग्ने शकेमं ते वयम्। यमं देवस्य  
वाजिनः। अति द्वेषांसि तरेम। अवतं मा समनसौ समोकसौ। सचेतसौ सरेतसौ।

उ॒भौ मा॒म॒वत॑जा॒तवे॑दसौ। शि॒वौ भ॑वत॒म॒द्य नः॑। स्व॒यं कृ॑ण्वानः सु॒गम॑प्रयावम्॥१६॥

ति॒ग्मशृ॑ङ्गो वृष॒भः शो॑शु॒चानः॑। प्र॒त्न॑ स॒धस्थ॑मनु पश्य॑मानः। आ तन्तु॑म॒ग्निर्दिव्यं॑  
त॑तान। त्वन्न॒स्तन्तु॑रु॒त सेतु॑रग्रे। त्वं पन्था॑ भवसि दे॒व्यानः॑। त्वया॑ऽग्रे पृ॒ष्ठं  
व॒यमा॑रु॒हेम। अथा॑ दे॒वैः स॑ध॒माद॑ मदेम। उ॒दुत्त॑मं मु॒मुग्धि॑ नः। वि पाशं॑  
म॒ध्यम॑श्च॒त। अवा॑ध॒मानि॑ जी॒वसे॑॥१७॥

व॒य॑ सौ॒म व्र॑ते तव। म॒नस्त॑नूषु बिभ्र॑तः। प्र॒जाव॑न्तो अशीमहि। इन्द्रा॒णी  
दे॒वी सु॒भगा॑ सु॒पत्नी॑। उद॑शे॒न पति॑विद्ये जिगाय। त्रि॒श॑द॒स्या ज॒घनं॑ यो॒ज॑नानि।  
उ॒पस्थ॑ इन्द्र॒ः स्थ॑वि॒रं बि॑भर्ति। सेना॑ ह॒ नाम॑ पृथि॒वी ध॑नञ्जया। वि॒श्वव्य॑चा॒ अदि॑तिः  
सूर्य॑त्वक्। इन्द्रा॒णी दे॒वी प्रा॒सहा॑ ददा॑ना॥१८॥

सा नो॑ दे॒वी सु॒हवा॑ शर्म॒ यच्छ॑तु। आत्वा॑ऽहा॒र्षम॒न्तर॑भूः। ध्रु॒वस्ति॒ष्ठावि॑चाचलिः।  
विश॑स्त्वा॒ सर्वा॑ वाञ्छन्तु। मा त्वद्रा॒ष्ट्रम॑धि॒ भ्रश॑त्। ध्रु॒वा द्यौर्ध्रु॒वा पृ॑थि॒वी। ध्रु॒वं

विश्वमिदं जगत्। ध्रुवा ह पर्वता इमे। ध्रुवो राजा विशामयम्। इहैवैधि मा  
व्यथिष्ठाः॥१९॥

पर्वत इवाविचाचलिः। इन्द्र इवेह ध्रुवस्तिष्ठ। इह राष्ट्रमु धारय। अभितिष्ठ  
पृतन्यतः। अधरे सन्तु शत्रवः। इन्द्र इव वृत्रहा तिष्ठ। अपः क्षेत्राणि सञ्जयन्।  
इन्द्र एणमदीधरत्। ध्रुवं ध्रुवेण हविषा। तस्मै देवा अधिब्रवन्। अयं च  
ब्रह्मणस्पतिः॥२०॥ हविर्भिरास्यमभि दासतो विपश्चितमप्रयावञ्जीवसे ददाना व्यथिष्ठा ब्रवत्रेकं च॥ [२]

जुष्टी नरो ब्रह्मणा वः पितृणाम्। अक्षमव्ययं न किलारिषाथ। यच्छक्रीषु बृहता  
रवेण। इन्द्रे शुष्ममदधाथा वसिष्ठाः। पावका नः सरस्वती। वाजेभिर्वाजिनीवती।  
यज्ञं वष्टु धिया वसुः। सरस्वत्यभिना नैषि वस्यः। मा पस्फरीः पयसा मा न  
आधक्। जुषस्व नः सख्या वेश्या च॥२१॥

मा त्वक्षेत्राण्यरणानि गन्म। वृञ्जे हविर्नमसा बरुहिरग्नौ। अयामि सुगधृतवती  
सुवृक्तिः। अम्यक्षि सद्म सदने पृथिव्याः। अश्रायि यज्ञः सूर्ये न चक्षुः। इहार्वाश्चमति

ह्वये। इन्द्रं जैत्राय जेतवे। अस्माकमस्तु केवलः। अर्वाश्चमिन्द्रममुतो हवामहे।  
यो गोजिद्धं न जिदंश्च जिद्यः॥२२॥

इमं नो यज्ञं विह्वे जुषस्व। अस्य कुर्मो हरिवो मेदिनं त्वा। असम्मृष्टो जायसे  
मातृवोः शुचिः। मन्द्रः कविरुदतिष्ठो विवस्वतः। घृतेन त्वा वर्धयन्नग्न आहुत। धूमस्ते  
केतुरभवद्विवि श्रितः। अग्निरग्रे प्रथमो देवतानाम्। संयातानामुत्तमो विष्णुरासीत्।  
यजमानाय परिगृह्य देवान्। दीक्षयेदं हविरा गच्छतन्नः॥२३॥

अग्निश्च विष्णो तप उत्तमं महः। दीक्षापालेभ्योऽवनतं हि शंक्रा।  
विश्वैर्देवैर्यज्ञियैः संविदानौ। दीक्षामस्मै यजमानाय धत्तम्। प्र तद्विष्णुः स्तवते  
वीर्याय। मृगो न भीमः कुचरो गिरिष्ठाः। यस्योरुषु त्रिषु विक्रमणेषु। अधि  
क्षियन्ति भुवनानि विश्वा। नूमर्तो दयते सनिष्यन् यः। विष्णव उरुगायाय  
दाशत्॥२४॥

प्र यः सत्राचा मनसा यजातै। एतावन्तन्नर्यमा विवासात्। विचक्रमे पृथिवीमेष

एताम्। क्षेत्राय विष्णुर्मनुषे दशस्यन्। ध्रुवासो अस्य कीरयो जनांसः। उरुक्षितिः  
 सुजनिमा चकार। त्रिदेवः पृथिवीमेष एताम्। विचक्रमे शतर्चसं महित्वा। प्र  
 विष्णुरस्तु तवसस्तवीयान्। त्वेषः ह्यस्य स्थविरस्य नाम॥२५॥

होतारं चित्ररथमध्वरस्य। यज्ञस्ययज्ञस्य केतुः रुशन्तम्। प्रत्यर्धिं देवस्यदेवस्य  
 म॒ह्ना। श्रिया त्वग्निमतिथिं जनानाम्। आ नो विश्वाभिरूतिभिः सजोषाः। ब्रह्म  
 जुषाणो हर्यश्च याहि। वरीवृज्स्थविरिभिः सुशिप्र। अस्मे दधद्वृषणः शुष्ममिन्द्र।  
 इन्द्रः सुवर्षा जनयन्नहानि। जिगायोशिग्भिः पृतना अभि श्रीः॥२६॥

प्रारोचयन्मनवे केतुमहाम्। अविन्दज्योतिर्बृहते रणाय। अश्विनाववसे  
 निहये वाम्। आ नूनं यातः सुकृताय विप्रा। प्रातुर्युक्तेन सुवृता रथेन।  
 उपागच्छतमवसागतन्नः। अविष्टं धीष्वश्विना न आसु। प्रजावद्रेतो अहयं नो  
 अस्तु। आवा तोके तनये तूतुजानाः। सुरत्नासो देववीतिं गमेम॥२७॥

त्वः सोम क्रतुभिः सुक्रतुर्भूः। त्वं दक्षैः सुदक्षो विश्ववेदाः। त्वं वृषा



वृष॒त्वेभि॑र्म॒हि॒त्वा। द्यु॒म्नेभि॑र्द्यु॒म्य॑भवो नृ॒चक्षाः॑। अषा॑ढं यु॒थ्सु॑ पृ॒त॒नासु॑ प॒प्रिम्।  
 सुव॒र्षाम॒प्स्वां वृ॒जन॑स्य गो॒पाम्। भ॒रेषु॒जा॑ सु॒क्षि॒तिः सु॒श्रव॑सम्। जय॑न्तं  
 त्वा॒मनु॑ म॒देम॑ सोम। भवा॑ मि॒त्रो न शेव्यो॑ घृ॒तासु॑तिः। वि॒भूत॑द्यु॒म्न ए॒व या उ॑  
 स॒प्रथाः॑॥२८॥

अधा॑ ते वि॒ष्णो वि॒दुषा॑ चि॒दृध्यः॑। स्तोमो॑ य॒ज्ञस्य॑ रा॒ध्यो ह॒विष्म॑तः। यः पू॒र्व्याय॑  
 वे॒धसे॒ नवी॑यसे। सु॒म॒ज्ज्ञान॑ये वि॒ष्णावे॒ ददा॑शति। यो जा॒तम॒स्य म॑हतो म॒हि ब्रवा॑त्।  
 सेदु॑ श्रवो॑भि॒र्युज्यं॑ चि॒दभ्य॑सत्। तमु॑ स्तो॒तारः पू॒र्व्यं यथा॑ वि॒द ऋ॒तस्य॑। गर्भ॑ ह॒विषा॑  
 पि॒प॒र्त॒न। आ॒ऽस्य॑ जा॒नन्तो॒ नाम॑ चि॒द्वि॒वक्त॑न। बृ॒हत्ते॑ वि॒ष्णो सु॒म॒तिं भ॑जामहे॥२९॥

इ॒मा धा॒ना घृ॑त॒स्तुवः॑। हरी॑ इ॒होप॑वक्षतः। इन्द्र॑ सु॒खत॑मे रथे॑। ए॒ष ब्र॒ह्मा  
 प्र॑तेमहे। वि॒दथे॑ श॑सिषः॒ हरी॑। य ऋ॒त्वियः॑ प्र॑ते व॒न्वे। व॒नुषो॑ हर्य॒तं म॑दम्।  
 इन्द्रो॒ नाम॑ घृ॒तन्न॑यः। ह॒रिभि॑श्चार्॒सेच॑ते। श्रु॒तो गु॒ण आ त्वा॑ वि॒शन्तु॑॥३०॥

ह॒रि॒व॒र्षस॒ङ्गि॒रः। आच॑र्षणि॒प्रा वृ॑ष॒भो जना॑नाम्। राजा॑ कृ॒ष्टी॒नां पु॑रु॒हूत॑ इन्द्रः।

स्तुतश्चवस्यन्नवसोपमद्रिक्। युक्त्वा हरी वृषणायाह्यर्वाङ्। प्र यथ्सिन्धवः प्रसुवं  
यदायन्। आपः समुद्रश्च रथ्येव जग्मुः। अतश्चिदिन्द्रः सदसो वरीयान्। यदी-  
सोमः पृणति दुग्धो अश्नुः। ह्यामसि त्वेन्द्र याह्यर्वाङ्॥३१॥

अरन्ते सोमस्तनुवे भवाति। शतक्रतो मादयस्वा सुतेषु। प्रास्माश्च अ-  
पृतनासु प्रयुत्सु। इन्द्राय सोमाः प्रदिवो विद्वानाः। ऋभुर्येभिर्वृषपर्वा विहायाः।  
प्रयम्यमाणान्प्रति षू गृभाय। इन्द्र पिब वृषधूतस्य वृष्णाः। अहेडमान उपयाहि  
यज्ञम्। तुभ्यं पवन्त इन्द्रवः सुतासः। गावो न वज्रिन्स्वमोको अच्छ्॥३२॥

इन्द्रा गंहि प्रथमो यज्ञियानाम्। या ते काकुत्सुकृता या वरिष्ठा। यया  
शश्वत्पिबसि मध्वं ऊर्मिम्। तया पाहि प्र ते अध्वर्युरस्थात्। सन्ते वज्रो  
वर्ततामिन्द्र गव्युः। प्रातर्युजा वि बोधय। अश्विनावेह गच्छतम्। अस्य सोमस्य  
पीतये। प्रातर्यावाणा प्रथमा यजध्वम्। पुरा गृध्रादररुषः पिबाथः। प्रातरहि  
यज्ञमश्विना दधाते। प्रशंसन्ति कवयः पूर्वभाजः। प्रातर्यजध्वमश्विना हिनोत। न

सायमस्ति देवया अजुष्टम्। उतान्यो अस्मद्यजते विचायः। पूर्वः पूर्वो यजमानो  
वनीयान्॥ ३३॥ चाश्वजिद्यो गच्छत नो दाशत्रामाभिश्चरगमेम सप्रथा भजामहे विशन्तु याह्रवाडच्छं पिवाथः पद्व॥—————[३]

नक्तं जाताऽस्योषधे। रामे कृष्णे असिक्रि च। इदं रजनि रजय। किलासं  
पलितं च यत्। किलासं च पलितं च। निरितो नाशया पृषत्। आ नः स्वो अश्नुतां  
वर्णः। परां श्वेतानि पातय। असितं ते निलयनम्। आस्थानमसितं तव॥ ३४॥

असिक्रियस्योषधे। निरितो नाशया पृषत्। अस्थिजस्य किलासस्य। तनूजस्य  
च यत्त्वचि। कृत्यया कृतस्य ब्रह्मणा। लक्ष्मं श्वेतमनीनशम्। सरूपा नाम ते  
माता। सरूपो नाम ते पिता। सरूपाऽस्योषधे सा। सरूपमिदं कृधि॥ ३५॥

शुनं हुवेम मघवानमिन्द्रम्। अस्मिन्भरे नृतमं वाजसातौ। शृण्वन्तमुग्रमृतये  
समथ्सु। घ्नन्तं वृत्राणि सञ्जितं धनानाम्। धूनुथ द्यां पर्वतान्दाशुषे वसु। नि  
वो वना जिहते यामं नो भिया। कोपयथ पृथिवीं पृश्निमातरः। युधे यदुग्राः  
पृषतीरयुग्ध्वम्। प्रवेपयन्ति पर्वतान्। विविञ्चन्ति वनस्पतीन्॥ ३६॥

प्रोवा॑रत मरु॒तो दु॒र्मदा॑ इव। देवा॑सुः सर्व॒या वि॒शा। पु॒रु॒त्रा हि स॒दृङ्मु॑सि। वि॒शो  
वि॒श्वा अनु॑ प्र॒भु। स॒म॒थ्सु॑ त्वा हवामहे। स॒म॒थस्व॒ग्निम॑वसे। वा॒ज॒यन्तो॑ हवामहे।  
वा॒जे॒षु चि॒त्रा॒धस॑म्। स॒ङ्ग॑च्छ॒ध्व॒ सं॑व॒दध्व॑म्। सं वो म॒ना॑सि जानताम्॥३७॥

दे॒वा भा॒गं यथा॑ पूर्वे॑। स॒ज्जाना॑ना उ॒पास॑त। स॒मा॒नो म॒न्त्रः स॒मि॒तिः स॒मा॒नी।  
स॒मा॒नं म॒नः स॒ह चि॒त्तमे॑षाम्। स॒मा॒नं के॒तो अ॒भि स॑ र॒भध्व॑म्। स॒ज्जाने॑न वो  
ह॒विषा॑ यजामः। स॒मा॒नी व॒ आकू॑तिः। स॒मा॒ना हृद॑यानि वः। स॒मा॒नम॑स्तु वो  
म॒नः। यथा॑ वः सु॒स॒हास॑ति॥३८॥

स॒ज्जानं॑ नः स्वैः। स॒ज्जान॑म॒रणैः। स॒ज्जान॑म॒श्विना॑ यु॒वम्। इ॒हास्मा॑सु नि॒यच्छ॑तम्।  
स॒ज्जानं॑ मे बृ॒हस्प॑तिः। स॒ज्जान॑स॒ सवि॑ता क॑रत्। स॒ज्जान॑म॒श्विना॑ यु॒वम्। इ॒ह मह्यं॑  
नि य॑च्छतम्। उप॑ च्छा॒यामि॑व॒ घृणैः॑। अ॒गन्म॑ श॒र्म ते व॑यम्॥३९॥

अ॒ग्ने हि॒र॒ण्यस॑न्द॒शः। अ॒द॒भ्येभिः॑ स॒वितः॑ पा॒युभि॑ष्ट्वम्। शि॒वेभि॑र॒द्य परि॑पाहि नो  
ग॒यम्। हि॒र॒ण्यजि॑ह्वः सु॒वि॒ताय॑ न॒व्यसे॑। र॒क्षा मा॑कि॒र्नो अ॒घश॑स॒ ईश॑त। म॒दैम॑दे

हि नो ददुः। यूथा गवामृजुक्रतुः। सङ्गृभाय पुरुशता। उभया हस्त्या वसु। शिशीहि  
राय आ भर॥४०॥

शिप्रिन्वाजानां पते। शचीवस्तव द॒सना॑। आ तू न इन्द्र भाजय।  
गोष्वश्वेषु शुभ्रषु। सहस्रेषु तुवीमघ। यद्देवा देवहेडनम्। देवासश्चकृमा वयम्।  
आदित्यास्तस्मान्मा यूयम्। ऋतस्यर्तेन मुञ्चत। ऋतस्यर्तेनाऽऽदित्याः॥४१॥

यजत्रा मुञ्चतेह मा॑। यज्ञैर्वो यज्ञवाहसः। आशिक्षन्तो न शेकिम। मेदस्वता  
यजमानाः। सुचाऽऽज्येन जुह्वतः। अकामा वो विश्वेदेवाः। शिक्षन्तो नोप शेकिम।  
यदि दिवा यदि नक्तम्। एन एनस्योकरत्। भूतं मा तस्माद्भव्यं च॥४२॥

द्रुपदादिव मुञ्चतु। द्रुपदादिवेन्मुमुचानः। स्विन्नः स्नात्वी मलादिव। पूतं  
पवित्रेणेवाऽऽज्यम्। विश्वे मुञ्चन्तु मेनसः। उद्वयं तमसस्परि। पश्यन्तो  
ज्योतिरुत्तरम्। देवं देवत्रा सूर्यम्। अगन्म ज्योतिरुत्तमम्॥४३॥

वयं भरादित्याश्च नव च॥

तव कृधि वनस्पतीञ्जानतामसंति

वृषा सो अ॒शुः प॑वते ह॒विष्मा॒न्सोमः॑। इन्द्र॑स्य भा॒ग ऋ॑त॒युः श॒तायुः॑।  
 स मा वृषा॑णं वृष॒भं कृ॑णोतु। प्रि॒यं वि॒शाँ सर्व॑वीर॒ सु॒वीरम्। कस्य॑ वृषा  
 सु॒ते सचा॑। नि॒युत्वा॑न्वृष॒भो र॑णत्। वृ॒त्रहा सोम॑पीतये। यस्ते॑ शृङ्ग वृषो॒नपात्।  
 प्रण॑पात्कुण्ड॒पाय्यः॑। न्य॑स्मिन्दध्र॒ आ मनः॑॥४४॥

तँ स॒ध्रीची॑रू॒तयो वृ॑ष्णि॒यानि। पौ॑ँस्या॒नि नि॒युतः॑ सश्चुरिन्द्र॑म्। स॒मुद्रं न  
 सिन्ध॑व उ॒क्थशु॑ष्माः। उ॒रुव्य॑च॒सङ्गिर॒ आ वि॑शन्ति। इन्द्रा॑य॒ गिरो॒ अनि॑शितसर्गाः।  
 अ॒पः प्रैर॑य॒न्सग॑रस्य बु॒ध्रात्। यो अक्षे॑णेव च॒क्रिया॒ शची॑भिः। विष्व॑क्त॒स्तम्भं  
 पृथि॑वीमु॒त द्याम्। अक्षो॑दय॒च्छव॑सा॒ क्षाम॑बु॒ध्रम्। वा॒र्णवा॑त॒स्तवि॑षीभि॒रिन्द्रः॑॥४५॥

दृ॒ढान्यौघा॑दु॒शमा॑न् ओजः॑। अवा॑भि॒नत्कु॑भः पर्व॑तानाम्। आ नो॑ अ॒ग्ने  
 सुके॒तुना॑। र॒यिं वि॒श्वायु॑पोषसम्। मा॒र्डीकं॑ धे॒हि जी॒वसे॑। त्वँ सोम॑ म॒हे भग॑म्।  
 त्वं यू॒नं ऋ॑ताय॒ते। दक्ष॑ दधासि जी॒वसे॑। रथं॑ यु॒ञ्जते म॒रुतः॑ शु॒भे सु॒गम्। सू॒रो न  
 मि॒त्रावरु॑णा॒ गवि॑ष्टिषु॥४६॥

रजाँसि चित्रा विचरन्ति तन्यवः। दिवः सम्राजा पयसा न उक्षतम्। वाचं  
 सुमित्रावरुणाविरावतीम्। पर्जन्याश्चित्रां वदति त्विषीमतीम्। अभ्रा वसत मरुतः  
 सुमायया। द्यां वर्षयतमरुणामरेपसम्। अयुक्त सप्त शुन्युवः। सूरौ रथस्य  
 नृप्रियः। ताभिर्याति स्वयुक्तिभिः। वहिष्ठेभिर्विहरन् यासि तन्तुम्॥४७॥

अवव्ययन्नसितं देव वस्वः। दविध्वतो रश्मयः सूर्यस्य। चर्मेवावाधुस्तमो  
 अपस्वन्तः। पर्जन्याय प्र गायत। दिवस्पुत्राय मीढुषे। स नो यवसमिच्छतु।  
 अच्छा वद तवसं गीर्भिराभिः। स्तुहि पर्जन्यं नमसाऽऽविवास। कनिक्रदद्वृषभो  
 जीरदानुः। रेतो दधात्वोषधीषु गर्भम्॥४८॥

यो गर्भमोषधीनाम्। गवां कृणोत्यर्वताम्। पर्जन्यः पुरुषीणाम्। तस्मा इदास्ये  
 हविः। जुहोता मधुमत्तमम्। इडां नः संयतं करत्। तिस्रो यदग्ने शरदस्त्वामित्।  
 शुचिं घृतेन शुचयः सपर्यन्। नामानि चिदधिरे यज्ञियानि। असूदयन्त तनुवः  
 सुजाताः॥४९॥

इन्द्रश्च नः शुनासीरौ। इमं यज्ञं मिमिक्षतम्। गर्भं धत्तः स्वस्तये। ययोरिदं  
विश्वं भुवनमा विवेश। ययोरानन्दो निहितो महेश्च। शुनासीरावृतुभिः संविदानौ।  
इन्द्रवन्तौ हविरिदं जुषेथाम्। आघ्राये अग्निमिन्धते। स्तृणन्ति बर्हिरानुषक्।  
येषामिन्द्रो युवा सखा। अग्न इन्द्रश्च मेदिना। हथो वृत्राण्यप्रति। युवः हि  
वृत्रहन्तमा। याभ्याः सुव्रजयन्नग्रं एव। यावातस्थतुर्भुवनस्य मध्ये। प्रचर्षणी  
वृषणा वज्रबाहू। अग्नी इन्द्रावृत्रहणा हुवे वाम्॥५०॥

च॥

[५]

उत नः प्रिया प्रियासु। सप्तस्वसा सुजुष्टा। सरस्वती स्तोम्याऽभूत्। इमा  
जुह्वानायुष्मदा नमोभिः। प्रति स्तोमः सरस्वति जुषस्व। तव शर्मन्प्रियतमे  
दधानाः। उपस्थेयाम शरणं न वृक्षम्। त्रीणि पदा विचक्रमे। विष्णुर्गोपा अदाभ्यः।  
ततो धर्माणि धारयन्॥५१॥

तदस्य प्रियमभि पाथो अश्याम्। नरो यत्र देवयवो मदन्ति। उरुक्रमस्य स  
हि बन्धुरित्था। विष्णोः पदे परमे मध्व उथ्सः। क्रत्वादा अस्थु श्रेष्ठः। अद्य त्वा



व॒न्वन्त्सुरे॒क्णाः॑। म॒र्त आ॒नाश॑ सुवृ॒क्तिम्। इ॒मा ब्र॑ह्म ब्रह्म॒वाह॑। प्रि॒या त॒ आ ब॒रुहिः॑  
सी॒द। वी॒हि सू॒र पु॒रोडा॑शम्॥५२॥

उप॑ नः सू॒नवो॒ गिरः॑। शृ॒ण्वन्त्व॒मृत॑स्य॒ ये। सु॒मृडी॒का भ॑वन्तु नः। अ॒द्या नो॑ देव  
स॒वितः॑। प्र॒जाव॑त्सा॒वीः सौ॒भग॑म्। परा॑ दुः॒ष्वप्रि॑यः सु॒व। वि॒श्वानि॑ देव स॒वितः॑।  
दु॒रितानि॑ परा॑ सु॒व। यद्भ॒द्रं तन्म॒ आ सु॑व। शु॒चि॒म॒र्केर्बृ॑हस्पतिम्॥५३॥

अ॒ध्वरे॑षु॒ नम॑स्यत। अ॒ना॒म्योज॑ आ च॒के। या धा॒रय॑न्त दे॒वा सु॒दक्षा॑  
दक्ष॑पिता॒रा। अ॒सुर्या॑य प्रम॑हसा। स इ॒त् क्षेति॑ सु॒धित॑ ओ॒कंसि॑ स्वे। तस्मा॑ इडा॑  
पि॒न्वते॑ वि॒श्वदा॑नी॑। तस्मै॑ वि॒शः स्व॒यमे॒वान॑मन्ति। यस्मि॑न्ब्र॒ह्मा रा॒जानि॑ पूर्॒व ए॒ति।  
सकू॑तिमिन्द्र॒ सच्यु॑तिम्। सच्यु॑तिं ज॒घन॑च्युतिम्॥५४॥

क॒नात्का॒भान्न॑ आ भ॑र। प्र॒य॒प्स्यन्नि॑व स॒क्थ्यौ॑। वि न॑ इन्द्र॒ मृधो॑ जहि।  
कनी॑खुनदि॒व सा॒पय॑न्। अ॒भि नः॑ सु॒ष्टुतिं॑ नय। प्र॒जाप॑तिः स्त्रि॒यां यशः॑।  
मु॒ष्कयो॑रदधा॒त्सप॑म्। का॒मस्य॑ तृ॒प्तिमा॑न॒न्दम्। तस्या॑ग्ने भा॒जये॒ह मा॑। मो॒दः प्र॑मो॒द

आनन्दः॥५५॥

मुष्कयोर्निहितः सपः। सृत्वेव कामस्य तृप्याणि। दक्षिणानां प्रतिग्रहे।  
मनसश्चित्तमाकूतिम्। वाचः सत्यमशीमहि। पशूनां रूपमन्नस्य। यशः श्रीः  
श्रयतां मयि। यथाऽहमस्या अतृपः स्त्रियै पुमान्। यथा स्त्री तृप्यति पुंसि  
प्रिये प्रिया। एवं भगस्य तृप्याणि॥५६॥

यज्ञस्य काम्यः प्रियः। ददामीत्यग्निर्वदति। तथेति वायुराहु तत्। हन्तेति  
सत्यं चन्द्रमाः। आदित्यः सत्यमोमिति। आपस्तथ्सत्यमा भरन्। यशो यज्ञस्य  
दक्षिणाम्। असौ मे कामः समृद्धताम्। न हि स्पशमविदन्नन्यमस्मात्।  
वैश्वानरात्पुनरुतारमग्नेः॥५७॥

अथेममन्थन्नमृतममूराः। वैश्वानरं क्षेत्रजित्याय देवाः। येषामिमे पूर्वे  
अर्मास आसन्। अयूपाः सन्न विभृता पुरूणि। वैश्वानर त्वया ते नृत्ताः।  
पृथिवीमन्यामभितस्थुर्जनांसः। पृथिवीं मातरं महीम्। अन्तरिक्षमुप ब्रुवे।

बृ॒हती॑मू॒तये॒ दि॒वम्। वि॒श्वं बि॒भर्ति॑ पृ॒थि॒वी॥५८॥

अ॒न्तरि॑क्षं वि पंप्र॒थे। दु॒हे द्यौर्बृ॑हती पयः। न ता न॑शन्ति न द॑भाति तस्करः।  
नैना॑ अमि॒त्रो व्यथि॑राद॒धर्ष॑ति। दे॒वाःश्च॒ याभि॑र्यज॒ते द॑दाति च। ज्यो॒गित्ताभिः॑  
सच॑ते गोप॑तिः स॒ह। न ता अ॒र्वा रे॒णुकं॑काटो अश्नु॒ते। न सः॑स्कृ॒तत्र॑मुप॑ यन्ति  
ता अ॒भि। उ॒रुगा॑यमभ॑यं तस्य॒ ता अनु॑। गावो॒ मर्त्य॑स्य॒ वि च॑रन्ति यज्व॑नः॥५९॥

रा॒त्री व्य॑ख्यदाय॒ती। पु॒रुत्रा॑ दे॒व्यक्ष॑भिः। वि॒श्वा अ॒धि श्रि॒योऽधि॑ता उप॑ ते गा  
इ॒वाक॑रम्। वृ॒णीष्व॑ दु॒हित॑र्दिवः। रा॒त्री स्तो॒मं न जि॑ग्युषी॑। दे॒वीं वाच॑म॒जन॑यन्त  
दे॒वाः। तां वि॒श्वरू॑पाः प॒शवो॑ वदन्ति। सा नो॑ म॒न्द्रेष॑मूर्जं॒ दुहा॑ना। धे॒नुर्वा॑ग॒स्मानु॑प॒  
सुष्टु॑तैतु॑॥६०॥

यद्वा॒ग्वद॑न्त्यविचे॒त॒नानि॑। रा॒ष्ट्री दे॒वानां॑ निष॒साद॑ म॒न्द्रा। चत॑स्र ऊ॒र्जं दु॒दुहे॑  
पया॑सि। क्व॑ स्विद॒स्याः पर॑मं जंग॒म। गो॒री मि॑माय स॒लिलानि॑ तक्ष॑ती। ए॒कप॑दी  
द्वि॒पदी॑ सा चतु॑ष्पदी। अ॒ष्टाप॑दी नव॑पदी बभू॒वुषी॑। स॒हस्रा॑क्षरा पर॒मे व्यो॑मन्।

तस्या॑ समुद्रा अधि॑ विक्षर॑न्ति। तेन॑ जीवन्ति प्र॒दिश॑श्चत॑स्रः॥६१॥

ततः॑ क्षर॑त्यक्षरम्। तद्वि॑श्वमुप॑ जीवति। इन्द्रा॑सूरा॑ ज॒नय॑न्वि॒श्वक॑र्मा। म॒रुत्वा॑  
अस्तु॑ ग॒णवा॑न्त्सजा॒तवान्। अ॒स्य स्रु॒षा श्वशु॑रस्य॒ प्रशि॑ष्टिम्। स॒पत्ना॒ वाचं॑  
मन॑सा॒ उपा॑सताम्। इन्द्रः॒ सूरौ॑ अ॒तर॒द्रजा॑सि। स्रु॒षा स॒पत्ना॒ श्वशु॑रो॒  
ऽयम॑स्तु। अ॒यं शत्रू॑अ॒यतु॑ ज॒र्हृषा॑णः। अ॒यं वाजं॑ ज॒यतु॑ वाज॑सातौ। अ॒ग्निः  
क्षत्र॑भृ॒दनि॑भृष्ट॒मोजः॑। स॒हस्रि॑यो दी॒प्यता॑मप्र॒युच्छन्। वि॒भ्राज॑मानः॒ समि॑धा॒ न  
उ॒ग्रः। आ॒न्तरि॑क्षम॒रुह॑द॒गन्ध्याम्॥६२॥

धारयन्सुरोडाशं बृहस्पतिं जघनं च्युतिमानन्दो भगस्य तृप्याण्यग्नेः पृथिवी यज्वन एतु  
प्रदिशश्चतस्रो वाजंसातौ चत्वारि च॥

[६]

वृषा॑ऽस्य॒ शुर्वृष॑भाय॒ गृह्य॑से। वृषा॒ऽयमु॑ग्रो नृचक्ष॑से। दि॒व्यः क॑र्म॒ण्यो हि॒तो  
बृ॒हन्नाम॑। वृष॒भस्य॒ या क॑कुत्। वि॒षूवान् वि॑ष्णो भवतु। अ॒यं यो मा॑म॒को वृषा॑।  
अथो॑ इन्द्र॑ इव दे॒वेभ्यः॑। वि ब्र॑वीतु जने॑भ्यः। आयु॑ष्मन्तं व॒र्चस्व॑न्तम्। अथो॑  
अधि॑पतिं वि॒शाम्॥६३॥

अस्याः पृथिव्या अध्यक्षम्। इममिन्द्र वृषभं कृणु। यः सुशृङ्गः सुवृषभः।  
 कल्याणो द्रोण आहितः। कार्षीवल प्रगाणेन। वृषभेण यजामहे। वृषभेण  
 यजमानाः। अक्रूरेणेव सर्पिषा। मृद्धश्च सर्वा इन्द्रेण। पृतनाश्च जयामसि॥६४॥

यस्यायमृषभो हविः। इन्द्राय परिणीयते। जयाति शत्रुमायन्तम्। अथो हन्ति  
 पृतन्यतः। नृणामहं प्रणीरसत्। अग्रं उद्भिन्दतामसत्। इन्द्र शुष्मं तनुवा मेरयस्व।  
 नीचा विश्वा अभितिष्ठाभिमांतीः। नि शृणीह्याबाधं यो नो अस्ति। उरुं नो लोकं  
 कृणुहि जीरदानो॥६५॥

प्रेह्यभि प्रेहि प्र भरा सहस्व। मा विवेनो वि शृणुष्व। जनैषु। उदीडितो वृषभ  
 तिष्ठ शुष्मैः। इन्द्र शत्रून्पुरो अस्माकं युध्य। अग्रे जेता त्वं जय। शत्रून्सहस्र  
 ओजसा। वि शत्रून् विमृधो नुद। एतं ते स्तोमं तुविजात विप्रः। रथं न धीरः  
 स्वपा अतक्षम्। यदीदग्रे प्रतित्वं देव हर्याः॥६६॥

सुवर्वतीरूप एना जयेम। यो घृतेनाभिमानितः। इन्द्र जैत्राय जज्ञिषे। स नः

सङ्कांसु पारय। पृतनासाह्येषु च। इन्द्रो जिगाय पृथिवीम्। अन्तरिक्षं सुवर्महत्।  
वृत्रहा पुरुचेतनः। इन्द्रो जिगाय सहसा सहांसि। इन्द्रो जिगाय पृतनानि  
विश्वान्॥६७॥

इन्द्रो जातो वि पुरो रुरोज। स नः परस्पा वरिवः कृणोतु। अयं कृत्तुरगृभीतः।  
विश्वजिदुद्भिदिथ्सोमः। ऋषिर्विप्रः काव्येन। वायुरग्रेगा यज्ञप्रीः। साकङ्गन्मनसा  
यज्ञम्। शिवो नियुद्धिः शिवाभिः। वायो शुक्रो अयामि ते। मध्वो अग्रं  
दिविष्टिषु॥६८॥

आ याहि सोम पीतये। स्वारुहो देव नियुत्वता। इममिन्द्र वर्धय क्षत्रियाणाम्।  
अयं विशां विशपतिरस्तु राजा। अस्मा इन्द्र महि वर्चांसि धेहि। अवर्चसं कणुहि  
शत्रुमस्य। इममा भञ्ज ग्रामे अश्वेषु गोषु। निर्मुं भञ्ज योऽमित्रो अस्य। वर्ष्मन्  
क्षत्रस्य ककुभि श्रयस्व। ततो न उग्रो वि भञ्जा वसूनि॥६९॥

अस्मे द्यावापृथिवी भूरि वामम्। सन्दुहाथां घर्मदुधेव धेनुः। अयं राजा प्रिय

इन्द्रस्य भूयात्। प्रियो गवामोषधीनामुतापाम्। युनज्मिं त उत्तरावन्तमिन्द्रम्।  
येन जयांसि न परा जयांसै। स त्वाऽकरेकवृषभः स्वानाम्। अथो राजन्नुत्तमं  
मानवानाम्। उत्तरस्त्वमधरे ते सपत्नाः। एकवृषा इन्द्रसखा जिगीवान्॥७०॥

विश्वा आशाः पृतनाः सञ्जयं जयन्। अभि तिष्ठ शत्रूयतः सहस्व। तुभ्यं भरन्ति  
क्षितयो यविष्ठ। बलिमग्ने अन्तित ओत दूरात्। आ भन्दिष्ठस्य सुमतिं चिकिद्धि।  
बृहत्ते अग्ने महि शर्म भद्रम्। यो देह्यो अनमयद्वधस्त्रैः। यो अर्यपत्नीरुषसंश्चकार।  
स निरुध्या नहुषो यहो अग्निः। विशश्चक्रे बलिहतः सहोभिः॥७१॥

प्र सद्यो अग्ने अत्येष्यन्यान्। आविर्यस्मै चारुतरो बभूथ। ईडेन्यो वपुष्यो  
विभावा। प्रियो विशामतिथिर्मानुषीणाम्। ब्रह्मज्येष्ठा वीर्या सम्भृतानि। ब्रह्माग्ने  
ज्येष्ठं दिवमा ततान। ऋतस्य ब्रह्म प्रथमोत जज्ञे। तेनारहति ब्रह्मणा स्पर्धितुङ्कः।  
ब्रह्म स्रुचो घृतवतीः। ब्रह्मणा स्वरवो मिताः॥७२॥

ब्रह्म यज्ञस्य तन्तवः। ऋत्विजो ये हविष्कृतः। शृङ्गाणीवेच्छृङ्गिणाः सन्ददृश्रिरे।

च॒षाल॑वन्तः स्वर॑वः पृथि॒व्याम्। ते दे॒वासः स्वर॑वस्तस्थि॒वाꣳसः। नमः॑ सखि॒भ्यः  
 स॒न्नान्माऽव॑गात। अ॒भिभूर॑ग्निर॒तर॑द्रजाꣳसि। स्पृ॒धो वि॒हत्य॑ पृ॒तना॑ अ॒भि॒श्रीः।  
 जु॒षा॒णो म॒ आहु॑तिं मा॒महि॑ष्ट। ह॒त्वा स॒पत्नान्॑ वरि॒वस्कर॑न्नः। ईशा॑नं त्वा  
 भुव॑नानाम॒भि॒श्रिय॑म्। स्तौम्य॑ग्न उरु॒कृत॑ꣳ सु॒वीर॑म्। ह॒विर्जु॑षा॒णः स॒पत्नाꣳ  
 अ॒भिभूर॑सि। ज॒हि शत्रूꣳ रप॑ मृ॒धो नुद॑स्व॥ ७३ ॥ वि॒शां जं॒याम॑सि जी॒रदानो॑ ह॒र्या वि॒श्वा दि॒र्विष्टि॑षु व॒सूनि  
 जिगी॒वान्म॒होभि॑र्मिता न॒श्चत्वा॑रि च॥ [७]

स प्र॒त्नव॑न्नवी॒यसा॑। अ॒ग्ने द्यु॒म्नेन॑ सं॒यता॑। बृ॒हत्त॑तन्थ भा॒नुना॑। नव॑ं नु स्तोम॑म॒ग्नये॑।  
 दि॒वः श्ये॑नाय॑ जी॒जन॑म्। वसोः॑ कु॒विद्व॑नाति॑ नः। स्वा॒रुहा॑ यस्य॒ श्रियो॑ दृ॒शे।  
 र॒यिर्वी॒रव॑तो यथा। अ॒ग्ने य॒ज्ञस्य॑ चे॒ततः॑। अदा॑भ्यः पु॒रए॒ता॥ ७४ ॥

अ॒ग्निर्वि॑शां मा॒नु॒षीणा॑म्। तूर्णी॑ रथः सदा॒ नवः॑। नव॑ꣳ सोमा॑य वा॒जिने॑। आ॒ज्यं  
 पय॑सोऽज॒नि। जुष्ट॑ꣳ शुचि॑तमं व॒सु। नव॑ꣳ सोम॒ जुष॑स्व नः। पी॒यूष॑स्येह तृ॒ष्णुहि॑।  
 यस्ते॑ भा॒ग ऋ॒ता व॒यम्। नव॑स्य सोम॒ ते व॒यम्। आ सु॑म॒तिं वृ॑णीमहे॥ ७५ ॥

स नो॑ रास्व स॒हस्रि॑णः। नव॑ꣳ ह॒विर्जु॑षस्व नः। ऋ॒तुभिः॑ सोम॒ भूत॑मम्।



तदङ्गं प्रतिहयं नः। राजन्त्सोम स्वस्तये। नवस्तोमन्नव हविः। इन्द्राग्निभ्यां  
नि वेदय। तज्जुषेता सचेतसा। शुचिं नु स्तोमं नवजातमद्य। इन्द्राग्नी वृत्रहणा  
जुषेथाम्॥ ७६॥

उभा हि वा स॑ सुहवा॒ जोह॑वीमि। ता वाज॑ स॒द्य उ॑शते धेष्ठा। अ॒ग्निरिन्द्रो॒  
नव॑स्य नः। अस्य ह॒व्यस्य॑ तृप्यताम्। इ॒ह दे॒वौ स॑हस्रिणौ। य॒ज्ञं न॒ आ हि  
गच्छ॑ताम्। वसु॑मन्त॑ सुव॒र्विदम्। अ॒स्य ह॒व्यस्य॑ तृप्यताम्। अ॒ग्निरिन्द्रो॒ नव॑स्य  
नः। विश्वा॑न्दे॒वा स्त॑र्पयत॥ ७७॥

ह॒विषो॒ऽस्य नव॑स्य नः। सुव॒र्विदो॒ हि ज॑ज्ञिरे। ए॒दं ब॒रुहिः॒ सुष्ट॑रीमा॒ नवे॑न। अ॒यं  
य॒ज्ञो य॑जमानस्य भा॒गः। अ॒यं ब॑भूव भुव॑नस्य॒ गर्भः॑। वि॒श्वे दे॒वा इ॒दम॑द्यागमि॒ष्टाः।  
इ॒मे नु॒ द्यावा॑पृथि॒वी स॒मीची॑। त॒न्वाने॒ य॒ज्ञं पु॑रु॒पेश॑सन्धिया। आ॒ऽस्मै पृ॑णीतां  
भुव॑नानि॒ विश्वा॑। प्र॒जां पु॑ष्टि॒ममृतं॒ नवे॑न॥ ७८॥

इ॒मे धे॒नू अ॒मृतं॒ ये दु॒हाते॑। पय॑स्वत्युत्तरामे॒तु पु॑ष्टिः। इ॒मं य॒ज्ञं जु॑षमा॒णे नवे॑न।

समीची द्यावापृथिवी घृताचीं। यविष्ठो हव्यवाहनः। चित्रभानुर्घृतासुतिः। नवजातो  
वि रोचसे। अग्रे तत्ते महित्वनम्। त्वमग्रे देवताभ्यः। भागे देव न मीयसे॥७९॥

स एना विद्वान् यक्ष्यसि। नवः स्तोमं जुषस्व नः। अग्निः प्रथमः प्राश्नातु। स  
हि वेद यथा हविः। शिवा अस्मभ्यमोषधीः। कृणोतु विश्वचर्षणिः। भद्रान्नः श्रेयः  
समनैष्ट देवाः। त्वयाऽवसेन समशीमहि त्वा। स नो मयोभूः पितो आ विशस्व। शं  
तोकाय तनुवे स्योनः। एतमु त्यं मधुना संयुतं यवम्। सरस्वत्या अधिमनावचर्कषुः।  
इन्द्र आसीत्सीरपतिः शतक्रतुः। कीनाशा आसन्मरुतः सुदानवः॥८०॥

पुरुरता वृणीमहे

जुषथान्तर्पयतामृतत्रवेन मीयसे स्योनश्चत्वारि च॥

[८]

जुष्टश्चक्षुषो जुष्टीनरो नक्तञ्जाता वृषास उत नो वृषाँऽस्यः सप्रब्रवदष्टौ॥८॥

जुष्टो मन्युर्भगो जुष्टी नरो हरिवर्षसङ्घिः शिप्रिन्वाजानामुत नः प्रिया यद्वाग्वदन्तो विश्वा आशा अशीतिः॥८०॥

जुष्टः सुदानवः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके चतुर्थः प्रपाठकः समाप्तः॥

॥ पञ्चमः प्रश्नः ॥

॥ तैत्तिरीयब्राह्मणे द्वितीयाष्टके पञ्चमः प्रपाठकः ॥

प्रा॒णो र॑क्षति॒ विश्व॑मेज॑त्। इ॒र्यो भू॑त्वा ब॑हुधा ब॒हूनि॑। स इ॒त्सर्वं॑ व्या॑नशे। यो  
 दे॒वो दे॒वेषु॑ वि॒भूर॑न्तः। आ॒वृ॒द॒दात् क्षे॑त्रिय॑ध्व॒गद्व॑षा॑। तमि॒त्प्रा॑णं म॒न॒सोप॑ शिक्ष॒त।  
 अ॒ग्रं दे॒वाना॑मि॒दम॑त्तु नो ह॒विः। म॒न॒स॒श्चित्ते॒दम्। भू॒तं भ॑व्यं च गु॒प्यते। तद्धि  
 दे॒वेष्व॑ग्रि॒यम्॥१॥

आ न॑ ए॒तु पुर॑श्च॒रम्। स॒ह दे॒वैरि॒म॑ ह॒वम्। म॒नः श्रेय॑सि॒श्रेय॑सि। क॒र्मन् य॒ज्ञप॑तिं  
 दध॑त्। जु॒षता॑ मे॒ वा॒गि॒द॑ ह॒विः। वि॒रा॒ड्वी पुरो॑हि॒ता। ह॒व्य॒वाड॑न॒पायि॑नी।  
 यया॑ रू॒पाणि॑ बहु॒धा व॑द॒न्ति। पे॒शा॑सि॒ दे॒वाः प॑र॒मे ज॒नित्रे॑। सा नो॑  
 वि॒राड॑न॒पस्फु॑रन्ती॥२॥

वा॒ग्दे॒वी जु॑षतामि॒द॑ ह॒विः। चक्षु॑र्दे॒वाना॑ ज्योति॑र॒मृते॒ न्य॑क्तम्। अ॒स्य वि॒ज्ञाना॑य  
 बहु॒धा नि॒धी॑यते। तस्य॑ सु॒म्रम॑शीमहि। मा नो॑ हा॒सीद्वि॒चक्ष॑णम्। आ॒युरि॒न्नः

प्रतीर्यताम्। अनन्धाश्चक्षुषा वयम्। जीवा ज्योतिरशीमहि। सुवज्योतिरुतामृतम्।  
 श्रोत्रेण भद्रमुत शृण्वन्ति सत्यम्। श्रोत्रेण वाचं बहुधोद्यमानाम्। श्रोत्रेण मोदश्च  
 महश्च श्रूयते। श्रोत्रेण सर्वा दिश आ शृणोमि। येन प्राच्या उत दक्षिणा।  
 प्रतीच्यै दिशः शृण्वन्त्युत्तरात्। तदिच्छोत्रं बहुधोद्यमानम्। अरान्न नेमिः परि सर्वं  
 बभूव॥ ३॥ अग्निमनंपस्फुरन्ती सत्यं सप्त च॥ [१]

उदेहि वाजिन्यो अस्यपस्वन्तः। इदं राष्ट्रमा विश सूनृतावत्। यो रोहितो  
 विश्वमिदं जजान। स नो राष्ट्रेषु सुधितान्दधातु। रोहं रोहं रोहित आरुरोह।  
 प्रजाभिर्वृद्धिं जनुषामुपस्थम्। ताभिः स रब्धो अविदथ्यदुर्वीः। गातुं प्रपश्यन्निह  
 राष्ट्रमाऽहः। आऽहार्षीद्राष्ट्रमिह रोहितः। मृधो व्यास्थदभयं नो अस्तु॥ ४॥

अस्मभ्यं द्यावापृथिवी शक्करीभिः। राष्ट्रं दुहाथामिह रेवतीभिः। विममर्श रोहितो  
 विश्वरूपः। समाचक्राणः प्ररुहो रुहश्च। दिवं गत्वाय महता महिम्ना। वि नो  
 राष्ट्रमुनत्तु पर्यसा स्वेन। यास्ते विशस्तपसा सं बभूवुः। गायत्रं वथ्समनु तास्त

आऽगुः। तास्त्वा विंशन्तु महंसा स्वेन। सं माता पुत्रो अभ्येतु रोहितः॥५॥

यूयमुग्रा मरुतः पृश्निमातरः। इन्द्रेण सयुजा प्रमृणीथ शत्रून्। आ वो रोहितो  
अशृणोदभिद्यवः। त्रिसंतासो मरुतः स्वादुसम्मदः। रोहितो द्यावापृथिवी जंजान।  
तस्मिंस्तन्तुं परमेष्ठी तंतान। तस्मिंञ्छिश्रिये अज एकपात्। अदृहद्द्यावापृथिवी  
बलेन। रोहितो द्यावापृथिवी अदृहत्। तेन सुवः स्तभितन्तेन नाकः॥६॥

सो अन्तरिक्षे रजंसो विमानः। तेन देवाः सुवरन्वविन्दन्। सुशेवं त्वा भानवो  
दीदिवांसम्। समंग्रासो जुह्वो जातवेदः। उक्षन्ति त्वा वाजिनमा घृतेन।  
संसमग्रे युवसे भोजनानि। अग्रे शर्धं महते सौभगाय। तवं द्युमन्युत्तमानि  
सन्तु। सञ्जास्पत्यं सुयममा कृणुष्व। शत्रूयतामभि तिष्ठा महांसि॥७॥

अस्वेतु रोहितो

नाको महांसि॥

[२]

पुनर्न इन्द्रो मघवा ददातु। धनानि शक्रो धन्यः सुराधाः। अर्वाचीनं कृणुतां  
याचितो मनः। श्रुष्टी नो अस्य हविषो जुषाणः। यानि नोऽजिनं धनानि। जुहर्थ

शूर॑ म॒न्युना॑। इन्द्रा॑नु॒विन्द॑ न॒स्तानि॑। अ॒नेन॑ ह॒विषा॑ पुनः॑। इन्द्र॑ आशा॑भ्यः परि॑।  
सर्वा॑भ्योऽभयं॑ करत्॥८॥

जेता॑ शत्रून् विच॑र्षणिः। आकू॑त्यै त्वा॒ कामा॑य त्वा स॒मृधे॑ त्वा। पुरो॑ द॒धे  
अमृ॑त॒त्वाय॑ जी॒वसे॑। आकू॑तिम॒स्याव॑से। काम॑मस्य॒ समृ॑द्धौ। इन्द्र॑स्य यु॒ञ्जते॑ धियः॑।  
आकू॑तिं दे॒वीं मन॑सः पुरो॑ द॒धे। य॒ज्ञस्य॑ मा॒ता सु॒हवा॑ मे अस्तु। यदि॑च्छामि॒ मन॑सा॒  
सका॑मः। वि॒देय॑मेन॒द्धृद॑ये निवि॑ष्टम्॥९॥

सेद॑ग्निर॒ग्नी॒रत्ये॑त्य॒न्यान्। यत्र॑ वा॒जी तन॑यो वी॒डुपा॑णिः। स॒हस्र॑पाथा अ॒क्षरा॑  
स॒मेति॑। आशा॑नां त्वाऽऽशा॑पा॒लेभ्यः॑। च॒तुर्भ्यो॑ अ॒मृते॑भ्यः। इ॒दं भू॑तस्याध्य॑क्षेभ्यः।  
वि॒धेम॑ ह॒विषा॑ व॒यम्। विश्वा॑ आशा॒ मधु॑ना॒ स॒ सृ॑जामि। अ॒न॒मी॒वा आप॑ ओष॑धयो  
भवन्तु। अ॒यं यज॑मानो मृ॒धो व्य॑स्यताम्॥१०॥

अगृ॑भीताः प॒शवः॑ सन्तु॒ सर्वे॑। अ॒ग्निः सोमो॑ वरु॒णो मि॒त्र इन्द्रः॑। बृह॑स्पतिः सवि॒ता  
यः स॑ह॒स्री। पू॒षा नो॑ गोभि॒रव॑सा॒ सर॑स्वती। त्वष्टा॑ रू॒पाणि॑ सम॑नक्तु॒ यज्ञैः॑। त्वष्टा॑

रूपाणि दधती सरस्वती। पूषा भगं सविता नो ददातु। बृहस्पतिर्दददिन्द्रः  
सहस्रम्। मित्रो दाता वरुणः सोमो अग्निः॥११॥ कृत्रिर्विष्टमस्यतात्रव च॥ [३]

आ नो भर भगमिन्द्र द्युमन्तम्। नि ते देष्णस्य धीमहि प्ररेके। उर्व इव पप्रथे  
कामो अस्मे। तमापृणा वसुपते वसूनाम्। इमं कामं मन्दया गोभिरश्वैः। चन्द्रवंता  
राधसा पप्रथश्च। सुवयवो मतिभिस्तुभ्यं विप्राः। इन्द्राय वाहः कुशिकासो अक्रन्।  
इन्द्रस्य नु वीर्याणि प्रवोचम्। यानि चकार प्रथमानि वज्री॥१२॥

अहन्नहिमन्वपस्तर्द। प्रवक्षणा अभिनत्पर्वतानाम्। अहन्नहिं पर्वते  
शिश्रियाणम्। त्वष्टाऽस्मै वज्रं स्वयन्ततक्ष। वाश्रा इव धेनवः स्यन्दमानाः।  
अञ्जः समुद्रमव जग्मुरापे। वृषायमाणोऽवृणीत सोमम्। त्रिकद्रुकेष्वपिबथ्सुतस्य।  
आ सायकं मघवा दत्त वज्रम्। अहन्नेनं प्रथमजा महीनाम्॥१३॥

यदिन्द्राहन्प्रथमजा महीनाम्। आन्मायिनाममिनाः प्रोत मायाः। आत्सूर्य  
जनयन्द्यामुषासम्। तादीक्रा शत्रून् किलाविविथ्से। अहन्वृत्रं वृत्रतरं व्यसम्।

इन्द्रो वज्रेण महता वधेन। स्कन्धांसीव कुलिशेनाविवृक्णा। अहिः शयत  
उपपृक्पृथिव्याम्। अयोध्येव दुर्मद आ हि जुह्वे। महावीरं तुविबाधमृजीषम्॥१४॥

नातांरीरस्य समृतिं वधानाम्। स रुजानाः पिपिषु इन्द्रशत्रुः। विश्वो विहाया  
अरतिः। वसुर्दधे हस्ते दक्षिणे। तरणिर्न शिश्रथत्। श्रवस्यया न शिश्रथत्।  
विश्वस्मा इदिषुध्यसे। देवत्रा हव्यमूहिषे। विश्वस्मा इत्सुकृते वारमृण्वति।  
अग्निद्वारा व्यृण्वति॥१५॥

उदुञ्जिहानो अभि काममीरयन्। प्रपृश्नन्विश्वा भुवनानि पूर्वथा। आ केतुना  
सुषमिद्धो यजिष्ठः। कामं नो अग्ने अभिहर्य दिग्भ्यः। जुषाणो हव्यममृतेषु  
दृढ्यः। आ नो रयिं बहुलां गोमतीमिषम्। नि धेहि यक्षदमृतेषु भूषन्। अश्विना  
यज्ञमार्गतम्। दाशुषः पुरुदंससा। पूषा रक्षतु नो रयिम्॥१६॥

इमं यज्ञमश्विना वर्धयन्ता। इमौ रयिं यजमानाय धत्तम्। इमौ पशून् रक्षतां  
विश्वतो नः। पूषा नः पातु सदमप्रयच्छन्। प्रते महे सरस्वति। सुभगे वाजिनीवति।



स॒त्य॒वाचै॑ भ॒रे म॒तिम्। इ॒दं ते॑ ह॒व्यं घृ॒तव॑त्सरस्वति। स॒त्य॒वाचे॑ प्रभ॒रेमा॑ ह॒वीꣳषि॑।  
 इ॒मानि॑ ते दुरि॒ता सौ॑भ॒गानि॑। तेभि॑र्व॒यꣳ सु॒भगा॑सः स्याम॥१७॥ व॒ज्र॒ह्नीना॑मृ॒जोषं॑ व्य॒ण्वति॑ रक्षतु  
 नो र॒यिꣳ सौ॑भ॒गान्येकं॑ च॥

[४]

य॒ज्ञो रा॒यो य॒ज्ञ ई॒शे व॑सूनाम्। य॒ज्ञः स॒स्याना॑मु॒त सु॑क्षितीनाम्। य॒ज्ञ इ॒ष्टः  
 पू॒र्वचि॑त्तिं दधातु। य॒ज्ञो ब्र॑ह्म॒ण्वाꣳ अ॒प्येतु॑ दे॒वान्। अ॒यं य॒ज्ञो व॑र्धतां गोभि॒रश्वैः॑।  
 इ॒यं वेदिः॑ स्वप॒त्या सु॑वीरा। इ॒दं ब॒र्हिर॑ति ब॒र्हीꣳष्य॑न्या। इ॒मं य॒ज्ञं वि॒श्वे अव॑न्तु  
 दे॒वाः। भ॒ग ए॒व भ॒गवाꣳ अ॑स्तु दे॒वाः। तेन॑ व॒यं भ॒गव॑न्तः स्याम॥१८॥

तं त्वा॑ भ॒ग सर्व॑ इ॒ज्जो॑हवीमि। स नो॑ भ॒ग पु॒रए॒ता भ॑वेह। भ॒ग प्र॒णेत॑र्भ॒ग  
 स॒त्य॑राधः। भ॒गेमां॑ धि॒यमु॑द॒व द॑दन्नः। भ॒ग प्र॒णो ज॑नय गोभि॒रश्वैः॑। भ॒ग प्र॒  
 नृभि॑र्नृ॒वन्तः॑ स्याम। शश्व॑तीः समा॒ उप॑यन्ति लो॒काः। शश्व॑तीः समा॒ उप॑यन्त्यापः।  
 इ॒ष्टं पू॒र्तꣳ शश्व॑तीनाꣳ समा॑नाꣳ शाश्व॑तेन। ह॒विषे॑ष्वाऽन॒न्तं लो॒कं प॒रमा॑ रु॒रोह॑॥१९॥

इ॒यमे॒व सा॒ या प्र॑थ॒मा व्यो॑च्छत्। सा रू॒पाणि॑ कुरुते पञ्च दे॒वी। द्वे स्व॑सा॒रौ  
 व॒यत॑स्तन्नमे॒तत्। स॒ना॒तनं॑ वि॒त॑त्ꣳ ष॒ण्म॑यू॒खम्। अ॒वा॒न्याꣳस्त॑न्तू॒न्कि॒रतो॑ ध॒त्तो

अन्यान्। नावंपृज्याते न गमाते अन्तम्। आ वो यन्तूदवाहासो अद्य। वृष्टिं  
ये विश्वे मरुतो जुनन्ति। अयं यो अग्निर्मरुतः समिद्धः। एतं जुषध्वं कवयो  
युवानः॥२०॥

धारावरा मरुतो धृष्णुवोजसः। मृगा न भीमास्तविषेभिरूमिभिः। अग्नयो न  
शुशुचाना ऋजीषिणः। भूमिन्धमन्त उप गा अवृण्वत। वि चक्रमे त्रिर्देवः। आ  
वेधसं नीलपृष्ठं बृहन्तम्। बृहस्पतिः स दने सादयध्वम्। सादद्यौनिं दम् आ  
दीदिवांसम्। हिरण्यवर्णमरुषः संपेम। स हि शुचिः शतपत्रः स शुन्ध्युः॥२१॥

हिरण्यवाशीरिषिरः सुवर्षाः। बृहस्पतिः स स्वावेश ऋष्याः। पूरू सखिभ्य  
आसुतिं करिष्ठः। पूषः स्तवं व्रते वयम्। नरिष्येम कदाचन। स्तोतारस्त इह  
स्मसि। यास्ते पूषन्ना वो अन्तः समुद्रे। हिरण्ययीरन्तरिक्षे चरन्ति। याभिर्यासि  
दूत्याः सूर्यस्य। कामेन कृतश्रवं इच्छमानः॥२२॥

अरण्यान्यरण्यान्यसौ। या प्रेव नश्यसि। कथा ग्रामं न पृच्छसि। न त्वाभीरिव

विन्दती (३)। वृषा॒वाय॒ वद॑ते। यदु॒पाव॑न्ति चिच्चि॒कः। आ॒घा॒टीभि॑रिव धा॒वयन्।  
अ॒र॒ण्या॒निर्म॑हीयते। उ॒त गा॑वं इ॒वा॒दन्। उ॒तो वे॑श्मे॒व दृ॑श्यते॥२३॥

उ॒तो अ॑र॒ण्या॒निः सा॒यम्। श॒क॒टीरि॑व स॒र्ज॑ति। गा॒मङ्गै॑ष आ ह॒य॑ति।  
दा॒र्वङ्गै॑ष उ॒पा॑वधीत्। वस॑न्नर॒ण्या॒न्यां॑ सा॒यम्। अ॒क्रु॒क्ष॒दि॒तिं म॑न्यते। न वा  
अ॑र॒ण्या॒निर्ह॑न्ति। अ॒न्यश्चे॒न्नाभि॑गच्छ॒ति। स्वा॑दोः फ॒ल॑स्य ज॒ग्ध्वा। यत्र॑ का॒मं नि॑  
प॑द्यते। आ॒ञ्जन॑गन्धी॑ सु॒भीम्। ब॒हू॒न्नाम॑कृ॒षी॒वला॑म्। प्रा॒हं मृ॒गाणां॑ मा॒तर॑म्।  
अ॒र॒ण्या॒नीम॑श॑सिषम्॥२४॥ स्या॒म क॒रो॒ह यु॒वानः शु॒न्य॒रि॒च्छ॒मा॒नो दृ॑श्यते नि॒प॒द्यते च॒त्वारि॑ च॥ [५]

वा॒त्र॒ह॒त्याय॒ शव॑से। पृ॒त॒ना॒सा॒ह्याय॒ च। इन्द्र॒ त्वा व॑र्तयाम॒सि। सु॒ब्र॒ह्मा॒णं वी॒र॒वंतं॑  
बृ॒ह॒न्त॑म्। उ॒रुं ग॑भी॒रं पृ॑थु॒बु॒ध॒मिन्द्र॑। श्रु॒त॒र्षि॒मु॒ग्र॒म॒भि॒मा॒ति॒षा॒ह॒म्। अ॒स्मभ्य॑ चि॒त्रं  
वृ॒ष॒णं॑ र॒यिं दा॑ः। क्षे॒त्रि॒यै त्वा॒ नि॒र॒ऋ॒त्यै त्वा॑। द्रु॒हो मु॑ञ्चामि॒ वरु॑णस्य॒ पाशा॑त्।  
अ॒ना॒ग॒सं ब्र॑ह्म॒णे त्वा॒ करो॑मि॥२५॥

शि॒वे ते॒ द्या॒वा॑पृथि॒वी उ॒भे इ॒मे। शं ते॑ अ॒ग्निः स॒हा॒द्विर॑स्तु। शं द्या॒वा॑पृथि॒वी

स॒होष॑धीभिः। श॒म॒न्तरि॑क्षः स॒ह वा॑तेन ते। शं ते च॒त॒स्रः प्र॒दिशो॑ भवन्तु। या  
 दै॒वीश्च॑त॒स्रः प्र॒दिशः॑। वा॒त॒प॒त्नीर॑भि॒ सूर्यो॑ विच॒ष्टे। तासां॑ त्वा ज॒र॒स आ॑ द॒धामि॑।  
 प्र यक्ष्मं॑ ए॒तु निर्ऋ॑तिं परा॒चैः। अ॒मोचि॑ यक्ष्मा॑द्दु॒रिता॑दव॒त्यै॥ २६॥

द्रु॒हः पाशा॑न्नि॒र्ऋत्यै॑ चोद॑मोचि। अ॒हा अव॑र्ति॒मवि॑द॒थ्स्यो॒नम्। अप्य॑भूद्ब॒द्रे  
 सु॒कृ॒तस्य॑ लो॒के। सूर्य॑मृ॒तं तम॑सो॒ ग्राह्या॑ यत्। दे॒वा अ॒मुश्च॑न्न॒सृज॑न्व्ये॒नसः॑।  
 ए॒वम॒हमि॑मं क्षै॒त्रिया॑ज्जामि॒शः॒सात्। द्रु॒हो मु॑श्चामि॒ वरु॑णस्य॒ पाशा॑त्। बृ॒हस्प॑ते  
 यु॒वमिन्द्र॑श्च॒ वस्वः॑। दि॒व्यस्यै॑शा॒थे उ॒त पा॑रि॒थिव॑स्य। ध॒त्तः र॒यिः स्तु॑व॒ते  
 की॒रये॑चित्॥ २७॥

यू॒यं पा॑त स्व॒स्तिभिः॑ सदा॑ नः। दे॒वायु॑ध॒मिन्द्र॑मा जो॒हु॒वानाः॑। वि॒श्वावृ॑ध॒मभि॑ ये  
 रक्ष॑माणाः। येन॑ ह॒ता दी॒र्घम॑ध्वा॒नमा॑यन्। अ॒न॒न्तम॑र्थ॒मनि॑व॒थ्स्यमा॑नाः। यत्ते॑ सु॒जा॒ते  
 हि॒मव॑थ्सु भेष॒जम्। म॒योभूः॑ श॒न्त॑मा॒ यद्धृ॑दोऽसि॑। ततो॑ नो दे॒हि सी॑बले। अ॒दो  
 गि॒रिभ्यो॑ अ॒धि यत्प्र॑धाव॑सि। स॒शो॒भ॑मा॒ना क॒न्ये॑व शु॒भ्रे॥ २८॥

तां त्वा मुद्रंला ह॒विषा॑ वर्धयन्ति। सा नः॑ सी॒बले॑ र॒यिमा॑ भा॒जये॒ह। पूर्वं  
 दे॒वा अप॑रेणानुपश्यं॒ जन्म॑भिः। जन्मा॒न्यव॑रैः परा॑णि। वेदा॑नि दे॒वा अ॒यम॒स्मीति॑  
 माम्। अ॒ह॒५ हि॒त्वा शरी॑रं ज॒रसः॑ प॒रस्ता॑त्। प्रा॒णापा॒नौ चक्षुः॑ श्रोत्रम्। वाचं॑ मन॑सि  
 सम्भृ॑ताम्। हि॒त्वा शरी॑रं ज॒रसः॑ प॒रस्ता॑त्। आ भूतिं॑ भूतिं॑ व॒यम॑श्नवामहे। इ॒मा ए॒व  
 ता उ॒षसो॑ याः प्र॑थ॒मा व्यौच्छन्। ता दे॒व्यः कुर्व॑ते पञ्च॒रूपा। शश्व॑तीर्ना॒वपृ॑ज्यन्ति।  
 न ग॑म॒न्त्यन्त॑म्॥ २९॥ क॒रोम्य॑वर्त्ये चिच्छु॒भ्रेऽश्न॑वामहे च॒त्वारि॑ च॥ [६]

वसू॑नां त्वाऽधी॑तेन। रु॒द्राणा॑मूर्म्या। आ॒दि॒त्यानां॑ तेज॑सा। वि॒श्वेषां॑ दे॒वानां॑  
 ऋ॒तुना॑। म॒रुता॑मे॒म्ना जु॑होमि॒ स्वाहा॑। अ॒भिभू॑तिर॒हमा॑गमम्। इन्द्र॑सखा स्वा॒युधः॑।  
 आस्वा॑शा॒सु दु॒ष्पहः॑। इ॒दं वर्चो॑ अ॒ग्निना॑ द॒त्तमा॑गात्। यशो॑ भर्गः॒ सह॑ ओजो॒ बलं॑  
 च॥ ३०॥

दी॒र्घायु॑त्वाय॑ श॒तशा॑रदाय। प्रति॑गृ॒भ्णामि॑ म॒हते॑ वी॒र्या॑य। आयु॑रसि वि॒श्वायु॑रसि।  
 स॒र्वायु॑रसि॒ सर्व॑मायु॑रसि। सर्वं॑ म॒ आयु॑र्भूयात्। सर्व॑मायु॑र्गेषम्। भूर्भुवः॑ सु॒वः।

अ॒ग्नि॒र्ध॒मे॒णा॒न्ना॒दः। मृ॒त्यु॒र्ध॒मे॒णा॒न्ना॒प॒तिः। ब्र॒ह्म॑ क्ष॒त्रं॑ स्वा॒हा॥३१॥

प्र॒जा॒प॒तिः प्र॒णे॒ता। बृ॒ह॒स्प॒तिः पु॒र॒ण॒ता। य॒मः प॒न्थाः॑। च॒न्द्र॒माः पु॒न॒र॒सुः स्वा॒हा॥  
अ॒ग्नि॒र॒न्ना॒दोऽन्ना॒प॒तिः। अ॒न्ना॒द्य॑म॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥ सो॒मो रा॒जा  
रा॒ज॑प॒तिः। रा॒ज्य॑म॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥ व॒रु॒णः स॒म्राट् स॒म्राट् प॒तिः।  
सा॒म्रा॒ज्य॑म॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥३२॥

मि॒त्रः क्ष॒त्रं क्ष॒त्रप॑तिः। क्ष॒त्रम॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥ इन्द्रो॑ ब॒लं  
ब॒ल॑प॒तिः। ब॒ल॑म॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥ बृ॒ह॒स्प॒तिर्ब्र॒ह्म ब्र॒ह्म॑प॒तिः।  
ब्र॒ह्मा॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा॥ स॒वि॒ता रा॒ष्ट्रं॑ रा॒ष्ट्रप॑तिः। रा॒ष्ट्रम॒स्मिन्  
य॒ज्ञे य॒ज॑मा॒नाय॑ द॒दातु॑ स्वा॒हा॥ पू॒षा वि॒शां वि॒द॑तिः। वि॒शंम॒स्मिन् य॒ज्ञे य॒ज॑मा॒नाय॑  
द॒दातु॑ स्वा॒हा॥ सर॑स्व॒ती पु॒ष्टिः पु॒ष्टि॑प॒ती। पु॒ष्टि॑म॒स्मिन् य॒ज्ञे य॒ज॑मा॒नाय॑ द॒दातु॑  
स्वा॒हा॥ त्व॒ष्टा प॒शूनां॑ मि॒थु॒नानां॑ रू॒प॒कृ॒द्रूप॑प॒तिः। रू॒पे॒णा॒स्मिन् य॒ज्ञे य॒ज॑मा॒नाय॑  
प॒शून् द॑दातु स्वा॒हा॥३३॥ च॒ स्वा॒हा सा॒म्रा॒ज्य॑म॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा वि॒शंम॒स्मिन् य॒ज्ञे य॒ज॑मा॒नाय॑ द॒दातु॑ स्वा॒हा च॒त्वारि॑

च (अ॒ग्निः सो॒मो व॒रु॒णो मि॒त्र इन्द्रो॑ बृ॒ह॒स्प॒तिः स॒वि॒ता पू॒षा सर॑स्व॒ती त्व॒ष्टा द॒शं॥)।

स ईं पाहि॒ य ऋ॑जी॒षी तरु॑त्रः। यः शि॒प्र॒वान्वृ॑ष॒भो यो म॑ती॒नाम्। यो  
गो॑त्र॒भिद्व॑ज्र॒भृद्यो ह॑रि॒ष्ठाः। स इन्द्र॑ चि॒त्रा॒ः अ॒भि तृ॑न्धि॒ वाजा॑न्। आ ते शु॒ष्मो  
वृष॑भ ए॒तु प॒श्चात्। ओत्त॑राद॒धरा॑गा पु॒रस्ता॑त्। आ वि॒श्वतो॑ अ॒भिस॑मे॒त्वर्वा॑ङ्। इन्द्र॑  
द्यु॒म्नः सु॑र्व॒वद्वेह्य॑स्मे। प्रोष्व॑स्मै पु॒रोर॑थम्। इन्द्रा॑य शूष॒मर्च॑त॥ ३४॥

अ॒भीके॑ चिदु॒ लोक॑कृत्। स॒ङ्गे स॒मथ्सु॑ वृ॒त्रहा॑। अ॒स्माकं॑ बोधि॒ चोदि॑ता।  
नभ॑न्तामन्य॒केषा॑म्। ज्या॒का अ॒धि ध॑न्व॒सु। इन्द्र॑ व॒यः शु॑ना॒सीर॑म्। अ॒स्मिन्  
य॒ज्ञे ह॑वामहे। आ वा॒जैरु॑पं नो ग॒मत्। इन्द्रा॑य शु॒ना॒सीरा॑य। सु॒चा जु॑हुत नो  
ह॒विः॥ ३५॥

जुष॑तां प्रति॒ मेधि॑रः। प्र ह॒व्यानि॑ घृ॒तव॑न्त्यस्मै। हर्य॑श्वाय॒ भर॑ता स॒जोषा॑ः।  
इन्द्र॑र्तुभिर्ब्रह्म॑णा वावृ॒धानः॑। शु॒ना॒सीरी॑ ह॒विरि॑दं जुष॒स्व। वयः॑ सु॒पर्णा॑ उप॒सेदु॑रिन्द्र॒म्।  
प्रि॒यमे॑धा॒ ऋष॑यो॒ नाध॑मानाः। अप॑ ध्वा॒न्तमूर्णु॑हि पू॒र्धि चक्षुः॑। मुमु॑ग्य॒स्मान्नि॒धये॑ऽव  
ब॒द्धान्। बृ॒हदिन्द्रा॑य गाय॒त॥ ३६॥

मरुतो वृत्रहन्तमम्। येन ज्योतिरजनयन्नृतावृधः। देवं देवाय जागृवि।  
 कामिहैकाः क इमे पतङ्गाः। मान्थालाः कुलिपरिमापतन्ति। अनावृतैनान्प्रधमन्तु  
 देवाः। सौपर्णं चक्षुस्तनुवा विदेय। एवा वन्दस्व वरुणं बृहन्तम्।  
 नमस्याधीरममृतस्य गोपाम्। स नः शर्म त्रिवरूथं वियसत्॥३७॥

यूयं पात स्वस्तिभिः सदा नः। नाकं सुपर्णमुप यत्पतन्तम्। हृदा वेनन्तो  
 अभ्यचक्षत त्वा। हिरण्यपक्षं वरुणस्य दूतम्। यमस्य योनौ शकुनं भुरण्युम्। शं  
 नो देवीरभिष्टये। आपो भवन्तु पीतये। शं योरभि स्रवन्तु नः। ईशाना वार्याणाम्।  
 क्षयन्तीश्चर्षणीनाम्॥३८॥

अपो याचामि भेषजम्। अप्सु मे सोमो अब्रवीत्। अन्तर्विश्वानि भेषजा। अग्निं  
 च विश्वशम्भुवम्। आपश्च विश्वभेषजीः। यदप्सु ते सरस्वति। गोष्वश्वेषु यन्मधु।  
 तेन मे वाजिनीवति। मुखमङ्घ्रि सरस्वति। या सरस्वती वैशम्भल्या॥३९॥

तस्यां मे रास्व। तस्यांस्ते भक्षीय। तस्यांस्ते भूयिष्ठभाजो भूयास्म। अहं त्वदस्मि



मदसि त्वमेतत्। ममासि योनिस्तव योनिरस्मि। ममैव सन्वहं हव्यान्यग्ने। पुत्रः  
 पित्रे लोककृज्जातवेदः। इहैव सन्तत्र सन्तं त्वाऽग्ने। प्राणेन वाचा मनसा बिभर्मि।  
 तिरो मा सन्तमायुर्मा प्रहासीत्॥४०॥

ज्योतिषा त्वा वैश्वानरेणोपतिष्ठे। अयं ते योनिर्ऋत्वियः। यतो जातो  
 अरोचथाः। तं जानन्नग्र आरोह। अथा नो वर्धया रयिम्। या ते अग्ने यज्ञियां  
 तनूस्तयेह्यारोहात्माऽऽत्मानम्। अच्छा वसूनि कृण्वन्नस्मे नर्या पुरूणि। यज्ञो  
 भूत्वा यज्ञमा सीद स्वां योनिम्। जातवेदो भुव आ जायमानः सक्षय एहि।  
 उपावरोह जातवेदः पुनस्त्वम्॥४१॥

देवेभ्यो हव्यं वह नः प्रजानन्। आयुः प्रजां रयिम्स्मासु धेहि। अजस्रो  
 दीदिहि नो दुरोणे। तमिन्द्रं जोहवीमि मघवानमुग्रम्। सत्रा दधानमप्रतिष्कुतं  
 शवांसि। मंहिष्ठो गीर्भिरा च यज्ञियोऽववर्तत्। राये नो विश्वा सुपथा कृणोतु  
 वज्री। त्रिकद्रुकेषु महिषो यवाशिरं तुविशुष्मस्तृपत्। सोममपिबद्विष्णुना सुतं यथा-

ऽव॑शत्। स ई॑ ममाद् महि॑ कर्म॒ कर्त॑वे म॒हामु॑रुम्॥४२॥

सैन॑ꣳ स॒श्वदे॒वं दे॒वः स॒त्यमि॑न्दुꣳ स॒त्य इन्द्रः॑। वि॒दद्य॑तीं स॒रमा॑ रु॒ग्णम॑द्रेः।  
महि॑ पाथः॑ पू॒र्व्यꣳ स॒द्विर्य॑क्कः। अग्रं॑ नय॒त्सुप॑द्यक्ष॒राणाम्। अ॒च्छा र॑वं प्रथ॒मा  
जा॑न॒तीगा॑त्। वि॒दद्र॑व्यꣳ स॒रमा॑ दृढमूर्वम्। येना॒नुकं॑ मा॒नुषी॑ भो॒जते॑ विट्। आ  
ये वि॒श्वाः स्व॒प॒त्यानि॑ च॒क्रुः। कृ॒ण्वाना॑सौ अमृ॒त॒त्वाय॑ गा॒तुम्। त्वं नृ॒भिर्नृ॑पते  
दे॒वह॑तौ॥४३॥

भूरी॑णि वृ॒त्वा ह॑र्य॒श्च हꣳसि॑। त्वन्नि॑द॒स्युश्चु॑मु॒रिम्। धुनिं॑ चास्वा॒पयो॑ द॒भीत॑ये  
सु॒हन्तु॑। ए॒वा पा॑हि प्र॒त्नथा॑ म॒न्दतु॑ त्वा। श्रु॒धि ब्र॑ह्म॒ वावृ॑धस्वो॒त गी॒र्भिः। आ॒विः  
सूर्य॑ कृ॒णुहि॑ पी॒पिही॑षः। ज॒हि शत्रू॑ꣳ र॒भि गा॑ इन्द्र॒ तृन्धि॑। अ॒ग्ने बा॑ध॒स्व वि॒ मृधो॑  
नुद॑स्व। अ॒पामी॑वा॒ अप॒ रक्षा॑ꣳसि से॒ध। अ॒स्मात्स॑मु॒द्राद्बृ॑हतो दि॒वो नः॑॥४४॥

अ॒पां भू॑मान॒मुप॑ नः सृ॒जेह॑। यज्ञ॒ प्रति॑ तिष्ठ सु॒मतौ॑ सु॒शेवा॑ आ त्वा॑। वसू॑नि  
पु॒रुधा॑ वि॒शन्तु॑। दी॒र्घमा॑युर्य॒जमा॑नाय कृ॒ण्वन्। अथा॒मृते॑न ज॒रितार॑मङ्घ्रि॒। इन्द्रः॑

शुनावद्वितनोति सीरम्। संवत्सरस्य प्रतिमाणमेतत्। अर्कस्य ज्योतिस्तदिदास  
ज्येष्ठम्। संवत्सरः शुनवत्सीरमेतत्। इन्द्रस्य राधः प्रयतं पुरु त्मना। तदर्करूपं  
विमिमानमेति। द्वादशारे प्रति तिष्ठतीदृषा। अश्वायन्तो गव्यन्तो वाजयन्तः।  
हवामहे त्वोपगन्तवा उ। आभूषन्तस्त्वा सुमतौ नवायाम्। वयमिन्द्र त्वा शुनः  
हुवेम॥ ४५॥ अर्चतु हविर्गायत यः सच्चरपणीनां वैशम्भल्या हांसीत्त्वमुरु देवहूतौ नस्मना षट्॥ [८]

प्राण उदेहि पुनरा नो भर यज्ञो रायो वार्त्रहत्याय वसूनाः स ई पाह्यष्टौ॥ ८॥

प्राणो रक्षत्यग्भीता धारावरा मरुतो दीर्घायुत्वाय ज्योतिषा त्वा पञ्चचत्वारिंशत्॥ ४५॥

प्राणः शुनः हुवेम॥

हरिः ओम्॥

॥ इति श्रीकृष्णयजुर्वेदीयतैत्तिरीयब्राह्मणे द्वितीयाष्टके पञ्चमः प्रपाठकः समाप्तः ॥

॥ षष्ठमः प्रश्नः ॥

॥ तैत्तिरीयब्राह्मणे द्वितीयाष्टके षष्ठः प्रपाठकः ॥

स्वा॒द्वीं त्वा॑ स्वा॒दुना॑। ती॒व्रां ती॒व्रेण॑। अ॒मृता॑म॒मृते॑न। मधु॑मतीं॒ मधु॑मता। सृ॒जामि॑  
 स॒ सोमे॑न। सोमो॑ऽस्य॒श्विभ्या॑ पच्यस्व। सर॑स्वत्यै पच्यस्व। इन्द्रा॑य सु॒त्राम्णो॑  
 पच्यस्व। परी॒तो पि॑श्वता सु॒तम्। सोमो॑ य उ॒त्तम॑ ह॒विः॥१॥

द॒ध॒न्वा यो न॑र्यो अ॒प्स्वन्तरा॑। सु॒षाव॑ सोम॒मद्रि॑भिः। पु॒नातुं॑ ते परि॒स्रुत॑म्। सोम॒ः  
 सूर्य॑स्य दुहि॒ता। वारे॑ण॒ शश्व॑ता॒ तना॑। वा॒युः पू॒तः प॒वित्रे॑ण। प्रा॒ङ्ख॒सोमो॑ अति॑द्रुतः।  
 इन्द्र॑स्य॒ युज्यः॑ सखा॑। वा॒युः पू॒तः प॒वित्रे॑ण। प्र॒त्यङ्ख॒सोमो॑ अति॑द्रुतः॥२॥

इन्द्र॑स्य॒ युज्यः॑ सखा॑। ब्रह्म॑ क्ष॒त्रं प॑वते॒ तेजं॑ इन्द्रि॒यम्। सुर॑या॒ सोमः॑ सु॒त  
 आसु॑तो॒ मदा॑य। शु॒क्रेण॑ देव॒ देवताः॑ पिपृ॒ग्धि। रसे॑नान्नं॒ यज॑मानाय धेहि। कु॒विद॑ङ्ग  
 यव॑मन्तो॒ यव॑श्चित्। यथा॒ दान्त्य॑नुपूर्वं वि॒यूय॑। इहे॑हैषां कृणु॒त भो॑ज॒नानि॑। ये  
 ब॒र्हिषो॑ नमो॑वृत्तिं॒ न ज॒ग्मुः। उ॒प॒या॒मगृ॑हीतोऽस्य॒श्विभ्या॑ त्वा जुष्टं॑ गृह्णामि॥३॥

सरस्वत्या॑ इन्द्राय॑ सु॒त्राम्णो॑। ए॒ष ते॒ योनि॑स्तेज॑से त्वा। वी॒र्या॑य त्वा॒ बला॑य  
त्वा। तेजो॑ऽसि॒ तेजो॑ मयि॑ धेहि। वी॒र्य॑मसि॒ वी॒र्यं॑ मयि॑ धेहि। बल॑मसि॒ बलं॑ मयि॑  
धेहि। नाना॑ हि वां दे॒वहि॑त॒ः सदः॑ कृतम्। मा स॒ः सृ॑क्षाथां पर॒मे व्यो॑मन्। सुरा॒  
त्वमसि॑ शु॒ष्मिणी॒ सोमं॑ ए॒षः। मा मां हि॒ः सीः॒ स्वां॑ योनि॑मावि॒शन्॥४॥

उ॒प॒या॒मगृ॑हीतोऽस्याश्वि॒नं तेजः॑। सा॒र॒स्व॒तं वी॒र्य॑म्। ऐ॒न्द्रं बल॑म्। ए॒ष ते॒  
योनि॑र्मोदा॑य त्वा। आ॒न॒न्दा॑य त्वा॒ मह॑से त्वा। ओजो॑ऽस्यो॒जो मयि॑ धेहि।  
म॒न्युर॑सि॒ म॒न्युं मयि॑ धेहि। महो॑ऽसि॒ महो॑ मयि॑ धेहि। सहो॑ऽसि॒ सहो॑ मयि॑  
धेहि। या व्याघ्रं॑ विषू॑चिका। उ॒भौ वृ॑कं च रक्ष॑ति। श्ये॒नं प॑त॒त्रिण॑ः सि॒ः ह॑म्।  
सेमं॑ पा॒त्वः ह॑सः। स॒म्पृ॒चः स्थ॒ सं मां भ॒द्रेण॑ पृ॒ङ्ग। वि॒पृ॒चः स्थ॒ वि मां पा॑प्मनां  
पृ॒ङ्ग॥५॥ हविः प्रत्यङ्ग्लोमो अतिद्रुतो गृह्याम्याविशन्विषूचिका पञ्च च॥ [१]

सोमो॑ राजा॒ऽमृत॑ः सु॒तः। ऋ॒जी॒षेणा॑जहान्मृत्युम्। ऋ॒तेन॑ स॒त्यमिन्द्रि॑यम्।  
वि॒पान॑ः शु॒क्रम॑न्ध॒सः। इन्द्र॑स्येन्द्रि॒यम्। इ॒दं प॒योऽमृतं॑ मधु॑। सोमं॑ म॒द्ध्यो व्य॑पिबत्।  
छ॒न्द॑सा ह॒ः सः शु॑चि॒षत्। ऋ॒तेन॑ स॒त्यमिन्द्रि॑यम्। अ॒द्ध्यः क्षी॒रं व्य॑पिबत्॥६॥

क्रुडुः॥ङ्गिर॒सो धि॒या। ऋ॒तेन॑ स॒त्यमिन्द्रि॑यम्। अन्ना॑त्परि॒स्रुतो॒ रसम्॑। ब्रह्म॑णा  
व्य॑पिबत् क्ष॒त्रम्। ऋ॒तेन॑ स॒त्यमिन्द्रि॑यम्। रेतो॒ मूत्रं॑ विज॑हाति। योनिं॑  
प्रवि॒शदिन्द्रि॑यम्। गर्भो॑ ज॒रायु॑णाऽऽवृ॑तः। उल्बं॑ जहाति॒ जन्म॑ना। ऋ॒तेन॑  
स॒त्यमिन्द्रि॑यम्॥७॥

वेदेन॑ रू॒पे व्य॑करोत्। सु॒तासु॒ती प्र॒जाप॑तिः। ऋ॒तेन॑ स॒त्यमिन्द्रि॑यम्। सोमे॑न॒ सोमो॑  
व्य॑पिबत्। सु॒तासु॒तौ प्र॒जाप॑तिः। ऋ॒तेन॑ स॒त्यमिन्द्रि॑यम्। दृ॒ष्ट्वा रू॒पे व्या॑करोत्।  
स॒त्यानृ॑ते प्र॒जाप॑तिः। अश्र॑द्धामनृतेऽद॑धात्। श्र॒द्धा९ स॒त्ये प्र॒जाप॑तिः। ऋ॒तेन॑  
स॒त्यमिन्द्रि॑यम्। दृ॒ष्ट्वा परि॑स्रुतो॒ रसम्॑। शु॒क्रेण॑ शु॒क्रं व्य॑पिबत्। पयः॑ सोमं॑ प्र॒जा-  
प॑तिः। ऋ॒तेन॑ स॒त्यमिन्द्रि॑यम्। वि॒पान॑९ शु॒क्रम॑न्धसः। इन्द्र॑स्येन्द्रि॒यम्। इ॒दं पयो॑-  
ऽमृतं॑ मधु॑॥८॥ अ॒न्यः क्षी॑रं व्य॑पिब॒ज्जन्म॑नृतेन॑ स॒त्यमिन्द्रि॑य९ श्र॒द्धा९ स॒त्ये प्र॒जाप॑तिरु॒द्यौ च॑॥ [२]

सुरा॑वन्तं बर्हि॑षद९ सु॒वीरम्॑। य॒ज्ञः९ हि॑न्वन्ति म॒हिषा॑ नमो॑भिः। दधा॑नाः सोमं॑  
दि॒वि दे॒वता॑सु। मदे॑मेन्द्रं॒ यज॑मानाः स्व॒र्काः। यस्ते॒ रसः॑ सम्भृ॑त॒ ओष॑धीषु। सोम॑स्य॒

शुष्मः सुरया सुतस्य। तेन जिन्व यजमानं मदेन। सरस्वतीमश्विनाविन्द्रमग्निम्।  
यमश्विना नमुचेरासुरादधि। सरस्वत्यसनोदिन्द्रियाय॥९॥

इमन्तः शुक्रं मधुमन्तमिन्दुम्। सोमः राजानमिह भक्षयामि। यदत्र रितः  
रसिनः सुतस्य। यदिन्द्रो अपिबच्छर्चाभिः। अहं तदस्य मनसा शिवेन। सोमः  
राजानमिह भक्षयामि। पितृभ्यः स्वधाविभ्यः स्वधा नमः। पितामहेभ्यः स्वधाविभ्यः  
स्वधा नमः। प्रपितामहेभ्यः स्वधाविभ्यः स्वधा नमः। अक्षन्पितरः॥१०॥

अमीमदन्त पितरः। अतीतृपन्त पितरः। अमीमृजन्त पितरः। पितरः शुन्धध्वम्।  
पुनन्तु मा पितरः सोम्यासः। पुनन्तु मा पितामहाः। पुनन्तु प्रपितामहाः। पवित्रेण  
शतायुषा। पुनन्तु मा पितामहाः। पुनन्तु प्रपितामहाः॥११॥

पवित्रेण शतायुषा। विश्वमायुर्व्यश्नवै। अग्र आयूँषि पवसेऽग्रे पवंस्व।  
पवमानः सुवर्जनः पुनन्तु मा देवजनाः। जातवेदः पवित्रवद्यत्ते पवित्रमर्चिषि।  
उभाभ्यां देव सवितर्वैश्वदेवी पुनती। ये समानाः समनसः। पितरो यमराज्ये।

तेषां लो॒कः स्व॒धा नमः॑। य॒ज्ञो दे॒वेषु॑ कल्पताम्॥१२॥

ये संजा॒ताः सम॑नसः। जी॒वा जी॒वेषु॑ माम॒काः। तेषा॒ङ् श्रीर्म॑यि कल्पताम्।  
अ॒स्मिँल्लो॒के श॒त९ समा॑ः। द्वे स्रु॒ती अ॑श्रुणवं पि॒तृणा॑म्। अ॒हं दे॒वाना॑मु॒त म॑र्त्यानाम्।  
याभ्या॑मिदं वि॒श्वमे॒ज॒त्समे॑ति। यद॑न्त॒रा पि॒तरं॑ मा॒तरं॑ च। इ॒द९ ह॒विः प्र॒जन॑नं मे  
अस्तु। दश॑वीर९ स॒र्वग॑ण९ स्व॒स्तये॑। आ॒त्म॒सनि॑ प्रजा॒सनि॑। प॒शु॒स॒न्य॑भय॒सनि॑  
लो॒क॒सनि॑। अ॒ग्निः प्र॒जां ब॑हु॒लां मे॑ करोतु। अन्नं॒ पयो॑ रे॒तो अ॒स्मासु॑ धत्त।  
रा॒य॒स्पोष॑मिष॒मूर्ज॑म॒स्मासु॑ दी॒ध॒र॒त्स्वाहा॑॥१३॥ इन्द्रियाय॑ पि॒तरं॑ श॒ताय॑षा पुन॒न्तु मा पि॒ताम॑हाः पुन॒न्तु प्र॑पितामहाः

कल्पताङ् स्व॒स्तये॑ प॒थं च॥ [३]

सी॒सेन॑ तन्नं॒ मन॑सा मनी॒षिणः॑। ऊ॒र्णा॒सू॒त्रेण॑ क॒वयो॑ वयन्ति। अ॒श्विना॑ य॒ज्ञ९  
स॒वि॒ता सर॑स्वती। इन्द्र॑स्य रू॒पं वरु॑णो भिष॒ज्यन्। तद॑स्य रू॒पम॑मृ॒त९ श॒ची॑भिः।  
ति॒स्रोऽद॑धुर्दे॒वताः॑ स॒र॒रा॒णाः। लो॒मा॒नि श॒ष्पैर्ब॑हु॒धा न तो॒क॑भिः। त्वग॑स्य  
मा॒९सम॑भव॒न्न ला॒जाः। तद॑श्विना॑ भिष॒जां रु॒द्रव॑र्तनी। सर॑स्वती वयति॒ पेशो॑



अन्तरः॥१४॥

अस्थिं मञ्जानं मासरैः। कारोतरेण दधतो गवां त्वचि। सरस्वती मनसा पेशलं वसु। नासत्याभ्यां वयति दर्शतं वपुः। रसं परिस्नुता न रोहितम्। नग्नहूर्धोरस्तसरन्न वेमं। पयसा शुक्रममृतं जनित्रम्। सुरया मूत्राञ्जनयन्ति रेतः। अपामंतिं दुर्मतिं बाधमानाः। ऊर्वध्यं वातं स बुवन्तदारात्॥१५॥

इन्द्रः सुत्रामा हृदयेन सत्यम्। पुरोडाशेन सविता जजान। यकृत्क्लोमानं वरुणो भिषज्यन्। मतस्त्रे वायुव्यैर्न मिनाति पित्तम्। आत्राणि स्थाली मधु पिन्वमाना। गुदा पात्राणि सुदुघा न धेनुः। श्येनस्य पत्रं न प्लीहा शर्चीभिः। आसन्दी नाभिरुदरं न माता। कुम्भो वनिष्ठुर्जनिता शर्चीभिः। यस्मिन्नग्रे योन्यां गर्भो अन्तः॥१६॥

प्लाशीर्व्यक्तः शतधार उथ्सः। दुहे न कुम्भीः स्वधां पितृभ्यः। मुखं सदस्य शिर इथ्सदेन। जिह्वा पवित्रमश्विना स सरस्वती। चप्पन्न पायुर्भिषगस्य वालः। वस्तिर्न शेषो हरसा तरस्वी। अश्विभ्यां चक्षुरमृतं ग्रहाभ्याम्। छागेन तेजो हविषा

श्रुतेन। पक्ष्माणि गोधूमैः क्लैरुतानि। पेशो न शुक्लमसितं वसाते॥१७॥

अविर्न मेषो नसि वीर्याय। प्राणस्य पन्थां अमृतो ग्रहाभ्याम्।  
सरस्वत्युपवाकैर्व्यानम्। नस्यानि बर्हिर्बदरैर्जजान। इन्द्रस्य रूपमृषभो  
बलाय। कर्णाभ्यां श्रोत्रममृतं ग्रहाभ्याम्। यवा न बर्हिर्भ्रुवि केसराणि। कर्कन्धु  
जज्ञे मधु सारघं मुखात्। आत्मन्नुपस्थे न वृकस्य लोमं। मुखे श्मश्रूणि न  
व्याघ्रलोमम्॥१८॥

केशा न शीरुषन् यशसे श्रियै शिखा। सिंहस्य लोमं त्विषिरिन्द्रियाणि।  
अङ्गान्यात्मन्मिषजा तदश्विना। आत्मानमङ्गैः समधात्सरस्वती। इन्द्रस्य रूपं  
शतमानमायुः। चन्द्रेण ज्योतिरमृतं दधाना। सरस्वती योन्यां गर्भमन्तः। अश्विभ्यां  
पत्नी सुकृतं बिभर्ति। अपां रसेन वरुणो न साम्ना। इन्द्रं श्रियै जनयन्नप्सु  
राजा। तेजः पशूनां हविरिन्द्रियावत्। परिस्नुता पयसा सारघं मधु। अश्विभ्यां  
दुग्धं मिषजा सरस्वत्या सुतासुताभ्याम्। अमृतः सोम इन्दुः॥१९॥ अन्तर आरादन्तर्वसाते

व्याघ्रलोमः राजां चत्वारि च॥

[४]

मि॒त्रो॑ऽसि वरु॑णोऽसि। सम॒हं वि॒श्वैर्दे॒वैः। क्ष॒त्रस्य॒ नाभि॑रसि। क्ष॒त्रस्य॒ योनि॑रसि।  
स्यो॒नामा सी॑द। सु॒षदा॒मा सी॑द। मा त्वां हिं॑सीत्। मा मां हिं॑सीत्। निष॑साद  
धृ॒तव्र॑तो वरु॑णः। पु॒स्त्या॑स्वा॥२०॥

साम्रा॑ज्याय सु॒क्रतुः॑। दे॒वस्य॑ त्वा सवि॒तुः प्र॑सवे। अ॒श्विनो॑र्बा॒हुभ्या॑म्। पू॒ष्णो  
हस्ता॑भ्याम्। अ॒श्विनो॑र्भैष॒ज्येन॑। तेज॑से ब्रह्मवर्चसायाभिषि॑ञ्चामि। दे॒वस्य॑ त्वा  
सवि॒तुः प्र॑सवे। अ॒श्विनो॑र्बा॒हुभ्या॑म्। पू॒ष्णो हस्ता॑भ्याम्। सर॑स्वत्यै भैष॒ज्येन॑॥२१॥

वी॒र्या॑यान्नाद्या॑याभिषि॑ञ्चामि। दे॒वस्य॑ त्वा सवि॒तुः प्र॑सवे। अ॒श्विनो॑र्बा॒हुभ्या॑म्।  
पू॒ष्णो हस्ता॑भ्याम्। इन्द्र॑स्येन्द्रि॒येण॑। श्रि॒यै यश॑से बला॑याभिषि॑ञ्चामि। को॑ऽसि  
क॒तमो॑ऽसि। कस्मै॑ त्वा काय॑ त्वा। सु॒श्लोकाँ॑(४) सुम॑ङ्ग॒लाँ॑(४) सत्य॑रा॒जा(३)न्।  
शिरो॑ मे श्रीः॥२२॥

यशो॑ मुख॑म्। त्विषिः॑ केशा॑श्च श्मश्रू॑णि। राजा॑ मे प्रा॒णोऽमृ॑तम्। स॒म्राट्प॑क्षुः।

वि॒राट्छ्रोत्र॑म्। जि॒ह्वा मे॑ भ॒द्रम्। वाङ्म॑हः। मनो॑ म॒न्युः। स्व॒राङ्गामः॑। मोदाः॑ प्रमो॒दा  
अ॒ङ्गुली॒रङ्गानि॑॥ २३॥

चित्तं॑ मे॒ सहः॑। बा॒हू मे॒ बल॑मिन्द्रि॒यम्। हस्तौ॑ मे॒ कर्म॑ वी॒र्यम्॑। आ॒त्मा क्ष॑त्रमुरो॒  
मम्। पृ॒ष्ठीर्मे॑ रा॒ष्ट्रमु॒दर॑म॒सौ। ग्री॒वाश्च॒ श्रोण्यौ॑। ऊ॒रू अ॑र॒त्नी जा॑नु॒नी। विशो॑  
मेऽङ्गानि॑ स॒र्वतः॑। नाभि॑र्मे॒ चित्तं॑ वि॒ज्ञान॑म्। पा॒युर्मेऽप॑चितिर्भ॒सत्॥ २४॥

आ॒न॒न्द॒न॒न्दावा॑ण्डौ मे॑। भगुः॑ सौभा॑ग्यं प॒सः। जङ्घा॑भ्यां प॒द्भ्यां धर्मो॑ऽस्मि। विशि॑  
राजा॑ प्र॒तिष्ठि॑तः। प्र॒ति क्ष॑त्रे प्र॒ति ति॑ष्ठामि रा॒ष्ट्रे। प्र॒त्यश्वेषु॑ प्र॒ति ति॑ष्ठामि गो॒षु।  
प्र॒त्यङ्गेषु॑ प्र॒ति ति॑ष्ठाम्या॒त्मन्। प्र॒ति प्रा॑णेषु प्र॒ति ति॑ष्ठामि पु॒ष्टे। प्र॒ति द्या॑वापृथि॒व्योः।  
प्र॒ति ति॑ष्ठामि य॒ज्ञे॥ २५॥

त्र॒या दे॒वा ए॒काद॑श। त्र॒यस्त्रि॑ं॒शाः सु॒राध॑सः। बृ॒हस्प॑ति॒पुरो॑हिताः। दे॒वस्य॑ सवि॒तुः  
स॒वे। दे॒वा दे॒वैर॑वन्तु मा। प्र॒थ॒मा द्वि॒तीयैः॑। द्वि॒तीया॑स्तृ॒तीयैः॑। तृ॒तीयाः॑ स॒त्येन॑। स॒त्यं  
य॒ज्ञेन॑। य॒ज्ञो य॒ज्ञुर्भिः॑॥ २६॥

यजूंषि सामभिः। सामान्यृग्भिः। ऋचो याज्याभिः। याज्या वषट्कारैः। वषट्कारा  
आहुतिभिः। आहुतयो मे कामान्थ्समर्धयन्तु। भूः स्वाहा। लोमानि प्रयतिर्मम।  
त्वङ् आनतिरागतिः। मांसं म उपनतिः। वस्वस्थि। मज्जा म आनतिः॥२७॥ पुस्त्यांस्वा

सरस्वत्यै भेषज्येन श्रीरङ्गानि भुसद्यज्ञे यज्ञो यज्ञमिरुपनतिर्द्वे च॥

[५]

यद्देवा देवहेडनम्। देवासश्चकृमा वयम्। अग्निर्मा तस्मादेनसः।  
विश्वान्मुञ्चत्वंहसः। यदि दिवा यदि नक्तम्। एनांसि चकृमा वयम्।  
वायुर्मा तस्मादेनसः। विश्वान्मुञ्चत्वंहसः। यदि जाग्रद्यदि स्वप्ने। एनांसि  
चकृमा वयम्॥२८॥

सूर्यो मा तस्मादेनसः। विश्वान्मुञ्चत्वंहसः। यद्गामे यदरण्ये। यत्सभायां  
यदिन्द्रिये। यच्छूद्रे यदर्ये। एनश्चकृमा वयम्। यदेकस्याधि धर्मणि।  
तस्यावयजनमसि। यदापो अग्निया वरुणेति शपामहे। ततो वरुण नो  
मुञ्च॥२९॥

अवभृथ निचङ्कुण निचेरुरसि निचङ्कुण। अव देवैर्देवकृतमेनोऽयाद्। अव

मर्त्यैर्मर्त्यकृतम्। उ॒रोरा नो॑ देव रि॒षस्पा॑हि। सु॒मित्रा न॒ आप॒ ओष॑धयः सन्तु।  
दु॒र्मित्रास्तस्मै॑ भूयासुः। योऽस्मान्द्वेष्टि॑। यं च॑ व॒यं द्वि॒ष्मः। द्रु॒पदादि॒वेन्मुमुचा॑नः।  
स्वि॒न्नः स्ना॒त्वी मला॑दिव॥३०॥

पू॒तं प॒वित्रे॑णे॒वाऽऽज्य॑म्। आपः॑ शु॒न्धन्तु॑ मै॒नसः॑। उ॒द्वयं॑ तम॑स॒स्परि॑। पश्य॑न्तो  
ज्योति॑रुत्त॑रम्। दे॒वं दे॒वत्रा॑ सूर्य॑म्। अ॒गन्म॒ ज्योति॑रुत्त॑मम्। प्र॒ति॒युतो॑ वरु॑णस्य  
पाशः॑। प्र॒त्य॑स्तो वरु॑णस्य॒ पाशः॑। ए॒धोऽस्ये॑धिषी॒महि॑। स॒मिद॑सि॥३१॥

तेजो॑ऽसि॒ तेजो॒ मयि॑ धेहि। अ॒पो अ॒न्व॑चारिषम्। रसे॑न॒ सम॑सृक्ष्महि। प॒य॑स्वा॒  
अ॒ग्न आ॑गमम्। तं मा॒ स॒सृ॒ज॒ वर्च॑सा। प्र॒जया॑ च॒ धने॑न च। स॒माव॑वर्ति पृथि॒वी।  
समु॑षाः। समु॒ सूर्यः॑। समु॒ विश्व॑मिदं जग॑त्। वै॒श्वान॒रज्यो॑तिर्भूयासम्। वि॒भुं का॑मं  
व्य॑श्जवै। भूः स्वाहा॑॥३२॥

स्वप्न एनासि चकृमा वयं मुञ्च मलादिव समिदसि जगुत्रीणि च॥

[६]

होता॑ यक्ष॒त्समि॑धेन्द्र॒मिड॑स्पदे। नाभा॑ पृथि॒व्या अधि॑। दि॒वो वर्ष्म॑न्त्समि॒ध्यते॑।  
ओजि॑ष्ठश्च॒रष॑णी॒ सहान्॑। वे॒त्वाऽऽज्य॑स्य॒ होत॑र्यज॑। होता॑ यक्ष॒त्तनू॑नपा॒तम्।

ऊ॒तिभि॒र्जेता॑र॒मप॑राजितम्। इन्द्रं॑ दे॒वꣳ सु॒व॒र्विद॑म्। प॒थिभि॒र्मधु॑मत्तमैः।  
नरा॒शꣳसे॑न॒ तेज॑सा॥ ३३॥

वेत्वाऽऽज्य॑स्य॒ होत॑र्यज॑। होता॑ यक्ष॒दिडा॑भिरिन्द्र॑मीडितम्। आ॒जुह्वा॑न॒मम॑र्त्यम्।  
दे॒वो दे॒वैः स॒र्वीर्य॑ः। वज्र॑हस्तः पुर॒न्दरः॑। वेत्वाऽऽज्य॑स्य॒ होत॑र्यज॑। होता॑यक्ष॒द्वर्हिषीन्द्र॑नि  
वृष॒भं न॑र्यापसम्। वसु॑भीरु॒द्रैरा॑दित्यैः। स॒युग्भि॑र्ब॒र्हिरा॑सदत्॥ ३४॥

वेत्वाऽऽज्य॑स्य॒ होत॑र्यज॑। होता॑ यक्ष॒दोजो॑ न वी॒र्यम्॑। सहो॑ द्वा॒र इन्द्र॑मवर्धयन्।  
सु॒प्रा॒य॒णा वि॑श्रयन्तामृता॒वृधः॑। द्वा॒र इन्द्रा॑य मी॒दुषे॑। वि॒यन्त्वाज्य॑स्य॒ होत॑र्यज॑।  
होता॑ यक्षदुषे॑ इन्द्र॑स्य धे॒नू। सु॒दुघे॑ मा॒तरौ॑ म॒ही। स॒वा॒तरौ॑ न तेज॑सी।  
व॒त्समिन्द्र॑मवर्धताम्॥ ३५॥

वी॒तामाज्य॑स्य॒ होत॑र्यज॑। होता॑ यक्ष॒द्वैव्या॑ होता॑रा। भि॒षजा॒ सखा॑या। ह॒विषेन्द्र॑  
भिष॑ज्यतः। क॒वी दे॒वो प्र॑चेतसौ। इन्द्रा॑य धत्त इन्द्रि॒यम्। वी॒तामाज्य॑स्य॒ होत॑र्यज॑।  
होता॑ यक्ष॒त्ति॒स्रो दे॒वीः। त्रय॑स्त्रि॒धात॑वोपसः। इडा॒ सर॑स्वती॒ भार॑ती॥ ३६॥

म॒हीन्द्र॑प॒त्नीर्ह॒विष्म॑न्तीः। वि॒यन्त्वाज्य॑स्य॒ होत॑र्यज॑। होता॑ यक्ष॒त्त्वष्टा॑र॒मिन्द्र॑  
दे॒वम्। मि॒षज॑ꣳ सु॒यज॑ घृ॒तश्रि॑यम्। पु॒रुरूप॑ꣳ सु॒रेत॑सं म॒घोनि॑म्। इन्द्रा॑य॒ त्वष्टा॑  
दध॑दिन्द्रि॒याणि॑। वे॒त्वाऽऽज्य॑स्य॒ होत॑र्यज॑। होता॑ यक्ष॒द्वन॑स्पतिम्। श॒मि॒तार॑ꣳ  
श॒तक्र॑तुम्। धि॒यो जो॒ष्टार॑मिन्द्रि॒यम्॥३७॥

मध्वा॑ सम॒ञ्जन्प॑थिभिः सु॒गेभिः॑। स्वदा॑ति ह॒व्यं मधु॑ना घृ॒तेन॑। वे॒त्वाऽऽज्य॑स्य॒  
होत॑र्यज॑। होता॑ यक्ष॒दिन्द्र॑ꣳ स्वाहा॑ऽऽज्य॑स्य। स्वाहा॒ मेद॑सः। स्वाहा॑ स्तो॒काना॑म्।  
स्वाहा॒ स्वाहा॑कृ॒तीनाम्॑। स्वाहा॑ ह॒व्यसू॑क्तीनाम्। स्वाहा॑ दे॒वाꣳ आ॑ज्य॒पान्।  
स्वाहेन्द्र॑ꣳ हो॒त्राञ्जु॑षा॒णाः। इन्द्र॑ आ॒ज्यस्य॑ वि॒यन्तु॑। होत॑र्यज॑॥३८॥

तेजसाऽऽसदवधत्तां भारतीन्द्रियं  
जुषाणा द्वे च (समिधेन्द्रन्तनूनपातमिडाभिर्वरुहियोजं उपे देव्यां तिस्रस्त्वष्टारं वनस्पतिमिन्द्रम्॥ समिधेन्द्रं चतुर्वैत्वेकं वियन्तु द्विर्वीतामेकं वियन्तु द्विवैत्वेकं वियन्तु  
होत॑र्यज॑॥)॥

[७]

समि॑द्ध इन्द्र॑ उ॒षसा॒मनी॑के। पु॒रोरु॑चा॒ पूर्व॑कृ॒द्वावृ॑धानः। त्रि॒भिर्दे॑वैस्त्रि॒ꣳशता॑  
वज्र॑बाहुः। ज॒घान॑ वृ॒त्रं वि॑ दुरो॑ ववार। नरा॒शꣳसः॑ प्र॒तिशू॑रो मि॒मानः॑। तनून॑पात्प्रति॑  
य॒ज्ञस्य॑ धाम॑। गोभि॑र्व॒पावा॑न्मधु॑ना सम॒ञ्जन्। हिर॑ण्यैश्च॒न्द्री य॑जति॒ प्रचे॑ताः। ई॒डितो॑



देवैर्हरि॑वाꣳ अभि॒ष्टिः। आ॒जुह्वा॑नो ह॒विषा॒ शर्ध॑मानः॥३९॥

पु॒र॒न्द॒रो म॒घवा॑न् वज्र॑बाहुः। आया॑तु य॒ज्ञमु॑प॒नो जुषा॑णः। जुषा॑णो  
ब॒र्हि॒र॒हरि॑वान्न इन्द्रः॑। प्रा॒चीनꣳ सी॒दत्प्र॑दिशा॑ पृथि॒व्याः। उ॒रु॒व्यचाः॑ प्रथ॑मानꣳ  
स्यो॒नम्। आ॒दि॒त्यैर॑क्तं वसु॑भिः स॒जोषाः॑। इन्द्रं॑ दुरः॑ कव॒ष्यो धाव॑मानाः। वृषा॑णं  
यन्तु॑ जन॑यः सु॒पत्नीः॑। द्वा॒रो दे॒वीर॒भितो॑ विश्र॑यन्ताम्। सु॒वीरा॑ वी॒रं प्रथ॑माना  
महो॑भिः॥४०॥

उ॒पासा॑नक्ता बृ॒हती॑ बृ॒हन्त॑म्। पय॑स्वती सु॒दुधे॑ शू॒रमिन्द्र॑म्। पेश॑स्वती तन्तु॑ना  
सं॒व्यय॑न्ती। दे॒वानां॑ दे॒वं य॑जतः सु॒रुक्मे॑। दै॒व्या मि॑मा॒ना मन॑सा पु॒रु॒त्रा। हो॒ता॒रा॒विन्द्र॑  
प्रथ॑मा सु॒वाचा॑। मूर्ध॑न् य॒ज्ञस्य॑ म॒धुना॑ दधा॒ना। प्रा॒चीनं॑ ज्योति॑र्ह॒विषा॑ वृधातः। ति॒स्रो  
दे॒वीर॒ह॒विषा॑ वर्ध॑मानाः। इन्द्रं॑ जुषा॒णा वृष॑णं न पत्नीः॥४१॥

अच्छि॑न्नं तन्तुं पय॑सा सर॑स्वती। इडा॑ दे॒वी भा॑रती वि॒श्वतू॑र्तिः। त्वष्टा॑ दध॒दिन्द्रा॑य  
शुष्म॑म्। अपा॒कोचि॑ष्टुर्य॒शसे॑ पु॒रूणि॑। वृषा॑ यज॒न्वृष॑णं भूरि॑रेताः। मूर्ध॑न् य॒ज्ञस्य॑

समनक्तु देवान्। वनस्पतिरवसृष्टो न पार्श्वैः। त्मन्यां समञ्जच्छमिता न देवः।  
 इन्द्रस्य हव्यैर्जुठरं पृणानः। स्वदाति हव्यं मधुना घृतेन। स्तोकानामिन्दुं प्रति शूर  
 इन्द्रः। वृषायमाणो वृषभस्तुराषाट्। घृतपुषा मधुना हव्यमुन्दन्। मूर्धन् यज्ञस्य  
 जुषतां स्वाहा॥४२॥ शर्धमानो महोभिः पर्वीर्धृतेन चत्वारि च॥ [८]

आचर्षणिप्रा विवेष यन्मा। तं सध्रीचीः। सत्यमित्तन्न त्वावां अन्यो अस्ति।  
 इन्द्रं देवो न मर्त्यो ज्यायान्। अहन्नहिं परिशयानमर्णः। अवासृजोऽपो अच्छां  
 समुद्रम्। प्रसंसाहिषे पुरुहूत शत्रून्। ज्येष्ठस्ते शुष्मं इह रातिरस्तु। इन्द्रा भर  
 दक्षिणेना वसूनि। पतिः सिन्धूनामसि रेवतीनाम्। स शेवृधमधि धाद्युम्नमस्मे।  
 महिं क्षत्रं जनाषाडिन्द्र तव्यम्। रक्षां च नो मघोनः पाहि सूरीन्। राये च नः  
 स्वपत्या इषे धाः॥४३॥ रेवतीनां चत्वारि च॥ [९]

देवं बरुहिरिन्द्रं सुदेवं देवैः। वीरवन्त्सीर्णं वेद्यामवर्धयत्। वस्तोर्वृतं  
 प्राक्तोर्भृतम्। राया बरुहिष्मतोऽत्यगात्। वसुवने वसुधेयस्य वेतु यजं। देवीद्वार

इन्द्रं सङ्घाते। विङ्घीर्यामन्नवर्धयन्। आ वृथ्सेन तरुणेन कुमारेण चमीविता  
अपार्वणम्। रेणुककाटं नुदन्ताम्। वसुवने वसुधेयस्य वियन्तु यजं॥४४॥

देवी उषासानक्ता। इन्द्रं यज्ञे प्रयत्यहेताम्। दैवीर्विशः प्रायांसिष्टाम्। सुप्रीते  
सुधिते अभूताम्। वसुवने वसुधेयस्य वीतां यजं। देवी जोष्ट्री वसुधिती।  
देवमिन्द्रमवर्धताम्। अयाव्यन्याघा द्वेषांसि। आन्यावाक्षीद्वसु वार्याणि।  
यजमानाय शिक्षिते॥४५॥

वसुवने वसुधेयस्य वीतां यजं। देवी ऊर्जाहुती दुघे सुदुघे। पयसेन्द्रमवर्धताम्।  
इषमूर्जमन्याऽवाक्षीत्। सग्धिः सर्पीतिमन्या। नवेन पूर्वं दयमाने। पुराणेन नवम्।  
अधातामूर्जमूर्जाहुती वसु वार्याणि। यजमानाय शिक्षिते। वसुवने वसुधेयस्य वीतां  
यजं॥४६॥

देवा दैव्या होतांरा। देवमिन्द्रमवर्धताम्। हुताघंशः सावाभाष्टं वसुवार्याणि।  
यजमानाय शिक्षितौ। वसुवने वसुधेयस्य वीतां यजं। देवीस्तिस्त्रस्तिस्त्रो देवीः।

पतिमिन्द्रमवर्धयन्। अस्पृक्षद्भारती दिवम्। रुद्रैर्यज्ञं सरस्वती। इडा वसुमती  
गृहान्॥४७॥

वसुवने वसुधेयस्य वियन्तु यजं। देव इन्द्रो नराशंसः। त्रिवरूथस्त्रिवन्धुरः।  
देवमिन्द्रमवर्धयत्। शतेन शितिपृष्ठानामाहितः। सहस्रेण प्रवर्तते। मित्रावरुणेदस्य  
होत्रमर्हतः। बृहस्पतिः स्तोत्रम्। अश्विनाऽऽध्वर्यवम्। वसुवने वसुधेयस्य वेतु  
यजं॥४८॥

देव इन्द्रो वनस्पतिः। हिरण्यपर्णो मधुशाखः सुपिप्पलः। देवमिन्द्रमवर्धयत्।  
दिवमग्रेणाप्रात्। आऽन्तरिक्षं पृथिवीमदृहीत्। वसुवने वसुधेयस्य वेतु यजं।  
देवं बर्हिर्वारितीनाम्। देवमिन्द्रमवर्धयत्। स्वासस्थमिन्द्रेणासन्नम्। अन्या  
बर्हीष्यभ्यभूत्। वसुवने वसुधेयस्य वेतु यजं। देवो अग्निः स्विष्टकृत्।  
देवमिन्द्रमवर्धयत्। स्विष्टं कुर्वन्स्विष्टकृत्। स्विष्टमद्य करोतु नः। वसुवने  
वसुधेयस्य वेतु यजं॥४९॥

वियन्तु यजं शिक्षिते शिक्षिते वसुवने वसुधेयस्य वीतां यजं गृहान् वेतु यजाभूथद्वं (देवं बर्हिर्देवीद्वारं  
देवी उषासानकां देवी जोष्टीं देवी ऊर्जाहृती देवा दैव्या होतांरा शिक्षितौ देवीस्तिस्रस्तिस्रो देवीर्देव इन्द्रो नराशंसो देव इन्द्रो वनस्पतिर्देवं बर्हिर्वारितीनान्देवो  
अग्निः स्विष्टकृद्देवम्। वेतु वियन्तु चतुर्वीतामेकां वियन्तु चतुर्वैत्ववर्धयदवर्धयन्निर्वर्धतामेकांऽवर्धयश्चतुरवर्धयत्। वस्तोरा वथ्सेन देवीरयावीपं हुताऽस्पृक्षच्छुतेन दिवं

स्वासुस्थः स्विष्टः शिक्षिते शिक्षिते शिक्षितौ॥॥

[१०]

होता यक्षत्समिधाऽग्निमिडस्पदे। अश्विनेन्द्रः सरस्वतीम्। अजो धूम्रो न  
गोधूमैः क्लैर्भेषजम्। मधु शष्पैर्न तेज इन्द्रियम्। पयः सोमः परिस्नुता घृतं मधु।  
वियन्त्वाज्यस्य होतर्यजं। होता यक्षत्तनूनपात्सरस्वती। अविर्मेषो न भेषजम्।  
पथा मधुमताभरन्। अश्विनेन्द्राय वीर्यम्॥५०॥

बदरैरुपवाकाभिर्भेषजं तोक्मभिः। पयः सोमः परिस्नुता घृतं मधु।  
वियन्त्वाज्यस्य होतर्यजं। होता यक्षं नराशंसं न नृग्रहम्। पतिः सुरायै  
भेषजम्। मेषः सरस्वती भिषक्। रथो न चन्द्राश्विनोर्वपा इन्द्रस्य वीर्यम्।  
बदरैरुपवाकाभिर्भेषजं तोक्मभिः। पयः सोमः परिस्नुता घृतं मधु। वियन्त्वाज्यस्य  
होतर्यजं॥५१॥

होता यक्षदिडेडित आजुह्वानः सरस्वतीम्। इन्द्रं बलैर्न वर्धयन्। ऋषभेण  
गवैन्द्रियम्। अश्विनेन्द्राय वीर्यम्। यवैः कर्कन्धुभिः। मधु लाजैर्न मासरम्।  
पयः सोमः परिस्नुता घृतं मधु। वियन्त्वाज्यस्य होतर्यजं। होता यक्षद्वर्हिः

सुष्टरीमोर्णम्रदाः। भिषङ्गासत्या॥५२॥

भिषजाऽश्विनाऽश्वा शिशुमती। भिषग्धेनुः सरस्वती। भिषग्दुह इन्द्राय भेषजम्।  
पयः सोमः परिस्नुता घृतं मधु। वियन्त्वाज्यस्य होतर्यजं। होता यक्षद्दुरो दिशः।  
कवृष्यो न व्यचस्वतीः। अश्विभ्यां न दुरो दिशः। इन्द्रो न रोदसी दुधे। दुहे  
कामान्त्सरस्वती॥५३॥

अश्विनेन्द्राय भेषजम्। शुक्रं न ज्योतिरिन्द्रियम्। पयः सोमः परिस्नुता घृतं मधु।  
वियन्त्वाज्यस्य होतर्यजं। होता यक्षत्सुपेशसोषे नक्तं दिवा। अश्विना सञ्जानाने।  
समं जाते सरस्वत्या। त्विषिमिन्द्रे न भेषजम्। श्येनो न रजसा हृदा। पयः सोमः  
परिस्नुता घृतं मधु॥५४॥

वियन्त्वाज्यस्य होतर्यजं। होता यक्षद्वैव्या होतारा भिषजाऽश्विना। इन्द्रं न  
जागृवी दिवा नक्तं न भेषजैः। शूषः सरस्वती भिषक्। सीसेन दुह इन्द्रियम्।  
पयः सोमः परिस्नुता घृतं मधु। वियन्त्वाज्यस्य होतर्यजं। होता यक्षत्तिस्रो देवीर्न

भेषजम्। त्रयस्त्रिधातवोऽपसः। रूपमिन्द्रै हिरण्ययम्॥५५॥

अश्विनेडा न भारती। वाचा सरस्वती। मह इन्द्राय दधुरिन्द्रियम्। पयः सोमः  
परिस्रुता घृतं मधु। वियन्त्वाज्यस्य होतर्यजं। होता यक्षत्त्वष्टारमिन्द्रमश्विना।  
भिषजं न सरस्वतीम्। ओजो न जूतिरिन्द्रियम्। वृको न रभसो भिषक्। यशः  
सुरया भेषजम्॥५६॥

श्रिया न मासरम्। पयः सोमः परिस्रुता घृतं मधु। वियन्त्वाज्यस्य होतर्यजं।  
होता यक्षद्वनस्पतिम्। शमितारं शतक्रतुम्। भीमं न मन्युं राजानं व्याघ्रं  
नमसाऽश्विना भामम्। सरस्वती भिषक्। इन्द्राय दुह इन्द्रियम्। पयः सोमः  
परिस्रुता घृतं मधु। वियन्त्वाज्यस्य होतर्यजं॥५७॥

होता यक्षदग्निं स्वाहाऽऽज्यस्य स्तोकानाम्। स्वाहा मेदसां पृथक्।  
स्वाहा छागमश्विभ्याम्। स्वाहा मेषं सरस्वत्यै। स्वाहर्षभमिन्द्राय सिंहाय  
सहसेन्द्रियम्। स्वाहाऽग्निं न भेषजम्। स्वाहा सोममिन्द्रियम्। स्वाहेन्द्रं  
सुत्रामाणं सवितारं वरुणं भिषजां पतिम्। स्वाहा वनस्पतिं प्रियं पाथो न

भेषजम्। स्वाहा देवाः अज्यपान्॥५८॥

स्वाहाऽग्निः होत्राञ्जुषाणो अग्निर्भेषजम्। पयः सोमः परिस्नुतां घृतं मधु।  
वियन्त्वाज्यस्य होतर्यजं। होता यक्षदश्विना सरस्वतीमिन्द्रः सुत्रामाणम्। इमे  
सोमाः सुरामाणः। छागैर्न मेषैर्ऋषभैः सुताः। शष्पैर्न तोक्मभिः। लाजैर्महस्वन्तः।  
मदा मासरेण परिष्कृताः। शुक्राः पयस्वन्तोऽमृताः। प्रस्थिता वो मधुश्चुतः।  
तानश्विना सरस्वतीन्द्रः सुत्रामा वृत्रहा। जुषन्ताः सौम्यं मधु। पिबन्तु मदन्तु  
वियन्तु सोमम्। होतर्यजं॥५९॥

वीर्यं वियन्त्वाज्यस्य होतर्यजं नासत्या सरस्वती मधुं हिरण्यं भेषजं वियन्त्वाज्यस्य होतर्यजाज्यपानमृताः  
पञ्च च (समिधाऽग्निः षट्। तनूनपांश्चसप्त। नराशःसमृषिः। इडेडितो यवैरष्टौ। बर्हिः सप्त। दुरोऽश्विना नव। सुपेशसर्षिः। दैव्या होतांरा सीसेन रसः।  
तिन्मस्वष्टारमृष्टावष्टौ। वनस्पतिमृषिः। अग्नित्रयोदश। अश्विना द्वादश त्रयोदश। समिधाऽग्निं बदरैर्बदरैर्यवैरश्विना त्विषिमश्विना न भेषजं रूपमश्विना भीमं  
भामम्॥)॥

[११]

समिद्धो अग्निरश्विना। तप्तो घृमो विराट्श्सुतः। दुहे धेनुः सरस्वती।  
सोमः शुक्रमिहेन्द्रियम्। तनूपा भिषजां सुते। अश्विनोभा सरस्वती। मध्वा  
रजाःसीन्द्रियम्। इन्द्राय पथिभिर्वहान्। इन्द्रायेन्दुः सरस्वती। नराशःसेन  
नृग्रहुः॥६०॥



अधातामश्विना मधु। भेषजं भिषजा सुते। आजुह्वाना सरस्वती।  
 इन्द्रायेन्द्रियाणि वीर्यम्। इडाभिरश्विनाविषम्। समूर्जः स रयिं दधुः। अश्विना  
 नमुचेः सुतम्। सोमः शुक्रं परिस्नुता। सरस्वती तमाभरत्। बरुहिषेन्द्राय  
 पातवे॥६१॥

कवष्यो न व्यचस्वतीः। अश्विभ्यां न दुरो दिशः। इन्द्रो न रोदसी दुधे।  
 दुहे कामान् सरस्वती। उषासा नक्तमश्विना। दिवेन्द्रः सायमिन्द्रियैः। सञ्जानाने  
 सुपेशसा। समं जाते सरस्वत्या। पातं नो अश्विना दिवा। पाहि नक्तः  
 सरस्वति॥६२॥

दैव्या होतारा भिषजा। पातमिन्द्रः सचा सुते। तिस्रस्त्रेधा सरस्वती। अश्विना  
 भारतीडा। तीव्रं परिस्नुता सोमम्। इन्द्राय सुषवुर्मदम्। अश्विना भेषजं मधु।  
 भेषजं नः सरस्वती। इन्द्रे त्वष्टा यशः श्रियम्। रूपः रूपमधुः सुते। ऋतुथेन्द्रो  
 वनस्पतिः। शशमानः परिस्नुता। कीलालमश्विभ्यां मधु। दुहे धेनुः सरस्वती।  
 गोभिर्न सोममश्विना। मासरेण परिष्कृता। समधाताः सरस्वत्या। स्वाहेन्द्रे सुतं

मधु॥६३॥ नृग्रहः पातवे सरस्वत्यधुः सुतेऽष्टौ च॥ \_\_\_\_\_ [१२]

अ॒श्विना॑ ह॒विरिन्द्रि॑यम्। नमु॑चेर्धिया सर॑स्वती। आ शु॒क्रमा॑सुराद्व॒सु। म॒घमिन्द्रा॑य  
ज॒ग्निरे। यम॑श्विना॒ सर॑स्वती। ह॒विषेन्द्र॑मवर्धयन्। स बि॑भेद व॒लं म॒घम्। नमु॑चावासुरे  
सचा॑। तमिन्द्रं प॒शवः॑ सचा॑। अ॒श्विनो॒भा सर॑स्वती॥६४॥

दधा॑ना अ॒भ्यनू॑षत। ह॒विषा॑ य॒ज्ञमिन्द्रि॑यम्। य इन्द्रं इन्द्रि॒यं द॒धुः। स॒विता॑  
वरु॑णो भगः। स सु॒त्रामा॑ ह॒विष्म॑तिः। यज॑मानाय सश्र॒त। स॒विता॑ वरु॑णोऽदध॑त्।  
यज॑मानाय दा॒शुषे॑। आद॑त्त नमु॑चेर्व॒सु। सु॒त्रामा॑ बल॑मिन्द्रि॒यम्॥६५॥

वरु॑णः क्ष॒त्रमिन्द्रि॑यम्। भगे॑न स॒विता॑ श्रियम्। सु॒त्रामा॑ यश॑सा बलम्। दधा॑ना  
य॒ज्ञमा॑शत। अ॒श्विना॑ गोभि॑रिन्द्रि॒यम्। अश्वे॑भिर्वीर्यं बलम्। ह॒विषेन्द्र॑ सर॑स्वती।  
यज॑मानमवर्धयन्। ता नास॑त्या सु॒पेश॑सा। हिर॑ण्यवर्तनी नरा॑। सर॑स्वती ह॒विष्म॑ती।  
इन्द्र॑ कर्म॑सु नोऽव॑त। ता भि॒षजा॑ सु॒कर्म॑णा। सा सु॒दुघा॑ सर॑स्वती। स वृ॒त्रहा॑  
श॒तक्र॑तुः। इन्द्रा॑य दधुरिन्द्रि॒यम्॥६६॥ उ॒भा सर॑स्वती बल॑मिन्द्रि॒यन्नरा॑ पद्व॑॥ \_\_\_\_\_ [१३]

दे॒वं ब॒र्हिः सर॑स्वती। सु॒दे॒वमि॒न्द्रे अ॒श्विना॑। तेजो॒ न चक्षु॑र॒क्ष्योः। ब॒र्हिषा॑  
दधु॑रिन्द्रि॒यम्। व॒सुवने॑ वसु॒धेय॑स्य वियन्तु॒ यज॑। दे॒वीर्द्वारो॑ अ॒श्विना॑। भि॒षजे॒न्द्रे  
सर॑स्वती। प्रा॒णं न वी॒र्य॑न्न॒सि। द्वा॒रो दधु॑रिन्द्रि॒यम्। व॒सुवने॑ वसु॒धेय॑स्य वियन्तु॒  
यज॑॥६७॥

दे॒वी उ॒षासा॑व॒श्विना॑। भि॒षजे॒न्द्रे सर॑स्वती। बलं॒ न वाच॑मा॒स्यै। उ॒षाभ्या॑  
दधु॑रिन्द्रि॒यम्। व॒सुवने॑ वसु॒धेय॑स्य वियन्तु॒ यज॑। दे॒वी जो॒ष्टी अ॒श्विना॑। सु॒त्रामे॒न्द्रे  
सर॑स्वती। श्रो॒त्रं न कर्ण॑यो॒र्यशः॑। जो॒ष्टीभ्या॑ दधु॑रिन्द्रि॒यम्। व॒सुवने॑ वसु॒धेय॑स्य  
वियन्तु॒ यज॑॥६८॥

दे॒वी ऊ॒र्जाहु॑ती॒ दु॒घे सु॒दु॒घे। पय॑सेन्द्रः॒ सर॑स्वत्य॒श्विना॑ भि॒षजा॑ऽवत। शु॒क्रं न  
ज्योतिः॑ स्तन॑यो॒राहु॑ती धत्त इन्द्रि॒यम्। व॒सुवने॑ वसु॒धेय॑स्य वियन्तु॒ यज॑। दे॒वा  
दे॒वाना॑ भि॒षजा॑। हो॒ता॒रावि॒न्द्रम॑श्विना॑। व॒षट्कारैः॑ सर॑स्वती। त्वि॒षिं न हृद॑ये म॒तिम्।  
होतृ॑भ्यां दधु॑रिन्द्रि॒यम्। व॒सुवने॑ वसु॒धेय॑स्य वियन्तु॒ यज॑॥६९॥

देवीस्ति॒स्रस्ति॒स्रो दे॒वीः। सर॑स्वत्य॒श्विना॒ भार॒तीडा॑। शू॒षन्न मध्ये॒ नाभ्या॑म्।  
 इन्द्रा॑य दधुरिन्द्रि॒यम्। व॒सुवने॑ वसु॒धेय॑स्य वियन्तु॒ यज॑। दे॒व इन्द्रो॒ नरा॒शंसः॑।  
 त्रिव॑रूथः सर॑स्वत्याऽश्वि॒भ्यामी॑यते रथः। रेतो॒ न रूप॑म॒मृतं॑ ज॒नित्र॑म्। इन्द्रा॑य  
 त्वष्टा॒ दध॑दिन्द्रि॒याणि॑। व॒सुवने॑ वसु॒धेय॑स्य वियन्तु॒ यज॑॥ ७०॥

दे॒व इन्द्रो॒ वन॒स्पतिः॑। हिर॑ण्यपर्णो अ॒श्विभ्या॑म्। सर॑स्वत्याः सु॒पिप्प॑लः। इन्द्रा॑य  
 पच्य॑ते मधु॑। ओजो॒ न जू॑तिमृष॒भो न भाम॑म्। वन॒स्पति॑र्नो दध॑दिन्द्रि॒याणि॑।  
 व॒सुवने॑ वसु॒धेय॑स्य वियन्तु॒ यज॑। दे॒वं ब॒र्हिर्वा॑रि॒तीना॑म्। अ॒ध्वरे॒ स्ती॒र्णम॒श्विभ्या॑म्।  
 ऊ॒र्णम॑दाः सर॑स्वत्याः॥ ७१॥

स्यो॒नमि॑न्द्र ते॒ सदः॑। ई॒शायै॑ म॒न्युः राजा॑नं ब॒र्हिषा॑ दधुरिन्द्रि॒यम्। व॒सुवने॑  
 वसु॒धेय॑स्य वियन्तु॒ यज॑। दे॒वो अ॒ग्निः स्वि॑ष्ट॒कृत्। दे॒वान् य॑क्षद्यथाय॒थम्।  
 होता॑रा॒विन्द्र॑म॒श्विना॑। वा॒चा वाच॑ः सर॑स्वतीम्। अ॒ग्निः सोम॑ः स्वि॑ष्ट॒कृत्।  
 स्वि॑ष्ट॒ इन्द्रः॑ सु॒त्रामा॑ सवि॒ता वरु॑णो भि॒षक्। इ॒ष्टो दे॒वो वन॒स्पतिः॑। स्वि॑ष्टा दे॒वा

आँज्यपाः। इष्टो अग्निरग्निनां। होतां होत्रे स्विष्टकृत्। यशो न दधदिन्द्रियम्।  
ऊर्जमपचितिः स्वधाम्। वसुवने वसुधेयस्य वियन्तु यजं॥ ७२॥ द्वारं दधुरिन्द्रियं वसुवने  
वसुधेयस्य वियन्तु यजं जोष्टीभ्यां दधुरिन्द्रियं वसुवने वसुधेयस्य वियन्तु यजं हातृभ्यां दधुरिन्द्रियं वसुवने वसुधेयस्य वियन्तु यजं  
वसुधेयस्य वियन्तु यजं सरस्वत्या वनस्पतिः पदं (देवं बर्हिर्देवीद्वारं देवी उपासांश्चिनां देवी जोष्टी देवी ऊर्जाहृती देवा देवानां भिषजां वषट्कारेदेवीस्तिष्ठस्तिष्ठो देवादेव  
इन्द्रो नराशंसो देव इन्द्रो वनस्पतिर्देवं बर्हिर्वारितीनान्देवो अग्निः स्विष्टकृद्देवान्। समिधाऽग्निं देवं बर्हिः सरस्वत्यश्चिनां सर्वं वियन्तु। द्वारस्तिष्ठः सर्ववियन्तु।  
अज इन्द्रमोजोऽग्निं परः सरस्वतीम्। नक्तं पूर्वं सरस्वति। अन्यत्र सरस्वती। भिषक्पूर्वं दुह इन्द्रियम्। अन्यत्र दधुरिन्द्रियम्। सौत्रामण्यां संतासुती। अञ्जनयं  
यजमानः॥)॥

[१४]

अग्निमद्य होतारमवृणीत। अयं संतासुती यजमानः। पचन्पत्नीः।  
पचन्पुरोडाशान्। गृह्णन्ग्रहान्। बध्नन्नश्विभ्यां छागं सरस्वत्या इन्द्राय।  
बध्नन्सरस्वत्यै मेषमिन्द्रायाश्विभ्याम्। बध्नन्निन्द्रायर्षभमश्विभ्यां सरस्वत्यै।  
सूपस्था अद्य देवो वनस्पतिरभवत्। अश्विभ्यां छागेन सरस्वत्या इन्द्राय॥ ७३॥

सरस्वत्यै मेषेणेन्द्रायाश्विभ्याम्। इन्द्रायर्षभेणाश्विभ्यां सरस्वत्यै।  
अक्षं स्तान्मेदस्तः प्रतिपचताग्रभीषुः। अवीवृधन्त ग्रहैः। अपातामश्विना  
सरस्वतीन्द्रः सुत्रामा वृत्रहा। सोमान्सुराम्णाः। उपो उक्थामदाः श्रौद्विमदा अदन्।  
अवीवृधन्ताङ्गूषैः। त्वामद्यर्ष आर्षेयर्षीणान्नपादवृणीत। अयं संतासुती

यजमानः। बहुभ्य आ सङ्गतेभ्यः। एष मे देवेषु वसु वार्या यक्ष्यतु इति। ता या देवा देवदानान्यदुः। तान्यस्मा आ च शास्व। आ च गुरस्व। इषितश्च होतरसि भद्रवाच्याय प्रेषितो मानुषः। सूक्तवाकाय सूक्ता ब्रूहि॥७४॥ इन्द्राय यजमानः सुत च॥[१५]

उशन्तस्त्वा हवामह आ नो अग्ने सुकेतुना। त्व९ सोम महे भगं त्व९ सोम प्रचिकितो मनीषा। त्वया हि नः पितरः सोम पूर्वे त्व९ सोम पितृभिः संविदानः। बर्हिषदः पितर आऽहं पितृन्। उपहूताः पितरोऽग्निष्वात्ताः पितरः। अग्निष्वात्तानृतुमतो हवामहे। नराश९सै सोमपीथं य आशुः। ते नो अर्वन्तः सुहवा भवन्तु। शं नो भवन्तु द्विपदे शं चतुष्पदे। ये अग्निष्वात्ता येऽनग्निष्वात्ताः॥७५॥

अ९होमुचः पितरः सोम्यासः। परेऽवरेऽमृतांसो भवन्तः। अघिं ब्रुवन्तु ते अवन्त्वस्मान्। वान्यायै दुग्धे जुषमाणाः करम्भम्। उदीराणा अवरे परे च। अग्निष्वात्ता ऋतुभिः संविदानाः। इन्द्रवन्तो हविरिदं जुषन्ताम्। यदग्ने कव्यवाहन त्वमग्न ईडितो जातवेदः। मातली कव्यैः। ये तातृपुर्देवत्रा जेहमानाः।

होत्रावृधः स्तोमंतष्टासो अर्कैः। आऽग्ने याहि सुविदत्रेभिर्वाङ्। सत्यैः कव्यैः  
 पितृभिर्धर्मसद्भिः। हव्यवाहमजरं पुरुप्रियम्। अग्निं घृतेन हविषा सपर्यन्।  
 उपासदं कव्यवाहं पितृणाम्। स नः प्रजां वीरवती५ समृण्वतु॥७६॥ अर्नग्निष्वात्ता जेहमानाः  
 सुप्तं च॥ [१६]

होता यक्षदिडस्पदे। समिधानं महद्यशः। सुषमिद्धं वरेण्यम्। अग्निमिन्द्रं  
 वयोधसम्। गायत्रीं छन्द इन्द्रियम्। त्र्यविं गां वयो दधत्। वेत्वाऽऽज्यस्य  
 होतर्यजं। होता यक्षच्छुचिव्रतम्। तनूनपातमुद्भिदम्। यं गर्भमदितिर्दधे॥७७॥

शुचिमिन्द्रं वयोधसम्। उष्णिहं छन्द इन्द्रियम्। दित्यवाहं गां वयो दधत्।  
 वेत्वाऽऽज्यस्य होतर्यजं। होता यक्षदीडेन्यम्। ईडितं वृत्रहन्तमम्। इडाभिरीड्य५  
 सहः। सोममिन्द्रं वयोधसम्। अनुष्टुभं छन्द इन्द्रियम्। त्रिवत्सं गां वयो  
 दधत्॥७८॥

वेत्वाऽऽज्यस्य होतर्यजं। होता यक्षत्सुबर्हिषदम्। पूषण्वन्तममर्त्यम्। सीदन्तं

ब॒र्हिषि॑ प्रि॒ये। अ॒मृते॑न्द्रं वयो॒धसम्॑। बृ॒हतीं॑ छन्द॒ इन्द्रि॑यम्। पञ्चा॑विं गां वयो॒  
दध॑त्। वे॒त्वाऽऽज्य॑स्य॒ होत॑र्यजं। हो॒ताय॑क्ष॒द्व्यच॑स्वतीः। सु॒प्राय॑णा ऋ॒तावृ॑धः॥७९॥

द्वा॒रो दे॒वीर्हि॑र॒ण्ययीः॑। ब्र॒ह्माण॑ इन्द्रं वयो॒धसम्॑। प॒ङ्क्तिं॑ छन्द॒ इहेन्द्रि॑यम्। तु॒र्यवा॑हं  
गां वयो॒ दध॑त्। वे॒त्वाऽऽज्य॑स्य॒ होत॑र्यजं। हो॒ता यक्ष॑त्सुपे॒शसे॑। सु॒शि॒ल्पे बृ॒हती  
उ॒भे। न॒क्तो॒षासा॒ न द॑र्श॒ते। वि॒श्वमि॑न्द्रं वयो॒धसम्॑। त्रि॒ष्टुभं॑ छन्द॒ इन्द्रि॑यम्॥८०॥

प॒ष्ठवा॑हं गां वयो॒ दध॑त्। वे॒त्वाऽऽज्य॑स्य॒ होत॑र्यजं। हो॒ता यक्ष॑त्प्रचै॒तसा॑।  
दे॒वाना॑मु॒त्तमं॑ यशः। हो॒ता॒रा दै॒व्या क॒वी। स॒युजे॑न्द्रं वयो॒धसम्॑। जग॑तीं  
छन्द॒ इहेन्द्रि॑यम्। अ॒न॒ङ्गाहं॑ गां वयो॒ दध॑त्। वे॒त्वाऽऽज्य॑स्य॒ होत॑र्यजं। हो॒ता  
यक्ष॑त्पे॒शस्वतीः॑॥८१॥

ति॒स्रो दे॒वीर्हि॑र॒ण्ययीः॑। भा॒रती॑र्बृ॒हती॑र्म॒ही। प॒तिमि॑न्द्रं वयो॒धसम्॑। वि॒राजं॑ छन्द॒  
इहेन्द्रि॑यम्। धे॒नुं गां न वयो॒ दध॑त्। वे॒त्वाऽऽज्य॑स्य॒ होत॑र्यजं। हो॒ता यक्ष॑त्सुरे॒तसम्॑।  
त्व॒ष्टारं॑ पु॒ष्टि॒वर्ध॑नम्। रू॒पाणि॑ बि॒भ्र॑तं पृथक्। पु॒ष्टिमि॑न्द्रं वयो॒धसम्॑॥८२॥



द्विपदं छन्द इहेन्द्रियम्। उक्षाणं गां न वयो दधत्। वेत्वाऽऽज्यस्य होतर्यजं।  
 होता यक्षच्छतक्रतुम्। हिरण्यपर्णमुक्थिनम्। रशनां बिभ्रतं वशिम्। भगमिन्द्रं  
 वयोधसम्। ककुभं छन्द इहेन्द्रियम्। वशां वेहतं गां न वयो दधत्। वेत्वाऽऽज्यस्य  
 होतर्यजं। होता यक्षस्वाहाकृतीः। अग्निं गृहपतिं पृथक्। वरुणं भेषजं कविम्।  
 क्षत्रमिन्द्रं वयोधसम्। अतिच्छन्दसं छन्द इन्द्रियम्। बृहदृषभं गां वयो दधत्।  
 वेत्वाऽऽज्यस्य होतर्यजं॥८३॥ दधे दधेदतावुधं इन्द्रियं पेशस्वतीर्वयोधसं वेत्वाऽऽज्यस्य होतर्यजं सप्त च (इडस्पदेऽग्निज्ञायत्रीत्र्यविम्।  
 शुचिं व्रतं शुचिमुष्णिहं दित्युवाहम्। ईडेन्यं सोममनुष्टुभं त्रिवथ्सम्। सुबर्हिषदं मृतेन्द्रं बृहतीं पञ्चाविम्। व्यचस्वतीः सुप्रायणा द्वारो ब्रह्माणः पङ्क्तिमिह तुर्यवाहम्।  
 सुपेशं विश्वमिन्द्रं त्रिष्टुभं पष्ठवाहम्। प्रचैतसा सयुजेन्द्रं जगतीमिहानुवाहम्। पेशस्वतीस्तिष्ठः पतिं विराजमिह धेनुम्। सुरेतसन्त्वष्टारं पुष्टिमिन्द्रं द्विपदमिहोक्षाणम्।  
 शतक्रतुं भगमिन्द्रं ककुभमिह वशात्र। स्वाहाकृतीः क्षत्रमतिच्छन्दसं बृहदृषभं गां वयो दधेदिन्द्रियमृषिं वसु नवं दशेहोन्द्रियमष्टं नव दश गां न वयो दधेदिडस्पदे  
 सर्वं वेत्तु॥)

[१७]

समिद्धो अग्निः समिधा। सुषमिद्धो वरेण्यः। गायत्री छन्द इन्द्रियम्।  
 त्र्यविर्गौर्वयो दधुः। तनूनपाच्छुचिं व्रतः। तनूपाच्च सरस्वती। उष्णिक्छन्द इन्द्रियम्।  
 दित्युवाङ्गौर्वयो दधुः। इडाभिरग्निरीड्यः। सोमो देवो अमर्त्यः॥८४॥

अनुष्टुप्छन्द इन्द्रियम्। त्रिवथ्सो गौर्वयो दधुः। सुबर्हिरग्निः पूषण्वान्।

स्तीर्णबर्हिर्ममर्त्यः। बृहती छन्द इन्द्रियम्। पञ्चाविर्गौर्वयो दधुः। दुरो देवीर्दिशो महीः। ब्रह्मा देवो बृहस्पतिः। पङ्क्तिश्छन्द इहेन्द्रियम्। तुर्यवाद्गौर्वयो दधुः॥८५॥

उषे यही सुपेशंसा। विश्वे देवा अमर्त्याः। त्रिष्टुप्छन्द इन्द्रियम्। पृष्ठवाद्गौर्वयो दधुः। दैव्या होतारा भिषजा। इन्द्रेण सयुजा युजा। जगती छन्द इहेन्द्रियम्। अनङ्गान्गौर्वयो दधुः। तिस्र इडा सरस्वती। भारती मरुतो विशः॥८६॥

विराट्छन्द इहेन्द्रियम्। धेनुर्गौर्न वयो दधुः। त्वष्टा तुरीपो अद्भुतः। इन्द्राग्नी पुष्टिवर्धना। द्विपाच्छन्द इहेन्द्रियम्। उक्षा गौर्न वयो दधुः। शमिता नो वनस्पतिः। सविता प्रसुवन्भगम्। ककुच्छन्द इहेन्द्रियम्। वशा वेहद्गौर्न वयो दधुः। स्वाहा यज्ञं वरुणः। सुक्षत्रो भेषजं करत्। अतिच्छन्दाश्छन्द इन्द्रियम्। बृहदृषभो गौर्वयो दधुः॥८७॥ अमर्त्यस्तुर्यवाद्गौर्वयो दधुर्विशो वशा वेहद्गौर्न वयो दधुश्चत्वारि च॥

[१८]

वसन्तेनर्तुना देवाः। वसंवस्त्रिवृता स्तुतम्। रथन्तरेण तेजंसा। हविरिन्द्रे वयो दधुः। ग्रीष्मेण देवा ऋतुना। रुद्राः पञ्चदशे स्तुतम्। बृहता यशंसा बलम्। हविरिन्द्रे

वयो दधुः। व॒र॒ष्पाभि॑र॒ऋतु॑नाऽऽदि॒त्याः। स्तोमे॑ सप्तद॒शे स्तु॑तम्॥८८॥

वै॒रूपे॑ण॒ वि॒शौज॑सा। ह॒वि॒रि॒न्द्रे वयो॑ दधुः। शा॒र॒दे॒न॒र्तु॑ना॒ दे॒वाः। ए॒क॒वि॒ंश  
ऋ॒भ॒वः स्तु॑तम्। वै॒रा॒जे॒न॒ श्रि॒या श्रि॒यम्। ह॒वि॒रि॒न्द्रे वयो॑ दधुः। हे॒म॒न्ते॒न॒र्तु॑ना॒ दे॒वाः।  
म॒रु॒त॑स्त्रि॒ण॒वे स्तु॑तम्। ब॒ले॒न॒ श॒क्र॑रीः स॒हः। ह॒वि॒रि॒न्द्रे वयो॑ दधुः। शै॒शि॒रे॒ण॒र्तु॑ना॒ दे॒वाः।  
त्र॒य॒स्त्रि॒ंशे॑ऽमृ॒तः स्तु॑तम्। स॒त्ये॒न॒ रे॒वती॑ः क्ष॒त्रम्। ह॒वि॒रि॒न्द्रे वयो॑ दधुः॥८९॥ स्तोमे॑  
सप्तद॒शे स्तु॑त॒ सहो॑ ह॒वि॒रि॒न्द्रे वयो॑ दधुश्च॒त्वारि॑ च (वसु॒न्ते॒न॒ ग्री॒ष्मे॒ण॒ व॒र॒ष्पाभिः॑ शा॒र॒दे॒न॒ हे॒म॒न्ते॒न॒ शै॒शि॒रे॒ण॒ षट्॥)॥ [१९]

दे॒वं ब॒र॒हि॒रि॒न्द्रं वयो॑ध॒सम्। दे॒वं दे॒वम॑व॒र्धय॑त्। गा॒य॒त्रि॒या छ॒न्द॑सेन्द्रि॒यम्। तेज॒  
इ॒न्द्रे वयो॑ दध॑त्। व॒सु॒वने॑ वसु॒धेय॑स्य वेतु॒ यज॑। दे॒वी॒र्द्वा॒रो दे॒वमि॑न्द्रं वयो॑ध॒सम्।  
दे॒वी॒र्दे॒वम॑व॒र्धय॑न्। उ॒ष्णि॒हा छ॒न्द॑सेन्द्रि॒यम्। प्रा॒णमि॑न्द्रे वयो॑ दध॑त्। व॒सु॒वने॑  
वसु॒धेय॑स्य वि॒यन्तु॑ यज॑॥९०॥

दे॒वी दे॒वं वयो॑ध॒सम्। उ॒षे इ॒न्द्रम॑व॒र्धता॑म्। अ॒नु॒ष्टु॒भा छ॒न्द॑सेन्द्रि॒यम्। वाच॑मि॒न्द्रे  
वयो॑ दध॑त्। व॒सु॒वने॑ वसु॒धेय॑स्य वी॒तां यज॑। दे॒वी जो॒ष्टी दे॒वमि॑न्द्रं वयो॑ध॒सम्। दे॒वी

दे॒वम॑व॒र्धता॑म्। बृ॒हत्या॑ छ॒न्द॑सेन्द्रि॒यम्। श्रो॒त्रमि॑न्द्रे वयो॒ दध॑त्। व॒सुव॑ने॒ वसु॑धेय॑स्य  
वी॒तां यज॑॥९१॥

दे॒वी ऊ॒र्जाहु॑ती दे॒वमि॑न्द्रं वयो॒धस॑म्। दे॒वी दे॒वम॑व॒र्धता॑म्। प॒ङ्क्त्या॑ छ॒न्द॑सेन्द्रि॒यम्।  
शु॒क्रमि॑न्द्रे वयो॒ दध॑त्। व॒सुव॑ने॒ वसु॑धेय॑स्य वी॒तां यज॑। दे॒वा दै॒व्या हो॑ता॒रा दे॒वमि॑न्द्रं  
वयो॒धस॑म्। दे॒वा दे॒वम॑व॒र्धता॑म्। त्रि॒ष्टुभा॑ छ॒न्द॑सेन्द्रि॒यम्। त्वि॒षिमि॑न्द्रे वयो॒ दध॑त्।  
व॒सुव॑ने॒ वसु॑धेय॑स्य वी॒तां यज॑॥९२॥

दे॒वीस्ति॒स्रस्ति॒स्रो दे॒वीर्व॑यो॒धस॑म्। पति॑मिन्द्रं॒मव॑र्धयन्। जग॑त्या॒ छ॒न्द॑सेन्द्रि॒यम्।  
ब॒लमि॑न्द्रे वयो॒ दध॑त्। व॒सुव॑ने॒ वसु॑धेय॑स्य वियन्तु॒ यज॑। दे॒वो नरा॑श॒सो दे॒वमि॑न्द्रं  
वयो॒धस॑म्। दे॒वो दे॒वम॑व॒र्धय॑त्। वि॒राजा॑ छ॒न्द॑सेन्द्रि॒यम्। रे॒तु इ॒न्द्रे वयो॒ दध॑त्।  
व॒सुव॑ने॒ वसु॑धेय॑स्य वे॒तु यज॑॥९३॥

दे॒वो व॒न॒स्पति॑र्दे॒वमि॑न्द्रं वयो॒धस॑म्। दे॒वो दे॒वम॑व॒र्धय॑त्। द्वि॒पदा॑ छ॒न्द॑सेन्द्रि॒यम्।  
भग॑मिन्द्रे वयो॒ दध॑त्। व॒सुव॑ने॒ वसु॑धेय॑स्य वे॒तु यज॑। दे॒वं ब॒र्हिर्वा॑रि॒तीनां॑

देवमिन्द्रं वयोधसम्। देवं देवमवर्धयत्। ककुभा छन्दसेन्द्रियम्। यश इन्द्रे वयो  
 दधत्। वसुवने वसुधेयस्य वेतु यजं। देवो अग्निः स्विष्टकृद्देवमिन्द्रं वयोधसम्।  
 देवो देवमवर्धयत्। अतिच्छन्दसा छन्दसेन्द्रियम्। क्षत्रमिन्द्रे वयो दधत्। वसुवने  
 वसुधेयस्य वेतु यजं॥१४॥

वियन्तु यजं वीतां यजं वीतां यजं वेतु यजं वेतु यजं पञ्च च (देवं बर्हिर्गायत्रिया तेजः।  
 देवीद्वारि उष्णिहां प्राणम्। देवी देवमुषे अनुष्टुभा वाचम्। देवी जोष्टी बृहत्या श्रोत्रम्। देवी ऊर्जाहंती पुङ्गा शुक्रम। देवा दैव्या होतांरा त्रिष्टुभा त्विषिम्।  
 देवास्तिस्त्रस्तिस्रो देवीः पतिं जगत्या बलम्। देवो नराशंसो विराजा रेतः। देवो वनस्पतिर्द्विपदा भगम्। देवं बर्हिर्वारितीनां ककुभा यशः। देवो अग्निः  
 स्विष्टकृदतिच्छन्दसा क्षत्रम्। वेतु वियन्तु चतुर्वीतामेको वियन्तु चतुर्वैत्ववर्धयदवर्धयः श्रुतुर्वर्धतामेकोऽवर्धयः श्रुतुर्वर्धयत्॥)॥ [२०]

स्वाद्धी त्वा सोमः सुरावन्तः सीसेन मित्रोऽसि यद्वेवा होतां यक्षश्मिधेन्द्रः समिद्धं इन्द्र आचर्षणिप्रा देवं बर्हिरहोतां यक्षश्मिधाऽग्निः समिद्धो  
 अग्निरंश्चिनाऽश्चिनां हविरिन्द्रियं देवं बर्हिः सरस्वत्यग्निमुद्योशन्तो होतां यक्षदिडस्पदे समिद्धो अग्निः समिधां वसुन्तेनर्तुनां देवं बर्हिरिन्द्रं वयोधसं विश्रुतिः॥२०॥  
 स्वाद्धी त्वाऽमीमदन्त पितरः साम्राज्याय पूतं पवित्रेणोपासानक्ता बदरेरधातां देव इन्द्रो वनस्पतिः पृष्टवाहुङ्गा देवी देवं वयोधसं चतुर्नवतिः॥१४॥  
 स्वाद्धी त्वां वेतु यजं॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके षष्ठः प्रपाठकः समाप्तः॥

॥सप्तमः प्रश्नः॥

॥तैत्तिरीयब्राह्मणे द्वितीयाष्टके सप्तमः प्रपाठकः॥

त्रिवृथ्स्तोमो भवति। ब्रह्मवर्चसं वै त्रिवृत्। ब्रह्मवर्चसमेवाव रुन्धे। अग्निष्टोमः सोमो भवति। ब्रह्मवर्चसं वा अग्निष्टोमः। ब्रह्मवर्चसमेवाव रुन्धे। रथन्तरं सामं भवति। ब्रह्मवर्चसं वै रथन्तरम्। ब्रह्मवर्चसमेवाव रुन्धे। परिस्रजो होता भवति॥१॥

अरुणो मिर्मिरस्त्रिशुक्रः। एतद्वै ब्रह्मवर्चसस्य रूपम्। रूपेणैव ब्रह्मवर्चसमव रुन्धे। बृहस्पतिरकामयत देवानां पुरोधां गच्छेयमिति। स एतं बृहस्पतिसवमपश्यत्। तमाऽहरत्। तेनायजत। ततो वै स देवानां पुरोधामगच्छत्। यः पुरोधाकामः स्यात्। स बृहस्पतिसवेन यजेत॥२॥

पुरोधामेव गच्छति। तस्य प्रातः सवने सन्नेषु नाराशंसेषु। एकादश दक्षिणा नीयन्ते। एकादश माध्यं दिने सवने सन्नेषु नाराशंसेषु। एकादश तृतीयसवने सन्नेषु नाराशंसेषु। त्रयस्त्रिंशत्सम्पद्यन्ते। त्रयस्त्रिंशद्वै देवताः। देवता एवाव रुन्धे। अश्वश्चतुस्त्रिंशः। प्राजापत्यो वा अश्वः॥३॥

प्रजापतिश्चतुस्त्रिंशो देवतानाम्। यावतीरेव देवताः। ता एवाव रुन्धे।  
 कृष्णाजिनैऽभिषिञ्चति। ब्रह्मणो वा एतद्रूपम्। यत्कृष्णाजिनम्। ब्रह्मवर्चसेनैवैनं  
 समर्धयति। आज्येनाभिषिञ्चति। तेजो वा आज्यम्। तेज एवास्मिन्दधाति॥४॥

भवति यजेत् वा अश्वो दधाति॥

[१]

यदग्नेयो भवन्ति। अग्निमुखा हृद्धिः। अथ यत्पौष्णः। पुष्टिर्वै पूषा। पुष्टिर्वैश्यस्य।  
 पुष्टिमेवाव रुन्धे। प्रसवाय सावित्रः। अथ यत्त्वाष्ट्रः। त्वष्टा हि रूपाणि विकरोति।  
 निर्वरुणत्वाय वारुणः॥५॥

अथो य एव कश्च सन्धसूयते। स हि वारुणः। अथ यद्वैश्वदेवः। वैश्वदेवो  
 हि वैश्यः। अथ यन्मारुतः। मारुतो हि वैश्यः। सप्तैतानि हवींषि भवन्ति।  
 सप्तगणा वै मरुतः। पृश्निः पष्ठौही मारुत्या लभ्यते। विड्वै मरुतः। विशं  
 एवैतन्मध्यतोऽभिषिच्यते। तस्माद्वा एष विशः प्रियः। विशो हि मध्यतो-  
 ऽभिषिच्यते। ऋषभचर्मैऽध्यभिषिञ्चति। स हि प्रजनयिता। दध्राऽभिषिञ्चति।  
 ऊर्वा अन्नाद्यं दधि। ऊर्जैवैनमन्नाद्येन समर्धयति॥६॥

वारुणो विड्वै मरुतोऽष्टौ च॥ [२]

यदाग्नेयो भवति। आग्नेयो वै ब्राह्मणः। अथ यथ्सौम्यः। सौम्यो हि ब्राह्मणः। प्रसवायैव सावित्रः। अथ यद्वार्हस्पत्यः। एतद्वै ब्राह्मणस्य वाक्पतीयम्। अथ यदग्नीषोमीयः। आग्नेयो वै ब्राह्मणः। तौ यदा सङ्गच्छेते॥७॥

अथ वीर्यावत्तरो भवति। अथ यथ्सारस्वतः। एतद्धि प्रत्यक्षं ब्राह्मणस्य वाक्पतीयम्। निर्वरुणत्वायैव वारुणः। अथो य एव कश्च सन्धसूयते। स हि वारुणः। अथ यद्वावापृथिव्यः। इन्द्रो वृत्राय वज्रमुदयच्छत्। तं द्यावापृथिवी नान्वमन्येताम्। तमेतेनैव भागधेयेनान्वमन्येताम्॥८॥

वज्रस्य वा एषोऽनुमानाय। अनुमतवज्रः सूयाता इति। अष्टावेतानि हवीर्यं भवन्ति। अष्टाक्षरा गायत्री। गायत्री ब्रह्मवर्चसम्। गायत्रियैव ब्रह्मवर्चसमं रुन्धे। हिरण्येन घृतमुत्पुनाति। तेजस एव रुचे। कृष्णाजिनेऽभिषिञ्चति। ब्रह्मणो वा एतदृक्सामयो रूपम्। यत्कृष्णाजिनम्। ब्रह्मन्नेवैनमृक्सामयोरध्यभिषिञ्चति। घृतेनाभिषिञ्चति। तथा वीर्यावत्तरो भवति॥९॥ सङ्गच्छेते भागधेयेनान्वमन्येतां रूपं चत्वारि च॥—[३]



न वै सोमेन॑ सोम॑स्य सु॒वो॑ऽस्ति। ह॒तो ह्ये॑षः। अ॒भिषु॑तो ह्ये॑षः। न हि ह॒तः  
 सू॒यते॑। सौ॒मी॑ꣳ सू॒तव॑शा॒मा ल॑भते। सोमो॒ वै रे॑तो॒धाः। रे॒त ए॒व तद॑धाति। सौ॒म्यर्चा॑-  
 ऽभिषि॑ञ्चति। रे॒तो॒धा ह्ये॑षा। रे॒तः सोम॑ः। रे॒त ए॒वास्मि॑न्दधाति। यत्किं च॑ राज॒सूय॑मृते  
 सोमम्। तत्सर्वं॑ भवति। अषा॑ढं यु॒थ्सु पृ॑त॒नासु प॑प्रिम्। सु॒वर्षा॑म॒प्स्वा वृ॑जन॑स्य  
 गो॒पाम्। भ॒रेषु॑जाꣳ सु॒क्षि॒तिꣳ सु॒श्रव॑सम्। जय॑न्तं॒ त्वामनु॑ मदेम सोम॥१०॥ रेतः सोमः  
 सुप्त च॥

[४]

यो वै सोमे॑न सू॒यते॑। स दे॒वस॒वः। यः प॒शुना॑ सू॒यते॑। स दे॒वस॒वः। य इ॒ष्ट्या॑  
 सू॒यते॑। स म॑नुष्यस॒वः। ए॒तं वै पृ॑थ॒ये दे॒वाः प्राय॑च्छन्। ततो॒ वै सोऽप्या॑र॒ण्याना॑  
 प॒शूनाम॑सूयत। याव॑न्तीः किय॑न्तीश्च प्र॒जा वाचं॑ वद॑न्ति। तासा॒ꣳ सर्वा॑साꣳ  
 सू॒यते॑॥११॥

य ए॒तेन॑ यज॑ते। य उ॑ चैनमे॒वं वेद॑। ना॒रा॒शःꣳस्य॑र्चाऽभिषि॑ञ्चति। म॒नुष्या॑ वै  
 नरा॒शःꣳसः। नि॒हुत्य॑ वावैतत्। अथा॒भिषि॑ञ्चति। यत्किं च॑ राज॒सूय॑मनुत्तरवे॒दीकम्॑।

तत्सर्वं भवति। ये मे पञ्चाशतं ददुः। अश्वानां सधस्तुतिः। द्युमदग्रे महि श्रवः।  
 बृहत्कृधि मघोनाम्। नृवदमृत नृणाम्॥१२॥ सुयते सधस्तुतिस्त्रीणि च॥ [५]

एष गोसवः। षट्त्रिंश उक्थ्यो बृहत्सामा। पवमाने कण्वरथन्तरं भवति। यो  
 वै वाजपेयः। स सम्राट्सवः। यो राजसूयः। स वरुणसवः। प्रजापतिः स्वाराज्यं  
 परमेष्ठी। स्वाराज्यं गौरैव। गौरिव भवति॥१३॥

य एतेन यजते। य उ चैनमेवं वेद। उभे बृहद्रथन्तरे भवतः। तद्धि स्वाराज्यम्।  
 अयुतं दक्षिणाः। तद्धि स्वाराज्यम्। प्रतिधुषाऽभिषिञ्चति। तद्धि स्वाराज्यम्।  
 अनुद्धते वेद्यै दक्षिणत आहवनीयस्य बृहतः स्तोत्रं प्रत्यभिषिञ्चति। इयं वाव  
 रथन्तरम्॥१४॥

असौ बृहत्। अनयोरेवैनमनन्तरहितमभिषिञ्चति। पशुस्तोमो वा एषः।  
 तेन गोसवः। षट्त्रिंशः सर्वः। रेवञ्जातः सहसा वृद्धः। क्षत्राणां क्षत्रभृत्तमो  
 वयोधाः। महान्महित्वे तस्तभानः। क्षत्रे राष्ट्रे च जागृहि। प्रजापतेस्त्वा परमेष्ठिनः

स्वारा॑ज्येना॒भिषि॑ञ्चामीत्या॑ह। स्वारा॑ज्यमे॒वैनं॑ गमयति॥१५॥ इव भवति रथन्तरमाहैकं च॥-[६]

सि॒॒हे व्या॒घ्र उ॒त या पृ॒दा॑कौ। त्विषि॑र॒ग्नौ ब्रा॑ह्म॒णे सूर्ये॑ या। इन्द्रं॑ या दे॒वी  
सु॒भगा॑ ज॒जान॑। सा न॒ आग॑न्वर्चसा संविदा॒ना। या रा॑ज॒न्ये दु॒न्दुभा॑वाय॒तायाम्।  
अश्व॑स्य॒ क्रन्द्ये॑ पुरु॒षस्य॑ मा॒यौ। इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा  
संविदा॒ना। या ह॒स्तिनि॑ द्वी॒पिनि॑ या हि॒रण्ये॑। त्विषि॑र॒श्वेषु॑ पुरु॒षेषु॑ गो॒षु॥१६॥

इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना। रथे॑ अ॒क्षेपु॑  
वृष॒भस्य॑ वा॒जे। वा॒र्ते प॒र्जन्ये॑ वरु॒णस्य॑ शु॒ष्मे। इन्द्रं॑ या दे॒वी सु॒भगा॑ ज॒जान॑। सा  
न॒ आग॑न्वर्चसा संविदा॒ना। रा॒डसि॑ वि॒राडसि॑। स॒म्राडसि॑ स्व॒राडसि॑। इन्द्रा॑य त्वा  
तेज॑स्वते॒ तेज॑स्वन्तः॒ श्रीणा॑मि। इन्द्रा॑य॒ त्वौज॑स्वत॒ ओज॑स्वन्तः॒ श्रीणा॑मि॥१७॥

इन्द्रा॑य त्वा॒ पय॑स्वते॒ पय॑स्वन्तः॒ श्रीणा॑मि। इन्द्रा॑य॒ त्वाऽऽयु॑ष्मत् आयु॑ष्मन्तः॒  
श्रीणा॑मि। तेजो॑ऽसि। तत्ते॒ प्र य॑च्छामि। तेज॑स्वदस्तु मे॒ मुखम्। तेज॑स्वच्छि॒रो  
अस्तु॑ मे। तेज॑स्वान् वि॒श्वतः॑ प्र॒त्यङ्। तेज॑सा॒ सम्पि॑पृ॒ग्धि मा। ओजो॑ऽसि। तत्ते॒

प्र यच्छामि॥१८॥

ओज॑स्वदस्तु मे॒ मुखम्। ओज॑स्वच्छि॒रो अस्तु मे। ओज॑स्वान् वि॒श्वतः॑ प्र॒त्यङ्।  
ओज॑सा॒ सं पि॑पृ॒ग्धि मा। पयो॑ऽसि। तत्ते॒ प्र यच्छामि। पय॑स्वदस्तु मे॒ मुखम्।  
पय॑स्वच्छि॒रो अस्तु मे। पय॑स्वान् वि॒श्वतः॑ प्र॒त्यङ्। पय॑सा॒ सं पि॑पृ॒ग्धि मा॥१९॥

आयु॑रसि। तत्ते॒ प्र यच्छामि। आयु॑ष्मदस्तु मे॒ मुखम्। आयु॑ष्मच्छि॒रो अस्तु  
मे। आयु॑ष्मान् वि॒श्वतः॑ प्र॒त्यङ्। आयु॑षा॒ सं पि॑पृ॒ग्धि मा। इ॒मम॑ग्र॒ आयु॑षे॒ वर्च॑से  
कृ॒धि। प्रि॒यꣳ रे॒तो वरु॑ण सोम राजन्। मा॒तेवा॑स्मा अदि॒ते शर्म॑ यच्छ। वि॒श्वे दे॒वा  
जर॑दष्टि॒र्यथा॑ऽसत्॥२०॥

आयु॑रसि वि॒श्वायु॑रसि। स॒र्वायु॑रसि॒ सर्व॑मायु॑रसि। यतो॒ वातो॒ मनो॑जवाः। यतः॒  
क्षर॑न्ति॒ सिन्ध॑वः। तासां॑ त्वा॒ सर्वा॑साꣳ रु॒चा। अ॒भिषि॑श्रामि॒ वर्च॑सा। स॒मुद्र॑ इ॒वासि  
गृ॒ह्मना॑। सोम॑ इ॒वा॒स्यदा॑भ्यः। अ॒ग्निरि॑व वि॒श्वतः॑ प्र॒त्यङ्। सूर्य॑ इ॒व ज्योति॑षा  
वि॒भूः॥२१॥

अ॒पां यो द्रव॑णे रसः॑। तम॒हम॒स्मा आ॑मुष्याय॒णाय॑। तेज॑से ब्रह्मवर्च॒साय॑  
 गृह्णामि। अ॒पां य ऊ॒र्मौ रसः॑। तम॒हम॒स्मा आ॑मुष्याय॒णाय॑। ओज॑से वीर्याय  
 गृह्णामि। अ॒पां यो म॑ध्यतो रसः॑। तम॒हम॒स्मा आ॑मुष्याय॒णाय॑। पु॒ष्ट्यै प्र॑जन॒नाय॑  
 गृह्णामि। अ॒पां यो य॒ज्ञियो रसः॑। तम॒हम॒स्मा आ॑मुष्याय॒णाय॑। आयु॑षे दीर्घायु॒त्वाय॑  
 गृह्णामि॥२२॥ गोष्वोज॑स्वन्तः५ श्रीणा॑म्योजो॑ऽसि तत्ते प्रय॑च्छामि पय॑सा सम्पि॑पृग्धि माऽसं॑द्विभू॒र्यज्ञियो रसो द्वे च॥—————[७]

अभिप्रे॑हि वीर॑यस्व। उ॒ग्रश्चेत्ता॑ सपत्न॒हा। आ॒तिष्ठ॑ मि॒त्रव॑र्धनः। तुभ्यं दे॒वा  
 अधि॑ब्रवन्। अ॒ङ्गौ न्य॒ङ्गाव॑भित् आ॒तिष्ठ॑ वृ॒त्रह॑त्रथम्। आ॒तिष्ठ॑न्तं परि॒ विश्वे॑ अभूषन्।  
 श्रियं॑ वसा॒नश्चर॑ति॒ स्वरो॑चाः। म॒हत्तद॒स्यासु॑रस्य॒ नाम॑। आ वि॒श्वरू॑पो अ॒मृता॑नि  
 तस्थौ। अनु॑ त्वेन्द्रो॑ मद॒त्वनु॑ बृह॒स्पतिः॥२३॥

अनु॑ सोमो॒ अन्व॒ग्निरा॑वीत्। अनु॑ त्वा॒ विश्वे॑ दे॒वा अ॑वन्तु। अनु॑ स॒प्त राजा॑नो  
 य उ॒ताभि॑षि॒क्ताः। अनु॑ त्वा मि॒त्रावरु॑णावि॒हाव॑तम्। अनु॑ द्यावा॑पृथि॒वी वि॒श्वश॑म्भू।  
 सूर्यो॑ अहो॑भि॒रनु॑ त्वाऽवतु। च॒न्द्रमा॒ नक्ष॑त्रैरनु॑ त्वाऽवतु। द्यौश्च॑ त्वा पृथि॒वी च॒

प्रचेतसा। शुक्रो बृहदक्षिणा त्वा पिपर्तु। अनुं स्वधा चिकिता५ सोमो अग्निः।  
आऽयं पृणक्तु रजसी उपस्थम्॥२४॥ बहुस्पतिः सोमो अग्निरेकं च॥—————[८]

प्रजापतिः प्रजा असृजत। ता अस्मात्सृष्टाः परांचीरायन्। स एतं  
प्रजापतिरोदनमपश्यत्। सोऽन्नं भूतोऽतिष्ठत्। ता अन्यत्रान्नाद्यमवित्वा। प्रजापतिं  
प्रजा उपावर्तन्त। अन्नमेवैनं भूतं पश्यन्तीः प्रजा उपावर्तन्ते। य एतेन यजते। य  
उ चैनमेवं वेद। सर्वाण्यन्नानि भवन्ति॥२५॥

सर्वे पुरुषाः। सर्वाण्येवान्नान्यव रुन्धे। सर्वान्पुरुषान्। राडंसि विराड्सीत्याह।  
स्वाराज्यमेवैनं गमयति। यद्विरण्यं ददाति। तेजस्तेनाव रुन्धे। यत्तिसृधन्वम्।  
वीर्यं तेन। यदष्ट्राम्॥२६॥

पुष्टिं तेन। यत्कमण्डलुम्। आयुष्टेन। यद्विरण्यमा बध्नाति। ज्योतिर्वै हिरण्यम्।  
ज्योतिरेवास्मिन्दधाति। अथो तेजो वै हिरण्यम्। तेज एवाऽऽत्मन्धत्ते। यदोदनं  
प्राश्नाति। एतदेव सर्वमवरुध्य॥२७॥

तदस्मिन्नेकधाऽधात्। रोहिण्यां कार्यः। यद्वाह्मण एव रोहिणी। तस्मादेव। अथो  
वर्ष्मैवैनं समानानां करोति। उद्यता सूर्येण कार्यः। उद्यन्तं वा एतं सर्वाः प्रजाः  
प्रतिनन्दन्ति। दिदृक्षेण्यो दर्शनीयो भवति। य एवं वेद। ब्रह्मवादिनो वदन्ति॥२८॥

अवेत्योऽवभृथा (३) ना (३) इति। यद्दर्भपुञ्जीलैः पवयति। तत्स्विदेवावैति।  
तन्नावैति। त्रिभिः पवयति। त्रयं इमे लोकाः। एभिरेवैनं लोकैः पवयति। अथो  
अपां वा एतत्तेजो वर्चः। यद्दर्भाः। यद्दर्भपुञ्जीलैः पवयति। अपामेवैनं तेजसा  
वर्चसाऽभिषिञ्चति॥२९॥ भवन्त्यष्टांमवरुध्यं वदन्ति दर्भा यद्दर्भपुञ्जीलैः पवयत्येकं च॥\_\_\_\_\_ [९]

प्रजापतिरकामयत बृहोर्भूयान्स्थ्यामिति। स एतं पञ्चशारदीयमपश्यत्।  
तमाऽहरत्। तेनायजत। ततो वै स बृहोर्भूयानभवत्। यः कामयैत  
बृहोर्भूयान्स्थ्यामिति। स पञ्चशारदीयेन यजेत। बृहोरेव भूयान्भवति। मरुथ्स्तोमो  
वा एषः। मरुतो हि देवानां भूयिष्ठाः॥३०॥

बृहोर्भवति। य एतेन यजते। य उचैनमेवं वेद। पञ्चशारदीयो भवति। पञ्च

वा ऋतवः संवत्सरेः। ऋतुष्वेव संवत्सरे प्रति तिष्ठति। अथो पञ्चाक्षरा पङ्क्तिः।  
 पाङ्क्तो यज्ञः। यज्ञमेवाव रुन्धे। सप्तदशः स्तोमा नाति यन्ति। सप्तदशः प्रजापतिः।  
 प्रजापतेरास्यै॥ ३१॥ भूयिष्ठा यन्ति द्वे च॥ [१०]

अगस्त्यो मरुद्ध्य उक्ष्णः प्रौक्षत्। तानिन्द्र आदत्त। त एनं वज्रमुद्यत्याभ्यायन्त।  
 तानगस्त्यश्चैवेन्द्रश्च कयाशुभीयेनाशमयताम्। ताञ्छान्तानुपाह्वयत। यत्कयाशुभीयं  
 भवति शान्त्यै। तस्मादेत ऐन्द्रामारुता उक्षाणः सवनीया भवन्ति। त्रयः प्रथमेऽहन्ना  
 लभ्यन्ते। एवं द्वितीयै। एवं तृतीयै॥ ३२॥

एवं चतुर्थे। पञ्चोत्तमेऽहन्ना लभ्यन्ते। वर्षिष्ठमिव ह्येतदहः। वर्षिष्ठः समानानां  
 भवति। य एतेन यजते। य उचैनमेवं वेद। स्वाराज्यं वा एष यज्ञः। एतेन वा  
 एकया वा कान्दमः स्वाराज्यमगच्छत्। स्वाराज्यं गच्छति। य एतेन यजते॥ ३३॥

य उ चैनमेवं वेद। मारुतो वा एषः स्तोमः। एतेन वै मरुतो देवानां भूयिष्ठा  
 अभवन्। भूयिष्ठः समानानां भवति। य एतेन यजते। य उ चैनमेवं वेद।



पञ्चशार्दीयो वा ए॒ष य॒ज्ञः। आ पञ्चमात्पुरु॑षादन्नम॑त्ति। य ए॒तेन॑ यज॑ते। य  
उ॒ चैनमे॒वं वेद॑। सप्त॒दश॑ स्तोमा॒ नाति॑ यन्ति। सप्त॒दशः प्र॒जाप॑तिः। प्र॒जाप॑तेरे॒व  
नैति॑॥ ३४॥

तृतीयं गच्छति य एतेन यजतेऽति य एतेन यजते य उ चैनमेवं वेद त्रीणि च (अगस्त्यः स्वाराज्यं मारुतः पञ्चशार्दीयो वा एष  
यज्ञः सप्तदशं प्रजापतेरेव नैति॥)॥

[११]

अ॒स्या जरा॑सो द॒मा म॒रित्राः॑। अ॒र्चद्धू॑मासो अ॒ग्नयः॑ पाव॒काः। श्वि॒चीच॑यः श्वा॒त्रासो॑  
भुर॒ण्यवः॑। व॒न॒रूष॑दो वा॒यवो॑ न सोमाः॑। यजा॑ नो मि॒त्रावरु॑णा। यजा॑ दे॒वाः ऋ॑तं  
बृ॒हत्। अ॒ग्ने यक्षि॑ स्व॒न्दम॑म्। अ॒श्वि॒ना पि॑ब॒तः सु॒तम्। दी॒द्य॒ग्नी शु॑चि॒व्रता॑। ऋ॒तुना॑  
य॒ज्ञवा॑हसा॥ ३५॥

द्वे विरूपे चरतः स्वर्थे। अन्याऽन्यां वृत्समुप धापयेते। हरिरन्यस्यां भवति  
स्वधावान्। शुक्रो अन्यस्यां ददृशे सुवर्चाः। पूर्वापरं चरतो माययैतौ। शिशू क्रीडन्तौ  
परि यातो अध्वरम्। विश्वान्यन्यो भुवनाऽभि चष्टे। ऋतूनन्यो विदधञ्जायते पुनः।  
त्रीणि शता त्रीषहस्राण्यग्निम्। त्रिंशच्च देवा नव चाऽसपर्यन्॥ ३६॥

औक्षं घृतैरास्तृणन्बृहिरस्मै। आदिद्धोतारं न्यषादयन्त। अग्निनाऽग्निः

समिध्यते। कविर्गृहपतिर्युवा॥ हव्यवाङ्मुहोऽऽस्यः। अग्निर्देवानां जठरम्। पूतदक्षः  
कविक्रतुः। देवो देवेभिरा गमत्। अग्निश्रियो मरुतो विश्वकृष्टयः। आ त्वेषमुग्रमव  
ईमहे वयम्॥ ३७॥

ते स्वानिनो रुद्रिया वरुषनिर्णिजः। सिंहा न हेषक्रतवः सुदानवः। यदुत्तमे  
मरुतो मध्यमे वा। यद्वाऽवमे सुभगासो दिवि ष्ट। ततो नो रुद्रा उत वाऽन्वस्य।  
अग्ने वित्ताद्धविषो यद्यजामः। ईडे अग्निः स्ववसन्नमोभिः। इह प्रसप्तो वि च  
यत्कृतं नः। रथैरिव प्रभरे वाजयद्धिः। प्रदक्षिणिन्मरुताः स्तोममृद्ध्याम्॥ ३८॥

श्रुधि श्रुत्कर्ण वह्निभिः। देवैरग्ने सयावभिः। आसीदन्तु बर्हिषि।  
मित्रो वरुणो अर्यमा। प्रातर्यावाणो अध्वरम्। विश्वेषामदितिर्यज्ञियानाम्।  
विश्वेषामतिथिर्मानुषाणाम्। अग्निर्देवानामव आवृणानः। सुमृडीको भवतु  
विश्ववेदाः। त्वे अग्ने सुमतिं भिक्षमाणाः॥ ३९॥

दिवि श्रवो दधिरे यज्ञियांसः। नक्ता च चक्रुरुषसा विरूपे। कृष्णं च

वर्णमरुणं च सन्धुः। त्वामग्न आदित्यास आस्यम्। त्वां जिह्वां शुचयश्चक्रिरे  
 कवे। त्वां रातिषाचो अध्वरेषु सश्विरे। त्वे देवा हविरदन्त्याहुतम्। नि त्वां  
 यज्ञस्य साधनम्। अग्ने होता रमृत्विजम्। वनुष्वदेव धीमहि प्रचेतसम्। जीरं  
 दूतममर्त्यम्॥४०॥ युज्वाहुसासपर्यन्वयमुद्धां भिक्षमाणाः प्रचेतसमेकं च॥ [१२]

तिष्ठा हरी रथ आ युज्यमाना याहि। वायुर्न नियुतो नो अच्छ। पिबास्यन्धो  
 अभिसृष्टो अस्मे। इन्द्रः स्वाहा ररिमा ते मदाय। कस्य वृषा सुते सचा।  
 नियुत्वान्वृषभो रणत्। वृत्रहा सोमपीतये। इन्द्रं वयं महाधने। इन्द्रमर्भे हवामहे।  
 युजं वृत्रेषु वज्रिणम्॥४१॥

द्विता यो वृत्रहन्तमः। विद इन्द्रः शतक्रतुः। उप नो हरिभिः सुतम्। स सूर  
 आजुनयं ज्योतिरिन्द्रम्। अया धिया तरणिरद्विबर्हाः। ऋतेन शुष्मी नवमानो  
 अर्केः। व्युसिधो अस्रो अद्विर्बिभेद। उतत्यदाश्वश्चियम्। यदिन्द्र नाहुषीष्वा। अग्ने  
 विक्षु प्रतीदयत्॥४२॥

भरे॒ष्विन्द्र॑ सु॒हव॑ हवामहे। अ॒होमुच॑ सु॒कृतं॑ दैव्यं जनम्। अ॒ग्निं मि॒त्रं  
वरु॑णं सा॒तये॒ भग॑म्। द्यावा॑पृथि॒वी म॒रुतः॑ स्व॒स्तये॑। म॒हि क्षेत्रं॑ पु॒रुश्च॒न्द्रं  
वि वि॒द्वान्। आदि॑त्सखि॒भ्यश्च॒रथ॑ समै॒रत्। इन्द्रो॑ नृभि॑रज॒न॒द्दी॒द्यानः॑ सा॒कम्।  
सूर्य॑मुष॒सं गा॒तुम॒ग्निम्। उ॒रुं नो॑ लो॒कम॑नु॒ नेषि॑ वि॒द्वान्। सुव॑र्व॒ज्योति॑रभय॑  
स्व॒स्ति॥४३॥

ऋ॒ष्वा तं॑ इन्द्र॒ स्थवि॑रस्य बा॒हू। उप॑स्थेयाम शर॒णा बृ॒हन्ता॑। आ नो॒  
विश्वा॑भि॒रू॒तिभिः॑ स॒जोषाः॑। ब्र॒ह्म जुषा॑णो ह॒र्यश्च॑ याहि। वरी॑वृ॒ज॒त्स्थवि॑रेभिः  
सुशि॒प्र। अ॒स्मे दध॑द्वृष॒णं शु॒ष्ममिन्द्र॑। इन्द्रा॑य॒ गावं॑ आ॒शिर॑म्। दु॒दुहे॑ व॒ज्रिणे॑  
मधु॑। यत्सी॑मुप॒हृरे॑ वि॒दत्। तास्ते॑ व॒ज्रि॒न्येन॑वो॒ जोज॑युर्नः॥४४॥

गभ॑स्तयो नि॒युतो॑ वि॒श्ववा॑राः। अ॒हर॑ह॒र्भूय॑ इ॒ज्जोगु॑वानाः। पूर्णा॑ इन्द्र॒ क्षुम॑तो  
भो॒ज॑नस्य। इ॒मां ते॒ धियं॑ प्र भ॑रे म॒हो म॒हीम्। अ॒स्य स्तो॒त्रे धि॑षणा॒ यत्त॑ आ॒न॒जे।  
तमु॑त्स॒वे च॑ प्रस॒वे च॑ सास॒हिम्। इन्द्रं॑ दे॒वासः॑ शव॑सा म॒दं ननु॑॥४५॥

वृ॒ज्रिणा॑मय॒त्स्वस्ति॑ जौज॑युर्नः

प्रजापतिः पशून्सृजत। तैऽस्मात्सृष्टाः परां च आयन्। तानग्निष्टोमेन  
 नाऽऽप्रोत्। तानुक्थ्येन नाऽऽप्रोत्। तान्धोडुशिना नाऽऽप्रोत्। तान्नात्रिया  
 नाऽऽप्रोत्। तान्ध्वसिना नाऽऽप्रोत्। सौऽग्निमब्रवीत्। इमान्म ईप्सेति।  
 तानग्निस्त्रिवृता स्तोमेन नाऽऽप्रोत्॥४६॥

स इन्द्रमब्रवीत्। इमान्म ईप्सेति। तानिन्द्रः पञ्चदशेन स्तोमेन नाऽऽप्रोत्।  
 स विश्वान्देवानब्रवीत्। इमान्म ईप्सेतेति। तान् विश्वेदेवाः सप्तदशेन स्तोमेन  
 नाऽऽप्नुवन्। स विष्णुमब्रवीत्। इमान्म ईप्सेति। तान् विष्णुरेकविंशेन  
 स्तोमेनाऽऽप्रोत्। वारवन्तीयेनावारयत॥४७॥

इदं विष्णुर्वि चक्रम इति व्यक्रमत। यस्मात्पशवः प्रप्रेव भ्रंशैरन्। स एतेन  
 यजेत। यदाप्रोत्। तदप्सोर्यामस्याप्सोर्यामत्वम्। एतेन वै देवा जैत्वानि जित्वा।  
 यं काममकामयन्त तमाऽऽप्नुवन्। यं कामं कामयते। तमेतेनाऽऽप्रोति॥४८॥

नाऽऽप्रोदवारयत् नवं च॥

[१४]

व्याघ्रोऽयमग्नौ चरति प्रविष्टः। ऋषीणां पुत्रो अभिशस्तिपा अयम्। नमस्कारेण

नमंसा ते जुहोमि। मा देवानां मिथुयाकर्म भागम्। सावीरुहि देव प्रसवायं पित्रे।  
वर्ष्माणमस्मै वरिमाणमस्मै। अथास्मभ्यः सवितः सर्वताता। दिवेदिव आ सुवा  
भूरि पश्वः। भूतो भूतेषु चरति प्रविष्टः। स भूतानामधिपतिर्बभूव॥४९॥

तस्य मृत्यौ चरति राजसूयम्। स राजा राज्यमनु मन्यतामिदम्। येभिः  
शिल्पैः पप्रथानामदहत्। येभिर्द्वामभ्यपिः शत्रुजापतिः। येभिर्वाचं विश्वरूपाः  
समव्ययत्। तेनेममग्र इह वर्चसा समङ्घि। येभिरादित्यस्तपति प्र केतुभिः।  
येभिः सूर्यो ददृशे चित्रभानुः। येभिर्वाचं पुष्कलेभिरव्ययत्। तेनेममग्र इह वर्चसा  
समङ्घि॥५०॥

आऽयं भातु शवसा पञ्च कृष्टीः। इन्द्र इव ज्येष्ठो भवतु प्रजावान्। अस्मा  
अस्तु पुष्कलं चित्रभानु। आऽयं पृणक्तु रजसी उपस्थम्। यत्ते शिल्पं कश्यप  
रोचनावत्। इन्द्रियावत्पुष्कलं चित्रभानु। यस्मिन्सूर्या अर्पिताः सप्त साकम्।  
तस्मिन्नाजानमधि विश्रयेमम्। द्यौरसि पृथिव्यसि। व्याघ्रो वैयाघ्रेऽधि॥५१॥

विश्रयस्व दिशो महीः। विशस्त्वा सर्वा वाञ्छन्तु। मा त्वद्राष्ट्रमधि भ्रशत्।  
 या दिव्या आपः पयसा सम्बभूवुः। या अन्तरिक्ष उत पार्थिवीर्याः। तासां त्वा  
 सर्वासां रुचा। अभिषिञ्चामि वर्चसा। अभि त्वा वर्चसाऽसिचं दिव्येन। पयसा  
 सह। यथासां राष्ट्रवर्धनः॥५२॥

तथा त्वा सविता करत्। इन्द्रं विश्वा अवीवृधन्। समुद्रव्यचसङ्गिरः। रथीतमं  
 रथीनाम्। वाजानां सत्पतिं पतिम्। वसवस्त्वा पुरस्तादभिषिञ्चन्तु गायत्रेण  
 छन्दसा। रुद्रास्त्वा दक्षिणतोऽभिषिञ्चन्तु त्रैष्टुभेन छन्दसा। आदित्यास्त्वा  
 पश्चादभिषिञ्चन्तु जागतेन छन्दसा। विश्वे त्वा देवा उत्तरतोऽभिषिञ्चन्तु त्वाऽनुष्टुभेन  
 छन्दसा। बृहस्पतिस्त्वोपरिष्ठादभिषिञ्चन्तु पाङ्केन छन्दसा॥५३॥

अरुणं त्वा वृकमुग्रङ्गजङ्कुरम्। रोचमानं मरुतामग्रे अर्चिषः। सूर्यवन्तं मघवानं  
 विषासहिम्। इन्द्रमुक्थेषु नामहूतमं हुवेम। प्र बाहवांसि ससृतं जीवसे नः। आ

नो गव्यूतिमुक्षतं घृतेन। आ नो जनै श्रवयतं युवाना। श्रुतं मे मित्रावरुणा हवेमा।  
 इन्द्रस्य ते वीर्यकृतः। बाहू उपाव हारामि॥५४॥  
 छन्दसोपावहारामि॥

[१५]

अभि प्रेहि वीरयस्व। उग्रश्चेत्ता सपत्नहा। आतिष्ठ वृत्रहन्तमः। तुभ्यं  
 देवा अधिब्रवन्। अङ्गौ न्यङ्गावभितो रथं यौ। ध्वान्तं वाताग्रमनु सञ्चरन्तौ।  
 दूरेहेतिरिन्द्रियावाँन्पतत्री। ते नोऽग्रयः पप्रयः पारयन्तु। नमस्त ऋषे गद।  
 अव्यथायै त्वा स्वधायै त्वा॥५५॥

मा न इन्द्राभितस्त्वदृष्वारिष्टासः। एवा ब्रह्मन्तवेदस्तु। तिष्ठा रथे अधि  
 यद्वज्रहस्तः। आ रश्मीन्दैव युवसे स्वश्वः। आ तिष्ठ वृत्रहन्नातिष्ठन्तं परि।  
 अनु त्वेन्द्रो मदत्वनु त्वा मित्रावरुणौ। द्यौश्च त्वा पृथिवी च प्रचेतसा। शुक्रो  
 बृहदक्षिणा त्वा पिपर्तु। अनु स्वधा चिकिता५ सोमो अग्निः। अनु त्वाऽवतु  
 सविता सवेन॥५६॥

इन्द्रं विश्वा अवीवृधन्। समुद्रव्यचसङ्गिरः। रथीतम५ रथीनाम्। वाजाना५



सत्पतिं पतिम्। परिमा सेन्या घोषाः। ज्यानां वृञ्जन्तु गृध्रवः। मेथिष्ठाः पिन्वमाना  
 इह। मां गोपतिमभि संविशन्तु। तन्मेऽनुमतिरनु मन्यताम्। तन्माता पृथिवी  
 तत्पिता द्यौः॥५७॥

तद्वावाणः सोमसुतो मयोभुवः। तदश्विना शृणुतः सौभगा युवम्। अव ते हेड  
 उदुत्तमम्। एना व्याघ्रं परिषस्वजानाः। सिःहः हिन्वन्ति महते सौभगाय। समुद्रं  
 न सुहुवंतस्थिवाःसम्। मर्मज्यन्ते द्वीपिनमप्स्वन्तः। उदसावेतु सूर्यः। उदिदं  
 मामकं वचः। उदिहि देव सूर्य। सह वग्नुना मम। अहं वाचो विवाचनम्। मयि  
 वागस्तु धर्णसिः। यन्तु नदयो वर्षन्तु पर्जन्याः। सुपिप्पला ओषधयो भवन्तु।  
 अन्नवतामोदनवतामामिक्षवताम्। एषाः राजा भूयासम्॥५८॥

च॥ स्वधार्थं त्वा सवेन द्यौः सूर्य सप्त

[१६]

ये केशिनः प्रथमाः सत्रमासता। येभिराभृतं यदिदं विरोचते। तेभ्यो जुहोमि  
 बहुधा घृतेन। रायस्पोषेणेमं वर्चसा सः सृजाथ। नर्ते ब्रह्मणस्तपसो विमोकः।  
 द्विनाम्नी दीक्षा वशिनी ह्युग्रा। प्र केशाः सुवर्ते काण्डिनो भवन्ति। तेषां ब्रह्मेदीशे

वप॑नस्य॒ नान्यः॑। आ रो॑ह॒ प्रोष्ठं॑ विष॑हस्व॒ शत्रून्॑। अवा॑स्त्राग्दीक्षा व॒शिनी॒ ह्यु॒ग्रा॥५९॥

दे॒हि दक्षि॑णां॒ प्रति॑र॒स्वायुः॑। अथा॑मुच्यस्व॒ वरु॑णस्य॒ पाशा॑त्। येना॑वप॒थ्सवि॑ता  
क्षुरे॑ण। सोम॑स्य॒ राज्ञो॒ वरु॑णस्य वि॒द्वान्। तेन॑ ब्रह्मा॒णो वप॑ते॒दम॒स्योर्जे॑मम्। र॒य्या  
वर्च॑सा॒ स॒ सृ॑जाथ। मा ते॒ केशा॑ननु॒ गा॒द्वर्च॑ ए॒तत्। तथा॑ धा॒ता क॑रोतु ते।  
तुभ्य॑मिन्द्रो बृह॒स्पतिः॑। स॒वि॒ता वर्च॑ आद॑धात्॥६०॥

तेभ्यो॑ नि॒धानं॑ बहु॒धा व्यैच्छ॑न्। अ॒न्तरा॑ द्यावा॑पृथि॒वी अ॒पः सु॒वः। द॒र्भस्त॒म्बे  
वीर्य॑कृते नि॒धाय॑। पौ॒॒॒॒स्ये॒नेमं॑ वर्च॑सा॒ स॒ सृ॑जाथ। बलं॑ ते बाहु॒वोः स॒वि॒ता  
द॑धातु। सोम॑स्त्वाऽनक्तु॒ पय॑सा घृ॒तेन॑। स्त्रीषु॑ रू॒पम॑श्वि॒नैत॑न्नि ध॑त्तम्। पौ॒॒॒॒स्ये॒नेमं॑  
वर्च॑सा॒ स॒ सृ॑जाथ। यथ्सी॒मन्तं॑ कङ्क॑तस्ते लि॒लेख॑। यद्वा॑ क्षुरः प॑रि॒व॒वर्ज॑ वप॑स्ते।  
स्त्रीषु॑ रू॒पम॑श्वि॒नैत॑न्नि ध॑त्तम्। पौ॒॒॒॒स्ये॒नेम॑ स॒ सृ॑जाथो वी॒र्ये॑ण॥६१॥

ह्यु॒ग्राऽद॑धाद्वर्जं वप॑स्ते द्वे च॥

[१७]

इन्द्रं॑ वै स्वावि॒शो म॒रुतो॑ नापा॑चायन्। सोऽन॑पचाय्यमान ए॒तं वि॑घ्नम॑पश्यत्।

तमाऽहरत्। तेनायजत। तेनैवासान्तं सः स्तुम्भं व्यहन्। यद्व्यहन्। तद्विघ्नस्य विघ्नत्वम्। वि पाप्मानं भ्रातृव्यं हते। य एतेन यजते। य उं चैनमेवं वेद॥६२॥

यं राजानं विशो नापचार्येयुः। यो वा ब्राह्मणस्तमसा पाप्मना प्रावृतः स्यात्। स एतेन यजेत। विघ्नेनैवैनद्विहत्य। विशामाधिपत्यं गच्छति। तस्य द्वे द्वादशे स्तोत्रे भवतः। द्वे चतुर्विंशे। औद्भिद्यमेव तत्। एतद्वै क्षत्रस्यौद्भिद्यम्। यदस्मै स्वाविशो बलिं हरन्ति॥६३॥

हरन्त्यस्मै विशो बलिम्। ऐनमप्रतिख्यातं गच्छति। य एवं वेद। प्रबाहुगवा अग्रे क्षत्राण्यातेपुः। तेषामिन्द्रः क्षत्राण्यादत्त। न वा इमानि क्षत्राण्यभूवन्निति। तन्नक्षत्राणां नक्षत्रत्वम्। आ श्रेयसो भ्रातृव्यस्य तेज इन्द्रियं दत्ते। य एतेन यजते। य उं चैनमेवं वेद॥६४॥

तद्यथा ह वै संचक्रिणौ कल्लकावुपावहितौ स्याताम्। एवमेतौ युग्मन्तौ स्तोमौ। अयुक्षु स्तोमेषु क्रियेते। पाप्मनोऽपहत्यै। अपं पाप्मानं भ्रातृव्यं हते। य एतेन यजते। य उं चैनमेवं वेद। तद्यथा ह वै सूतग्रामण्यः। एवं छन्दांसि।

तेष्वसावादित्यो बृहतीरभ्यूढः॥६५॥

सुतो बृहतीषु स्तुवते सुतो बृहन् प्रजयां पशुभिरसानीत्येव। व्यतिषक्ताभिः  
स्तुवते। व्यतिषक्तं वै क्षत्रं विशा। विशैवैनं क्षत्रेण व्यतिषजति। व्यतिषक्ताभिः  
स्तुवते। व्यतिषक्तो वै ग्रामणीः सजातैः। सजातैरेवैनं व्यतिषजति। व्यतिषक्ताभिः  
स्तुवते। व्यतिषक्तो वै पुरुषः पाप्मभिः। व्यतिषक्ताभिरेवास्य पाप्मनो नुदते॥६६॥

हरन्त्येनमेवं वेदाभ्यूढः पाप्मभिरैकं च॥

[१८]

त्रिवृद्धाग्नेयौऽग्निमुखा हृद्विर्यदाग्नेय आग्नेयो न वै सोमं न यो वै सोमं नैष गंसुवः सिंहेऽभि प्रेहिं मित्रवर्धनः प्रजापतिस्ता ओदनं प्रजापतिरकामयत  
बहोर्भूयान्गस्त्योस्या जरांसस्तिष्ठा हरीं प्रजापतिः पशून्व्याघ्रौऽयमभिप्रेहिं वृत्रहन्तमो ये केशिन् इन्द्रं वा अष्टादश॥१८॥

त्रिवृद्धो वै सोमेनायुरसि बहुर्भवति तिष्ठा हरीरथ आयं भातु तेभ्यो निधानं पदर्थंष्टिः॥६६॥

त्रिवृत्पाप्मनो नुदते॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके सप्तमः प्रपाठकः समाप्तः॥

॥ अष्टमः प्रश्नः ॥

॥ तैत्तिरीयब्राह्मणे द्वितीयाष्टके अष्टमः प्रपाठकः ॥

पीवो॑न्ना॒ꣳ रयि॑वृधः सुमे॒धाः। श्वे॒तः सि॑षक्ति नि॒युता॑मभि॒श्रीः। ते वा॒यवे॒ सम॑नसो  
 वित॑स्थुः। विश्वे॑न्नरः स्वप॒त्यानि॑ चक्रुः। रा॒येऽनु॑ यञ्ज॒ज्ञतू॑ रोद॑सी उ॒भे। रा॒ये दे॒वी  
 धि॒षणा॑ धाति दे॒वम्। अधा॑ वा॒युं नि॒युतः॑ सश्चत॒ स्वाः। उ॒त श्वे॒तं वसु॑धिति॒न्निरे॑के।  
 आ वा॑यो॒ प्र या॑भिः। प्र वा॒युम॑च्छा बृह॒ती म॑नी॒षा॥१॥

बृह॑द्रयिं वि॒श्ववा॑राꣳ रथ॒प्राम्। द्यु॒तद्या॑मा नि॒युतः॑ पत्य॒मानः। क॒विः  
 क॒विमि॑यक्षसि प्रयज्यो। आ नो॑ नि॒युद्धिः॑ श॒तिनी॑भिरध्व॒रम्। स॒हस्रि॑णीभि॒रुप॑  
 याहि॑ य॒ज्ञम्। वा॒यो अ॒स्मिन् ह॒विषि॑ मादयस्व। यू॒यं पा॑त स्व॒स्तिभिः॑ सदा॑ नः।  
 प्रजा॑पते॒ न त्वदे॑तान्य॒न्यः। विश्वा॑ जा॒तानि॑ परि॒ ता ब॑भूव। यत्का॑मास्ते जुहुमस्तं  
 नो॑ अस्तु॥२॥

वय॑ꣳ स्या॑म॒ पत॑यो रयी॒णाम्। रयी॑णां पतिं यज॒तं बृ॑हन्तम्। अ॒स्मिन्भरे॑ नृ॒तम॑  
 वाज॑सातौ। प्र॒जाप॑तिं प्रथम॒जामृ॑तस्य। यजा॑म दे॒वमधि॑ नो ब्रवीतु। प्रजा॑पते॒

त्वन्निधिपाः पुराणः। देवानां पिता जनिता प्रजानाम्। पतिर्विश्वस्य जगतः परस्पाः।  
हविर्नो देव विहवे जुषस्व। तवेमे लोकाः प्रदिशो दिशश्च॥३॥

पुरावतो निवतं उद्वतंश्च। प्रजापते विश्वसृज्जीवधन्य इदं नो देव। प्रतिहर्य  
हव्यम्। प्रजापतिं प्रथमं यज्ञियांनाम्। देवानामग्रे यजतं यजध्वम्। स नो ददातु  
द्रविणं सुवीर्यम्। रायस्पोषं विष्यंतु नाभिंस्मे। यो राय ईशे शतदाय उक्थ्यः।  
यः पशूनां रक्षिता विष्टितानाम्। प्रजापतिः प्रथमजा ऋतस्य॥४॥

सहस्रधामा जुषतां हविर्नः। सोमापूषणमौ देवौ। सोमापूषणा रजसो  
विमानम्। सप्तचक्रं रथमविश्वमिन्वम्। विषूवृतं मनसा युज्यमानम्। तं जिन्वथो  
वृषणा पञ्चरश्मिम्। दिव्यन्यः सदनं चक्र उच्चा। पृथिव्यामन्यो अध्यन्तरिक्षे।  
तावस्मभ्यं पुरुवारं पुरुक्षुम्। रायस्पोषं विष्यन्तान्नाभिंस्मे॥५॥

धियं पूषा जिन्वतु विश्वमिन्वः। रयिं सोमो रयिपतिर्दधातु। अवंतु  
देव्यदितिरनर्वा। बृहद्वदेम विदथे सुवीराः। विश्वान्यन्यो भुवना जजान।

विश्वम॒न्यो अ॒भि॒चक्षा॑ण एति। सोमा॑पूषणा॒वव॑तं धियं मे। युव॒भ्यां विश्वाः॑ पृ॒तना॑  
जयेम। उदु॑त्तमं वरु॒णास्त॑भ्रा॒द्याम्। यत्किं चेदं कि॒त॒वासः॑। अव॑ ते हेड॒स्तत्त्वा॑  
यामि। आ॒दि॒त्याना॑मव॑सा न दक्षि॒णा। धा॒रय॑न्त आदि॒त्यास॑स्ति॒स्रो भूमी॑र्धारयन्।  
य॒ज्ञो दे॒वाना॑ ५ शुचि॑रपः ॥ ६ ॥ मनीषाऽस्तु चर्तस्यास्मे कित्वासंश्चत्वारि च ॥ [१]

ते शु॒क्रासः॑ शुच॑यो रश्मि॒वन्तः॑। सीद॑न्नादि॒त्या अधि॑ ब॒र्हिषि॑ प्रि॒ये। कामे॑न  
दे॒वाः स॒रथं॑ दि॒वो नः॑। आ या॑न्तु य॒ज्ञमुप॑ नो जुषा॒णाः। ते सून॑वो अदि॑तेः  
पीव॑सामिषम्। घृ॒तं पि॒न्वत्प्रति॑हर्य॒न्वृते॑जाः। प्र य॒ज्ञिया॑ यज॑मानाय येमुरे।  
आ॒दि॒त्याः कामं॑ पि॒तुम॑न्त॒मस्मे॑। आ नः॑ पु॒त्रा अदि॑तेर्या॒न्तु य॒ज्ञम्। आ॒दि॒त्यासः॑  
प॒थिभि॑र्दे॒वयानैः॑ ॥ ७ ॥

अ॒स्मे कामं॑ दा॒शुषे॑ स॒न्नम॑न्तः। पुरो॑डाशं घृ॒तव॑न्तं जुषन्ताम्। स्क॒भाय॑त  
नि॒र्ऋ॑ति ५ सेध॒ताम॑तिम्। प्र र॒श्मिभि॑र्यत॑माना अमृ॒ध्राः। आदि॑त्याः काम॒ प्रय॑तां  
वष॑ट्कृतिम्। जुष॒ध्वं नो ह॒व्यदा॑तिं यज॒त्राः। आ॒दि॒त्यान्काम॑मव॑से हुवेम। ये भू॒तानि॑

ज॒नय॑न्तो विचि॒ख्युः। सीद॑न्तु पु॒त्रा अदि॑तेरु॒पस्थ॑म्। स्ती॒र्णं ब॒र्हिर्ह॑वि॒रद्या॑य  
दे॒वाः॥८॥

स्ती॒र्णं ब॒र्हिः सी॑दता य॒ज्ञे अ॒स्मिन्। ध्रा॒जाः सेध॑न्तो॒ अम॑तिं दुरे॒वा॑म्। अ॒स्मभ्य॑  
पु॒त्रा अदि॑तेः प्र य॑स॒त। आदि॑त्याः का॒मं ह॒विषो॑ जुषा॒णाः। अ॒ग्ने नय॑ सु॒पथा॑  
रा॒ये अ॒स्मान्। वि॒श्वानि॑ दे॒व व॒युना॑नि वि॒द्वान्। यु॒यो॒ध्य॑स्मञ्जु॒हुरा॑णमे॒नः। भूयि॑ष्ठान्ते  
नम॑ उ॒क्तिं वि॒धेम। प्र वः॑ शु॒क्राय॑ भा॒नवे॑ भर॒ध्वम्। ह॒व्यं म॒तिं चा॒ग्नये॑ सु॒पूत॑म्॥९॥

यो दै॒व्यानि॑ मा॒नुषा॑ ज॒नू॒षि। अ॒न्तर्वि॑श्वानि वि॒द्वन्। जिगा॑ति। अ॒च्छा गि॒रो  
म॒तयो॑ दे॒वय॑न्तीः। अ॒ग्निं य॑न्ति द्रवि॑णं॒ भिक्ष॑माणाः। सु॒स॒न्द॒शं सु॒प्रती॑कं॒ स्व॒श्वम्।  
ह॒व्य॒वाह॑म॒रतिं॑ मा॒नुषा॑णाम्। अ॒ग्ने त्वम॑स्मद्यु॒यो॒ध्यमी॑वाः। अ॒न॒ग्नि॒त्रा अ॒भ्यम॑न्त  
कृ॒ष्टीः। पु॒नर॑स्मभ्यं॒ सुवि॑ताय॑ दे॒व। क्षां वि॒श्वेभिर॑जरे॒भिर्य॑जत्र॥१०॥

अ॒ग्ने त्वं पा॑रया॒ नव्यो॑ अ॒स्मान्। स्व॒स्तिभि॑रतिं दु॒र्गाणि॑ वि॒श्वानि॑। पू॒श्च पृ॒थ्वी  
ब॑हु॒ला न॑ उ॒र्वी। भ॒वा तो॒काय॑ तन॑याय॒ शं योः। प्रका॑रवो म॒न॒ना व॒च्यमा॑नाः।



देवद्रीचीं नयथ देवयन्तः। दक्षिणावाङ्वाजिनी प्राच्येति। हविर्भरन्त्यग्रये घृताचीं।  
इन्द्रं नरो युजे रथम्। जगृष्णाते दक्षिणमिन्द्र हस्तम्॥११॥

वसूयवो वसुपते वसूनाम्। विद्महि त्वा गोपतिः शूर गोनाम्। अस्मभ्यं  
चित्रं वृषेण रयिन्दाः। तवेदं विश्वमभितः पशव्यम्। यत्पश्यसि चक्षसा सूर्यस्य।  
गवामसि गोपतिरेकं इन्द्र। भक्षीमहि ते प्रयतस्य वस्वः। समिन्द्र णो मनसा नेषि  
गोभिः। स सूरिभिर्मघवन्त्स स्वस्त्या। सं ब्रह्मणा देवकृतं यदस्ति॥१२॥

सं देवानां सुमत्या यज्ञियानाम्। आराच्छत्रुमपं बाधस्व दूरम्। उग्रो यः  
शम्बः पुरुहूत तेन। अस्मे धेहि यवमद्रोमदिन्द्र। कृधीधियं जरित्रे वाजरत्नाम्।  
आ वेधसः स हि शुचिः। बृहस्पतिः प्रथमं जायमानः। महो ज्योतिषः परमे  
व्योमन्। सप्तास्यस्तुविजातो रवेण। वि सप्तरश्मिरधमत्तमांसि॥१३॥

बृहस्पतिः समजयद्वसूनि। महो ब्रजान्गोमतो देव एषः। अपः  
सिषासन्त्सुवरप्रतीतः। बृहस्पतिरुहन्त्यमित्रमर्केः। बृहस्पते पर्येवा पित्रे।

आ नो॑ दि॒वः पा॒वीर॑वी। इ॒मा जु॒ह्वा॑ना॒ यस्ते॒ स्तनः॑। सर॑स्वत्य॒भि नो॑ नेषि। इ॒यꣳ  
शुष्मे॑भिर्बि॒सखा॑ इ॒वारु॑जत्। सानुं॑ गिरी॒णान्त॑वि॒षेभि॑रु॒र्मिभिः॑। पा॒राव॑द॒घ्नीम॑व॒से  
सुवृ॑क्तिभिः। सर॑स्वती॒मा वि॑वासेम धी॒तिभिः॑॥१४॥ दे॒व्यानाँ॑ दे॒वाः सु॒पु॒तं यज॑न् ह॒स्तम॑स्ति॒ तमाँ॑स्यु॒र्मिभि॑र्द्वे

चं॥

[२]

सोमो॑ धे॒नुꣳ सोमो॑ अर्व॒न्तमा॑शुम्। सोमो॑ वी॒रं क॑र्म॒ण्यं द॑दातु। सा॒दन्यं॑ वि॒दथ्यꣳ  
स॒भेय॑म्। पि॒तुः श्र॑व॒णं यो द॑दा॒शद॑स्मै। अषा॑ढं यु॒थ्सु त्वꣳ सोम॑ क॒तुभिः॑। या ते॒  
धा॒मा॑नि ह॒विषा॑ यज॑न्ति। त्वमि॒मा ओष॑धीः सोम॑ वि॒श्वः। त्वम॒पो अ॑जनय॒स्त्वङ्गाः।  
त्वमा॑त॒तन्थो॑र्व॒न्तरि॑क्षम्। त्वं ज्योति॑षा॒ वि तमो॑ ववर्थ॥१५॥

या ते॒ धा॒मा॑नि दि॒वि या पृ॑थि॒व्याम्। या प॑र्व॒तेष्वोष॑धीष्व॒प्सु। तेभि॑र्नो॒ विश्वैः॑  
सु॒मना॑ अ॒हेड॑न्। राज॑न्त्य॒सोम॑ प्र॒ति ह॒व्या गृ॑भाय। वि॒ष्णोर्नु॑कं तद॑स्य प्रि॒यम्। प्र  
तद्वि॑ष्णुः। प॒रो मा॑त्र॒या त॒नुवा॑ वृ॒धान। न ते॒ महि॑त्वमन्व॒श्नु॑वन्ति। उ॒भे ते॒ विद्म॑  
रज॑सी पृथि॒व्या वि॑ष्णो॑ दे॒व त्वम्। प॒रम॑स्य॒ वि॒थ्से॑॥१६॥

विचक्रमे त्रिर्देवः। आ ते महो यो जात एव। अभि गोत्राणि। आभिः स्पृधो  
 मिथुतीररिषण्यन्। अमित्रस्य व्यथया मन्युमिन्द्र। आभिर्विश्वा अभियुजो विषूचीः।  
 आर्याय विशोवतारीर्दासीः। अयं शृण्वे अध जयन्नुत घ्नन्। अयमुत प्र कृणुते  
 युधा गाः। यदा सत्यं कृणुते मन्युमिन्द्रः॥१७॥

विश्वं दृढं भयत एजदस्मात्। अनु स्वधामक्षरन्नापो अस्य। अवर्धत मध्य आ  
 नाव्यानाम्। सध्रीचीनेन मनसा तमिन्द्र ओजिष्ठेन। हन्मनाहन्नभिद्यून्। मरुत्वंतं  
 वृषभं वावृधानम्। अकवारिं दिव्यं शासमिन्द्रम्। विश्वासाहमवसे नूतनाय। उग्रं  
 सहोदामिह तं हुवेम। जनिष्ठा उग्रः सहसे तुराय॥१८॥

मन्द्र ओजिष्ठो बहुलाभिमानः। अवर्धन्निन्द्र मरुतश्चिदत्र। माता यद्वीरं  
 दधनद्धनिष्ठा। कस्यावो मरुतः स्वधाऽऽसीत्। यन्मामेकं समधत्ताहिहत्ये।  
 अहं ह्युग्रस्तविषस्तुविष्मान्। विश्वस्य शत्रोरनमं वधस्त्रैः। वृत्रस्य त्वा श्वसथा  
 दीषमाणाः। विश्वे देवा अजहुर्ये सखायः। मरुद्विरिन्द्र सख्यं ते अस्तु॥१९॥

अथे॒मा वि॒श्वाः पृ॒त॒ना जया॑सि। वर्ध॑ीं वृ॒त्रं म॑रुत इन्द्रि॒येण॑। स्वेन॒ भामे॑न तवि॒षो  
ब॑भू॒वान्। अ॒हमे॑ता मन॑वे वि॒श्वश्च॑न्द्राः। सु॒गा अ॒पश्च॑कर॒ वज्र॑बाहुः। स यो वृषा॒  
वृ॒ष्णि॒येभिः॑ स॒मो॒काः। म॒हो दि॒वः पृ॒थि॒व्याश्च॑ स॒म्राट्। स॒ती॒नस॑त्वा ह॒व्यो भ॑रेषु।  
म॒रुत्वा॑ नो भव॒त्विन्द्र॑ ऊ॒ती। इन्द्रो॑ वृ॒त्रम॑तरद्वृ॒त्रतू॑र्ये॥२०॥

अ॒नाधृ॑ष्यो म॒घवा॒ शूर॒ इन्द्रः॑। अन्वे॑नं वि॒शो अ॑मदन्त पूर्वीः। अ॒य॑ राजा॒  
जग॑तश्च॒रष॑णीनाम्। स ए॒व वी॒रः स उ॑ वी॒र्या॑वान्। स ए॑करा॒जो जग॑तः पर॒स्याः।  
य॒दा वृ॒त्रम॑तर॒च्छूर॒ इन्द्रः॑। अथा॑भवद्द॒मिता॑भि॒क्र॑तूनाम्। इन्द्रो॑ य॒ज्ञं वर्ध॑यन्वि॒श्ववे॑दाः।  
पु॒रो॒डाश॑स्य जुष॒ता॑ ह॒विर्नः॑। वृ॒त्रं ती॒र्त्वा दा॑न॒वं वज्र॑बाहुः॥२१॥

दि॒शोऽदृ॑हद्दृ॒हि॒ता दृ॑ह॒णेन॑। इ॒मं य॒ज्ञं वर्ध॑यन्वि॒श्ववे॑दाः। पु॒रो॒डाशं॑ प्रति॒  
गृ॒ष्णा॒त्विन्द्रः॑। य॒दा वृ॒त्रम॑तर॒च्छूर॒ इन्द्रः॑। अथै॑करा॒जो अ॑भव॒ज्जनाना॑म्। इन्द्रो॑  
दे॒वाञ्छ॑म्बर॒हत्य॑ आवत्। इन्द्रो॑ दे॒वाना॑मभवत्पु॒रो॒गाः। इन्द्रो॑ य॒ज्ञे ह॒विषा॑  
वावृ॒धानः॑। वृ॒त्रतू॑र्नो अ॒भय॑ शर्म॒ य॑सत्। यः स॒प्त सि॒न्धू॑ र॒दधा॑त्पृथि॒व्याम्। यः

सप्त लोकानकृणोद्विशश्च। इन्द्रो हविष्मान्त्सगणो मरुद्भिः। वृत्रतूर्नो यज्ञमिहोप  
यासत्॥२२॥ वृत्रं विष्म इन्द्रस्तुरायास्तु वृत्रतूर्यं वज्रबाहुः पृथिव्याञ्चोणिं च॥ [३]

इन्द्रस्तरस्वानभिमातिहोग्रः। हिरण्यवाशीरिषिरः सुवर्षाः। तस्य वयं सुमतौ  
यज्ञियस्य। अपि भद्रे सौमनसे स्याम। हिरण्यवर्णो अभयं कृणोतु। अभिमातिहेन्द्रः  
पृतनासु जिष्णुः। स नः शर्म त्रिवरूथं वि यंसत्। यूयं पात स्वस्तिभिः सदा  
नः। इन्द्रं स्तुहि वज्रिणं स्तोमपृष्ठम्। पुरोडाशस्य जुषतां हविर्नः॥२३॥

हत्वाभिमातीः पृतनाः सहस्वान्। अथाभयं कृणुहि विश्वतो नः। स्तुहि शूरं  
वज्रिणमप्रतीतम्। अभिमातिहनं पुरुहूतमिन्द्रम्। य एक इच्छतपतिर्जनेषु।  
तस्मा इन्द्राय हविरा जुहोत। इन्द्रो देवानामधिपाः पुरोहितः। दिशां  
पतिरभवद्वाजिनीवान्। अभिमातिहा तविषस्तुविष्मान्। अस्मभ्यं चित्रं वृषणं  
रयिन्दात्॥२४॥

य इमे द्यावापृथिवी महित्वा। बलेनादहदभिमातिहेन्द्रः। स नो हविः प्रति

गृभ्णातु रा॒तये॑। दे॒वानां॑ दे॒वो नि॑धि॒पा नो॑ अव्यात्। अन॑वस्ते॒ रथं॑ वृ॒ष्णे य॑त्ते॑।  
इन्द्र॑स्य॒ नु वी॒र्या॑ण्यह॒न्नहि॑म्। इन्द्रो॑ या॒तोऽव॑सितस्य॒ राजा॑। श॒मस्य॑ च शृ॒ङ्गिणो॑  
वज्र॑बाहुः। सेदु॒ राजा॑ क्षेति च॒र्षणी॑नाम्। अ॒रान्न ने॒मिः परि॒ ता ब॑भूव॥२५॥

अ॒भि सि॒ध्मो अ॑जिगादस्य॒ शत्रू॑न्। वि॒तिग्मे॑न॒ वृष॑भेणा॒ पुरो॑भेत्। सं  
वज्रे॑णासृजद्वृ॒त्रमिन्द्रः॑। प्र॒ स्वां म॒तिम॑तिर॒च्छाश॑दानः। वि॒ष्णुं दे॒वं वरु॑णमू॒तये॑  
भग॑म्। मेद॑सा दे॒वा व॒पया॑ यजध्वम्। ता नो॑ य॒ज्ञमा॑गतं वि॒श्वधे॑ना। प्र॒जाव॑द॒स्मे  
द्रवि॑णे॒ह ध॑त्तम्। मेद॑सा दे॒वा व॒पया॑ यजध्वम्। वि॒ष्णुं च दे॒वं वरु॑णं च रा॒तिम्॥२६॥

ता नो॒ अमी॑वा अप॒ बाध॑मानौ। इ॒मं य॒ज्ञं जु॑षमा॒णावु॑पेतम्। वि॒ष्णूवरु॑णा  
यु॒वम॑ध्व॒राय॑ नः। वि॒शे जना॑य॒ महि॑ श॒र्म य॑च्छतम्। दी॒र्घप्र॑य॒ज्यू ह॒विषा॑ वृ॒धा॒ना।  
ज्योति॑षाऽरा॑तीर्द॒हत॑न्तमा॒सि। ययो॒रोज॑सा स्क॒भि॒ता र॒जासि॑। वी॒र्ये॑भिर्वी॒रत॑मा॒  
शवि॑ष्ठा। याऽप॒त्ये ते॒ अप्र॑ती॒त्ता स॒होभिः॑। वि॒ष्णू अ॒ग॒न्वरु॑णा पृ॒र्वहू॑तौ॥२७॥

वि॒ष्णूवरु॑णाव॒भि॒शस्ति॑पा॒वा॑म्। दे॒वा य॑जन्त॒ ह॒विषा॑ घृ॒तेन॑। अ॒पामी॑वा॒ सेध॑त॒

रक्षसंश्च। अथाधत्तं यजमानाय शं योः। अ॒हो॒मुचां वृष॒भा सुप्र॑तूर्ती। दे॒वानां  
दे॒वता॑मा॒ शचि॑ष्ठा। विष्णू॑वरुणा॒ प्रति॑हर्यतन्नः। इ॒दं नरा॒ प्रय॑तमू॒तर्ये॑ ह॒विः। म॒ही नु  
द्यावा॑पृथि॒वी इ॒ह ज्ये॑ष्ठै। रु॒चा भ॑वता॒ शुच॑र्यद्वि॒रकैः॥२८॥

यथ्सीं॒ वरि॑ष्ठे बृह॒ती वि॑मि॒न्वन्। नृ॒वद्भ्यो॒क्षा प॑प्रथा॒नेभि॑रेवैः। प्रपूर्॒वजे॑ पि॒तरा॒  
नव्य॑सीभिः। गी॒र्भिः कृ॑णुध्व॒ स॒दने॑ ऋ॒तस्य॑। आ नो॑ द्यावापृथि॒वी दै॒व्येन॑। जने॑न  
यातं॒ महि॑ वां वरू॒थम्। स इ॒थ्स्वपा॒ भुव॑नेष्वा॒स। य इ॒मे द्यावा॑पृथि॒वी ज॒जान॑।  
उ॒र्वी ग॑भी॒रे रज॑सी सु॒मेकै॑। अ॒व॒शे धी॒रः श॒च्या॒ समै॑रत्॥२९॥

भूरिं॒ द्वे अच॑रन्ती॒ चर॑न्तम्। प॒द्वन्तं॒ गर्भ॑म॒पदी॑दधाते। नित्यं॒ न स॒नुं पि॒त्रोरु॑पस्थे।  
तं पि॑पृत॒ रोद॑सी सत्य॒वाचम्। इ॒दं द्यावा॑पृथि॒वी स॒त्यम॑स्तु। पि॒त॒र्मा॒तर्य॑दि॒होप॑  
ब्रु॒वे वा॑म्। भू॒तं दे॒वाना॑म॒वमे॑ अ॒वो॑भिः। वि॒द्यामे॒षं वृ॒जनं॑ जी॒रदा॑नुम्। उ॒र्वी पृ॒थ्वी  
ब॑हु॒ले दू॒रे अ॑न्ते। उप॑ ब्रु॒वे नम॑सा॒ यज्ञे॑ अ॒स्मिन्। दधा॑ते॒ ये सु॒भगे॑ सुप्र॑तूर्ती।  
द्यावा॒ रक्ष॑तं पृथि॒वी नो॒ अ॒भ्वा॑त्। या जा॒ता ओष॑ध॒योऽति॑ वि॒श्वाः परि॑ष्ठाः।

या ओषधयः सोमराज्ञीरश्वावती५ सोमवतीम्। ओषधीरिति मातरोऽन्या वो  
अन्यामवतु॥३०॥ हविर्ना दाद्वभूव रतिं पूर्वहतावकैरैरदस्मिन्पञ्च च॥ [४]

शुचिं नु स्तोमं५ श्वथद्वृत्रम्। उभा वामिन्द्राग्नी प्र चर्षणिभ्यः। आ वृत्रहणा  
गीर्भिर्विप्रः। ब्रह्मणस्पते त्वमस्य यन्ता। सूक्तस्य बोधि तनयं च जिन्वा विश्वं तद्भद्रं  
यद्वन्ति देवाः। बृहद्वदेम विदथे सुवीराः। स ई५ सत्येभिः सखिभिः शुचद्विः।  
गोधायसं विधनसैरतर्दत्। ब्रह्मणस्पतिर्वृषभिर्वराहैः॥३१॥

घर्मस्वेदेभिर्द्रविणं व्यानट्। ब्रह्मणस्पतेरभवद्यथावशम्। सत्यो मन्युर्महि कर्मा  
करिष्यतः। यो गा उदाजुत्स दिवे वि चाभजत्। महीवं रीतिः शवंसा सरत्पृथक्।  
इन्द्रानो अग्निं वनवद्वनुष्यतः। कृतब्रह्मा शूशुवद्रातहव्य इत्। जातेन जातमतिमृत्प्र  
सृ५सते। यं यं युजं कृणुते ब्रह्मणस्पतिः। ब्रह्मणस्पते सुयमस्य विश्वहा॥३२॥

रायः स्याम रथ्यो विवस्वतः। वीरेषु वीरा५ उपपृङ्क्षि नस्त्वम्। यदीशानो  
ब्रह्मणा वेषि मे हवम्। स इज्जनेन स विशा स जन्मना। स पुत्रैर्वाजं भरते धना



नृभिः। देवानां यः पितरमा विवासति। श्रद्धामना हविषा ब्रह्मणस्पतिम्। यास्ते  
पूषन्नावो अन्तः। शुक्रं ते अन्यत्पूषेमा आशाः। प्रपथे पथामजनिष्ट पूषा॥३३॥

प्रपथे दिवः प्रपथे पृथिव्याः। उभे अभि प्रियतमे सधस्थे। आ च परां च चरति  
प्रजानन्। पूषा सुबन्धुर्दिव आ पृथिव्याः। इडस्पतिर्मघवां दस्मवर्चाः। तं देवासो  
अददुः सूर्यायै। कामेन कृतं तवसः स्वश्चम्। अजाऽश्वः पशुपा वाजबस्त्यः।  
धियं जिन्वो विश्वे भुवने अर्पितः। अष्ट्रं पूषा शिथिरामुद्वरीवृजत्॥३४॥

सञ्चक्षाणो भुवना देव ईयते। शुचीं वो हव्या मरुतः शुचीनाम्। शुचिः  
हिनोम्यध्वरः शुचिभ्यः। ऋतेन सत्यमृतसाप आयन्। शुचिजन्मानः शुचयः  
पावकाः। प्र चित्रमर्कं गृणते तुराय। मारुताय स्वतवसे भरध्वम्। ये सहासि  
सहसा सहन्ते। रेजते अग्ने पृथिवी मखेभ्यः। असेष्वा मरुतः खादयो वः॥३५॥

वक्षः सुरुक्मा उप शिश्रियाणाः। वि विद्युतो न वृष्टिर्भी रुचानाः। अनु  
स्वधामायुधैर्यच्छमानाः। या वः शर्म शशमानाय सन्ति। त्रिधातूनि दाशुषे

यच्छ्रुताधिं। अस्मभ्यं तानि मरुतो वियन्त। रयिं नो धत्त वृषणः सुवीरम्। इमे  
तुरं मरुतो रामयन्ति। इमे सहः सहस्र आ नमन्ति। इमे शस्त्रं सवनुष्यतो नि  
पांति॥३६॥

गुरुद्वेषो अरुरुषे दधन्ति। अरा इवेदचरमा अहेव। प्रप्रं जायन्ते अकंवा महोभिः।  
पृश्नेः पुत्रा उपमासो रभिष्ठाः। स्वया मृत्या मरुतः सं मिमिक्षुः। अनु ते दायि  
मह इन्द्रियाय। सत्रा ते विश्वमनु वृत्रहत्यै। अनु क्षत्रमनु सहो यजत्र। इन्द्र  
देवेभिरनु ते नृषह्यै। य इन्द्र शुष्मो मघवन्ते अस्ति॥३७॥

शिक्षा सखिभ्यः पुरुहूत नृभ्यः। त्वं हि दृढा मघवन्विचेताः। अपावृधि परिवृतिं  
न राधः। इन्द्रो राजा जगतश्चरषणीनाम्। अधिक्षमि विषुरूपं यदस्ति। ततो  
ददातु दाशुषे वसूनि। चोदद्राध उपस्तुतश्चिदवाक्। तमुष्टुहि यो अभिभूत्योजाः।  
वन्वन्नवातः पुरुहूत इन्द्रः। अषाढमुग्रं सहमानमाभिः॥३८॥

गीर्भिर्वर्ध वृषभं चरषणीनाम्। स्थूरस्य रायो बृहतो य ईशै। तमुष्टवाम

विदथेष्विन्द्रम्। यो वायुना जयति गोमतीषु। प्र धृष्णुया नयति वस्यो अच्छ। आ ते शुष्मो वृषभ एतु पश्चात्। ओत्तरादधरागा पुरस्तात्। आ विश्वतो अभिसमेत्त्वाङ्। इन्द्रं द्युम्नः सुवर्वद्धेह्यस्मे॥ ३९॥ वराहैर्विश्वहाऽजनिष्ट पृषोद्वरीवृजत्खादयो वः पान्यस्त्याभिर्नवं च॥ [५]

आ देवो यातु सविता सुरतः। अन्तरिक्षप्रा वहमानो अश्वैः। हस्ते दधानो नर्या पुरूणि। निवेशय च प्रसुवं च भूमि। अभीवृतं कृशनैर्विश्वरूपम्। हिरण्यशम्यं यजतो बृहन्तम्। आस्थाद्रथः सविता चित्रभानुः। कृष्णा रजांसि तविषीं दधानः। सघा नो देवः सविता सवाय। आ साविषद्वसुपतिर्वसूनि॥ ४०॥

विश्रयमाणो अमतिमरूचीम्। मूर्तभोजनमधरासतेन। विजनाञ्छ्यावाः शितिपादो अख्यन्। रथः हिरण्यप्रउगं वहन्तः। शश्वद्विशः सवितुर्देव्यस्य। उपस्थे विश्वा भुवनानि तस्थुः। वि सुपर्णो अन्तरिक्षाण्यख्यत्। गभीरवैपा असुरः सुनीथः। क्वेदानीः सूर्यः कश्चिकेत। कृतमान्द्याः रश्मिरस्या ततान॥ ४१॥

भगं धियं वाजयन्तः पुरन्धिम्। नराशंसो ग्रास्पतिर्नो अव्यात्। आ ये वामस्य

सङ्ग॑थे र॑यी॒णाम्। प्रि॒या दे॒वस्य॑ स॒वितुः॑ स्या॑म। आ नो॑ वि॒श्वे अ॒स्क्रा॑गमन्तु दे॒वाः।  
मि॒त्रो अ॑र्य॒मा वरु॑णः स॒जोषाः॑। भुव॑न् यथा॑ नो॒ विश्वे॑ वृ॒धासः॑। क॒रन्त्सु॑षाहा॑ वि॒थुरं  
न शवः॑। शं नो॑ दे॒वा वि॒श्वदे॒वा भव॑न्तु। श॒रं सर॑स्वती स॒ह धी॒भिर॑स्तु॥४२॥

श॒म॑भि॒षाचः॑ श॒मु रा॒ति॒षाचः॑। शं नो॑ दि॒व्याः पा॒रि॒वाः शं नो॑ अ॒प्याः। ये स॒वितुः॑  
स॒त्यस॑वस्य॒ विश्वे॑। मि॒त्रस्य॑ व्र॒ते वरु॑णस्य दे॒वाः। ते सौ॒भ॒गं वी॒रव॑द्भोम॒दप्रः॑। दधा॑तन्  
द्रवि॑णं चि॒त्रम॒स्मे। अ॒ग्ने या॒हि दू॒त्यं वा॒रि॒षेण्यः॑। दे॒वा॒ अ॒च्छा॑ ब्र॒ह्म॒कृता॑ गु॒णेन॑।  
सर॑स्वतीं म॒रुतो॑ अ॒श्विना॒पः। य॒क्षि दे॒वान्र॑त्न॒धेया॑य॒ विश्वा॑न्॥४३॥

द्यौः पि॑तुः पृथि॑वि मा॒तर॑धृक्। अ॒ग्ने भ्रा॑त॒र्वस॒वो मृ॒डता॑ नः। वि॒श्वे आ॒दि॒त्या  
अ॒दिते॑ स॒जोषाः॑। अ॒स्मभ्य॒॑ शर्म॑ बहु॒लं वि य॑न्त। वि॒श्वे दे॒वाः शृ॒णु॒तेम॒॑ हव॑ मे।  
ये अ॒न्तरि॑क्षे॒ य उप॑ द्यवि॒ष्ठ। ये अ॒ग्नि॒जि॒ह्वा उ॒त वा॒ यज॑त्राः। आ॒स॒द्या॒स्मिन्ब॒र्हिषि॑  
मा॒दय॑ध्वम्। आ वा॑ मि॒त्राव॑रुणा ह॒व्यजु॑ष्टिम्। नम॑सा दे॒वाव॑व॒साऽऽव॑वृ॒त्याम्॥४४॥

अ॒स्माकं॑ ब्र॒ह्म पृ॒त॑नासु स॒ह्या अ॒स्माक॑म्। वृ॒ष्टिर्दि॒व्या सु॑पा॒रा। यु॒वं वस्त्रा॑णि

पीवसा वसाथे। युवोरच्छिद्रा मन्तवो ह सर्गाः। अवातिरतमनृतानि विश्वा। ऋतेन मित्रावरुणा सचेथे। तथ्सु वा मित्रावरुणा महित्वम्। ईर्मा तस्थुषीरहभिर्दुदुहे। विश्वाः पिन्वथ स्वसरस्य धेनाः। अनु वामेकः पविरा ववर्ति॥४५॥

यद्वह्निष्ठन्नाति विदे सुदानू। अच्छिद्रश्च शर्म भुवनस्य गोपा। ततो नो मित्रावरुणाववीष्टम्। सिषासन्तो जीगिवाश्च सः स्याम। आ नो मित्रावरुणा हव्यदातिम्। घृतैर्गव्यूतिमुक्षतमिडाभिः। प्रति वामत्र वरमा जनाय। पृणीतमुद्रो दिव्यस्य चारोः। प्र बाहवा सिसृतं जीवसे नः। आ नो गव्यूतिमुक्षतं घृतेन॥४६॥

आ नो जने श्रवयतं युवाना। श्रुतं मे मित्रावरुणा हवेमा। इमा रुद्राय स्थिरधन्वने गिरः। क्षिप्रेषवे देवाय स्वधाम्ने। अषाढाय सहमानाय मीढुषे। तिग्मायुधाय भरता शृणोतन। त्वादत्तेभी रुद्र शन्तमेभिः। शतश्च हिमा अशीय भेषजेभिः। व्यस्मद्वेषो वितरं व्यहः। व्यमीवाश्चातयस्वा विषूचीः॥४७॥

अर्हन्विभर्षि मा नस्तोके। आ ते पितर्मरुताश्च सुम्नमेतु। मा नः सूर्यस्य

स॒न्द्दशो॑ यु॒योथाः। अ॒भि नो॑ वी॒रो अ॒र्वति॑ क्षमेत। प्र जा॑येमहि रु॒द्र प्र॒जाभिः॑। ए॒वा  
 ब॑भ्रो वृषभ चे॒कितान॑। यथा॑ दे॒व न ह॑णी॒षे न ह॑सि। हा॒व॒न॒श्रू॒र्नो रु॒द्रेह॑ बो॒धि।  
 बृ॒हद्व॑दे॒म वि॒दथे॑ सु॒वीराः॑। परि॑ णो रु॒द्रस्य॑ हे॒तिः स्तु॒हि श्रु॒तम्। मी॒ढु॒ष्ट॒मा॒र्ह॒न्विभ॑र्षि।  
 त्वम॑ग्रे रु॒द्र आ वो॒ राजा॑नम्॥४८॥ वसू॑नि ततानास्तु विश्वान् ववृ॒त्यां वव॑र्ति घृ॒तेन॑ वि॒ष्पीः श्रु॒तन्दे॑ च॥—[६]

सूर्यो॑ दे॒वीमु॒षस॒ꣳ रोच॑माना॒मर्यः॑। न योषा॑म॒भ्येति॑ प॒श्चात्। यत्रा॒ नरो॑ दे॒व॒यन्तो॑  
 यु॒गानि॑। वि॒त॒न्वते॒ प्रति॑ भ॒द्राय॑ भ॒द्रम्। भ॒द्रा अ॒श्वा ह॑रि॒तः सूर्य॑स्य। चि॒त्रा ए॒द॒ग्वा  
 अनु॑माद्या॑सः। न॒म॒स्यन्तो॑ दि॒व आ पृ॑ष्ठम॑स्थुः। परि॒ द्यावा॑पृथि॒वी य॑न्ति स॒द्यः।  
 तत्सूर्य॑स्य दे॒वत्वं तन्म॑हि॒त्वम्। म॒ध्या क॑र्तो॒र्वित॑त॒ꣳ सञ्ज॑भार॥४९॥

य॒देद॑यु॒क्त ह॑रि॒तः स॒धस्था॑त्। आ॒द्रात्री॒ वास॑स्तनुते सि॒मस्मै॑। तन्मि॒त्रस्य॑  
 वरु॑णस्याभिचक्षे॑। सूर्यो॑ रू॒पं कृ॑णुते द्यो॒रुप॑स्थे॑। अ॒न॒न्तम॒न्यद्रु॑श॑दस्य॒ पाजः॑।  
 कृ॒ष्णम॒न्यद्ध॑रि॒तः सं भ॑रन्ति। अ॒द्या दे॒वा उ॒दिता॑ सूर्य॑स्य। नि॒र॑ह॑सः

पिपृ॒तान्नि॑र॒व॒द्यात्। तन्नो॑ मि॒त्रो वरु॑णो माम॒हन्ता॑म्। अदि॑तिः सिन्धुः पृथि॒वी उ॒त  
द्यौः॥५०॥

दि॒वो रु॒क्म उ॑रु॒चक्षा॑ उदे॑ति। दू॒रे अ॑र्थ॒स्तर॑णि॒भ्राज॑मानः। नू॒नं जनाः॑ सू॒र्येण॑  
प्रसू॑ताः। आयन्न॒र्थानि॑ कृ॒णव॑न्नपा॒सि। शं नो॑ भव॒ चक्ष॑सा शं नो अ॒ह्ना। शं भा॒नुना॑  
श॒ हि॒मा शं घृ॑णेन। यथा॒ शम॑स्मै शमस॑द्दुरो॒णे। तथ्सू॑र्य॒ द्रवि॑णं धे॒हि चि॒त्रम्।  
चि॒त्रं दे॒वाना॑मुद॑गा॒दनी॑कम्। चक्षु॑र्मि॒त्रस्य॑ वरु॑णस्या॒ग्नेः॥५१॥

आप्रा॒ द्यावा॑पृथि॒वी अ॒न्तरि॑क्षम्। सू॒र्य आ॒त्मा जग॑तस्त॒स्थुष॑श्च। त्वष्टा॑  
दध॒त्तन्न॑स्तु॒रीप॑म्। त्वष्टा॑ वी॒रं पि॒शङ्ग॑रूपः। दशे॑मन्त्वष्टु॒र्जन॑यन्त॒ गर्भ॑म्। अत॑न्द्रासो  
युव॒तयो॑ बिभ॑र्त्रम्। ति॒ग्मानी॑क॒ः स्वय॑शसं जने॑षु। विरोच॑मानं॒ परि॑षीन्नयन्ति।  
आवि॑ष्ट्यो॑ वर्धते॒ चारु॑रासु। जि॒ह्मना॑मूर्ध्वस्वय॑शा उ॒पस्थे॑॥५२॥

उ॒भे त्वष्टु॑र्बिभ्यतु॒र्जाय॑मानात्। प्र॒तीचीं॑ सि॒ंहं प्र॑तिजोषयेते। मि॒त्रो जना॑न्प्र  
स मि॒त्र। अ॒यं मि॒त्रो न॑म॒स्यः सु॒शेवः॑। राजा॑ सुक्ष॒त्रो अ॑जनिष्ट वे॒धाः। तस्य॑

वयं सुम॑तौ यज्ञि॑यस्य। अपि॑ भ॒द्रे सौम॑न॒से स्या॑म। अ॒न॒मी॒वा॒स॒ इडं॑या॒ मद॑न्तः।  
मि॒त॒ज्म॑वो॒ वरि॑म॒न्ना पृ॑थि॒व्याः। आ॒दि॒त्यस्य॑ व्र॒तमु॑प॒क्ष्यन्तः॥५३॥

वयं मि॒त्रस्य॑ सुम॑तौ स्या॑म। मि॒त्रं न ई॑ शि॒म्या गो॑षु ग॒व्यव॑त्। स्वा॒धियो॑  
वि॒दथे॑ अ॒प्स्वजी॑जनन्। अ॒रे॒जय॑ता॒ रोद॑सी॒ पाज॑सा गि॒रा। प्र॒ति प्रि॑यं य॒जत॑  
ज॒नुषा॑मवः। म॒हा॒ आ॒दि॒त्यो न॑र्म॒सोप॑सद्यः। या॒तय॑ज्जनो गृ॒णते॑ सु॒शेवः॑। तस्मा॑  
ए॒तत्प॑न्य॒तमा॑य जुष्टम्। अ॒ग्नौ मि॒त्राय॑ ह॒विरा जु॑होत। आ वा॒ रथो॑ रोद॑सी  
ब॒द्धा॒नः॥५४॥

हि॒र॒ण्ययो॑ वृष॑भि॒र्या॒त्वश्चैः॑। घृ॒तव॑र्त॒निः प॒विर्भी॑रु॒चा॒नः। इ॒षां वो॒ढा  
नृ॒पति॑र्वा॒जिनी॑वान्। स प॑प्र॒थानो॑ अ॒भि प॑ञ्च भू॒मः। त्रि॒व॒न्धुरो॑ म॒न॒साया॑तु  
यु॒क्तः। वि॒शो ये॒न ग॑च्छ॒थो दे॒व॒यन्तीः॑। कु॒त्रा चि॒द्याम॑म॒श्विना॑ दधा॒ना। स्व॒श्वा  
य॒शसा॑ऽऽया॑तम॒र्वाक्। द॒स्त्रा नि॒धिं म॑धु॒मन्तं॑ पि॒बाथः॑। वि वा॒ रथो॑ व॒ध्वा  
याद॑मानः॥५५॥

अ॒न्तां दि॒वो बा॑धते व॒र्त॒निभ्या॑म्। यु॒वोः श्रि॒यं परि॑ योषा॑वृणीत। सू॒रो दु॑हि॒ता



परितक्मियायाम्। यदेवयन्तुमवन्तः शचीभिः। परिघ्नः सवां मनावां वयोगाम्। यो  
हस्यवाः रथिरावस्तं उस्त्राः। रथो युजानः परियातिं वर्तिः। तेन नः शं योरुषसो  
व्युष्टौ। न्यश्विना वहतं यज्ञे अस्मिन्। युवं भुज्युमवविद्धः समुद्रे॥५६॥

उदूहथुरणसो अस्त्रिधानैः। पुत्रिभिरश्रमैरव्यथिभिः। दुःसनाभिरश्विना  
पारयन्ता। अग्नीषोमा यो अद्य वाम्। इदं वचः सपर्यतिं। तस्मै धत्तः सुवीर्यम्।  
गवां पोषः स्वश्वियम्। यो अग्नीषोमा हविषा सपर्यात्। देवद्रीचा मनसा यो  
घृतेन। तस्य व्रतः रक्षतं पातमः हंसः॥५७॥

विशे जनाय महि शर्म यच्छतम्। अग्नीषोमा य आहुतिम्। यो वां  
दाशाद्धविष्कृतिम्। स प्रजया सुवीर्यम्। विश्वमायुर्व्यश्नवत्। अग्नीषोमा चेति  
तद्वीर्यं वाम्। यदमुष्णीतमवसं पणिङ्गोः। अवातिरतं प्रथयस्य शेषः। अविन्दतं  
ज्योतिरेकं बहुभ्यः। अग्नीषोमाविमः सु मेऽग्नीषोमा हविषः प्रस्थितस्य॥५८॥

द्यौरग्रेरुपस्थं उपक्ष्यन्तो बद्धधानो बद्धा यादमानः समुद्रेऽहंसः प्रस्थितस्य॥

अ॒हम॑स्मि प्रथ॒म॒जा ऋ॒तस्य॑। पूर्वं दे॒वेभ्यो॑ अ॒मृत॑स्य नाभिः। यो मा ददा॑ति स  
इदे॒व माऽऽवा॑ः। अ॒हम॑न्नम॒न्नम॑दन्तम॒ग्नि। पूर्व॑म॒ग्नेरपि॑ दह॒त्यन्न॑म्। य॒त्तौ हा॑साते  
अ॒हमु॒त्तरेषु॑। व्या॒त्तम॑स्य प॒शवः॑ सु॒जम्भ॑म्। पश्य॑न्ति धीराः प्रच॑रन्ति पाकाः।  
जहा॑म्यन्यन्न जहा॑म्यन्यम्। अ॒हम॑न्नं वश॑मिच्छ॑रामि॥५९॥

स॒मा॒नम॑र्थं पर्य॑मि भु॒ञ्जत्। को माम॑न्नं मनु॒ष्यो द॑येत। परा॑के अन्नं निहि॑तं  
लो॒क ए॒तत्। वि॒श्वेर्दे॒वैः पि॒तृभिर्गु॑प्तम॒न्नम्। यद॑द्यते लु॒प्यते॑ यत्प॑रो॒प्यते॑। श॒त॒त॒मी  
सा त॒नूर्मे॑ बभू॒व। म॒हान्तो॑ च॒रू संकृ॑द्गु॒धेन॑ पप्रौ। दिवं च॒ पृ॒श्निं पृ॒थि॒वीं च॑  
सा॒कम्। तथ्स॒म्पिब॑न्तो न मि॑नन्ति वे॒धसः॑। नैतद्भू॒यो भव॑न्ति नो कनी॑यः॥६०॥

अन्नं प्रा॒णम॑न्नम॒पान॑माहुः। अन्नं मृ॒त्युं तमु॑ जी॒वातु॑माहुः। अन्नं ब्र॒ह्माणो॑ ज॒रसं॑  
वद॑न्ति। अन्नमाहुः प्र॒जन॑नं प्र॒जाना॑म्। मोघ॑मन्नं विन्द॑ते अ॒प्रचे॑ताः। स॒त्यं ब्र॑वीमि  
व॒ध इ॒त्थं तस्य॑। ना॒र्यम॑णं पु॒ष्यति॑ नो सखा॑यम्। के॒वला॑घो भवति के॒वला॑दी।  
अ॒हं मे॒घः स्त॒नय॑न्वर्ष॑न्नस्मि। माम॑दन्त्य॒हम॑द्व्यन्यान्॥६१॥

अ॒ह॒९ स॒द॒मृ॒तो॑ भवामि। म॒दा॑दि॒त्या अ॒धि॒ सर्वे॑ तपन्ति। दे॒वीं वाच॑म॒जन॒यन्त॒  
य॒द्वा॒ग्वद॑न्ती। अ॒न॒न्ता॒मन्ता॒दधि॑ निर्मि॒तां म॒हीम्। यस्यां॑ दे॒वा अ॑द॒धुर्भो॑ज॒नानि॑।  
एका॑क्ष॒रां द्वि॒पदा॑९ ष॒द॒दां च। वाचं॑ दे॒वा उप॑ जीवन्ति॒ विश्वे॑। वाचं॑ दे॒वा उप॑  
जीवन्ति॒ विश्वे॑। वाचं॑ गन्ध॒र्वाः प॒शवो॑ म॒नुष्याः॑। वा॒ची॒मा वि॒श्वा भुव॑ना॒न्यर्पि॑ता॥६२॥

सा नो॑ ह॒वं जु॒षता॑मिन्द्र॒पत्नी॑। वा॒ग॒क्षरं॑ प्रथ॒म॒जा ऋ॒तस्य॑। वेदा॑नां मा॒ता-  
ऽमृ॒तस्य॑ नाभिः॑। सा नो॑ जुषा॒णोप॑ य॒ज्ञमा॑गात्। अ॒वन्ती॑ दे॒वी सु॒हवा॑ मे अस्तु।  
या॒मृष॑यो म॒न्त्रकृ॒तो मनी॑षिणः। अ॒न्वैच्छं॑ दे॒वास्त॑प॒सा श्रमे॑ण। ता॒न्दे॒वीं वाच॑९ ह॒विषा॑  
य॒जाम॑हे। सा नो॑ दधातु सु॒कृ॒तस्य॑ लो॒के। च॒त्वारि॑ वा॒क्प॒रि॒मिता॑ प॒दानि॑॥६३॥

तानि॑ विदुर्ब्रा॒ह्म॒णा ये मनी॑षिणः। गुहा॑ त्रीणि॒ निहि॑ता॒ नेङ्ग॑यन्ति। तुरी॒यं वा॒चो  
म॒नुष्या॑ वदन्ति। श्र॒द्धया॑ऽग्निः॒ समि॑ध्यते। श्र॒द्धया॑ विन्दते ह॒विः। श्र॒द्धां भग॑स्य  
मूर्ध॒नि। वच॑सा वे॒दया॑मसि। प्रि॒य९ श्र॒द्धे द॑दतः। प्रि॒य९ श्र॒द्धे दि॑दा॒सतः। प्रि॒यं  
भो॒जेषु॑ यज्व॑सु॥६४॥

इदं मं उदितं कृधि। यथा देवा असुरेषु। श्रद्धामुग्रेषु चक्रिरे। एवं भोजेषु  
यज्वंसु। अस्माकमुदितं कृधि। श्रद्धां देवा यजमानाः। वायुगोपा उपासते। श्रद्धां  
हृदय्ययाऽऽकूत्या। श्रद्धया हूयते हविः। श्रद्धां प्रातरह्वामहे॥६५॥

श्रद्धां मध्यन्दिनं परि। श्रद्धां सूर्यस्य निमृचि। श्रद्धे श्रद्धापयेह मा। श्रद्धा  
देवानधि वस्ते। श्रद्धा विश्वमिदं जगत्। श्रद्धां कामस्य मातरम्। हविषा  
वर्धयामसि। ब्रह्म जज्ञानं प्रथमं पुरस्तात्। वि सीमतः सुरुचो वेन आवः। स  
बुधिया उप मा अस्य विष्ठाः॥६६॥

सुतश्च योनिमसंतश्च विवः। पिता विराजामृषभो रयीणाम्। अन्तरिक्षं  
विश्वरूपं आविवेश। तमर्कैरभ्यर्चन्ति वथ्सम्। ब्रह्म सन्तं ब्रह्मणा वर्धयन्तः।  
ब्रह्म देवानजनयत्। ब्रह्म विश्वमिदं जगत्। ब्रह्मणः क्षत्रं निर्मितम्। ब्रह्म ब्राह्मण  
आत्मना। अन्तरस्मिन्निमे लोकाः॥६७॥

अन्तर्विश्वमिदं जगत्। ब्रह्मैव भूतानां ज्येष्ठम्। तेन कोऽर्हति स्पर्धितुम्।

ब्रह्मन्देवास्त्रयस्त्रिंशत्। ब्रह्मन्निन्द्रप्रजापती। ब्रह्मन् ह विश्वा भूतानि। नावीवान्तः  
समाहिता। चतस्र आशाः प्रचरन्त्वग्रयः। इमं नो यज्ञं नयतु प्रजानन्। घृतं  
पिन्वंन्नजरं सुवीरम्॥६८॥

ब्रह्मं समिद्धवत्याहुतीनाम्। आ गावो अगमन्नुत भद्रमक्रन्। सीदन्तु गोष्ठे  
रणयन्त्वस्मे। प्रजावतीः पुरुरूपा इह स्युः। इन्द्राय पूर्वीरुषसो दुहानाः। इन्द्रो  
यज्वने पृणते च शिक्षति। उपेददाति न स्वं मुषायति। भूयोभूयो रयिमिदस्य  
वर्धयन्। अभिन्ने खिल्ले नि दधाति देवयुम्। न ता नशन्ति न ता अर्वा॥६९॥

गावो भगो गाव इन्द्रो मे अच्छात्। गावः सोमस्य प्रथमस्य भक्षः। इमा या  
गावः सजनास इन्द्रः। इच्छामीद्धृदा मनसा चिदिन्द्रम्। यूयं गावो मेदयथा कृशं  
चित्। अश्लीलं चित्कृणुथा सुप्रतीकम्। भद्रं गृहं कृणुथ भद्रवाचः। बृहद्वो वयं  
उच्यते सभासु। प्रजावतीः सूयवसं रिशन्तीः। शुद्धा अपः सुप्रपाणे पिबन्तीः।  
मा वः स्तेन ईशत माऽघशंसः। परि वो हेती रुद्रस्य वृज्यात्। उपेदमुपपर्वनम्।

आसु गोषूपपृच्यताम्। उपर्षभस्य रेतंसि। उपेन्द्र तव वीर्ये॥७०॥ चरामि कनीयोऽन्यानपिता  
पदानि यज्वंसु हवामहे विष्टा लोकाः सुवीरमर्वा पिबन्तीः षट्॥ [८]

ता सूर्याचन्द्रमसां विश्वभृत्तमा महत्। तेजो वसुमद्राजतो दिवि। सामात्माना  
चरतः सामचारिणा। ययोर्व्रतं न ममे जातुं देवयोः। उभावन्तौ परि यातु अमर्या।  
दिवो न रश्मीः स्तनुतो व्यर्णवे। उभा भुवन्ती भुवना कविक्रतू। सूर्या न चन्द्रा चरतो  
हतामती। पती द्युमद्विश्वविदा उभा दिवः। सूर्या उभा चन्द्रमसा विचक्षणा॥७१॥

विश्ववारा वरिवोभा वरेण्या। ता नोऽवतं मतिमन्ता महिब्रता। विश्ववपरी  
प्रतरणा तरन्ता। सुवर्विदा दृशये भूरिरश्मी। सूर्या हि चन्द्रा वसु त्वेषदर्शता।  
मनुस्विनोभानुचरतोनु सन्दिवम्। अस्य श्रवो नद्यः सप्त बिभ्रति। द्यावा  
क्षामा पृथिवी दर्शतं वपुः। अस्मे सूर्याचन्द्रमसाऽभिचक्षे। श्रद्धेकमिन्द्र चरतो  
विचर्तुर्म॥७२॥

पूर्वापरं चरतो माययैतौ। शिशू क्रीडन्तौ परि यातो अध्वरम्। विश्वान्यन्यो

भुव॑नाऽभि॒ चष्टे॑। ऋ॒तून॒न्यो वि॒दध॑ञ्जायते पुनः॑। हिर॑ण्यवर्णाः शुच॑यः पाव॒का यासा॑ ५  
 राजा॑। यासा॑ दे॒वाः शि॒वेन॑ मा॒ चक्षु॑षा पश्यत। आपो॑ भ॒द्रा आदि॑त्पश्यामि।  
 नास॑दासी॒न्नो सदा॑सीत्तदानी॑म्। नासी॒द्रजो॒ नो व्यो॑मा प॒रो यत्। किमाव॑रीवः कुह॒  
 कस्य॑ शर्मन्॥ ७३ ॥

अम्भः॑ किमा॑सी॒द्रहनं॑ गभी॒रम्। न मृ॒त्युर॒मृतं॑ तर्हि॒ न। रात्रि॑या अ॒हं  
 आसी॑त्प्रके॒तः। आनी॑दवा॒तः स्व॒धया॒ तदे॒कम्। तस्मा॑द्धान्यं न प॒रः किञ्च॒नास॑।  
 तम॑ आसी॒त्तम॑सा गूढम॒ग्रे प्र॒केत॑म्। स॒लिल॑ ५ सर्व॑मा इ॒दम्। तुच्छे॑ना॒भ्वपि॑हितं  
 यदासी॑त्। तम॑स॒स्तन्म॑हि॒ना जा॑य॒तैक॑म्। काम॒स्तद॒ग्रे सम॑वर्त॒ताधि॑॥ ७४ ॥

मन॑सो॒ रेतः॑ प्रथ॒मं यदासी॑त्। स॒तो बन्धु॑मस॑ति॒ निर॑विन्दन्। हृदि॑ प्र॒तीष्या॑ क॒वयो॑  
 मनी॑षा। ति॒रश्ची॒नो वि॑त॒तो र॒श्मिरे॑षाम्। अ॒धः स्वि॑दासी(३)दुपरि॑ स्विदासी(३)त्।  
 रेतो॑धा आ॑सन्महि॒मानं॑ आसन्। स्व॒धा अ॒वस्ता॒त्प्रय॑तिः प॒रस्ता॑त्। को अ॒द्धा  
 वैद् क इ॒ह प्र वो॑चत्। कुत॑ आजा॑ता॒ कुत॑ इ॒यं विसृ॑ष्टिः। अ॒र्वाग्दे॒वा अ॒स्य

विसर्जनाय॥७५॥

अथा॒ को वे॑द॒ यत॑ आब॒भूव॑। इ॒यं वि॒सृष्टि॑र्यत॑ आब॒भूव॑। यदि॑ वा द॒धे यदि॑ वा॒  
न। यो अ॒स्याध्य॑क्षः पर॒मे व्यो॑मन्। सो अ॒ङ्ग वे॑द॒ यदि॑ वा॒ न वे॑द। कि॒ं॒ऽस्वि॒द्वन॒ङ्क  
उ॒ स वृ॒क्ष आ॑सीत्। यतो॒ द्यावा॑पृथि॒वी नि॑ष्टत॒क्षुः। मनी॑षिणो॒ मन॑सा पृ॒च्छते॑दुत॒त्।  
यद॒ध्यति॑ष्ठ॒द्भुव॑नानि धा॒रयन्। ब्रह्म॒ वनं॑ ब्रह्म॒ स वृ॒क्ष आ॑सीत्॥७६॥

यतो॒ द्यावा॑पृथि॒वी नि॑ष्टत॒क्षुः। मनी॑षिणो॒ मन॑सा॒ विब्र॑वीमि वः।  
ब्रह्मा॒ध्यति॑ष्ठ॒द्भुव॑नानि धा॒रयन्। प्रा॒तर॒ग्निं प्रा॒तरिन्द्र॒॑ हवाम॑हे। प्रा॒तर्मि॒त्रावरु॑णा  
प्रा॒तर॒श्विना॑। प्रा॒तर्भगं॑ पू॒षणं॑ ब्रह्म॑ण॒स्पति॑म्। प्रा॒तः सोम॑मु॒त रु॒द्रं हु॑वेम। प्रा॒तर्जि॑तं  
भग॑मु॒ग्रं हु॑वेम। व॒यं पु॒त्रमदि॑ते॒र्यो वि॑ध॒र्ता। आ॒ध्रश्चि॒द्यं मन्य॑मानस्तु॒रश्चित्॥७७॥

राजा॑ चि॒द्यं भगं॑ भ॒क्षीत्याह॑। भग॒ प्रणे॑त॒र्भग॒ सत्य॑राधः। भगे॒मां धिय॑मुद॒व दद॑न्नः।  
भग॒ प्र णो॑ जनय॒ गोभि॑रश्वैः। भग॒ प्र नृभि॑र्नृ॒वन्तः स्याम॑। उ॒तेदानीं॑ भग॑वन्तः स्याम।  
उ॒त प्र॑पि॒त्व उ॒त मध्ये॑ अह्ना॑म्। उ॒तोदि॑ता मघव॒न्त्सूर्य॑स्य। व॒यं दे॒वानां॑ सु॒मतौ



स्याम। भगं एव भगवां॑ अस्तु देवाः॥७८॥

तेन॑ व॒यं भ॒गव॑न्तः स्याम। तं त्वा॑ भ॒ग॒ सर्व॑ इ॒ज्जो॑हवीमि। स नो॑ भ॒ग॒ पुर॑ ए॒ता  
भ॑वे॒ह। स॒म॒ध्व॒रायो॑षसो॑ नमन्त। द॒धि॒क्रावे॑व॒ शुच॑ये प॒दाय॑। अ॒र्वा॒ची॒नं व॑सु॒विदं॑  
भ॒गं नः॑। रथ॑मि॒वाश्वा॑ वा॒जिन॑ आव॑हन्तु। अ॒श्वा॒वती॑र्गो॒मती॑र्न उ॒षासः॑। वी॒र॒व॑तीः  
सद॑मुच्छ॒न्तु भ॒द्राः। घृ॒तं दु॒हा॒ना वि॒श्वतः॑ प्र॒पी॒नाः। यू॒यं पा॑त स्व॒स्तिभिः॑ सदा॑  
नः॥७९॥ वि॒च॒क्ष॒णा वि॑च॒तुर॑ शर्म॒त्रधि॑ वि॒सर्ज॑नाय॒ ब्रह्म॑ वनं॒ ब्रह्म॑ स वृ॒क्ष आ॑सीत्तु॒रक्षि॑देवाः प्र॒पी॒ना ए॒कं च॥-[९]

पी॒वो॒न्ना॒न्ते शु॒क्रासः॑ सोमो॑

धेनु॑मिन्द्र॒स्तरं॑ स्वा॒ज्जुचि॑मा दे॒वो या॑तु सूर्यो॑ दे॒वीम॑हमस्मि॒ ता सूर्या॑चन्द्रमसा॒ नवं॥९॥

पी॒वो॒न्ना॒मग्ने त्वं पा॑रयानाधृष्यः शुचिं॑ नु वि॒श्रय॑माणो दि॒वो रु॒क्मोऽन्नं॑ प्रा॒णम॑ब्र॒न्ता सूर्या॑चन्द्रमसा॒ नवं॑सप्ततिः॥७९॥

पी॒वो॒न्नां यू॒यं पा॑त स्व॒स्तिभिः॑ सदा॑ नः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे द्वितीयाष्टके अष्टमः प्रपाठकः समाप्तः॥

॥ अष्टकम् ३ ॥

॥ प्रथमः प्रश्नः ॥

॥ तैत्तिरीयब्राह्मणे तृतीयाष्टके प्रथमः प्रपाठकः ॥

अ॒ग्निर्नः॑ पा॒तु कृ॒त्तिकाः॑। नक्ष॑त्रं दे॒वमिन्द्रि॑यम्। इ॒दमा॑सां विचक्ष॒णम्। ह॒विरा॑सं  
जु॒होत॑न। यस्य॒ भान्ति॑ र॒श्मयो॒ यस्य॑ के॒तवः॑। यस्ये॒मा वि॒श्वा भु॑व॒नानि॒ सर्वा॑।  
स कृ॒त्तिका॑भि॒रभिसं॑वसानः। अ॒ग्निर्नो॑ दे॒वः सु॑वि॒ते द॑धातु। प्र॒जाप॑ते रोहि॒णी वे॑तु  
प॒त्नी॑। वि॒श्वरू॑पा बृ॒हती चि॒त्रभा॑नुः॥१॥

सा नो॑ य॒ज्ञस्य॑ सु॒वि॒ते द॑धातु। यथा॒ जीवे॑म श॒रदः॒ सर्वा॑राः। रोहि॒णी  
दे॒व्युद॑गात्पु॒रस्ता॑त्। वि॒श्वा रू॒पाणि॑ प्रति॒मोद॑माना। प्र॒जाप॑तिः५ ह॒विषा॑ व॒र्धय॑न्ती।  
प्रि॒या दे॒वाना॑मुप॑यातु य॒ज्ञम्। सोमो॒ राजा॑ मृ॒गशी॑र्षेण॒ आग॑न्। शि॒वं नक्ष॑त्रं  
प्रि॒यम॑स्य॒ धाम॑। आ॒प्याय॑मानो बहु॒धा जने॑षु। रे॒तः प्र॒जां यज॑माने दधातु॥२॥

यत्ते॒ नक्ष॑त्रं मृ॒गशी॑र्षमस्ति। प्रि॒यः५ रा॑जन् प्रि॒यत॑मं प्रि॒याणा॑म्। तस्मै॑ ते सोम

ह॒विषा॑ वि॒धेम। शं न॑ ए॒धि द्वि॒पदे॑ शं चतु॑ष्पदे। आ॒र्द्रया॑ रु॒द्रः प्रथ॑मा न एति। श्रेष्ठो॑  
दे॒वानां॑ पति॑रघ्नियाना॑म्। नक्ष॑त्रमस्य ह॒विषा॑ वि॒धेम। मा नः॑ प्र॒जाः री॑रिष॒न्मोत॑  
वी॒रान्। हे॒ती रु॒द्रस्य॑ परि॑ णो वृणक्तु। आ॒र्द्रा नक्ष॑त्रं जुषताः॑ ह॒विर्नः॑॥३॥

प्र॒मु॒ञ्च॒मानौ॑ दुरि॒तानि॑ वि॒श्वाः। अ॒पा॒घशः॑ स॒न्नुद॑ता॒मरा॑तिम्। पुन॑र्नो दे॒व्यदि॑तिः  
स्पृ॒णोतु। पुन॑र्वसू नः पुन॑रेता॑ य॒ज्ञम्। पुन॑र्नो दे॒वा अ॒भिय॑न्तु स॒र्वे। पुनः॑ पुन॑र्वो  
ह॒विषा॑ य॒जामः। ए॒वा न दे॒व्यदि॑तिरन॒र्वा। वि॒श्वस्य॑ भ॒र्त्री जग॑तः प्रति॒ष्ठा। पुन॑र्वसू  
ह॒विषा॑ वर्ध॑यन्ती। प्रि॒यं दे॒वाना॑म॒प्येतु॑ पा॒थः॥४॥

बृह॒स्पतिः॑ प्रथ॒मं जा॑यमानः। ति॒ष्यं नक्ष॑त्रम॒भि सम्ब॑भूव। श्रेष्ठो॑ दे॒वानां॑ पृ॒तना॑सु  
जि॒ष्णुः। दि॒शोऽनु॑ सर्वा॒ अभ॑यं नो अस्तु। ति॒ष्यः पु॒रस्ता॑दु॒त म॑ध्य॒तो नः। बृह॒स्पति॑र्नः  
परि॑ पातु प॒श्चात्। बाधे॑तां द्वेषो॒ अभ॑यं कृणुताम्। सु॒वीर्य॑स्य॒ पत॑यः स्याम। इ॒दः  
स॒र्पेभ्यो॑ ह॒विर॑स्तु जुष्टम्। आ॒श्रेषा॑ येषा॑मनु॒यन्ति॑ चे॒तः॥५॥

ये अ॒न्तरि॑क्षं पृथि॒वीं क्षि॑यन्ति। ते नः॑ स॒र्पासो॑ ह॒वमा॑गमिष्ठाः। ये रौ॑च॒ने

सूर्यस्यापि सर्पाः। ये दिवं देवीमनु सञ्चरन्ति। येषामाश्रेषा अनुयन्ति कामम्।  
तेभ्यः सर्पेभ्यो मधुमञ्जुहोमि। उपहूताः पितरो ये मघासु। मनोजवसः सुकृतः  
सुकृत्याः। ते नो नक्षत्रे हवमागमिष्ठाः। स्वधाभिर्यज्ञं प्रयतं जुषन्ताम्॥६॥

ये अग्निदग्धा येऽनग्निदग्धाः। येऽमुं लोकं पितरः क्षियन्ति। याश्च विद्म यां  
उ च न प्रविद्म। मघासु यज्ञं सुकृतं जुषन्ताम्। गवां पतिः फल्गुनीनामसि त्वम्।  
तदर्यमन्वरुणमित्र चारु। तं त्वा वयं सनितारं सनीनाम्। जीवा जीवन्तमुप  
संविशेम। येनेमा विश्वा भुवनानि सञ्जिता। यस्य देवा अनु सं यन्ति चेतः॥७॥

अर्यमा राजाऽजरस्तुविष्मान्। फल्गुनीनामृषभो रोरवीति। श्रेष्ठो देवानां भगवो  
भगासि। तत्त्वा विदुः फल्गुनीस्तस्य वित्तात्। अस्मभ्यं क्षत्रमजरं सुवीर्यम्।  
गोमदश्ववदुप सन्नुदेह। भगो ह दाता भग इत्प्रदाता। भगो देवीः फल्गुनीरा  
विवेश। भगस्येत्तं प्रसवं गमेम। यत्र देवैः सधुमादं मदेम॥८॥

आयातु देवः संवितोपयातु। हिरण्ययेन सुवृता रथेन। वहन् हस्तं सुभगं

विद्वानापसम्। प्रयच्छन्तं पपुंरिं पुण्यमच्छं। हस्तः प्रयच्छत्वमृतं वसीयः। दक्षिणेन  
प्रतिगृणीम एनत्। दातारमद्य संविता विदेय। यो नो हस्ताय प्रसुवाति यज्ञम्।  
त्वष्टा नक्षत्रमभ्येति चित्राम्। सुभ५ संसं युवति५ रोचमानाम्॥९॥

निवेशयन्नमृतान्मर्त्यांश्च। रूपाणि पि५शन् भुवनानि विश्वा। तन्नस्त्वष्टा तदु  
चित्रा विचष्टाम्। तन्नक्षत्रं भूरिदा अस्तु मह्यम्। तन्नः प्रजां वीरवती५ सनोतु।  
गोभिर्नो अश्वैः समनक्तु यज्ञम्। वायुर्नक्षत्रमभ्येति निष्ठ्याम्। तिग्मशृङ्गो वृषभो  
रोरुवाणः। समीरयन् भुवना मातरिश्वा। अप द्वेषांसि नुदतामरातीः॥१०॥

तन्नो वायुस्तदु निष्ठ्या शृणोतु। तन्नक्षत्रं भूरिदा अस्तु मह्यम्। तन्नो देवासो  
अनुजानन्तु कामम्। यथा तरेम दुरितानि विश्वा। दूरमस्मच्छत्रवो यन्तु भीताः।  
तदिन्द्राग्नी कृणुतां तद्विशाखे। तन्नो देवा अनुमदन्तु यज्ञम्। पश्चात् पुरस्तादभयं  
नो अस्तु। नक्षत्राणामधिपत्नी विशाखे। श्रेष्ठाविन्द्राग्नी भुवनस्य गोपौ॥११॥

विषूचः शत्रूनप बाधमानौ। अप क्षुधं नुदतामरातिम्। पूर्णा पश्चादुत पूर्णा

पुरस्तात्। उन्मध्यतः पौर्णमासी जिगाय। तस्यां देवा अधि संवसन्तः। उत्तमे  
 नाकं इह मादयन्ताम्। पृथ्वी सुवर्चा युवतिः सजोषाः। पौर्णमास्युदगाच्छोभमाना।  
 आप्याययन्ती दुरितानि विश्वा। उरुं दुहां यजमानाय यज्ञम्॥१२॥ चित्रभानुर्यजमाने दधातु हविर्नः  
 पाथश्चेतौ जुपन्ताश्चेतौ मदेम रोचमानामरातीर्गोषो यज्ञम्॥ [१]

ऋद्ध्यास्मि हव्यैर्नमसोपसद्य। मित्रं देवं मित्रधेयं नो अस्तु। अनूराधान् हविषां  
 वर्धयन्तः। शतं जीवेम शरदः सर्वाः। चित्रं नक्षत्रमुदगात्पुरस्तात्। अनूराधास  
 इति यद्वदन्ति। तन्मित्र एति पृथिभिर्देवयानैः। हिरण्ययैर्विततैरन्तरिक्षे। इन्द्रो  
 ज्येष्ठामनु नक्षत्रमेति। यस्मिन्वृत्रं वृत्रतूर्यं ततार॥१३॥

तस्मिन्वयममृतं दुहांनाः। क्षुधं तरेम दुरितं दुरिष्टिम्। पुरन्दराय वृषभाय  
 धृष्णवे। अषाढाय सहमानाय मीढुषे। इन्द्राय ज्येष्ठा मधुमद्दुहांना। उरुं कृणोतु  
 यजमानाय लोकम्। मूलं प्रजां वीरवतीं विदेय। पराच्येतु निर्ऋतिः पराचा।  
 गोभिर्नक्षत्रं पशुभिः समक्तम्। अहर्भूयाद्यजमानाय मह्यम्॥१४॥

अह॑र्नो अ॒द्य सु॒विते॑ द॒धातु॑। मूलं॑ नक्ष॑त्रमिति॒ यद्वद॑न्ति। परा॑चीं वा॒चा निर्ऋ॑तिं  
नु॒दामि॑। शि॒वं प्र॒जायै॑ शि॒वम॑स्तु॒ मह्य॑म्। या दि॒व्या आपः॑ पय॑सा सम्ब॒भूवुः॑।  
या अ॒न्तरि॑क्ष उ॒त पार्थि॑वीर्याः। यासा॑मषा॒ढा अ॑नु॒यन्ति॒ काम॑म्। ता न॒ आपः॑  
शङ् स्यो॒ना भ॑वन्तु। याश्च॒ कूप्या॒ याश्च॑ ना॒द्याः समु॑द्रियाः। याश्च॑ वैश॒न्तीरु॑त  
प्रा॑स॒चीर्याः॥१५॥

यासा॑मषा॒ढा मधु॑ भ॒क्षय॑न्ति। ता न॒ आपः॑ शङ् स्यो॒ना भ॑वन्तु। तन्नो॒ विश्वे॒  
उप॑ शृण्वन्तु दे॒वाः। तद॑षा॒ढा अ॒भिसं॑यन्तु॒ यज्ञ॑म्। तन्नक्ष॑त्रं प्रथ॒तां प॒शुभ्यः॑।  
कृषि॑र्वृष्टि॒र्यज॑मानाय कल्प॒ताम्। शु॒भ्राः क॒न्या यु॒वतयः॑ सु॒पेश॑सः। क॒र्मक॑तः सु॒कृतो॑  
वी॒र्या॑वतीः। विश्वा॑न् दे॒वान् ह॒विषा॑ वर्ध॒यन्तीः॑। अ॒षा॒ढाः काम॑मुप॒ यान्तु॑ य॒ज्ञम्॥१६॥

यस्मिन् ब्रह्मा॒ऽभ्यज॑य॒त्सर्व॑मेतत्। अ॒मुं च॑ लो॒कमि॑दम् च॒ सर्व॑म्। तन्नो॒  
नक्ष॑त्रमभि॒जिद्वि॑जित्य॑। श्रियं॑ दधा॒त्वह्णी॑यमानम्। उ॒भौ लो॒कौ ब्रह्म॑णा॒ सञ्जि॑ते॒मौ।  
तन्नो॒ नक्ष॑त्रमभि॒जिद्वि॑चष्टाम्। तस्मि॑न्व॒यं पृ॒तनाः॒ सञ्जि॑येम। तन्नो॑ दे॒वासो॒

अनु॒जानन्तु॑ काम॒म्। शृ॒ण्वन्ति॑ श्रो॒णाम॒मृत॑स्य गो॒पाम्। पु॒ण्याम॑स्या॒ उप॑शृ॒णोमि॒  
वाच॑म्॥१७॥

म॒हीं दे॒वीं विष्णु॑पत्नीमजूर्याम्। प्र॒तीची॑मेना॒ ह॒विषा॑ यजामः। त्रे॒धा  
विष्णु॑रुरुगा॒यो विच॑क्रमे। म॒हीं दि॒वं पृथि॒वीम॒न्तरि॑क्षम्। तच्छ्रो॒णैति॑श्रव॒  
इच्छ॑माना। पु॒ण्यं श्लो॒कं यज॑मानाय कृ॒ण्वती॑। अ॒ष्टौ दे॒वा वस॑वः सो॒म्यासः॑।  
चत॑स्रो दे॒वीर॒जराः॑ श्रवि॑ष्ठाः। ते य॒ज्ञं पा॑न्तु रज॑सः प॒रस्ता॑त्। स॒व॒त्स॒रीण॑म॒मृत॑ः  
स्व॒स्ति॥१८॥

य॒ज्ञं नः॑ पा॒न्तु वस॑वः प॒रस्ता॑त्। द॒क्षिण॑तोऽभि॒यन्तु॑ श्रवि॑ष्ठाः। पु॒ण्यं नक्ष॑त्रम॒भि  
संवि॑शाम। मा नो अ॒राति॑रघ॒शः सा॒ऽगन्। क्ष॒त्रस्य॑ रा॒जा वरु॑णोऽधि॒राजः॑।  
नक्ष॑त्राणा॒ शत॑भिष॒ग्वसि॑ष्ठः। तौ दे॒वेभ्यः॑ कृ॒णुतो॑ दी॒र्घमा॑युः। श॒तं स॒हस्रा॑  
भे॒ष॒जानि॑ ध॒त्तः। य॒ज्ञं नो॒ राजा॑ वरु॒ण उप॑यातु। तन्नो॒ विश्वे॑ अ॒भि संय॑न्तु  
दे॒वाः॥१९॥

तन्नो॒ नक्ष॑त्रं श॒तभि॑ष॒ग्वजु॑षाणम्। दी॒र्घमा॑युः प्र॒तिर॑द्भे॒ष॒जानि॑। अ॒ज



एकपादुदगात्पुरस्तात्। विश्वा भूतानि प्रति मोदमानः। तस्य देवाः प्रसवं यन्ति सर्वे। प्रोष्ठपदासो अमृतस्य गोपाः। विभ्राजमानः समिधान उग्रः। आऽन्तरिक्षमरुहदगन्द्याम्। तं सूर्यं देवमजमेकपादम्। प्रोष्ठपदासो अनुयन्ति सर्वे॥२०॥

अहिर्बुध्नियः प्रथमान एति। श्रेष्ठो देवानामुत मानुषाणाम्। तं ब्राह्मणाः सोमपाः सोम्यासः। प्रोष्ठपदासो अभि रक्षन्ति सर्वे। चत्वार एकमभि कर्म देवाः। प्रोष्ठपदास इति यान् वदन्ति। ते बुध्नियं परिषद्यं स्तुवन्तः। अहिं रक्षन्ति नमसोपसद्य। पूषा रेवत्यन्वेति पन्थाम्। पुष्टिपती पशुपा वाजबस्त्यौ॥२१॥

इमानि हव्या प्रयता जुषाणा। सुगैर्नो यानैरुपयातां यज्ञम्। क्षुद्रान् पशून् रक्षतु रेवती नः। गावो नो अश्वाः अन्वेतु पूषा। अन्नं रक्षन्तौ बहुधा विरूपम्। वाजं सनुतां यजमानाय यज्ञम्। तदश्विनावश्वयुजोपयाताम्। शुभङ्गमिष्ठौ सुयमेभिरश्वैः। स्वं नक्षत्रं हविषा यजन्तौ। मध्वा सम्पृक्तौ यजुषा समक्तौ॥२२॥

यौ देवानां भिषजौ हव्यवाहौ। विश्वस्य दूतावमृतस्य गोपौ। तौ नक्षत्रं  
 जुजुषाणोपयाताम्। नमोऽश्विभ्यां कृणुमोऽश्वयुग्भ्याम्। अपं पाप्मानं भरणीर्भरन्तु।  
 तद्यमो राजा भगवान् विचष्टाम्। लोकस्य राजा महतो महान् हि। सुगं नः  
 पन्थामभयं कृणोतु। यस्मिन्नक्षत्रे यम एति राजा। यस्मिन्नेनमभ्यषिञ्चन्त देवाः।  
 तदस्य चित्रं हविषा यजाम। अपं पाप्मानं भरणीर्भरन्तु। निवेशनी यत्ते देवा  
 अदधुः॥ २३॥ ततार मह्यं प्रासचीर्या यान्तु यज्ञं वाचं स्वस्ति देवा अनुयन्ति सर्वे वाजबस्यो समन्तौ देवास्त्रिणि च॥ [२]

नवोनवो भवति जायमानो यमादित्या अ२ शुमाप्याययन्ति। ये विरूपे समनसा  
 संव्ययन्ती। समानं तन्तुं परितातना ते। विभू प्रभू अनुभू विश्वतो हुवे। ते नो नक्षत्रे  
 हवमागमेतम्। वयं देवी ब्रह्मणा संविदानाः। सुरत्नासो देववीतिं दधानाः। अहोरात्रे  
 हविषा वर्धयन्तः। अतिं पाप्मानमतिं मुक्त्या गमेम। प्रत्युवदृश्यायती॥ २४॥

व्युच्छन्तीं दुहिता दिवः। अपो मही वृणुते चक्षुषा। तमो ज्योतिष्कृणोति सूनरी।  
 उदुस्त्रियाः सचते सूर्यः। सचा उद्यन्नक्षत्रमर्चिमत्। तवेदुषो व्युषि सूर्यस्य च। सं

भुक्तेनं गमेमहि। तन्नो नक्षत्रमर्चिमत्। भानुमत्तेजं उच्चरत्। उपयज्ञमिहागमत्॥२५॥

प्र नक्षत्राय देवाय। इन्द्रायेन्दुं हवामहे। स नः सविता सुवत्सनिम्। पुष्टिदां वीरवत्तमम्। उदुत्यं चित्रम्। अदितिर्न उरुष्यतु महीमू षु मातरम्। इदं विष्णुः प्रतद्विष्णुः। अग्निर्मूर्धा भुवः। अनुनोऽद्यानुमतिरन्विदनुमते त्वम्। हव्यवाहं स्विष्टम्॥२६॥ आयत्यगमस्विष्टम्॥ [३]

अग्निर्वा अकामयत। अन्नादो देवानां स्यामिति। स एतमग्नये कृत्तिकाभ्यः पुरोडाशमष्टाकंपालं निरवपत्। ततो वै सोऽन्नादो देवानामभवत्। अग्निर्वै देवानामन्नादः। यथा ह वा अग्निर्देवानामन्नादः। एवम् ह वा एष मनुष्याणां भवति। य एतेन हविषा यजते। य उ चैनदेवं वेद। सोऽत्र जुहोति। अग्नये स्वाहा कृत्तिकाभ्यः स्वाहा। अम्बायै स्वाहा दुलायै स्वाहा। नितृत्यै स्वाहाऽभ्रयन्त्यै स्वाहा। मेघयन्त्यै स्वाहा वरुषयन्त्यै स्वाहा। चुपुणीकायै स्वाहेति॥२७॥

प्रजापतिः प्रजा असृजत। ता अस्मात्सृष्टाः पराचीरायन्। तासां

रोहिणीमभ्यध्यायत्। सोऽकामयत्। उप॒ मा वर्तेत। समे॑नया गच्छे॒येति॑। स ए॒तं  
 प्र॒जाप॑तये रोहि॒ण्यै च॒रुं निर॑वपत्। ततो॒ वै सा तमु॑पावर्तत। समे॑नयागच्छत्।  
 उप॑ ह॒ वा ए॑नं प्रि॒यमाव॑र्तते। सं प्रि॒येण॑ गच्छते। य ए॒तेन॑ ह॒विषा॑ यज॑ते। य  
 उ॒चैन॑देवं वेद॑। सोऽत्र॑ जुहोति। प्र॒जाप॑तये॒ स्वाहा॑ रोहि॒ण्यै स्वाहा॑। रोच॑मानायै  
 स्वाहा॑ प्र॒जाभ्यः॒ स्वाहेति॑॥२८॥

सोमो॒ वा अ॑कामयत्। ओष॑धीना॒ राज्यम॑भिज॑येयमिति॑। स ए॒तं  
 सोमा॑य मृ॒गशी॒र्षाय॑ श्यामा॒कं च॒रुं पय॑सि निर॑वपत्। ततो॒ वै स ओष॑धीना॒  
 राज्यम॑भ्यजयत्। सु॒माना॑ना॒ ह॒ वै रा॒ज्यम॑भिज॑यति। य ए॒तेन॑ ह॒विषा॑ यज॑ते। य  
 उ॒चैन॑देवं वेद॑। सोऽत्र॑ जुहोति। सोमा॑य॒ स्वाहा॑ मृ॒गशी॒र्षाय॑ स्वाहा॑। इ॒न्व॒काभ्यः॒  
 स्वाहो॑षधीभ्यः॒ स्वाहा॑। रा॒ज्याय॑ स्वाहा॒ऽभिजि॑त्यै॒ स्वाहेति॑॥२९॥

रु॒द्रो वा अ॑कामयत्। प॒शुमान्॑स्यामिति॑। स ए॒तं  
 च॒रुं पय॑सि निर॑वपत्। ततो॒ वै स प॑शुमान॑भवत्। प॒शुमान् ह॒ वै भ॑वति। य ए॒तेन॑  
 ह॒विषा॑ यज॑ते। य उ॒चैन॑देवं वेद॑। सोऽत्र॑ जुहोति। रु॒द्राय॑ स्वाहा॒ऽऽर्द्रा॑यै॒ स्वाहा॑।

पिन्वमानायै स्वाहा पशुभ्यः स्वाहेति॥३०॥

ऋक्षा वा इयमलोमकाऽऽसीत्। साऽकामयत्। ओषधीभिर्वनस्पतिभिः प्रजायेयेति। सैतमदित्यै पुनर्वसुभ्यां चरुं निरवपत्। ततो वा इयमोषधीभिर्वनस्पतिभिः प्राजायत्। प्रजायते ह वै प्रजयां पशुभिः। य एतेन हविषा यजते। य उ चैनदेवं वेद। सोऽत्र जुहोति। अदित्यै स्वाहा पुनर्वसुभ्याम्। स्वाहा भूत्यै स्वाहा प्रजात्यै स्वाहेति॥३१॥

बृहस्पतिर्वा अकामयत्। ब्रह्मवर्चसी स्यामिति। स एतं बृहस्पतये तिष्याय नैवारं चरुं पयसि निरवपत्। ततो वै स ब्रह्मवर्चस्यभवत्। ब्रह्मवर्चसी ह वै भवति। य एतेन हविषा यजते। य उ चैनदेवं वेद। सोऽत्र जुहोति। बृहस्पतये स्वाहा तिष्याय स्वाहा। ब्रह्मवर्चसाय स्वाहेति॥३२॥

देवासुराः संयत्ता आसन्। ते देवाः सर्पेभ्य आश्रेषाभ्य आज्ये करम्भं निरवपन्। तानेताभिरेव देवताभिरुपानयन्। एताभिर्ह वै देवताभिर्द्विषन्तं भ्रातृव्यमुपनयति। य एतेन हविषा यजते। य उ चैनदेवं वेद। सोऽत्र जुहोति। सर्पेभ्यः स्वाहाऽऽश्रेषाभ्यः

स्वाहा॥ द॒न्द॒शू॒कै॒भ्यः॒ स्वा॒हेति॑॥ ३३॥

पि॒त॒रो वा अ॑कामयन्त। पि॒तृ॒लो॒क ऋ॑ध्रुया॒मेति॑। त ए॒तं पि॒तृ॒भ्यो म॒घा॒भ्यः  
पु॒रो॒डा॒शꣳ ष॑ट्प॒लं नि॑र॒वप॑न्। ततो॒ वै ते पि॑तृ॒लो॒क आ॑र्ध्रुवन्। पि॒तृ॒लो॒के ह॒ वा  
ऋ॑ध्रोति। य ए॒तेन॑ ह॒विषा॒ यज॑ते। य उ॑ चैन॒दे॒वं वे॑द। सोऽ॒त्र जु॑होति। पि॒तृ॒भ्यः स्वा॒हा  
म॒घा॒भ्यः। स्वा॒हाऽन॒घा॒भ्यः स्वा॒हाऽग॒दा॒भ्यः। स्वा॒हाऽरु॒न्ध॒ती॒भ्यः स्वा॒हेति॑॥ ३४॥

अ॒र्य॒मा वा अ॑कामयत। प॒शु॒मा॒न्त्स्या॒मिति॑। स ए॒तम॑र्य॒म्णे फ॒ल्गु॑नी॒भ्यां च॒रुं  
नि॑र॒वप॑त्। ततो॒ वै स प॑शु॒मा॒न॒भव॑त्। प॒शु॒मा॒न् ह॒ वै भ॑वति। य ए॒तेन॑ ह॒विषा॒  
यज॑ते। य उ॑ चैन॒दे॒वं वे॑द। सोऽ॒त्र जु॑होति। अ॒र्य॒म्णे स्वा॒हा फ॒ल्गु॑नी॒भ्याꣳ स्वा॒हा॥  
प॒शु॒भ्यः स्वा॒हेति॑॥ ३५॥

भ॒गो वा अ॑कामयत। भ॒गी श्रे॒ष्ठी दे॒वाना॑ꣳस्या॒मिति॑। स ए॒तं भ॒गाय॑ फ॒ल्गु॑नी॒भ्यां  
च॒रुं नि॑र॒वप॑त्। ततो॒ वै स भ॒गी श्रे॒ष्ठी दे॒वाना॑म॒भव॑त्। भ॒गी ह॒ वै श्रे॒ष्ठी सं॑मा॒नाना॑  
भवति। य ए॒तेन॑ ह॒विषा॒ यज॑ते। य उ॑ चैन॒दे॒वं वे॑द। सोऽ॒त्र जु॑होति। भ॒गाय॑ स्वा॒हा

फलङ्गुनीभ्या॒ꣳ स्वाहा॑। श्रैष्ठ्या॒य स्वाहेति॑॥३६॥

स॒वि॒ता वा अ॑कामयत। श्र॒न्मे दे॒वा द॒धीर॑न्। स॒वि॒ता स्या॒मिति॑। स ए॒तꣳ  
स॒वि॒त्रे ह॒स्ताय॑ पुरो॒डाशं॑ द्वा॒दश॑कपालं॒ निर॑वपदाशूनां॒ व्री॒ही॒णाम्। ततो॒ वै तस्मै॑  
श्रद्धे॒वा अ॑दधत। स॒वि॒ताऽभ॑वत्। श्रद्ध॒वा अ॑स्मै मनु॒ष्या द॑धते। स॒वि॒ता संमा॒नानां॑  
भव॒ति। य ए॒तेन॑ ह॒विषा॑ यज॑ते। य उ॑ चैन॒देवं वे॑द। सोऽ॒त्र जु॑होति। स॒वि॒त्रे  
स्वाहा॑ ह॒स्ताय॑। स्वाहा॑ द॒दते॑ स्वाहा॑ पृ॒णते॑। स्वाहा॑ प्र॒यच्छ॑ते स्वाहा॑ प्रतिगृ॒णते॑  
स्वाहेति॑॥३७॥

त्वष्टा॒ वा अ॑कामयत। चि॒त्रं प्र॒जां वि॑न्देयेति॑। स ए॒तं त्वष्ट्रे॑ चि॒त्रायै॑ पुरो॒डाशं॑ म॒ष्टा-  
क॒पालं॑ निर॑वपत्। ततो॒ वै स चि॒त्रं प्र॒जाम॑विन्दत। चि॒त्रꣳ ह॒ वै प्र॒जां वि॑न्दते।  
य ए॒तेन॑ ह॒विषा॑ यज॑ते। य उ॑ चैन॒देवं वे॑द। सोऽ॒त्र जु॑होति। त्वष्ट्रे॒ स्वाहा॑ चि॒त्रायै॑  
स्वाहा॑। चै॒त्राय॑ स्वाहा॑ प्र॒जायै॑ स्वाहेति॑॥३८॥

वा॒युर्वा अ॑कामयत। का॒म॒चार॑मे॒षु लो॒केष्व॑भिज॑येय॒मिति॑। स ए॒तद्वा॒यवे॑ नि॒ष्ठ्यायै॑  
गृ॒ष्ट्यै दु॒ग्धं प॑यो निर॑वपत्। ततो॒ वै स का॒म॒चार॑मे॒षु लो॒केष्व॑भ्य॑जयत्। का॒म॒चारꣳ

ह॒ वा ए॒षु लो॒केष्व॒भिज॑यति। य ए॒तेन॑ ह॒विषा॑ यज॑ते। य उ॑ चैनदे॒वं वेद॑।  
सोऽ॒त्र जु॑होति। वा॒यवे॒ स्वाहा॑ नि॒ष्ठ्यायै॑ स्वाहा॑। का॒म॒चा॒राय॑ स्वाहा॑ऽभिजित्यै॑  
स्वाहेति॑॥३९॥

इन्द्रा॒ग्नी वा अ॑कामयेताम्। श्रे॒ष्ठ्यं दे॒वाना॑म॒भिज॑येवेति॑। तावे॒तमिन्द्रा॑ग्निभ्यां  
विशा॑खाभ्यां पुरो॒डाश॑मेका॒दश॑कपालं निर॑वपताम्। ततो॒ वै तौ श्रे॒ष्ठ्यं  
दे॒वाना॑म॒भ्यज॑यताम्। श्रे॒ष्ठ्यं ह॒ वै स॑मा॒नाना॑म॒भि ज॑यति। य ए॒तेन॑ ह॒विषा॑  
यज॑ते। य उ॑ चैनदे॒वं वेद॑। सोऽ॒त्र जु॑होति। इन्द्रा॒ग्निभ्या॑ऽ॒ स्वाहा॑ विशा॑खाभ्या॑ऽ॒  
स्वाहा॑। श्रे॒ष्ठ्याय॑ स्वाहा॑ऽभिजित्यै॑ स्वाहेति॑॥४०॥

अथै॒तत्पौ॑र्णमा॒स्या आज्यं॑ निर्वपति। कामो॒ वै पौ॑र्णमा॒सी। काम॑ आज्यम्।  
कामे॑नैव कामः॑ स॒मर्ध॑यति। क्षि॒प्रमे॑न॒ऽस॑काम॒ उप॑नमति। येन॑ कामे॒न यज॑ते।  
सोऽ॒त्र जु॑होति। पौ॑र्णमा॒स्यै स्वाहा॑ का॒माय॑ स्वाहा॑ऽग॒त्यै स्वाहेति॑॥४१॥

प्रजापतिः षोडश सोम एकादश रुद्रो दशर्क्षेकादश बृहस्पतिर्दश देवासुरा नव पितर एकादशार्यमा भगो दश दश सविता चतुर्दश त्वष्टा वायुरिन्द्राग्नी दश  
दशाथैतत्पौर्णमास्या अष्टो पञ्चदश॥



मित्रो वा अंकामयत्। मित्रधेयमेषु लोकेष्वभिजयेयमिति। स एतं मित्रायानूराधेभ्यश्चरुं निरवपत्। ततो वै स मित्रधेयमेषु लोकेष्वभ्यजयत्। मित्रधेयः ह वा एषु लोकेष्वभिजयति। य एतेन हविषा यजते। य उ चैनदेवं वेद। सोऽत्र जुहोति। मित्राय स्वाहाऽनूराधेभ्यः स्वाहा। मित्रधेयाय स्वाहाऽभिजित्यै स्वाहेति॥४२॥

इन्द्रो वा अंकामयत्। ज्यैष्ठ्यं देवानामभिजयेयमिति। स एतमिन्द्राय ज्यैष्ठ्यायै पुरोडाशमेकादशकपालं निरवपन्महाव्रीहीणाम्। ततो वै स ज्यैष्ठ्यं देवानामभ्यजयत्। ज्यैष्ठ्यः ह वै समानानामभिजयति। य एतेन हविषा यजते। य उ चैनदेवं वेद। सोऽत्र जुहोति। इन्द्राय स्वाहा ज्यैष्ठ्यायै स्वाहा। ज्यैष्ठ्याय स्वाहाऽभिजित्यै स्वाहेति॥४३॥

प्रजापतिर्वा अंकामयत्। मूलं प्रजां विन्देयेति। स एतं प्रजापतये मूलाय चरुं निरवपत्। ततो वै स मूलं प्रजामविन्दत। मूलः ह वै प्रजां विन्दते। य एतेन हविषा यजते। य उ चैनदेवं वेद। सोऽत्र जुहोति। प्रजापतये स्वाहा मूलाय

स्वाहा॥ प्रजायै स्वाहेति॥४४॥

आपो वा अकामयन्त। समुद्रं काममभिजयेमेति। ता एतमद्भ्योऽषाढाभ्यश्चरुं  
निरवपन्। ततो वै ताः समुद्रं काममभ्यजयन्। समुद्रं ह वै काममभिजयति। य  
एतेन हविषा यजते। य उ चैनदेवं वेद। सोऽत्र जुहोति। अद्भ्यः स्वाहाऽषाढाभ्यः  
स्वाहा॥ समुद्राय स्वाहा कामाय स्वाहा॥ अभिजित्यै स्वाहेति॥४५॥

विश्वे वै देवा अकामयन्त। अनपज्यं जयेमेति। त एतं विश्वेभ्यो देवेभ्यो-  
ऽषाढाभ्यश्चरुं निरवपन्। ततो वै तेऽनपज्यमजयन्। अनपज्यं ह वै जयति।  
य एतेन हविषा यजते। य उ चैनदेवं वेद। सोऽत्र जुहोति। विश्वेभ्यो देवेभ्यः  
स्वाहाऽषाढाभ्यः स्वाहा॥ अनपज्याय स्वाहा जित्यै स्वाहेति॥४६॥

ब्रह्म वा अकामयत्। ब्रह्मलोकमभिजयेयमिति। तदेतं ब्रह्मणेऽभिजिते चरुं  
निरवपत्। ततो वै तद्ब्रह्मलोकमभ्यजयत्। ब्रह्मलोकं ह वा अभिजयति। य  
एतेन हविषा यजते। य उ चैनदेवं वेद। सोऽत्र जुहोति। ब्रह्मणे स्वाहाऽभिजिते

स्वाहा॥ ब्रह्मलोकाय स्वाहाऽभिजित्यै स्वाहेति॥४७॥

विष्णुर्वा अकामयत। पुण्यं श्लोकं शृण्वीय। न मां पापी कीर्तिरागच्छेदिति। स एतं विष्णावे श्रोणायै पुरोडाशं त्रिकपालं निरवपत्। ततो वै स पुण्यं श्लोकं मशृणुत्। नैनं पापी कीर्तिरागच्छत्। पुण्यं ह वै श्लोकं शृणुते। नैनं पापी कीर्तिरागच्छति। य एतेन हविषा यजते। य उ चैनदेवं वेद। सोऽत्र जुहोति। विष्णावे स्वाहा श्रोणायै स्वाहा॥ श्लोकाय स्वाहा श्रुताय स्वाहेति॥४८॥

वसवो वा अकामयन्त। अग्रं देवतानां परीयामेति। त एतं वसुभ्यः श्रविष्ठाभ्यः पुरोडाशमष्टाकपालं निरवपन्। ततो वै तेऽग्रं देवतानां पर्यायन्। अग्रं ह वै समानानां पर्येति। य एतेन हविषा यजते। य उ चैनदेवं वेद। सोऽत्र जुहोति। वसुभ्यः स्वाहा श्रविष्ठाभ्यः स्वाहा॥ अग्राय स्वाहा परीत्यै स्वाहेति॥४९॥

इन्द्रो वा अकामयत। दृढोऽशितिलः स्यामिति। स एतं वरुणाय शतभिषजे भेषजेभ्यः पुरोडाशं दशकपालं निरवपत्कृष्णानां ब्रीहीणाम्। ततो वै स दृढो-

ऽशिथिलोऽभवत्। दृढो ह वा अशिथिलो भवति। य एतेन हविषा यजते। य उ चैनदेवं वेद। सोऽत्र जुहोति। वरुणाय स्वाहा शतभिषजे स्वाहा। भेषजेभ्यः स्वाहेति॥५०॥

अजो वा एकपादकामयत। तेजस्वी ब्रह्मवर्चसी स्यामिति। स एतमजायैकपदे प्रोष्ठपदेभ्यश्चरुं निरवपत्। ततो वै स तेजस्वी ब्रह्मवर्चस्यभवत्। तेजस्वी ह वै ब्रह्मवर्चसी भवति। य एतेन हविषा यजते। य उ चैनदेवं वेद। सोऽत्र जुहोति। अजायैकपदे स्वाहा प्रोष्ठपदेभ्यः स्वाहा। तेजसे स्वाहा ब्रह्मवर्चसाय स्वाहेति॥५१॥

अहिर्वै बुध्रियोऽकामयत। इमां प्रतिष्ठां विन्देयेति। स एतमहये बुध्रियाय प्रोष्ठपदेभ्यः पुरोडाशं भूमिकपालं निरवपत्। ततो वै स इमां प्रतिष्ठामविन्दत। इमां ह वै प्रतिष्ठां विन्दते। य एतेन हविषा यजते। य उ चैनदेवं वेद। सोऽत्र जुहोति। अहये बुध्रियाय स्वाहा प्रोष्ठपदेभ्यः स्वाहा। प्रतिष्ठायै स्वाहेति॥५२॥

पूषा वा अकामयत। पशुमान्स्यामिति। स एतं पूष्णे रेवत्यै चरुं निरवपत्। ततो वै स पशुमानभवत्। पशुमान् ह वै भवति। य एतेन हविषा यजते। य उ

चैनदे॒वं वेद॑। सोऽ॒त्र जुहो॑ति। पू॒ष्णे स्वाहा॑ रे॒वत्यै॑ स्वाहा॑। प॒शुभ्यः॑ स्वाहेति॑॥५३॥

अ॒श्विनौ वा अ॑कामयेताम्। श्रो॒त्रस्वि॒नाव॒ब॒धि॒रौ स्या॒वेति॑। तावे॒तम॒श्विभ्या॑म॒श्वयु॒ग्म्यः  
पु॒रोडा॑शं द्वि॒कपा॒लं नि॒र॒व॒प॒ताम्। ततो॒ वै तौ श्रो॑त्रस्वि॒नाव॒ब॒धि॒राव॒भव॒ताम्।  
श्रो॒त्रस्वी॑ ह॒ वा अ॒ब॒धि॒रो भ॒वति॑। य ए॒तेन॑ ह॒विषा॑ यज॑ते। य उ॑ चैनदे॒वं वेद॑।  
सोऽ॒त्र जुहो॑ति। अ॒श्विभ्या॑ः स्वाहा॑ऽश्व॒युग्म्या॑ः स्वाहा॑। श्रो॒त्राय॑ स्वाहा॑ श्रु॒त्यै  
स्वाहेति॑॥५४॥

य॒मो वा अ॑कामयत। पि॒तृणा॑ः रा॒ज्यम॒भिज॑येय॒मिति॑। स ए॒तं  
य॒माया॑प॒भर॑णीभ्यश्च॒रुं नि॒र॒प॒वत्। ततो॒ वै स पि॑तृणा॑ः रा॒ज्यम॒भ्यज॑यत्।  
स॒मा॒ना॒नाः ह॒ वै रा॒ज्यम॒भि ज॑यति। य ए॒तेन॑ ह॒विषा॑ यज॑ते। य उ॑ चैनदे॒वं वेद॑।  
सोऽ॒त्र जुहो॑ति। य॒माय॑ स्वाहा॑ऽप॒भर॑णीभ्यः स्वाहा॑। रा॒ज्याय॑ स्वाहा॑ऽभिजि॑त्यै  
स्वाहेति॑॥५५॥

अथै॒तद॑मावा॒स्याया॑ आज्यं॒ निर्व॑पति। कामो॒ वा अ॑मावा॒स्याः। काम॑ आज्यम्॑।

कामेनैव कामं समर्धयति। क्षिप्रमेनं सकामं उपनमति। येन कामेन यजते।  
 सोऽत्र जुहोति। अमावास्यायै स्वाहा कामाय स्वाहाऽऽगत्यै स्वाहेति॥५६॥ मित्र इन्द्रः  
 प्रजापतिर्दश दशाप् एकादश विश्वे ब्रह्म दशदश विष्णुस्त्रयोदश वसव इन्द्रोऽजोऽहिर्वै बुधिर्यः पूषाऽश्विनौ यमो दश दशाथैतदमावास्याया अष्टौ पञ्चदश॥ [५]

चन्द्रमा वा अकामयत। अहोरात्रानर्धमासान्मासानृतून्त्संवत्सरमात्वा।  
 चन्द्रमसः सायुज्यं सलोकतामाप्नुयामिति। स एतं चन्द्रमसे प्रतीदृश्यायै  
 पुरोडाशं पञ्चदशकपालं निरवपत्। ततो वै सोऽहोरात्रानर्धमासान्मासा-  
 नृतून्त्संवत्सरमात्वा। चन्द्रमसः सायुज्यं सलोकतामाप्नोत्। अहोरात्रान् ह वा  
 अर्धमासान्मासानृतून्त्संवत्सरमात्वा। चन्द्रमसः सायुज्यं सलोकतामाप्नोति।  
 य एतेन हविषा यजते। य उ चैनदेवं वेद। सोऽत्र जुहोति। चन्द्रमसे स्वाहा  
 प्रतीदृश्यायै स्वाहा। अहोरात्रेभ्यः स्वाहाऽर्धमासेभ्यः स्वाहा। मासेभ्यः स्वाहर्तुभ्यः  
 स्वाहा। संवत्सराय स्वाहेति॥५७॥

अहोरात्रे वा अकामयेताम्। अत्यहोरात्रे मुच्येवहि। न नावहोरात्रे  
 आप्नुयातामिति। ते एतमहोरात्राभ्यां चरुं निरवपताम्। द्वयानां व्रीहीणाम्।

शुक्लानां च कृष्णानां च। स॒वा॒त्योर्दु॒ग्धे। श्वे॒तायै च कृ॒ष्णायै च। ततो॒ वै ते  
अत्य॑होरा॒त्रे अ॑मुच्येते। नैन॑ अहोरा॒त्रे आ॑प्नुताम्। अति॑ ह॒ वा अ॑होरा॒त्रे मु॑च्यते।  
नैन॑महोरा॒त्रे आ॑प्नुतः। य ए॒तेन॑ ह॒विषा॒ यज॑ते। य उ॑ चैनदे॒वं वेद॑। सोऽत्र॑ जुहोति।  
अहे॒ स्वाहा॒ रात्रि॑यै॒ स्वाहा॑। अति॑मुक्त्यै॒ स्वाहेति॑॥५८॥

उ॒षा वा अ॑कामयत। प्रि॒याऽऽदि॒त्यस्य॑ सु॒भगा॑ स्या॒मिति॑। सैतमु॒षसे॑ च॒रुं  
नि॒र्वप॑त्। ततो॒ वै सा प्रि॒याऽऽदि॒त्यस्य॑ सु॒भगा॑ऽभवत्। प्रि॒यो ह॒ वै स॑मा॒नाना॑ः  
सु॒भगा॑ भवति। य ए॒तेन॑ ह॒विषा॒ यज॑ते। य उ॑ चैनदे॒वं वेद॑। सोऽत्र॑ जुहोति। उ॒षसे॑  
स्वाहा॒ व्यु॑ष्ठ्यै॒ स्वाहा॑। व्यू॒ष्यै॒ स्वाहा॑ व्यु॒च्छन्त्यै॒ स्वाहा॑। व्यु॑ष्टायै॒ स्वाहेति॑॥५९॥

अथै॒तस्मै॒ नक्ष॑त्राय च॒रुं नि॒र्वप॑ति। यथा॒ त्वं दे॒वाना॑म॒सि। ए॒वम॑हं म॒नुष्या॑णां  
भूया॑स॒मिति॑। यथा॑ ह॒ वा ए॒तद्दे॒वाना॑म्। ए॒व॒ ह॒ वा ए॒ष म॒नुष्या॑णां भवति। य  
ए॒तेन॑ ह॒विषा॒ यज॑ते। य उ॑ चैनदे॒वं वेद॑। सोऽत्र॑ जुहोति। नक्ष॑त्राय॒ स्वाहा॑दे॒ष्यते॒  
स्वाहा॑। उ॒द्य॒ते स्वा॒होदि॑ताय॒ स्वाहा॑। हर॑से॒ स्वाहा॑ भर॑से॒ स्वाहा॑। भ्राज॑से॒ स्वाहा॑

तेजसे स्वाहा॥ तपसे स्वाहा॥ ब्रह्मवर्चसाय स्वाहेति॥६०॥

सूर्यो वा अंकामयत। नक्षत्राणां प्रतिष्ठा स्यामिति। स एतः सूर्याय नक्षत्रेभ्यश्चरुं निर्वपत्। ततो वै स नक्षत्राणां प्रतिष्ठाऽभवत्। प्रतिष्ठा ह वै समानानां भवति। य एतेन हविषा यजते। य उ चैनदेवं वेद। सोऽत्र जुहोति। सूर्याय स्वाहा नक्षत्रेभ्यः स्वाहा॥ प्रतिष्ठायै स्वाहेति॥६१॥

अथैतमदित्यै चरुं निर्वपति। इयं वा अदितिः। अस्यामेव प्रति तिष्ठति। सोऽत्र जुहोति। अदित्यै स्वाहा॥ प्रतिष्ठायै स्वाहेति॥६२॥

अथैतं विष्णवे चरुं निर्वपति। यज्ञो वै विष्णुः। यज्ञ एवान्ततः प्रति तिष्ठति। सोऽत्र जुहोति। विष्णवे स्वाहा यज्ञाय स्वाहा॥ प्रतिष्ठायै स्वाहेति॥६३॥

चन्द्रमाः पञ्चदशाहोरात्रे सप्तदशोपा एकादशाथैतस्मै नक्षत्राय त्रयोदश सूर्यो दशाथैतमदित्यै पञ्चाथैतं विष्णवे षट्सप्त (सविताऽऽशूनां ब्रौहीणामिन्द्रो महाब्रौहीणामिन्द्रः कृष्णानां ब्रौहीणामहोरात्रे द्वयानां ब्रौहीणाम्। पितरः षट्पदपालः सविता द्वादशकपालमिन्द्राग्नी एकादशकपालमिन्द्र एकादशकपालमिन्द्रो दशकपालं विष्णुः सप्तकपालमहिर्भूमिकपालमश्विनौ द्विकपालं चन्द्रमाः पञ्चदशकपालमग्निस्त्वष्टा वसवोऽष्टाकपालमन्यत्र चरुम्। रुद्रोऽर्यमा पृषा पशुमान्ध्याः सोमो रुद्रो बृहस्पतिः पर्यासि वायुः पर्यः सोमो वायुरिन्द्राग्नी मित्र इन्द्र आपो ब्रह्म यमोऽभिर्जित्यै त्वष्टा प्रजापतिः प्रजायै पौर्णमास्या अमावास्याया अगत्य विश्वे जित्या अश्विनौ श्रुत्यै। ब्रह्म तदेतं विष्णुः स एतं वायुः स एतदापस्ताः। पितरो विश्वे वसवोऽकामयन्त मेति त एतन्निरवपन्। आपोऽकामयन्त मेति ता एतन्निरवपन्। इन्द्राग्नी अश्विनांवकामयेतां वेति तावेतन्निरवपताम्। अहोरात्रे वा अंकामयेतामिति ते एतन्निरवपताम्। अन्यत्रांकामयेतेति स एतन्निरवपत्। इन्द्राग्नी श्रेष्ठमिन्द्रो ज्येष्ठमिन्द्रो दृढः। अहिः सूर्योऽदित्यै विष्णवे प्रतिष्ठायै



सोमो॑ यमः॑ संमानाना॑म्। अ॒ग्निर्नो॑ रीरिषद॒न्यत्रं॑ रीरिषः॥॥

[६]

अ॒ग्निर्न॑ ऋ॒ध्यास्म॑ नवो॑नवोऽग्नि॒र्मित्र॑श्चन्द्र॒माः षट्॥६॥

अ॒ग्निर्न॑स्तत्रो॑ वा॒युरहि॑र्बु॒ध्रियं॑ ऋ॒क्षा वा॑ इ॒यमथै॑तत्पौ॒र्णमा॑स्या अ॒जो वा॑ एक॒पा॒थसूर्य॑स्त्रिष॒ष्टिः॥६३॥

अ॒ग्निर्न॑ पातु॒ प्रति॑ष्टायै॒ स्वाहे॑ति॥

हरिः॑ ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके प्रथमः प्रपाठकः समाप्तः॥

॥द्वितीयः प्रश्नः॥

॥तैत्तिरीयब्राह्मणे तृतीयाष्टके द्वितीयः प्रपाठकः॥

तृतीयस्यामि॒तो दि॒वि सोम॑ आसीत्। तं गा॒य॒त्र्याऽह॑रत्। तस्य॑ पु॒र्णम॑च्छिद्यत।  
तत्पु॒र्णोऽभ॑वत्। तत्पु॒र्णस्य॑ पु॒र्णत्व॑म्। ब्र॒ह्म वै पु॒र्णः। यत्पु॒र्णशा॒ख्या  
व॒त्सान॑पाक॒रोति॑। ब्र॒ह्मणै॒वैना॑न॒पाक॑रोति। गा॒य॒त्रो वै पु॒र्णः। गा॒य॒त्राः प॒शवः॑॥१॥

तस्मा॒त्रीणि॑त्रीणि पु॒र्णस्य॑ पला॒शानि॑। त्रि॒पदा॑ गा॒य॒त्री। यत्पु॒र्णशा॒ख्या गाः  
प्रा॒र्पय॑ति। स्वयै॒वैना॑ दे॒वता॑या प्रा॒र्पय॑ति। यं का॒मये॑ताप॒शुः स्या॑दि॒ति। अ॒पु॒र्णान्त॑स्मै  
शु॒ष्का॑ग्रा॒माह॑रेत्। अ॒प॒शुरे॒व भ॑वति। यं का॒मये॑त प॒शुमा॑न्त्स्या॒दि॒ति। ब॒हुप॑र्णान्त॑स्मै  
बहु॑शा॒खामा॑हरेत्। प॒शुम॑न्तमे॒वैनं॑ करोति॥२॥

यत्प्राची॑मा॒ हरे॑त्। दे॒वल॑ोकम॒भि ज॑येत्। यदु॒दीचीं॑ मनुष्यल॑ोकम्। प्राची॑मु॒दीची॑मा  
ह॑रति। उ॒भयो॑र्लो॒कयो॑र॒भिजि॑त्यै। इ॒षे त्वो॒र्जे त्वे॒त्याह॑। इ॒षमे॒वोर्जं॑ यज॑माने  
दधा॑ति। वा॒यवः॑ स्वे॒त्याह॑। वा॒युर्वा अ॒न्तरि॑क्ष॒स्याध्य॑क्षाः। अ॒न्तरि॑क्ष॒देव॒त्याः खलु॑

वै प॒शवः॑ ॥ ३ ॥

वा॒यव॑ ए॒वैना॒न्परि॑ द॒दाति॑ । प्र वा ए॒नाने॒तदा क॑रोति । यदा॑ह । वा॒यवः॑  
स्थे॒त्युपा॒यवः॑ स्थे॒त्याह॑ । यज॑मानायै॒व प॒शूनु॑पं ह्वयते । दे॒वो वः॑ स॒विता॑  
प्रा॒र्पय॑त्वित्या॒ह प्र॒सूत्यै॑ । श्रेष्ठ॑तमाय॒ कर्म॑ण॒ इत्या॑ह । य॒ज्ञो हि श्रेष्ठ॑त॒मं कर्म॑ ।  
तस्मा॑दे॒वमा॑ह । आप्या॑यध्वम॒घ्निया॑ दे॒वभा॒गमित्या॑ह ॥ ४ ॥

व॒त्सेभ्य॑श्च॒ वा ए॒ताः पु॒रा म॑नु॒ष्येभ्य॑श्चाप्या॒यन्त॑ । दे॒वेभ्य॑ ए॒वैना॒ इन्द्रा॑याप्या॒यय॑ति ।  
ऊ॒र्जस्व॑तीः प॒यस्व॑ती॒रित्या॑ह । ऊ॒र्जः॒ हि प॑यः स॒म्भर॑न्ति । प्र॒जाव॑तीर॒नमी॒वा  
अ॒य॒क्ष्मा इत्या॑ह प्र॒जात्यै॑ । मा वः॑ स्तेन ई॒शत॒ माऽघ॑श॒स इत्या॑ह गु॒प्त्यै॑ ।  
रु॒द्रस्य॑ हे॒तिः परि॑ वो वृ॒ण॒क्तित्या॑ह । रु॒द्रादे॒वैना॑स्त्रायते । ध्रु॒वा अ॒स्मिन्गो॑प॒तौ स्या॑त  
ब॒ह्वीरित्या॑ह । ध्रु॒वा ए॒वास्मि॑न्ब॒ह्वीः क॑रोति ॥ ५ ॥

यज॑मानस्य प॒शून्पा॒हीत्या॑ह । प॒शूनां॑ गो॒पी॒थाय॑ । तस्मा॑त्सा॒यं प॒शव॑  
उप॑स॒माव॑र्तन्ते । अन॑धः सादयति । गर्भा॑णां धृ॒त्या अ॒प्र॒पादा॑य । तस्मा॑द्गर्भाः॑

प्र॒जाना॑म॒प्रपा॑दुकाः। उ॒परी॑व॒ निद॑धाति। उ॒परी॑व॒ हि सु॑व॒र्गो लो॒कः। सु॒व॒र्गस्य॑  
लो॒कस्य॑ स॒मंष्ट्यै॑॥६॥ प॒शवः॑ करोति प॒शवो॑ दे॒वभा॑गमि॒त्याह॑ करोति न॒वं च॥—————[१]

दे॒वस्य॑ त्वा स॒वितुः॑ प्र॒स॒व इत्य॑श्च॒प॒र॒शुमा॑द॒त्ते प्र॑सू॒त्यै। अ॒श्विनो॑र्बा॒हुभ्या॑मि॒त्याह॑।  
अ॒श्विनो॑ हि दे॒वाना॑म॒ध्वर्यू॑ आ॒स्ताम्। पू॒ष्णो ह॑स्ता॒भ्यामि॒त्याह॑ य॒त्यै। यो वा ओष॑धीः  
प॒र्वशो॑ वेद। नैनाः स हि॑न॒स्ति। प्र॒जाप॑ति॒र्वा ओष॑धीः प॒र्वशो॑ वेद। स ए॑ना॒ न  
हि॑न॒स्ति। अ॒श्वप॒र्श्वा ब॒र्हिर॑च्छै॒ति। प्रा॒जाप॒त्यो वा अ॒श्वः स॑यो॒नित्वा॑य॥७॥

ओष॑धीना॒महि॑सा॒यै। य॒ज्ञस्य॑ घो॒षद॑सी॒त्याह॑। य॒ज॑मान ए॒व र॒यिं द॑धाति।  
प्र॒त्युष्ट॑ र॒क्षः प्र॒त्युष्टा॑ अ॒रा॒तय॑ इ॒त्याह॑। र॒क्ष॑सा॒मप॑ह॒त्यै। प्रे॒यम॑गा॒द्धिष॑णा  
ब॒र्हिर॑च्छे॒त्याह॑। वि॒द्या वै धि॑षणा॑। वि॒द्ययै॑वै॒नद॑च्छै॒ति। म॒नु॒ना कृ॒ता स्व॒धया॑  
वि॒त॒ष्टे॒त्याह॑। मा॒नु॒वी हि प॑र॒शुः स्व॒धाकृ॑ता॥८॥

त आ॒व॑ह॒न्ति क॒वयः॑ पु॒रस्ता॑दि॒त्याह॑। शु॒श्रु॒वांसो॑ वै क॒वयः॑। य॒ज्ञः पु॒रस्ता॑त्।  
मु॒ख॒त ए॒व य॒ज्ञमा॑ र॒भते॑। अथो॑ य॒दे॒तदु॒क्त्वा य॒तः कु॑त॒श्चा ह॑र॒ति। तत्प्रा॑च्या ए॒व

दि॒शो भ॑वति। दे॒वेभ्यो॑ जु॒ष्टमि॑ह ब॒र्हि॒रा॒सद॑ इत्या॑ह। ब॒र्हि॒षः स॑मृ॒द्धौ। क॑र्म॒णो॒ऽन॑परा॒धाय। दे॒वानां॑ परि॒षूत॑म॒सीत्या॑ह॥ ९॥

यद्वा इ॒दं किं॑ च। तद्दे॒वानां॑ परि॒षूत॑म्। अथो॒ यथा॒ वस्य॑से प्र॒ति॒प्रो॒च्याहे॒दं क॑रिष्यामीति॑। ए॒वमे॒व तद॑ध्व॒र्युर्दे॒वेभ्यः॑ प्र॒ति॒प्रो॒च्यं ब॒र्हि॒र्दा॑ति। आ॒त्मनो॑ऽहि॒ंसा॑यै। याव॑तः स्त॒म्बान्प॑रिदि॒शेत्। यत्तेषा॑मुच्छि॒ष्टं ऽ॒प्यात्। अति॑ तद्य॒ज्ञस्य॑ रेचयेत्। एक॑ं स्त॒म्बं प॑रिदि॒शेत्। तं॑ स॒र्वं दा॑यात्॥ १०॥

य॒ज्ञस्यान॑तिरेकाय। व॒र्षवृ॑द्धम॒सीत्या॑ह। व॒र्षवृ॑द्धा वा ओष॑धयः। दे॒वब॑र्हि॒रित्या॑ह। दे॒वेभ्य॑ ए॒वैन॑त्करोति। मा त्वा॒ऽन्व॒ङ्गा ति॒र्यगि॑त्या॒हाहि॑ंसा॒यै। प॑र्व ते रा॒ध्यास॑मित्या॒हर्ध्वै॑। आ॒च्छे॒त्ता ते॒ मा रि॑ष॒मित्या॑ह। नास्या॒ऽऽत्म॑नो मीयते। य ए॒वं वेद॑॥ ११॥

दे॒वब॑र्हिः श॒तव॑ल्शं वि॒रोहे॑त्या॑ह। प्र॒जा वै ब॒र्हिः। प्र॒जानां॑ प्र॒जन॑नाय। स॒हस्र॑वल्शा वि व॒यं रु॑हे॒मेत्या॑ह। आ॒मे॒वैता॑मा शा॒स्ते। पृ॒थि॒व्याः स॒म्पृचः॑

पा॒हीत्या॑ह॒ प्रति॑ष्ठित्यै। अयु॑ङ्गायुङ्गान्मु॒ष्टीं लु॑नोति। मि॒थुन॑त्वाय॒ प्रजा॑त्यै। सु॒स॒म्भृता॑  
त्वा॒ सम्भ॑रा॒मीत्या॑ह। ब्रह्म॑णै॒वैन॒थ्सम्भ॑रति॥१२॥

अदि॑त्यै रा॒स्नाऽसी॑त्या॒ह। इ॒यं वा अदि॑तिः। अ॒स्या ए॒वैन॒द्रास्ना॑ करोति।  
इन्द्रा॑ण्यै स॒न्नह॑न॒मित्या॑ह। इन्द्रा॑णी वा अ॒ग्रे दे॒वता॑ना॒ऽसम॑न॒ह्यत। साऽऽघ्नो॑त्।  
ऋ॒द्ध्यै सन्न॑ह्यति। प्र॒जा वै ब॒र्हिः। प्र॒जाना॑मप॒रावा॑पाय। तस्मा॒थ्सत्ता॑व॒सन्तताः॑ प्र॒जा  
जा॑यन्ते॥१३॥

पू॒षा ते॑ ग्र॒न्थिं ग्र॑न्था॒त्वित्या॑ह। पु॒ष्टिमे॒व यज॑माने दधाति। स ते  
मा॒स्थादि॒त्याहा॑हि॒सायै॑। प॒श्चात्प्रा॑श्चमुप॑गूहति। प॒श्चाद्वै प्रा॒चीन॑ऽरेतो॑ धीयते।  
प॒श्चादे॒वास्मै॑ प्रा॒चीन॑ऽरेतो॑ दधाति। इन्द्र॑स्य त्वा बा॒हुभ्या॑मुद्य॑च्छु॒ इत्या॑ह।  
इन्द्रि॒यमे॒व यज॑माने दधाति। बृह॑स्पते॑र्मूर्ध्ना ह॑रा॒मीत्या॑ह। ब्रह्म॑ वै दे॒वाना॑  
बृह॑स्पतिः॥१४॥

ब्रह्म॑णै॒वैन॑द्धरति। उ॒र्वन्तरि॑क्ष॒मन्वि॒हीत्या॑ह गत्यै॑। दे॒व॒ङ्ग॒मम॑सीत्या॑ह।

देवानेवैनंद्मयति। अनन्धः सादयति। गर्भाणां धृत्या अप्रपादाय। तस्माद्गर्भाः  
प्रजानामप्रपादुकाः। उपरीव नि दधाति। उपरीव हि सुवर्गो लोकः। सुवर्गस्य  
लोकस्य समष्ट्यै॥१५॥ सुयोनिर्त्वायं स्वधाकृताऽसीत्याह दायद्वेदं भरति जायन्ते बृहस्पतिः समष्ट्यै॥ [२]

पूर्वेद्युरिध्माबर्हिः करोति। यज्ञमेवारभ्यं गृहीत्वोपवसति। प्रजापतिर्यज्ञम-  
सृजत। तस्योखे अस्त्रं सेताम्। यज्ञो वै प्रजापतिः। यथसाँन्नाय्योखे भवतः।  
यज्ञस्यैव तदुखे उपदधात्यप्रस्त्रं साय। शुन्धध्वं दैव्याय कर्मणे देवयज्याया  
इत्याह। देवयज्याया एवैनानि शुन्धति। मातरिश्वनो घर्मोऽसीत्याह॥१६॥

अन्तरिक्षं वै मातरिश्वनो घर्मः। एषां लोकानां विधृत्यै। द्यौरसि पृथिव्यसीत्याह।  
दिवश्च ह्येषा पृथिव्याश्च सम्भृता। यदुखा। तस्मादेवमाह। विश्वधाया असि  
परमेण धाम्नेत्याह। वृष्टिर्वै विश्वधायाः। वृष्टिमेवाव रुन्धे। दृहंस्व मा ह्वारित्याह  
धृत्यै॥१७॥

वसूनां पवित्रमसीत्याह। प्राणा वै वसवः। तेषां वा एतद्भागधेयम्। यत्पवित्रम्।

तेभ्य एवैनत्करोति। शतधारं सहस्रधारमित्याह। प्राणेष्वेवायुर्दधाति सर्वत्वाय।  
त्रिवृत्पलाशशाखायां दर्भमयं भवति। त्रिवृद्वै प्राणः। त्रिवृतमेव प्राणं मध्यतो  
यजमाने दधाति॥१८॥

सौम्यः पूर्णः संयोनित्वाय। साक्षात्पवित्रं दर्भाः। प्राक्सायमधिनि दधाति।  
तत्प्राणापानयो रूपम्। तिर्यक्प्रातः। तद्दर्शस्य रूपम्। दार्श्यं ह्येतदहः। अन्नं वै  
चन्द्रमाः। अन्नं प्राणाः। उभयमेवोपैत्यजामित्वाय॥१९॥

तस्मादयं सर्वतः पवते। हुतः स्तोको हुतो द्रप्स इत्याह प्रतिष्ठित्यै। हविषो-  
ऽस्कन्दाय। न हि हुतं स्वाहाकृतं स्कन्दति। दिवि नाको नामाग्निः। तस्य  
विप्रुषो भागधेयम्। अग्नये बृहते नाकायेत्याह। नाकमेवाग्निं भागधेयेन समर्धयति।  
स्वाहा द्यावापृथिवीभ्यामित्याह। द्यावापृथिव्योरेवैनत्प्रतिष्ठापयति॥२०॥

पवित्रवत्यानयति। अपां चैवौषधीनां च रसं संसृजति। अथो ओषधीष्वेव  
पशून्प्रतिष्ठापयति। अन्वारभ्य वाचं यच्छति। यज्ञस्य धृत्यै। धारयन्नास्ते। धारयन्त



इव हि दुहन्ति। कामधुक्ष इत्याहातृतीयस्यै। त्रयं इमे लोकाः। इमानेव लोकान् यजमानो दुहे॥२१॥

अमूमिति नाम गृह्णाति। भद्रमेवासां कर्मा विष्करोति। सा विश्वायुः सा विश्वव्यचाः सा विश्वकर्मेत्याह। इयं वै विश्वायुः। अन्तरिक्षं विश्वव्यचाः। असौ विश्वकर्मा। इमानेवैतामिलोकान् यथापूर्वं दुहे। अथो यथा प्रदात्रे पुण्यमाशास्ते। एवमेवैना एतदुपस्तौति। तस्मात्प्रादादित्युन्नीय वन्दमाना उपस्तुवन्तः पशून्दुहन्ति॥२२॥

बहु दुग्धीन्द्राय देवेभ्यो हविरिति वाचं विसृजते। यथादेवतमेव प्रसौति। दैव्यस्य च मानुषस्य च व्यावृत्तै। त्रिराह। त्रिषत्या हि देवाः। अवाचं यमोऽनन्वारभ्योत्तराः। अपरिमितमेवाव रुन्धे। न दारुपात्रेण दुह्यात्। अग्निवद्वै दारुपात्रम्। यद्दारुपात्रेण दुह्यात्॥२३॥

यातयाँम्रा हविषा यजेत। अथो खल्वाहुः। पुरोडाशमुखानि वै हवीँषि। नेत इतः पुरोडाशँ हविषो यामोऽस्तीति। काममेव दारुपात्रेण दुह्यात्। शूद्र एव

न दुह्यात्। असंतो वा एष सम्भूतः। यच्छूद्रः। अहविरेव तदित्याहुः। यच्छूद्रो दोग्धीति॥२४॥

अग्निहोत्रमेव न दुह्याच्छूद्रः। तद्धि नोत्पुनन्ति। यदा खलु वै पवित्रमत्येति। अथ तद्धविरिति। सम्पृच्यध्वमृतावरीरित्याह। अपां चैवौषधीनां च रसः सः सृजति। तस्मादपां चौषधीनां च रसमुपजीवामः। मन्द्रा धनस्य सातय इत्याह। पुष्टिमेव यजमाने दधाति। सोमेन त्वातन्चमीन्द्राय दधीत्याह॥२५॥

सोममेवैनत्करोति। यो वै सोमं भक्षयित्वा। संवत्सरः सोमं न पिबति। पुनर्भक्ष्योऽस्य सोमपीथो भवति। सोमः खलु वै साँन्नाय्यम्। य एवं विद्वान्साँन्नाय्यं पिबति। अपुनर्भक्ष्योऽस्य सोमपीथो भवति। न मृन्मयेनापि दध्यात्। यन्मृन्मयेनापिदध्यात्। पितृदेवत्यः स्यात्॥२६॥

अयस्पात्रेण वा दारुपात्रेण वाऽपि दधाति। तद्धि सदेवम्। उदन्वद्भवति। आपो वै रक्षोघ्नीः। रक्षसामपहत्यै। अदस्तमसि विष्णावे त्वेत्याह। यज्ञो वै विष्णुः। यज्ञायैवैनददस्तं करोति। विष्णो हव्यः रक्षस्वेत्याह गुप्त्यै। अनधः सादयति।

गर्भाणां धृत्या अप्रपादाय। तस्माद्गर्भाः प्रजानामप्रपादुकाः। उपरीव निदधाति।  
उपरीव हि सुवर्गो लोकः। सुवर्गस्य लोकस्य समष्ट्यै॥ २७॥ असीत्याहु धृत्यै यजमाने दधात्यजामित्वाय  
स्थापयति दहे दुहन्ति दुह्यादोग्धीति दधीत्याह स्यात्सादयति पञ्च च॥ [३]

कर्मणे वां देवेभ्यः शकेयमित्याहु शक्त्यै। यज्ञस्य वै सन्ततिमनु प्रजाः  
पशवो यजमानस्य सन्तायन्ते। यज्ञस्य विच्छित्तिमनु प्रजाः पशवो यजमानस्य  
विच्छिद्यन्ते। यज्ञस्य सन्ततिरसि यज्ञस्य त्वा सन्तत्यै स्तृणामि सन्तत्यै त्वा  
यज्ञस्येत्याहुवनीयात्सन्तनोति। यजमानस्य प्रजायै पशूनां सन्तत्यै। अपः  
प्रणयति। श्रद्धा वा आपः। श्रद्धामेवारभ्य प्रणीय प्रचरति। अपः प्रणयति। यज्ञो  
वा आपः॥ २८॥

यज्ञमेवारभ्य प्रणीय प्रचरति। अपः प्रणयति। वज्रो वा आपः। वज्रमेव  
भ्रातृव्येभ्यः प्रहृत्य प्रणीय प्रचरति। अपः प्रणयति। आपो वै रक्षोग्रीः।  
रक्षंसामपहत्यै। अपः प्रणयति। आपो वै देवानां प्रियं धाम। देवानामेव प्रियं  
धाम प्रणीय प्रचरति॥ २९॥

अपः प्रणयति। आपो वै सर्वा देवताः। देवता एवारभ्यं प्रणीय प्रचरति।  
 वेषाय त्वेत्याह। वेषाय ह्येनदादत्ते। प्रत्युष्टं रक्षः प्रत्युष्टा अरांतय इत्याह।  
 रक्षंसामपहत्यै। धूरसीत्याह। एष वै धुर्योऽग्निः। तं यदनुपस्पृश्यातीयात्॥३०॥

अध्वर्युं च यजमानं च प्रदहेत्। उपस्पृश्यात्येति। अध्वर्योश्च यजमानस्य  
 चाप्रदाहाय। धूर्व तं योऽस्मान्धूर्वति तं धूर्व यं वयं धूर्वाम् इत्याह। द्वौ वाव  
 पुरुषौ। यं चैव धूर्वति। यश्चैनं धूर्वति। तावुभौ शुचाऽर्पयति। त्वं देवानामसि  
 सस्त्रितं पप्रितं जुष्टं वह्निं देवहूतं मित्याह। यथायजुरेवैतत्॥३१॥

अहुतमसि हविर्धानमित्याहानात्यै। दृहंस्व मा ह्वारित्याह धृत्यै।  
 मित्रस्य त्वा चक्षुषा प्रेक्ष इत्याह मित्रत्वाय। मा भेर्मा संविक्था मा त्वा  
 हिंसिषमित्याहाहिंसायै। यद्वै किं च वातो नाभि वाति। तत्सर्वं वरुणदेवत्यम्।  
 उरु वातायेत्याह। अवारुणमेवैनत्करोति। देवस्य त्वा सवितुः प्रसव इत्याह  
 प्रसूत्यै। अश्विनोर्बाहुभ्यामित्याह॥३२॥

अ॒श्विनौ हि दे॒वाना॑मध्व॒र्यू आस्ता॑म्। पू॒ष्णो हस्ता॑भ्या॒मित्या॑ह॒ यत्यै॑। अ॒ग्नये॑  
जुष्टं॑ निर्व॒पामीत्या॑ह। अ॒ग्नयं ए॒वैनां॑ जुष्टं॑ निर्व॒पति। त्रि॒र्यजु॑षा। त्रयं॑ इ॒मे लो॒काः।  
ए॒षां लो॒काना॑मात्यै॑। तू॒ष्णीं च॑तुर्थम्। अ॒प॒रि॒मितमे॒वाव॑ रु॒न्धे। स ए॒वमे॒वानु॑पूर्व॑  
हवी॑षि॒ निर्व॒पति॥ ३३॥

इ॒दं दे॒वाना॑मि॒दमु॑ नः सु॒हेत्या॑ह॒ व्यावृ॑त्यै। स्फा॒त्यै त्वा॒ नारा॑त्या  
इत्या॑ह॒ गुत्यै॑। तम॑सीव॒ वा ए॒षोऽन्तश्च॑रति। यः प॑री॒णहि॑। सुव॑र॒भि वि  
ख्ये॑षं वैश्वान॒रं ज्योति॑रित्या॑ह। सुव॑रे॒वाभि वि प॑श्यति वैश्वान॒रं ज्योतिः॑।  
द्यावा॑पृथि॒वी ह॒विषि॑ गृही॒त उद॑वेपेताम्। दृ॒ह॑न्ता॒न्दुर्या द्यावा॑पृथि॒व्योरित्या॑ह।  
गृ॒हाणां॑ द्यावा॑पृथि॒व्योर्धृत्यै॑। उ॒र्वन्त॑रि॒क्षम॑न्विहीत्या॑ह॒ गत्यै॑। अदि॑त्यास्त्वो॒पस्थे॑  
सादया॑मीत्या॑ह। इ॒यं वा अदि॑तिः। अ॒स्या ए॒वैन॑दुपस्थे॑ सादयति। अ॒ग्ने ह॒व्य॑  
र॒क्ष॒स्वेत्या॑ह॒ गुत्यै॑॥ ३४॥ य॒ज्ञो वा आपो॑ धामं॒ प्रणी॑य॒ प्रच॑रत्यती॒यादे॒तद्वाहु॑भ्या॒मित्या॑ह॒ हवी॑षि॒ निर्व॒पति॒ गत्यै॑ च॒त्वारि॑ च॥—[४]

इन्द्रो॑ वृ॒त्रम॑हन्। सोऽपः॑। अ॒भ्य॑म्रियत। तासां॑ यन्मे॒ध्यं य॒ज्ञिय॑ स॒दे॒वमासी॑त्।

तदपोदक्रामत्। ते दुर्भा अभवन्। यद्दुर्भैरुप उत्पुनाति। या एव मेध्या यज्ञियाः  
सदेवा आपः। तामिरेवैना उत्पुनाति। द्वाभ्यामुत्पुनाति॥३५॥

द्विपाद्यजमानः प्रतिष्ठित्यै। देवो वः सवितोत्पुनात्वित्याह। सवितृप्रसूत एवैना  
उत्पुनाति। अच्छिद्रेण पवित्रेणेत्याह। असौ वा आदित्योऽच्छिद्रं पवित्रम्। तेनैवैना  
उत्पुनाति। वसोः सूर्यस्य रश्मिभिरित्याह। प्राणा वा आपः। प्राणा वसवः। प्राणा  
रश्मयः॥३६॥

प्राणैरेव प्राणान्त्सं पृणक्ति। सावित्रियर्चा। सवितृप्रसूतं मे कर्मासदिति।  
सवितृप्रसूतमेवास्य कर्म भवति। पच्छो गायत्रिया त्रिष्वमृद्धत्वाय। आपो  
देवीरग्रेपुवो अग्रेगुव इत्याह। रूपमेवासांमेतन्महिमानं व्याचष्टे। अग्रं इमं यज्ञं  
नयताग्रे यज्ञपतिमित्याह। अग्रं एव यज्ञं नयन्ति। अग्रे यज्ञपतिम्॥३७॥

युष्मानिन्द्रोऽवृणीत वृत्रतूर्यं यूयमिन्द्रमवृणीध्वं वृत्रतूर्य इत्याह। वृत्रं  
हं हनिष्यन्निन्द्र आपो वव्रे। आपो हेन्द्रं वव्रिरे। संज्ञामेवासांमेतत्सामानं

व्याचष्टे। प्रोक्षिताः स्थेत्याह। तेनाऽऽपुः प्रोक्षिताः। अग्नये वो जुष्टं  
 प्रोक्षाम्यग्नीषोमभ्यामित्याह। यथादेवतमेवैनान्प्रोक्षति। त्रिः प्रोक्षति। त्र्यावृद्धि  
 यज्ञः॥ ३८॥

अथो रक्षसामपंहत्यै। शुन्धध्वं दैव्याय कर्मणे देवयज्याया इत्याह। देवयज्याया  
 एवैनानि शुन्धति। त्रिः प्रोक्षति। त्र्यावृद्धि यज्ञः। अथो मेध्यत्वाय। अवधूतः  
 रक्षोऽवधूता अरातय इत्याह। रक्षसामपंहत्यै। अदित्यास्त्वगसीत्याह। इयं वा  
 अदितिः॥ ३९॥

अस्या एवैनत्त्वचं करोति। प्रति त्वा पृथिवी वेत्त्वित्याह प्रतिष्ठित्यै।  
 पुरस्तात्प्रतीचीनं ग्रीवमुत्तरलोमोपस्तृणाति मेध्यत्वाय। तस्मात्पुरस्तात्प्रत्यश्चः  
 पशवो मेधमुपतिष्ठन्ते। तस्मात्प्रजा मृगं ग्राहकाः। यज्ञो देवेभ्यो निलायत।  
 कृष्णो रूपं कृत्वा। यत्कृष्णाजिने हविरंध्यवहन्ति। यज्ञादेव तद्यज्ञं प्रयुङ्क्ते।  
 हविषोऽस्कन्दाय॥ ४०॥

अधिषवणमसि वानस्पत्यमित्याह। अधिषवणमेवैनत्करोति। प्रति त्वा-

ऽदित्यास्त्वग्वेत्त्वित्याह सयत्वाय। अग्नेस्तनूरसीत्याह। अग्नेर्वा एषा तनूः।  
यदोषधयः। वाचो विसर्जनमित्याह। यदा हि प्रजा ओषधीनामश्नन्ति। अथ  
वाचं विसृजन्ते। देववीतये त्वा गृह्णामीत्याह॥४१॥

देवताभिरेवैन्यसमर्धयति। अद्रिरसि वानस्पत्य इत्याह। ग्रावाणमेवैनत्करोति।  
स इदं देवेभ्यो हव्यं सुशमिं शमिष्वेत्याह शान्त्यै। हविष्कृदेहीत्याह।  
य एव देवानां हविष्कृतः। तान् ह्वयति। त्रिह्वयति। त्रिषत्या हि देवाः।  
इषमावदोर्जमावदेत्याह॥४२॥

इषमेवोर्जं यजमाने दधाति। द्युमद्वदत वयं सङ्घातं जेष्मेत्याह  
भ्रातृव्याभिभूत्यै। मनोः श्रद्धादेवस्य यजमानस्यासुरघ्नी वाक्। यज्ञायुधेषु  
प्रविष्टाऽऽसीत्। तेऽसुरा यावन्तो यज्ञायुधानामुद्वदतामुपाशृण्वन्। ते पराभवन्।  
तस्मात्स्वानां मध्येऽवसायं यजेत। यावन्तोऽस्य भ्रातृव्या यज्ञायुधानामुद्वदतामुप-  
शृण्वन्ति। ते परा भवन्ति। उच्चैः समाहन्त वा आह विजित्यै॥४३॥



वृद्धः एषामिन्द्रियं वीर्यम्। श्रेष्ठं एषां भवति। वरुषवृद्धमसि प्रति त्वा वरुषवृद्धं वेत्त्वित्याह। वरुषवृद्धा वा ओषधयः। वरुषवृद्धा इषीकाः समृद्धौ। यज्ञः रक्षाः स्यन्तु प्राविशन्। तान्यस्मा पशुभ्यो निरवादयन्त। तुषैरोषधीभ्यः। परापूतः रक्षः परापूता अरातय इत्याह। रक्षसामपंहत्यै॥४४॥

रक्षसां भागोऽसीत्याह। तुषैरेव रक्षाः सि निरवादयते। अप उपस्पृशति मेध्यत्वाय। वायुर्वो विविनक्तित्याह। पवित्रं वै वायुः। पुनात्येवैनान्। अन्तरिक्षादिव वा एते प्रस्कन्दन्ति। ये शूर्पात्। देवो वः सविता हिरण्यपाणिः प्रतिगृह्णात्वित्याह। प्रतिष्ठित्यै। हविषोऽस्कन्दाय। त्रिष्फलीकर्तवा आह। त्र्यावृद्धि यज्ञः। अथो मेध्यत्वाय॥४५॥

द्वभ्यामुत्पुनाति रश्मयो नयन्त्यग्रे यज्ञपति यज्ञोऽदितिरस्कन्दाय गृह्णामीत्याह वदेत्याहु विजित्या अपंहत्या अस्कन्दाय त्रीणि च॥

[५]

अवधूतः रक्षोऽवधूता अरातय इत्याह। रक्षसामपंहत्यै। अदित्यास्त्वगसीत्याह। इयं वा अदितिः। अस्या एवैतत्त्वचं करोति। प्रति त्वा पृथिवी वेत्त्वित्याह। प्रतिष्ठित्यै। पुरस्तात्प्रतीचीनंग्रीवमुत्तरलोमोपस्तृणाति मेध्यत्वाय। तस्मात्पुरस्तात्प्रत्यश्वः

प॒शवो॑ मे॒धमु॑पतिष्ठन्ते। तस्मा॑त्प्र॒जा मृ॑गं ग्राह॑काः। य॒ज्ञो दे॒वेभ्यो॑ नि॒लाय॑त॥४६॥

कृ॒ष्णो रू॒पं कृ॒त्वा। यत्कृ॑ष्णाजि॒ने ह॒विर॑धि॒पि॒नष्टि॑। य॒ज्ञादे॒व तद्य॒ज्ञं प्र॑युङ्के।  
ह॒विषो॑ऽस्क॒न्दाय॑। द्यावा॑पृथि॒वी स॒हास्ता॑म्। ते श॑म्यामा॒त्रमे॒कम॒हर्व्यै॑ताः।  
श॑म्यामा॒त्रमे॒कम॒हः। दि॒वः स्क॑म्भ॒निर॑सि॒ प्रति॒ त्वाऽदि॑त्या॒स्त्वग्वे॒त्त्वित्या॑ह।  
द्यावा॑पृथि॒व्योर्वी॒त्यै। धि॒षणा॑ऽसि पर्व॒त्या प्रति॑ त्वा दि॒वः स्क॑म्भ॒निर्वे॒त्त्वित्या॑ह।  
द्यावा॑पृथि॒व्योर्वि॒धृत्यै॑॥४७॥

धि॒षणा॑ऽसि पा॒र्वते॒यी प्रति॑ त्वा पर्व॒तिर्वे॒त्त्वित्या॑ह। द्यावा॑पृथि॒व्योर्वि॒धृत्यै॑। दे॒वस्य॑  
त्वा स॒वितुः॑ प्र॒सव॑ इत्या॒ह प्र॒सूत्यै॑। अ॒श्विनो॑र्बा॒हुभ्या॑मित्या॒ह। अ॒श्विनो॑ हि  
दे॒वाना॑म॒ध्वर्यू॑ आस्ता॑म्। पू॒ष्णो ह॒स्ता॑भ्या॒मित्या॑ह॒ यत्त्यै॑। अधि॑वपा॒मीत्या॑ह।  
य॒थादे॒वत॑मे॒वैना॒नधि॑ वपति। धा॒न्यम॑सि धि॒नुहि॑ दे॒वानि॒त्याह॑। ए॒तस्य॑ य॒जुषो॑  
वी॒र्ये॑ण॥४८॥

याव॑दे॒का दे॒वता॑ का॒मय॑न्ते याव॑दे॒का। ताव॑दाहु॒तिः प्र॑थते। न हि तदस्ति॑।

यत्तावदेव स्यात्। यावञ्जुहोति। प्राणाय त्वाऽपानाय त्वेत्याह। प्राणानेव यजमाने दधाति। दीर्घामनु प्रसितिमायुषे धामित्याह। आयुरेवास्मिन्दधाति। अन्तरिक्षादिव वा एतानि प्रस्कन्दन्ति। यानि दृषदः। देवो वः सविता हिरण्यपाणिः प्रतिगृह्णात्वित्याह प्रतिष्ठित्यै। हविषोऽस्कन्दाय। असंवपन्ती पि० षाणूनि कुरुतादित्याह मेध्यत्वाय॥४९॥ निलायत् विधृत्यै वीर्येण स्कन्दन्ति चत्वारि च॥ [६]

धृष्टिरसि ब्रह्म यच्छेत्याह धृत्यै। अपाग्नेऽग्निमामादं जहि निष्क्रव्यादः सेधा देवयजं वहेत्याह। य एवामात्क्रव्यात्। तमपहत्य। मेध्येऽग्नौ कपालमुपदधाति। निर्दग्धः रक्षो निर्दग्धा अरातय इत्याह। रक्षाऽस्येव निर्दहति। अग्निवत्युपदधाति। अस्मिन्नेव लोके ज्योतिर्धत्ते। अङ्गारमधि वर्तयति॥५०॥

अन्तरिक्ष एव ज्योतिर्धत्ते। आदित्यमेवामुष्मिल्लोके ज्योतिर्धत्ते। ज्योतिष्मन्तोऽस्मा इमे लोका भवन्ति। य एवं वेद। ध्रुवमसि पृथिवीं दृ० हेत्याह। पृथिवीमेवैतेन दृ० हति। ध्रुवमस्यन्तरिक्षं दृ० हेत्याह। अन्तरिक्षमेवैतेन दृ० हति। धरुणमसि दिवं

दृ॒ष्ट॒हेत्या॑ह। दि॒वंमे॒वैतेन॑ दृ॒ष्ट॒हति॑॥५१॥

धर्मा॑सि दि॒शो दृ॒ष्ट॒हेत्या॑ह। दि॒शं ए॒वैतेन॑ दृ॒ष्ट॒हति॑। इ॒माने॒वैतैर्लो॒कान्दृ॑ष्ट॒हति॑।  
दृ॒ष्ट॒हन्तेऽस्मा॑ इ॒मे लो॒काः प्र॒जया॑ प॒शुभिः॑। य ए॒वं वेद॑। त्री॒ण्यग्रे॑  
क॒पाला॒न्युप॑दधाति। त्रय॑ इ॒मे लो॒काः। ए॒षां लो॒काना॒माप्त्यै॑। ए॒कम॒ग्रे क॒पाल॒मुप॑  
दधाति। ए॒कं वा अ॒ग्रे क॒पालं॑ पु॒रुष॑स्य स॒म्भवं॑ति॥५२॥

अथ॒ द्वे। अथ॒ त्रीणि॑। अथ॒ चत्वारि॑। अथा॒ष्टौ। तस्मा॑दृ॒ष्टाक॑पालं पु॒रुष॑स्य शि॒रः।  
यदे॒वं क॒पाला॒न्युप॑दधाति। य॒ज्ञो वै प्र॒जाप॑तिः। य॒ज्ञमे॒व प्र॒जाप॑ति॒ः स॒ऽस्क॑रोति।  
आ॒त्मान॑मे॒व तथ्स॑ऽस्क॒रोति॑। त॒ः स॒ऽस्कृ॑तमा॒त्मान॑म्॥५३॥

अ॒मुष्मि॑ल्लो॒केऽनु॑ प॒रैति॑। यदृ॒ष्टावु॑प॒दधा॑ति। गा॒य॒त्रि॒या तथ्स॑मि॒तम्। यन्न॑वं।  
त्रि॒वृता॒ तत्। यदृ॒शं। वि॒राजा॒ तत्। यदे॒काद॑श। त्रि॒ष्टुभा॒ तत्। यद्वा॑द॒श॥५४॥

जग॑त्या॒ तत्। छ॒न्दः स॑मि॒तानि॒ स उ॑प॒दध॑त्क॒पाला॑नि। इ॒माँल्लो॒कान॑नुपूर्व॒ं दि॒शो  
विधृ॑त्यै दृ॒ष्ट॒हति॑। अथाऽऽयुः॑ प्रा॒णान्प्र॒जां प॒शून् यज॑माने दधाति। स॒जा॒तान॑स्मा

अ॒भितो॑ बहु॒लान्क॑रोति। चि॒तुः स्थे॒त्याह॑। य॒था॒य॒जु॒रे॒वैत॑त्। भृ॒गूणा॒मङ्गि॑रसां॒ तप॑सा  
तप्य॒ध्वमि॒त्याह॑। दे॒वता॑नामे॒वैना॑नि॒ तप॑सा॒ तप॑ति। तानि॒ ततः॑ स॒ंस्थि॑ते। यानि॑  
घ॒र्मे क॑पा॒ला॒न्युप॑चि॒न्वन्ति॑ वे॒धस॒ इति॑ चतु॑ष्पद॒यर्चा॑ वि मु॑ञ्चति। चतु॑ष्पादः प॒शवः॑।  
प॒शुष्वे॒वोपरि॑ष्ठात्प्रति॑ तिष्ठति॥ ५५॥

वर्तयति दिवंमेवैतेन दृ० हति सम्भवति त० स०स्कृतमात्मानं द्वादश स०स्थिते त्रीणि

च॥

[७]

दे॒वस्य॑ त्वा सवि॒तुः प्र॑स॒व इत्या॑ह॒ प्रसू॑त्यै। अ॒श्विनो॑र्बा॒हुभ्या॑मि॒त्याह॑। अ॒श्विनौ  
हि दे॒वाना॑मध्व॒र्यू आस्ता॑म्। पू॒ष्णो हस्ता॑भ्या॒मित्या॑ह॒ यत्यै॑। सं व॑पा॒मीत्या॑ह॒।  
य॒था॒दे॒वत॑मे॒वैना॑नि॒ संव॑पति। समा॑पो अ॒द्विर॑ग्मत॒ समो॑ष॒धयो॑ रसे॒नेत्या॑ह॒।  
आपो॑ वा ओष॑धीर्जि॒न्वन्ति॑। ओष॑धयोऽपो जि॒न्वन्ति॑। अ॒न्या वा ए॒तासा॑म॒न्या  
जि॒न्वन्ति॑॥ ५६॥

तस्मा॑दे॒वमा॑ह॒। स० रे॒वती॒र्जग॑तीभि॒र्मधु॑मती॒र्मधु॑मतीभिः सृ॒ज्यध्व॑मि॒त्याह॑। आपो॑  
वै रे॒वतीः॑। प॒शवो॑ जग॑तीः। ओष॑धयो॒ मधु॑मतीः। आप॒ ओष॑धीः प॒शून्। ताने॒वास्मा॑  
एक॑धा स॒ं सृ॒ज्य। मधु॑मतः करोति। अ॒द्भ्यः परि॑ प्रजा॑ताः स्थ॒ सम॑द्भिः पृ॒च्यध्व॑मिति॑

पर्याप्लावयति। यथा सुवृष्ट इमामनुविसृत्य॥५७॥

आप ओषधीर्महयन्ति। तादृगेव तत्। जनयत्यै त्वा संयौमीत्याह। प्रजा एवैतेन दाधार। अग्नये त्वाऽग्नीषोमभ्यामित्याह व्यावृत्यै। मुखस्य शिरोऽसीत्याह। यज्ञो वै मुखः। तस्यैतच्छिरः। यत्पुरोडाशः। तस्मादेवमाह॥५८॥

घर्मोऽसि विश्वायुरित्याह। विश्वमेवायुर्यजमाने दधाति। उरु प्रथस्वोरु ते यज्ञपतिः प्रथतामित्याह। यजमानमेव प्रजया पशुभिः प्रथयति। त्वचं गृह्णीष्वेत्याह। सर्वमेवैनं सतनुं करोति। अथाऽऽप आनीय परिमार्ष्टि। मांस एव तत्त्वचं दधाति। तस्मात्त्वचा मांसं छुन्नम्। घर्मो वा एषोऽशान्तः॥५९॥

अर्धमासेऽर्धमासे प्रवृज्यते। यत्पुरोडाशः। स ईश्वरो यजमानं शुचा प्रदहः। पर्यग्नि करोति। पशुमेवैनमकः। शान्त्या अप्रदाहाय। त्रिः पर्यग्नि करोति। त्र्यावृद्धि यज्ञः। अथो रक्षसामपहत्यै। अन्तरितं रक्षोऽन्तरिता अरातय इत्याह॥६०॥

रक्षसामन्तर्हित्यै। पुरोडाशं वा अधिश्रितं रक्षांस्यजिघांसन्। दिवि नाको

नामा॒ग्नी र॑क्षो॒हा। स ए॒वास्मा॒द्रक्षा॑ऽस्यपा॑हन्। दे॒वस्त्वा॑ सवि॒ता श्र॑पय॒त्वित्या॑ह।  
 स॒वि॒तृप्र॑सूत ए॒वैन॑ऽ श्रपयति। वर्षि॑ष्ठे अधि॒ नाक् इत्या॑ह। रक्ष॑सामप॑हत्यै।  
 अ॒ग्निस्ते॑ त॒नुवं॑ माऽति॑धा॒गित्या॒हाऽन॑तिदाहाय। अग्ने॑ ह॒व्यः र॑क्ष॒स्वेत्या॑ह  
 गु॒प्त्यै॥६१॥

अवि॑दहन्तः श्रपय॒तेति॒ वाचं॑ वि॒सृज॑ते। य॒ज्ञमे॒व ह॒वीऽप्य॑भि॒व्याहृत्य॑ प्रत॑नुते।  
 पु॒रोरु॒चम॑वि॒दाहाय॑ श्र॒त्यै करो॑ति। म॒स्तिष्को॒ वै पु॑रो॒डाशः॑। तं यन्नाभि॑  
 वा॒सये॑त्। आ॒विर्म॑स्तिष्कः॑ स्यात्। अ॒भिवा॑सयति। तस्मा॒द्गुहा॑ म॒स्तिष्कः॑।  
 भ॒स्मना॑ऽभिवा॑सयति। तस्मा॑न्मा॒सेना॑स्थि॑ छुन्नम्॥६२॥

वेदे॒नाभि॑वा॑सयति। तस्मा॒त्केशैः॑ शि॒रश्छु॑न्नम्। अ॒खल॑तिभावु॒को भव॑ति। य ए॒वं  
 वेद॑। प॒शोर्वै प्र॑ति॒मा पु॑रो॒डाशः॑। स नाय॑जुष्क॑म॒भिवा॑स्यः। वृथै॒व स्यात्। ई॒श्वरा॑  
 यज॑मानस्य प॒शवः॑ प्रमे॑तोः। सं ब्रह्म॑णा पृ॒च्यस्वेत्या॑ह। प्रा॒णा वै ब्रह्म॑॥६३॥

प्रा॒णाः प॒शवः॑। प्रा॒णैरे॒व प॒शून्सम्पृ॑णक्ति। न प्र॒मायु॑का भवन्ति। यज॑मानो  
 वै पु॒रो॒डाशः॑। प्र॒जा प॒शवः॑ पु॒रीष॑म्। यदे॒वम॑भिवा॑सयति। यज॑मानमे॒व प्र॒जया॑

प॒शुभिः॑ स॒म॑र्धयति। दे॒वा वै ह॒विर्भृ॑त्वाऽब्रुवन्। कस्मि॑न्नि॒दं म्र॑क्ष्यामह॒ इति॑।  
सोऽ॒ग्निर॑ब्रवीत्॥६४॥

मयि॑ त॒नूः सं निध॑ध्वम्। अ॒हं व॒स्तं ज॑नयिष्यामि। यस्मि॑न्म॒क्ष्यध्व॒ इति॑। ते दे॒वा  
अ॒ग्नौ त॒नूः स॒न्त्य॑दधत। तस्मा॑दाहुः। अ॒ग्निः सर्वा॑ दे॒वता॒ इति॑। सोऽ॒ङ्गारे॑णाऽऽपः।  
अ॒भ्य॑पातयत्। तत॑ ए॒कतो॑ऽजायत। स द्वितीय॑म॒भ्य॑पातयत्॥६५॥

ततो॑ द्वि॒तोऽजा॑यत। स तृ॒तीय॑म॒भ्य॑पातयत्। तत॑स्त्रि॒तोऽजा॑यत। यद॒द्ध्यो-  
ऽजा॑यन्त। तदा॒प्याना॑माप्य॒त्वम्। यदा॒त्म॒भ्योऽजा॑यन्त। तदा॒त्म्याना॑मात्म्य॒त्वम्।  
ते दे॒वा आ॒प्येष्व॑मृजत। आ॒प्या अ॑मृजत॒ सूर्या॑भ्युदिते। सूर्या॑भ्युदितः  
सूर्या॑भिनिमृक्ते॥६६॥

सूर्या॑भिनिमृक्तः कु॒न॒खिनि॑। कु॒न॒खी श्या॒वद॑ति। श्या॒वद॑न्न॒ग्रदि॑धिषौ। अ॒ग्रदि॑धिषुः  
प॑रिवित्ते। प॑रिवित्तो वी॒र॒हणि॑। वी॒र॒हा ब्र॑ह्म॒हणि॑। तद्व॑ह्म॒हणं॑ नात्य॑च्यवत। अ॒न्तर्वे॑दि  
निन॑यत्यवरु॒द्धौ। उ॒ल्मु॑केना॒भि गृ॑ह्णाति श्रु॒तत्वा॑य। श्रु॒तका॑मा इव॒ हि दे॒वाः॥६७॥ अन्या



जिन्वन्त्यनु विसृत्यैवमाहाशान्त आहु गुत्यै छत्रं ब्रह्माब्रवीद्वितीयमभ्यंपातयध्वसूर्याभिनिमृक्ते देवाः॥ \_\_\_\_\_[८]

देवस्य त्वा सवितुः प्रसव इति स्फ्यमादत्ते प्रसूत्यै। अश्विनोर्बाहुभ्यामित्याह।  
अश्विनौ हि देवानांमध्वर्यू आस्ताम्। पूष्णो हस्ताभ्यामित्याह यत्यै। आदद इन्द्रस्य  
बाहुरसि दक्षिण इत्याह। इन्द्रियमेव यजमाने दधाति। सहस्रभृष्टिः शततेजा  
इत्याह। रूपमेवास्यैतन्महिमानं व्याचष्टे। वायुरसि तिग्मतेजा इत्याह। तेजो वै  
वायुः॥६८॥

तेज एवास्मिन्दधाति। विषाद्वै नामासुर आसीत्। सोऽबिभेत्। यज्ञेन मा  
देवा अभिभविष्यन्तीति। स पृथिवीमभ्यवमीत्। सा मेध्याऽभवत्। अथो यदिन्द्रो  
वृत्रमहन्। तस्य लोहितं पृथिवीमनु व्यधावत्। सा मेध्याऽभवत्। पृथिवि  
देवयजनीत्याह॥६९॥

मेध्यामेवैनां देवयजनीं करोति। ओषध्यास्ते मूलं मा हिंसिषमित्याह।  
ओषधीनामहिंसायै। व्रजं गच्छ गोस्थानमित्याह। छन्दांसि वै व्रजो गोस्थानः।  
छन्दांस्येवास्मै व्रजं गोस्थानं करोति। वर्षतु ते द्यौरित्याह। वृष्टिर्वै द्यौः।

वृष्टिमेवाव रुन्धे। ब॒धान दे॒व स॒वितः पर॒मस्यां परा॒वतीत्या॑ह॥७०॥

द्वौ वाव पुरुषौ। यं चैव द्वेष्टि। यश्चैनं द्वेष्टि। तावुभौ बंध्राति परमस्यां परावति  
शतेन पाशैः। योऽस्मान्द्वेष्टि यं च वयं द्विष्मस्तमतो मा मौगित्याहानिमुत्तये।  
अरुरुर्वे नामासुर आसीत्। स पृथिव्यामुपमुत्तोऽशयत्। तं देवा अपहतोऽरुरुः  
पृथिव्या इति पृथिव्या अपाघ्नन्। भ्रातृव्यो वा अरुरुः। अपहतोऽरुरुः पृथिव्या  
इति यदाह॥७१॥

भ्रातृव्यमेव पृथिव्या अपहन्ति। तेऽमन्यन्त। दिवं वा अयमितः पतिष्यतीति।  
तमरुरुस्ते दिवं माऽस्कानिति दिवः पर्यबाधन्त। भ्रातृव्यो वा अरुरुः। अरुरुस्ते दिवं  
मा स्कानिति यदाह। भ्रातृव्यमेव दिवः परिबाधते। स्तम्बयजुर्हरति। पृथिव्या  
एव भ्रातृव्यमपहन्ति। द्वितीयः हरति॥७२॥

अन्तरिक्षादेवैनमपहन्ति। तृतीयः हरति। दिव एवैनमपहन्ति। तूष्णीं चतुर्थः  
हरति। अपरिमितादेवैनमपहन्ति। असुराणां वा इयमग्र आसीत्। यावदासीनः

परापश्यति। तावद्देवानांम्। ते देवा अब्रुवन्। अस्त्वेव नोऽस्यामपीति॥७३॥

क्यन्नो दास्यथेति। यावत्स्वयं परिगृहीथेति। ते वसंवस्त्वेति दक्षिणतः पर्यगृह्णन्। रुद्रास्त्वेति पश्चात्। आदित्यास्त्वेत्युत्तरतः। तेऽग्निना प्राञ्चोऽजयन्। वसुभिर्दक्षिणा। रुद्रैः प्रत्यञ्चः। आदित्यैरुदञ्चः। यस्यैवं विदुषो वेदिं परिगृह्णन्ति॥७४॥

भवत्यात्मना। पराऽस्य भ्रातृव्यो भवति। देवस्य सवितुः सुव इत्याहु प्रसूत्यै। कर्म कृण्वन्ति वेधस इत्याहु। इषितं हि कर्म क्रियते। पृथिव्यै मेध्यं चामेध्यं च व्युदक्रामताम्। प्राचीनमुदीचीनं मेध्यम्। प्रतीचीनं दक्षिणाऽमेध्यम्। प्राचीमुदीचीं प्रवृणां करोति। मेध्यामेवेनां देवयजनीं करोति॥७५॥

प्राञ्चो वेद्यं सावुन्नयति। आहुवनीयस्य परिगृहीत्यै। प्रतीची श्रोणी। गार्हपत्यस्य परिगृहीत्यै। अथो मिथुनत्वाय। उद्धन्ति। यदेवास्यां अमेध्यम्। तदपहन्ति। उद्धन्ति। तस्मादोषधयः पराभवन्ति॥७६॥

मूलं छिनत्ति। भ्रातृव्यस्यैव मूलं छिनत्ति। मूलं वा अतितिष्ठद्रक्षाऽस्यनूत्पिपते।

यद्धस्तेन छिन्द्यात्। कुन्खिनीः प्रजाः स्युः। स्फ्येन छिनत्ति। वज्रो वै स्फ्यः। वज्रेणैव यज्ञाद्रक्षाऽस्यपहन्ति। पितृदेवत्याऽतिखाता। इयतीं खनति॥७७॥

प्रजापतिना यज्ञमुखेन सम्मिताम्। वेदिर्देवेभ्यो निलायत। तां चतुरङ्गुलेऽन्विन्दन्। तस्माच्चतुरङ्गुलं खेयां। चतुरङ्गुलं खनति। चतुरङ्गुले ह्योषधयः प्रतितिष्ठन्ति। आ प्रतिष्ठायै खनति। यजमानमेव प्रतिष्ठां गमयति। दक्षिणतो वर्षीयसीं करोति। देवयजनस्यैव रूपमंकः॥७८॥

पुरीषवतीं करोति। प्रजा वै पशवः पुरीषम्। प्रजयैवेनं पशुभिः पुरीषवन्तं करोति। उत्तरं परिग्राहं परिगृह्णाति। एतावती वै पृथिवी। यावती वेदिः। तस्या एतावत एव भ्रातृव्यं निर्भज्य। आत्मन उत्तरं परिग्राहं परिगृह्णाति। ऋतमस्यृतसदनमस्यृतश्रीरसीत्याह। यथायजुरेवैतत्॥७९॥

क्रूरमिव वा एतत्करोति। यद्वेदिं करोति। धा असि स्वधा असीति योयुष्यते शान्त्यै। उर्वी चासि वस्वी चासीत्याह। उर्वीमेवेनां वस्वीं करोति। पुरा क्रूरस्य

वि॒सृ॒पो वि॒रप्शि॒न्नित्या॑ह मे॒ध्य॒त्वाय॑। उ॒दा॒दाय॑ पृथि॒वीं जी॒रदा॑नु॒र्यामै॑रयं च॒न्द्रम॑सि  
स्व॒धाभि॑रित्या॑ह। यदे॒वास्या॑ अमे॒ध्यम्। तद॑प॒हत्य॑। मे॒ध्या॑ दे॒वय॑ज॒नीं कृ॒त्वा॥८०॥

यद॒दश्च॑न्द्रम॑सि मे॒ध्यम्। तद॒स्यामे॑रयति। तां धीरा॑सो अनु॒दृश्य॑ यजन्त  
इत्या॒हानु॑ख्यात्यै। प्रोक्ष॑णी॒रा सा॑दय। इ॒ध्माब॑रु॒हिरु॑प॒सादय॑। स्रु॒वं च स्रु॑चश्च  
सम्मृ॑ड्धि। पत्नी॒ः सन्न॑ह्य। आ॒ज्ये॑नोदे॒हीत्या॑हानुपूर्व॒तायै॑। प्रोक्ष॑णी॒रा सा॑दयति।  
आपो॒ वै र॑क्षो॒घ्नीः॥८१॥

रक्ष॑सा॒मप॑हत्यै। स्फ्य॑स्य॒ वर्त्म॑न्त्सादयति। य॒ज्ञस्य॑ सन्त॑त्यै। उ॒वाच॑ हासि॑तो  
दै॒वतः॑। ए॒ताव॑तीर्वा अ॒मुष्मि॑ल्लोक आप॑ आसन्। याव॑तीः प्रोक्ष॑णी॒रिति॑।  
तस्मा॑द्ब॒ह्वीरा॑सा॒द्याः। स्फ्य॑मुदस्यन्। यं द्वि॒ष्ट्यात्तं ध्या॑येत्। शु॒चैवै॑नम॒र्पय॑ति॥८२॥  
वा॒युरा॑ह प॒राव॑तीत्या॒हं द्वि॒तीयः॑ ह॒रती॑ति परिगृह्णन्ति दे॒वय॑ज॒नीं करो॑ति भवन्ति खन॑त्यक॒रेत॑कृ॒त्वा र॑क्षो॒घ्नीर॑र्पयति॥

[९]

वज्रो॒ वै स्फ्यः॑। यद॒न्वश्च॑ धा॒रये॑त्। वज्रे॑ऽध्व॒र्युः क्ष॑ण्वीत। पु॒रस्ता॑त्तिर्यश्च  
धा॒रय॑ति। वज्रो॒ वै स्फ्यः॑। वज्रे॑णै॒व य॒ज्ञस्य॑ दक्षि॒णतो॑ रक्षा॒ऽस्य॑प॒हन्ति॑। अ॒ग्नि॒भ्यां

प्राचंश्च प्रतीचंश्च। स्फ्येनोदीचश्चाधराचंश्च। स्फ्येन वा एष वज्रेणास्यै पाप्मानं  
भ्रातृव्यमपहृत्य। उत्कुरेऽधि प्रवृश्चति॥८३॥

यथोपधाय वृश्चन्त्येवम्। हस्तावव नेनित्ते। आत्मानमेव पवयते। स्फ्यं  
प्रक्षालयति मेध्यत्वाय। अथो पाप्मन एव भ्रातृव्यस्य न्यङ्गं छिनत्ति।  
इध्माबर्हिःरुपसादयति युक्त्यै। यज्ञस्य मिथुनत्वाय। अथो पुरोरुचमेवैतां दधाति।  
उत्तरस्य कर्मणोऽनुख्यात्यै। न पुरस्तात्प्रत्यगुपसादयेत्॥८४॥

यत्पुरस्तात्प्रत्यगुपसादयेत्। अन्यत्राऽऽहुतिपथादिध्मं प्रतिपादयेत्। प्रजा  
वै बर्हिः। अपराध्रुयाद्बर्हिषा प्रजानां प्रजननम्। पश्चात्प्रागुपसादयति।  
आहुतिपथेनेध्मं प्रतिपादयति। सम्प्रत्येव बर्हिषा प्रजानां प्रजननमुपैति।  
दक्षिणमिध्मम्। उत्तरं बर्हिः। आत्मा वा इध्मः। प्रजा बर्हिः। प्रजा ह्यात्मन  
उत्तरतरा तीर्थे। ततो मेधमुपनीय। यथादेवतमेवैनत्प्रतिष्ठापयति। प्रति तिष्ठति  
प्रजया पशुभिर्यजमानः॥८५॥ वृश्चति सादयेदिध्मः पञ्च च॥

[१०]

तृतीयस्यां देवस्यांश्चपशुं यो वै पूर्वद्युः कर्मणे वामिन्द्रो वृत्रमहन्सांऽपोऽवधूतं धृष्टिदेवस्येत्याहु सं वंपामि देवस्य स्फ्यमा दंदे वज्रो वै स्फ्यो दश॥१०॥

तृतीयस्यां यज्ञस्यान्तिरेकाय पवित्रंवत्यध्वयुं चाधिपवणमस्यन्तरिक्ष एव रक्षंसामन्तरहित्यै द्वौ वाव पुरुषौ यददश्चन्द्रमसि मेध्यं पश्चाशीतिः॥८५॥  
तृतीयस्यां यजमानः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके द्वितीयः प्रपाठकः समाप्तः॥

॥तृतीयः प्रश्नः॥

॥तैत्तिरीयब्राह्मणे तृतीयाष्टके तृतीयः प्रपाठकः॥

प्रत्युष्टं रक्षः प्रत्युष्टा अरातय इत्याह। रक्षसामपंहत्यै। अग्नेर्वस्तेजिष्ठेन तेजसा निष्टपामीत्याह मेध्यत्वाय। सुचः सम्मार्ष्टि। सुवमग्रे। पुमांसमेवाभ्यः सश्यति मिथुनत्वाय। अथ जुहूम्। अथोपभृतम्। अथ ध्रुवाम्। असौ वै जुहूः॥१॥

अन्तरिक्षमुपभृत्। पृथिवी ध्रुवा। इमे वै लोकाः सुचः। वृष्टिः सम्मार्जनानि। वृष्टिर्वा इमाँल्लोकाननुपूर्वं कल्पयति। ते ततः क्लृप्ताः समेधन्ते। समेधन्तेऽस्मा इमे लोकाः प्रजयां पशुभिः। य एवं वेद। यदि कामयेत वर्षुकः पर्जन्यः स्यादिति। अग्रतः सम्मृज्यात्॥२॥

वृष्टिमेव नि यच्छति। अवाचीनां हि वृष्टिः। यदि कामयेतावर्षुकः स्यादिति। मूलतः सम्मृज्यात्। वृष्टिमेवोद्यच्छति। तदु वा आहुः। अग्रत एवोपरिष्ठात्सम्मृज्यात्। मूलतोऽधस्तात्। तदनुपूर्वं कल्पते। वर्षुको भवतीति॥३॥



प्राचीमभ्याकारम्। अग्रैरन्तरतः। एवमिव ह्यन्नमद्यते। अथो अग्राद्वा  
 ओषधीनामूर्जं प्रजा उपजीवन्ति। ऊर्ज एवान्नाद्यस्यावरुद्धौ। अधस्तात्प्रतीचीम्।  
 दण्डमुत्तमतः। मूलेन मूलं प्रतिष्ठित्यै। तस्मादरत्नौ प्राश्नुपरिष्टाल्लोमानि।  
 प्रत्यश्च्यधस्तात्॥ ४॥

स्रुग्येषा। प्राणो वै स्रुवः। जुहूर्दक्षिणो हस्तः। उपभृत्स्रुव्यः। आत्मा ध्रुवा।  
 अन्नं स्रुमार्जनानि। मुखतो वै प्राणोऽपानो भूत्वा। आत्मानमन्नं प्रविश्य।  
 बाह्यतस्तनुवः शुभयति। तस्मात्स्रुवमेवाग्रे सम्मार्ष्टि। मुखतो हि प्राणोऽपानो  
 भूत्वा। आत्मानमन्नमाविशति। तौ प्राणापानौ। अव्यर्धुकः प्राणापानाभ्यां भवति।  
 य एवं वेद॥ ५॥ जुहूर्मुज्याद्वतीति प्रत्यश्च्यधस्तान्मार्ष्टि पञ्च च॥ [१]

दिवः शिल्पमवततम्। पृथिव्याः ककुभि श्रितम्। तेन वयः सहस्रवल्शेन।  
 सपत्नं नाशयामसि स्वाहेति स्रुक्स्रुमार्जनान्यग्नौ प्र हरति। आपो वै दर्भाः।  
 रूपमेवैषामेतन्महिमानं व्याचष्टे। अनुष्टुभर्चा। आनुष्टुभः प्रजापतिः। प्राजापत्यो

वेदः। वेदस्याग्रं॑ स्रुक्सम्मार्जनानि॥६॥

स्वेनै॒वैनानि॒ छन्द॑सा। स्वया॑ दे॒वत॑या॒ सम॑र्धयति। अथो॒ ऋ॒गवा॑व योषा॑। द॒र्भो॑  
वृषा॑। तन्मि॑थुनम्। मि॒थुनमे॒वास्य॑ तद्य॒ज्ञे क॑रोति प्र॒जन॑नाय। प्रजा॑यते प्र॒जया॑  
प॒शुभि॑र्यज॑मानः। तान्ये॒के वृ॒थैवापा॑स्यन्ति। तत्तथा॒ न का॑र्यम्। आर॑ब्धस्य य॒ज्ञिय॑स्य  
कर्म॑णः सवि॑दोहः॥७॥

यद्ये॑नानि प॒शवो॑ऽभि तिष्ठे॑युः। न तत्प॒शुभ्यः॒ कम्। अ॒द्भिर्मा॑र्जयित्वात्क॒रे  
न्य॑स्येत्। यद्वै य॒ज्ञिय॑स्य कर्म॑णोऽन्यत्राऽऽहु॑तीभ्यः स॒न्तिष्ठ॑ते। उ॒त्क॒रो वा॑व तस्य  
प्रति॑ष्ठा। ए॒ताः हि तस्मै॑ प्रति॑ष्ठां दे॒वाः स॒मभ॑रन्। यद॒द्भिर्मा॑र्जयति। तेन॑ शा॒न्तम्।  
यदु॑त्क॒रे न्य॑स्यति। प्र॒तिष्ठा॑मे॒वैनानि॒ तद्ग॑मयति॥८॥

प्रति॑ तिष्ठति प्र॒जया॑ प॒शुभि॑र्यज॑मानः। अथो॑ स्त॒म्बस्य॒ वा ए॒तद्रूप॑म्।  
यत्स्रु॑क्सम्मार्जनानि। स्त॒म्बशो॑ वा ओष॑धयः। तासां॑ जरत्क॒क्षे प॒शवो॑ न र॑मन्ते।  
अप्रि॑यो ह्येषां॑ जरत्क॒क्षः। याव॑दप्रियो ह॒ वै जर॑त्क॒क्षः प॑शूनाम्। ताव॑दप्रियः प॑शूनां

भवति। यस्यैतान्यन्यत्राग्नेर्दधति। नवदाव्यासु वा ओषधीषु पशवो रमन्ते॥९॥

नवदावो ह्येषां प्रियः। यावत्प्रियो ह वै नवदावः पशूनाम्। तावत्प्रियः पशूनां भवति। यस्यैतान्यग्नौ प्रहरन्ति। तस्मादेतान्यग्नावेव प्रहरेत्। यतरस्मिन्त्सम्मृज्यात्। पशूनां धृत्यै। यो भूतानामधिपतिः। रुद्रस्तन्तिचरो वृषां। पशूनस्माकं मा हिंसीः। एतदस्तु हुतं तव स्वाहेत्यग्निसम्मार्जनान्यग्नौ प्रहरति। एषा वा एतेषां योनिः। एषा प्रतिष्ठा। स्वामेवैनानि योनिम्। स्वां प्रतिष्ठां गमयति। प्रति तिष्ठति प्रजयां पशुभिर्यजमानः॥१०॥

वेदस्याग्रं सुखसम्मार्जनानि विदोहो गमयति पशवो रमन्ते हिंसीः षट् च॥

[२]

अयंज्ञो वा एषः। योऽपत्नीकः। न प्रजाः प्रजायेरन्। पत्न्यन्वास्ते। यज्ञमेवाकः। प्रजानां प्रजननाय। यत्तिष्ठन्ती सन्नह्येत। प्रियं ज्ञातिं रुन्ध्यात्। आसीना सन्नह्यते। आसीना ह्येषा वीर्यं करोति॥११॥

यत्पश्चात्प्राच्यन्वासीत। अनया समदन्दधीत। देवानां पत्न्या समदन्दधीत।

देशाद्दक्षिणत उदीच्यन्वास्ते। आत्मनो गोपीथाय। आशासाना सौमनसमित्याह।  
मेध्यामेवैनां केवलीं कृत्वा। आशिषा समर्धयति। अग्नेरनुव्रता भूत्वा सन्नह्ये  
सुकृताय कमित्याह। एतद्वै पत्न्यै व्रतोपनयनम्॥१२॥

तेनैवैनां व्रतमुपनयति। तस्मादाहुः। यश्चैवं वेद यश्च न। योऽक्रमेव युते।  
यमन्वास्ते। तस्यामुष्मिल्लोके भवतीति योऽक्रमेण। यद्योऽक्रमे। स योगः। यदास्ते। स  
क्षेमः॥१३॥

योगक्षेमस्य क्लृप्त्यै। युक्तं क्रियाता आशीः कामे युज्याता इति। आशिषः  
समृद्धौ। ग्रन्थिं ग्रन्थाति। आशिष एवास्यां परि गृह्णाति। पुमान् वै ग्रन्थिः। स्त्री  
पत्नी। तन्मिथुनम्। मिथुनमेवास्य तद्यज्ञे करोति प्रजननाय। प्र जायते प्रजया  
पशुभिर्यजमानः॥१४॥

अथो अर्धो वा एष आत्मनः। यत्पत्नी। यज्ञस्य धृत्या अशिथिलं भावाय।  
सुप्रजसंस्त्वा वयं सुपत्नीरुपं सेदिमेत्याह। यज्ञमेव तन्मिथुनीकरोति।

ऊनेऽतिरिक्तं धीयाता इति प्रजात्यै। महीनां पयोऽस्योषधीनां रस इत्याह।  
 रूपमेवास्यैतन्महिमानं व्याचष्टे। तस्य तेऽक्षीयमाणस्य निर्वपामि देवयज्याया  
 इत्याह। आमेवैतामा शास्ते॥१५॥ करोति ब्रतोपनयनं क्षेमो यजमानः शास्ते॥ [३]

घृतं च वै मधुं च प्रजापतिरासीत्। यतो मध्वासीत्। ततः प्रजा असृजत।  
 तस्मान्मधुषि प्रजननमिवास्ति। तस्मान्मधुषा न प्रचरन्ति। यातयाम हि।  
 आज्येन प्रचरन्ति। यज्ञो वा आज्यम्। यज्ञेनैव यज्ञं प्रचरन्त्ययातयामत्वाय।  
 पत्यवेक्षते॥१६॥

मिथुनत्वाय प्रजात्यै। यद्वै पत्नी यज्ञस्य करोति। मिथुनं तत्। अथो पत्न्या  
 एवैष यज्ञस्यान्वारम्भोऽनवच्छित्यै। अमेध्यं वा एतत्करोति। यत्पत्यवेक्षते।  
 गार्हपत्येऽधि श्रयति मेध्यत्वाय। आहवनीयमभ्युद्धवति। यज्ञस्य सन्तत्यै।  
 तेजोऽसि तेजोऽनु प्रेहीत्याह॥१७॥

तेजो वा अग्निः। तेज आज्यम्। तेजसैव तेजः समर्धयति। अग्निस्ते तेजो मा

विनेदित्याहाहि॑ सायै। स्फ्यस्य॑ वर्त्मन्त्सादयति। यज्ञस्य॑ सन्तत्यै। अग्नेर्जिह्वाऽसि॑  
सुभूर्देवानामित्या॑ह। यथा॑ यजुरे॒वैतत्। धाम्ने॑ धाम्ने देवेभ्यो॑ यजुषे॒यजुषे॑ भवेत्या॑ह। आ-  
मे॒वैता॒मा शा॑स्ते॥१८॥

तद्वा अतः॑ पवित्रा॑भ्यामे॒वोत्पु॑नाति। यज॑मानो वा आज्यम्। प्रा॒णापा॒नौ प॒वित्रे॑।  
यज॑मान ए॒व प्रा॒णापा॒नौ द॑धाति। पुन॒राहा॒रम्। ए॒वमि॒व हि प्रा॒णापा॒नौ स॒ञ्चर॑तः।  
शु॒क्रम॑सि॒ ज्योति॑रसि॒ तेजो॑ऽसीत्या॑ह। रू॒पमे॒वास्यै॒तन्महि॑मानं व्याच॑ष्टे। त्रि॒र्यजु॑षा।  
त्रय॑ इ॒मे लो॒काः॥१९॥

ए॒षां लो॒काना॒माप्त्यै॑। त्रिः। त्र्या॑वृद्धि यज्ञः। अथो॑ मेध्य॒त्वाय॑। अथाऽऽज्य॑वतीभ्याम॒प  
रू॒पमे॒वासा॑मे॒तद्वर्ण॑ दधाति। अपि॒ वा उ॒ताऽऽहुः॑। यथा॑ ह॒ वै योषा॑ सु॒वर्ण॑ हिर॑ण्यं  
पे॒शलं बिभ्र॑ती रू॒पाण्यास्ते॑। ए॒वमे॒ता ए॒तर्ही॑ति। आपो॑ वै सर्वा॑ दे॒वताः॑॥२०॥

ए॒षा हि वि॒श्वेषां॑ दे॒वानां॑ त॒नूः। यदा॑ज्यम्। तत्रो॒भयो॑र्मीमा॒सा। जा॒मि स्यात्।  
यद्यजु॑षाऽऽज्यं॒ यजु॑षा॒ऽप उ॑त्पुनीयात्। छन्द॑सा॒ऽप उ॑त्पुनात्यजा॑मित्वाय। अथो॑

मिथुन॑त्वाय॑। सा॒वि॒त्रि॒यर्चा॑। स॒वि॒तृ॒प्र॒सू॒तं मे॒ कर्मा॑स॒दिति॑। स॒वि॒तृ॒प्र॒सू॒तमे॒वास्य॑ कर्म  
भवति॑। प॒च्छो गाय॑त्रिया त्रि॒ष्वमृ॑द्धत्वाय॑। अ॒द्भिरे॒वौष॑धीः सं न॑यति। ओष॑धीभिः  
प॒शून्। प॒शुभि॑र्यज॑मानम्। शु॒क्रं त्वा॑ शु॒क्रायां॑ ज्योति॑स्त्वा ज्योति॑ष्य॒र्चिस्त्वा॒  
ऽर्चि॑षीत्या॒ह सर्व॑त्वाय॑। पर्या॑प्त्या॒ अन॑न्तरायाय॥ २१॥ ईक्ष॑त आ॒हु शा॒स्ते लो॒का दे॒वता॑ भवति॑ षट्  
च॥ [४]

दे॒वा॒सु॒राः संय॑त्ता आसन्। स ए॒तमि॒न्द्र आ॒ज्य॑स्यावका॒शम॑पश्यत्। तेनावै॑क्षत।  
ततो॑ दे॒वा अभ॑वन्। परा॑ऽसु॒राः। य ए॒वं वि॒द्वाना॒ज्यम॑वेक्ष॑ते। भव॑त्या॒त्मना॑। परा॑ऽस्य  
भ्रातृ॑व्यो भवति। ब्र॒ह्म॒वादि॒नो वद॑न्ति। यदाज्ये॑नान्यानि॑ ह॒वींष्य॑भिघा॒रय॑ति॥ २२॥

अथ॒ केना॑ऽऽज्य॑मिति॑। स॒त्येने॑ति॑ ब्रूयात्। चक्षु॑र्वै स॒त्यम्। स॒त्येनै॒वैन॑द॒भि  
घा॑रयति। ई॒श्वरो॒ वा ए॒षोऽन्धो॑ भवि॑तोः। यश्चक्षु॑षाऽऽज्य॑म॒वेक्ष॑ते। नि॒मी॒ल्यावे॑क्षेत।  
दा॒धारा॒त्मश्चक्षुः॑। अ॒भ्याज्यं॑ घारयति। आ॒ज्यं गृ॑ह्णाति॥ २३॥

छन्दा॑ंसि॒ वा आ॒ज्यम्। छन्दा॑ंस्ये॒व प्री॑णाति। च॒तुर्जु॑ह्वं गृह्णाति। चतु॑ष्पादः

प॒शवः॑। प॒शूने॒वाव॑ रु॒न्धे। अ॒ष्टावु॑प॒भृति॑। अ॒ष्टाक्ष॑रा गाय॒त्री। गा॒य॒त्रः प्रा॒णः। प्रा॒णमे॒व  
प॒शुषु॑ दधाति। च॒तुर्ध्रु॑वायाम्॥ २४॥

चतु॑ष्पादः प॒शवः॑। प॒शुष्वे॒वोप॑रि॒ष्टात्प्रति॑ तिष्ठति। य॒ज॒मा॒नदे॒वत्या॑ वै जु॒हूः।  
भ्रा॒तृव्य॑दे॒वत्यो॑प॒भृत्। च॒तुर्जु॑ह्वां गृ॒ह्णन्भू॑यो गृ॒ह्णीयात्। अ॒ष्टावु॑प॒भृति॑ गृ॒ह्णन्क॑र्णीयः।  
यज॑मानायै॒व भ्रा॑तृव्यमु॒पस्ति॑ करोति। गो॒र्वे स्रु॑चः। च॒तुर्जु॑ह्वां गृ॒ह्णाति।  
तस्मा॑च्चतु॑ष्पदी॥ २५॥

अ॒ष्टावु॑प॒भृति॑। तस्मा॑द॒ष्टाश॑फा। च॒तुर्ध्रु॑वायाम्। तस्मा॑च्चतुः स्तना।  
गामे॒व तथ्स॑ङ्स्करोति। साऽस्मै॒ सङ्स्कृ॑तेष॒मूर्जं॑ दुहे। य॒ज्ञु॒ह्वां गृ॒ह्णाति॑।  
प्र॒या॒जेभ्य॑स्तत्। यदु॑प॒भृति॑। प्र॒या॒जा॒नूया॒जेभ्य॑स्तत्। सर्व॑स्मै वा ए॒तद्य॒ज्ञाय॑ गृ॒ह्यते॑।  
यद्ध्रु॑वायामा॒ज्यम्॥ २६॥ अ॒भिघा॑रयति गृ॒ह्णाति ध्रु॑वायां चतु॑ष्पदी प्र॒या॒जा॒नूया॒जेभ्य॑स्तद्धे च॥ —————[५]

आपो॑ दे॒वीर॑ग्रेपुवो अ॒ग्रेगु॑व॒ इत्या॑ह। रू॒पमे॒वासा॑मे॒तन्महि॑मानं व्याच॑ष्टे। अ॒ग्रं  
इ॒मं य॒ज्ञं न॑य॒ताग्रे॑ य॒ज्ञप॑तिमित्या॑ह। अ॒ग्रं ए॒व य॒ज्ञं न॑यन्ति। अ॒ग्रे य॒ज्ञप॑तिम्।



युष्मानिन्द्रोऽवृणीत वृत्रतूर्यं यूयमिन्द्रमवृणीध्वं वृत्रतूर्यं इत्याह। वृत्रं हं  
हनिष्यन्निन्द्र आपो वव्रे। आपो हेन्द्रं वव्रिरे। संज्ञामेवासामेतत्सामानं व्याचष्टे।  
प्रोक्षिताः स्थेत्याह॥२७॥

तेनाऽऽपः प्रोक्षिताः। अग्निर्देवेभ्यो निलायत। कृष्णो रूपं कृत्वा। स  
वनस्पतीन्प्राविशत्। कृष्णोऽस्याखरेष्ठोऽग्नये त्वा स्वाहेत्याह। अग्नये एवैनं जुष्टं  
करोति। अथो अग्नेरेव मेधमव रुन्धे। वेदिरसि बर्हिषे त्वा स्वाहेत्याह। प्रजा  
वै बर्हिः। पृथिवी वेदिः॥२८॥

प्रजा एव पृथिव्यां प्रतिष्ठापयति। बर्हिरसि सुगम्यस्त्वा स्वाहेत्याह। प्रजा वै  
बर्हिः। यजमानः सुचः। यजमानमेव प्रजासु प्रतिष्ठापयति। दिवे त्वाऽन्तरिक्षाय  
त्वा पृथिव्यै त्वेति बर्हिरासाद्य प्रोक्षति। एभ्य एवैनल्लोकेभ्यः प्रोक्षति। अथ ततः  
सह सुचा पुरस्तात्प्रत्यञ्चं ग्रन्थिं प्रत्युक्षति। प्रजा वै बर्हिः। यथा सृत्यै काल  
आपः पुरस्ताद्यन्ति॥२९॥

तादृगेव तत्। स्वधा पितृभ्य इत्याह। स्वधाकारो हि पितृणाम्। ऊर्ध्वं बर्हिषद् इति दक्षिणायै श्रोणेरोत्तरस्यै निनयति सन्तत्यै। मासा वै पितरो बर्हिषदः। मासानेव प्रीणाति। मासा वा ओषधीर्वर्धयन्ति। मासाः पचन्ति समृद्धौ। अनतिस्कन्दन् ह पर्जन्यो वर्षति। यत्रैतदेवं क्रियते॥३०॥

ऊर्जा पृथिवीं गच्छतेत्याह। पृथिव्यामेवोर्जं दधाति। तस्मात्पृथिव्या ऊर्जा भुञ्जते। ग्रन्थिं वि स्रंसयति। प्रजनयत्येव तत्। ऊर्ध्वं प्राञ्चमुद्गूढं प्रत्यञ्चमा यच्छति। तस्मात्प्राचीन् रेतो धीयते। प्रतीचीः प्रजा जायन्ते। विष्णोः स्तूपोऽसीत्याह। यज्ञो वै विष्णुः॥३१॥

यज्ञस्य धृत्यै। पुरस्तात्प्रस्तरं गृह्णाति। मुख्यमेवैनं करोति। इयन्तं गृह्णाति। प्रजापतिना यज्ञमुखेन सम्मितम्। इयन्तं गृह्णाति। यज्ञपुरुषा सम्मितम्। इयन्तं गृह्णाति। एतावद्वै पुरुषे वीर्यम्। वीर्यसम्मितम्॥३२॥

अपरिमितं गृह्णाति। अपरिमितस्यावरुद्धौ। तस्मिन्पुत्रे अपि सृजति।

यज॑मानो॒ वै प्र॑स्त॒रः। प्रा॒णापा॒नौ प॒वित्रे॑। यज॑मान ए॒व प्रा॑णापा॒नौ द॑धाति।  
ऊर्णा॑म्रदसं त्वा स्तृ॒णामी॑त्याह। य॒थाय॒जुरे॒वैतत्। स्वा॒स॒स्थं दे॒वेभ्य॒ इत्या॑ह। दे॒वेभ्य॑  
ए॒वैन॑त्स्वा॒स॒स्थं क॑रोति॥३३॥

ब॒र्हिः स्तृ॑णाति। प्र॒जा वै ब॒र्हिः। पृ॒थि॒वी वेदिः॑। प्र॒जा ए॒व पृ॑थि॒व्यां  
प्रति॑ष्ठापयति। अन॑तिदृश्न॒ऽस्तृ॑णाति। प्र॒जयै॒वेन॑ प॒शुभि॑रन॑तिदृश्नं करोति।  
धा॒रय॑न्प्रस्त॒रं प॑रि॒धीन्प॑रि॒ दधा॑ति। यज॑मानो॒ वै प्र॑स्त॒रः। यज॑मान ए॒व तत्स्व॑यं  
प॑रि॒धीन्प॑रि॒ दधा॑ति। ग॒न्ध॒र्वोऽसि॑ वि॒श्वाव॑सुरि॒त्याह॑॥३४॥

विश्व॑मे॒वायु॑र्यज॑माने दधाति। इन्द्र॑स्य बा॒हुर॑सि॒ दक्षि॑ण॒ इत्या॑ह। इन्द्रि॒यमे॒व  
यज॑माने दधाति। मि॒त्रावरु॑णौ त्वोत्त॑र॒तः प॑रि॒धत्ता॑मि॒त्याह॑। प्रा॒णापा॒नौ मि॒त्रावरु॑णौ।  
प्रा॒णापा॒नावे॒वास्मि॑न्दधाति। सूर्य॑स्त्वा पु॒रस्ता॑त् पा॒त्वित्या॑ह। रक्ष॑साम॒प॑ह॒त्यै।  
कस्या॑श्चिद॒भि॒श॑स्त्या॒ इत्या॑ह। अप॑रि॒मिता॑दे॒वेन॑ पाति॥३५॥

वी॒तिहो॑त्रं त्वा क॒व॒ इत्या॑ह। अ॒ग्निमे॒व हो॒त्रेण॑ स॒म॑र्धयति। द्यु॒मन्त॑ः

समिधीम॒हीत्या॑ह॒ समि॑द्धौ। अ॒ग्ने बृ॒हन्त॑मध्व॒र इत्या॑ह॒ वृद्धै॑। वि॒शो य॒त्रे  
स्थ॒ इत्या॑ह। वि॒शां यत्यै॑। उ॒दीची॑ना॒ग्ने नि द॑धाति॒ प्रति॑ष्ठित्यै। वसू॑ना॒ः  
रु॒द्राणा॑मादित्याना॒ः स॒दसि॑ सी॒देत्या॑ह। दे॒वता॑नामे॒व स॒दने॑ प्रस्तर॒ः सा॑दयति।  
जु॒हूर॑सि घृ॒ताची॑ नाम्नेत्या॑ह॥ ३६॥

अ॒सौ वै जु॒हूः। अ॒न्तरि॑क्षमुप॒भृत्। पृ॒थि॒वी ध्रु॒वा। तासा॑मे॒तदे॒व प्रि॒यं  
नाम॑। यद्घृ॒ताची॑ति। यद्घृ॒ताची॑त्याह॑। प्रि॒येणै॒वैना॒ नाम्ना॑ सादयति। ए॒ता  
अ॒सद॑न्त्सुकृ॒तस्य॑ लो॒क इत्या॑ह। स॒त्यं वै सु॒कृ॒तस्य॑ लो॒कः। स॒त्य ए॒वैना॑ः  
सुकृ॒तस्य॑ लो॒के सा॑दयति। ता वि॒ष्णो पा॒हीत्या॑ह। य॒ज्ञो वै वि॒ष्णुः। य॒ज्ञस्य॑ धृत्यै॑।  
पा॒हि य॒ज्ञं पा॒हि य॒ज्ञप॑तिं पा॒हि मां य॑ज्ञ॒निय॑मित्या॑ह। य॒ज्ञाय॑ यज॑मानायाऽऽत्म॒नै।  
तेभ्य॑ ए॒वाऽऽशि॒षमा॑शास्तेऽना॒त्यै॑॥ ३७॥ स्थेत्याह पृथिवी वेदिर्यन्ति क्रियते वीणुर्वीर्यसम्मितं करोत्याह पाति नाम्नेत्याह लोके

सादयति पद च॥

[६]

अ॒ग्निना॒ वै हो॒त्रा॑। दे॒वा अ॒सुरा॑न॒भ्य॑भवन्। अ॒ग्नये॑ समि॒ध्यमा॑ना॒यानु॑ब्रूहीत्या॑ह॒  
भ्रातृ॑व्याऽभि॒भूत्यै॑। ए॒कं वि॑ः श॒तिमि॑ध्मदा॒रूणि॑ भवन्ति। ए॒कं वि॑ः शो वै पु॒रुषः॑।

पुरुषस्याऽऽत्यै। पञ्चदशेध्मदारूण्यभ्या दधाति। पञ्चदश वा अर्धमासस्य रात्रयः।  
अर्धमासशः संवत्सर आप्यते। त्रीनपरिधीनपरि दधाति॥३८॥

ऊर्ध्वे समिधावा दधाति। अनूयाजेभ्यः समिधमतिं शिनष्टि। षट्त्सम्पद्यन्ते।  
षड्वा ऋतवः। ऋतूनेव प्रीणाति। वेदेनोप वाजयति। प्राजापत्यो वै वेदः। प्राजापत्यः  
प्राणः। यजमान आहवनीयः। यजमान एव प्राणं दधाति॥३९॥

त्रिरुपं वाजयति। त्रयो वै प्राणाः। प्राणानेवास्मिन्दधाति। वेदेनोपयत्यं स्रुवेण  
प्राजापत्यमाधारमा धारयति। यज्ञो वै प्रजापतिः। यज्ञमेव प्रजापतिं मुखत  
आरभते। अथो प्रजापतिः सर्वा देवताः। सर्वा एव देवताः प्रीणाति। अग्निमग्नीत्रिस्त्रिः  
सं मृद्धीत्याह। त्र्यावृद्धि यज्ञः॥४०॥

अथो रक्षसामपहत्यै। परिधीन्त्सं माँष्टि। पुनात्येवैनान्। त्रिस्त्रिः सं माँष्टि।  
त्र्यावृद्धि यज्ञः। अथो मेध्यत्वाय। अथो एते वै देवाश्वाः। देवाश्वानेव तत्सं माँष्टि।  
सुवर्गस्य लोकस्य समष्ट्यै। आसीनोऽन्यमाधारमा धारयति॥४१॥

तिष्ठन्नन्यम्। यथाऽनो वा रथं वा युञ्ज्यात्। एवमेव तदध्वर्युर्यज्ञं युनक्ति।  
सुवर्गस्य लोकस्याभ्यूढ्यै। वहन्त्येनं ग्राम्याः पशवः। य एवं वेद। भुवनमसि वि  
प्रथस्वेत्याह। यज्ञो वै भुवनम्। यज्ञ एव यजमानं प्रजया पशुभिः प्रथयति। अग्ने  
यष्टरिदं नम इत्याह॥४२॥

अग्निर्वै देवानां यष्टा। य एव देवानां यष्टा। तस्मां एव नमस्करोति।  
जुह्वेह्यग्निस्त्वा ह्वयति देवयज्याया उपभृदेहि देवस्त्वा सविता ह्वयति देवयज्याया  
इत्याह। आग्नेयी वै जुहूः। सावित्र्युपभृत्। ताभ्यामेवैने प्रसूत आदत्ते। अग्नाविष्णू  
मा वामव क्रमिषमित्याह। अग्निः पुरस्तात्। विष्णुर्यज्ञः पश्चात्॥४३॥

ताभ्यामेव प्रतिप्रोच्यात्या क्रामति। विजिहाथां मा मा सन्ताप्तमित्याहाहि सायै।  
लोकं मे लोककृतौ कृणुतमित्याह। आमेवैतामा शास्ते। विष्णोः स्थानमसीत्याह।  
यज्ञो वै विष्णुः। एतत्खलु वै देवानामपराजितमायतनम्। यद्यज्ञः। देवानामेवा-  
पराजित आयतने तिष्ठति। इत इन्द्रो अकृणोद्वीर्याणीत्याह॥४४॥

इन्द्रियमेव यजमाने दधाति। समारभ्योर्ध्वो अर्ध्वरो दिविस्पृशमित्याहु वृद्धौ।  
 आघारमाघार्यमाणमनु समारभ्य। एतस्मिन्काले देवाः सुवर्गं लोकमायन्।  
 साक्षादेव यजमानः सुवर्गं लोकमेति। अथो समृद्धेनैव यज्ञेन यजमानः सुवर्गं  
 लोकमेति। अहुतो यज्ञो यज्ञपतेरित्याहानात्यै। इन्द्रावान्ध्रस्वाहेत्याह। इन्द्रियमेव  
 यजमाने दधाति। बृहद्वा इत्याह॥४५॥

सुवर्गो वै लोको बृहद्वाः। सुवर्गस्य लोकस्य समष्ट्यै। यजमानदेवत्यां वै जुहूः।  
 भ्रातृव्यदेवत्योपभृत्। प्राण आघारः। यत्संस्पर्शयेत्। भ्रातृव्येऽस्य प्राणं दध्यात्।  
 असंस्पर्शयन्नत्या क्रामति। यजमान एव प्राणं दधाति। पाहि मांऽग्ने दुश्चरितादा  
 मा सुचरिते भजेत्याह॥४६॥

अग्निर्वाव पवित्रम्। वृजिनमनृतं दुश्चरितम्। ऋजुकर्म सत्यं सुचरितम्।  
 अग्निरेवैनं वृजिनादनृताद्दुश्चरितात्पाति। ऋजुकर्मे सत्ये सुचरिते भजति।  
 तस्मादेवमा शास्ते। आत्मनो गोपीथाय। शिरो वा एतद्यज्ञस्य। यदाघारः। आत्मा  
 ध्रुवा॥४७॥

आ॒घ्रा॒रमा॒घार्य॑ ध्रु॒वा॑ ५ सम॑न॒क्ति। आ॒त्म॒न्ने॒व य॒ज्ञस्य॑ शि॒रः॑ प्र॒ति द॑धाति। द्विः  
 सम॑न॒क्ति। द्वौ हि प्रा॑णापा॒नौ। तदा॑हुः। त्रि॒रे॒व सम॑ञ्च॒यात्। त्रिधा॑तु हि शि॒र  
 इति॑। शि॒र इ॒वैत॑द्य॒ज्ञस्य॑। अथो॒ त्रयो॒ वै प्रा॒णाः। प्रा॒णाने॒वास्मि॑न्दधाति। म॒खस्य॑  
 शिरो॑ऽसि सञ्चो॒तिषा॑ ज्योति॑रङ्ग॒मित्या॑ह। ज्योति॑रे॒वास्मा॑ उप॒रि॒ष्टाद॑धाति।  
 सुव॑र्गस्य॒ लोक॑स्यानु॒ख्यात्यै॑॥४८॥ परि॑दधाति प्रा॒णं द॑धाति हि य॒ज्ञो घ्रा॑रयति नम॒ इत्या॑ह प॒श्चाद्वी॒र्या॑णीत्या॒हु भा॑ इत्या॑ह  
 भुजे॒त्या॒ह ध्रु॒वैवास्मि॑न्दधाति त्रीणि॑ च॥

[७]

धि॒ष्णि॒या वा ए॒ते न्यु॑प्यन्ते। यद्व॒ह्मा। यद्वो॑ता॑। यद॑ध्व॒र्युः। यद॑ग्री॒त्।  
 यद्य॑ज॒मानः॑। तान् यद॑न्तरे॒यात्। यज॑मानस्य प्रा॒णान्त्सङ्क॑र्षेत्। प्र॒मायु॑कः स्यात्।  
 पु॒रोडा॑शमप॒गृह्य॑ सञ्च॑रत्यध्व॒र्युः॥४९॥

यज॑मानायै॒व तल्लो॒क ५ शि॑ ५ षति। नास्य॑ प्रा॒णान्त्सङ्क॑र्षति। न प्र॒मायु॑को भवति।  
 पु॒रस्ता॑त् प्र॒त्यङ्मा॑सीनः। इडा॑या॒ इडा॑मा द॑धाति। ह॒स्त्या॑ ५ होत्रे॑। प॒शवो॑ वा इडा॑।  
 प॒शवः॑ पु॒रुषः॑। प॒शुष्वे॒व प॒शून्प्र॑ति॒ष्ठाप॑यति। इडा॑यै॒ वा ए॒षा प्र॑जा॒तिः॥५०॥

तां प्र॑जा॒तिं यज॑मा॒नोऽनु॑ प्र जा॑यते। द्वि॒रङ्गु॒लाव॑नक्ति॒ पर्व॑णोः। द्वि॒पाद्य॑ज॒मानः॑



प्रतिष्ठित्यै। स॒कृदुप॑ स्तृणाति। द्विरा द॑धाति। स॒कृद॒भि घा॑रयति। च॒तुः सम्प॑द्यते।  
च॒त्वारि॑ वै प॒शोः प्र॑तिष्ठानानि। यावा॑ने॒व प॒शुः। तमु॑प॒ह्वय॑ते॥५१॥

मुख॑मिव॒ प्रत्यु॑प॒ह्वये॑त। स॒म्मुखाने॑व प॒शूनु॑प॒ ह्वये॑त। प॒शवो॑ वा इडा॑। तस्मा॑त्सा-  
ऽन्वा॒रभ्या॑। अ॒ध्व॒र्युणां॑ च॒ यज॑मानेन च। उप॑हूतः पशु॒मान॑सानीत्या॒ह। उप॑ ह्ये॒नौ  
ह्वय॑ते होता॑। इडा॑यै दे॒वता॑नामुप॒ह्वे। उप॑हूतः पशु॒मान्भ॑वति। य ए॒वं वेद॑॥५२॥

यां वै ह॒स्त्या॒मिडा॑मा॒दधा॑ति। वा॒चः सा भा॑ग॒धेय॑म्। या॒मुप॑ह्वय॑ते। प्रा॒णाना॑ऽ  
सा। वाचं॑ चै॒व प्रा॒णाऽश्वा॑व॒ रुन्धे॑। अथ॒ वा ए॒तर्ह्यु॑प॒हृता॒या॒मिडा॑याम्। पु॒रोडा॑श॒स्यै॒व  
ब॑र्हि॒षदो॑ मीमा॒ऽसा। यज॑मानं दे॒वा अ॑ब्रुवन्। ह॒विर्नो॑ निर्व॒पेति॑। नाह॑म॒भागो॑  
निर्व॑प्स्यामीत्य॑ब्रवीत्॥५३॥

न मया॑ऽभा॒गया॑ऽनु॒वक्ष्य॑थेति॒ वाग॑ब्रवीत्। नाह॑म॒भागा॑ पु॒रोनु॒वाक्या॑ भविष्यामीति॑  
पु॒रोनु॒वाक्या॑। नाह॑म॒भागा॑ या॒ज्या भविष्यामीति॑ या॒ज्या। न मया॑ऽभा॒गेन॑  
वष॑ट्कारिष्य॒थेति॑ वषट्कारः। यद्य॑जमान॒भागं॑ नि॒धाय॑ पु॒रोडा॑शं ब॒र्हिष॑दं क॒रोति॑।

तानेव तद्वाग्निं करोति। चतुर्धा करोति। चतस्रो दिशः। दिक्ष्वेव प्रति तिष्ठति।  
बर्हिषदं करोति॥५४॥

यजमानो वै पुरोडाशः। प्रजा बर्हिः। यजमानमेव प्रजासु प्रतिष्ठापयति।  
तस्मादस्त्राऽन्याः प्रजाः प्रतितिष्ठन्ति। मा५सेनाऽन्याः। अथो खल्वाहुः। दक्षिणा  
वा एता हविर्यज्ञस्यान्तर्वेद्यव रुध्यन्ते। यत्पुरोडाशं बर्हिषदं करोतीति। चतुर्धा  
करोति। चत्वारो ह्येते हविर्यज्ञस्यर्त्विजः॥५५॥

ब्रह्मा होताऽध्वर्युरग्नीत्। तमग्निं मृशेत्। इदं ब्रह्मणः। इदं होतुः। इदमध्वर्योः।  
इदमग्नीध इति। यथैवादः सौम्यैऽध्वरे। आदेशमृत्विग्भ्यो दक्षिणा नीयन्ते। तादृगेव  
तत्। अग्नीधे प्रथमाया दधाति॥५६॥

अग्निमुखा हृद्धिः। अग्निमुखामेवर्द्धिं यजमान ऋध्नोति। सकृदुपस्तीर्य  
द्विरादधत्। उपस्तीर्य द्विरग्निं धारयति। षट्थसम्पद्यन्ते। षड्वा ऋतवः। ऋतून्नेव  
प्रीणाति। वेदेन ब्रह्मणं ब्रह्मभागं परिहरति। प्राजापत्यो वै वेदः। प्राजापत्यो  
ब्रह्मा॥५७॥

सविता यज्ञस्य प्रसूत्यै। अथ काममन्येन। ततो होत्रे। मध्यं वा एतद्यज्ञस्य।  
यद्धोता। मध्यत एव यज्ञं प्रीणाति। अथाध्वर्यवे। प्रतिष्ठा वा एषा यज्ञस्य। यदध्वर्युः।  
तस्माद्धविर्यज्ञस्यैतामेवाऽऽवृतमनु॥५८॥

अन्या दक्षिणा नीयन्ते। यज्ञस्य प्रतिष्ठित्यै। अग्निमग्नीथ्सकृत्सकृत्सं मृद्धीत्याह।  
पराङ्मिव ह्येतर्हि यज्ञः। इषिता दैव्या होतार इत्याह। इषितः हि कर्म क्रियते।  
भद्रवाच्याय प्रेषितो मानुषः सूक्तवाकाय सूक्ता ब्रूहीत्याह। आमेवैतामा शास्ते।  
स्वगा दैव्या होतृभ्य इत्याह। यज्ञमेव तत्स्वगा करोति। स्वस्तिर्मानुषेभ्य  
इत्याह। आमेवैतामा शास्ते। शं योर्ब्रूहीत्याह। शंयुमेव बार्हस्पत्यं भागधेयेन  
समर्धयति॥५९॥ चतुर्थध्वर्युः प्रजातिर्ह्ययते वेदांब्रवीद्वरहिषदं करोत्यृत्विजो दधाति ब्रह्माऽनुकरोति चत्वारि च॥—————[८]

अथ सूचावनुष्टुभ्यां वाजवतीभ्यां व्यूहति। प्रतिष्ठा वा अनुष्टुक्। अन्नं वाजः  
प्रतिष्ठित्यै। अन्नाद्यस्यावरुद्धौ। प्राचीं जुहूमूहति। जातानेव भ्रातृव्यान्प्रणुदते।  
प्रतीचीमुपभृतम्। जनिष्यमाणानेव प्रतिनुदते। सविषूच एवापोह्य सपत्नान्  
यजमानः। अस्मिँल्लोके प्रति तिष्ठति॥६०॥

द्वाभ्याम्। द्विप्रतिष्ठो हि। वसुभ्यस्त्वा रुद्रेभ्यस्त्वाऽऽदित्येभ्यस्त्वेत्याह।  
यथायजुरेवैतत्। सुक्षु प्रस्तरमनक्ति। इमे वै लोकाः सुचः। यजमानः प्रस्तरः।  
यजमानमेव तेजसाऽनक्ति। त्रेधाऽनक्ति। त्रयं इमे लोकाः॥६१॥

एभ्य एवैनं लोकेभ्योऽनक्ति। अभिपूर्वमनक्ति। अभिपूर्वमेव यजमानं तेजसा-  
ऽनक्ति। अक्तं रिहाणा इत्याह। तेजो वा आज्यम्। यजमानः प्रस्तरः।  
यजमानमेव तेजसाऽनक्ति। वियन्तु वय इत्याह। वयं एवैनं कृत्वा। सुवर्गं लोकं  
गमयति॥६२॥

प्रजां योनिं मा निर्मृक्षमित्याह। प्रजायै गोपीथाय। आप्यायन्तामाप ओषधय  
इत्याह। आप एवौषधीरा प्याययति। मरुतां पृषेतयः स्थेत्याह। मरुतो वै वृष्ट्या  
ईशते। वृष्टिमेवाव रुन्धे। दिवं गच्छ ततो नो वृष्टिमेरयेत्याह। वृष्टिर्वै द्यौः।  
वृष्टिमेवाव रुन्धे॥६३॥

यावद्वा अध्वर्युः प्रस्तरं प्रहरति। तावदस्यायुर्मियते। आयुष्पा अग्नेऽस्यायुर्मि

पाहीत्याह। आयुरेवाऽऽत्मन्धत्ते। यावद्वा अध्वर्युः प्रस्तरं प्रहरति। तावदस्य चक्षुर्मीयते। चक्षुष्पा अग्नेऽसि चक्षुर्म पाहीत्याह। चक्षुरेवाऽऽत्मन्धत्ते। ध्रुवाऽसीत्याह प्रतिष्ठित्यै। यं परिधिं पर्यधत्था इत्याह॥६४॥

यथायजुरेवैतत्। अग्ने देव पणिभिर्वीयमाण इत्याह। अग्रयं एवैनं जुष्टं करोति। तन्तं एतमनु जोषं भरामीत्याह। सजातानेवास्मा अनुकान्करोति। नेदेष त्वदपचेतयाता इत्याहानुख्यात्यै। यज्ञस्य पाथ उप समितमित्याह। भूमानमेवोपैति। परिधीन्प्र हरति। यज्ञस्य समिष्ट्यै॥६५॥

सुचौ सं प्रस्त्रावयति। यदेव तत्र क्रूरम्। तत्तेन शमयति। जुह्वामुपभृतम्। यजमानदेवत्या वै जुहूः। भ्रातृव्यदेवत्योपभृत्। यजमानायैव भ्रातृव्यमुपस्तिं करोति। सः स्रावभागाः स्थेत्याह। वसवो वै रुद्रा आदित्याः सः स्रावभागाः। तेषां तद्भागधेयम्॥६६॥

तानेव तेन प्रीणाति। वैश्वदेव्यर्चा। एते हि विश्वे देवाः। त्रिष्टुग्भवति। इन्द्रियं वै

त्रिष्टुक्। इन्द्रियमेव यजमाने दधाति। अग्नेर्वामपन्नगृहस्य सदसि सादयामीत्याह।  
इयं वा अग्निरपन्नगृहः। अस्या एवैने सदेने सादयति। सुम्नाय सुम्निनी सुम्ने मां  
धत्तमित्याह॥६७॥

प्रजा वै पशवः सुम्नम्। प्रजामेव पशूनात्मन्धत्ते। धुरि धुर्यौ पातमित्याह।  
जायापत्योर्गोपीथाय। अग्नेऽदध्यायोऽशीततनो इत्याह। यथायजुरेवैतत्।  
पाहि माऽद्य दिवः पाहि प्रसित्यै पाहि दुरिष्ठ्यै पाहि दुरद्वन्धे पाहि  
दुश्चरितादित्याह। आमेवैतामा शास्ते। अविषन्नः पितुं कृणु सुषदा  
योनिः॥ स्वाहेतीध्मसंवृश्चनान्यन्वाहार्यपचनेऽभ्याधाय फलीकरणहोमं जुहोति।  
अतिरिक्तानि वा इध्मसं वृश्चनानि॥६८॥

अतिरिक्ताः फलीकरणाः। अतिरिक्तमाज्योच्छेषणम्। अतिरिक्त एवातिरिक्तं  
दधाति। अथो अतिरिक्तेनैवातिरिक्तमात्वाऽव रुन्धे। वेदिर्देवेभ्यो निलायत। तां  
वेदेनान्वविन्दन्। वेदेन वेदिं विविदुः पृथिवीम्। सा पप्रथे पृथिवी पार्थिवानि। गर्भं

बिभर्ति भुवनेष्वन्तः। ततो यज्ञो जायते विश्वदानिरिति पुरस्तात्स्थम्बयजुषो वेदेन वेदिः सम्मार्ष्ट्यनुवित्यै॥६९॥

अथो यद्वेदश्च वेदिश्च भवतः। मिथुनत्वाय प्रजात्यै। प्रजापतेर्वा एतानि श्मश्रूणि। यद्वेदः। पत्न्या उपस्थ आस्यति। मिथुनमेव करोति। विन्दते प्रजाम्। वेदः होताऽऽहवनीयाऽस्तृणन्नेति। यज्ञमेव तत्सन्तनोत्योत्तरस्मादर्धमासात्। तत् सन्ततमुत्तरेऽर्धमास आलभते॥७०॥

तं कालेकाल आगते यजते। ब्रह्मवादिनो वदन्ति। स त्वा अध्वर्युः स्यात्। यो यतो यज्ञं प्रयुङ्के। तदेनं प्रतिष्ठापयतीति। वाताद्वा अध्वर्युर्यज्ञं प्रयुङ्के। देवा गातुविदो गातुं वित्वा गातुमितेत्याह। यत एव यज्ञं प्रयुङ्के। तदेनं प्रतिष्ठापयति। प्रति तिष्ठति प्रजयां पशुभिर्यजमानः॥७१॥

तिष्ठतीमे लोका गमयति द्यौर्वृष्टिमेवावं रुन्धे पर्यधत्वा इत्याहु समिष्टौ भागधेयं च तृमित्याहु वा इध्मसं वृश्चनान्यनुवित्यै लभते यजमानः॥

[९]

यो वा अयथादेवतं यज्ञमुपचरति। आ देवताभ्यो वृश्च्यते। पापीयान्भवति। यो यथादेवतम्। न देवताभ्य आवृश्च्यते। वसीयान्भवति। वारुणो वै पाशः।

इ॒मं वि॒ष्या॑मि॒ वरु॑णस्य॒ पाश॑मित्या॒ह। वरु॑ण॒पा॒शादे॒वैनां॑ मु॒ञ्चति॑। स॒वि॒तृप्र॑सूतो॒ यथा॑दे॒वत॑म्॥७२॥

न दे॒वता॑भ्य॒ आवृ॑श्च्यते। वसी॑यान्भवति। धा॒तुश्च॒ योनौ॑ सु॒कृत॑स्य॒ लोक॑ इत्या॒ह। अ॒ग्निर्वै॑ धा॒ता। पु॒ण्यं कर्म॑ सु॒कृत॑स्य॒ लोकः॑। अ॒ग्निरे॒वैनां॑ धा॒ता। पु॒ण्ये कर्म॑णि सु॒कृत॑स्य॒ लोके॑ द॒धाति॑। स्यो॒नं मे॑ स॒ह प॒त्या करो॑मीत्या॒ह। आ॒त्मन॑श्च॒ यज॑मानस्य॒ चाना॑त्यै स॒न्त्वाय॑। समा॒युषा॑ सं प्र॒जये॑त्या॒ह॥७३॥

आ॒मे॒वैता॑मा शा॒स्ते पूर्ण॑पात्रे। अ॒न्ततो॑ऽनु॒ष्टुभा॑। चतु॑ष्प॒द्वा ए॒तच्छ॑न्दः प्र॒ति॑ष्ठि॒तं प॒त्न्यै पूर्ण॑पात्रे भ॒वति॑। अ॒स्मिँल्लो॒के प्र॒ति ति॑ष्ठानीति॑। अ॒स्मिन्ने॒व लो॒के प्र॒ति ति॑ष्ठति। अथो॒ वाग्वा॑ अ॒नु॒ष्टुक्। वाङ्मि॑थुनम्। आपो॒ रेतः॑ प्र॒जर्न॑नम्। ए॒तस्मा॑द्वै मि॑थुनाद्विद्योत॑मानः स्त॒नय॑न्वर्षति। रेतः॑ सि॒ञ्चन्॥७४॥

प्र॒जाः प्र॑ज॒नय॑न्। यद्वै य॒ज्ञस्य॑ ब्रह्म॑णा यु॒ज्यते॑। ब्रह्म॑णा॒ वै तस्य॑ विमो॒कः। अ॒द्भिः शान्तिः॑। विमु॑क्तं वा ए॒तर्हि॑ यो॒क्त्रं ब्रह्म॑णा। आ॒दायै॑न॒त्पत्नी॑ स॒हाप॑ उपगृही॒ते शान्त्यै॑।



अञ्जलौ पूर्णपात्रमा नयति। रेतं एवास्यां प्रजां दधाति। प्रजया हि मनुष्यः पूर्णः।  
मुखं वि मृष्टे। अवभृथस्यैव रूपं कृत्वोत्तिष्ठति॥७५॥ सवितृप्रसूतो यथादेवतं प्रजयेत्याह मिश्रन्मृष्ट एकं च॥

[१०]

परिवेषो वा एष वनस्पतीनाम्। यदुपवेषः। य एवं वेद। विन्दते परिवेष्टारम्।  
तमुत्करे। यं देवा मनुष्येषु। उपवेषमधारयन्। ये अस्मदपं चेतसः। तानस्मभ्यमिहा  
कुरु। उपवेषोपं विद्धि नः॥७६॥

प्रजां पुष्टिमथो धनम्। द्विपदो नृश्चतुष्पदः। ध्रुवाननपगान्कुर्विति  
पुरस्तात्प्रत्यश्चमुपं गूहति। तस्मात्पुरस्तात्प्रत्यश्चः शूद्रा अवस्यन्ति। स्थविमत  
उपंगूहति। अप्रतिवादिन एवैनान्कुरुते। धृष्टिर्वा उपवेषः। शुचर्तो वज्रो ब्रह्मणा  
संशितः। योपवेषे शुक्। साऽमुमृच्छतु यं द्विष्म इति॥७७॥

अथास्मै नाम गृह्य प्रहरति। निरमुन्नुद ओकसः। सपत्नो यः पृतन्यति। निर्बाध्यैन  
हविषा। इन्द्र एणं पराशरीत्। इहि तिस्रः परावतः। इहि पञ्च जनाः अति। इहि  
तिस्रोऽति रोचनायावत्। सूर्यो असद्विवि। प्रमान्त्वा परावतम्॥७८॥

इन्द्रो नयतु वृत्रहा। यतो न पुनरायसि। शश्वतीभ्यः समाभ्य इति। त्रिवृद्वा  
 एष वज्रो ब्रह्मणा सशितः। शुचैवैनं विध्वा। एभ्यो लोकेभ्यो निर्णुद्य। वज्रेण  
 ब्रह्मणा स्तृणुते। हृतोऽसाववधिष्मामुमित्याह स्तृत्यै। यं द्विष्यात्तं ध्यायेत्।  
 शुचैवैनमर्पयति॥७९॥

प्रत्युष्टं दिवः शिल्पुमयंजो घृतं च देवासुराः स एतमिन्द्र आपो देवीरग्निना धिष्ण्या अथ सुचौ यो वा अयथादेवतं परिवेषो वा एकादश॥११॥  
 प्रत्युष्टमयंज एषा हि विश्वेषां देवानामूर्जा पृथिवीमथो रक्षन्तां प्रजातिं द्वाभ्यां तं कालेकाले नवससतिः॥७९॥  
 प्रत्युष्टमर्पयति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके तृतीयः प्रपाठकः समाप्तः॥

॥चतुर्थः प्रश्नः॥

॥तैत्तिरीयब्राह्मणे तृतीयाष्टके चतुर्थः प्रपाठकः॥

ब्रह्मणे ब्राह्मणमालभते। क्षत्राय राजन्यम्। मरुद्भ्यो वैश्यम्। तपसे शूद्रम्।  
तमसे तस्करम्। नारकाय वीरहणम्। पाप्मनै क्लीबम्। आक्रयायायोगम्। कामाय  
पुंश्चलम्। अतिक्रुष्टाय मागधम्॥१॥

गीताय सूतम्। नृत्ताय शैलूषम्। धर्माय सभाचरम्। नर्माय रेभम्। नरिष्ठायै  
भीमलम्। हसाय कारिम्। आनन्दाय स्त्रीषखम्। प्रमुदे कुमारीपुत्रम्। मेधायै  
रथकारम्। धैर्याय तक्षाणम्॥२॥

श्रमाय कौलालम्। मायायै कार्मारम्। रूपाय मणिकारम्। शुभे वपम्।  
शरव्याया इषुकारम्। हेत्यै धन्वकारम्। कर्मणे ज्याकारम्। दिष्टाय रज्जुसर्गम्।  
मृत्यवे मृगयुम्। अन्तकाय श्वनितम्॥३॥

सन्धये जारम्। गेहायोपपतिम्। निर्ऋत्यै परिवित्तम्। आर्त्यै परिविविदानम्।

अरा॑ध्यै दिधि॑षूप॒तिम्। प॒वित्रा॑य भि॒षज॑म्। प्र॒ज्ञाना॑य नक्ष॒त्रदर्श॑म्। निष्कृ॑त्यै  
पेश॑स्कारीम्। बला॑योप॒दाम्। वर्णा॑यानू॒रुध॑म्॥४॥

न॒दीभ्यः॑ पौञ्जि॑ष्टम्। ऋ॒क्षीका॑भ्यो नैषा॑दम्। पुरु॑ष॒व्याघ्रा॑य दु॒र्मद॑म्। प्र॒युञ्ज॒  
उन्म॑त्तम्। ग॒न्ध॒र्वा॒फ्स॒राभ्यो॑ ब्रा॒त्यम्। स॒र्पदे॒वज॒नेभ्यो॑ऽप्र॒तिप॑दम्। अवै॑भ्यः कि॒तव॑म्।  
इ॒र्यता॑या अ॒कित॑वम्। पि॒शा॒चेभ्यो॑ बि॒दल॑का॒रम्। या॒तु॒धानै॑भ्यः कण्ट॑कका॒रम्॥५॥

उ॒त्सा॒देभ्यः॑ कु॒ञ्जम्। प्र॒मुदे॑ वाम॒नम्। द्वा॒भ्यः स्रा॒मम्। स्व॒प्रा॒या॒न्धम्। अध॑र्मा॒य  
बधि॑रम्। सं॒ज्ञाना॑य स्मर॑कारीम्। प्र॒का॒मोद्या॑योप॒सद॑म्। आ॒शि॒क्षायै॑ प्र॒श्जि॒नम्।  
उ॒प॒शि॒क्षायै॑ अभि॒प्र॒श्जि॒नम्। म॒र्यादा॑यै प्र॒श्ज॒विवा॑कम्॥६॥

ऋ॒त्यै स्ते॒नहृ॑दयम्। वैर॑ह॒त्याय॑ पि॒शुन॑म्। वि॒वि॒त्यै क्ष॒त्तार॑म्। औप॑द्र॒ष्टाय॑  
सङ्ग॑ही॒तार॑म्। बला॑यानु॒चर॑म्। भू॒म्ने परि॑ष्क॒न्दम्। प्रि॒याय॑ प्रि॒यवा॑दि॒नम्। अरि॑ष्ट्या  
अश्व॑सा॒दम्। मेधा॑य वा॒सः प॒ल्पू॒लीम्। प्र॒का॒माय॑ रज॒यि॒त्रीम्॥७॥

भा॒यै दा॒र्वाहा॑रम्। प्र॒भा॒या आग्ने॑न्धम्। नाक॑स्य पृ॒ष्ठाया॑भिषे॒क्तार॑म्। ब्र॒ध्नस्य॑

विष्टपाय पात्रनिर्णेगम्। देवलोकाय पेशितारम्। मनुष्यलोकाय प्रकरितारम्।  
सर्वेभ्यो लोकेभ्य उपसेत्तारम्। अवर्त्यै वधायोपमन्थितारम्। सुवर्गाय लोकाय  
भागदुघम्। वर्षिष्ठाय नाकाय परिवेष्टारम्॥८॥

अर्मेभ्यो हस्तिपम्। जवायांश्वपम्। पुष्ट्यै गोपालम्। तेजसेऽजपालम्।  
वीर्यायाविपालम्। इरायै कीनाशम्। कीलालाय सुराकारम्। भद्राय गृहपम्।  
श्रेयसे वित्तधम्। अध्यक्षायानुक्षत्तारम्॥९॥

मन्यवेऽयस्तापम्। क्रोधाय निसरम्। शोकायाभिसरम्। उत्कूलविकूलाभ्यां  
त्रिस्थिनम्। योगाय योत्तारम्। क्षेमाय विमोत्तारम्। वपुषे मानस्कृतम्।  
शीलायाञ्जनीकारम्। निर्ऋत्यै कोशकारीम्। यमायासूम्॥१०॥

यम्यै यमसूम्। अथर्वभ्योऽवतोकां। संवत्सराय पर्यारिणीम्। परिवत्सराया-  
विजाताम्। इदावत्सरायापस्कद्वरीम्। इद्वत्सरायातीत्वरीम्। वत्सराय  
विजर्जराम्। संवत्सराय पलिक्रीम्। वनाय वनपम्। अन्यतोरण्याय दावपम्॥११॥

सरो॑भ्यो धै॒वरम्। वेश॑न्ताभ्यो दा॒शम्। उ॒प॒स्थाव॑रीभ्यो बै॒न्दम्। न॒ङ्गुला॑भ्यः  
 शौ॒ष्क॒लम्। पा॒र्याय॑ कै॒वर्तम्। अ॒वा॒र्याय॑ मा॒र्गा॒रम्। ती॒र्थेभ्य॑ आ॒न्दम्। विष॑मेभ्यो  
 मैना॒लम्। स्वने॑भ्यः पर्ण॑कम्। गुहा॑भ्यः किरा॑तम्। सानु॑भ्यो जम्भ॑कम्। पर्व॑तेभ्यः  
 किम्पू॑रुषम्॥१२॥

प्र॒ति॒श्रु॒त्का॒या ऋ॒तु॒लम्। घोषा॑य भ॒षम्। अन्ता॑य बहु॒वा॒दिनम्। अ॒न॒न्ताय॑ मू॒कम्।  
 मह॑से वीणा॒वा॒दम्। क्रोशा॑य तू॒णव॑ध्मम्। आ॒क्र॒न्दाय॑ दु॒न्दु॒भ्याघा॑तम्। अ॒वर॑स्प॒राय॑  
 शङ्ख॑ध्मम्। ऋ॒भु॒भ्यो॑जिनस॒न्धाय॑म्। सा॒ध्येभ्य॑श्चर्म॒म्णम्॥१३॥

बी॒भ॒ध्सायै॑ पौल्क॒सम्। भू॒त्यै जा॑गर॒णम्। अभू॑त्यै स्वप॒नम्। तुला॑यै वाणि॒जम्।  
 वर्णा॑य हि॒रण्य॑का॒रम्। विश्वे॑भ्यो दे॒वेभ्यः॑ सि॒ध्म॒लम्। प॒श्चाद्दोषा॑य ग्ला॒वम्। ऋ॒त्यै  
 जन॑वा॒दिनम्। व्यृ॒द्ध्या अप॑ग॒ल्भम्। स॒श॒राय॑ प्र॒च्छि॒दम्॥१४॥

हसा॑य पु॒श्च॒लूमा ल॑भते। वी॒णा॒वा॒दं ग॑ण॒कं गी॑ताय॑। याद॑से शा॒बु॒ल्याम्। न॒र्माय॑  
 भद्र॑व॒तीम्। तू॒णव॑ध्मं ग्रा॑म॒ण्यं पा॑णिसङ्घा॒तं नृ॑त्ताय॑। मोदा॑यानु॒क्रोश॑कम्। आ॒न॒न्दाय॑

तलवम्॥१५॥

अक्षराजाय कितवम्। कृताय सभाविनम्। त्रेताया आदिनवदर्शम्।  
 द्वापराय बहिः सदम्। कलये सभास्थाणुम्। दुष्कृताय चरकाचार्यम्। अध्वने  
 ब्रह्मचारिणम्। पिशाचेभ्यः सैलगम्। पिपासायै गोव्यच्छम्। निर्ऋत्यै गोघातम्।  
 क्षुधे गौविकर्तम्। क्षुत्तृष्णाभ्यान्तम्। यो गां विकृन्तन्तं मांसं भिक्षमाण  
 उपतिष्ठते॥१६॥

भूम्यै पीठसर्पिणमा लभते। अग्नयेऽंसलम्। वायवे चाण्डालम्। अन्तरिक्षाय  
 वंशनर्तिनम्। दिवे खलतिम्। सूर्याय हर्यक्षम्। चन्द्रमसे मिर्मिरम्। नक्षत्रेभ्यः  
 किलासम्। अह्ने शुक्लं पिङ्गलम्। रात्रियै कृष्णं पिङ्गाक्षम्॥१७॥

वाचे पुरुषमा लभते। प्राणमपानं व्यानमुदानं संमानं तान् वायवै। सूर्याय  
 चक्षुरा लभते। मनश्चन्द्रमसे। दिग्भ्यः श्रोत्रम्। प्रजापतये पुरुषम्॥१८॥

अथैतानरूपेभ्य आलभते। अतिह्रस्वमतिदीर्घम्। अतिकृशमत्यंसलम्।

अतिशुक्लमतिकृष्णम्। अतिश्लक्ष्णमतिलोमशम्। अतिकिरिटमतिदन्तुरम्।  
अतिमिर्मिरमतिमेमिषम्। आशायै जामिम्। प्रतीक्षायै कुमारीम्॥१९॥

ब्रह्मणे गीताय श्रमाय सन्धये नदीभ्यं उध्सादेभ्य ऋत्यै भाया अमैभ्यो मन्यवे यम्यै दशदश सर्गैभ्यो द्वादश प्रतिश्रुत्कायै बीभृत्सायै दशदश हसाय  
सुसाक्षराजाय त्रयोदश भूम्यै दश वाचे षडथ नवैकान्नविंशतिः॥१९॥

ब्रह्मणे यम्यै नवदश॥१९॥

ब्रह्मणे कुमारीम्॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके चतुर्थः प्रपाठकः समाप्तः॥



॥ पञ्चमः प्रश्नः ॥

॥ तैत्तिरीयब्राह्मणे तृतीयाष्टके पञ्चमः प्रपाठकः ॥

स॒त्यं प्रप॑द्ये। ऋ॒तं प्रप॑द्ये। अ॒मृतं प्रप॑द्ये। प्र॒जाप॑तेः प्रि॒यां त॒नुव॑मना॒र्तां प्रप॑द्ये।  
 इ॒दम॑हं प॑ञ्चद॒शेन॑ वज्रेण। द्विष॑न्तं भ्रात॑र्य॒मव॑ क्रामामि। योऽ॒स्मान्द्वेष्टि॑। यं च॑ व॒यं  
 द्विष्मः॑। भूर्भुवः॑ सु॒वः। हिम्॥१॥ सत्यं दशं॥ [१]

प्र वो॑ वाजा॑ अ॒भिद्य॑वः। ह॒विष्म॑न्तो घृ॒ताच्य॑। दे॒वाञ्जि॑गाति सु॒म्रयुः॑। अ॒ग्न आया॑हि  
 वी॒तये॑। गृ॒णानो॑ ह॒व्यदा॑तये। नि होता॑ स॒त्सि ब॒र्हिषि॑। तं त्वा॑ स॒मिद्धि॑रङ्गि॒रः।  
 घृ॒तेन॑ वर्धयामसि। बृ॒हच्छो॑चा यविष्य। स नः॑ पृथुः श्र॒वाय्य॑म्॥२॥

अच्छा॑ देव वि॒वास॑सि। बृ॒हद॑ग्ने सु॒वीर्य॑म्। ई॒डेन्यो॑ नम॒स्यस्ति॑रः। तमा॑सि  
 द॒र्शतः॑। स॒मग्नि॑रि॒ध्यते॑ वृषा॑। वृषो॑ अ॒ग्निः स॒मिध्य॑ते। अ॒श्वो न दे॑व॒वाहनः॑। त॑  
 ह॒विष्म॑न्त ईडते। वृष॑णं त्वा व॒यं वृष॑न्। वृषा॑णः स॒मिधी॑महि॥३॥

अ॒ग्ने दी॑द्यतं बृ॒हत्। अ॒ग्निं द॒त्तं वृ॑णीमहे। होता॑रं वि॒श्ववे॑दसम्। अ॒स्य य॒ज्ञस्य॑

सुक्रतुम्। समिध्यमानो अध्वरे। अग्निः पावक ईड्यः। शोचिष्केशस्तमीमहे।  
 समिद्धो अग्न आहुत। देवान् यक्षि स्वध्वर। त्वं हि हव्यवाडसि। आ जुहोत  
 दुवस्यत। अग्निं प्रयत्यध्वरे। वृणीध्वं हव्यवाहनम्। त्वं वरुण उत मित्रो अग्ने।  
 त्वां वर्धन्ति मतिभिर्वसिष्ठाः। त्वे वसु सुषणनानि सन्तु। यूयं पात स्वस्तिभिः  
 सदा नः॥४॥ श्रुवाय्यमिधिमहसि सप्त च॥

[२]

अग्ने महां असि ब्राह्मण भारत। असावसौ। देवेद्धो मन्विद्धः।  
 ऋषिष्टुतो विप्रानुमदितः। कविशस्तो ब्रह्मसंशितो घृताहवनः। प्रणीर्यज्ञानाम्।  
 रथीरध्वराणाम्। अतूर्तो होता। तूर्णिरहव्यवाद्। आस्पात्रं जुहूर्देवानाम्॥५॥

चमसो देवपानः। अरां इवाग्ने नेमिर्देवांस्त्वं परिभूरसि। आ वह देवान्  
 यजमानाय। अग्निमग्न आवह। सोममावह। अग्निमावह। प्रजापतिमावह।  
 अग्नीषोमावावह। इन्द्राग्नी आवह। इन्द्रमावह। महेन्द्रमावह। देवां औज्यपां  
 आवह। अग्निं होत्रायाऽऽवह। स्वं महिमानमावह। आ चाग्ने देवान् वह।  
 सुयजा च यज जातवेदः॥६॥ देवानामिन्द्रमा वह पद च॥

[३]

अ॒ग्निर्हो॒ता वे॒त्व॒ग्निः। हो॒त्रं वै॑त्तु प्रा॒वि॒त्रम्। स्मो व॒यम्। सा॒धु ते॑ यज॒मान॑ दे॒वता॑।  
घृ॒तव॑तीम॒ध्वर्यो॑ स्तु॒चमा॑स्य॒स्व। दे॒वायु॑वं वि॒श्ववा॑राम्। ई॒डांम॑है दे॒वाः ई॒डे॒न्यान्।  
न॒म॒स्याम॑ नम॒स्यान्। यजा॑म य॒ज्ञिया॑न्॥ ७ ॥ अ॒ग्निर्हो॒ता नव॑॥ ————— [४]

स॒मिधो॑ अ॒ग्र आ॒ज्य॑स्य वि॒यन्तु। तनू॑नपा॒दग्र॒ आ॒ज्य॑स्य वेतु। इ॒डो अ॑ग्र  
आ॒ज्य॑स्य वि॒यन्तु। ब॒र्हि॒र॑ग्र आ॒ज्य॑स्य वेतु। स्वाहा॒ऽग्निम्। स्वाहा॒ सोम॑म्। स्वाहा॒  
ऽग्निम्। स्वाहा॑ प्र॒जाप॑तिम्। स्वाहा॒ऽग्नी॒षोमौ॑। स्वाहे॑न्द्रा॒ग्नी। स्वाहे॑न्द्रम्। स्वाहा॑  
महे॑न्द्रम्। स्वाहा॑ दे॒वाः आ॑ज्य॒पान्। स्वाहा॒ऽग्निः हो॒त्राञ्जु॑षा॒णाः। अ॒ग्र आ॒ज्य॑स्य  
वि॒यन्तु॥ ८ ॥ इन्द्रा॒ग्नी प॑ञ्च॒ च॥ ————— [५]

अ॒ग्निर्वृ॑त्राणि॑ जङ्घ॒नत्। द्र॒वि॒ण॒स्युर्वि॑प॒न्यया॑। स॒मि॒द्धः शु॒क्र आ॑हु॒तः। जु॒षा॒णो  
अ॒ग्निरा॑ज्य॒स्य वेतु॑। त्व॑ सो॒मासि॑ स॒त्प॑तिः। त्व॑ रा॒जो॒त वृ॑त्र॒हा। त्वं भ॒द्रो अ॑सि॒  
क्र॑तुः। जु॒षा॒णः सोम॑ आ॒ज्य॑स्य ह॒विषो॑ वेतु। अ॒ग्निः प्र॒त्ने॒न ज॑न्म॒ना। शु॒म्भान॑स्त॒नुव॑ः  
स्वाम्। क॒विर्वि॑प्रे॒ण वावृ॑धे। जु॒षा॒णो अ॒ग्निरा॑ज्य॒स्य वेतु॑। सोम॑ गी॒र्भि॒ष्ट्वा व॑यम्।

व॒र्धया॑मो वचो॒विदः॑। सु॒मृ॒डी॒को न॒ आवि॑श। जु॒षा॒णः सोम॒ आज्य॑स्य ह॒विषो॑  
वेतु॥१॥ स्वा॑ प॒द च॑॥ \_\_\_\_\_[६]

अ॒ग्नि॒र्मूर्धा॑ दि॒वः क॒कुत्। पतिः॑ पृथि॒व्या अ॒यम्। अ॒पा॑ रेता॑सि जिन्वति।  
भुवो॑ य॒ज्ञस्य॒ रज॑सश्च ने॒ता। यत्रा॑ नि॒युद्धिः॑ सच॑से शि॒वाभिः॑। दि॒वि मूर्धा॑नं दधिषे  
सुव॑र॒षाम्। जि॒ह्वा॒मग्ने॑ चकृषे ह॒व्य॒वाह॑म्। प्रजा॑पते॒ न त्वदे॑तान्य॒न्यः। वि॒श्वा जा॒तानि॑  
परि॒ ता ब॑भूव। यत्का॑मास्ते जहु॒मस्तं॑ नो अस्तु॥१०॥

व॒यः स्या॑म॒ पत॑यो रयी॒णाम्। स वे॑द पु॒त्रः पि॒तर॑ स मा॒तरम्॑। स सूनु॑र्भुव॒थ्स  
भुव॑त्पुन॑र्मघः। स द्यामौ॒र्णो॑दन्तरि॒क्षः स सु॑वः। स वि॒श्वा भुवो॑ अभव॒थ्स आ॑भवत्।  
अ॒ग्नी॒षोमा॑ सवे॑दसा। सह॑ती वनत॒ङ्गिरः॑। सन्दे॑व॒त्रा ब॑भूवथुः। यु॒वमे॒तानि॑ दि॒वि  
रोच॑नानि। अ॒ग्निश्च॑ सोम॒ सक्र॑तू अध॒त्तम्॥११॥

यु॒वः सि॒न्धूः र॒भि॒शस्ते॑रव॒द्यात्। अ॒ग्नी॒षोमा॑वमु॒ञ्चतं॑ गृभी॒तान्। इन्द्रा॑ग्नी रोच॒ना  
दि॒वः। परि॒ वाजे॑षु भूषथः। तद्वा॑ञ्चेति॒ प्रवी॑र्यम्। श्जथ॑द्वृ॒त्रमु॑त संनोति॒ वाजम्॑।

इन्द्रा यो अग्नी सहुरी सपर्यात्। इरज्यन्तां वसव्यस्य भूरैः। सहस्तमा सहसा वाजयन्ता। एन्द्रं सानसि९ रयिम्॥१२॥

सजित्वान९ सदासहम्। वर्षिष्ठमृतये भर। प्रससाहिषे पुरुहूत शत्रून्। ज्येष्ठस्ते शुष्मं इह रातिरस्तु। इन्द्रा भर दक्षिणेना वसूनि। पतिः सिन्धूनामसि रेवतीनाम्। महा९ इन्द्रो य ओजसा। पर्जन्यो वृष्टिमा९ इवा। स्तोमैर्वथ्सस्य वावृधे। महा९ इन्द्रो नृवदाचर्षणिप्राः॥१३॥

उत द्विबर्हा अमिनः सहोभिः। अस्मद्रियग्वावृधे वीर्याय। उरुः पृथुः सुकृतः कर्तृभिर्भूत्। पिप्रीहि देवा९ उशतो यविष्ठ। विद्वा९ ऋतू९ र्ऋतुपते यजेह। ये दैव्या ऋत्विजस्तेभिरग्ने। त्व९ होतृणामस्यायजिष्ठः। अग्निः९ स्विष्टकृतम्। अयाङ्गिरग्नेः प्रिया धामानि। अयाट्थ्सोमस्य प्रिया धामानि॥१४॥

अयाङ्ग्रेः प्रिया धामानि। अयाद्वजापतेः प्रिया धामानि। अयाङ्ग्रीषोमयोः प्रिया धामानि। अयाङ्दिन्द्राग्नियोः प्रिया धामानि। अयाङ्दिन्द्रस्य प्रिया धामानि।

अया॑ण्महेन्द्रस्य॑ प्रि॒या धामा॑नि। अया॑ङ्गैवाना॑माज्य॒पाना॑ प्रि॒या धामा॑नि।  
 यक्ष॑दग्नेर्होतुः॑ प्रि॒या धामा॑नि। यक्ष॑ध्वं म॑हि॒मानम्। आय॑जता॒मेज्या॒ इषः॑।  
 कृ॒णोतु॒ सो अ॑ध्व॒रा जा॒तवे॑दाः। जुष॑ता॒ ह॒विः। अग्ने॒ यद॒द्य वि॒शो अ॑ध्वरस्य  
 होतः॑। पाव॑क शोचे॒ वेष्ट्व॑ हि यज्वा॑। ऋ॒ता य॑जासि म॒हिना॑ वियद्भूः। ह॒व्या व॑ह  
 यविष्ठ॒ या ते॑ अ॒द्य॥१५॥ अ॒स्त्वध॑त्त॒ रयि॑ च॒रषणि॑प्राः सोम॑स्य प्रि॒या धामा॑नीषः प॒द्व॥ [७]

उप॑हूत॒ रथ॑न्त॒र स॒ह पृ॑थि॒व्या। उप॑ मा रथ॑न्त॒र स॒ह पृ॑थि॒व्या ह॑यताम्।  
 उप॑हूतं वामदे॒व्य स॒हान्तरि॑क्षेण। उप॑ मा वामदे॒व्य स॒हान्तरि॑क्षेण ह॑यताम्।  
 उप॑हूतं बृ॒हत्स॒ह दि॒वा। उप॑ मा बृ॒हत्स॒ह दि॒वा ह॑यताम्। उप॑हूताः स॒प्त हो॒त्राः।  
 उप॑ मा स॒प्त हो॒त्रा ह॑यन्ताम्। उप॑हूता धे॒नुः स॒हर्ष॑भा। उप॑ मा धे॒नुः स॒हर्ष॑भा  
 ह॑यताम्॥१६॥

उप॑हूतो भ॒क्षः स॒खा। उप॑ मा भ॒क्षः स॒खा ह॑यताम्। उप॑हूताँ(४)हो। इडोप॑हूता।  
 उप॑हूतेडाँ। उपो॑ अ॒स्मा इडाँ ह॑यताम्। इडोप॑हूता। उप॑हूतेडाँ। मा॒न॒वी घृ॒तप॑दी  
 मैत्रा॑वरु॒णी। ब्र॒ह्म दे॒वकृ॑तमुप॑हूतम्॥१७॥

दैव्या॑ अध्व॒र्यव॑ उ॒पंहू॑ताः। उ॒पंहू॑ता मनु॒ष्याः॑। य इ॒मं य॒ज्ञम॑वान्। ये य॒ज्ञप॑तिं  
व॒र्धान्। उ॒पंहू॑ते द्यावा॑पृथि॒वी। पू॒र्वजे॑ ऋ॒ताव॑री। दे॒वी दे॒वपु॑त्रे। उ॒पंहू॑तोऽयं यज॑मानः।  
उत्त॑रस्या॒न्देव॑य॒ज्याया॑मु॒पंहू॑तः। भूय॑सि हवि॒ष्कर॑ण॒ उ॒पंहू॑तः। दि॒व्ये धाम॑न्नु॒पंहू॑तः।  
इ॒दं मे॑ दे॒वा ह॒विर्जु॑षन्ता॒मिति॑ तस्मि॒न्नु॒पंहू॑तः। वि॒श्वम॑स्य प्रि॒यमु॒पंहू॑तम्। वि॒श्वस्य॑  
प्रि॒यस्यो॒पंहू॑त॒स्यो॒पंहू॑तः॥१८॥ स॒हर॑ष॒भा ह॒यता॑मु॒पंहू॑तः॑ ह॒विष्कर॑ण॒ उ॒पंहू॑तश्च॒त्वारि॑ च॥ [८]

दे॒वं ब॒र्हिः। व॒सुव॑ने॒ वसु॑धेय॑स्य वेतु। दे॒वो नरा॑श॒सः। व॒सुव॑ने॒ वसु॑धेय॑स्य  
वेतु। दे॒वो अ॒ग्निः स्वि॑ष्ट॒कृत्। सु॒द्रवि॑णा म॒न्द्रः क॒विः। स॒त्यम॑न्माय॒जी होता॑।  
होतु॑र्होतु॒राय॑जीयान्। अ॒ग्ने या॒न्दे॒वान॑या॒ट्। या॑ अ॒पि॒प्रेः। ये ते॑ हो॒त्रे अ॑म॒थ्स॑त।  
ता॑ स॒स॒नुषी॑ हो॒त्रा॒न्दे॒वङ्ग॑माम्। दि॒वि दे॒वेषु॑ य॒ज्ञमे॑र॒येम॑म्। स्वि॒ष्ट॒कृच्चा॑ग्ने होता॒-  
ऽभूः॑। व॒सुव॑ने॒ वसु॑धेय॑स्य नमोवा॒के वी॑हि॥१९॥ अ॒पि॒प्रेः प॒ञ्च च॥ [९]

इ॒दं द्या॑वापृथि॒वी भ॒द्रम॑भूत्। आ॒र्धं सू॑क्तवा॒कम्। उ॒त न॑मोवा॒कम्। ऋ॒ध्यास्म॑  
सू॒क्तोच्य॑म॒ग्ने। त्व॑ सू॒क्तवा॑ग॒सि। उ॒प॒श्रि॒तो दि॒वः पृ॑थि॒व्योः। ओम॑न्वती तेऽस्मिन्

य॒ज्ञे य॑ज॒मान् द्या॑वा॒पृथि॒वी स्ता॑म्। श॒ङ्ग॒ये जी॒रदा॑न्। अ॒त्र॒सू अ॒प्र॒वेदे। उ॒रुग॑व्यूती  
अ॒भयं॑ कृ॒तौ॥२०॥

वृ॒ष्टि॒द्या॒वा री॒त्या॒पा। श॒म्भु॒वौ म॒यो॒भु॒वौ। ऊ॒र्ज॑स्वती च॒ प॒य॑स्वती च। सू॒प॒च॒र॒णा  
च॑ स्व॒धि॒च॒र॒णा च॑। तयो॑रा॒विदि॑। अ॒ग्निरि॒दꣳ ह॒विर॑जुषत। अ॒वी॒वृ॒धत् महो॑  
ज्यायो॑ऽकृत। सोमं॑ इ॒दꣳ ह॒विर॑जुषत। अ॒वी॒वृ॒धत् महो॑ ज्यायो॑ऽकृत। अ॒ग्निरि॒दꣳ  
ह॒विर॑जुषत॥२१॥

अ॒वी॒वृ॒धत् महो॑ ज्यायो॑ऽकृत। प्र॒जाप॑तिरि॒दꣳ ह॒विर॑जुषत। अ॒वी॒वृ॒धत् महो॑  
ज्यायो॑ऽकृत। अ॒ग्नी॒षोमा॑वि॒दꣳ ह॒विर॑जुषेताम्। अ॒वी॒वृ॒धेतां॑ महो॑ ज्यायो॑ऽक्राताम्।  
इ॒न्द्रा॒ग्नी इ॒दꣳ ह॒विर॑जुषेताम्। अ॒वी॒वृ॒धेतां॑ महो॑ ज्यायो॑ऽक्राताम्। इ॒न्द्र इ॒दꣳ  
ह॒विर॑जुषत। अ॒वी॒वृ॒धत् महो॑ ज्यायो॑ऽकृत। म॒हे॒न्द्र इ॒दꣳ ह॒विर॑जुषत॥२२॥

अ॒वी॒वृ॒धत् महो॑ ज्यायो॑ऽकृत। दे॒वा आ॑ज्य॒पा आ॑ज्यम॒जुष॑न्त। अ॒वी॒वृ॒धन्त॑  
महो॑ ज्यायो॑ऽकृत। अ॒ग्नि॒र्हो॒त्रेणे॒दꣳ ह॒विर॑जुषत। अ॒वी॒वृ॒धत् महो॑ ज्यायो॑ऽकृत।



अस्यामृद्धोत्रायान्देवङ्गमायाम्। आशास्तेऽयं यजमानोऽसौ। आयुरा शास्ते।  
सुप्रजास्त्वमा शास्ते। सजातवनस्यामा शास्ते॥२३॥

उत्तरान्देवयज्यामा शास्ते। भूयो हविष्करणमा शास्ते। दिव्यं धामा शास्ते।  
विश्वं प्रियमा शास्ते। यदनेन हविषाऽऽशास्ते। तदश्यात्तदृध्यात्। तदस्मै देवा  
रासन्ताम्। तदग्निर्देवो देवेभ्यो वनते। वयमग्नेर्मानुषाः। इष्टं च वीतं च। उभे च  
नो द्यावापृथिवी अहंसस्पाताम्। इह गतिर्वामस्येदं च। नमो देवेभ्यः॥२४॥ अभ्यं  
कृतावकृताग्निर्द० हविरंजुपत महेन्द्र इद० हविरंजुपत सजातवनस्यामा शास्ते वीतं च त्रीणि च॥ [१०]

तच्छं योरावृणीमहे। गातुं यज्ञाय। गातुं यज्ञपतये। दैवीं स्वस्तिरस्तु नः।  
स्वस्तिर्मानुषेभ्यः। ऊर्ध्वं जिगातु भेषजम्। शं नो अस्तु द्विपदे। शं चतुष्पदे॥२५॥ तच्छं  
योरो॥ [११]

आप्यायस्व सन्ते। इह त्वष्टारमग्रियं तन्नस्तुरीपम्। देवानां पत्नीरुशतीरवन्तु  
नः। प्रावन्तु नस्तुजये वाजसातये। याः पार्थिवासो या अपामपि व्रते। ता नो  
देवीः सुहवाः शर्म यच्छता। उत गा विंयन्तु देवपत्नीः। इन्द्राण्यग्राय्यश्विनी राट्।

आ रोद॑सी वरुणा॑नी शृ॑णोतु। वि॒यन्तु॑ दे॒वीर्य॑ ऋ॒तुर्जनी॑नाम्॥२६॥

अ॒ग्निर्होता॑ गृ॒हप॑तिः स राजा॑। वि॒श्वा वेद॑ जनि॑मा जा॒तवे॑दाः। दे॒वाना॑मु॒त  
यो म॒र्त्याना॑म्। यजि॑ष्ठः स प्र य॑जतामृ॒तावा॑। व॒यमु॑ त्वा गृ॒हप॑ते जना॑नाम्। अ॒ग्ने  
अक॑र्म स॒मिधा॑ बृ॒हन्त॑म्। अ॒स्थूरि॑ णो॒ गार्ह॑पत्यानि सन्तु। ति॒ग्मेन॑ न॒स्तेज॑सा  
स॒ शि॑शाधि॥२७॥ जनी॑नामृ॒ष्टौ च॑॥

[१२]

उप॑हूत॒ रथ॑न्त॒रः स॒ह पृ॑थि॒व्या। उप॑ मा रथ॑न्त॒रः स॒ह पृ॑थि॒व्या ह॑यताम्।  
उप॑हूतं वाम॑दे॒व्यः स॒हान्तरि॑क्षेण। उप॑ मा वाम॑दे॒व्यः स॒हान्तरि॑क्षेण ह॑यताम्।  
उप॑हूतं बृ॒हत्स॒ह दि॒वा। उप॑ मा बृ॒हत्स॒ह दि॒वा ह॑यताम्। उप॑हूताः स॒प्त हो॑त्राः।  
उप॑ मा स॒प्त हो॑त्रा ह॑यन्ताम्। उप॑हूता धे॒नुः स॒हर्ष॑भा। उप॑ मा धे॒नुः स॒हर्ष॑भा  
ह॑यताम्॥२८॥

उप॑हूतो भ॒क्षः स॒खा। उप॑ मा भ॒क्षः स॒खा ह॑यताम्। उप॑हूताँ(४)हो। इडोप॑हूता।  
उप॑हूतेडा॑। उपो॑ अ॒स्माः इडा॑ ह॑यताम्। इडोप॑हूता। उप॑हूतेडा॑। मा॒न॒वी घृ॑तप॑दी  
मै॒त्रावरु॑णी। ब्रह्म॑ दे॒वकृ॑तमुप॑हूतम्॥२९॥

दैव्या॑ अध्व॒र्यव॒ उप॑हूताः। उप॑हूता मनु॒ष्याः॑। य इ॒मं यु॒ज्ञम॑वान्।  
 ये यु॒ज्ञप॑त्नीं॒ वर्धा॑न्। उप॑हूते द्यावा॑पृथि॒वी। पूर्व॑जे ऋ॒ताव॑री। दे॒वी  
 दे॒वपु॑त्रे। उप॑हूते॒यं यज॑माना। इन्द्रा॑णीवा॒ऽविध॑वा। अदि॑तिरिव सु॒पुत्रा॑।  
 उत्त॑रस्यान्दे॒वय॒ज्याया॒मुप॑हूता। भूय॑सि ह॒विष्कर॑ण॒ उप॑हूता। दि॒व्ये धाम॑न्नुप॑हूता।  
 इ॒दं मे॑ दे॒वा ह॒विर्जु॑षन्ता॒मिति॑ तस्मि॒न्नुप॑हूता। वि॒श्वम॑स्याः प्रि॒यमुप॑हूतम्। वि॒श्वस्य॑  
 प्रि॒यस्योप॑हूत॒स्योप॑हूता॥ ३० ॥ स॒हर्ष॑भा ह्वयतामुप॑हूत\* सु॒पुत्रा॑ षट्॥ [१३]

सुत्यं प्रबोऽग्नें महानग्निर्होता समिधोऽग्निरवृत्रायन्निर्मूर्धोपहूतं देवं बर्हिरिदं द्यावापृथिवी तच्छुं योरा प्यायस्वोपहूतन्नयोदश॥१३॥  
 सुत्यं वयं स्याम वृष्टिर्द्यावा त्रिंशत्॥३०॥  
 सुत्यमुपहूता॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके पञ्चमः प्रपाठकः समाप्तः॥

॥ षष्ठमः प्रश्नः ॥

॥ तैत्तिरीयब्राह्मणे तृतीयाष्टके षष्ठः प्रपाठकः ॥

अ॒ञ्जन्ति॒ त्वाम॑ध्व॒रे दे॒व॒यन्तः॑। वन॑स्पते॒ मधु॑ना॒ दैव्ये॑न। यद॑र्ध्वस्ति॑ष्ठा॒द्रवि॑णे॒ह  
ध॑त्तात्। यद्वा॒ क्षयो॑ मा॒तुर॒स्या उ॒पस्थे॑। उच्छ्र॑यस्व वनस्पते। वर्ष्म॑न्पृथि॒व्या अधि॑।  
सुमि॑ती मी॒यमा॑नः। वर्चो॑धा य॒ज्ञवा॑हसे। समि॑द्धस्य॒ श्रय॑माणः पुरस्ता॑त्। ब्रह्म॑  
वन्वा॒नो अ॒जर॑ꣳ सु॒वीर॑म्॥१॥

आ॒रे अ॒स्मद॑म॒तिं बा॑ध॒मानः॑। उच्छ्र॑यस्व मह॒ते सौभ॑गाय। ऊ॒र्ध्व ऊ॒ षु णं ऊ॒तये॑।  
तिष्ठा॑ दे॒वो न स॑वि॒ता। ऊ॒र्ध्वो वाज॑स्य॒ सनि॑ता॒ यद॑ञ्जिभिः। वा॒घद्वि॑र्वि॒ह्वया॑महे।  
ऊ॒र्ध्वो नः॑ पा॒ह्यꣳह॑सो॒ नि के॑तुना॑। वि॒श्वꣳ स॑म॒त्रिणं॑ दह। कृ॒धी न॑ ऊ॒र्ध्वा च॒ रथा॑य  
जी॒वसे॑। वि॒दा दे॒वेषु॑ नो॒ दुवः॑॥२॥

जा॒तो जा॑यते सुदि॒न॒त्वे अ॒ह्ना॑म्। स॒म॒र्य आ वि॒दथे॑ वर्ध॒मानः॑। पु॒नन्ति॒ धीरा॑  
अ॒पसो॑ मनी॒षा। दे॒व॒या विप्र॒ उदि॑यति॒ वाच॑म्। युवा॑ सुवासाः॒ परि॑वीत॒ आगा॑त्।

स उ श्रेयाँभवति जायमानः। तं धीरांसः कवय उन्नयन्ति। स्वाधियो मनसा  
 देवयन्तः। पृथुपाजा अमर्त्यः। घृतनिर्णिख्स्वाहुतः। अग्निर्यज्ञस्य हव्यवाट्। तं  
 सुबाधो यतः सुचः। इत्था धिया यज्ञवन्तः। आचक्रुरग्निमूतयै। त्वं वरुण उत  
 मित्रो अग्ने। त्वां वर्धन्ति मतिभिर्वसिष्ठाः। त्वे वसु सुषणनानि सन्तु। यूयं पात  
 स्वस्तिभिः सदा नः॥३॥ सुवीरुं दवः स्वाहुतोऽष्टौ च॥ [१]

होता यक्षदग्निः समिधा सुषमिधा समिद्धं नाभां पृथिव्याः सङ्गथे वामस्य।  
 वर्ष्मन्दिव इडस्पदे वेत्वाऽऽज्यस्य होतर्यजं। होता यक्षत्तनूनपातमदितेर्गर्भं  
 भुवनस्य गोपाम्। मध्वाद्य देवो देवेभ्यो देवयानान्पथो अनक्तु वेत्वाऽऽज्यस्य  
 होतर्यजं। होता यक्षन्नराशंसं नृशस्त्रं नृङ्गः प्रणेत्रम्। गोभिर्वपावान्धस्याद्वीरैः  
 शक्तीवान्नथैः प्रथमया वा हिरण्यैश्चन्द्री वेत्वाऽऽज्यस्य होतर्यजं। होता  
 यक्षदग्निमिड ईडितो देवो देवाः आवक्षद्दूतो हव्यवाडमूरः। उपेमं यज्ञमुपेमां  
 देवो देवहूतिमवतु वेत्वाऽऽज्यस्य होतर्यजं। होता यक्षद्वरुहिः सुष्टरीमोर्णम्रदा

अस्मिन् यज्ञे वि च प्र च प्रथताऽस्वास्थ्यं देवेभ्यः। एमैनद्य वसवो रुद्रा  
आदित्याः सन्दन्तु प्रियमिन्द्रस्यास्तु वेत्वाऽऽज्यस्य होतर्यजं॥४॥

होता यक्षदुरं ऋष्याः कवृष्यो कौषधावनीरुदाताभीर्जिहतां विपक्षौभिः  
श्रयन्ताम्। सुप्रायणा अस्मिन् यज्ञे विश्रयन्तामृतावृधो वियन्त्वाज्यस्य होतर्यजं।  
होता यक्षदुषासानक्ता बृहती सुपेशसा नृः पतिभ्यो योनिं कृण्वाने।  
सऽस्मयमाने इन्द्रेण देवैरेदं बर्हिः सीदतां वीतामाज्यस्य होतर्यजं। होता  
यक्षद्वैव्या होतारा मन्द्रा पोतारा कवी प्रचेतसा। स्विष्टमृद्यान्यः करदिषा  
स्वभिगूर्तमन्य ऊर्जा सतवसेमं यज्ञं दिवि देवेषु धत्तां वीतामाज्यस्य होतर्यजं।  
होता यक्षत्तिस्त्रो देवीरपसामपस्तमा अच्छिद्रमद्येदमपस्तन्वताम्। देवेभ्यो  
देवीर्देवमपो वियन्त्वाज्यस्य होतर्यजं। होता यक्षत्त्वष्टारमचिष्टुमपाकं रेतोधां  
विश्रवसं यशोधाम्। पुरुरूपमकामकर्शनं सुपोषः पोषैः स्यात्सुवीरो  
वीरैर्वेत्वाऽऽज्यस्य होतर्यजं। होता यक्षद्वनस्पतिमुपावस्रक्षद्वियो जोष्टारं  
शशमन्नरः। स्वदात्स्वधितिरऋतुथाद्य देवो देवेभ्यो हव्यावाङ्मेत्वाऽऽज्यस्य

होत॒र्यजं॑। होता॑ यक्षद॒ग्निः॑ स्वाहाऽऽज्य॑स्य स्वाहा मेद॑सुः स्वाहा॑ स्तो॒काना॑ऽ  
 स्वाहा स्वाहा॑कृतीना॑ऽ स्वाहा॑ ह॒व्यसू॑क्तीनाम्। स्वाहा॑ दे॒वाः॑ आ॒ज्य॒पान्थ॒स्वाहा॑-  
 ऽग्निः॑ हो॒त्राञ्जु॑षाणा अ॒ग्न आ॒ज्य॑स्य वियन्तु होत॒र्यजं॑॥५॥ प्रियमिन्द्र॑स्यास्तु वेत्वाऽऽज्य॑स्य होत॒र्यजं॑ सुवीरौ  
 वीर॑वेत्वाऽऽज्य॑स्य होत॒र्यजं॑ च॒त्वारि॑ च (अग्निन्तनूनपा॑त्त्रराशः॑ संमग्नि॑मिड ईडितो ब॒र्हिर्दु॑रं उपा॑सानक्ता दे॒व्यां तिस्र॑स्त्वष्टा॑रं वन॑स्पति॒मग्नि॑म्। पञ्च वे॒त्वेकौ॑ वियन्तु  
 द्वि॒र्वी॒तामे॒कौ वियन्तु॑ द्वि॒र्वे॒त्वेकौ॑ वियन्तु होत॒र्यजं॑॥॥

[२]

समि॑द्धो अ॒द्य मनु॑षो दुरो॒णे। दे॒वो दे॒वान् यज॑सि जा॒तवे॑दः। आ च॒ वहं॑  
 मि॒त्रम॑हश्चि॒कित्वा॑न्। त्वं दू॒तः क॒विर॑सि प्र॒चे॒ताः। तनू॑नपात्प॒थ ऋ॒तस्य॑ या॒नान्।  
 म॒ध्वां स॒मञ्ज॑न्थस्व॒दया॑ सुजिह्व। म॒न्मा॑नि धी॒भि॒रु॒त य॒ज्ञमृ॑न्धन्। दे॒व॒त्रा च॑ कृ॒णु॒ह्यध्व॑रं  
 नः। न॒रा॒शः॑ संस्य म॒हि॒मानं॑मेषाम्। उप॑ स्तोषाम य॒ज्ञत॑स्य॒ यज्ञैः॑॥६॥

ते सु॒क्रत॑वः शुच॑यो धिय॒न्धाः। स्वद॑न्तु दे॒वा उ॒भया॑नि ह॒व्या। आ॒जु॒ह्वान् ई॒ड्यो  
 व॒न्द्यश्च॑। आया॑ह्यग्ने वसु॑भिः स॒जोषा॑ः। त्वं दे॒वाना॑मसि य॒ह्व होता॑। स ए॒नान्  
 यक्षी॑षि॒तो यजी॑यान्। प्रा॒चीनं॑ ब॒र्हिः प्र॒दिशा॑ पृथि॒व्याः। वस्तो॑र॒स्या वृ॑ज्यते अ॒ग्ने  
 अ॒ह्ना॑म्। व्यु॑ प्रथते वि॒तरं॑ वरी॑यः। दे॒वेभ्यो॑ अदि॑तये स्यो॒नम्॥७॥

व्यचंस्वतीरुर्विया विश्रयन्ताम्। पतिभ्यो न जनयः शुभमानाः। देवीर्द्वारो  
 बृहतीर्विश्वमिन्वाः। देवेभ्यो भवथ सुप्रायणाः। आसुष्वयन्ती यजते उपांके।  
 उषासानक्ता सदतां नि योनौ। दिव्ये योषणे बृहती सुरुक्मे। अधि श्रियः  
 शुक्रपिशं दधाने। दैव्या होतारा प्रथमा सुवाचा। मिमाना यज्ञं मनुषो यजध्वै॥८॥

प्रचोदयन्ता विदथेषु कारू। प्राचीनं ज्योतिः प्रदिशां दिशन्तां। आ नो यज्ञं  
 भारती तूयमेतु। इडां मनुष्वदिह चेतयन्ती। तिस्रो देवीर्बर्हिरेदः स्योनम्।  
 सरस्वती स्वपंसः सदन्तु। य इमे द्यावापृथिवी जनित्री। रूपैरपिः शद्भुवनानि  
 विश्वा। तमद्य होतरिषितो यजीयान्। देवं त्वष्टारमिह यक्षि विद्वान्॥९॥

उपावसृजत्मन्यां समञ्जन्। देवानां पार्थ ऋतुथा हवीःषि। वनस्पतिः  
 शमिता देवो अग्निः। स्वदन्तु हव्यं मधुना घृतेन। सद्यो जातो व्यमिमीत  
 यज्ञम्। अग्निर्देवानामभवत्पुरोगाः। अस्य होतुः प्रदिश्यतस्य वाचि। स्वाहाकृतः  
 हविरदन्तु देवाः॥१०॥ यज्ञैः स्योनं यजध्वै विद्वान्धौ च॥



अ॒ग्निर्होता॑ नो अध्व॒रे। वा॒जी सन्परि॑णीयते। दे॒वो दे॒वेषु॑ य॒ज्ञियः॑।  
परि॑त्रिवि॒ष्ट्यध्व॑रम्। यात्य॒ग्नी र॒थीरि॑व। आ दे॒वेषु॑ प्रयो दध॑त्। परि॒ वाज॑पतिः  
क॒विः। अ॒ग्निर्ह॒व्यान्य॑क्रमीत्। दध॒द्रत्नानि॑ दा॒शुषे॑॥११॥ अ॒ग्निर्होता॑ नो नव॑॥—————[४]

अजै॑द॒ग्निः। अस॑न॒द्वाज॑न्नि। दे॒वो दे॒वेभ्यो॑ ह॒व्यावा॑ट्। प्रा॒ञ्जोभि॑र्हिन्वा॒नः। धेना॑भिः  
कल्प॑मानः। य॒ज्ञस्यायुः॑ प्रति॒रन्। उप॒ प्रेष्य॑ होतः। ह॒व्या दे॒वेभ्यः॑॥१२॥ अजै॑दद्यौ॥[५]

दैव्याः॑ शमि॒तार उ॒त म॑नुष्या॒ आर॑भध्वम्। उप॑नयत् मे॒ध्या दु॑रः। आशा॑साना॒  
मेध॑पतिभ्यां॒ मेध॑म्। प्रा॒स्मा अ॒ग्निं भ॑रत। स्तृ॒णीत ब॑रु॒हिः। अन्वे॑न॒ मा॒ता म॑न्यताम्।  
अनु॑ पि॒ता। अनु॑ भ्रा॒ता सग॑र्भ्यः। अनु॑ सखा॒ सयू॑थ्यः। उ॒दीची॑ना॒ अस्य॑ प॒दो  
निध॑त्तात्॥१३॥

सूर्यं॑ चक्षु॑र्गमयतात्। वातं॑ प्रा॒णम॒न्वव॑सृजतात्। दि॒शः श्रो॑त्रम्। अ॒न्तरि॑क्षम॒सुम्।  
पृथि॒वी स॑ शरी॒रम्। ए॒क॒धाऽस्य॑ त्वच॒माच्छा॑तात्। पु॒रा नाभ्या॑ अपि॒शसौ॑  
वपा॑मुत्खि॒दतात्। अ॒न्तरे॒वोष्माणं॑ वा॒रय॑तात्। श्ये॒नम॑स्य॒ वक्षः॑ कृणुतात्। प्र॒शसा॑  
बा॒हू॥१४॥

श॒ला दो॒षणी॑। क॒श्यपे॒वाꣳसा॑। अ॒च्छि॒द्रे श्रोणी॑। क॒वषो॒रू स्ने॒कपर्णा॑ष्ठीवन्ता॑।  
 षड्विंश॑तिरस्य॒ वङ्क॑यः। ता अ॒नुष्यो॑च्यावयतात्। गात्रं॑ गात्रम॒स्यानू॑नं कृणुतात्।  
 ऊ॒वध्य॒गोहं॑ पा॒र्थिवं॑ खनतात्। अ॒स्त्रा रक्षः॑ सꣳसृजतात्। व॒निष्ठुम॑स्य॒ मा  
 रा॑विष्ट॥१५॥

उरू॑कं म॒न्यमा॑नाः। नेद्व॑स्तोके तनये। रवि॑तारवच्छमि॒तारः। अधि॑गो शमीध्वम्।  
 सु॒शमि॑ शमीध्वम्। श॒मीध्वम॑धिगो। अधि॑गुश्चापापश्च। उ॒भौ दे॒वानाꣳ शमि॑तारौ।  
 तावि॑मं प॒शूꣳ श्र॑पयतां प्रवि॒द्वाꣳसौ॑। यथा॑यथाऽस्य॒ श्रप॑णन्तथातथा॥१६॥

धृताद्वाह मा

राविष्ट तथातथा॥

[६]

जुष॑स्व स॒प्रथ॑स्तमम्। वचो॑ दे॒वप्सर॑स्तमम्। ह॒व्या जुह्वा॑न आ॒सनि॑। इ॒मं नो॑  
 य॒ज्ञम॒मृते॑षु धेहि। इ॒मा ह॒व्या जा॑तवेदो जुषस्व। स्तो॒काना॑मग्ने मेद॑सो घृतस्य।  
 होतः॑ प्रा॒शान॑ प्रथ॒मो नि॒षद्य॑। घृत॑वन्तः पावक ते। स्तो॒काः श्रौ॑तन्ति मेद॑सः।  
 स्वध॑र्मं दे॒ववी॑तये॥१७॥

श्रेष्ठं॑ नो धेहि॒ वार्य॑म्। तुभ्य॑ꣳ स्तो॒का घृ॑तश्चुतः। अग्ने॒ विप्रा॑य सन्त्य। ऋषिः॑ श्रेष्ठः॒

समिध्यसे। यज्ञस्य प्राविता भव। तुभ्यः श्रोतन्त्यग्निगो शचीवः। स्तोकासौ अग्ने  
मेदसो घृतस्य। कविशस्तो बृहता भानुनागाः। हव्या जुषस्व मेधिर। ओजिष्ठन्ते  
मध्यतो मेद उद्धृतम्। प्र ते वयं ददामहे। श्रोतन्ति ते वसो स्तोका अधित्वचि।  
प्रति तान्देवशोर्विहि॥१८॥ देववीतय उद्धृतर्वाणि च॥

[७]

आवृत्रहणा वृत्रहभिः शुष्मैः। इन्द्र यातन्नमोभिरग्ने अर्वाक्। युव  
राधोभिरकवेभिरिन्द्र। अग्ने अस्मे भवतमुत्तमेभिः। होता यक्षदिन्द्राग्नी। छागस्य  
वपाया मेदसः। जुषेता हविः। होतर्यजं। विह्यख्यन्मनसा वस्य इच्छन्।  
इन्द्राग्नी ज्ञास उत वा सजातान्॥१९॥

नान्या युवत्प्रमतिरस्ति मह्यम्। स वा धियं वाजयन्तीमतक्षम्। होता  
यक्षदिन्द्राग्नी। पुरोडाशस्य जुषेता हविः। होतर्यजं। त्वामीडते अजिरं दूत्याय।  
हविष्मन्तः सदमिन्मानुषासः। यस्य देवैरासंदो बर्हिरग्ने। अहान्यस्मै सुदिना  
भवन्तु। होता यक्षदग्निम्। पुरोडाशस्य जुषेता हविः। होतर्यजं॥२०॥ सजातान्भिन्दे

च॥

[८]

गीर्भिर्विप्रः प्रमंतिमिच्छमानः। ईदृ॑ र॒यिं य॒शसं॑ पू॒र्वभा॑जम्। इन्द्रा॑ग्नी वृत्रह॑णा  
 सुव॒ज्रा। प्र णो॑ नव्ये॑भिस्तिरतं दे॒ष्णैः। माच्छे॑द्वा र॒श्मीरि॑ति नाध॑मानाः। पि॒तृणां॑  
 शक्ती॑रनुयच्छ॑मानाः। इन्द्रा॑ग्निभ्यां कं वृष॑णो मदन्ति। ताह्य॑द्री धि॒षणा॑या उ॒पस्थे॑।  
 अ॒ग्निर॑ सु॒दीति॑ सु॒दृशं॑ गृणन्तः। न॒मस्या॑म॒स्त्वेड्यं॑ जा॒तवे॑दः। त्वां दू॒तम॑र॒तिर॑  
 ह॒व्यवा॑हम्। दे॒वा अ॑कृण्वन्नमृ॒तस्य॑ नाभिम्॥२१॥ जा॒तवे॑दो द्वे चं॥ [९]

त्व॑ ह्य॒ग्ने प्रथ॑मो मनो॒ता॥ अ॒स्या धि॒यो अ॒भवो॑ दस्म॒होता॑॥ त्व॑ सीं  
 वृष॑न्नकृ॒णोर्दु॑ष्टरी॒तु। स॒हो वि॒श्वस्मै॑ स॒हसे॑ स॒हध्वे॑। अ॒धा हो॒ता न्य॑सीदो॒ यजी॑यान्।  
 इ॒डस्प॒द इ॒षय॒त्रीड्यः॑ सन्। तं त्वा॒ नरः॑ प्रथ॒मं दे॑व॒यन्तः॑। म॒हो रा॒ये चि॒तय॑न्तो  
 अनु॑गमन्। वृ॒तेव॑ यन्तं ब॒हुभिर्व॑स॒व्यैः। त्वे र॒यिं जा॑गृ॒वांसो॑ अनु॑गमन्॥२२॥

रु॒शान्त॑म॒ग्निं दर्श॑तं बृ॒हन्त॑म्। व॒पाव॑न्तं वि॒श्वहा॑ दी॒दिवा॑सम्। प॒दं दे॒वस्य॑  
 नम॑सा वि॒यन्तः॑। श्र॒वस्य॑वः श्र॒व आ॑प॒न्नमृ॑क्तम्। ना॒मानि॑ चि॒दधि॑रे य॒ज्ञिया॑नि।  
 भ॒द्रायां॑ ते रण॑यन्त॒ सन्दृ॑ष्टौ। त्वां व॑र्धन्ति क्षि॒तयः॑ पृथि॒व्याम्। त्व॑ रा॒य उ॒भया॑सो

जनानाम्। त्वं त्राता तरणे चेत्योऽभूः। पिता माता सदमिन्मानुषाणाम्॥२३॥

सपर्येण्यः स प्रियो विश्वग्निः। होता मन्द्रो निषसादा यजीयान्। तं त्वा वयं  
दम् आ दीदिवा९सम्। उपजुबाधो नमसा सदेम। तं त्वा वयं सुधियो नव्यमग्ने।  
सुम्नायव ईमहे देवयन्तः। त्वं विशो अनयो दीद्यानः। दिवो अग्ने बृहता रोचनेन।  
विशां कविं विशपति९ शश्वतीनाम्। नितोशनं वृषभं चर्षणीनाम्॥२४॥

प्रेतीषणि मिषयन्तं पावकम्। राजन्तमग्निं यजत९ रयीणाम्। सो अग्र ईजे  
शशमे च मर्तः। यस्तु आनदथ्समिधां हव्यदातिम्। य आहुतिं परि वेदा नमोभिः।  
विश्वेथ्सवामा दधते त्वोतः। अस्मा उ ते महि महे विधेम। नमोभिरग्ने समिधोत  
हव्यैः। वेदीसूनो सहसो गीर्भिरुक्थैः। आ ते भद्राया९ सुमतौ यतेम॥२५॥

आ यस्तुतन्थ रोदसी विभासा। श्रवोभिश्च श्रवस्यस्तरुत्रः। बृहद्धिर्वाजैः  
स्थविरेभिरस्मे। रेवद्धिरग्ने वितरं वि भाहि। नृवद्वसो सदमिद्धैह्यस्मे। भूरितोकाय  
तनयाय पश्वः। पूर्वोरिषो बृहतीरारे अघाः। अस्मे भद्रा सौश्रवसानि सन्तु।

पुरूण्यग्ने पुरुधा त्वाया। वसूनि राजन्वसुतांते अश्याम्। पुरूणि हि त्वे पुरुवार-  
सन्ति। अग्ने वसुं विधत्ते राजनित्वे॥२६॥ जागृवाँसो अनुग्मन्मानुषाणाश्चरपणीनां यन्तेमाश्यान्द्वे च॥—[१०]

आभरतः शिक्षतं वज्रबाहू। अस्माः इन्द्राग्नी अवतः शचीभिः। इमे नु ते  
रश्मयः सूर्यस्य। येभिः सपित्वं पितरो न आयन्। होता यक्षदिन्द्राग्नी। छागंस्य  
हविष आत्तामद्य। मध्यतो मेद उद्धृतम्। पुरा द्वेषोभ्यः। पुरा पौरुषेय्या गृभः।  
घस्तान्नूनम्॥२७॥

घासे अज्राणां यवसप्रथमानाम्। सुमत्क्षराणाः शतरुद्रियाणाम्। अग्निष्वात्तानां  
पीवोपवसनानाम्। पार्श्वतः श्रोणितः शितामत उथ्सादतः। अङ्गादङ्गादवत्तानाम्।  
करत एवेन्द्राग्नी। जुषेताः हविः। होतर्यजं। देवेभ्यो वनस्पते हवीःषि। हिरण्यपर्ण  
प्रदिवस्ते अर्थम्॥२८॥

प्रदक्षिणिद्रशनयां नियूय। ऋतस्य वक्षि पथिभी रजिष्ठैः। होता  
यक्षद्वनस्पतिमभिहि। पिष्टतमया रभिष्ठया रशनयाधित। यत्रेन्द्राग्नियोश्छागंस्य

ह॒विषः॑ प्रि॒या धामा॑नि। यत्र॒ वन॒स्पतेः॑ प्रि॒या पाथा॑सि। यत्र॑ दे॒वाना॑माज्य॒पाना॑  
प्रि॒या धामा॑नि। यत्रा॒ग्नेर्होतुः॑ प्रि॒या धामा॑नि। तत्रै॒तं प्र॒स्तुत्ये॑वोप॒स्तुत्ये॑  
वोपाव॑स्रक्षत्। रभी॑यासमिव कृ॒त्वी॥२९॥

कर॑दे॒वं दे॒वो वन॒स्पतिः॑। जुष॑तासि॒ ह॒विः। होत॑र्यज॒। पि॒प्री॒हि दे॒वाः  
उ॒शतो॑ यविष्ठ। वि॒द्वाः ऋ॒तूँस्ऋ॒तुप॑ते यजे॒ह। ये दै॒व्या ऋ॒त्विज॑स्तेभि॒रग्ने॑। त्व  
होत॑वृ॒णाम॒स्याय॑जिष्ठः। होता॑ यक्षद॒ग्निः स्वि॑ष्ट॒कृत॑म्। अया॑ङ्गि॒रिन्द्रा॑ग्नि॒योश्छाग॑स्य  
ह॒विषः॑ प्रि॒या धामा॑नि। अया॒ङ्गन॒स्पतेः॑ प्रि॒या पाथा॑सि। अया॑ङ्ग॒वाना॑माज्य॒पाना॑  
प्रि॒या धामा॑नि। यक्ष॑द॒ग्नेर्होतुः॑ प्रि॒या धामा॑नि। यक्ष॑त्स्वं म॒हि॒मान॑म्।  
आय॑जता॒मेज्या॒ इषः॑। कृ॒णोतु॒ सो अ॑ध्व॒रा जा॒तवे॑दाः। जुष॑तासि॒ ह॒विः।  
होत॑र्यज॒॥३०॥ नूनमर्थं कृत्वी पाथासि सप्त च॥

[११]

उपो॑ ह॒ यद्वि॑दथ॒ वा॒जिनो॒ गूः। गी॒र्भिर्वि॑प्राः प्रम॑तिमिच्छ॒मानाः॑। अ॒र्वन्तो॒ न  
का॒ष्ठा॒न्नक्ष॑माणाः। इन्द्रा॑ग्नी जोहु॑वतो॒ नर॒स्ते। वन॑स्पते र॒शन॑याऽभि॒धाय॑। पि॒ष्टत॑मया

व॒युना॑नि वि॒द्वान्। वह॑ दे॒व॒त्रा दि॑धिषो ह॒वीः॑ षि। प्र च॑दा॒तार॑म॒मृते॑षु वोचः। अ॒ग्निः॑  
स्वि॑ष्ट॒कृत॑म्। अया॑ङ्गि॒रिन्द्रा॑ग्नि॒योश्छा॑ग॒स्य ह॒विषः॑ प्रि॒या धा॑मा॒नि॥ ३१॥

अया॑ङ्गुन॒स्पतेः॑ प्रि॒या पा॑था॒सि। अया॑ङ्गै॒वाना॑माज्य॒पाना॑ प्रि॒या धा॑मा॒नि।  
यक्ष॑द॒ग्नेर॑होतुः प्रि॒या धा॑मा॒नि। यक्ष॑थ्स्वं म॒हि॒मान॑म्। आ॒य॒ज॒ता॒मे॒ज्या इ॒षः॑।  
कृ॒णोतु॑ सो अ॒ध्व॒रा जा॑तवे॒दाः। जु॒ष॒ता॒ ह॒विः॑। अ॒ग्ने य॒द॒द्य वि॒शो अ॒ध्व॒रस्य॑  
होतः। पा॒व॒क शो॒चे वे॒ष्ट्व॑ हि यज्वा॑। ऋ॒ता य॑जासि म॒हि॒ना वि॒यद्भूः॑। ह॒व्या वह॑  
यवि॑ष्ठ॒ या ते॑ अ॒द्य॥ ३२॥ धा॑मा॒नि भू॒रेकं॑ च॥ [१२]

दे॒वं ब॒र्हिः सु॑दे॒वं दे॒वैः स्या॑त्सु॒वीरं॑ वी॒रैर्व॑स्तो॒र्वृ॒ज्ये॒ता॒क्तोः प्र॑भ्रि॒ये॒ता॒त्य॒न्या॒न्ना॒या  
ब॒र्हिष्म॑तो म॒दे॒म व॑सु॒वने॑ वसु॒धेय॑स्य वेतु॒ यज॑। दे॒वीर्द्वा॑रः सङ्घा॒ते  
वि॒द्वीर्या॑म॒ञ्छि॒थि॒रा ध्रु॒वा दे॒वहू॑तौ व॒त्स ई॑मे॒ना॒स्तरु॑ण॒ आ॒मि॑मी॒यात्कु॑मा॒रो  
वा न॑व॒जातो॒ मै॒ना अ॒र्वा रे॒णुक॑काटः पृ॒ण॒ग्वसु॑वने॑ वसु॒धेय॑स्य वि॒यन्तु॑ यज॑।  
दे॒वी उ॒षा॑सा॒न॒क्ताऽद्या॑स्मिन् य॒ज्ञे प्र॑य॒त्य॒हे॒ता॒मपि॑ नूनं दै॒वीर्वि॑शः प्रा॒या॑सि॒ष्टा॒ः



सुप्री॑ते सुधि॑ते वसु॒वने॑ वसु॒धेय॑स्य वीतां॑ यज॑। दे॒वी जोष्टी॑ वसु॒धिती॑ ययो॑र॒न्या-  
 ऽघा॑द्वेषा॒सि यु॒यव॑दान्याव॒क्षद्व॑सु वा॒र्याणि॑ यज॑मानाय वसु॒वने॑ वसु॒धेय॑स्य  
 वीतां॑ यज॑। दे॒वी ऊ॒र्जाहु॑ती इष॒मूर्ज॑म॒न्याव॒क्षत्स॑ग्धिः॒ सपी॑तिम॒न्या नवे॑न॒ पूर्वं  
 दय॑मानाः स्याम॑ पुरा॒णेन॒ नवं॑ तामूर्ज॑मूर्जाहु॑ती ऊ॒र्जय॑माने अधातां वसु॒वने॑  
 वसु॒धेय॑स्य वीतां॑ यज॑। दे॒वा दै॒व्या होता॑रा॒ नेष्टा॑रा॒ पोता॑रा ह॒ताघ॑शः॒ सावाभ॑रद्व॒सू  
 वसु॒वने॑ वसु॒धेय॑स्य वीतां॑ यज॑। दे॒वीस्ति॒स्रस्ति॒स्रो दे॒वीरि॑डा॒ सर॑स्वती॒  
 भार॑ती॒ द्यां भार॑त्यादि॒त्यैर॑स्पृक्ष॒त्सर॑स्वतीमः॒ रु॒द्रैर्य॑ज्ञमा॒वीदि॑हैवेड॒या वसु॑म॒त्या  
 सध॑मादं॒ मदे॑म वसु॒वने॑ वसु॒धेय॑स्य वियन्तु॑ यज॑। दे॒वो नरा॑शः॒ सस्त्रि॑शी॒रूषा॑  
 षड॑क्षः॒ शत॑मिदे॒नः शि॑तिपृ॒ष्ठा आद॑धति॒ सह॑स्र॒मीं प्रव॑हन्ति मि॒त्रावरु॑णेद॒स्य  
 हो॒त्रम॑रु॒हतो॑ बृह॒स्पतिः॑ स्तो॒त्रम॑श्विनाऽऽध्व॒र्यवं॑ वसु॒वने॑ वसु॒धेय॑स्य वेतु॑  
 यज॑। दे॒वो वन॑स्पतिर्व॒रूष॑प्रा॒वा घृ॒तनि॑र्णि॒ग्दाम॑ग्रेणास्पृक्ष॒दान्तरि॑क्षं॒ मध्यै॑नाप्राः  
 पृथि॒वीमुप॑रेणादः॒ हीद्व॑सु॒वने॑ वसु॒धेय॑स्य वेतु॑ यज॑। दे॒वं ब॒रुहि॑र्वारि॒तीनां॑ नि॒धेधा॑ऽसि

प्रच्युतीनामप्रच्युतत्रिकामधरणं पुरुस्पार्हं यशस्वदेना बर्हिषाऽन्या बर्हीऽप्यभि  
 ष्याम वसुवने वसुधेयस्य वेतु यज। देवो अग्निः स्विष्टकृत्सुद्रविणा मन्द्रः कविः  
 सत्यमन्माऽऽयजी होता होतुर्होतुरायजीयानग्ने यान्देवानयाड्याः अपिप्रेर्ये  
 ते होत्रे अमथ्सत् ताः संसनुषीः होत्रां देवङ्गमान्दिवि देवेषु यज्ञमेरयेमः  
 स्विष्टकृच्चाग्ने होताऽभूर्वसुवने वसुधेयस्य नमोवाके वीहि यज॥ ३३ ॥ यजेकं च॥ [१३]

देवं बर्हिः। वसुवने वसुधेयस्य वेतु। देवीद्वारः। वसुवने वसुधेयस्य वियन्तु।  
 देवी उषासानक्ता। वसुवने वसुधेयस्य वीताम्। देवी जोष्टी। वसुवने वसुधेयस्य  
 वीताम्। देवी ऊर्जाहुती। वसुवने वसुधेयस्य वीताम्॥ ३४ ॥

देवा दैव्या होताः। वसुवने वसुधेयस्य वीताम्। देवीस्तिस्त्रस्तिस्त्रो देवीः।  
 वसुवने वसुधेयस्य वियन्तु। देवो नराशंसः। वसुवने वसुधेयस्य वेतु। देवो  
 वनस्पतिः। वसुवने वसुधेयस्य वेतु। देवं बर्हिर्वारितीनाम्। वसुवने वसुधेयस्य  
 वेतु॥ ३५ ॥

दे॒वो अ॒ग्निः स्वि॑ष्ट॒कृत्। सु॒द्रवि॑णा म॒न्द्रः क॒विः। स॒त्यम॑न्माय॒जी होता॑।  
 होत॑र॒होत॑राय॒जीयान्। अ॒ग्ने या॒न्दे॒वानया॑त्। या॒९ अ॒पि॒प्रेः। ये ते॑ हो॒त्रे अ॒म॑त्स॒त।  
 ता॒९ स॑स॒नुषी॒॑९ हो॒त्रा॑न्दे॒वङ्ग॑माम्। दि॒वि दे॒वेषु॑ य॒ज्ञमे॒रये॑मम्। स्वि॒ष्ट॒कृच्चा॒ग्ने  
 होता॑ऽभूः। व॒सुव॑ने॒ वसु॑धेय॒स्य न॑मोवा॒के वी॒हि॑॥३६॥ वी॒तां वे॒त्वभू॑र॒कं च॑॥ [१४]

अ॒ग्निम॑द्य हो॒ता॑रमवृणीता॒यं यज॑मानः पच॑न्प॒त्तीः पच॑न्पु॒रोडा॑शं ब॒ध्नन्नि॑न्द्रा॒ग्निभ्या॑  
 छा॒ग॒॑९ सू॒प॒स्था अ॒द्य दे॒वो व॒न॒स्पति॑रभवदिन्द्रा॒ग्निभ्या॑ छा॒गे॒नाघ॑स्ता॒न्तं मे॒द॒स्तः  
 प्र॒ति॒प॒च॒ता॒ग्नेभी॑ष्टा॒मवी॑वृधेतां पु॒रोडा॑शेन॒ त्वाम॑द्य॒र्ष आ॒र्षेय॑ ऋषी॒णान्न॑पादवृणीता॒यं  
 यज॑मानो ब॒हुभ्य॑ आ स॒ङ्ग॑तेभ्य ए॒ष मे॑ दे॒वेषु॑ वसु॒ वार्या॑ यक्ष्यत॒ इति॑ ता या  
 दे॒वा दे॒व॒दाना॑न्यदु॒स्तान्य॑स्मा आ च॒ शा॒स्वा च॑ गुरस्वे॒षित॑श्च हो॒तर॑सि॒ भद्र॑वाच्या॒य  
 प्रेषि॑तो॒ मानु॑षः सू॒क्तवा॒काय॑ सू॒क्ता ब्रू॑हि॥३७॥ अ॒ग्निम॑द्यैकम्॥ [१५]

अ॒ञ्जन्ति॑ होतां यक्ष॒त्समि॑द्धो अ॒द्याग्नि॑रजै॒र्दे॒व्यां जु॒प॒स्वा वृ॒त्रह॑णा गी॒र्भिस्त्व॒॑९ ह्याभ॑रतमु॒पोह॑ यद्दे॒वं ब॒र्हिः सु॒दे॒वं दे॒वं ब॒र्हिर्अ॒ग्निम॑द्य पञ्च॑दश॥१५॥  
 अ॒ञ्जन्त्य॑ग्नि॒रहो॑तां नो गी॒र्भिरु॑पो ह॒ यद्वि॑दथ॒ वा॒जिनः॑ स॒प्तत्रि॑ंशत्॥३७॥  
 अ॒ञ्जन्ति॑ सू॒क्ताब्रू॑हि॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके षष्ठः प्रपाठकः समाप्तः॥

॥सप्तमः प्रश्नः॥

॥तैत्तिरीयब्राह्मणे तृतीयाष्टके सप्तमः प्रपाठकः॥

सर्वान् वा एषोऽग्नौ कामान्प्रवेशयति। योऽग्नीनन्वाधाय व्रतमुपैति। स यदनिष्ट्वा प्रयायात्। अकामप्रीता एनं कामा नानुप्रयायुः। अतेजा अवीर्यः स्यात्। स जुहुयात्। तुभ्यं ता अङ्गिरस्तम। विश्वाः सुक्षितयः पृथक्। अग्ने कामाय येमिर् इति। कामानेवास्मिन्दधाति॥१॥

कामप्रीता एनं कामा अनु प्रयान्ति। तेजस्वी वीर्यावान्भवति। सन्ततिर्वा एषा यज्ञस्य। योऽग्नीनन्वाधाय व्रतमुपैति। स यदुद्धायति। विच्छित्तिरेवास्य सा। तं प्राञ्चमुद्धृत्य। मनसोपतिष्ठेत्। मनो वै प्रजापतिः। प्राजापत्यो यज्ञः॥२॥

मनसैव यज्ञः सन्तनोति। भूरित्याह। भूतो वै प्रजापतिः। भूतिमेवोपैति। वि वा एष इन्द्रियेण वीर्येणर्ध्यते। यस्याऽऽहिताग्नेरग्निरपक्षायति। यावच्छम्यया प्रविध्यैत्। यदि तावदपक्षायैत्। तं सम्भरेत्। इदं तु एकं पुर उं तु एकम्॥३॥

तृतीयेन॑ ज्योतिषा॑ संवि॑शस्व। संवे॑शनस्तनु॒वै चारु॑रेधि। प्रि॒ये दे॒वानां॑  
पर॒मे ज॒नित्र॑ इति॑। ब्रह्म॑णै॒वैन॑ꣳ सम्भ॑रति। सैव ततः॑ प्रायश्चि॑त्तिः। यदि॑  
परस्त॒रामे॑पक्षाये॑त्। अ॒नुप्र॒यायाव॑स्येत्। सो ए॒व ततः॑ प्रायश्चि॑त्तिः। ओष॑धी॒र्वा  
ए॒तस्य॑ प॒शून्प॒यः प्रवि॑शति। यस्य॑ ह॒विषे॑ व॒त्सा अ॒पाकृ॑ता॒ धय॑न्ति॥४॥

तान् यद्बु॒ह्यात्। या॒तया॑म्ना ह॒विषा॑ यजेत। यन्न दु॒ह्यात्। य॒ज्ञप॒रुरन्त॑रियात्।  
वा॒य॒व्यां॑ यवा॒गूं निर्व॑पेत्। वा॒युर्वै प॒यसः॑ प्रदापयि॑ता। स ए॒वास्मै॑ प॒यः प्रदा॑पयति।  
प॒यो वा ओष॑धयः। प॒यः प॒यः। प॒यसै॒वास्मै॑ प॒योऽव॑ रुन्धे॥५॥

अथोत्त॑रस्मै ह॒विषे॑ व॒त्सान॒पाकृ॑र्यात्। सैव ततः॑ प्रायश्चि॑त्तिः। अ॒न्य॒त॒रान् वा  
ए॒ष दे॒वान्भा॑ग॒धेये॑न॒ व्य॑र्धयति। ये यज॑मानस्य सा॒यं गृ॒हमा॑ गच्छ॑न्ति। यस्य॑ सा॒यं  
दु॒ग्धꣳ ह॒विरा॑र्तिमाच्छ॑ति। इन्द्रा॑य व्री॒हीन्नि॒रुप्योप॑ वसेत्। प॒यो वा ओष॑धयः। प॒यं  
ए॒वार॑भ्य॒ गृही॒त्वोप॑ वसति। यत्प्रा॒तः स्या॑त्। तच्छृ॑तं कु॒र्यात्॥६॥

अथे॒तर॑ ऐ॒न्द्रः पुं॒रोडा॑शः स्यात्। इन्द्रि॑ये ए॒वास्मै॑ स॒मीची॑ दधाति। प॒यो

वा ओषधयः। पयः पयः। पयसैवास्मै पयोऽवं रुन्धे। अथोत्तरस्मै हविषे  
 वत्सानपाकुर्यात्। सैव ततः प्रायश्चित्तिः। उभयान् वा एष देवान्भागधेयेन  
 व्यर्धयति। ये यजमानस्य सायं च प्रातश्च गृहमा गच्छन्ति। यस्योभयं  
 हविरार्तिमाच्छति॥७॥

ऐन्द्रं पञ्चशरावमोदनं निर्वपेत्। अग्निं देवतानां प्रथमं यजेत्। अग्निमुखा एव  
 देवताः प्रीणाति। अग्निं वा अन्वन्या देवताः। इन्द्रमन्वन्याः। ता एवोभयीः प्रीणाति।  
 पयो वा ओषधयः। पयः पयः। पयसैवास्मै पयोऽवं रुन्धे। अथोत्तरस्मै हविषे  
 वत्सानपाकुर्यात्॥८॥

सैव ततः प्रायश्चित्तिः। अर्धो वा एतस्य यज्ञस्य मीयते। यस्य व्रत्ये-  
 ऽहन्पत्यनालम्भुका भवन्ति। तामपुरुषं यजेत। सर्वेणैव यज्ञेन यजते। तामिद्धोप  
 ह्वयेत। अमूहमस्मि। सा त्वम्। द्यौरहम्। पृथिवी त्वम्। सामाहम्। ऋत्नम्।  
 तावेहि सम्भवाव। सह रेतो दधावहै। पुंसे पुत्राय वेत्तवै। रायस्पोषाय

सुप्रजास्त्वाय सुवीर्यायेति। अर्ध एवैनामुप ह्वयते। सैव ततः प्रायश्चित्तिः॥१॥<sup>दुधाति</sup>  
 यज्ञ उत एकन्धयन्ति रुन्धे कुर्यादूर्ध्वत्पाकुर्थात्पृथिवी त्वमष्टौ च (सर्वान् वि वै यदि परस्तरामोषधीरन्यतरानुभयान्धौ वै॥)॥\_\_\_\_\_ [१]

यद्विष्वण्णेन जुहुयात्। अप्रजा अपशुर्यजमानः स्यात्। यदनायतने निनयेत्।  
 अनायतनः स्यात्। प्राजापत्ययर्चा वल्मीकवपायामव नयेत्। प्राजापत्यो वै  
 वल्मीकः। यज्ञः प्रजापतिः। प्रजापतावेव यज्ञं प्रतिष्ठापयति। भूरित्याह। भूतो  
 वै प्रजापतिः॥१०॥

भूतिमेवोपैति। तत्कृत्वा। अन्यां दुग्ध्वा पुनर्होतव्यम्। सैव ततः प्रायश्चित्तिः।  
 यत्कीटावपन्नेन जुहुयात्। अप्रजा अपशुर्यजमानः स्यात्। यदनायतने निनयेत्।  
 अनायतनः स्यात्। मध्यमेन पूर्णेन द्यावापृथिव्ययर्चाऽन्तः परिधि निनयेत्।  
 द्यावापृथिव्योरेवैतत्प्रतिष्ठापयति॥११॥

तत्कृत्वा। अन्यां दुग्ध्वा पुनर्होतव्यम्। सैव ततः प्रायश्चित्तिः। यदववृष्टेन  
 जुहुयात्। अपरूपमस्याऽऽत्मजायेत। किलासो वास्यादर्शसो वा। यत्प्रत्येयात्।  
 यज्ञं विच्छिन्द्यात्। स जुहुयात्। मित्रो जनांन्कल्पयति प्रजानन्॥१२॥



मित्रो दाधार पृथिवीमुत द्याम्। मित्रः कृष्टीरनिमिषाऽभि चष्टे। सत्याय हव्यं  
घृतवञ्जुहोतेति। मित्रेणैवैनत्कल्पयति। तत्कृत्वा। अन्यां दुग्ध्वा पुनर्होतव्यम्। सैव  
ततः प्रायश्चित्तिः। यत्पूर्वस्यामाहुत्या५ हुतायामुत्तराऽऽहुतिः स्कन्देत्। द्विपाद्भिः  
पशुभिर्यजमानो व्यृध्येत। यदुत्तरयाऽभि जुहुयात्॥१३॥

चतुष्पाद्भिः पशुभिर्यजमानो व्यृध्येत। यत्र वेत्थ वनस्पते देवानां गुह्या नामानि।  
तत्र हव्यानि गामयेति वानस्पत्ययर्चा समिधमाधाय। तूष्णीमेव पुनर्जुहुयात्।  
वनस्पतिनैव यज्ञस्यातां चानांतां चाऽऽहुती वि दाधार। तत्कृत्वा। अन्यां दुग्ध्वा  
पुनर्होतव्यम्। सैव ततः प्रायश्चित्तिः। यत्पुरा प्रयाजेभ्यः प्राङङ्गारः स्कन्देत्।  
अध्वर्यवे च यजमानाय चाकः३ स्यात्॥१४॥

यदक्षिणा। ब्रह्मणे च यजमानाय चाकः३ स्यात्। यत्प्रत्यक्। होत्रे च पत्नियै  
च यजमानाय चाकः३ स्यात्। यदुदङ्गुः। अग्नीधे च पशुभ्यश्च यजमानाय चाकः३  
स्यात्। यदभिजुहुयात्। रुद्रोऽस्य पशून्धातुकः स्यात्। यन्नाभिजुहुयात्। अशान्तः

प्रह्रियेत॥१५॥

सुवस्य बुध्रेनाभिनिदध्यात्। मा तमो मा यज्ञस्तमन्मा यजमानस्तमत्। नमस्ते  
अस्त्वायते। नमो रुद्र परायते। नमो यत्र निषीदसि। अमुं मा हिंसीरमुं मा  
हिंसीरिति येन स्कन्देत्। तं प्रहरेत्। सहस्रशृङ्गो वृषभो जातवेदाः। स्तोमपृष्ठो  
घृतवाँन्सुप्रतीकः। मा नो हासीन्मेत्थितो नेत्त्वा जहाम। गोपोषं नो वीरपोषं च  
यच्छेति। ब्रह्मणैवैनं प्र हरति। सैव ततः प्रायश्चित्तिः॥१६॥ वै प्रजापतिः स्थापयति प्रजानन्मि जुहुयाध्व्याद्वियेत्  
जहाम त्रीणि च (यद्विष्यण्णेन प्राजापत्यया यत्कीटा मध्यमेन यदवंबुधेन यत्पूर्वस्यां यत्पुरा प्रयाजेभ्यः प्राडङ्गारो यदक्षिणा यत्प्रत्यग्यदुदङ्क॥)॥—[२]

वि वा एष इन्द्रियेण वीर्येण धर्यते। यस्याऽऽहिताग्नेरग्निर्मथ्यमानो न  
जायते। यत्रान्यं पश्येत्। तत आहृत्य होतव्यम्। अग्नावेवास्याग्निहोत्रं हुतं  
भवति। यद्यन्यत्र विन्देत्। अजायां होतव्यम्। आग्नेयी वा एषा। यदजा।  
अग्नावेवास्याग्निहोत्रं हुतं भवति॥१७॥

अजस्य तु नाश्नीयात्। यदजस्याश्नीयात्। यामेवाग्नावाहुतिं जुहुयात्।  
तामद्यात्। तस्मादजस्य नाश्यम्। यद्यजान्न विन्देत्। ब्राह्मणस्य दक्षिणे हस्ते

होत॒व्यम्। ए॒ष वा अ॒ग्निर्वै॑श्वान॒रः। यद्वा॑ह्म॒णः। अ॒ग्नावे॒वास्या॑ग्निहोत्र॑ हु॒तं  
भ॑वति॥१८॥

ब्रा॒ह्म॒णं तु वंस॒त्यै नापं॑ रुन्ध्यात्। यद्वा॑ह्म॒णं वंस॒त्या अप॑रुन्ध्यात्।  
यस्मिन्ने॒वाग्ना॒वाहु॑तिं जुहुयात्। तं भा॑ग॒धेये॑न॒ व्य॑र्धयेत्। तस्मा॑द्वा॒ह्म॒णो वंस॒त्यै  
नाप॑रुध्यः। यदि॑ ब्रा॒ह्म॒णं न वि॑न्देत्। द॒र्भस्त॒म्बे हो॑त॒व्यम्। अ॒ग्नि॒वान् वै द॑र्भस्त॒म्बः।  
अ॒ग्नावे॒वास्या॑ग्निहोत्र॑ हु॒तं भ॑वति। द॒र्भांस्तु॑ नाध्या॑सीत॥१९॥

यद्द॒र्भान॒ध्यासी॑त। या॒मे॒वाग्ना॒वाहु॑तिं जुहुयात्। ता॒मध्या॑सीत। तस्मा॑द्द॒र्भा  
ना॒ध्या॑सित॒व्याः। यदि॑ द॒र्भान्न॑ वि॑न्देत्। अ॒प्सु हो॑त॒व्यम्। आ॒पो वै सर्वा॑  
दे॒वताः। दे॒वता॑स्वे॒वास्या॑ग्निहोत्र॑ हु॒तं भ॑वति। आ॒पस्तु॑ न परि॑चक्षीत। यदापं॑  
परि॑चक्षीत॥२०॥

या॒मे॒वा॒प्स्वाहु॑तिं जुहुयात्। तां परि॑चक्षीत। तस्मा॑दा॒पो न परि॑चक्ष्याः। मे॒ध्या  
च॒ वा ए॒तस्या॑मे॒ध्या च॑ त॒नुवौ॑ स॑ सृज्येते। यस्याऽऽहि॑ताग्नेर॒न्यैर॒ग्निभि॑र॒ग्नयः॑

स० सृज्यन्ते॥ अ॒ग्नये॒ विवि॑चये॒ पुरो॒डाश॑म॒ष्टाक॑पालं॒ निर्व॑पेत्। मे॒ध्यां॑ चै॒वास्या॑मे॒ध्यां  
च॑ त॒नुवौ॒ व्याव॑र्तयति। अ॒ग्नये॑ व्र॒तप॑तये॒ पुरो॒डाश॑म॒ष्टाक॑पालं॒ निर्व॑पेत्। अ॒ग्निमे॒व  
व्र॒तप॑ति॥ स्वेन॑ भा॒गधे॑ये॒नोप॑ धावति। स ए॒वैनं॑ व्र॒तमा॑ ल॒म्भय॑ति॥ २१॥

गर्भ॑ः स्र॒वन्त॑म॒गद॑म॒कः। अ॒ग्निरिन्द्र॑स्त्वष्टा॒ बृह॑स्पतिः। पृ॒थिव्या॑म॒व॑ च॒श्रोतै॑तत्।  
नाभि॑प्राप्नोति॒ निर्ऋ॑तिं॒ परा॑चैः। रे॒तो॒ वा ए॒तद्वा॒जिन॑माहि॒ताग्नेः॑। यद॑ग्नि॒होत्र॑म्।  
तद्य॑त्स्र॒वेत्। रे॒तो॒ऽस्य॑ वा॒जिन॑ः स्र॒वेत्। गर्भ॑ः स्र॒वन्त॑म॒गद॑म॒करि॑त्याह। रे॒तं  
ए॒वास्मि॒न्वा॒जिनं॑ दधाति॥ २२॥

अ॒ग्निरि॑त्याह। अ॒ग्निर्वै रे॒तो॒धाः। रे॒तं ए॒व तद॑धाति। इन्द्र॑ इत्याह।  
इन्द्रि॑यमे॒वास्मि॒न्दधा॑ति। त्वष्टे॑त्याह। त्वष्टा॒ वै प॑शूनां मि॒थुना॑ना० रू॒पकृ॑त्।  
रू॒पमे॒व प॑शुषु॒ दधा॑ति। बृह॑स्पतिरि॒त्याह॑। ब्र॒ह्म॒ वै दे॒वानां॑ बृह॑स्पतिः। ब्र॒ह्मणै॑वास्मै॑  
प्र॒जाः प्र॑ ज॒नय॑ति। पृ॒थिव्या॑म॒व॑ च॒श्रोतै॑तदि॒त्याह॑। अ॒स्यामे॒वैन॑त्प्रति॒ष्ठाप॑यति।  
नाभि॑प्राप्नोति॒ निर्ऋ॑तिं॒ परा॑चैरि॒त्याह॑। र॒क्ष॑सा॒मप॑हत्यै॥ २३॥

अ॒जाऽग्रा॑वे॒वास्या॑ग्नि॒होत्र॑० हु॒तं भ॑वति  
भव॑त्यासीत् परि॒चक्षी॑त् ल॒म्भय॑ति दधाति दे॒वानां॑ बृह॑स्पतिः पञ्च॑ च (वि॒ वै यद्य॑न्यम॒जायां॑ ब्राह्म॒णस्य॑ दर्भ॒स्तुम्बै॑ऽपसु॒ होत॑व्यम्)॥ ————— [३]

याः पुरस्तात्प्रस्रवन्ति। उपरिष्ठाथ्सर्वतश्च याः। ताभी रश्मिपवित्राभिः। श्रद्धां  
यज्ञमा रभे। देवा गातुविदः। गातुं यज्ञाय विन्दत। मनसस्पतिना देवेन। वाताद्यज्ञः  
प्र युज्यताम्। तृतीयस्यै दिवः। गायत्रिया सोम आभृतः॥२४॥

सोमपीथाय सन्नयितुम्। वक्लमन्तरमा ददे। आपो देवीः शुद्धाः स्थ। इमा  
पात्राणि शुन्धत। उपातङ्ग्याय देवानाम्। पर्णवल्कमुत शुन्धत। पयो गृहेषु पयो  
अघ्नियासु। पयो वत्सेषु पय इन्द्राय हविषे धियस्व। गायत्री पर्णवल्केन। पयः  
सोमं करोत्विमम्॥२५॥

अग्निं गृह्णामि सुरथं यो मयोभूः। य उद्यन्तमारोहति सूर्यमहै। आदित्यं ज्योतिषां  
ज्योतिरुत्तमम्। श्वो यज्ञाय रमतां देवताभ्यः। वसून्नुद्रानादित्यान्। इन्द्रेण सह  
देवताः। ताः पूर्वः परिं गृह्णामि। स्व आयतने मनीषया। इमामूर्जं पञ्चदशीं ये  
प्रविष्टाः। तान्देवान्परिं गृह्णामि पूर्वः॥२६॥

अग्निर्हव्यवाडिह ताना वहतु। पौर्णमासः हविरिदमेषां मयि। आमावास्यः

हविरिदमेषां मयि। अन्तराऽग्नी पशवः। देवसुःसदमा गमन्। तान्पूर्वः परि  
 गृह्णामि। स्व आयतने मनीषया। इह प्रजा विश्वरूपा रमन्ताम्। अग्निं गृहपतिमभि  
 संवसानाः। ताः पूर्वः परि गृह्णामि॥२७॥

स्व आयतने मनीषया। इह पशवो विश्वरूपा रमन्ताम्। अग्निं गृहपतिमभि  
 संवसानाः। तान्पूर्वः परि गृह्णामि। स्व आयतने मनीषया। अयं पितृणामग्निः।  
 अवाङ्मुखा पितृभ्य आ। तं पूर्वः परि गृह्णामि। अविषन्नः पितुं करत्। अजस्रं  
 त्वाः सभापालाः॥२८॥

विजयभागः समिन्धताम्। अग्ने दीदाय मे सभ्य। विजित्यै शरदः शतम्।  
 अन्नमावसथीयम्। अभि हराणि शरदः शतम्। आवसथे श्रियं मन्त्रम्।  
 अहिर्बुध्नियो नि यच्छतु। इदमहमग्निज्यैष्ठेभ्यः। वसुभ्यो यज्ञं प्रब्रवीमि।  
 इदमहमिन्द्रज्यैष्ठेभ्यः॥२९॥

रुद्रेभ्यो यज्ञं प्र ब्रवीमि। इदमहं वरुणज्यैष्ठेभ्यः। आदित्येभ्यो यज्ञं प्र ब्रवीमि।  
 पर्यस्वतीरोषधयः। पर्यस्वद्वीरुधां पर्यः। अपां पर्यसो यत्पर्यः। तेन मामिन्द्र सः

सृज। अग्रे॑ व्रतपते व्रतं चरिष्यामि। तच्छे॑केयं तन्मे॑ राध्यताम्। वायौ॑ व्रतपत॒  
आदित्य॑ व्रतपते॥३०॥

व्रतानां॑ व्रतपते व्रतं चरिष्यामि। तच्छे॑केयं तन्मे॑ राध्यताम्। इमां प्राची॑मुदीचीम्।  
इष॒मूर्ज॑म॒भि स॒ङ्स्कृ॑ताम्। बहु॒पर्णाम॑शुष्काग्राम्। हरा॑मि पशुपाम॒हम्। यत्कृ॑ष्णो  
रूपं कृ॒त्वा। प्रावि॑शस्त्वं वन॒स्पतीन्। तत॒स्त्वामे॑कवि॒शति॑धा। सम्भ॑रामि  
सुस॒म्भृता॑॥३१॥

त्रीन्प॑रि॒धीऽस्ति॒स्रः स॒मिधः॑। य॒ज्ञायु॑रनुसञ्च॒रान्। उप॒वेषं॑ मेक्ष॑णं धृष्टि॑म्। सं  
भ॑रामि सुस॒म्भृता॑। या जा॒ता ओष॑धयः। दे॒वेभ्य॑स्त्रियु॒गं पुरा॑। तासां॑ पर्व॑ राध्यासम्।  
परि॒स्तर॑मा॒हरन्। अ॒पां मे॒ध्यं य॒ज्ञिय॑म्। सदे॒वः शि॒वम॑स्तु मे॥३२॥

आ॒च्छे॒त्ता वो॒ मा रि॑षम्। जीवा॑नि श॒रदः॑ श॒तम्। अप॑रिमितानां॒ परि॑मिताः।  
सन्न॑ह्ये सुकृ॒ताय॑ कम्। ए॒नो मा निगा॑ङ्क॒तम॑च्च॒नाह॑म्। पुन॑रु॒त्थाय॑ बहु॒ला भ॑वन्तु।  
स॒कृदा॑च्छि॒न्नं ब॒र्हि॒रूणा॑मृदु। स्यो॒नं पि॒तृभ्य॑स्त्वा भ॒राम्य॑हम्। अ॒स्मिन्सी॑दन्तु मे

पितरः सोम्याः। पितामहाः प्रपितामहाश्चानुगैः सह॥३३॥

त्रिवृत्पलाशे दुर्भः। इयान्प्रादेशसंमितः। यज्ञे पवित्रं पोतृतमम्। पयो हव्यं करोतु मे। इमौ प्राणापानौ। यज्ञस्याङ्गानि सर्वशः। आप्याययन्तौ सञ्चरताम्। पवित्रे हव्यशोधने। पवित्रे स्थो वैष्णवी। वायुर्वा मनसा पुनातु॥३४॥

अयं प्राणश्चापानश्च। यजमानमपि गच्छताम्। यज्ञे ह्यभूतां पोतारौ। पवित्रे हव्यशोधने। त्वया वेदिं विविदुः पृथिवीम्। त्वया यज्ञो जायते विश्वदानिः। अच्छिद्रं यज्ञमन्वेषि विद्वान्। त्वया होता सन्तनोत्यर्धमासान्। त्रयस्त्रिंशोऽसि तन्तूनाम्। पवित्रेण सहागहि॥३५॥

शिवेयं रञ्जुरभिधानी। अघ्नियामुप सेवताम्। अप्रस्रं साय यज्ञस्य। उखे उपदधाम्यहम्। पशुभिः सन्नीतं बिभृताम्। इन्द्राय शृतं दधि। उपवेषोऽसि यज्ञाय। त्वां परिवेषमधारयन्। इन्द्राय हविः कृण्वन्तः। शिवः शग्मो भवासि नः॥३६॥

अमृन्मयन्देवपात्रम्। यज्ञस्याऽऽयुषि प्र युज्यताम्। तिरः पवित्रमतिनीताः।



आपो धारय मातिंगुः। देवेन सवित्रोत्पूताः। वसोः सूर्यस्य रश्मिभिः। गां दोहपवित्रे  
रञ्जुम्। सर्वा पात्राणि शुन्यता। एता आ चरन्ति मधुमद्बुहानाः। प्रजावतीर्यशसो  
विश्वरूपाः॥३७॥

बृहीर्भवन्तीरुपजायमानाः। इह व इन्द्रो रमयतु गावः। पूषा स्थ। अयक्ष्मा वः  
प्रजया स९ सृजामि। रायस्पोषेण बहुलाभवन्तीः। ऊर्जं पयः पिन्वमाना घृतं च।  
जीवो जीवन्तीरुपवः सदेयम्। द्यौश्चेमं यज्ञं पृथिवी च सन्दुहाताम्। धाता सोमेन  
सह वातेन वायुः। यजमानाय द्रविणं दधातु॥३८॥

उत्सं दुहन्ति कलशं चतुर्बिलम्। इडां देवीं मधुमती९ सुवर्विदम्। तदिन्द्राग्नी  
जिन्वत९ सूनृतावत्। तद्यजमानममृतत्वे दधातु। कामधुक्षः प्र णो ब्रूहि। इन्द्राय  
हविरिन्द्रियम्। अमूं यस्यां देवानाम्। मनुष्याणां पयो हितम्। बहु दुग्धीन्द्राय  
देवेभ्यः। हव्यमा प्यायतां पुनः॥३९॥

वत्सेभ्यो मनुष्येभ्यः। पुनर्दोहाय कल्पताम्। यज्ञस्य सन्ततिरसि। यज्ञस्य

त्वा॒ सन्त॑ति॒मनु॑ सन्त॑नोमि। अद॑स्तमसि॒ विष्ण॑वे त्वा। यु॒ज्ञाया॑पि दधाम्य॒हम्।  
अ॒द्विररि॑त्तेन पात्रे॑ण। याः पू॒ताः प॑रि॒शेर॑ते। अ॒यं प॒यः सोम॑ कृत्वा। स्वां योनि॒मपि॑  
गच्छ॑तु॥ ४०॥

पु॒र्णव॒ल्कः पु॒वित्र॑म्। सौ॒म्यः सोम॒द्धि निर्मि॑तः। इ॒मौ पु॒र्णं च॒ दु॒र्भं च॑। दे॒वानां॑  
हव्य॒शोध॑नौ। प्रा॒त॒र्वे॒षाय॑ गोपाय। विष्णो॑ ह॒व्यः हि रक्ष॑सि। उ॒भा॒व॒ग्री उ॑पस्तृण॒ते।  
दे॒वता॑ उप॑वसन्तु मे। अ॒हं ग्रा॒म्यानु॑प॒ वसा॑मि। म॒ह्यं गोप॑तये प॒शून्॥ ४१॥  
गृह्णामि पूर्वस्ताः पूर्वः परिगृह्णामि सभापाला इन्द्रज्येष्ठेभ्य आदित्य व्रतपते सुसम्भृतां मे सह पुनातु गहि नो विश्वरूपा दधातु पुनर्गच्छतु पशून् (याः  
पुरस्तादिमामूर्जमिह प्रजा इह पशवोऽयं पितृणामग्निः।)॥

[४]

दे॒वां दे॒वेषु॑ परा॑क्रमध्वम्। प्रथ॑मा द्वितीये॑षु। द्विती॑यास्तृतीये॑षु। त्रिरे॑कादशा इ॒ह  
मा॑ऽवत। इ॒दं श॑केयं यदिदं क॒रोमि॑। आ॒त्मा क॑रोत्वा॒त्मनै॑। इ॒दं क॑रिष्ये भेष॒जम्।  
इ॒दं मे॑ विश्वभेष॒जा। अ॒श्विना॒ प्राव॑तं यु॒वम्। इ॒दम॒हं से॒नाया॑ अ॒भीत्व॑र्यै॥ ४२॥

मु॒ख॒मपो॑हामि। सूर्य॑ ज्योति॒र्वि भा॑हि। म॒ह॒त इ॒न्द्रिया॑य। आ॒प्याय॑तां घृ॒तयो॑निः।  
अ॒ग्नि॒र्हव्या॑ऽनु॒ मन्य॑ताम्। खम॑ङ्ख॒ त्वच॑मङ्ख॒। सु॒रूपं॑ त्वा॒ वसु॑विदम्। प॒शूनां॑ तेज॑सा।

अ॒ग्नये॒ जुष्ट॑म॒भि घा॑रयामि। स्यो॒नं ते॒ स॒दनं॑ करोमि॥४३॥

घृ॒तस्य॒ धा॑र॒या सु॑शे॒वं क॑ल्पयामि। तस्मि॑न्त्सी॒दामृ॑ते॒ प्रति॑ तिष्ठ। ब्री॒हीणां॑ मे॒ध  
सु॒मन॑स्यमा॒नः। आ॒र्द्रः प्र॑थ॒स्तुर्भु॑वनस्य गो॒पाः। शृ॒त उ॒थ्न्ना॑ति॒ जनि॑ता म॒तीना॑म्।  
यस्त॑ आ॒त्मा प॒शुषु॑ प्रवि॑ष्टः। दे॒वानां॑ वि॒ष्ठाम॑नु॒ यो वि॑त॒स्थे। आ॒त्म॒न्वान्त्सो॑म  
घृ॒तवा॑न् हि भू॒त्वा। दे॒वान्गा॑च्छु॒ सु॒र्ववि॑न्द॒ यज॑मानाय॒ मह्य॑म्। इ॒रा भू॑तिः पृथि॒व्यै  
रसो॒ मोत्क्र॑मीत्॥४४॥

दे॒वाः पि॑तरः पि॒तरो॑ दे॒वाः। योऽह॑म॒स्मि स॒ सन् य॑जे। यस्या॑स्मि॒ न त॑म॒न्तरे॑मि।  
स्वं म॑ इ॒ष्टं स्वं द॑त्तम्। स्वं पू॒र्तं स्व॑ श्रान्तम्। स्व॑ हु॒तम्। तस्य॑ मे॒ऽग्निर॑प॒द्रष्टा॑।  
वा॒युर॑प॒श्रो॒ता। आ॒दि॒त्योऽनु॑ख्या॒ता। द्यौः पि॒ता॥४५॥

पृथि॒वी मा॒ता। प्र॒जाप॑तिर्ब॒न्धुः। य ए॒वास्मि॒ स सन् य॑जे। मा भे॒र्मा सं॑वि॒क्था  
मा त्वा॑ हि॒ंसि॑षम्। मा ते॒ तेजो॑ऽप॑ क्र॒मीत्। भ॒र॒तमु॑द्धरे॒मनु॑षिश्च। अ॒व॒दाना॑नि  
ते प्र॒त्यव॑दास्यामि। नम॑स्ते अस्तु॒ मा मा॑ हि॒ंसीः। यद॑व॒दाना॑नि तेऽव॒घ्नन्।

विलो॒माका॑र्षमा॒त्मनः॑ ॥४६॥

आज्ये॑न प्रत्ये॑नज्येनत्। तत् आ प्या॑यतां पुनः॑। अज्या॑यो यवमा॒त्रात्।  
आ॒व्या॒धात्कृ॑त्यतामिदम्। मा रू॒रुपाम॑ य॒ज्ञस्ये॑। शुद्धं॑ स्वि॒ष्टमिदं॑ ह॒विः।  
मनु॑ना दृ॒ष्टां घृ॒तप॑दीम्। मि॒त्रावरु॑णसमीरिताम्। द॒क्षिणा॒र्धादस॑म्भिन्दन्।  
अव॑द्याम्येकतोमु॒खाम्॥४७॥

इडे॑ भा॒गं जु॑षस्व नः। जिन्व॒ गा जिन्वा॑र्वतः। तस्या॑स्ते भक्षि॒वाणः॑ स्याम।  
स॒र्वात्मा॑नः स॒र्वग॑णाः। ब्र॒ध्न पिन्व॑स्व। दद॑तो मे॒ मा क्षा॑यि। कुर्व॑तो मे॒ मोप॑दसत्।  
दि॒शां क्लृ॑प्तिरसि। दि॒शो मे॒ कल्प॑न्ताम्। कल्प॑न्तां मे॒ दिशः॑ ॥४८॥

दैवी॑श्च॒ मानु॑षीश्च। अ॒होरा॒त्रे मे॑ कल्पेताम्। अ॒र्धमा॒सा मे॑ कल्पन्ताम्। मा॒सा मे॑  
कल्पन्ताम्। ऋ॒तवो॑ मे॒ कल्प॑न्ताम्। सं॒वत्स॒रो मे॑ कल्पताम्। क्लृ॑प्तिरसि॒ कल्प॑तां  
मे। आशा॑नां त्वाऽऽशापा॒लेभ्यः॑। च॒तुर्भ्यो॑ अ॒मृतै॑भ्यः। इ॒दं भू॒तस्या॑र्ध्यक्षेभ्यः ॥४९॥

वि॒धेम॑ ह॒विषा॑ व॒यम्। भज॑तां भा॒गी भा॒गम्। मा भा॒गोऽभ॑क्त। निर॑भा॒गं

भजामः। अपस्मिन्व। ओषधीर्जिन्व। द्विपात्पाहि। चतुष्पादव। दिवो वृष्टिमेरय।  
ब्राह्मणानामिदं हविः॥५०॥

सोम्यानां सोमपीथिनाम्। निर्भक्तो ब्राह्मणः। नेहा ब्राह्मणस्यास्ति। समङ्कां  
बर्हिर्हविषा घृतेन। समादित्यैर्वसुभिः सं मरुद्भिः। समिन्द्रेण विश्वेभिर्देवेभिरङ्गाम्।  
दिव्यं नभो गच्छतु यत्स्वाहा। इन्द्राणीवाविधवा भूयासम्। अदितिरिव सुपुत्रा।  
अस्थूरि त्वा गार्हपत्य॥५१॥

उपनिषदे सुप्रजास्त्वायं। सं पत्नी पत्यां सुकृतेन गच्छताम्। यज्ञस्य युक्तौ  
धुर्यावभूताम्। सज्जानानौ विजहतामरातीः। दिवि ज्योतिरजरमा रभेताम्। दशते  
तनुवो यज्ञ यज्ञियाः। ताः प्रीणातु यजमानो घृतेन। नारिष्ठयोः प्रशिषमीडमानः।  
देवानां दैव्येऽपि यजमानोऽमृतोऽभूत्। यं वा देवा अकल्पयन्॥५२॥

ऊर्जो भागं शतक्रतू। एतद्वा तेन प्रीणानि। तेन तृप्यतमंहौ। अहं देवानां  
सुकृतामस्मि लोके। ममेदमिष्टं न मिथुर्भवाति। अहं नारिष्ठावनु यजामि विद्वान्।

यदाभ्यामिन्द्रो अदधाद्वाग्धेयम्। अदारसृद्धवत देवसोम। अस्मिन् यज्ञे मरुतो मृडता नः। मा नो विददभिभामो अशस्तिः॥५३॥

मा नो विदद्वृजना द्वेष्या या। ऋषभं वाजिनं वयम्। पूर्णमासं यजामहे। स नो दोहताः सुवीर्यम्। रायस्पोषः सहस्रिणम्। प्राणाय सुरार्धसे। पूर्णमासाय स्वाहा। अमावास्या सुभगा सुशेवा। धेनुरिव भूय आप्यायमाना। सा नो दोहताः सुवीर्यम्। रायस्पोषः सहस्रिणम्। अपानाय सुरार्धसे। अमावास्यायै स्वाहा। अभि स्तृणीहि परि धेहि वेदिम्। जामिं मा हिःसीरमुया शयाना। होतृषदना हरिताः सुवर्णाः। निष्का इमे यजमानस्य ब्रध्ने॥५४॥

अभीत्वयै करोमि क्रमीत्पिताऽऽत्मनं एकतो मुखं मे दिशोऽर्ध्यक्षेभ्यो हविर्गारहपत्या कल्पयन्नशस्तिः सा नो दोहताः सुवीर्यं सप्त च॥

[५]

परिस्तृणीत परिधत्ताग्निम्। परिहितोऽग्निर्यजमानं भुनक्तु। अपाः रस ओषधीनाः सुवर्णः। निष्का इमे यजमानस्य सन्तु कामदुघाः। अमुत्रामुष्मिल्लोके। भूपते भुवनपते। महतो भूतस्य पते। ब्रह्माणं त्वा वृणीमहे। अहं भूपतिरहं

भुवनपतिः। अहं महतो भूतस्य पतिः॥५५॥

देवेनं सवित्रा प्रसूत आर्त्विज्यं करिष्यामि। देवं सवितरेतं त्वा वृणते।  
बृहस्पतिं दैव्यं ब्रह्माणम्। तदहं मनसे प्र ब्रवीमि। मनो गायत्रियै। गायत्री  
त्रिष्टुभे। त्रिष्टुजगत्यै। जगत्यनुष्टुभे। अनुष्टुक्पङ्क्तौ। पङ्क्तिः प्रजापतये॥५६॥

प्रजापतिर्विश्वेभ्यो देवेभ्यः। विश्वे देवा बृहस्पतये। बृहस्पतिर्ब्रह्मणे। ब्रह्म भूर्भुवः  
सुवः। बृहस्पतिर्देवानां ब्रह्मा। अहं मनुष्याणाम्। बृहस्पते यज्ञं गोपाय। इदं तस्मै  
हर्म्यं करोमि। यो वो देवाश्चरति ब्रह्मचर्यम्। मेधावी दिक्षु मनसा तपस्वी॥५७॥

अन्तर्दूतश्चरति मानुषीषु। चतुः शिखण्डा युवतिः सुपेशाः। घृतप्रतीका भुवनस्य  
मध्ये। मर्मृज्यमाना महते सौभगाय। मह्यं धुक्स्व यजमानाय कामान्। भूमिर्भूत्वा  
महिमानं पुपोष। ततो देवी वर्धयते पयांसि। यज्ञियां यज्ञं वि च यन्ति शं च।  
ओषधीरापं इह शक्नोरीश्व। यो मा हृदा मनसा यश्च वाचा॥५८॥

यो ब्रह्मणा कर्मणा द्वेष्टि देवाः। यः श्रुतेन हृदयेनेष्णता च। तस्येन्द्र वज्रेण  
 शिरश्छिनद्भि। ऊर्णामृदु प्रथमानं स्योनम्। देवेभ्यो जुष्टं सदानाय बर्हिः। सुवर्गे  
 लोके यजमानं हि धेहि। मां नाकस्य पृष्ठे परमे व्योमन्। चतुः शिखण्डा युवतिः  
 सुपेशाः। घृतप्रतीका वयुनानि वस्ते। साऽऽस्तीर्यमाणा महते सौभगाय॥५९॥

सा मे धुक्व यजमानाय कामान्। शिवा च मे शग्मा चैधि। स्योना च मे  
 सुषदा चैधि। ऊर्जस्वती च मे पयस्वती चैधि। इषमूर्जं मे पिन्वस्व। ब्रह्म तेजो मे  
 पिन्वस्व। क्षत्रमोजो मे पिन्वस्व। विशं पुष्टिं मे पिन्वस्व। आयुरन्नाद्यं मे पिन्वस्व।  
 प्रजां पशून्मे पिन्वस्व॥६०॥

अस्मिन् यज्ञ उप भूय इन्नु मे। अविंक्षोभाय परिधीं दधामि। धर्ता धरुणो  
 धरीयान्। अग्निर्द्वेषांसि निरितो नुदातै। विच्छिनद्भि विधृतीभ्यां सपत्नान्।  
 जातान्भ्रातृव्यान् ये च जनिष्यमाणाः। विशो यन्त्राभ्यां विधमाम्येनान्। अहं  
 स्वानामुत्तमोऽसानि देवाः। विशो यन्त्रे नुदमाने अरातिम्। विश्वं पाप्मानममतिं



दुर्मरायुम्॥६१॥

सीदन्ती देवी सुकृतस्य लोके। धृतीं स्थो विधृती स्वधृती। प्राणान्मयि  
धारयतम्। प्रजां मयि धारयतम्। पशून्मयि धारयतम्। अयं प्रस्तर उभयस्य  
धृता। धृता प्रयजानामुतानूयाजानाम्। स दाधार समिधो विश्वरूपाः। तस्मिन्श्नुचो  
अध्या सादयामि। आ रोह पथो जुहु देवयानान्॥६२॥

यत्रर्षयः प्रथमजा ये पुराणाः। हिरण्यपक्षाऽजिरा सम्भृताङ्गा। वहांसि मा  
सुकृतां यत्र लोकाः। अवाहं बाध उपभृता सपत्नान्। जातान्भ्रातृव्यान् ये च  
जनिष्यमाणाः। दोहै यज्ञं सुदुघामिव धेनुम्। अहमुत्तरो भूयासम्। अधरे  
मथ्सपत्नाः। यो मा वाचा मनसा दुर्मरायुः। हृदाऽरातीयादभिदासदग्ने॥६३॥

इदमस्य चित्तमधरं ध्रुवायाः। अहमुत्तरो भूयासम्। अधरे मथ्सपत्नाः।  
ऋषभोऽसि शाक्रः। घृताचीनां सूनुः। प्रियेण नाम्नां प्रिये सदसि सीद। स्योनो  
मे सीद सुषदः पृथिव्याम्। प्रथयि प्रजयां पशुभिः सुवर्गे लोके। दिवि सीद

पृथिव्यामन्तरिक्षे। अहमुत्तरो भूयासम्॥६४॥

अधरे मथ्सपत्नः। इयं स्थाली घृतस्य पूर्णा। अच्छिन्नपयाः शतधार उथ्सः।  
मारुतेन शर्मणा दैव्येन। यज्ञोऽसि सर्वतः श्रितः। सर्वतो मां भूतं भविष्यच्छ्रयताम्।  
शतं मे सन्त्वाशिषः। सहस्रं मे सन्तु सूनृताः। इरावतीः पशुमतीः। प्रजापतिरसि  
सर्वतः श्रितः॥६५॥

सर्वतो मां भूतं भविष्यच्छ्रयताम्। शतं मे सन्त्वाशिषः। सहस्रं मे सन्तु सूनृताः।  
इरावतीः पशुमतीः। इदमिन्द्रियममृतं वीर्यम्। अनेनेन्द्राय पशवोऽचिकित्सन्। तेन  
देवा अवतोप माम्। इहेषमूर्जं यशः सह ओजः सनेयम्। शृतं मयि श्रयताम्।  
यत्पृथिवीमचरत्तत्प्रविष्टम्॥६६॥

येनासिश्चद्वलमिन्द्रे प्रजापतिः। इदं तच्छुक्रं मधु वाजिनीवत्। येनोपरिष्ठादधि नोन्म  
दधि मां धिनोतु। अयं वेदः पृथिवीमन्वविन्दत्। गुहां सतीं गहने गह्वरेषु।  
स विन्दतु यजमानाय लोकम्। अच्छिद्रं यज्ञं भूरिकर्मा करोतु। अयं यज्ञः

समंसदद्धविष्मान्। ऋचा साम्ना यजुषा देवताभिः॥६७॥

तेन लोकान्त्सूर्यवतो जयेम। इन्द्रस्य सुख्यममृतत्वमश्याम्। यो नः कनीय इह कामयातै। अस्मिन् यज्ञे यजमानाय मह्यम्। अप तमिन्द्राग्नी भुवनान्नुदेताम्। अहं प्रजां वीरवतीं विदेय। अग्ने वाजजित्। वाजं त्वा सरिष्यन्तम्। वाजं जेष्यन्तम्। वाजिनं वाजजितम्॥६८॥

वाजजित्यायै सं माजिर्म। अग्निमन्नादमन्नाद्याय। उपहूतो द्यौः पिता। उप मां द्यौः पिता ह्वयताम्। अग्निराग्नीध्रात्। आयुषे वर्चसे। जीवात्वै पुण्याय। उपहूता पृथिवी माता। उप मां माता पृथिवी ह्वयताम्। अग्निराग्नीध्रात्॥६९॥

आयुषे वर्चसे। जीवात्वै पुण्याय। मनो ज्योतिर्जुषतामाज्यम्। विच्छिन्नं यज्ञं समिमं दधातु। बृहस्पतिस्तनुतामिमं नः। विश्वे देवा इह मादयन्ताम्। यन्ते अग्न आवृश्चामि। अहं वा क्षिपितश्चरन्। प्रजां च तस्य मूलं च। नीचैर्देवा नि वृश्चत॥७०॥

अग्ने॑ यो नोऽभि॒दास॑ति। सु॒मा॒नो यश्च॑ नि॒ष्ठ्यः। इ॒ध्मस्यै॑व प्र॒क्षाय॑तः। मा  
तस्योच्छे॑षि॒ किञ्च॑न। यो मां द्वेष्टि॑ जा॒तवे॑दः। यं चाऽऽहं॑ द्वेष्मि॒ यश्च॑ माम्।  
सर्वा॑ऽस्तान॑ग्रे सन्द॑ह। या॑ऽश्चाहं॑ द्वेष्मि॒ ये च॑ माम्। अग्ने॑ वाजजित्। वाजं॑ त्वा  
ससृ॑वाऽसम्॥ ७१॥

वाजं॑ जिगि॒वाऽसम्॑। वा॒जिनं॑ वाज॒जितम्॑। वा॒ज॒जि॒त्यायै॑ सम्मा॑र्जिम्।  
अ॒ग्निम॑न्ना॒दम॑न्नाद्याय। वेदि॑र्ब॒र्हिः श्रु॑तऽ ह॒विः। इ॒ध्मः परि॑धयः सु॒चः। आ॒ज्यं  
य॒ज्ञ ऋ॒चो य॒जुः। या॒ज्याश्च॑ वषट्का॒राः। सं मे॒ सन्न॑तयो नमन्ताम्। इ॒ध्मस॒न्नह॑ने  
हु॒ते॥ ७२॥

दि॒वः खी॑लोऽव॑ततः। पृ॒थि॒व्या अ॒ध्युत्थि॑तः। तेना॑ स॒हस्र॑काण्डेन। द्विष॑न्तऽ  
शोच॑यामसि। द्विष॑न्मे ब॒हु शो॑चतु। ओष॑धे॒ मो अ॒हऽ शु॑चम्। य॒ज्ञ नम॑स्ते य॒ज्ञ।  
नमो॑ नम॑श्च ते य॒ज्ञ। शि॒वेन॑ मे॒ सन्ति॑ष्ठस्व। स्यो॒नेन॑ मे॒ सन्ति॑ष्ठस्व॥ ७३॥

सु॒भू॒तेन॑ मे॒ सन्ति॑ष्ठस्व। ब्र॒ह्म॒व॒र्च॒सेन॑ मे॒ सन्ति॑ष्ठस्व। य॒ज्ञस्य॑र्द्धि॒मनु॑ सन्ति॑ष्ठस्व।

उप॑ ते यज्ञ॑ नमः॑। उप॑ ते नमः॑। उप॑ ते नमः॑। त्रि॒ष्फ॒लीक्रि॒यमा॑णानाम्। यो न्य॒ङ्गो  
अ॒व॒शिष्य॑ते। रक्ष॑सां भाग॒धेयम्॑। आप॒स्तत्र॑ व॒हता॑दि॒तः॥७४॥

उ॒लूख॑ले॒ मुस॑ले॒ यच्च॑ शूर्पे॑॥ आ॒शि॒श्लेष॑ दृष॒दि यत्क॑पाले॑॥ अ॒व॒प्रुषो॑ वि॒प्रुषः॑  
संय॑जामि। वि॒श्वे दे॒वा ह॒विरि॑दं जु॒षन्ता॑म्। य॒ज्ञे या वि॒प्रुषः॑ सन्ति॑ ब॒ह्वीः। अ॒ग्नौ  
ताः सर्वाः॑ स्वि॒ष्टाः सु॒हृता॑ जुहोमि। उ॒द्यन्न॒द्यमि॑त्र महः॑। स॒पत्न्या॑न्मे अनीनशः॑।  
दि॒वैनान् वि॒द्युता॑ जहि। नि॒म्रोच॑न्न॒धरा॑न्कृ॒धि॥७५॥

उ॒द्यन्न॒द्य वि नो॑ भज। पि॒ता पु॒त्रेभ्यो॑ यथा॑॥ दी॒र्घायु॑त्वस्य॑ हे॒शिषे॑। तस्य॑ नो  
देहि॑ सूर्य॑।

### ॥ हृद्रोगघ्न-मन्त्राः ॥

उ॒द्यन्न॒द्य मि॑त्रमहः॑। आ॒रोह॑न्नुत्तरां॑ दि॒वम्॑॥ हृ॒द्रो॒गं मम॑ सूर्य॑। ह॒रि॒माणं॑ च नाशय॑।  
शु॒क्रेषु॑ मे ह॒रि॒माणम्॑। रो॒प॒णाका॑सु दध्मसि॑॥७६॥

अथो॑ ह॒रि॒द्र॒वेषु॑ मे। ह॒रि॒माणं॑ नि दध्मसि॑। उद॑गाद॒यमा॑दित्यः॑। वि॒श्वेन॑ सह॑सा

स॒ह। द्विष॑न्तं॒ मम॑ र॒न्धय॑न्। मो अ॒हं द्विष॑तो र॒धम्।



यो नः॑ शपा॒दश॑पतः। यश्च॑ नः॑ शप॑तः शपा॑त्। उ॒षाश्च॑ तस्मै॑ नि॒मृक्क॑। सर्वं॑ पा॒प॒५  
समू॑हताम्॥ ७७ ॥

यो नः॑ स॒पत्नो॒ यो रणः॑। म॒र्तोऽभि॑दास॑न्ति दे॒वाः। इ॒ध्मस्यै॑व प्र॒क्षाय॑न्तः। मा  
तस्योच्छे॑षि किञ्च॒न। अ॒व॑सृष्टः॒ परा॑पत। श॒रो ब्र॒ह्म॑स॒५शितः॑। गच्छा॑ऽमित्रा॒न्प्र  
वि॑श। मै॒षां कश्च॑नोच्छे॑षः॥ ७८ ॥

पतिः प्रजापतये तपस्वी वाचा सौभगाय पशून्मे पिन्वस्व दुर्मरायु देवयानानग्नेऽन्तरिक्षेऽहमुत्तरो  
भूयासं प्रजापतिरसि सर्वतः श्रितः प्रविष्टं देवताभिर्वाज्जितं पृथिवी ह्वयतामग्निराग्नीध्राद्वश्त समुवा५सरं हुते स्योनेन मे सन्तिष्ठस्वेतः कृधि दध्मस्यूहतामष्टौ  
च॥

[६]

सक्षे॒दं प॑श्य। वि॒ध॑र्त॒रि॒दं प॑श्य। ना॒के॒दं प॑श्य। र॒म॒तिः प॑नि॒ष्टा। ऋ॒तं व॑र्षि॒ष्ठम्।  
अ॒मृता॒यान्या॒हुः। सूर्यो॑ व॒रि॑ष्ठो अ॒क्षभिर्वि॑भा॒ति। अनु॑ द्यावा॑पृथि॒वी दे॒वपु॑त्रे।  
दी॒क्षाऽसि॑ तप॑सो॒ योनिः॑। तपो॑ऽसि॒ ब्र॒ह्म॑णो॒ योनिः॑॥ ७९ ॥

ब्र॒ह्मा॑सि क्ष॒त्रस्य॑ योनिः। क्ष॒त्रम॑स्यु॒तस्य॑ योनिः। ऋ॒तम॑सि॒ भूरा र॑भे। श्र॒द्धां  
मन॑सा। दी॒क्षां तप॑सा। वि॒श्वस्य॑ भुव॑न॒स्याधि॑प॒त्नीम्। सर्वे॑ कामा॒ यज॑मानस्य

सन्तु। वातं प्राणं मनसाऽन्वा रभामहे। प्रजापतिं यो भुवनस्य गोपाः। स नो मृत्योस्त्रायतां पात्वहंसः॥८०॥

ज्योग्जीवा जरामशीमहि। इन्द्रं शाक्वर गायत्रीं प्रपद्ये। तान्ते युनज्मि। इन्द्रं शाक्वर त्रिष्टुभं प्रपद्ये। तान्ते युनज्मि। इन्द्रं शाक्वर जगतीं प्रपद्ये। तान्ते युनज्मि। इन्द्रं शाक्वरानुष्टुभं प्रपद्ये। तान्ते युनज्मि। इन्द्रं शाक्वर पङ्क्तिं प्रपद्ये॥८१॥

तान्ते युनज्मि। आऽहं दीक्षामरुहमृतस्य पत्नीम्। गायत्रेण छन्दसा ब्रह्मणा च। ऋतं सत्येऽधायि। सत्यमृतेऽधायि। ऋतं च मे सत्यं चाभूताम्। ज्योतिरभूवः सुवरगमम्। सुवर्गं लोकं नाकस्य पृष्ठम्। ब्रध्नस्य विष्टपमगमम्। पृथिवी दीक्षा॥८२॥

तयाऽग्निर्दीक्षया दीक्षितः। ययाऽग्निर्दीक्षया दीक्षितः। तया त्वा दीक्षया दीक्षयामि। अन्तरिक्षं दीक्षा। तया वायुर्दीक्षया दीक्षितः। यया वायुर्दीक्षया दीक्षितः। तया त्वा दीक्षया दीक्षयामि। द्यौर्दीक्षा। तयाऽऽदित्यो दीक्षया दीक्षितः। ययाऽऽदित्यो दीक्षया दीक्षितः॥८३॥

तया॑ त्वा दी॒क्षया॑ दीक्षयामि। दि॒शो दी॒क्षा। तया॑ च॒न्द्रमा॑ दी॒क्षया॑ दीक्षि॒तः।  
 यया॑ च॒न्द्रमा॑ दी॒क्षया॑ दीक्षि॒तः। तया॑ त्वा दी॒क्षया॑ दीक्षयामि। आपो॑ दी॒क्षा। तया॑  
 वरु॑णो राजा दी॒क्षया॑ दीक्षि॒तः। यया॑ वरु॑णो राजा दी॒क्षया॑ दीक्षि॒तः। तया॑ त्वा  
 दी॒क्षया॑ दीक्षयामि। ओष॑धयो दी॒क्षा॥८४॥

तया॑ सोमो॒ राजा॑ दी॒क्षया॑ दीक्षि॒तः। यया॑ सोमो॒ राजा॑ दी॒क्षया॑ दीक्षि॒तः।  
 तया॑ त्वा दी॒क्षया॑ दीक्षयामि। वाग्दी॒क्षा। तया॑ प्रा॒णो दी॒क्षया॑ दीक्षि॒तः। यया॑ प्रा॒णो  
 दी॒क्षया॑ दीक्षि॒तः। तया॑ त्वा दी॒क्षया॑ दीक्षयामि। पृ॒थि॒वी त्वा दी॒क्षमा॑णमनु दीक्षताम्।  
 अ॒न्तरि॑क्षं त्वा दी॒क्षमा॑णमनु दीक्षताम्। द्यौस्त्वा दी॒क्षमा॑णमनु दीक्षताम्॥८५॥

दि॒शस्त्वा दी॒क्षमा॑णमनु दीक्षन्ताम्। आप॑स्त्वा दी॒क्षमा॑णमनु दीक्षन्ताम्।  
 ओष॑धयस्त्वा दी॒क्षमा॑णमनु दीक्षन्ताम्। वाक्त्वा दी॒क्षमा॑णमनु दीक्षताम्। ऋच॑स्त्वा  
 दी॒क्षमा॑णमनु दीक्षन्ताम्। सामा॑नि त्वा दी॒क्षमा॑णमनु दीक्षन्ताम्। यजू॑ंषि त्वा  
 दी॒क्षमा॑णमनु दीक्षन्ताम्। अह॑श्च रात्रि॑श्च। कृषि॑श्च वृष्टि॑श्च। त्विषि॑श्चाप॑चितिश्च॥८६॥

आप॑श्चोष॑धयश्च। ऊ॒र्क् सूनृ॑ता च। तास्त्वा दी॒क्षमा॑णमनु दीक्षन्ताम्। स्वे दक्षे॑



दक्षपितॄह सीद। देवानां सुमो महते रणाय। स्वासस्थस्तनुवा संविशस्व।  
पितेवैधि सूनव आ सुशेवः। शिवो मां शिवमा विंश। सत्यं मं आत्मा। श्रद्धा  
मेऽक्षितिः॥८७॥

तपो मे प्रतिष्ठा। सवितृप्रसूता मां दिशो दीक्षयन्तु। सत्यमस्मि। अहं त्वदस्मि  
मदसि त्वमेतत्। ममासि योनिस्तव योनिरस्मि। ममैव सन्वहं हव्यान्यग्रे। पुत्रः  
पित्रे लोककृज्जातवेदः। आजुह्वानः सुप्रतीकः पुरस्तात्। अग्रे स्वां योनिमा सीद  
साध्या। अस्मिन्सधस्थे अद्युत्तरस्मिन्॥८८॥

विश्वे देवा यजमानश्च सीदत। एकमिषे विष्णुस्त्वाऽन्वेतु। द्वे ऊर्जे विष्णुस्त्वा-  
ऽन्वेतु। त्रीणि व्रताय विष्णुस्त्वाऽन्वेतु। चत्वारि मायोभवाय विष्णुस्त्वाऽन्वेतु। पञ्च  
पशुभ्यो विष्णुस्त्वाऽन्वेतु। षड्रायस्पोषाय विष्णुस्त्वाऽन्वेतु। सप्त सप्तभ्यो होत्राभ्यो  
विष्णुस्त्वाऽन्वेतु। सखायः सप्तपदा अभूमा। सुख्यं ते गमेयम्॥८९॥

सख्यात्ते मा योषम्। सख्यान्मे मा योषाः। साऽसि सुब्रह्मण्ये। तस्यांस्ते पृथिवी

पादः। साऽसि सुब्रह्मण्ये। तस्यांस्तेऽन्तरिक्षं पादः। साऽसि सुब्रह्मण्ये। तस्यांस्ते  
द्यौः पादः। साऽसि सुब्रह्मण्ये। तस्यांस्ते दिशः पादः॥९०॥

पुरोरजास्ते पञ्चमः पादः। सा न इषमूर्जं धुक्वा तेजं इन्द्रियम्।  
ब्रह्मवर्चसमन्नाद्यम्। वि मिमे त्वा पयस्वतीम्। देवानां धेनुः सुदुधामनपस्फुरन्तीम्।  
इन्द्रः सोमं पिबतु। क्षेमो अस्तु नः। इमान्नराः कृणुत वेदिमेत्य। वसुमतीः  
रुद्रवतीमादित्यवतीम्॥९१॥

वर्ष्मन्दिवः। नाभां पृथिव्याः। यथाऽयं यजमानो न रिष्येत्। देवस्य सवितुः सवे।  
चतुः शिखण्डा युवतिः सुपेशाः। घृतप्रतीका भुवनस्य मध्ये। तस्याः सुपर्णावधि  
यौ निविष्टौ। तयोर्देवानामधि भागधेयम्। अप् जन्यं भयं नुद। अपं चक्राणि वर्तय।  
गृहः सोमस्य गच्छतम्। न वा उ वेतन्म्रियसे न रिष्यसि। देवाः इदैषि पृथिभिः  
सुगेभिः। यत्र यन्ति सुकृतो नापि दुष्कृतः। तत्र त्वा देवः सविता दधातु॥९२॥

योनिरहंसः पुङ्क्तिं प्रपद्ये दीक्षा यथाऽऽदित्यो दीक्षया दीक्षितस्तथा त्वा दीक्षया दीक्षयाम्योपधयो दीक्षा द्यौस्त्वा दीक्षमाणमनु दीक्षतामपचित्तिश्चाक्षितिरुत्तरस्मिन्गमेयं  
दिशः पाद आदित्यवती वर्तय पञ्च च॥

यदस्य पारे रजसः। शुक्रं ज्योतिरजायत। तन्नः पर्षदति द्विषः। अग्ने वैश्वानर-  
स्वाहा॥ यस्माद्दीषाऽवाशिष्टाः। ततो नो अभयं कृधि। प्रजाभ्यः सर्वाभ्यो मृडा।  
नमो रुद्राय मीढुषे॥ यस्माद्दीषा न्यषदः। ततो नो अभयं कृधि॥९३॥

प्रजाभ्यः सर्वाभ्यो मृडा। नमो रुद्राय मीढुषे॥ उदुस्त्र तिष्ठ प्रति तिष्ठ मारिषः।  
मेमं यज्ञं यजमानं च रीरिषः। सुवर्गे लोके यजमानं हि धेहि। शन्न एधि द्विपदे  
शं चतुष्पदे। यस्माद्दीषाऽवैपिष्टाः पलायिष्टाः समज्ञास्थाः। ततो नो अभयं कृधि।  
प्रजाभ्यः सर्वाभ्यो मृडा। नमो रुद्राय मीढुषे॥९४॥

य इदमकः। तस्मै नमः। तस्मै स्वाहा॥ न वा उवेतन्म्रियसे। आशानां त्वा विश्वा-  
आशाः। यज्ञस्य हि स्थ ऋत्वियौ॥ इन्द्राग्नी चेतनस्य च। हुताहुतस्य तृप्यतम्।  
अहुतस्य हुतस्य च। हुतस्य चाहुतस्य च। अहुतस्य हुतस्य च। इन्द्राग्नी अस्य  
सोमस्य। वीतं पिबतं जुषेथाम्। मा यजमानं तमो विदत्। मर्त्विजो मो इमाः  
प्रजाः। मा यः सोममिमं पिबात्। सः सृष्टमुभयं कृतम्॥९५॥ कृधि मीढुषेऽहुतस्य च सप्त च॥[८]

अ॒ना॒गसं॑स्त्वा व॒यम्। इ॒न्द्रेण॑ प्रे॒षिता॒ उप॑। वा॒युष्टे॑ अ॒स्त्व॑श्श॒भूः। मि॒त्रस्ते॑  
अ॒स्त्व॑श्श॒भूः। वरु॑णस्ते अ॒स्त्व॑श्श॒भूः। अपा॑ङ्ग्या ऋ॒तस्य॑ गर्भाः। भुव॑नस्य  
गो॒पाः श्येना॑ अतिथयः। पर्व॑तानां ककु॒भः प्र॒युतो॑ नपा॒तारः। व॒शुनेन्द्र॑ ह्य॒यत॑।  
घोषे॑णामी॒वाश्चा॑तयत॥ ९६॥

यु॒क्ताः स्थ॒ वह॑त। दे॒वा ग्रा॒वाण॑ इ॒न्दुरिन्द्र॑ इत्य॑वादिषुः। ए॒न्द्रम॑चुच्यवुः प॒रम॑स्याः  
प॒राव॑तः। आ॒ऽस्मात्स॒धस्था॑त्। ओ॒रोर॑न्तरि॒क्षात्। आ सु॑भू॒तम॑सुषवुः। ब्र॒ह्मव॑र्चसं  
म आ॑सुषवुः। स॒मरे॑ रक्षा॑स्यवधिषुः। अप॑हतं ब्रह्म॒ज्यस्य॑। वाक्क्र॑ त्वा म॒नश्च॑  
श्रीणी॑ताम्॥ ९७॥

प्रा॒णश्च॑ त्वा॒ऽपान॑श्च॒ श्रीणी॑ताम्। चक्षु॑श्च त्वा श्रो॒त्रं च॑ श्रीणी॑ताम्। दक्ष॑श्चत्वा बलं  
च श्रीणी॑ताम्। ओज॑श्च त्वा स॒हश्च॑ श्रीणी॑ताम्। आयु॑श्च त्वा॒ऽजरा॑ च॒ श्रीणी॑ताम्।  
आ॒त्मा च॑ त्वा त॒नूश्च॑ श्रीणी॑ताम्। श्रु॒तो॑ऽसि श्रु॒तं कृ॑तः। श्रु॒तार्य॑ त्वा श्रु॒तेभ्य॑स्त्वा।  
यमिन्द्र॑मा॒हुर्वरु॑णं यमा॒हुः। यं मि॒त्रमा॒हुर्यमु॑ स॒त्यमा॒हुः॥ ९८॥

यो दे॒वानां॑ दे॒वत॑मस्तपो॒जाः। तस्मै॑ त्वा तेभ्य॑स्त्वा। मयि॑ त्यदिन्द्रि॒यं म॒हत्। मयि॑

दक्षो मयि क्रतुः। मयि धायि सुवीर्यम्। त्रिशुङ्घर्मो वि भातु मे। आकूत्या मनसा  
सह। विराजा ज्योतिषा सह। यज्ञेन पयसा सह। तस्य दोहमशीमहि॥९९॥

तस्य सुम्रमशीमहि। तस्य भक्षमशीमहि। वाग्जुषाणा सोमस्य तृप्यतु। मित्रो  
जनान्प्र स मित्र। यस्मान्न जातः परो अन्यो अस्ति। य आविवेश भुवनानि  
विश्वो। प्रजापतिः प्रजया संविदानः। त्रीणि ज्योतींषि सचते स षोडशी। एष  
ब्रह्मा य ऋत्वियः। इन्द्रो नाम श्रुतो गुणे॥१००॥

प्र ते महे विदथे शसिषु हरी। य ऋत्वियः प्र ते वन्वे। वनुषो हर्यतं  
मदम्। इन्द्रो नाम घृतं नयः। हरिभिश्चारु सेचते। श्रुतो गुण आ त्वा विशन्तु।  
हरिवर्षसङ्गिरः। इन्द्राधिपतेऽधिपतिस्त्वं देवानामसि। अधिपतिं माम्। आयुष्मन्तं  
वर्चस्वन्तं मनुष्येषु कुरु॥१०१॥

इन्द्रश्च सम्राड्वरुणश्च राजा। तौ ते भक्षं चक्रतुरग्र एतम्। तयोरनु भक्षं भक्षयामि।  
वाग्जुषाणा सोमस्य तृप्यतु। प्रजापतिर्विश्वकर्मा। तस्य मनो देवं यज्ञेन राध्यासम्।

अ॒र्थे॒गा अ॒स्य ज॑हितः। अ॒व॒सान॑पतेऽव॒सानं॑ मे वि॒न्द। नमो॑ रु॒द्राय॑ वास्तो॒ष्पत॑ये।  
आय॑ने वि॒द्रव॑णे॥१०२॥

उ॒द्याने॑ यत्प॒राय॑णे। आ॒वर्त॑ने वि॒वर्त॑ने। यो गो॑पा॒यति॑ त॒५ हु॑वे।  
या॒न्य॑पा॒मित्या॒न्यप्र॑ती॒त्तान्य॑स्मि॒। य॒मस्य॑ ब॒लिना॒ चरा॑मि। इ॒हैव॑ सन्तः प्र॒ति  
तद्या॑तयामः। जी॒वा जी॒वेभ्यो॑ नि ह॑राम ए॒नत्। अ॒नृणा॑ अ॒स्मिन्न॑नृणाः पर॑स्मिन्।  
तृती॑ये लो॒के अ॑नृणाः स्या॑म। ये दै॒व्याना॑ उ॒त पि॑तृयाणाः॥१०३॥

सर्वा॑न्प॒थो अ॑नृणा आ॒क्षी॑येम। इ॒दमू॑नु श्रेयो॑ऽव॒सान॑मा ग॑न्म। शि॒वे नो॒  
द्यावा॑पृथि॒वी उ॒भे इ॒मे। गोम॑द्धन॒वद॑श्व॒वदूर्ज॑स्वत्। सु॒वीरा॑ वी॒रैर॑नु सञ्च॑रेम। अ॒र्कः  
प॒वित्र॑५ रज॑सो वि॒मानः॑। पु॒नाति॑ दे॒वानां॑ भुव॑नानि वि॒श्वा॑। द्यावा॑पृथि॒वी पय॑सा  
संवि॑दाने। घृ॒तं दु॑हाते अ॒मृतं॑ प्रपी॑ने। प॒वित्र॑म॒र्को रज॑सो वि॒मानः॑। पु॒नाति॑ दे॒वानां॑  
भुव॑नानि वि॒श्वा॑। सु॒व॒ज्योति॑र्यशो॑ म॒हत्। अ॒शीम॑हि गा॒धमु॑त प्र॒तिष्ठा॑म्॥१०४॥

चातयत्

श्रीणीता५ सत्यमाहुरंशीमहि गणे कुरु विद्रवणे पितृयाणां अर्को रजसो विमानस्त्रीणि च॥

[९]

उद॑स्ताम्प॒सी॒थ्सवि॒ता मि॒त्रो अ॑र्य॒मा। सर्वा॑न॒मित्रा॑नवधीद्युगेन॑। बृ॒हन्तं॑  
 माम॑करद्वी॒रव॑न्तम्। र॒थन्त॑रे श्र॑यस्व॒ स्वाहा॑ पृथि॒व्याम्। वाम॑दे॒व्ये श्र॑यस्व॒  
 स्वाहा॑ऽन्तरि॒क्षे। बृ॒हति॑ श्र॑यस्व॒ स्वाहा॑ दि॒वि। बृ॒हता॑ त्वोप॑स्त॒भ्रोमि॑। आ त्वा॑ ददे  
 यश॑से वी॒र्या॑य च। अ॒स्मास्वा॑घ्निया यू॒यं द॑धाथेन्द्रि॒यं पयः॑। यस्तै॑ द्र॒प्सो यस्तं॑  
 उद॒रूषः॑॥१०५॥

दै॒व्यः के॒तुर्वि॑श्वं भुव॑नमा॒विवेश॑। स नः॑ पा॒ह्यरि॑ष्ठ्यै स्वाहा॑। अनु॑ मा॒ सर्वो॑  
 य॒ज्ञोऽयमे॑तु। वि॒श्वे दे॒वा म॑रुतः॒ सामा॑र्कः। अ॒प्रिय॑श्छन्दा॑सि नि॒विदो॑ यजू॑षि।  
 अ॒स्यै पृ॑थि॒व्यै यद्य॑ज्ञि॒यम्। प्र॒जाप॑तेर्व॒र्तनि॑मनु॒ वर्त॑स्व। अनु॑वी॒रैरनु॑ रा॒ध्याम् गो॑भिः।  
 अ॒न्वश्चै॒रनु॑ स॒र्वैरु॑ पु॒ष्टैः। अनु॑ प्र॒जया॑ऽन्विन्द्रि॒येण॑॥१०६॥

दे॒वा नो॑ य॒ज्ञमृ॑जुधा न॑यन्तु। प्र॒तिक्ष॑त्रे प्र॒ति ति॑ष्ठामि रा॒ष्ट्रे। प्र॒त्यश्वे॑षु प्र॒ति  
 ति॑ष्ठामि गो॒षु। प्र॒ति प्र॒जायां॑ प्र॒ति ति॑ष्ठामि भ॒व्यै। वि॒श्वम॑न्याऽभि॑ वावृ॒धे।  
 तद॒न्यस्या॒मधि॑श्रितम्। दि॒वे च॑ वि॒श्वक॑र्मणे। पृथि॒व्यै चा॑करं॒ नमः॑। अ॒स्कान्द्यौः॑

पृथिवीम्। अस्कांनृषभो युवागाः॥१०७॥

स्कन्नेमा विश्वा भुवना। स्कन्नो यज्ञः प्र जनयतु। अस्कानजनि प्राजनि। आ  
स्कन्नाज्जायते वृषा। स्कन्नात्प्र जनिषीमहि। ये देवा येषामिदं भागधेयं बभूव। येषां  
प्रयाजा उत्तानूयाजाः। इन्द्रज्येष्ठेभ्यो वरुणराजभ्यः। अग्निहोतृभ्यो देवेभ्यः स्वाहा।  
उत त्या नो दिवा मृतिः॥१०८॥

अदितिरूत्या गमत्। सा शन्ताची मयस्करत्। अप स्त्रिधः। उत त्या  
दैव्या भिषजा। शन्नस्करतो अश्विना। यूयातामस्मद्रपः। अप स्त्रिधः।  
शमग्निरग्निभिस्करत्। शन्नस्तपतु सूर्यः। शं वातो वात्वरपाः॥१०९॥

अप स्त्रिधः। तदित्पदं न विचिकेत विद्वान्। यन्मृतः पुनरप्येति जीवान्।  
त्रिवृद्धवृनस्य रथवृत्। जीवो गर्भो न मृतः स जीवात्। प्रत्यस्मै पिपीषते। विश्वानि  
विदुषे भर। अरङ्गमाय जग्मवे। अपश्चादध्वने नरे। इन्दुरिन्दुमवांगात्। इन्दोरिन्द्रो-  
ऽपात्। तस्य त इन्द्रविन्द्रपीतस्य मधुमतः। उपहृतस्योपहृतो भक्षयामि॥११०॥

इन्द्रियेण गा मतिररपा अंगान्त्राणि च॥

[१०]



ब्रह्मं प्रतिष्ठा मनसो ब्रह्मं वाचः। ब्रह्मं यज्ञानां हविषामाज्यस्य। अतिरिक्तं कर्मणो यच्च हीनम्। यज्ञः पर्वाणि प्रतिरन्नेति कल्पयन्। स्वाहाकृताऽऽहुतिरेतु देवान्। आश्रावितमत्याश्रावितम्। वर्षद्वृतमत्यनूक्तं च यज्ञे। अतिरिक्तं कर्मणो यच्च हीनम्। यज्ञः पर्वाणि प्रतिरन्नेति कल्पयन्। स्वाहाकृताऽऽहुतिरेतु देवान्॥१११॥

यद्वो देवा अतिपादयानि। वाचा चित्प्रयतं देवहेडनम्। अरायो अस्मां अभिदुच्छुनायते। अन्यत्रास्मन्मरुतस्तन्निधेतन। ततं म आपस्तदु तायते पुनः। स्वादिष्ठा धीतिरुचथाय शस्यते। अयं संमुद्र उत विश्वभेषजः। स्वाहाकृतस्य समुतृष्णुतर्भुवः। उद्वयं तमसस्परि। उदुत्यं चित्रम्॥११२॥

इमं मे वरुण तत्त्वां यामि। त्वन्नो अग्ने स त्वन्नो अग्ने। त्वमग्ने अयासि प्रजापते। इमं जीवेभ्यः परिधिं दधामि। मैषान्नुगादपरो अर्धमेतम्। शतं जीवन्तु शरदः पुरुचीः। तिरो मृत्युं दधतां पर्वतेन। इष्टेभ्यः स्वाहा वषडनिष्टेभ्यः स्वाहा। भेषजं दुरिष्ट्यै स्वाहा निष्कृत्यै स्वाहा। दौराध्यै स्वाहा दैवीभ्यस्तनूभ्यः स्वाहा॥११३॥

ऋद्धौ स्वाहा समृद्धौ स्वाहा। यतं इन्द्र भयामहे। ततो नो अभयं कृधि।  
मघवञ्छुग्धि तव तन्न ऊतये। वि द्विषो वि मृधो जहि। स्वस्तिदा विशस्पतिः।  
वृत्रहा वि मृधो वशी। वृषेन्द्रः पुर एतु नः। स्वस्तिदा अभयङ्करः। आभिर्गीर्भिर्यदतो  
न ऊनम्॥११४॥

आप्यायय हरिवो वर्धमानः। यदा स्तोतृभ्यो महि गोत्रा रुजासि। भूयिष्ठभाजो  
अधं ते स्याम। अनाज्ञातं यदाज्ञातम्। यज्ञस्य क्रियते मिथु। अग्ने तदस्य कल्पय।  
त्व९ हि वेत्थं यथातथम्। पुरुषसम्मितो यज्ञः। यज्ञः पुरुषसम्मितः। अग्ने तदस्य  
कल्पय। त्व९ हि वेत्थं यथातथम्। यत्पाकत्रा मनसा दीनदक्षा न। यज्ञस्य मन्वते  
मर्तासः। अग्निष्टद्धोतां क्रतुविद्विजानन्। यजिष्ठो देवा९ ऋतुशो यजाति॥११५॥ देवाश्चित्रं  
तनूयः स्वाहो नं पुरुषसम्मितोऽग्ने तदस्य कल्पय पञ्च च॥ [११]

यद्देवा देवहेडनम्। देवासश्चकृमा वयम्। आदित्यास्तस्मान्मा मुञ्चत। ऋतस्यर्तेन  
मामुत। देवा जीवनकाम्या यत्। वाचाऽनृतमूदिम। अग्निर्मा तस्मादेनसः।  
गार्हपत्यः प्रमुञ्चतु। दुरिता यानि चकृम। करोतु मामनेनसम्॥११६॥

ऋतेन द्यावापृथिवी। ऋतेन त्वं संरस्वति। ऋतान्मां मुञ्चतां हंसः।  
 यदन्यकृतमारिम। सजातशंसादुत वा जामिशंसात्। ज्यायंसः शंसादुत वा  
 कनीयसः। अनाज्ञातं देवकृतं यदेनः। तस्मात्त्वमस्माज्जातवेदो मुमुग्धि। यद्वाचा  
 यन्मनसा। बाहुभ्यामूरुभ्यामष्टीवद्भ्याम्॥११७॥

शिश्रैर्यदनृतं चकृमा वयम्। अग्निर्मा तस्मादेनंसः। यद्धस्ताभ्यां  
 चकर किल्बिषाणि। अक्षाणां वग्नुमुपजिघ्रमानः। दूरेपश्या च राष्ट्रभृच्च।  
 तान्यप्सरसावनुदत्तामृणानि। अदीव्यन्नृणं यदहं चकार। यद्वादास्यन्त्सञ्जगारा  
 जनेभ्यः। अग्निर्मा तस्मादेनंसः। यन्मयि माता गर्भे सति॥११८॥

एनश्चकार यत्पिता। अग्निर्मा तस्मादेनंसः। यदा पिपेष मातरं पितरम्। पुत्रः  
 प्रमुदितो धयन्। अहिंसितौ पितरौ मया तत्। तदग्रे अनृणो भवामि। यदन्तरिक्षं  
 पृथिवीमुत द्याम्। यन्मातरं पितरं वा जिहिंसिम। अग्निर्मा तस्मादेनंसः। यदाशसा  
 निशसा यत्पराशसा॥११९॥

यदेनश्चकृमा नूतनं यत्पुराणम्। अग्निर्मा तस्मादेनसः। अतिं क्रामामि दुरितं  
यदेनः। जहामि रिप्रं परमे सधस्थै। यत्र यन्ति सुकृतो नापि दुष्कृतः। तमा  
रोहामि सुकृतां नु लोकम्। त्रिते देवा अमृजतैतदेनः। त्रित एतन्मनुष्येषु मामृजे।  
ततो मा यदि किञ्चिदानुशे। अग्निर्मा तस्मादेनसः॥१२०॥

गार्हपत्यः प्रमुञ्चतु। दुरिता यानि चकृमा। करोतु मामनेनसम्। दिवि जाता  
अप्सु जाताः। या जाता ओषधीभ्यः। अथो या अग्निजा आपः। ता नः शुन्धन्तु  
शुन्धनीः। यदापो नक्तं दुरितं चराम। यद्वा दिवा नूतनं यत्पुराणम्। हिरण्यवर्णास्तत  
उत्पुनीत नः। इमं मे वरुण तत्त्वा यामि। त्वन्नो अग्ने स त्वन्नो अग्ने। त्वमग्ने  
अयासि॥१२१॥ अनेनसमष्टीवद्वा१ सति पराशसाऽऽनशोऽग्निर्मा तस्मादेनसः पुनीत नृन्मीणि च (यदेवा देवा ऋतेन सजातश्चाद्यद्वाचा यद्धस्ताभ्यामदीव्यं  
यन्मरियं माता यदा पिपेप यदन्तरिक्षं यदाशसाऽति क्रामामि त्रिते देवा दिवि जाता अप्सु जाता यदाप इमं मे वरुण तत्त्वा यामि त्वन्नो अग्ने स त्वन्नो  
अग्ने त्वमग्ने अयासि। )॥

[१२]

यत्ते ग्रावणां चिच्छिदुः सोम राजन्। प्रियाण्यङ्गानि स्वधिता परूषि।  
तथ्सन्धुत्स्वाज्येनोत वर्धयस्व। अनागसो अधमिथ्सङ्ख्येम। यत्ते ग्रावा बाहुच्युतो  
अचुच्यवुः। नरो यत्ते दुदुहर्दक्षिणेन। तत् आप्यायतां तत्ते। निष्ठ्यायतां देव सोम।

यत्ते त्वचं बिभिदुर्यच्च योनिम्। यदास्थानात्प्रच्युतो वेनसि त्मना॥१२२॥

त्वया तत्सोम गुप्तमस्तु नः। सा नः सन्धासत्परमे व्योमन्। अहाच्छरीरं पयसा  
समेत्य। अन्योन्यो भवति वर्णो अस्य। तस्मिन्वयमुपहूतास्तव स्मः। आ नो भज  
सदसि विश्वरूपे। नृचक्षाः सोम उत शुश्रुगस्तु। मा नो वि हांसीद्भिर आवृणानः।  
अनागास्तनुवो वावृधानः। आ नो रूपं वहतु जायमानः॥१२३॥

उप क्षरन्ति जुह्वो घृतेन। प्रियाण्यङ्गानि तव वर्धयन्तीः। तस्मै ते सोम नम  
इद्वषद्व। उप मा राजन्सुकृते ह्वयस्व। सं प्राणापानाभ्यां समु चक्षुषा त्वम्। स  
श्रोत्रेण गच्छस्व सोम राजन्। यत्त आस्थितं शमु तत्ते अस्तु। जानीतान्नः सङ्गमने  
पथीनाम्। एतं जानीतात्परमे व्योमन्। वृकाः सधस्था विद रूपमस्य॥१२४॥

यदागच्छात्पथिभिर्देवयानैः। इष्टापूर्ते कृणुतादाविरस्मै। अरिष्ठो राजन्नगदः  
परिहि। नमस्ते अस्तु चक्षसे रघूयते। नाकुमारोह सह यजमानेन। सूर्य  
गच्छतात्परमे व्योमन्। अभूद्देवः सविता वन्द्यो नः। इदानीमहं उपवाच्यो

नृभिः। वि यो रत्ना भजन्ति मानवेभ्यः। श्रेष्ठं नो अत्र द्रविणं यथा दधत्।  
उपं नो मित्रावरुणाविहावतम्। अन्वादीध्याथामिह नः सखाया। आदित्यानां  
प्रसितिरहेतिः। उग्रा शतापांष्टा घृविषा परि णो वृणक्तु। आप्यायस्व सन्तैः॥१२५॥

जायमानोऽस्य दधत्पञ्च च॥

[१३]

यदिदीक्षे मनसा यच्च वाचा। यद्वा प्राणैश्चक्षुषा यच्च श्रोत्रेण। यद्रेतसा  
मिथुनेनाप्यात्मना। अद्ध्यो लोका दधिरे तेज इन्द्रियम्। शुक्रा दीक्षायै तपसो  
विमोचनीः। आपो विमोक्तीर्मयि तेज इन्द्रियम्। यदृचा साम्ना यजुषा। पशूनां  
चर्मन् हविषा दिदीक्षे। यच्छन्दोभिरोषधीभिर्वनस्पतौ। अद्ध्यो लोका दधिरे तेज  
इन्द्रियम्॥१२६॥

शुक्रा दीक्षायै तपसो विमोचनीः। आपो विमोक्तीर्मयि तेज इन्द्रियम्। येन ब्रह्म  
येन क्षत्रम्। येनेन्द्राग्नी प्रजापतिः सोमो वरुणो येन राजा। विश्वे देवा ऋषयो येन  
प्राणाः। अद्ध्यो लोका दधिरे तेज इन्द्रियम्। शुक्रा दीक्षायै तपसो विमोचनीः।  
आपो विमोक्तीर्मयि तेज इन्द्रियम्। अपां पुष्पमस्योषधीनां रसः। सोमस्य प्रियं

धाम्॥१२७॥

अग्नेः प्रियतमं हविः स्वाहा॥ अपां पुष्पमस्योषधीनां रसः। सोमस्य प्रियं धाम्। इन्द्रस्य प्रियतमं हविः स्वाहा॥ अपां पुष्पमस्योषधीनां रसः। सोमस्य प्रियं धाम्। विश्वेषां देवानां प्रियतमं हविः स्वाहा॥ वयं सोम व्रते तव। मनस्तनूषु पिप्रतः। प्रजावन्तो अशीमहि॥१२८॥

देवेभ्यः पितृभ्यः स्वाहा॥ सोम्येभ्यः पितृभ्यः स्वाहा॥ कव्येभ्यः पितृभ्यः स्वाहा॥ देवास इह मादयध्वम्। सोम्यास इह मादयध्वम्। कव्यास इह मादयध्वम्। अनन्तरिताः पितरः सोम्याः सोमपीथात्। अपैतु मृत्युरमृतं न आगन्। वैवस्वतो नो अभयं कृणोतु। पूर्णं वनस्पतेरिव॥१२९॥

अभि नः शीयतां रयिः। सचतां नः शचीपतिः। परं मृत्यो अनु परेहि पन्थाम्। यस्ते स्व इतरो देवयानात्। चक्षुष्मते शृण्वते ते ब्रवीमि। मा नः प्रजां रीरिषो मोत वीरान्। इदमूनु श्रेयोवसानमागन्म। यद्भोजिद्धं न जिदंश्च जिद्यत्। पूर्णं

वनस्पतैरिव। अ॒भि नः शी॒यता॑ꣳ र॒यिः। सच॑तां नः श॒ची॒पतिः॑॥१३०॥ वनस्पतांवृद्धो लोका  
दधिरे तेजं इन्द्रियं धामाशीमहीवाभिनाः शीयताꣳ रयिरेकं च॥ [१४]

सर्वान् यद्विष्यण्णेन वि वै याः पुरस्ताद्देवा देवेषु परिस्तृणीत सक्षेदं यदस्य पारंऽनागस उदस्ताम्पसीद्वह्मं प्रतिष्ठा यद्देवा यत्ते ग्रावणा यदिदीक्षे चतुर्दश॥१४॥  
सर्वान्भूतिमेव यामेवाप्स्वाहुतिं व्रतानां पर्णवल्कः सोम्यानामस्मिन् युजेऽग्ने यो नो ज्योग्जीवाः पुरोरजाः प्रतमहे ब्रह्मं प्रतिष्ठा गार्हपत्यस्त्रिंशदुत्तरशतम्॥१३०॥  
सर्वाञ्छचीपतिः॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके सप्तमः प्रपाठकः समाप्तः॥



॥ अष्टमः प्रश्नः ॥

॥ तैत्तिरीयब्राह्मणे तृतीयाष्टके अष्टमः प्रपाठकः ॥

सा॒ङ्ग॒ह॒ण्येष्ट्या॑ यजते। इ॒माञ्ज॒नता॒९ सङ्गृ॑ह्ण॒नीति॑। द्वा॒द॒शा॒र॒त्नी र॒श॒ना भ॑वति।  
 द्वा॒द॒श॒ मा॒साः सं॒व॒त्स॒रः। सं॒व॒त्स॒रमे॒वाव॑ रुन्धे। मौ॒ञ्जी भ॑वति। ऊ॒र्ग्वे मु॒ञ्जाः।  
 ऊ॒र्जमे॒वाव॑ रुन्धे। चि॒त्रा नक्ष॑त्रं भवति। चि॒त्रं वा ए॒तत्कर्म॑॥१॥

यद॑श्वमे॒धः समृ॑द्धौ। पु॒ण्य॑नाम दे॒वय॑जनम॒ध्यव॑स्यति। पु॒ण्यामे॒व तेन॑ की॒र्तिम॒भि  
 ज॑यति। अप॑दातीनृ॒त्विजः॑ स॒माव॑ह॒न्त्या सु॑ब्रह्म॒ण्यायाः॑। सु॒व॒र्गस्य॑ लो॒कस्य॑ सम॑ष्ट्यै।  
 के॒श॒श्म॒श्रु व॑पते। न॒खानि॑ नि कृ॒न्तते। द॒तो धा॑वते। स्ना॒ति। अ॒हतं॑ वा॒सः परि॑धत्ते।  
 पा॒प्मनोऽप॑हत्यै। वाचं॑ य॒त्वोप॑ वसति। सु॒व॒र्गस्य॑ लो॒कस्य॑ गु॒प्त्यै। रा॒त्रिं जा॑ग॒रय॑न्त  
 आ॒सते। सु॒व॒र्गस्य॑ लो॒कस्य॑ सम॑ष्ट्यै॥२॥ कर्म धत्ते पञ्च च॥—————[१]

चतु॑ष्टय्य॒ आपो॑ भवन्ति। चतुः॑ श॒फो वा अ॑श्वः प्राजाप॒त्यः समृ॑द्धौ। ता दि॒ग्भ्यः  
 स॒माभृ॑ता भवन्ति। दि॒क्षु वा आपः॑। अ॒न्नं वा आपः॑। अ॒द्ध्यो वा अ॒न्नं जा॑यते।

यदेवाद्ध्योऽन्नं जायते। तदव रुन्धे। तासु ब्रह्मौदनं पंचति। रेत एव तद्वधाति॥३॥

चतुः शरावो भवति। दिक्ष्वेव प्रति तिष्ठति। उभयतोरुक्मौ भवतः। उभयत एवास्मिन्नुचं दधाति। उद्धरति श्रुतत्वाय। सर्पिष्वान्भवति मेध्यत्वाय। चत्वार आर्षेयाः प्राश्नन्ति। दिशामेव ज्योतिषि जुहोति। चत्वारि हिरण्यानि ददाति। दिशामेव ज्योतींश्च रुन्धे॥४॥

यदाज्यमुच्छिष्यते। तस्मिन् रशनान्युनत्ति। प्रजापतिर्वा ओदनः। रेत आज्यम्। यदाज्ये रशनान्युनत्ति। प्रजापतिमेव रेतसा समर्धयति। दर्भमयीं रशना भवति। बहु वा एष कुचरो मेध्यमुपगच्छति। यदश्वः। पवित्रं वै दर्भाः॥५॥

यददर्भमयीं रशना भवति। पुनात्येवैनम्। पूतमेनं मेध्यमा लभते। अश्वस्य वा आलब्धस्य महिमोदक्रामत्। स महर्त्विजः प्राविशत्। तन्महर्त्विजां महर्त्विक्कम्। यन्महर्त्विजः प्राश्नन्ति। महिमानमेवास्मिन्तद्वधाति। अश्वस्य वा आलब्धस्य रेत उदक्रामत्। तथ्सुवर्णं हिरण्यमभवत्। यथ्सुवर्णं हिरण्यं ददाति। रेत एव

तद्दधाति। ओदने ददाति। रेतो वा ओदनः। रेतो हिरण्यम्। रेतसैवास्मिन्नेतो  
दधाति॥६॥ दधाति रुन्धे दुर्भा अंभवथ्यद च॥ \_\_\_\_\_[२]

यो वै ब्रह्मणे देवेभ्यः प्रजापतयेऽप्रतिप्रोच्याश्वं मेध्यं बध्नाति। आ देवताभ्यो  
वृश्च्यते। पापीयान्भवति। यः प्रतिप्रोच्यं। न देवताभ्य आवृश्च्यते। वसीयान्भवति।  
यदाहं। ब्रह्मन्नश्वं मेध्यं भन्त्स्यामि देवेभ्यः प्रजापतये तेन राध्यासमिति। ब्रह्म वै  
ब्रह्मा। ब्रह्मण एव देवेभ्यः प्रजापतये प्रतिप्रोच्याश्वं मेध्यं बध्नाति॥७॥

न देवताभ्य आ वृश्च्यते। वसीयान्भवति। देवस्य त्वा सवितुः प्रसव इति  
रशनामादत्ते प्रसूत्यै। अश्विनोर्बाहुभ्यामित्याह। अश्विनौ हि देवानामध्वर्यू  
आस्ताम्। पूष्णो हस्ताभ्यामित्याह यत्यै। व्यृद्धं वा एतद्यज्ञस्य। यदयजुष्केण  
क्रियते। इमामंगृभ्णन्नशनामृतस्येत्यधि वदति यजुष्कृत्यै। यज्ञस्य समृद्धौ॥८॥

तदाहुः। द्वादशारत्नी रशना कर्तव्या(३) त्रयोदशारत्नी(३)रिति। ऋषभो वा एष  
ऋतूनाम्। यथ्संवत्सरः। तस्य त्रयोदशो मासो विष्टपम्। ऋषभ एष यज्ञानाम्।

यद॑श्वमे॒धः। यथा॑ वा ऋ॒षभ॑स्य॒ वि॒ष्टप॑म्। ए॒वमे॒तस्य॒ वि॒ष्टप॑म्। त्रयो॒दशम॑र॒त्नि॑  
र॒शना॑या॒मुपा॑ द॒धाति॑॥९॥

यथ॑र्ष॒भस्य॒ वि॒ष्टप॑ꣳ सꣳस्क्र॒रोति॑। तादृ॒गेव॑ तत्। पूर्वं॑ आयु॑षि वि॒दथे॑षु  
क॒व्येत्या॑ह। आयु॑रे॒वास्मि॑न्द॒धाति॑। तया॑ दे॒वाः सु॒तमा॑ ब॒भूवु॑रित्या॑ह।  
भूति॑मेवोपाव॑र्तते। ऋ॒तस्य॒ साम॑न्त्स॒रमा॑रप॒न्तीत्या॑ह। स॒त्यं वा ऋ॒तम्।  
स॒त्येनै॒वैन॑मृ॒तेना॑र॒भते। अ॒भि॒धा अ॒सीत्या॑ह॥१०॥

तस्मा॑द॒श्वमे॒धया॒जी सर्वा॑णि भू॒तान्य॑भि भ॑वति। भुव॑नम॒सीत्या॑ह।  
भू॒मान॑मेवोपै॑ति। य॒न्ताऽसी॑त्या॑ह। य॒न्तार॑मे॒वैनं॑ करोति। ध॒र्ताऽसी॑त्या॑ह।  
ध॒र्तार॑मे॒वैनं॑ करोति। सोऽग्निं॑ वै॒श्वान॑रमित्या॑ह। अ॒ग्नावे॒वैनं॑ वै॒श्वान॑रे जु॒होति॑।  
सप्र॑थस॒मित्या॑ह॥११॥

प्र॒जयै॒वैनं॑ प॒शुभिः॑ प्रथयति। स्वाहा॑कृ॒त इत्या॑ह। होमं॑ ए॒वास्यै॑षः।  
पृ॒थिव्या॑मित्या॑ह। अ॒स्यामे॒वैनं॑ प्रति॑ष्ठापयति। य॒न्ता रा॒ड्यन्ता॑ऽसि॒ यम॑नो ध॒र्ताऽसि॑

ध॒रुण॑ इत्या॒ह। रू॒पमे॒वास्यै॑तन्महि॒मानं॑ व्याच॑ष्टे। कृ॒ष्यै त्वा॒ क्षेमा॑य त्वा र॒य्यै त्वा॒  
पोषा॑य त्वेत्या॒ह। आ॒मेवै॑तामा शा॒स्ते। स्व॒गा त्वा॑ दे॒वेभ्य॑ इत्या॒ह। दे॒वेभ्य॑ ए॒वैनं॑  
स्व॒गा क॑रोति। स्वाहा॑ त्वा प्र॒जाप॑तय॒ इत्या॑ह। प्रा॒जाप॒त्यो वा अ॑श्वः। यस्या॑ ए॒व  
दे॒वता॑या आल॒भ्यते॑। तयै॒वैनं॑ स॒मर्ध॑यति॥१२॥ व॒भ्राति॑ स॒मृद्धा॑ उ॒पाद॑धात्युसीत्या॒हुः स॒प्रथ॑स॒मित्या॑ह दे॒वेभ्य॑ इत्या॒हुः  
पञ्च॑ च॥

[३]

यः पि॒तुर॑नु॒जायाः॑ पु॒त्रः। स पु॒रस्ता॑न्नयति। यो मा॒तुर॑नु॒जायाः॑ पु॒त्रः।  
स प॒श्चान्न॑यति। वि॒ष्वंश्च॑मे॒वास्मा॑त्पा॒प्मानं॑ विवृ॑हतः। यो अ॒र्वन्तं॑ जिघा॑सति  
तम॒भ्यमी॑ति वरु॑ण इति॒ श्वानं॑ चतुर॒क्षं प्र॑सौति। प॒रो म॑र्तः प॒रः श्वे॑ति शुन॑श्चतुर॒क्षस्य॑  
प्रह॑न्ति। श्वे॒व वै पा॒प्मा भ्रातृ॑व्यः। पा॒प्मानं॑मे॒वास्य॑ भ्रातृ॑व्यं ह॒न्ति। सै॒ध्रकं॑ मु॒सलं॑  
भव॑ति॥१३॥

क॒र्मक॑र्मे॒वास्मै॑ साधयति। पौ॒ंश्च॒ले॒यो ह॑न्ति। पु॒ंश्च॒ल्वां वै दे॒वाः शुचं॑ न्य॑दधुः।  
शुचै॒वास्य॑ शुचं॑ ह॒न्ति। पा॒प्मा वा ए॒तमी॑प्स॒तीत्या॑हुः। योऽश्व॑मे॒धेन॑ यज॑त  
इति॑। अ॒श्वस्या॑ध॒स्पद॑मुपा॑स्यति। व॒ज्री वा अ॑श्वः प्रा॒जाप॑त्यः। व॒ज्रेणै॒व पा॒प्मानं॑

भ्रातृव्यमवक्रामति। दक्षिणाऽपं प्लावयति॥१४॥

पाप्मानमेवास्माच्छमलमपं प्लावयति। ऐषीक उदूहो भवति। आयुर्वा  
इषीकाः। आयुरेवास्मिन्दधति। अमृतं वा इषीकाः। अमृतमेवास्मिन्दधति।  
वेतसशाखोपसम्बद्धा भवति। अप्सुयोनिर्वा अश्वः। अप्सुजो वेतसः। स्वादेवैनं  
योनेर्निर्मिमीते। पुरस्तात्प्रत्यश्चमभ्युदूहति। पुरस्तादेवास्मिन्प्रतीच्यमृतं दधाति।  
अहं च त्वं च वृत्रहन्निति ब्रह्मा यजमानस्य हस्तं गृह्णाति। ब्रह्मक्षत्रे एव  
सन्दधाति। अभिक्रत्वैन्द्र भूरधृज्मन्नित्यध्वर्युयजमानं वाचयत्यभिजित्यै॥१५॥ भवति

प्लावयति मिमीते पञ्च च॥

[४]

चत्वारं ऋत्विजः समुक्षन्ति। अभ्य एवैनं चतसृभ्यो दिग्भ्योऽभि समीरयन्ति।  
शतेन राजपुत्रैः सहाध्वर्युः। पुरस्तात्प्रत्यङ्घ्निष्ठन्प्रोक्षति। अनेनाश्वेन मध्येनेष्ट्वा। अयं  
राजा वृत्रं वेध्यादिति। राज्यं वा अध्वर्युः। क्षत्रं राजपुत्रः। राज्येनैवास्मिन्क्षत्रं  
दधाति। शतेना राजभिरुग्रैः सह ब्रह्मा॥१६॥

दक्षिणत उदङ्घ्रिष्ठम्प्रोक्षति। अनेनाश्वेन मेध्यैनेष्ट्वा। अयं राजाप्रतिधृष्यो-  
ऽस्त्विति। बलं वै ब्रह्मा। बलमराजोग्रः। बलैनैवास्मिन्बलं दधाति। शतेन  
सूतग्रामणिभिः सह होता। पश्चात्प्राङ्घ्रिष्ठम्प्रोक्षति। अनेनाश्वेन मेध्यैनेष्ट्वा। अयं  
राजाऽस्यै विशः॥१७॥

बहुग्वै बहुश्वायै बहुजाविकायै। बहुव्रीहियवायै बहुमाषतिलायै। बहुहिरण्यायै  
बहुहस्तिकायै। बहुदासपूरुषायै रयिमत्यै पुष्टिमत्यै। बहुरायस्पोषायै राजास्त्विति।  
भूमा वै होता। भूमा सूतग्रामण्यः। भूमैवास्मिन्भूमानं दधाति। शतेन  
क्षत्तसङ्ग्रहीतृभिः सहोद्गाता। उत्तरतो दक्षिणा तिष्ठन्प्रोक्षति॥१८॥

अनेनाश्वेन मेध्यैनेष्ट्वा। अयं राजा सर्वमायुरेत्विति। आयुर्वा उद्गाता। आयुः  
क्षत्तसङ्ग्रहीतारः। आयुषैवास्मिन्नायुर्दधाति। शतं शतं भवन्ति। शतायुः पुरुषः  
शतेन्द्रियः। आयुष्येवेन्द्रिये प्रति तिष्ठति। चतुः शता भवन्ति। चतस्रो दिशः।  
दिक्ष्वेव प्रति तिष्ठति॥१९॥ ब्रह्मा विश उक्षति दिश एकं च॥

यथा वै हविषो गृहीतस्य स्कन्दति। एवं वा एतदश्वस्य स्कन्दति।  
यन्निक्तमनालब्धमुत्सृजन्ति। यथस्तोक्या अन्वाह। सर्वहुतमेवैनं करोत्यस्कन्दाय।  
अस्कन्नः हि तत्। यद्धुतस्य स्कन्दति। सहस्रमन्वाह। सहस्रसम्मितः सुवर्गो  
लोकः। सुवर्गस्य लोकस्याभिजित्यै॥२०॥

यत्परिमिता अनुब्रूयात्। परिमितमव रुन्धीत। अपरिमिता अन्वाह। अपरिमितः  
सुवर्गो लोकः। सुवर्गस्य लोकस्य समष्ट्यै। स्तोक्या जुहोति। या एव वर्ष्या आपः।  
ता अव रुन्धे। अस्यां जुहोति। इयं वा अग्निर्वैश्वानरः॥२१॥

अस्यामेवैनाः प्रतिष्ठापयति। उवाच ह प्रजापतिः। स्तोक्यासु वा अहमश्वमेधः  
सः स्थापयामि। तेन ततः सः स्थितेन चरामीति। अग्नये स्वाहेत्याह। अग्नय एवैनं  
जुहोति। सोमाय स्वाहेत्याह। सोमायैवैनं जुहोति। सवित्रे स्वाहेत्याह। सवित्र  
एवैनं जुहोति॥२२॥

सरस्वत्यै स्वाहेत्याह। सरस्वत्या एवैनं जुहोति। पूष्णे स्वाहेत्याह। पूष्ण



ए॒वैनं॑ जुहोति। बृह॒स्पत॑ये स्वाहेत्या॑ह। बृह॒स्पत॑य ए॒वैनं॑ जुहोति। अ॒पां मो॑दाय॒  
स्वाहेत्या॑ह। अ॒द्ध्य ए॒वैनं॑ जुहोति। वा॒यवे॒ स्वाहेत्या॑ह। वा॒यव॑ ए॒वैनं॑ जुहोति॥२३॥

मि॒त्राय॒ स्वाहेत्या॑ह। मि॒त्रायै॑वैनं॑ जुहोति। वरु॑णाय॒ स्वाहेत्या॑ह। वरु॑णायै॑वैनं॑  
जुहोति। ए॒ताभ्य॑ ए॒वैनं॑ दे॒वता॑भ्यो जुहोति। दश॑दश स॒म्पादं॑ जुहोति। दशा॑क्षरा  
वि॒राट्। अन्नं॑ वि॒राट्। वि॒राजै॑वान्नाद्य॒मव॑ रुन्धे। प्र वा ए॒षोऽस्मा॑ल्लो॒काच्च॑वते। यः  
परा॑ची॒राहु॑तीर्जुहोति। पुनः॑ पुनर॒भ्याव॑र्तं जुहोति। अ॒स्मिन्ने॒व लो॒के प्र॑ति तिष्ठति।  
ए॒ता५ ह॒ वाव॑ सोऽश्व॑मे॒धस्य॒ सऽस्थि॑तिमुवा॒चास्क॑न्दाय। अस्क॑न्न॒५ हि तत्।  
यद्य॑ज्ञस्य॒ सऽस्थि॑तस्य॒ स्कन्द॑ति॥२४॥

अ॒भिर्जित्यै॑ वैश्वान॒रः संवि॑त्र ए॒वैनं॑ जुहोति वा॒यव॑ ए॒वैनं॑ जुहोति च्यव॑ते पट  
च॥

[६]

प्र॒जाप॑तये त्वा जुष्टं॑ प्रोक्षा॒मीति॑ पुरस्ता॑त्प्रत्यङ्गि॒ष्ठन्प्रोक्ष॑ति। प्र॒जाप॑तिर्वै  
दे॒वाना॑मन्ना॒दो वी॒र्या॑वान्। अ॒न्नाद्य॑मे॒वास्मि॑न्वी॒र्यं द॑धाति। तस्मा॒दश्वः॑ पशूनाम॑न्ना॒दो  
वी॒र्या॑वत्तमः। इन्द्रा॒ग्निभ्यां॑ त्वेति॑ दक्षिण॒तः। इन्द्रा॒ग्नी वै दे॒वाना॑मोजि॑ष्ठौ बलि॑ष्ठौ।

ओजं एवास्मिन्बलं दधाति। तस्मादश्वः पशूनामोजिष्ठो बलिष्ठः। वायवे त्वेति पश्चात्। वायुर्वै देवानामाशुः सारसारितमः॥ २५॥

ज्वमेवास्मिन्दधाति। तस्मादश्वः पशूनामाशुः सारसारितमः। विश्वेभ्यस्त्वा देवेभ्य इत्युत्तरतः। विश्वे वै देवा देवानां यशस्वितमाः। यशं एवास्मिन्दधाति। तस्मादश्वः पशूनां यशस्वितमः। देवेभ्यस्त्वेत्यधस्तात्। देवा वै देवानामपंचिततमाः। अपंचितिमेवास्मिन्दधाति। तस्मादश्वः पशूनामपंचिततमः॥ २६॥

सर्वेभ्यस्त्वा देवेभ्य इत्युपरिष्ठात्। सर्वे वै देवास्त्विषिमन्तो हरस्विनः। त्विषिमेवास्मिन् हरो दधाति। तस्मादश्वः पशूनां त्विषिमान् हरस्वितमः। दिवे त्वाऽन्तरिक्षाय त्वा पृथिव्यै त्वेत्याह। एभ्य एवैनं लोकेभ्यः प्रोक्षति। सते त्वाऽसते त्वाऽद्ध्यस्त्वौषधीभ्यस्त्वा विश्वेभ्यस्त्वा भूतेभ्य इत्याह। तस्मादश्वमेधयाजिनः सर्वाणि भूतान्युपजीवन्ति। ब्रह्मवादिनो वदन्ति। यत्प्राजापत्योऽश्वः। अथ कस्मादेनमन्याभ्यो देवताभ्योऽपि प्रोक्षतीति। अश्वे वै सर्वा देवता अन्वायन्ताः। तं

यद्विश्वेभ्यस्त्वा भूतेभ्य इति प्रोक्षति। देवता एवास्मिन्नन्वा यातयति। तस्मादश्वे  
सर्वा देवता अन्वायन्ताः॥२७॥ सारसारितुमोऽप्यचिततमः प्राजापत्योऽश्वः पञ्च च॥ [७]

यथा वै हविषो गृहीतस्य स्कन्दति। एवं वा एतदश्वस्य स्कन्दति।  
यत्प्रोक्षितमनालब्धमुत्सृजन्ति। यदश्वचरितानि जुहोति। सर्वहुतमेवैनं  
करोत्यस्कन्दाय। अस्कन्नं हि तत्। यद्धुतस्य स्कन्दति। ईङ्काराय स्वाहेङ्कृताय  
स्वाहेत्याह। एतानि वा अश्वचरितानि। चरितैरेवैनं समर्धयति॥२८॥

तदाहुः। अनाहुतयो वा अश्वचरितानि। नैता होतव्या इति। अथो खल्वाहुः।  
होतव्या एव। अत्र वावैवं विद्वानश्वमेधं सङ्स्थापयति। यदश्वचरितानि  
जुहोति। तस्माद्धोतव्या इति। बहिर्धा वा एनमेतदायतनादधाति। भ्रातृव्यमस्मै  
जनयति॥२९॥

यस्यानायतनैऽन्यत्राग्नेराहुतीर्जुहोति। सावित्रिया इष्ट्याः पुरस्ताथिस्विष्टकृतः।  
आहवनीयेऽश्वचरितानि जुहोति। आयतन एवास्याऽऽहुतीर्जुहोति। नास्मै

भ्रातृव्यं जनयति। तदाहुः। यज्ञमुखेयज्ञमुखे होतव्याः। यज्ञस्य क्लृप्त्यै। सुवर्गस्य लोकस्यानुख्यात्या इति। अथो खल्वाहुः॥३०॥

यद्यज्ञमुखेयज्ञमुखे जुहुयात्। पशुभिर्यजमानं व्यर्धयेत्। अवं सुवर्गाल्लोकात्पद्येत। पापीयान्भस्यादिति। सकृदेव होतव्याः। न यजमानं पशुभिर्यर्धयति। अभि सुवर्गं लोकं जयति। न पापीयान्भवति। अष्टाचत्वारिंशतमश्वरूपाणि जुहोति। अष्टाचत्वारिंशदक्षरा जगती। जागतोऽश्वः प्राजापत्यः समृद्धौ। एकमतिरिक्तं जुहोति। तस्मादेकः प्रजास्वर्धुकः॥३१॥ अर्धयति जनयति खल्वाहुर्जगती त्रीणि च॥ [८]

विभूर्मात्रा प्रभूः पित्रेत्याह। इयं वै माता। असौ पिता। आभ्यामेवैनं परिददाति। अश्वोऽसि हयोऽसीत्याह। शास्त्येवैनमेतत्। तस्माच्छिष्टाः प्रजा जायन्ते। अत्योऽसीत्याह। तस्मादश्वः सर्वान्पशूनत्येति। तस्मादश्वः सर्वेषां पशूनां श्रेष्ठ्यं गच्छति॥३२॥

प्र यशः श्रेष्ठ्यमाप्नोति। य एवं वेद। नरोऽस्यर्वाऽसि सतिरसि वाज्यंसीत्याह।

रूपमेवास्यैतन्महिमानं व्याचष्टे। ययुर्नामाऽसीत्याह। एतद्वा अश्वस्य प्रियं नामधेयम्। प्रियेणैवैनं नामधेयेनाभि वंदति। तस्मादप्यामित्रौ सङ्गत्य। नाम्ना चेद्ध्वयेते। मित्रमेव भवतः॥३३॥

आदित्यानां पत्वाऽन्विहीत्याह। आदित्यानेवैनं गमयति। अग्नये स्वाहा स्वाहेन्द्राग्निभ्यामिति पूर्वहोमां जुहोति। पूर्वं एव द्विषन्तं भ्रातृव्यमिति क्रामति। भूरसि भुवे त्वा भव्याय त्वा भविष्यते त्वेत्युत्सृजति सर्वत्वाय। देवा आशापाला एतं देवेभ्योऽश्वं मेधाय प्रोक्षितं गोपायतेत्याह। शतं वै तल्प्या राजपुत्रा देवा आशापालाः। तेभ्य एवैनं परिं ददाति। ईश्वरो वा अश्वः प्रमुक्तः परां परावतं गन्तोः। इह धृतिः स्वाहेह विधृतिः स्वाहेह रन्तिः स्वाहेह रमतिः स्वाहेति चतृषु पृथ्सु जुहोति॥३४॥

एता वा अश्वस्य बन्धनम्। ताभिरेवैनं बध्नाति। तस्मादश्वः प्रमुक्तो बन्धनमा गच्छति। तस्मादश्वः प्रमुक्तो बन्धनं न जहाति। राष्ट्रं वा अश्वमेधः। राष्ट्रे खलु

वा ए॒ते व्यायच्छन्ते। येऽश्वं॑ मे॒ध्यं॑ रक्ष॑न्ति। तेषां॑ य उ॒द॒चं॑ गच्छ॑न्ति। रा॒ष्ट्रादे॒व  
ते रा॒ष्ट्रं गच्छ॑न्ति। अथ॒ य उ॒द॒चं॑ न गच्छ॑न्ति॥३५॥

रा॒ष्ट्रादे॒व ते व्य॑वच्छिद्यन्ते। परा॒ वा ए॒ष सि॑च्यते। योऽब॒लोऽश्व॑मे॒धेन॑ यज॑ते।  
य॒द॒मित्रा॑ अश्वं॑ वि॒न्देर॑न्। ह॒न्येता॑स्य य॒ज्ञः। च॒तुः श॒ता र॑क्षन्ति। य॒ज्ञस्याघा॑ताय।  
अथा॒न्यमा॒नीय॑ प्रोक्षे॑युः। सैव॒ ततः॑ प्रायश्चित्तिः॥३६॥ गच्छति॑ भवतः॑ प॒थसु॑ जु॒होति॑ न गच्छ॑न्ति न॒वं  
च॥

[९]

प्र॒जाप॑तिरकामयताश्वमे॒धेन॑ यजे॒येति॑। स तपो॑ऽतप्यत। तस्य॑ तेपा॒नस्य॑।  
स॒प्तात्म॑नो दे॒वता॑ उद॑क्रामन्। सा दी॒क्षाऽभ॑वत्। स ए॒तानि॑ वैश्वदे॒वान्य॑पश्यत्।  
तान्य॑जुहोत्। तैर्वै स दी॒क्षामवा॑रुन्ध। यद्वैश्वदे॒वानि॑ जुहोति॑। दी॒क्षामे॒व  
तैर्य॑ज॒मानोऽव॑ रुन्धे॥३७॥

स॒प्त जु॑होति। स॒प्त हि॑ ता दे॒वता॑ उद॑क्रामन्। अ॒न्व॒हं जु॑होति। अ॒न्व॒हमे॒व  
दी॒क्षाम॑व॒ रुन्धे॑। त्रीणि॑ वैश्वदे॒वानि॑ जुहोति। च॒त्वार्यौ॑द्ब्रह्म॒णानि॑। स॒प्त स॑म्पद्यन्ते।  
स॒प्त वै शी॑र्ष॒ण्याः प्रा॒णाः। प्रा॒णा दी॒क्षा। प्रा॒णैरे॒व प्रा॒णान्दी॒क्षाम॑व॒ रुन्धे॑॥३८॥

एकविंशतिं वैश्वदेवानि जुहोति। एकविंशतिर्वै देवलॊकाः। द्वादश मासाः पञ्चतवः। त्रयं इमे लॊकाः। असावादित्य एकविंशः। एष सुवर्गो लॊकः। तद्वैव्यं क्षत्रम्। सा श्रीः। तद्ध्रस्यं विष्टपम्। तत्स्वाराज्यमुच्यते॥ ३९॥

त्रिंशतमौद्ब्रह्णानि जुहोति। त्रिंशदक्षरा विराट्। अन्नं विराट्। विराजैवान्नाद्यमव रुन्धे। त्रेधा विभज्यं देवतां जुहोति। त्र्यावृतो वै देवाः। त्र्यावृत इमे लॊकाः। एषां लॊकानामात्यै। एषां लॊकानां कृत्यै। अप वा एतस्मात्प्राणाः कामन्ति॥ ४०॥

यो दीक्षामतिरेचयति। सप्ताहं प्रचरन्ति। सप्त वै शीर्षण्याः प्राणाः। प्राणा दीक्षा। प्राणैरेव प्राणान्दीक्षामव रुन्धे। पूर्णाहुतिमुत्तमां जुहोति। सर्वं वै पूर्णाहुतिः। सर्वमेवाप्रोति। अथो इयं वै पूर्णाहुतिः। अस्यामेव प्रति तिष्ठति॥ ४१॥

रुन्धे उच्यते कामन्ति तिष्ठति॥

[१०]

प्रजापतिरश्वमेधमसृजत। तं सृष्टं न किञ्चनोदयच्छत्। तं वैश्वदेवान्येवोदयच्छन्। यद्वैश्वदेवानि जुहोति। यज्ञस्योद्यत्यै। स्वाहाऽऽधिमाधीताय स्वाहा। स्वाहाऽधीतं

मन॑से॒ स्वाहा॑। स्वाहा॒ मनः॑ प्र॒जाप॑तये॒ स्वाहा॑। काय॒ स्वाहा॒ कस्मै॒ स्वाहा॑ कत॒मस्मै॒  
स्वाहेति॑ प्राजाप॒त्ये मुख्ये॑ भवतः। प्र॒जाप॑तिमुखाभिरे॒वैनं॑ दे॒वता॑भि॒रुद्य॑च्छते॥४२॥

अ॒दित्यै॒ स्वाहा॑ऽदित्यै॒ मह्यै॑ स्वाहाऽदित्यै॒ सुमृ॑डी॒कायै॒ स्वाहेत्या॑ह। इ॒यं वा  
अ॒दितिः॑। अ॒स्या ए॒वैनं॑ प्र॒तिष्ठा॑योद्यच्छते। सर॑स्वत्यै॒ स्वाहा॒ सर॑स्वत्यै॒ बृह॑त्यै॒  
स्वाहा॒ सर॑स्वत्यै॒ पाव॑कायै॒ स्वाहेत्या॑ह। वा॒ग्वै सर॑स्वती। वा॒चैवैन॑मुद्यच्छते।  
पू॒ष्णे स्वाहा॑ पू॒ष्णे प्र॑प॒थ्याय॒ स्वाहा॑ पू॒ष्णे न॒रन्धि॑षाय॒ स्वाहेत्या॑ह। प॒शवो॒ वै  
पू॒षा। प॒शुभि॑रे॒वैन॑मुद्यच्छते। त्वष्ट्रे॒ स्वाहा॒ त्वष्ट्रे॑ तु॒रीपा॑य॒ स्वाहा॒ त्वष्ट्रे॑ पु॒रुरू॑पाय॒  
स्वाहेत्या॑ह। त्वष्ट्रा॒ वै प॑शूनां मि॒थुना॑नां॒ रूप॑कृत्। रू॒पमे॒व प॒शुषु॑ दधाति।  
अथो॑ रू॒पैरे॒वैन॑मुद्यच्छते। विष्ण॑वे॒ स्वाहा॒ विष्ण॑वे॒ निखुर्य॑पाय॒ स्वाहा॒ विष्ण॑वे॒  
निभू॑य॒पाय॒ स्वाहेत्या॑ह। य॒ज्ञो वै विष्णुः॑। य॒ज्ञायै॒वैन॑मुद्यच्छते। पूर्णा॑हुतिमु॒त्तमां॑  
जु॒होति॑। प्रत्यु॒त्त॑ब्ध्यै॒ सय॑त्वाय॥४३॥ यच्छते पुरुरूपाय स्वाहेत्याहाष्टौ वं॥

[११]

सा॒वि॒त्रम॒ष्टाकं॑पालं प्रा॒तर्निर्व॑पति। अ॒ष्टाक्ष॑रा गाय॒त्री। गा॒य॒त्रं प्रा॑तः स॒वन॑म्।



प्रातः सवनादेवैनं गायत्रियाश्छन्दसोऽधि निर्मिमीते। अथो प्रातः सवनमेव तेनाऽऽप्नोति। गायत्रीं छन्दः। सवित्रे प्रसवित्र एकादशकपालं मध्यन्दिने। एकादशाक्षरा त्रिष्टुप्। त्रैष्टुभं माध्यं दिनं सवनम्। माध्यं दिनादेवैनं सवनात्रिष्टुभश्छन्दसोऽधि निर्मिमीते॥४४॥

अथो माध्यं दिनमेव सवनं तेनाऽऽप्नोति। त्रिष्टुभं छन्दः। सवित्रे असवित्रे द्वादशकपालमपराह्णे। द्वादशाक्षरा जगती। जागतं तृतीयसवनम्। तृतीयसवनादेवैनं जगत्याश्छन्दसोऽधि निर्मिमीते। अथो तृतीयसवनमेव तेनाऽऽप्नोति। जगतीं छन्दः। ईश्वरो वा अश्वः प्रमुक्तः परां परावतं गन्तौ। इह धृतिः स्वाहेह विधृतिः स्वाहेह रन्तिः स्वाहेह रमन्तिः स्वाहेति चतस्र आहुतीर्जुहोति॥४५॥

चतस्रो दिशः। दिग्भिरेवैनं परिगृह्णाति। आश्वत्थो व्रजो भवति। प्रजापतिर्देवेभ्यो निलायत। अश्वो रूपं कृत्वा। सोऽश्वत्थे संवत्सरमतिष्ठत्। तदश्वत्थस्याश्वत्थत्वम्।

यदाश्वत्थो वृजो भवति। स्व एवैनं योनौ प्रतिष्ठापयति॥४६॥ त्रिष्टुभृच्छन्दसोऽधि निर्मिमीते जुहोति नव  
च॥

[१२]

आ ब्रह्मन्ब्राह्मणो ब्रह्मवर्चसी जायतामित्याह। ब्राह्मण एव ब्रह्मवर्चसं दधाति। तस्मात्पुरा ब्राह्मणो ब्रह्मवर्चस्यंजायत। आऽस्मिन्नाष्ट्रे राजन्यं इषव्यः शूरो महारथो जायतामित्याह। राजन्य एव शौर्यं महिमानं दधाति। तस्मात्पुरा राजन्यं इषव्यः शूरो महारथोऽजायत। दोग्ध्रीं धेनुरित्याह। धेन्वामेव पयो दधाति। तस्मात्पुरा दोग्ध्रीं धेनुरंजायत। वोढाऽनङ्घ्रानित्याह॥४७॥

अनुडुह्येव वीर्यं दधाति। तस्मात्पुरा वोढाऽनङ्घ्रानंजायत। आशुः सप्तिरित्याह। अश्व एव जवं दधाति। तस्मात्पुराऽऽशुरश्वोऽजायत। पुरन्धिर्योषेत्याह। योषित्येव रूपं दधाति। तस्मात्स्त्री युवतिः प्रिया भावुका। जिष्णू रथेष्ठा इत्याह। आ ह वै तत्र जिष्णू रथेष्ठा जायते॥४८॥

यत्रैतेन यज्ञेन यजन्ते। सभेयो युवेत्याह। यो वै पूर्ववयसी। स सभेयो युवा। तस्माद्युवा पुमान्प्रियो भावुकः। आऽस्य यजमानस्य वीरो जायतामित्याह। आ

ह वै तत्र यजमानस्य वीरो जायते। यत्रैतेन यज्ञेन यजन्ते। निकामेनिकामे  
 नः पर्जन्यो वर्षत्वित्याह। निकामेनिकामे ह वै तत्र पर्जन्यो वर्षति। यत्रैतेन  
 यज्ञेन यजन्ते। फलिन्यो न ओषधयः पच्यन्तामित्याह। फलिन्यो ह वै तत्रौषधयः  
 पच्यन्ते। यत्रैतेन यज्ञेन यजन्ते। योगक्षेमो नः कल्पतामित्याह। कल्पते ह वै  
 तत्र प्रजाभ्यो योगक्षेमः। यत्रैतेन यज्ञेन यजन्ते॥४९॥ अनुष्ठानित्याह जायते वर्षति सुप्त च॥ [१३]

प्रजापतिर्देवेभ्यो यज्ञान्व्यादिशत्। स आत्मन्नश्वमेधमधत्त। तं देवा अब्रुवन्।  
 एष वाव यज्ञः। यदश्वमेधः। अप्येव नोऽत्रास्त्विति। तेभ्य एतानन्नहोमान्प्रायच्छत्।  
 तानजुहोत्। तैर्वै स देवानप्रीणात्। यदन्नहोमां जुहोति॥५०॥

देवानेव तैर्यजमानः प्रीणाति। आज्येन जुहोति। अग्नेर्वा एतद्रूपम्। यदाज्यम्।  
 यदाज्येन जुहोति। अग्निमेव तत्प्रीणाति। मधुना जुहोति। महृत्यै वा एतद्देवतायै  
 रूपम्। यन्मधु। यन्मधुना जुहोति॥५१॥

महतीमेव तद्देवता प्रीणाति। तण्डुलैर्जुहोति। वसूनां वा एतद्रूपम्। यत्तण्डुलाः।

यत्तण्डुलैर्जुहोति। वसूनेव तत्प्रीणाति। पृथुकैर्जुहोति। रुद्राणां वा एतद्रूपम्।  
यत्पृथुकाः। यत्पृथुकैर्जुहोति॥५२॥

रुद्रानेव तत्प्रीणाति। लाजैर्जुहोति। आदित्यानां वा एतद्रूपम्। यल्लाजाः।  
यल्लाजैर्जुहोति। आदित्यानेव तत्प्रीणाति। करम्बैर्जुहोति। विश्वेषां वा एतद्देवानां  
रूपम्। यत्करम्बाः। यत्करम्बैर्जुहोति॥५३॥

विश्वानेव तद्देवान्प्रीणाति। धानाभिर्जुहोति। नक्षत्राणां वा एतद्रूपम्। यद्धानाः।  
यद्धानाभिर्जुहोति। नक्षत्राण्येव तत्प्रीणाति। सक्तुभिर्जुहोति। प्रजापतेर्वा एतद्रूपम्।  
यथ्सक्तवः। यथ्सक्तुभिर्जुहोति॥५४॥

प्रजापतिमेव तत्प्रीणाति। मसूस्यैर्जुहोति। सर्वासां वा एतद्देवतानां  
रूपम्। यन्मसूस्यानि। यन्मसूस्यैर्जुहोति। सर्वा एव तद्देवताः प्रीणाति।  
प्रियङ्गुतण्डुलैर्जुहोति। प्रियाङ्गा ह वै नामैते। एतैर्वै देवा अश्वस्याङ्गानि समदधुः।

यत्प्रियङ्गुतण्डुलैर्जुहोति। अश्वस्यैवाङ्गानि सन्दधाति। दशान्नानि जुहोति। दशाक्षरा  
विराट्। विराट्कृत्स्नस्यान्नाद्यस्यावरुद्धौ॥५५॥ जुहोति मधुना जुहोति पृथुर्जुहोति कर्मैर्जुहोति सक्तुभिर्जुहोति

प्रियङ्गुतण्डुलैर्जुहोति चत्वारि च (अन्नहोमानाऽऽज्येनाग्नेर्मधुना तण्डुलैः पृथुर्केर्लाजेः कर्मैर्धानाभिः सक्तुभिर्मसूयैः प्रियङ्गुतण्डुलैर्दशान्नानि द्वादश। )॥—[१४]

प्रजापतिरश्वमेधमसृजत। त९ सृष्ट९ रक्षा९स्यजिघा९सन्। स एतान्प्रजापतिर्नक्त  
होमानपश्यत्। तानजुहोत्। तैर्वै स यज्ञाद्रक्षा९स्यपाहन्। यन्नक्त९ होमां जुहोति।  
यज्ञादेव तैर्यजमानो रक्षा९स्यप हन्ति। आज्येन जुहोति। वज्रो वा आज्यम्।  
वज्रेणैव यज्ञाद्रक्षा९स्यप हन्ति॥५६॥

आज्यस्य प्रतिपदं करोति। प्राणो वा आज्यम्। मुखत एवास्य प्राणं दधाति।  
अन्नहोमाञ्जुहोति। शरीरवदेवावरुद्धे। व्यत्यासं जुहोति। उभयस्यावरुद्धौ। नक्तं  
जुहोति। रक्षसामपहत्यै। आज्येनान्ततो जुहोति॥५७॥

प्राणो वा आज्यम्। उभयत एवास्य प्राणं दधाति। पुरस्ताच्चोपरिष्ठाच्च। एकस्मै  
स्वाहेत्याह। अस्मिन्नेव लोके प्रति तिष्ठति। द्वाभ्या९ स्वाहेत्याह। अमुष्मिन्नेव  
लोके प्रति तिष्ठति। उभयोरेव लोकयोः प्रति तिष्ठति। अस्मि९श्चामुष्मि९श्च।

श॒ताय॒ स्वाहे॑त्याह। श॒तायुर्वै॑ पु॒रुषः॑ श॒तवी॑र्यः। आ॒युरे॒व वी॒र्य॑मव॑ रुन्धे।  
 स॒हस्रा॑य॒ स्वाहे॑त्याह। आ॒युर्वै॑ स॒हस्र॑म्। आ॒युरे॒वाव॑ रुन्धे। सर्व॑स्मै॒ स्वाहे॑त्याह।  
 अ॒प॒रि॒मि॒तमे॒वाव॑ रुन्धे॥५८॥ एव यज्ञाद्रक्षाऽस्यपहन्त्यन्ततो जुहोति शताय स्वाहेत्याह सुप्त च॥ [१५]

प्र॒जाप॑तिं वा ए॒ष ई॑प्स॒तीत्या॑हुः। योऽ॑श्वमे॒धेन॒ यज॑त॒ इति॑। अथो॑ आहुः। सर्वा॑णि  
 भू॒तानी॑तिं। ए॒कस्मै॒ स्वाहे॑त्याह। प्र॒जाप॑ति॒र्वा ए॒कः। तमे॒वाऽऽप्नो॑ति। ए॒कस्मै॒ स्वाहा॑  
 द्वाभ्या॑ऽ॒ स्वाहे॑त्य॒भिपूर्व॑माहु॒तीर्जु॑होति। अ॒भिपूर्व॑मे॒व सु॒वर्गं॑ लो॒कमे॑ति। ए॒कोत्त॑रं  
 जु॒होति॑॥५९॥

ए॒क॒वदे॒व सु॒वर्गं॑ लो॒कमे॑ति। सन्त॑तं जुहोति। सु॒वर्ग॑स्य॒ लो॒कस्य॒ सन्त॑त्यै।  
 श॒ताय॒ स्वाहे॑त्याह। श॒तायुर्वै॑ पु॒रुषः॑ श॒तवी॑र्यः। आ॒युरे॒व वी॒र्य॑मव॑ रुन्धे। स॒हस्रा॑य॒  
 स्वाहे॑त्याह। आ॒युर्वै॑ स॒हस्र॑म्। आ॒युरे॒वाव॑ रुन्धे। अ॒युता॑य॒ स्वाहा॑ नि॒युता॑य॒ स्वाहा॑  
 प्र॒युता॑य॒ स्वाहे॑त्याह॥६०॥

त्रय॑ इ॒मे लो॒काः। इ॒माने॒व लो॒कान॑व॑ रुन्धे। अ॒र्बुदा॑य॒ स्वाहे॑त्याह। वा॒ग्वा

अर्बुदम्। वाचमेवाव रुन्धे। न्यर्बुदाय स्वाहेत्याह। यो वै वाचो भूमा। तन्न्यर्बुदम्।  
वाच एव भूमानमव रुन्धे। समुद्राय स्वाहेत्याह॥६१॥

समुद्रमेवाऽऽप्नोति। मध्याय स्वाहेत्याह। मध्यमेवाऽऽप्नोति। अन्ताय  
स्वाहेत्याह। अन्तमेवाऽऽप्नोति। परार्धाय स्वाहेत्याह। परार्धमेवाऽऽप्नोति। उषसे  
स्वाहा व्युष्ट्यै स्वाहेत्याह। रात्रिर्वा उषाः। अहर्व्युष्टिः। अहोरात्रे एवाव रुन्धे।  
अथो अहोरात्रयोरेव प्रति तिष्ठति। ता यदुभयीर्दिवा वा नक्तं वा जुहुयात्।  
अहोरात्रे मोहयेत्। उषसे स्वाहा व्युष्ट्यै स्वाहोदेष्यते स्वाहोद्यते स्वाहेत्यनुदिते  
जुहोति। उदिताय स्वाहा सुवर्गाय स्वाहा लोकाय स्वाहेत्युदिते जुहोति।  
अहोरात्रयोरव्यतिमोहाय॥६२॥ एकोत्तरं जुहोति प्रयुताय स्वाहेत्याह समुद्राय स्वाहेत्याहाहर्व्युष्टिः सप्त च॥ — [१६]

विभूर्मात्रा प्रभूः पित्रेत्यश्वनामानि जुहोति। उभयोरेवैनं लोकयोर्नामधेयं  
गमयति। आयनाय स्वाहा प्रायणाय स्वाहेत्युद्वावाञ्जुहोति। सर्वमेवैनमस्कन्नं  
सुवर्गं लोकं गमयति। अग्नये स्वाहा सोमाय स्वाहेति पूर्वहोमाञ्जुहोति। पूर्व

ए॒व द्विष॑न्तं॒ भ्रातृ॑व्य॒मति॑ क्रामति। पृथि॒व्यै स्वाहा॑ऽन्तरि॑क्षाय॒ स्वाहेत्या॑ह।  
य॒था॒य॒जुरे॒वैतत्। अ॒ग्नये॒ स्वाहा॒ सोमा॑य॒ स्वाहेति॑ पूर्॒वदी॒क्षा जु॑होति। पूर्॒व ए॒व  
द्विष॑न्तं॒ भ्रातृ॑व्य॒मति॑ क्रामति॥६३॥

पृथि॒व्यै स्वाहा॑ऽन्तरि॑क्षाय॒ स्वाहेत्ये॑कवि॒ंशिनीं॑ दी॒क्षां जु॑होति। एक॑वि॒ंशति॑र्वै  
दे॒वलो॒काः। द्वा॒दश॑ मा॒साः पञ्च॑र्त॒वः। त्रय॑ इ॒मे लो॒काः। अ॒सावा॑दित्य  
ए॒कवि॒ंशः। ए॒ष सु॒वर्गो॑ लो॒कः। सु॒वर्गस्य॑ लो॒कस्य॑ स॒मंष्ट्यै॑। भु॒वो दे॒वानां॑  
क॒र्मणे॒त्यु॒तुदी॒क्षा जु॑होति। ऋ॒तूने॒वास्मै॑ कल्पयति। अ॒ग्नये॒ स्वाहा॑ वा॒यवे॒ स्वाहेति॑  
जुहो॒त्यन॑न्तरि॒त्यै॥६४॥

अ॒र्वाङ्म॑जः सङ्क्रा॑म॒त्वित्या॑प्तीर्जुहोति। सु॒वर्गस्य॑ लो॒कस्या॑प्त्यै॑। भू॒तं  
भ॒व्यं भवि॑ष्यदिति॒ पर्या॑प्तीर्जुहोति। सु॒वर्गस्य॑ लो॒कस्य॑ पर्या॑प्त्यै॑। आ  
मे॑ गृ॒हा भ॑व॒न्त्वित्या॑भू॒र्जुहोति॑। सु॒वर्गस्य॑ लो॒कस्या॑भू॒त्यै। अ॒ग्निना॒ तपो॑  
ऽन्व॑भ॒वदित्य॑नु॒भू॒र्जुहोति॑। सु॒वर्गस्य॑ लो॒कस्या॑नु॒भू॒त्यै। स्वाहा॑ऽऽधि॒माधी॑ताय॒



स्वाहेति समस्तानि वैश्वदेवानि जुहोति। समस्तमेव द्विषन्तं भ्रातृव्यमतिं क्रामति॥६५॥

दध्मः स्वाहा हनूभ्याः स्वाहेत्यङ्गहोमाञ्जुहोति। अङ्गेअङ्गे वै पुरुषस्य पाप्मोपश्लिष्टः। अङ्गादङ्गादेवैनं पाप्मनस्तेन मुञ्चति। अज्येताय स्वाहा कृष्णाय स्वाहा श्वेताय स्वाहेत्यश्वरूपाणि जुहोति। रूपैरेवैनं समर्धयति। ओषधीभ्यः स्वाहा मूलेभ्यः स्वाहेत्योषधिहोमाञ्जुहोति। द्वय्यो वा ओषधयः। पुष्पेभ्योऽन्याः फलं गृह्णन्ति। मूलेभ्योऽन्याः। ता एवोभयीरव रुन्धे॥६६॥

वनस्पतिभ्यः स्वाहेति वनस्पतिहोमाञ्जुहोति। आरण्यस्यान्नाद्यस्यावरुद्धौ। मेषस्त्वा पचतैरवत्वित्यपाव्यानि जुहोति। प्राणा वै देवा अपाव्याः। प्राणानेवावरुन्धे। कूप्याभ्यः स्वाहाऽध्वः स्वाहेत्यपाः होमाञ्जुहोति। अप्सु वा आपः। अन्नं वा आपः। अद्ध्यो वा अन्नं जायते। यदेवाद्ध्योऽन्नं जायते। तदवरुन्धे॥६७॥ पूर्वदीक्षा जुहोति पूर्वं एव द्विषन्तं भ्रातृव्यमतिं क्रामत्यनन्तरित्यै क्रामति रुन्धे जायतु एकं च॥

[१७]

अम्भांसि जुहोति। अयं वै लोकोऽम्भांसि। तस्य वसवोऽधिपतयः।

अग्निर्ज्योतिः। यदम्भांसि जुहोति। इममेव लोकमव रुन्धे। वसूनां सायुज्यं गच्छति। अग्निं ज्योतिरव रुन्धे। नभांसि जुहोति। अन्तरिक्षं वै नभांसि॥६८॥

तस्य रुद्रा अधिपतयः। वायुर्ज्योतिः। यन्नभांसि जुहोति। अन्तरिक्षमेवाव रुन्धे। रुद्राणां सायुज्यं गच्छति। वायुं ज्योतिरव रुन्धे। महांसि जुहोति। असौ वै लोको महांसि। तस्यादित्या अधिपतयः। सूर्यो ज्योतिः॥६९॥

यन्महांसि जुहोति। अमुमेव लोकमव रुन्धे। आदित्यानां सायुज्यं गच्छति। सूर्यं ज्योतिरव रुन्धे। नमो राज्ञे नमो वरुणायेति यव्यानि जुहोति। अन्नाद्यस्यावरुद्धौ। मयोभूर्वातो अभि वातून्ना इति गव्यानि जुहोति। पशूनामवरुद्धौ। प्राणाय स्वाहा व्यानाय स्वाहेति सन्ततिहोमाञ्जुहोति। सुवर्गस्य लोकस्य सन्तत्यै॥७०॥

सिताय स्वाहाऽसिताय स्वाहेति प्रमुक्तीर्जुहोति। सुवर्गस्य लोकस्य प्रमुक्त्यै। पृथिव्यै स्वाहाऽन्तरिक्षाय स्वाहेत्याह। यथायजुरेवैतत्। दत्वते स्वाहाऽदन्तकाय स्वाहेति शरीरहोमाञ्जुहोति। पितृलोकमेव तैर्यजमानोऽव रुन्धे। कस्त्वा युनक्ति

स त्वां युन॒क्तिति॑ परि॒धीन् युन॑क्ति। इ॒मे वै लो॒काः परि॒धयः॑। इ॒माने॒वास्मै॑ लो॒कान्  
युन॑क्ति। सु॒व॒र्गस्य॑ लो॒कस्य॑ सम॑ष्ट्यै॥ ७१॥

यः प्रा॑ण॒तो य आ॑त्म॒दा इति॑ म॒हिमा॑नौ जुहोति। सु॒व॒र्गो वै लो॒को महः॑।  
सु॒व॒र्गमे॒व ताभ्यां॑ लो॒कं यज॑मानोऽव॑ रुन्धे। आ ब्र॒ह्मन्ब्रा॒ह्म॒णो ब्र॑ह्मव॒र्चसी  
जा॑यता॒मिति॑ सम॑स्तानि ब्र॒ह्मव॒र्चसा॑नि जुहोति। ब्र॒ह्मव॒र्चसमे॒व तैर्यज॑मानोऽव॑  
रुन्धे। ज॒ज्ञि बी॒जमि॑ति जुहोत्यन॑न्तरित्यै। अ॒ग्नये॑ सम॑नमत्पृ॒थिव्यै॑ सम॑नम॒दिति॑  
सन्न॑तिहोमाञ्जुहोति। सु॒व॒र्गस्य॑ लो॒कस्य॑ सन्न॑त्यै। भू॒ताय॑ स्वाहा॑ भवि॒ष्यते॑ स्वाहेति॑  
भू॒ताभ॒व्यौ होमौ॑ जुहोति। अ॒यं वै लो॒को भू॒तम्॥ ७२॥

अ॒सौ भ॑वि॒ष्यत्। अ॒नयो॑रे॒व लो॒कयोः॑ प्र॒ति ति॑ष्ठति। सर्व॑स्याऽऽत्यै॑।  
सर्व॑स्याव॑रुद्धौ। यद॑क्र॒न्दः प्रथ॑मं जाय॑मान इ॒त्यश्व॑स्तो॒मीयं॑ जुहोति। सर्व॑स्याऽऽत्यै॑।  
सर्व॑स्य॒ जित्यै॑। सर्व॑मे॒व तेना॑ऽऽप्रोति। सर्वं॑ जयति। यो॑ऽश्वमे॒धेन॑ यज॑ते॥ ७३॥

य उ॑ चैनमे॒वं वेद॑। य॒ज्ञं र॒क्षां स्य॑जिघा॑सन्। स ए॒तान्प्र॒जाप॑तिर्नक्तं॑ हो॒मानं॑ पश्य

तानं जुहोत्। तैर्वै स यज्ञाद्रक्षाऽस्य पाहन्। यन्नक्तं होमाञ्जुहोति। यज्ञादेव  
 तैर्यजमानो रक्षाऽस्य पंहन्ति। उषसे स्वाहा व्युष्ट्यै स्वाहेत्यन्ततो जुहोति।  
 सुवर्गस्य लोकस्य समष्ट्यै॥ ७४॥ वै नमःसि सूर्यो ज्योतिः सन्तत्यै समष्ट्यै भूतं यजन्ते नवं च॥—[१८]

एकयूपो वैकादशिनी वा। अन्येषां यज्ञानां यूपा भवन्ति। एकविंशिन्यश्वमेधस्य।  
 सुवर्गस्य लोकस्याभिजित्यै। बैल्वो वा खादिरो वा पालाशो वा। अन्येषां  
 यज्ञक्रतूनां यूपा भवन्ति। राज्ञुदाल एकविंशत्यरत्निरश्वमेधस्य। सुवर्गस्य  
 लोकस्य समष्ट्यै। नान्येषां पशूनां तैजुन्या अवदन्ति। अवदन्त्यश्वस्य॥ ७५॥

पाप्मा वै तैजुनी। पाप्मनोऽपंहत्यै। प्लक्षशाखायामन्येषां पशूनामवदन्ति।  
 वेतसशाखायामश्वस्य। अप्सुयौनिर्वा अश्वः। अप्सुजो वेतसः। स्व एवास्य  
 योनावव द्यति। यूपेषु ग्राम्यान्पशून्त्रियुञ्जन्ति। आरोकेष्वारण्यान्धारयन्ति। पशूनां  
 व्यावृत्त्यै। आ ग्राम्यान्पशून्लभन्ते। प्रारण्यान्सृजन्ति। पाप्मनोऽपंहत्यै॥ ७६॥ अश्वस्य

व्यावृत्त्यै त्रीणि च॥

[१९]

राज्जुदालमग्निष्ठं मि॑नोति। भ्रू॒ण॒ह॒त्याया॒ अप॑हृत्यै। पौतु॑द्रवाव॒भितो॑ भवतः।  
पु॒ण्य॑स्य ग॒न्ध॒स्याव॑रुद्धै। भ्रू॒ण॒ह॒त्यामे॒वास्मा॑दप॒हत्य॑। पु॒ण्ये॑न ग॒न्धेनो॑भयतः परि॑  
गृ॒ह्णाति। षड्बै॒ल्वा भ॑वन्ति। ब्र॒ह्म॒व॒र्च॒सस्या॑वरुद्धै। षड्वा॑दिराः। तेज॒सोऽव॑रुद्धै॥ ७७ ॥

षट्वा॑ला॒शाः। सोम॒पी॒थस्या॑वरुद्धै। एक॑विंशतिः सम्प॑द्यन्ते। एक॑विंशतिर्वै  
दे॒वलो॒काः। द्वा॒द॒श मा॒साः प॒ञ्च॒र्त॒वः। त्रय॑ इ॒मे लो॒काः। अ॒सावा॑दित्य एक॑विंशः।  
ए॒ष सु॑व॒र्गो लो॒कः। सु॒व॒र्गस्य॑ लो॒कस्य॑ सम॑ष्ट्यै। श॒तं प॒शवो॑ भवन्ति॥ ७८ ॥

श॒तायुः॑ पु॒रुषः॑ श॒तेन्द्रि॑यः। आयु॑ष्येवेन्द्रि॒ये प्र॒ति ति॑ष्ठति। सर्वं॑ वा  
अ॒श्वमे॑ध्याप्रोति। अप॑रिमिता भवन्ति। अप॑रिमित॒स्याव॑रुद्धै। ब्र॒ह्म॒वा॒दिनो॑ वदन्ति।  
कस्मा॑त्स॒त्यात्। द॒क्षिण॒तोऽन्ये॑षां पशूनाम॑व॒द्यन्ति॑। उ॒त्तर॒तोऽश्व॑स्येति॑। वा॒रु॒णो वा  
अ॒श्वः॥ ७९ ॥

ए॒षा वै व॑रुणस्य॒ दिक्। स्वाया॑मे॒वास्य॑ दि॒श्यव॑द्यति। यदित॑रेषां पशूनाम॑व॒द्यति॑।  
श॒त॒दे॒वत्य॑ तेनाव॑ रुन्धे। चि॒तेऽग्ना॑वधि॑ वैत॒से क॒टेऽश्वं॑ चिनोति। अ॒प्सुयो॑नि॒र्वा

अश्वः। अ॒प्सु॒जो वे॑त॒सः। स्व ए॒वैनं॑ यो॒नौ प्र॑ति॒ष्ठाप॑यति। पु॒रस्ता॑त्प्र॒त्यञ्च॑ तू॒परं॑  
चि॒नोति॑। प॒श्चात्प्रा॒चीनं॑ गो॒मृग॑म्॥८०॥

प्रा॒णापा॒नावे॑वास्मिन्स॒म्यञ्चौ॑ दधाति। अश्वं॑ तू॒परं॑ गो॒मृग॑मिति॑ सर्व॒हुतं॑  
ए॒ताञ्जु॑होति। ए॒षां लो॒काना॑म॒भिजि॑त्यै। आ॒त्मना॒ऽभि जु॑होति। सा॒त्मान॑मे॒वैन॑  
स॒तनुं॑ करोति। सा॒त्माऽमु॒ष्मिँल्लो॒के भ॑वति। य ए॒वं वेद॑। अथो॒ वसो॑रे॒व धा॒रां तेना॑व  
रुन्धे। इ॒लुव॑र्दाय॒ स्वाहा॑ ब॒लि॒वर्दा॑य॒ स्वाहे॑त्याह। सं॒व॒त्स॒रो वा इ॑लुव॒र्दः। प॒रि॒  
व॒त्स॒रो ब॑लि॒वर्दः॑। सं॒व॒त्स॒रादे॒व प॑रि॒व॒त्स॒रादा॑यु॒रव॑ रुन्धे। आ॒युरे॒वास्मि॑न्दधाति।  
तस्मा॑दश्वमे॒धया॒जी ज॒रसा॑ वि॒स्रसा॑मुं लो॒कमे॑ति॥८१॥

तेजसोऽवरुद्धौ

भवन्त्यश्वौ

गोमृगमिलुवर्दश्चत्वारि

च॥

[२०]

ए॒क॒वि॒ंशो॑ऽग्नि॒र्भव॑ति। ए॒क॒वि॒ंशः॑ स्तोमः। ए॒क॒वि॒ंश॑तिर्यू॒पाः। यथा॒ वा अश्वौ॑  
व॒र्षभा॒ वा वृ॑षा॒णः स॑स्फुरे॒रन्। ए॒वमे॒व तथ्स्तो॑माः स॑स्फुरन्ते। यदे॒क॒वि॒ंशाः।  
ते यथ्सा॑मृच्छे॒रन्। ह॒न्येता॑स्य य॒ज्ञः। द्वा॒द॒श ए॒वाग्निः॑ स्या॒दित्या॑हुः। द्वा॒द॒शः

स्तोमः॥८२॥

एकादश॒ यूपाः॑। यद्द्वादशोऽग्नि॑र्भवति। द्वादश॒ मासाः॑ संवत्स॒रः। संवत्स॒रेणैवास्मा॒  
अन्न॑मव॒ रुन्धे। यद्व॒श यूपा॒ भव॑न्ति। दशाक्ष॑रा वि॒राट्। अन्नं॑ वि॒राट्।  
वि॒राजै॒वान्नाद्य॑मव॒ रुन्धे। य ए॑काद॒शः। स्तन॑ ए॒वास्यै॒ सः॥८३॥

दुह॒ ए॒वैनां॒ तेन॑। तदाहुः॑। यद्द्वादशोऽग्निः॑ स्याद्द्वाद॒शः स्तोम॒ एका॑द॒श यूपाः॑।  
यथा॒ स्थू॒रिणा॒ या॒यात्। ता॒दृक्तात्। ए॒क॒वि॒ंश ए॒वाग्निः॑ स्या॒दित्या॑हुः। ए॒क॒वि॒ंशः  
स्तोमः॑। ए॒क॒वि॒ंशति॑र्यूपाः॑। यथा॒ प्रष्टि॑भिर्याति। ता॒दृगे॒व तत्॥८४॥

यो वा अ॑श्वमे॒धे ति॒स्रः क॒कुभो॑ वेद। क॒कुद्ध॒ राज्ञा॑ भवति। ए॒क॒वि॒ंशोऽग्नि॑र्भवति।  
ए॒क॒वि॒ंशः स्तोमः॑। ए॒क॒वि॒ंशति॑र्यूपाः॑। ए॒ता वा अ॑श्वमे॒धे ति॒स्रः क॒कुभः॑। य ए॒वं  
वेद॑। क॒कुद्ध॒ राज्ञा॑ भवति। यो वा अ॑श्वमे॒धे त्रीणि॑ शी॒र्षाणि॒ वेद॑। शिरो॑ ह॒ राज्ञा॑  
भवति। ए॒क॒वि॒ंशोऽग्नि॑र्भवति। ए॒क॒वि॒ंशः स्तोमः॑। ए॒क॒वि॒ंशति॑र्यूपाः॑। ए॒तानि॒  
वा अ॑श्वमे॒धे त्रीणि॑ शी॒र्षाणि॑। य ए॒वं वेद॑। शिरो॑ ह॒ राज्ञा॑ भवति॥८५॥

ए॒व तच्छि॑रो ह॒ राज्ञा॑ भवति षट् च॥

द्वादशः स्तोमः स

दे॒वा वा अ॑श्वमे॒धे प॑व॒माने॑। सु॒व॒र्गं लो॒कं न प्रा॑जा॒नन्। तम॑श्वः प्रा॒जा॒नात्।  
 यद॑श्वमे॒धेऽश्वे॑न॒ मेध्ये॑नोद॒श्चो ब॑हिष्पवमा॒नः सर्प॑न्ति। सु॒व॒र्गस्य॑ लो॒कस्य॑ प्र॒ज्ञा॒त्यै।  
 न वै म॑नु॒ष्यः सु॒व॒र्गं लो॒कम॑ञ्ज॒सा वेद॑। अश्वो॒ वै सु॒व॒र्गं लो॒कम॑ञ्ज॒सा वेद॑।  
 यदु॑द्गा॒तोद्गा॑ये॒त्। यथा॑ क्षे॒त्रज्ञो॑ऽन्येन॑ प॒था प्र॑तिपा॒दये॑त्। ता॒दृक्त॑त्॥८६॥

उ॒द्गा॒तार॑म॒प॒रुध्य॑। अश्व॑मु॒द्गी॒थाय॑ वृणीते। यथा॑ क्षे॒त्रज्ञो॑ऽञ्ज॒सा न॑यति।  
 ए॒वमे॒वैन॑म॒श्वः सु॒व॒र्गं लो॒कम॑ञ्ज॒सा न॑यति। पु॒च्छ॑म॒न्वा र॑भन्ते। सु॒व॒र्गस्य॑ लो॒कस्य॑  
 सम॑ष्ट्यै। हिं क॑रोति। सा॒मैवाकः॑। हिं क॑रोति। उ॒द्गी॒थ ए॒वास्य॑ सः॥८७॥

वड॑बा॒ उप॑ रुन्धन्ति। मि॒थुन॒त्वाय॑ प्र॒ज्ञा॒त्यै। अथो॒ यथो॑पगा॒तारं॑ उप॒गाय॑न्ति।  
 ता॒दृगे॒व तत्। उद॑गासीद॒श्चो मे॒ध्य इ॒त्याह॑। प्रा॒जाप॑त्यो वा अश्वः। प्र॒जाप॑तिरु॒द्गी॒थः।  
 उ॒द्गी॒थमे॒वाव॑ रुन्धे। अथो॒ ऋ॒क्साम॑यो॒रेव॑ प्र॒ति ति॑ष्ठति। हि॒र॒ण्ये॒नोपा॑क॑रोति।  
 ज्योति॑र्वै हि॒र॒ण्यम्। ज्योति॑रे॒व मु॑ख॒तो द॑धाति। यज॑माने च प्र॒जासु॑ च। अथो॒  
 हि॒र॒ण्यज्योति॑रे॒व यज॑मानः सु॒व॒र्गं लो॒कमे॑ति॥८८॥ तथ्स उपाकरोति चत्वारि च॥ ——— [२२]



पुरुषो वै यज्ञः। यज्ञः प्रजापतिः। यदश्वे पशून्नियुञ्जन्ति। यज्ञादेव तद्यज्ञं प्रयुङ्क्ते। अश्वं तूपरं गोमृगम्। तानग्निष्ठ आलभते। सेनामुखमेव तत्संश्यति। तस्माद्राजमुखं भीष्मं भावुकम्। आग्नेयं कृष्णग्रीवं पुरस्ताल्ललाटे। पूर्वाग्निमेव तं कुरुते॥८९॥

तस्मात्पूर्वाग्निं पुरस्तात्स्थापयन्ति। पौष्णमन्वश्चम्। अन्नं वै पूषा। तस्मात्पूर्वाग्नावाहार्यमा हरन्ति। ऐन्द्रापौष्णमुपरिष्ठात्। ऐन्द्रो वै राजन्योऽन्नं पूषा। अन्नाद्येनैवैनमुभयतः परि गृह्णाति। तस्माद्राजन्योऽन्नादो भावुकः। आग्नेयो कृष्णग्रीवो बाहुवोः। बाहुवोरेव वीर्यं धत्ते॥९०॥

तस्माद्राजन्यो बाहुबलीभावुकः। त्वाष्ट्रौ लोमशसक्थौ सक्थ्योः। सक्थ्योरेव वीर्यं धत्ते। तस्माद्राजन्यं ऊरुबलीभावुकः। शितिपृष्ठौ बार्हस्पत्यौ पृष्ठे। ब्रह्मवर्चसमेवोपरिष्ठाद्धत्ते। अथो कवचे एवैते अभितः पर्यूहते। तस्माद्राजन्यः

सन्नद्धो वीर्यं करोति। धात्रे पृषोदरमधस्तात्। प्रतिष्ठामेवैतां कुरुते। अथो इयं  
वै धाता। अस्यामेव प्रति तिष्ठति। सौर्यं बलक्षं पुच्छे। उथ्सेधमेव तं कुरुते।  
तस्मादुथ्सेधं भूये प्रजा अभिसंश्रयन्ति॥११॥ कुरुते धत्ते कुरुते पञ्च च॥ [२३]

साङ्गहण्या चतुष्टयो यो वै यः पितृश्रुत्वारो यथा नित्तं प्रजापतये त्वा यथा प्रोक्षितं विभूराहं प्रजापतिरकामयताश्वमेधेनं प्रजापतिर्न किञ्चन सावित्रमा  
ब्रह्मन्प्रजापतिर्देवेभ्यः प्रजापती रक्षांसि प्रजापतिमीप्सति विभूरश्वनामान्यम्भांस्येकयूपो राज्ञुदालमेकविंशो देवाः पुरुषस्त्रयोविंशतिः॥२३॥  
साङ्गहण्या तस्मादश्वमेधयाजी यत्परिमिता यद्यज्ञमुखे यो दीक्षां देवानेव त्रयं इमे सितायं प्राणापानावेवास्मिन्तस्माद्वाजिन्यं एकंनवतिः॥११॥  
साङ्गहण्या संश्रयन्ति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके अष्टमः प्रपाठकः समाप्तः॥

॥नवमः प्रश्नः॥

॥तैत्तिरीयब्राह्मणे तृतीयाष्टके नवमः प्रपाठकः॥

प्रजापतिरश्वमेधमसृजत। सौऽस्मात्सृष्टोऽपाक्रामत्। तमष्टादशिभिरनु प्रायुङ्क्त।  
 तमाप्नोत्। तमाप्त्वाऽष्टादशिभिरवारुन्ध। यदष्टादशिनं आलभ्यन्ते। यज्ञमेव तैराप्त्वा  
 यजमानोऽव रुन्धे। संवत्सरस्य वा एषा प्रतिमा। यदष्टादशिनः। द्वादश मासाः  
 पञ्चर्तवः॥१॥

संवत्सरोऽष्टादशः। यदष्टादशिनं आलभ्यन्ते। संवत्सरमेव तैराप्त्वा यजमानो-  
 ऽव रुन्धे। अग्निष्टेऽन्यान्पशून्पाकुरोति। इतरेषु यूपेष्वष्टादशिनोऽजामित्वाय।  
 नवनवालभ्यन्ते सवीर्यत्वाय। यदारण्यैः सङ्स्थापयेत्। व्यवस्येतां पितापुत्रौ।  
 व्यध्वानः क्रामेयुः। विदूरं ग्रामयोग्रामान्तौ स्याताम्॥२॥

ऋक्षीकाः पुरुषव्याघ्राः परिमोषिण आव्याधिनीस्तस्करा अरण्येष्वजायेरन्।  
 तदाहुः। अपशवो वा एते। यदारण्याः। यदारण्यैः सङ्स्थापयेत्। क्षिप्रे  
 यजमानमरण्यं मृतं हरेयुः। अरण्यायतना ह्यारण्याः पशव इति। यत्पशून्नालभेत।

अनवरुद्धा अस्य पशवः स्युः। यत्पर्यग्निकृतानुत्सृजेत्॥ ३ ॥

यज्ञवेशसं कुर्यात्। यत्पशूनालभते। तेनैव पशूनं रुन्धे। यत्पर्यग्निकृतानुत्सृजत्ययं  
अवरुद्धा अस्य पशवो भवन्ति। न यज्ञवेशसं भवति। न यजमानमरण्यं मृतं  
हरन्ति। ग्राम्यैः सः स्थापयति। एते वै पशवः क्षेमो नाम। सं पितापुत्रावस्यतः।  
समध्वानः क्रामन्ति। समन्तिकं ग्रामयोग्रामान्तौ भवतः। नक्षीकाः पुरुषव्याघ्राः  
परिमोषिण आव्याधिनीस्तस्करा अरण्येष्वजायन्ते॥ ४ ॥ ऋतवः स्यातामुत्सृजेत्थ्यतस्त्रीणि च॥—[१]

प्रजापतिरकामयतोभौ लोकाववं रुन्धीयेति। स एतानुभयान्पशूनं पश्यत्।  
ग्राम्याश्चरण्याश्च। तानालभत। तैर्वै स उभौ लोकाववारुन्ध। ग्राम्यैरेव  
पशुभिरिमं लोकमवारुन्ध। आरण्यैरमुम्। यद् ग्राम्यान्पशूनालभते। इममेव  
तैर्लोकमवं रुन्धे। यदारण्यान्॥ ५ ॥

अमुं तैः। अनवरुद्धो वा एतस्य संवत्सर इत्याहुः। य इतइतश्चातुर्मास्यानि  
संवत्सरं प्रयुङ्क्त इति। एतावान् वै संवत्सरः। यच्चातुर्मास्यानि। यदेते चातुर्मास्याः

प॒श॒वं आ॒ल॒भ्यन्ते॑। प्र॒त्यक्ष॑मे॒व तैः सं॒वत्स॑रं यज॑मा॒नोऽवं रु॒न्धे। वि॒ वा ए॒ष प्र॒जया॑  
प॒शुभि॑र्ऋ॒ध्यते। यः सं॒वत्स॑रं प्र॑यु॒ङ्क्ते। सं॒वत्स॑रः सु॒वर्गो लो॒कः॥६॥

सु॒व॒र्गं तु लो॒कं नाप॑राध्नोति। प्र॒जा वै प॒श॒वं एका॑द॒शिनी॑। यदे॒त ऐ॑काद॒शिनाः  
प॒श॒वं आ॒ल॒भ्यन्ते॑। साक्षा॑दे॒व प्र॒जां प॒शून् यज॑मा॒नोऽवं रु॒न्धे। प्र॒जाप॑तिर्वि॒राज॑म॒-  
सृ॒जत। सा सृ॒ष्टाऽश्व॑मे॒धं प्रावि॑शत्। ता॒न॒द॒शिभि॑रनु॒ प्रायु॑ङ्क्त। ता॒मा॑प्रोत्। ता॒मा॒स्वा  
द॒शिभि॑रवा॒रुन्ध। यद्द॒शिनि॑ आ॒ल॒भ्यन्ते॑॥७॥

वि॒राज॑मे॒व तैरा॒स्वा यज॑मा॒नोऽवं रु॒न्धे। एका॑द॒श द॒शत॒ आल॑भ्यन्ते।  
एका॑द॒शाक्ष॑रा त्रि॒ष्टुप्। त्रैष्टु॑भाः प॒श॒वः। प॒शूने॒वावं रु॒न्धे। वैश्व॑दे॒वो वा  
अश्वः॑। ना॒नादे॒वत्याः॑ प॒श॒वो भ॑वन्ति। अश्व॑स्य स॒र्वत्वा॑य। ना॒नारू॑पा  
भ॑वन्ति। तस्मा॒न्नाना॑रूपाः प॒श॒वः। ब॒हुरू॑पा भ॑वन्ति। तस्मा॑द्ब॒हुरू॑पाः प॒श॒वः  
समृ॑द्धौ॥८॥ आ॒र॒ण्यं॑लो॒को द॒शिनि॑ आ॒ल॒भ्यन्ते॑ ना॒नारू॑पाः प॒श॒वो द्वे च॑॥

[२]

अ॒स्मै वै लो॒काय॑ ग्रा॒म्याः प॒श॒व आल॑भ्यन्ते। अ॒मुष्मा॑ आ॒र॒ण्याः।

यद्गाम्यान्पशूनालभते। इममेव तैर्लोकमव रुन्धे। यदारण्यान्। अमुं तैः।  
उभयाँन्पशूनालभते। गाम्याँश्चारण्याँश्च। उभयोँर्लोकयोरवरुद्धौ। उभयाँन्पशूना-  
लभते॥९॥

ग्राम्याँश्चारण्याँश्च। उभयस्यान्नाद्यस्यावरुद्धौ। उभयाँन्पशूनालभते।  
ग्राम्याँश्चारण्याँश्च। उभयेषां पशूनामवरुद्धौ। त्रयस्त्रयो भवन्ति। त्रय इमे  
लोकाः। एषां लोकानामाप्त्यै। ब्रह्मवादिनो वदन्ति। कस्माँत्सत्यात्॥१०॥

अस्मिँल्लोके बहवः कामा इति। यत्समानीभ्यो देवताँभ्योऽन्येँऽन्ये पशव  
आलभ्यन्ते। अस्मिन्नेव तल्लोके कामाँन्दधाति। तस्मादस्मिँल्लोके बहवः कामाः।  
त्रयाणां त्रयाणाँ सह वपा जुहोति। त्र्यावृतो वै देवाः। त्र्यावृत इमे  
लोकाः। एषां लोकानामाप्त्यै। एषां लोकानां क्लृप्त्यै। पर्यग्निकृतानारण्या-  
नुत्सृजन्त्यहिँसायै॥११॥ अवरुद्धा उभयाँन्पशूनालभते सत्यादहिँसायै॥

[३]

युञ्जन्ति ब्रध्नमित्याह। असौ वा आदित्यो ब्रध्नः। आदित्यमेवास्मै युनक्ति।  
अरुषमित्याह। अग्निर्वा अरुषः। अग्निमेवास्मै युनक्ति। चरन्तमित्याह। वायुर्वै

चरन्। वा॒युमे॒वास्मै॑ युनक्ति। परि॒त॒स्थुष॑ इत्याह॥१२॥

इ॒मे वै लो॒काः परि॒त॒स्थुषः॑। इ॒माने॒वास्मै॑ लो॒कान् यु॑नक्ति। रोच॑न्ते रोच॒ना दि॒वीत्या॑ह। नक्ष॑त्राणि वै रोच॒ना दि॒वि। नक्ष॑त्राण्ये॒वास्मै॑ रोचयति। यु॒ञ्जन्त्य॑स्य॒ काम्ये॑त्या॑ह। कामा॑ने॒वास्मै॑ युनक्ति। हरी॒ विप॑क्ष॒सेत्या॑ह। इ॒मे वै हरी॒ विप॑क्षसा। इ॒मे ए॒वास्मै॑ युनक्ति॥१३॥

शो॒णा धृ॒ष्णू नृ॒वाह॑सेत्या॑ह। अ॒होरा॒त्रे वै नृ॒वाह॑सा। अ॒होरा॒त्रे ए॒वास्मै॑ युनक्ति। ए॒ता ए॒वास्मै॑ दे॒वता॑ युनक्ति। सु॒वर्ग॑स्य॒ लो॒कस्य॑ सम॑ष्ट्यै। के॒तुं कृ॑ण्वन्न॑के॒तव॑ इति॑ ध्व॒जं प्र॑तिमु॒ञ्चति॑। यश॑ ए॒वैन॑रा॒ज्ञां ग॑मयति। जी॒मूत॑स्येव भवति॑ प्रती॒कमि॑त्या॑ह। य॒थाय॑जुरे॒वैतत्। ये ते॒ पन्था॑नः स॒वितः॑ पू॒र्व्यास॑ इत्य॑ध्व॒र्युर्यज॑मानं वाचयत्य॒भिजि॑त्यै॥१४॥

परा॒ वा ए॒तस्य॑ य॒ज्ञ ए॑ति। यस्य॑ प॒शुरु॒पाकृ॑तोऽन्यत्र॒ वेद्या॑ एति॑। ए॒तस्त्तो॑तरे॒तेन॑ प॒था पुन॑रश्व॒माव॑र्तयासि न॒ इत्या॑ह। वा॒युर्वै स्तो॑ता। वा॒युमे॒वास्य॑

प॒रस्ता॑द्वधा॒त्यावृ॑त्त्यै। यथा॒ वै ह॒विषो॑ गृही॒तस्य॑ स्कन्दति। ए॒वं वा ए॒तदश्व॑स्य  
स्कन्दति। यद॑स्यो॒पाकृ॑तस्य॒ लोमा॑नि शीय॑न्ते। यद्वा॒लेषु॑ का॒चाना॒वय॑न्ति।  
लोमा॑न्ये॒वास्य॑ तथ्सम्भ॑रन्ति॥१५॥

भूर्भुवः॑ सुव॒रिति॑ प्राजाप॒त्याभि॑राव॑यन्ति। प्राजाप॒त्यो वा अश्वः॑। स्वयै॒वैनं॑  
दे॒वत॑या॒ सम॑र्धयन्ति। भूरिति॑ महि॒षी। भुव॑ इति॑ वा॒वाता॑। सुव॒रिति॑ परिवृ॒त्ती।  
ए॒षां लो॒काना॑म॒भिजि॑त्यै। हि॒र॒ण्ययाः॑ का॒चा भ॑वन्ति। ज्योति॒र्वै हि॑रण्यम्।  
रा॒ष्ट्रम॑श्वमे॒धः॥१६॥

ज्योति॑श्चै॒वास्मै॑ रा॒ष्ट्रं च॑ स॒मीची॑ दधाति। स॒हस्रं॑ भवन्ति। स॒हस्रं॑सम्मि॒तः  
सुव॒र्गो लो॒कः। सुव॒र्गस्य॑ लो॒कस्या॒भिजि॑त्यै। अप॒ वा ए॒तस्मा॒त्तेज॑ इन्द्रि॒यं  
प॒शवः॑ श्रीः क्रा॑मन्ति। योऽश्वमे॒धेन॑ यज॑न्ते। वस॑वस्त्वाऽञ्जन्तु गाय॒त्रेण॑ छन्द॒सेति॑  
महि॑ष्य॒भ्यन॑क्ति। तेजो॒ वा आ॒ज्यम्। तेजो॑ गाय॒त्री। तेज॑सै॒वास्मै॑ तेजोऽव॑  
रुन्धे॥१७॥

रु॒द्रास्त्वा॑ञ्जन्तु त्रैष्टु॑भेन॒ छन्द॒सेति॑ वा॒वाता॑। तेजो॒ वा आ॒ज्यम्। इन्द्रि॒यं त्रि॒ष्टुप्।



तेजसैवास्मा इन्द्रियमव रुन्धे। आदित्यास्त्वाँऽञ्जन्तु जागतेन छन्दसेति परिवृत्ती।  
तेजो वा आज्यम्। पशवो जगती। तेजसैवास्मे पशूनव रुन्धे। पत्नयोऽभ्यञ्जन्ति।  
श्रिया वा एतद्रूपम्॥१८॥

यत्पत्नयः। श्रियमेवास्मिन्तद्वधति। नास्मात्तेज इन्द्रियं पशवः श्रीरप  
क्रामन्ति। लाजी(३)ञ्छाची(३)न् यशोममाँ(४) इत्यतिरिक्तमन्नमश्वायोपाहरन्ति।  
प्रजामेवान्नादीं कुर्वते। एतद्देवा अन्नमत्तैतदन्नमद्धि प्रजापतु इत्याह।  
प्रजायामेवान्नाद्यं दधते। यदि नावजिघ्रेत्। अग्निः पशुरासीदित्यवघ्रापयेत्।  
अव हैव जिघ्रति। आक्रान् वाजी क्रमैरत्यक्रमीद्वाजी द्यौस्ते पृष्ठं पृथिवी  
सधस्थमित्यश्वमनुमन्त्रयते। एषां लोकानामभिजित्यै। समिद्धो अञ्जन्कृदरं  
मतीनामित्यश्वस्याप्रियो भवन्ति सरूपत्वाय॥१९॥

परितुस्थुष इत्याहुमे एवास्मे युनक्तुभिजित्यै भरन्त्यश्वमेधो रुन्धे  
रूपभिजिति त्रीणि च॥

[४]

तेजसा वा एष ब्रह्मवर्चसेन व्यृध्यते। योऽश्वमेधेन यजते। होता च ब्रह्मा च  
ब्रह्मोद्यं वदतः। तेजसा चैवेन ब्रह्मवर्चसेन च समर्धयतः। दक्षिणतो ब्रह्मा भवति।

दक्षिणत आयतनो वै ब्रह्मा। बारुहस्पत्यो वै ब्रह्मा। ब्रह्मवर्चसमेवास्य दक्षिणतो  
दधाति। तस्माद्दक्षिणोऽर्धो ब्रह्मवर्चसितरः। उत्तरतो होता भवति॥२०॥

उत्तरत आयतनो वै होता। आग्नेयो वै होता। तेजो वा अग्निः। तेजं  
एवास्योत्तरतो दधाति। तस्मादुत्तरोऽर्धस्तेजस्वितरः। यूपमभितो वदतः।  
यजमानदेवत्यो वै यूपः। यजमानमेव तेजसा च ब्रह्मवर्चसेन च समर्धयतः।  
किं स्विदासीत्पूर्वचित्तिरित्याह। द्यौर्वै वृष्टिः पूर्वचित्तिः॥२१॥

दिवमेव वृष्टिमव रुन्धे। किं स्विदासीद्बृहद्वय इत्याह। अश्वो वै बृहद्वयः।  
अश्वमेवाव रुन्धे। किं स्विदासीत्पिशङ्गिलेत्याह। रात्रिर्वै पिशङ्गिला। रात्रिमेवाव  
रुन्धे। किं स्विदासीत्पिलिप्पिलेत्याह। श्रीर्वै पिलिप्पिला। अन्नाद्यमेवाव  
रुन्धे॥२२॥

कः स्विदेकाकी चरतीत्याह। असौ वा आदित्य एकाकी चरति। तेजं एवाव  
रुन्धे। क उस्विज्जायते पुनरित्याह। चन्द्रमा वै जायते पुनः। आयुरेवाव रुन्धे।  
किं स्विद्धिमस्य भेषजमित्याह। अग्निर्वै हिमस्य भेषजम्। ब्रह्मवर्चसमेवाव रुन्धे।

किं॒ स्वि॑दा॒वप॑नं॒ म॒हदि॑त्याह॥२३॥

अ॒यं वै लो॒क आ॒वप॑नं॒ म॒हत्। अ॒स्मिन्ने॒व लो॒के प्र॑ति॒ तिष्ठ॑ति। पृ॒च्छामि॑ त्वा॒  
पर॑मन्तं॒ पृथि॒व्या इ॒त्याह॑। वेदि॒र्वै परो॑ऽन्तः॒ पृथि॒व्याः। वेदि॑मे॒वाव॑ रुन्धे। पृ॒च्छामि॑  
त्वा॒ भुव॑नस्य॒ नाभि॑मित्याह॑। य॒ज्ञो वै भुव॑नस्य॒ नाभिः॑। य॒ज्ञमे॒वाव॑ रुन्धे। पृ॒च्छामि॑  
त्वा॒ वृष्णो॑ अ॒श्वस्य॒ रेत॑ इत्याह॑। सोमो॒ वै वृष्णो॑ अ॒श्वस्य॒ रेतः॑। सोम॑पी॒थमे॒वाव॑  
रुन्धे। पृ॒च्छामि॑ वा॒चः पर॑मं॒ व्योमे॑त्याह॑। ब्र॒ह्म वै वा॒चः पर॑मं॒ व्योम॑। ब्र॒ह्मव॑र्च॒समे॒वाव॑  
रुन्धे॥२४॥  
होता भवति वै वृष्टिः पूर्वचित्तिरन्नाद्यमेवाव रुन्धे महदित्याहु सोमो वै वृष्णो अश्वस्य रेतश्चत्वारि च॥—————[५]

अप॒ वा ए॒तस्मा॑त्प्रा॒णाः क्रा॑मन्ति। यो॑ऽश्वमे॒धेन॒ यज॑ते। प्रा॒णाय॑ स्वाहा॑  
व्या॒नाय॑ स्वाहे॒ति सं॒ज्ञप्य॑मान॒ आहु॑तीर्जुहोति॑। प्रा॒णाने॒वास्मि॑न्दधाति॑।  
नास्मा॑त्प्रा॒णा अप॑क्रामन्ति। अव॑न्तीः स्थाव॑न्तीस्त्वाऽवन्तु। प्रि॒यं त्वा॑ प्रि॒याणा॑म्।  
वर्षि॑ष्ठमा॒प्याना॑म्। नि॒धीनां॑ त्वा॑ निधि॒पति॑ हवामहे वसो म॒मेत्या॑ह॑। अपै॒वास्मै॑  
तद्धु॑वते॥२५॥

अथो॑ धुवन्त्ये॒वैनम्। अथो॒ न्ये॒वास्मै॑ हुवते। त्रिः परि॑यन्ति। त्रय॑ इमे लो॒काः।

ए॒भ्य ए॒वैनं॑ लो॒केभ्यो॑ धुवते। त्रिः पुनः॑ परि॒यन्ति॑। षट्त्सम्प॑द्यन्ते। षड्वा ऋ॒तवः॑।  
 ऋ॒तुभिरे॒वैनं॑ धुवते। अप॒ वा ए॒तेभ्यः॑ प्रा॒णाः क्रा॑मन्ति॥२६॥

ये य॒ज्ञे धु॒वनं॑ त॒न्वते॑। न॒व॒कृत्वः॑ परि॒यन्ति॑। न॒व॒ वै पु॒रुषे॑ प्रा॒णाः।  
 प्रा॒णाने॒वाऽऽत्म॑न्दधते। नै॒भ्यः प्रा॒णा अप॑क्रामन्ति। अ॒म्बे अ॒म्बाल्य॑म्बि॒क इति॑  
 प॒त्नीमु॑दानयति। अ॒ह्नै॒तै॒वैना॑म्। सु॒भ॒गे का॒म्पी॑ल॒वासि॒नीत्या॑ह। तप॑ ए॒वैना॑मु॒प॒नय॑ति।  
 सु॒व॒र्गे लो॒के स॒म्प्रो॒र्ण्वा॒थामि॑त्याह॥२७॥

सु॒व॒र्गमे॒वैना॑ लो॒कं ग॑मयति। आ॒ह॒म॒जानि॑ गर्भ॒धमा॑ त्वम॑जाऽसि  
 गर्भ॒धमि॑त्याह। प्र॒जा वै प॒शवो॑ गर्भः। प्र॒जामे॒व प॒शूना॑त्मन्ध॒त्ते। दे॒वा  
 वा अ॑श्वमे॒धे प॒व॒माने॑। सु॒व॒र्गं लो॒कं न॑ प्रा॒जान॑न्। तम॑श्वः प्रा॒जाना॑त्।  
 यथ्सू॒चीभि॑रसिप॒थान्क॑ल्पयन्ति। सु॒व॒र्गस्य॑ लो॒कस्य॑ प्र॒ज्ञा॑त्यै। गा॒य॒त्री  
 त्रि॒ष्टु॒जग॑तीत्याह॥२८॥

य॒था॒य॒जुरे॒वैतत्। त्र्य॒यः सू॒च्यो॑ भवन्ति। अ॒य॒स्म॒र्यो रज॑ता हरि॒ण्यः। अ॒स्य

वै लो॒कस्य॑ रू॒पम॑य॒स्मय्यः॑। अ॒न्तरि॑क्षस्य रज॒ताः। दि॒वो ह॑रि॒ण्यः। दि॒शो वा  
अ॑य॒स्मय्यः॑। अ॒वा॒न्तर॑दि॒शा र॑ज॒ताः। ऊ॒र्ध्वा ह॑रि॒ण्यः। दि॒श ए॒वास्मै॑ कल्पयति।  
कस्त्वा॑ छ॒ति कस्त्वा॑ वि॒शास्ती॒त्याहा॑हि॒सायै॑॥ २९॥

हुवते कामन्त्यूर्वाथामित्याह जगतीत्याह कल्पयत्येकं

च॥

[६]

अप॒ वा ए॒तस्मा॑च्छ्री॒ राष्ट्रं॑ क्रा॒मति॑। योऽ॒श्वमे॒धेन॑ यज॒ते। ऊ॒र्ध्वा मे॒नामु॑च्छ्र॒यता॑दि॒त्याह॑  
श्री॒र्वे रा॒ष्ट्रम॑श्वमे॒धः। श्रिय॑मे॒वास्मै॑ रा॒ष्ट्रमूर्ध्व॑मुच्छ्र॒यति॑। वे॒णुभा॒रङ्गि॒रावि॑वे॒त्याह॑। रा॒ष्ट्रं  
वै भा॒रः। रा॒ष्ट्रमे॒वास्मै॑ पर्य॒हति॑। अथा॑स्या॒ मध्य॑मे॒धता॑मि॒त्याह॑। श्री॒र्वे रा॒ष्ट्रस्य॑  
मध्य॑म्॥ ३०॥

श्रिय॑मे॒वाव॑ रुन्धे। शी॒ते वा॒ते पु॒नन्नि॑वे॒त्याह॑। क्षे॒मो वै रा॒ष्ट्रस्य॑ शी॒तो वा॒तः।  
क्षे॒ममे॒वाव॑ रुन्धे। यद्ध॑रि॒णी य॒वम॑त्ती॒त्याह॑। वि॒ड्वै ह॑रि॒णी। रा॒ष्ट्रं य॒वः। वि॒शं चै॒वास्मै॑  
रा॒ष्ट्रं च॑ स॒मीची॑ दधाति। न पु॒ष्टं प॒शु म॑न्यत॒ इत्या॑ह। तस्मा॑द्राजा॑ प॒शून्  
पु॒ष्यति॑॥ ३१॥

शू॒द्रा य॑दर्य॒जारा॑ न पोषा॑य धनाय॒तीत्या॑ह। तस्मा॑द्वैशी॒पुत्रं॑ नाभिषि॑ञ्चन्ते। इ॒यं

य॒का शंकु॑न्ति॒केत्या॑ह। वि॒ड्वै शंकु॑न्ति॒का। रा॒ष्ट्रम॑श्वमे॒धः। वि॒शं चै॒वास्मै॑ रा॒ष्ट्रं च॑  
स॒मीची॑ दधाति। आ॒हल॒मिति॑ सर्प॒तीत्या॑ह। तस्मा॑द्रा॒ष्ट्राय॑ वि॒शः सर्प॑न्ति। आ॒हतं॑  
ग॒भे प॒स॒ इत्या॑ह। वि॒ड्वै ग॒भः॥३२॥

रा॒ष्ट्रं प॒सः। रा॒ष्ट्रमे॒व वि॒श्याह॑न्ति। तस्मा॑द्रा॒ष्ट्रं वि॒शं घातु॑कम्। मा॒ता च॑ ते पि॒ता  
च॑ त॒ इत्या॑ह। इ॒यं वै मा॒ता। अ॒सौ पि॒ता। आ॒भ्यामे॒वैनं॑ परि॒ददा॑ति। अ॒ग्रं वृ॒क्षस्य॑  
रो॒हत॒ इत्या॑ह। श्री॒र्वै वृ॒क्षस्या॒ग्रम्। श्रि॒यमे॒वाव॑ रु॒न्धे॥३३॥

प्रसु॑ला॒मीति॑ ते पि॒ता ग॒भे मु॒ष्टिम॑त॒स्य॒दित्या॑ह। वि॒ड्वै ग॒भः। रा॒ष्ट्रं मु॒ष्टिः।  
रा॒ष्ट्रमे॒व वि॒श्याह॑न्ति। तस्मा॑द्रा॒ष्ट्रं वि॒शं घातु॑कम्। अप॒ वा ए॒तेभ्यः॑ प्रा॒णाः क्रा॑मन्ति।  
ये य॒ज्ञेऽपू॑तं वदन्ति। द॒धि॒क्राव्णो॑ अ॒कारि॑ष॒मिति॑ सुर॒भि॒मती॒मृचं॑ वदन्ति। प्रा॒णा वै  
सु॒र॒भयः॑। प्रा॒णाने॒वाऽऽत्मा॑न्द॒धते॑ नै॒भ्यः प्रा॒णा अप॑क्रामन्ति। आपो॑ हि ष्ठा म॒यो॒भुव॑  
इत्य॒द्भिर्मा॑र्जयन्ते। आपो॑ वै सर्वा॑ दे॒वताः॑। दे॒वता॑भिरे॒वाऽऽत्मा॑न् पवयन्ते॥३४॥

राष्ट्रस्य

मध्यं पुष्यति गभो रुन्धे दधते चत्वारि च॥

[७]

प्र॒जाप॑तिः प्र॒जाः सृ॒ष्ट्वा प्रे॒णाऽनु॑ प्रावि॑शत्। ता॒भ्यः पुनः॑ सम्भ॑वितुं नाश॑क्रोत्।

सोऽब्रवीत्। ऋध्रवदिथ्सः। यो मेतः पुनः सम्भरदिति। तं देवा अश्वमेधेनैव  
समंभरन्। ततो वै त आर्ध्वन्। योऽश्वमेधेन यजते। प्रजापतिमेव सम्भरत्युधोति।  
पुरुषमालभते॥ ३५॥

वैराजो वै पुरुषः। विराजमेवालभते। अथो अन्नं वै विराट्। अन्नमेवाव रुन्धे।  
अश्वमालभते। प्राजापत्यो वा अश्वः। प्रजापतिमेवालभते। अथो श्रीर्वा एकशफम्।  
श्रियमेवाव रुन्धे। गामालभते॥ ३६॥

यज्ञो वै गौः। यज्ञमेवालभते। अथो अन्नं वै गौः। अन्नमेवाव रुन्धे।  
अजावी आलभते भूम्ने। अथो पुष्टिर्वै भूमा। पुष्टिमेवाव रुन्धे। पर्यग्निकृतं पुरुषं  
चारण्याश्चोत्सृजन्त्यहिंसायै। उभौ वा एतौ पशू आलभ्येते। यश्चावमो यश्च  
परमः। तैऽस्योभये यज्ञे बद्धाः। अभीष्टा अभिप्रीताः। अभिजिता अभिहुता  
भवन्ति। नैनं दह्मवः पशवो यज्ञे बद्धाः। अभीष्टा अभिप्रीताः। अभिजिता अभिहुता  
हिंसन्ति। योऽश्वमेधेन यजते। य उ चैनमेवं वेद॥ ३७॥ लभते गामालभते परमोऽष्टौ च॥-[८]

प्रथमेन वा एष स्तोमेन राध्वा। चतुष्टोमेन कृतेनायानामुत्तरेहन्। एकविंशे  
 प्रतिष्ठायां प्रति तिष्ठति। एकविंशत्प्रतिष्ठायां ऋतूनन्वारोहति। ऋतवो वै पृष्ठानि।  
 ऋतवः संवत्सरः। ऋतुष्वेव संवत्सरे प्रतिष्ठायां देवता अभ्यारोहति। शक्करयः  
 पृष्ठं भवन्त्यन्यदन्यच्छन्दः। अन्येऽन्ये वा एते पशव आलभ्यन्ते॥३८॥

उतेव ग्राम्याः। उतेवारण्याः। अहरेव रूपेण समर्धयति। अथो अहं एवैष  
 बलिर्हियते। तदाहुः। अपशवो वा एते। यदजावयश्चारण्याश्च। एते वै सर्वे पशवः।  
 यद्गव्या इति। गव्यान्पशूनुत्तमेऽहं नालभते॥३९॥

तेनैवोभयान्पशूनव रुन्धे। प्राजापत्या भवन्ति। अनभिजितस्याभिजित्यै।  
 सौरीर्नव श्वेता वशा अनूबन्ध्या भवन्ति। अन्त एव ब्रह्मवर्चसमव रुन्धे। सोमाय  
 स्वराज्ञेऽनोवाहावनद्वाहाविति द्वन्द्विनः पशूनालभते। अहोरात्राणामभिजित्यै।  
 पशुभिर्वा एष व्यृध्यते। योऽश्वमेधेन यजते। छगुलं कल्माषं किकिदीविं  
 विदीगयमिति त्वाष्ट्रान्पशूना लभते। पशुभिरेवाऽऽत्मानं समर्धयति। ऋतुभिर्वा



एष व्यृध्यते। योऽश्वमेधेन यजते। पिशङ्गास्त्रयो वासन्ता इत्यृतुपशूनालभते। ऋतुभिरेवाऽऽत्मानं समर्धयति। आ वा एष पशुभ्यो वृश्च्यते। योऽश्वमेधेन यजते। पर्यग्निकृता उथ्सृजन्त्यनात्रस्काय॥४०॥ लभ्यन्ते लभते त्वाष्टान्यशूनालभतेऽष्टौ च॥—[९]

प्रजापतिरकामयत महानन्नादः स्यामिति। स एतावश्वमेधे महिमानावपश्यत्। तावंगृहीत। ततो वै स महानन्नादोऽभवत्। यः कामयेत महानन्नादः स्यामिति। स एतावश्वमेधे महिमानो गृहीत। महानेवान्नादो भवति। यजमानदेवत्यां वै वृषा। राजा महिमा। यद्वृषां महिम्नोभयतः परियजति। यजमानमेव राज्येनोभयतः परिगृह्णाति। पुरस्तात्स्वाहाकारा वा अन्ये देवाः। उपरिष्ठात्स्वाहाकारा अन्ये। ते वा एतेऽश्व एव मेध्यं उभयेऽवरुध्यन्ते। यद्वृषां महिम्नोभयतः परियजति। तानेवोभयान्प्रीणाति॥४१॥ परियजति षट्॥—[१०]

वैश्वदेवो वा अश्वः। तं यत्प्राजापत्यं कुर्यात्। या देवता अपिभागाः। ता भागधेयेन व्यर्धयेत्। देवताभ्यः समदं दध्यात्। स्तेगान्दंष्ट्राभ्यां मण्डूकां

जम्भ्यैभिरिति। आज्यमवदानं कृत्वा प्रतिसङ्ख्यायमाहुतीर्जुहोति। या एव देवता अपिभागाः। ता भागधेयेन समर्धयति। न देवताभ्यः समदं दधाति॥४२॥

चतुर्दशैताननुवाकाञ्जुहोत्यनन्तरित्यै। प्रयासाय स्वाहेति पञ्चदशम्। पञ्चदश वा अर्धमासस्य रात्रयः। अर्धमासशः संवत्सर आप्यते। देवासुराः संयत्ता आसन्। तेऽब्रुवन्नग्नयः स्विष्टकृतः। अश्वस्य मेध्यस्य वयमुद्धारमुद्धरामहे। अथैतानभि भवामेति। ते लोहितमुदहरन्त। ततो देवा अभवन्॥४३॥

पराऽसुराः। यत्स्विष्टकृद्भ्यो लोहितं जुहोति भ्रातृव्याऽभिभूत्यै। भवत्यात्मना। पराऽस्य भ्रातृव्यो भवति। गोमृगकण्ठेन प्रथमामाहुतिं जुहोति। पशवो वै गोमृगः। रुद्रोऽग्निः स्विष्टकृत्। रुद्रादेव पशूनन्तर्दधाति। अथो यत्रैषाऽऽहुतिर्हूयते। न तत्र रुद्रः पशूनभिमन्यते॥४४॥

अश्वशफेनं द्वितीयामाहुतिं जुहोति। पशवो वा एकशफम्। रुद्रोऽग्निः स्विष्टकृत्। रुद्रादेव पशूनन्तर्दधाति। अथो यत्रैषाऽऽहुतिर्हूयते। न तत्र रुद्रः पशूनभिमन्यते।

अ॒य॒स्म॒र्ये॒न क॒म॒ण्ड॒लु॒ना तृ॒तीया॑म्। आहु॑तिं जुहोत्याया॒स्यो॑ वै प्र॒जाः। रु॒द्रोऽग्निः॑  
स्वि॑ष्ट॒कृत्। रु॒द्रादे॒व प्र॒जा अ॒न्तर्द॑धाति। अथो॒ यत्रै॒षाऽऽहु॑तिर्हूयते॑। न तत्र॑ रु॒द्रः  
प्र॒जा अ॒भि॒म॒न्य॑ते॥४५॥ दधात्यभं वन्मन्यते प्रजा अन्तर्दधाति द्वे च ॥ [११]

अ॒श्व॒स्य॒ वा आ॒ल॒ब्ध॒स्य॒ मे॒ध उ॒द॒क्राम॑त्। तद॑श्वस्तो॒मीय॑मभवत्। यद॑श्वस्तो॒मीयं॑  
जुहो॑ति। स॒मे॒धमे॒वैन॒माल॑भते। आ॒ज्ये॒न जुहो॑ति। मे॒धो वा आ॒ज्यम्। मे॒धो-  
ऽश्व॒स्तो॒मीयम्। मे॒धेनै॒वास्मि॒न्मे॒धं द॑धाति। ष॒द्विंश॑तं जुहोति। ष॒द्विंश॑दक्षरा  
बृ॒हती॥४६॥

बा॒र्ह॒ताः प॒शवः॑। सा प॑शूनां मा॒त्रा। प॒शूने॒व मा॒त्रया॑ स॒म॒र्धय॑ति। ता॒य॒द्भूय॑सीर्वा  
कनी॑यसीर्वा जुहुयात्। प॒शून्मा॒त्रया॑ व्य॒र्धये॑त्। ष॒द्विंश॑तं जुहोति। ष॒द्विंश॑दक्षरा  
बृ॒हती। बा॒र्ह॒ताः प॒शवः॑। सा प॑शूनां मा॒त्रा। प॒शूने॒व मा॒त्रया॑ स॒म॒र्धय॑ति॥४७॥

अ॒श्व॒स्तो॒मीयं॑ हु॒त्वा द्वि॒पदा॑ जुहोति। द्वि॒पाद्वै पु॒रुषो॑ द्विप्र॑तिष्ठः। तदे॑नं प्रति॒ष्ठया॑  
स॒म॒र्धय॑ति। तदा॑हुः। अ॒श्व॒स्तो॒मीयं॑ पूर्॒वं हो॒त॒व्यां(३)न्दि॒पदा(३) इति॑। अ॒श्वो

वा अ॒श्व॒स्तो॒मीयम्। पुरु॑षो द्वि॒पदाः॑। अ॒श्व॒स्तो॒मीयः॑ हु॒त्वा द्वि॒पदां जु॒होति॑।  
 तस्मा॑द्वि॒पाच्चतु॑ष्पादमत्ति। अथो॑ द्वि॒पद्ये॒व चतु॑ष्पदः प्र॒तिष्ठा॑पयति। द्वि॒पदां हु॒त्वा।  
 नान्यामु॑त्तरा॒माहु॑तिं जुहुयात्। यदन्यामु॑त्तरा॒माहु॑तिं जुहुयात्। प्र प्र॒तिष्ठाया॑श्च्यवेत।  
 द्वि॒पदां अन्त॑तो जु॒होति॑ प्र॒तिष्ठि॑त्यै॥ ४८॥ बृहत्त्यर्धयति स्थापयति पञ्च च॥ [१२]

प्र॒जाप॑तिरश्वमे॒धम॑सृजत। सोऽस्मा॑त्सृष्टोऽपा॑क्रामत्। तं य॑ज्ञक्र॒तुभि॑रन्वैच्छत्।  
 तं य॑ज्ञक्र॒तुभि॑र्नान्वविन्दत्। तमिष्टि॑भि॒रन्वैच्छत्। तमिष्टि॑भि॒रन्वविन्दत्।  
 तदिष्टी॑नामिष्टित्वम्। यथ्स॑व॒त्सर॑मिष्टि॑भिर्यज॑ते। अश्व॑मे॒व तद॑न्विच्छति।  
 सा॒वि॒त्रियो॑ भवन्ति॥ ४९॥

इ॒यं वै स॑वि॒ता। यो वा अ॒स्यान्त्र॑शय॑ति॒ यो नि॒लय॑ते। अस्यां वा॒व तं वि॑न्दन्ति। न  
 वा इ॒मां कश्च॑नेत्याहुः। ति॒र्यङ्गो॒र्ध्वोत्ये॑तुम॒र्हतीति॑। यथ्सा॑वि॒त्रियो॑ भवन्ति। स॒वि॒तृ-  
 प्र॑सूत ए॒वैन॑मिच्छति। ईश्व॑रो वा अश्वः प्रमु॑क्तः परा॑ परा॒वतं॑ गन्तोः॑। यथ्सा॑यं  
 धृती॑र्जुहोति। अश्व॑स्य॒ यत्यै॑ धृत्यै॑॥ ५०॥

यत्प्रातरिष्टिभिर्यजते। अश्वमेव तदन्विच्छति। यत्सायं धृतीर्जुहोति।  
 अश्वस्यैव यत्यै धृत्यै। तस्मात्सायं प्रजाः क्षेम्या भवन्ति। यत्प्रातरिष्टिभिर्यजते।  
 अश्वमेव तदन्विच्छति। तस्माद्विवा नष्टैष एति। यत्प्रातरिष्टिभिर्यजते सायं  
 धृतीर्जुहोति। अहोरात्राभ्यामेवैनमन्विच्छति। अथो अहोरात्राभ्यामेवास्मै योगक्षेमं  
 कल्पयति॥५१॥ भवन्ति धृत्या एनमन्विच्छत्येकं च॥ [१३]

अप वा एतस्माच्छ्रीं राष्ट्रं क्रामति। योऽश्वमेधेन यजते। ब्राह्मणौ वीणागाथिनौ  
 गायतः। श्रिया वा एतद्रूपम्। यद्वीणा। श्रियमेवास्मिन्तद्धतः। यदा खलु वै पुरुषः  
 श्रियमश्नुते। वीणाऽस्मै वाद्यते। तदाहुः। यदुभौ ब्राह्मणौ गायेताम्॥५२॥

प्रभ्रंशुकास्माच्छ्रीः स्यात्। न वै ब्राह्मणे श्री रमत इति। ब्राह्मणोऽन्यो गायेत्।  
 राजन्योऽन्यः। ब्रह्म वै ब्राह्मणः। क्षत्रं राजन्यः। तथा हास्य ब्रह्मणा च क्षत्रेण  
 चोभयतः श्रीः परिगृहीता भवति। तदाहुः। यदुभौ दिवा गायेताम्। अपास्माद्राष्ट्रं  
 क्रामेत्॥५३॥

न वै ब्राह्मणे राष्ट्रं रमत् इति। यदा खलु वै राजा कामयते। अथ ब्राह्मणं जिनाति। दिवा ब्राह्मणो गायेत्। नक्तं राजान्यः। ब्रह्मणो वै रूपमहः। क्षत्रस्य रात्रिः। तथा हास्य ब्रह्मणा च क्षत्रेण चोभयतो राष्ट्रं परिगृहीतं भवति। इत्यददा इत्ययजथा इत्यपच इति ब्राह्मणो गायेत्। इष्टापूर्तं वै ब्राह्मणस्य॥५४॥

इष्टापूर्तेनैवैनं स समर्धयति। इत्यजिना इत्ययुध्यथा इत्यमुं सङ्ग्राममहन्निति राजान्यः। युद्धं वै राजान्यस्य। युद्धेनैवैनं स समर्धयति। अक्लृप्ता वा एतस्यर्तव इत्याहुः। योऽश्वमेधेन यजत इति। तिस्रोऽन्यो गायति तिस्रोऽन्यः। षट्थसम्पद्यन्ते। षड्वा ऋतवः। ऋतून्वास्मै कल्पयतः। ताभ्यां सङ्स्थायां। अनोयुक्ते च शते च ददाति। शतायुः पुरुषः शतेन्द्रियः। आयुष्येवेन्द्रिये प्रति तिष्ठति॥५५॥

गायताङ्गामेद्वाह्यस्य

कल्पयतश्चत्वारि च॥

[१४]

सर्वेषु वा एषु लोकेषु मृत्यवोऽन्वायन्ताः। तेभ्यो यदाहुतीर्न जुहुयात्। लोकेलोक एनं मृत्युर्विन्देत्। मृत्यवे स्वाहा मृत्यवे स्वाहेत्यभिपूर्वमाहुतीर्जुहोति।

लो॒काल्लो॑कादे॒व मृ॒त्युमव॑यजते। नैनं॑ लो॒केलो॑के मृ॒त्युर्वि॑न्दति। यद॒मुष्मै॑ स्वाहा॒  
ऽमुष्मै॑ स्वाहेति॒ जुह्व॑त्स॒श्चक्षी॑त। ब॒हुं मृ॒त्युम॒मित्रं॑ कुर्वीत। मृ॒त्यवे॒ स्वाहेत्येक॑स्मा  
ए॒वैकां॑ जुहुयात्। ए॒को वा अ॒मुष्मि॑ल्लो॒के मृ॒त्युः॥५६॥

अ॒श॒न॒या मृ॒त्युरे॒व। तमे॒वामुष्मि॑ल्लो॒केऽव॑यजते। भ्रू॒ण॒ह॒त्यायै॑ स्वाहेत्य॑वभृथ  
आहु॑तिं जुहोति। भ्रू॒ण॒ह॒त्यामे॒वाव॑ यजते। तदा॑हुः। यद्भ्रू॒ण॒ह॒त्या पा॒त्र्याऽथ॑।  
कस्मा॑द्यज्ञेऽपि॑ क्रियत॒ इति॑। अमृ॒त्युर्वा अ॒न्यो भ्रू॒ण॒ह॒त्याया॑ इत्या॑हुः। भ्रू॒ण॒ह॒त्या  
वाव॑ मृ॒त्युरिति॑। यद्भ्रू॒ण॒ह॒त्यायै॑ स्वाहेत्य॑वभृथ आहु॑तिं जुहोति॥५७॥

मृ॒त्युमे॒वाऽऽहु॑त्या तर्पयित्वा प॑रि॒पाणं॑ कृत्वा। भ्रू॒ण॒घ्ने भैष॑जं करोति। ए॒ताः  
ह॒ वै मु॑ण्डि॒भ औ॒दन्य॑वः। भ्रू॒ण॒ह॒त्यायै॑ प्रायश्चित्तिं वि॒दां च॑कार। यो हा॒स्यापि॑  
प्र॒जायां॑ ब्राह्म॒णः ह॑न्ति। सर्व॑स्मै तस्मै॑ भेष॑जं करोति। जु॒म्ब॒काय॑ स्वाहेत्य॑वभृथ  
उ॒त्त॒मा॒माहु॑तिं जुहोति। वरु॑णो॒ वै जु॑म्ब॒कः। अ॒न्त॒त ए॒व वरु॑ण॒मव॑यजते।

खलुतेर्विक्रिधस्यं शुक्लस्यं पिङ्गाक्षस्यं मूर्धं जुहोति। एतद्वै वरुणस्य रूपम्।  
रूपेणैव वरुणमवयजते॥५८॥ लोके मृत्युर्जुहोति मूर्धं जुहोति द्वे च॥ [१५]

वारुणो वा अश्वः। तं देवतया व्यर्धयति। यत्प्राजापत्यं करोति। नमो राज्ञे  
नमो वरुणायेत्याह। वारुणो वा अश्वः। स्वयैवैनं देवतया समर्धयति। नमोऽश्वाय  
नमः प्रजापतय इत्याह। प्राजापत्यो वा अश्वः। स्वयैवैनं देवतया समर्धयति।  
नमोऽधिपतय इत्याह॥५९॥

धर्मो वा अधिपतिः। धर्ममेवाव रुन्धे। अधिपतिरस्यधिपतिं मा कुर्वधिपतिरहं  
प्रजानां भूयासमित्याह। अधिपतिमेवैनं समानानां करोति। मां धेहि मयि  
धेहीत्याह। आशिषमेवैतामा शास्ते। उपाकृताय स्वाहेत्युपाकृते जुहोति।  
आलब्धाय स्वाहेति नियुक्ते जुहोति। हुताय स्वाहेति हुते जुहोति। एषां  
लोकानांभिर्जित्यै॥६०॥

प्र वा एष एभ्यो लोकेभ्यश्च्यवते। योऽश्वमेधेन यजते। आग्नेयमैन्द्राग्रमांश्चिनम्।



तान्प॒शूनाल॑भते॒ प्रति॑ष्ठित्यै। यदा॑ग्ने॒यो भव॑ति। अ॒ग्निः सर्वा॑ दे॒वताः॑। दे॒वता॑ ए॒वाव॑  
रुन्धे। ब्र॒ह्म वा अ॒ग्निः। क्ष॒त्रमिन्द्रः॑। यदै॑न्द्रा॒ग्नो भव॑ति॥६१॥

ब्र॒ह्मक्ष॒त्रे ए॒वाव॑ रुन्धे। यदा॑श्वि॒नो भव॑ति। आ॒शिषाम॑व॒रुद्धौ। त्रयो॑ भवन्ति।  
त्रय॑ इ॒मे लो॒काः। ए॒ष्वेव॑ लो॒केषु॑ प्रति॑ तिष्ठति। अ॒ग्नये॑ऽहो॒मुचे॑ऽष्टाक॑पाल॒ इति॑  
दश॑हविष॒मिष्टिं॑ निर्व॑पति। दशा॑क्षरा वि॒राट्। अन्नं॑ वि॒राट्। वि॒राजै॑वान्नाद्य॒मव॑ रुन्धे।  
अ॒ग्नेर्मन्वे॑ प्रथ॒मस्य॑ प्रचै॑तस् इति॑ याज्यानुवा॒क्या भव॑न्ति सर्व॒त्वाय॑॥६२॥ अधिपतय  
इत्या॑हभि॒जित्या॑ ऐन्द्रा॒ग्नो भव॑ति रुन्ध॒ एकं॑ च॥

[१६]

यद्य॑श्व॒मुप॑तप॒द्विन्देत्। आ॒ग्नेय॑म॒ष्टाक॑पालं॒ निर्व॑पेत्। सौ॒म्यं च॒रुम्। सा॒वि॒त्रम॒ष्टा॒  
क॑पालम्। यदा॑ग्ने॒यो भव॑ति। अ॒ग्निः सर्वा॑ दे॒वताः॑। दे॒वता॑भिरे॒वैनं॑ भिष॑ज्यति।  
यथ्सौ॒म्यो भव॑ति। सोमो॒ वा ओष॑धीना॒ राजा॑। याभ्य॑ ए॒वैनं॑ वि॒न्दति॑॥६३॥

ताभि॑रे॒वैनं॑ भिष॑ज्यति। यथ्सौ॒वि॒त्रो भव॑ति। स॒वि॒तृप्र॑सूत ए॒वैनं॑ भिष॑ज्यति।  
ए॒ताभि॑रे॒वैनं॑ दे॒वता॑भिर्भिष॑ज्यति। अ॒ग॒दो है॒व भव॑ति। पौ॒ष्णं च॒रुं निर्व॑पेत्। यदि॑

श्लो॒णः स्यात्। पू॒षा वै श्लौ॒ण्यस्य भि॒षक्। स ए॒वैनं॑ भिषज्यति। अश्लो॑णो ह॒व  
भ॑वति॥६४॥

रौ॒द्रं च॒रुं निर्व॑पेत्। यदि॑ म॒हती॑ दे॒वता॑ऽभि॒मन्ये॑त। ए॒तद्दे॒व॒त्यो वा अश्वः॑। स्वयै॒वैनं॑  
दे॒वता॑या भिषज्यति। अ॒ग॒दो ह॒व भ॑वति। वै॒श्वान॒रं द्वाद॑शकपालं निर्व॑पेन्मृगा॒खरे॑  
यदि॑ नाऽऽगच्छे॑त्। इ॒यं वा अ॒ग्निर्वै॑श्वान॒रः। इ॒यमे॒वैनं॑ म॒र्चिभ्यां॑ परि॒रोध॑मानयति।  
आह॑व सु॒त्यम॑हर्गच्छति। यद्य॑धी॒यात्॥६५॥

अ॒ग्नये॑ऽहो॒मुचे॑ऽष्टाकपालः। सौ॒र्यं प॑यः। वा॒य॒व्यं आ॒ज्यभा॑गः। यज॑मानो वा  
अश्वः॑। अ॒हंसा॒ वा ए॒ष गृ॑हीतः। यस्याश्वो मे॒धाय॑ प्रोक्षि॑तोऽध्येति॑। यद॑हो॒मुचे॑  
निर्व॑पति। अ॒हंस॑ ए॒व तेन॑ मुच्यते। यज॑मानो वा अश्वः॑। रे॒तसा॒ वा ए॒ष  
व्यू॑ध्यते॥६६॥

यस्याश्वो मे॒धाय॑ प्रोक्षि॑तोऽध्येति॑। सौ॒र्यं रे॒तः। यथ्सौ॒र्यं प॑यो भवति। रे॒तसै॒वैनं॑  
स सम॑र्धयति। यज॑मानो वा अश्वः॑। गर्भै॒र्वा ए॒ष व्यु॑ध्यते। यस्याश्वो मे॒धाय॑ प्रोक्षि॑तो-

ऽध्येति। वायुव्या गर्भाः। यद्वायुव्यं आज्यभागो भवति। गर्भैरेवैनं स समर्धयति।  
 अथो यस्यैषाऽश्वमेधे प्रायश्चित्तिः क्रियते। इष्ट्वा वसीयान्भवति॥६७॥ विन्दत्यश्वोपो ह्रैव  
 भवत्यधीयादध्यते गर्भैरेवैनं स समर्धयति द्वे च॥ [१७]

तदाहुः। द्वादश ब्रह्मोदनान्त्संस्थिते निर्वपेत्। द्वादशभिर्वेष्टिभिर्यजेतेति।  
 यदिष्टिभिर्यजेत। उपनामुक एनं यज्ञः स्यात्। पापीयांस्तु स्यात्। आप्तानि वा  
 एतस्य छन्दांसि। य ईजानः। तानि क एतावदाशु पुनः प्रयुञ्जीतेति। सर्वा वै  
 संस्थिते यज्ञे वागाप्यते॥६८॥

साप्ता भवति यातयाम्नी। क्रूरीकृतेव हि भवत्यरुष्कृता। सा न पुनः  
 प्रयुज्येत्याहुः। द्वादशैव ब्रह्मोदनान्त्संस्थिते निर्वपेत्। प्रजापतिर्वा ओदनः। यज्ञः  
 प्रजापतिः। उपनामुक एनं यज्ञो भवति। न पापीयान्भवति। द्वादश भवन्ति।  
 द्वादशमासाः संवत्सरः। संवत्सर एव प्रति तिष्ठति॥६९॥ आप्यते संवत्सर एकं च॥ [१८]

एष वै विभूर्नाम यज्ञः। सर्वं ह वै तत्र विभु भवति। यत्रैतेन यज्ञेन यजन्ते।

ए॒ष वै प्र॒भूर्नामं॑ य॒ज्ञः। सर्व॑ ह॒ वै तत्र॑ प्र॒भु भ॑वति। यत्रै॒तेन॑ य॒ज्ञेन॒ यज॑न्ते। ए॒ष  
वा ऊ॒र्जस्वान्नामं॑ य॒ज्ञः। सर्व॑ ह॒ वै तत्रो॒र्जस्व॑द्भवति। यत्रै॒तेन॑ य॒ज्ञेन॒ यज॑न्ते।  
ए॒ष वै प॒यस्वान्नामं॑ य॒ज्ञः॥७०॥

सर्व॑ ह॒ वै तत्र॑ प॒यस्व॑द्भवति। यत्रै॒तेन॑ य॒ज्ञेन॒ यज॑न्ते। ए॒ष वै वि॒धृतो॑ नामं  
य॒ज्ञः। सर्व॑ ह॒ वै तत्र॑ वि॒धृतं॑ भवति। यत्रै॒तेन॑ य॒ज्ञेन॒ यज॑न्ते। ए॒ष वै व्या॒वृत्तो॑  
नामं॑ य॒ज्ञः। सर्व॑ ह॒ वै तत्र॑ व्या॒वृत्तं॑ भवति। यत्रै॒तेन॑ य॒ज्ञेन॒ यज॑न्ते। ए॒ष वै  
प्रति॑ष्ठितो॒ नामं॑ य॒ज्ञः। सर्व॑ ह॒ वै तत्र॑ प्रति॑ष्ठितं भवति॥७१॥

यत्रै॒तेन॑ य॒ज्ञेन॒ यज॑न्ते। ए॒ष वै ते॒जस्वी॑ नामं॑ य॒ज्ञः। सर्व॑ ह॒ वै तत्र॑ ते॒जस्वि॑  
भ॑वति। यत्रै॒तेन॑ य॒ज्ञेन॒ यज॑न्ते। ए॒ष वै ब्र॑ह्मवर्च॒सी नामं॑ य॒ज्ञः। आ ह॒ वै तत्र॑  
ब्रा॒ह्म॒णो ब्र॑ह्मवर्च॒सी जा॑यते। यत्रै॒तेन॑ य॒ज्ञेन॒ यज॑न्ते। ए॒ष वा अ॑तिव्या॒धी नामं॑  
य॒ज्ञः। आ ह॒ वै तत्र॑ रा॒ज॒न्योऽति॑व्या॒धी जा॑यते। यत्रै॒तेन॑ य॒ज्ञेन॒ यज॑न्ते। ए॒ष वै  
दी॒र्घो नामं॑ य॒ज्ञः। दी॒र्घायु॑षो ह॒ वै तत्र॑ म॒नुष्या॑ भवन्ति। यत्रै॒तेन॑ य॒ज्ञेन॒ यज॑न्ते।

ए॒ष वै क्लृ॒प्तो ना॒म॑ य॒ज्ञः। क॒ल्प॑ते ह॒ वै तत्र॑ प्र॒जाभ्यो॑ यो॒गक्षे॑मः। यत्रै॒तेन॑ य॒ज्ञेन॑  
 यज॑न्ते॥ ७२॥ पर्यस्वान्नमं यज्ञः प्रतिष्ठितं भवति यत्रैतेन यज्ञेन यजन्ते षट् (एष वै विभुः प्रभूर्जस्वान्ययस्वान् विधृतो व्यावृत्तः प्रतिष्ठितस्तेजस्वी ब्रह्मवर्चस्यतिव्याधी दीर्घः क्लृप्तो द्वादशा॥)॥ [१९]

ता॒र्प्येणा॒श्व॑ सं॒ज्ञ॑पयन्ति। य॒ज्ञो वै ता॒र्प्यम्। य॒ज्ञेनै॒वैन॑ संम॑र्धयन्ति। या॒मेन॑  
 सा॒म्रा॑ प्र॒स्तो॒ताऽनू॑प॒तिष्ठ॑ते। य॒म॒लो॒कमे॒वैन॑ ग॒मय॑ति। ता॒र्प्ये च॑ कृ॒त्यधी॒वा॒से चा॒श्व॑  
 सं॒ज्ञ॑पयन्ति। ए॒तद्वै प॑शूना॑ रू॒पम्। रू॒पेणै॒व प॑शू॒नव॑ रुन्धे। हि॒र॒ण्य॒क॒शि॒पु भ॑वति।  
 तेज॒सोऽव॑रु॒द्धौ॥ ७३॥

रु॒क्मो भ॑वति। सु॒व॒र्गस्य॑ लो॒कस्या॑नु॒ख्यात्यै॑। अ॒श्वो भ॑वति। प्र॒जाप॑ते॒रात्यै॑।  
 अ॒स्य वै लो॒कस्य॑ रू॒पं ता॒र्प्यम्। अ॒न्तरि॑क्षस्य कृ॒त्यधी॒वा॒सः। दि॒वो हि॑र॒ण्य॒क॒शि॒पु।  
 आ॒दि॒त्यस्य॑ रु॒क्मः। प्र॒जाप॑ते॒रश्वः॑। इ॒ममे॒व लो॒कं ता॒र्प्येणा॑ऽऽप्रो॒ति॥ ७४॥

अ॒न्तरि॑क्षं कृ॒त्यधी॒वा॒सेन॑। दि॒वः हि॑र॒ण्य॒क॒शि॒पुना॑। आ॒दि॒त्यः रु॒क्मेण॑।  
 अ॒श्वेनै॒व मे॒ध्यै॒न प्र॒जाप॑तेः सायु॑ज्यः स॒लो॒कता॑माप्रोति। ए॒तासा॑मे॒व दे॒वता॑ना॑  
 सायु॑ज्यम्। सा॒र्ष्टि॒ताः स॒मान॑लो॒कता॑माप्रोति। यो॑ऽश्वमे॒धेन॑ यज॑ते। य उ॑ चैनमे॒वं

वेद॥ ७५॥ अवरुध्या आप्रोत्यष्टौ च॥ \_\_\_\_\_ [२०]

आदित्याश्चाङ्गिरसश्च सुवर्गे लोकेऽस्पर्धन्त। तेऽङ्गिरस आदित्येभ्यः।  
अमुमादित्यमश्वेऽं श्वेतं भूतं दक्षिणामनयन्। तेऽब्रुवन्। यन्नो नैष्ट। स वर्यो  
भूदिति। तस्मादश्वेऽं सवर्येत्याह्वयन्ति। तस्माद्यज्ञे वरो दीयते। यत्प्रजापतिरा-  
लब्धोऽश्वोऽभवत्। तस्मादश्वो नाम॥ ७६॥

यच्छ्वयदरुरासीत्। तस्मादर्वा नाम। यथ्सद्यो वाजांन्त्समजयत्। तस्माद्वाजी  
नाम। यदसुराणां लोकानादत्त। तस्मादादित्यो नाम। अग्निर्वा अश्वमेधस्य  
योनिरायतनम्। सूर्योऽग्नेर्योनिरायतनम्। यदश्वमेधेऽग्नौ चित्य उत्तरवेदिमुपवपति।  
योनिमन्तमेवैनमायतनवन्तं करोति॥ ७७॥

योनिमानायतनवान्भवति। य एवं वेद। प्राणापानौ वा एतौ देवानाम्।  
यदर्काश्वमेधौ। प्राणापानावेवाव रुन्धे। ओजो बलं वा एतौ देवानाम्।  
यदर्काश्वमेधौ। ओजो बलमेवाव रुन्धे। अग्निर्वा अश्वमेधस्य योनिरायतनम्।  
सूर्योऽग्नेर्योनिरायतनम्। यदश्वमेधेऽग्नौ चित्य उत्तरवेदिं चिनोति। तावर्काश्वमेधौ।

अ॒र्का॒श्वमे॒धावे॒वाव॑ रुन्धे। अथो॑ अ॒र्का॒श्वमे॒धयो॑रे॒व प्रति॑ तिष्ठति॥७८॥ नामं करोति  
 सूर्योऽग्नयो॑नि॒राय॑त॒नश्च॒त्वारि॑ च॥ [२१]

प्र॒जाप॑तिं॒ वै दे॒वाः पि॒तरम्। प॒शुं भू॑तं मे॒धाया॑ऽऽऽल॑भन्त। तमा॒लभ्यो॑पा॒वसन्।  
 प्रा॒तर्य॑ष्टा॒स्मह॑ इति॑। ए॒कं वा ए॒तद्दे॒वाना॑म॒हः। यथ्स॑व॒थ्सुरः॑। तस्मा॑द॒श्वः  
 पु॒रस्ता॑थ्स॒वथ्सुर॑ आल॑भ्यते। यत्प्र॒जाप॑ति॒राल॑भ्योऽश्वोऽभ॑वत्। तस्मा॑द॒श्वः।  
 यथ्स॒द्यो मे॒धोऽभ॑वत्॥७९॥

तस्मा॑द॒श्वमे॒धः। वेदु॑कोऽश्व॑मा॒शुं भ॑वति। य ए॒वं वेद॑। यद्वै तत्प्र॒जाप॑ति॒राल॑भ्यो-  
 ऽश्वोऽभ॑वत्। तस्मा॑द॒श्वः प्र॒जाप॑तेः प॒शूना॑मनु॒रूप॑तमः। आऽस्य॑ पु॒त्रः प्रति॑रूपो  
 जाय॑ते। य ए॒वं वेद॑। सर्वा॑णि भू॒तानि॑ स॒म्भृ॒त्याल॑भते। समे॑नं दे॒वास्तेज॑से  
 ब्र॒ह्मव॑र्च॒साय॑ भरन्ति। योऽश्व॑मे॒धेन॑ यज॑ते॥८०॥

य उ॑ चैनमे॒वं वेद॑। ए॒तद्दे॒वा ए॒तान्दे॒वता॑म्। प॒शुं भू॑तं मे॒धाया॑ऽऽऽल॑भन्त।  
 य॒ज्ञमे॒व। य॒ज्ञेन॑ य॒ज्ञम॑यजन्त दे॒वाः। का॒मप्रं॑ य॒ज्ञम॑कुर्वत। तेऽमृ॑त॒त्वम॑कामयन्त।  
 तेऽमृ॑त॒त्वम॑गच्छन्। योऽश्व॑मे॒धेन॑ यज॑ते। दे॒वाना॑मे॒वाय॑नेनैति॥८१॥

प्राजापत्येनैव यज्ञेन यजते कामप्रेण। अपुनर्मरमेव गच्छति। एतस्य वै रूपेण  
 पुरस्तात्प्राजापत्यमृषभं तूपरं बहुरूपमालभते। सर्वेभ्यः कामेभ्यः। सर्वस्याऽऽप्त्यै।  
 सर्वस्य जित्यै। सर्वमेव तेनाऽऽप्नोति। सर्वं जयति। योऽश्वमेधेन यजते। य उ  
 चैनमेवं वेद॥८२॥ मेधोऽभ्वद्यजत एति वेद॥ [२२]

यो वा अश्वस्य मेध्यस्य लोमनी वेद। अश्वस्यैव मेध्यस्य लोमं लोमं जुहोति।  
 अहोरात्रे वा अश्वस्य मेध्यस्य लोमनी। यत्सायं प्रातर्जुहोति। अश्वस्यैव मेध्यस्य  
 लोमं लोमं जुहोति। एतदनुकृति ह स्म वै पुरा। अश्वस्य मेध्यस्य लोमं लोमं  
 जुहोति। यो वा अश्वस्य मेध्यस्य पदे वेद। अश्वस्यैव मेध्यस्य पदेपदे जुहोति।  
 द्रश्पूर्णमासौ वा अश्वस्य मेध्यस्य पदे॥८३॥

यद्द्रश्पूर्णमासौ यजते। अश्वस्यैव मेध्यस्य पदेपदे जुहोति। एतदनुकृति ह  
 स्म वै पुरा। अश्वस्य मेध्यस्य पदेपदे जुहोति। यो वा अश्वस्य मेध्यस्य विवर्तनं  
 वेद। अश्वस्यैव मेध्यस्य विवर्तनेविवर्तने जुहोति। असौ वा आदित्योऽश्वः।



स आहवनीयमागच्छति। तद्विवर्तते। यदग्निहोत्रं जुहोति। अश्वस्यैव मेध्यस्य  
 विवर्तनेविवर्तने जुहोति। एतदनुकृति ह स्म वै पुरा। अश्वस्य मेध्यस्य  
 विवर्तनेविवर्तने जुहति॥८४॥ पुदे अग्निहोत्रं जुहोति त्रीणि च॥ [२३]

प्रजापतिस्तमष्टादशिभिः प्रजापतिरकामयतोभावस्मै युञ्जन्ति तेजसाऽपंप्राणा अपृश्नीरूर्ध्वा प्रजापतिः प्रेणाऽनुं प्रथमेन प्रजापतिरकामयत महान्वैश्वदेवो वा अश्वोऽश्वस्य  
 प्रजापतिस्तं यज्ञकृतभिरपृश्नीब्राह्मणौ सर्वेषु वारुणो यद्यश्वन्तदाहुष वै विभूस्ताप्येणादित्याः प्रजापतिं पितरं यो वा अश्वस्य मेध्यस्य लोमनी त्रयोविंशतिः॥२३॥  
 प्रजापतिरस्मिँल्लोक उत्तरतः श्रियमेव प्रजापतिरकामयत महान्यत्प्रातः प्र वा एष एभ्यो लोकेभ्यः सर्वे हु वै तत्र पयः स्वद्य उ चैनमेवं वेदं चत्वार्यशीतिः॥८४॥  
 प्रजापतिरश्वमेधं जुहति॥

हरिः ओम्॥

॥इति श्रीकृष्णयजुर्वेदीयतैत्तिरीयब्राह्मणे तृतीयाष्टके नवमः प्रपाठकः समाप्तः॥



## ॥तैत्तिरीय आरण्यकम्॥

॥प्रथमः प्रश्नः — अरुणप्रश्नः॥

ॐ भ॒द्रं कर्णे॑भिः शृणु॒याम॑ दे॒वाः। भ॒द्रं प॑श्येमा॒क्षभि॑र्यज॒त्राः। स्थि॒रैरङ्गै॑स्तुष्टुवाꣳ  
संस्त॒नूभिः॑। व्यशे॑म दे॒वहि॑तं यदायुः। स्व॒स्ति न॒ इन्द्रो॑ वृद्धश्र॒वाः। स्व॒स्ति नः॑  
पूषा वि॒श्ववे॑दाः। स्व॒स्ति न॒स्ताक्ष्यो॑ अरि॒ष्टने॑मिः। स्व॒स्ति नो॒ बृह॒स्पति॑र्दधातु॥ ॐ  
शान्तिः॒ शान्तिः॒ शान्तिः॑॥

भ॒द्रं कर्णे॑भिः शृणु॒याम॑ दे॒वाः। भ॒द्रं प॑श्येमा॒क्षभि॑र्यज॒त्राः। स्थि॒रैरङ्गै॑स्तुष्टुवाꣳ  
संस्त॒नूभिः॑। व्यशे॑म दे॒वहि॑तं यदायुः। स्व॒स्ति न॒ इन्द्रो॑ वृद्धश्र॒वाः। स्व॒स्ति नः॑  
पूषा वि॒श्ववे॑दाः। स्व॒स्ति न॒स्ताक्ष्यो॑ अरि॒ष्टने॑मिः। स्व॒स्ति नो॒ बृह॒स्पति॑र्दधातु।  
आप॑मापाम॒पः सर्वाः॑। अ॒स्माद॒स्मादि॒तोऽमु॑तः॥१॥

अ॒ग्निर्वा॒युश्च॑ सूर्यश्च। स॒ह सं॑ञ्चस्कर॒द्धिया॑। वा॒य्वश्वा॑ रश्मि॒पत॑यः। मरी॑च्यात्मानो  
अ॒द्रुहः॑। दे॒वीर्भु॑वन॒सूव॑रीः। पु॒त्रव॒त्वाय॑ मे सुत। महाना॒ग्नीर्म॑हामा॒नाः। म॒ह॒सो म॑ह॒सः॑

स्वः। देवीः पर्जन्यसूवरीः। पुत्रवत्वाय मे सुत॥२॥

अपाश्र्युष्णिमपा रक्षः। अपाश्र्युष्णिमपा रघम्। अपाघ्नमपं चावर्तिम्।  
अपदेवीरितो हित। वज्रं देवीरजीतांश्च। भुवनं देवसूवरीः। आदित्यानदितिं  
देवीम्। योनिर्नोर्ध्वमुदीषता। शिवा नः शन्तमा भवन्तु। दिव्या आप ओषधयः।  
सुमृडीका सरस्वति। मा ते व्योम सन्दृशि॥३॥\_\_\_\_\_ [१]

स्मृतिः प्रत्यक्षमैतिह्यम्। अनुमानश्चतुष्टयम्। एतैरादित्यमण्डलम्। सर्वैरेव  
विधास्यते। सूर्यो मरीचिमादत्ते। सर्वस्माद्भुवनादधि। तस्याः पाकविशेषेण। स्मृतं  
कालविशेषणम्। नदीव प्रभवात्काचित्। अक्षय्याथ्स्यन्दते यथा॥४॥

तां नद्योऽभि समायन्ति। सौरुः सती न निवर्तते। एवं नानासमुत्थानाः। कालाः  
संवत्सरः श्रिताः। अणुशश्च महशश्च। सर्वे समवयत्रितम्। सतैः सर्वैः समाविष्टः।  
ऊरुः सन्न निवर्तते। अधिसंवत्सरं विद्यात्। तदेवं लक्षणे॥५॥

अणुभिश्च महद्भिश्च। समारूढः प्रदृश्यते। संवत्सरः प्रत्यक्षेण। नाधिसत्वः

प्रदृश्यंते। प॒ट॒रो वि॒क्लि॒धः पि॒ङ्गः। ए॒तद्व॑रुण॒लक्ष॑णम्। यत्रैतदु॒प॒दृश्यं॑ते। स॒हस्रं॑ तत्र॒ नीय॑ते। एक॑ः हि शिरो नाना मुखे। कृ॒त्स्नं तद॑तुल॒क्षणम्॥६॥

उभयतः सप्तैन्द्रियाणि। जल्पितं त्वेव दिह्यते। शुक्लकृष्णे संवत्सरस्य। दक्षिणवामयोः पार्श्वयोः। तस्यैषा भवति। शुक्रं ते अन्यद्यजतं ते अन्यत्। विषुरूपे अहं नी द्यौरिवासि। विश्वा हि माया अवसि स्वधावः। भद्रा ते पूषन्निह रातिरस्त्विति। नात्र भुवनम्। न पूषा। न पशवः। नाऽऽदित्यः संवत्सर एव प्रत्यक्षेण प्रियतमं विद्यात्। एतद्वै संवत्सरस्य प्रियतमं रूपम्। योऽस्य महानर्थ उत्पत्स्यमानो भवति। इदं पुण्यं कुरुष्वेति। तमाहरणं दद्यात्॥७॥ ————— [२]

साक॒ञ्जाना॑ः सप्तथ॑माहुरेक॒जम्। षडु॑द्यमा ऋषयो देवजा इति। तेषामिष्टानि विहितानि धाम॒शः। स्था॒त्रे रै॑जन्ते विकृतानि रूप॒शः। को नु॑ मर्या॒ अमि॑थितः। सखा॒ सखा॑यमब्रवीत्। जहा॑को अ॒स्मदी॑षते। यस्ति॒त्याजं॑ सखि॒विदुः॑ सखा॑यम्। न तस्य॑ वा॒च्यपि॑ भा॒गो अ॑स्ति। यदी॑ः शृ॒णोत्य॒लकः॑ शृ॒णोति॥८॥

न हि प्रवेदं सुकृतस्य पन्थामिति। ऋतुर्ऋतुना नुद्यमानः। विननादाभिधावः।

षष्टिश्च त्रिंशका वल्गाः। शुक्लकृष्णौ च षाष्टिकौ। सारागवस्त्रैर्जरदक्षः। वसन्तो  
वसुभिः सह। संवत्सरस्य सवितुः। प्रैषकृत्प्रथमः स्मृतः। अमूनादयतेत्यन्यान्॥९॥

अमूञ्श्च परिरक्षतः। एता वाचः प्रयुज्यन्ते। यत्रैतदुपदृश्यते। एतदेव  
विजानीयात्। प्रमाणं कालपर्यये। विशेषणं तु वक्ष्यामः। ऋतूनां तन्निबोधत।  
शुक्लवासा रुद्रगणः। ग्रीष्मेणाऽऽवर्तते सह। निजहन् पृथिवीं सर्वाम्॥१०॥

ज्योतिषाऽप्रतिख्येन सः। विश्वरूपाणि वासांसि। आदित्यानां निबोधत।  
संवत्सरीणं कर्मफलम्। वर्षाभिर्ददतां सह। अदुःखो दुःखचक्षुरिव। तद्भाऽऽपीत  
इव दृश्यते। शीतेनाव्यथयन्निव। रुरुदक्ष इव दृश्यते। ह्लादयते ज्वलतश्चैव।  
शाम्यतश्चास्य चक्षुषी। या वै प्रजा भ्रंश्यन्ते। संवत्सरात्ता भ्रंश्यन्ते। याः  
प्रतितिष्ठन्ति। संवत्सरे ताः प्रतितिष्ठन्ति। वर्षाभ्यं इत्यर्थः॥११॥—————[३]

अक्षिदुःखोत्थितस्यैव। विप्रसन्ने कनीनिके। आङ्गे चाद्रणं नास्ति। ऋभूणां  
तन्निबोधत। कनकाभानि वासांसि। अहतानि निबोधत। अन्नमश्रीतं मृज्मीत।

अ॒हं वो॑ जी॒वन॒प्रदः॑। ए॒ता वा॒चः प्र॑यु॒ज्यन्ते॑। श॒रद्य॑त्रोप॒दृश्य॑ते॥१२॥

अभिधू॒न्वन्तोऽभिघ्न॑न्त इ॒वा। वा॒तव॑न्तो म॒रुद्ग॑णाः। अमु॒तो जे॒तुमि॑षुमु॒खमि॑वा।  
सन्न॑द्धाः सह द॑दृशे॒ ह। अप॑ध्वस्तैर्व॒स्तिव॑र्णैरि॒वा। वि॒शि॒खासः॑ क॒प॒र्दिनः॑।  
अक्रु॑द्धस्य यो॒त्स्यमा॑न॒स्य। क्रु॒द्धस्ये॑व॒ लोहि॑नी। हे॒मतश्चक्षु॑षी वि॒द्यात्। अ॒क्ष्णयोः॑  
क्षि॒प॒णो॒रि॒वा॥१३॥

दुर्भिक्षं दे॒वलो॑केषु। म॒नूना॑मु॒दकं॑ गृ॒हे। ए॒ता वा॒चः प्र॑व॒दन्तीः॑। वै॒द्युतो॑ या॒न्ति  
शै॒शिरीः॑। ता अ॒ग्निः प॑व॒मना॒ अन्वै॑क्षत। इ॒ह जी॑वि॒काम॑परिपश्यन्। तस्यै॒षा भ॑व॒ति।  
इ॒हेह॑वः स्व॒त॒पसः॑। म॒रुतः॑ सूर्य॒त्वचः॑। श॒र्म स॒प्रथा॒ आवृ॑णे॥१४॥ [४]

अति॑ता॒म्राणि॑ वा॒सा॒सि। अ॒ष्टि॒व॒ज्जि॒श॒तघ्नि॑ च। वि॒श्वे दे॒वा वि॑प्र॒हर॑न्ति।  
अ॒ग्निजि॑ह्वा अ॒सश्च॑त। नै॒व दे॒वो न॑ म॒र्त्यः। न रा॒जा व॑रु॒णो वि॑भुः। ना॒ग्निर्ने॒न्द्रो न॑  
प॑व॒मानः॑। मा॒तृक्क॑च्च॒न् विद्य॑ते। दि॒व्यस्यै॑का॒ धनु॑रार्तिः। पृ॒थि॒व्याम॑प॒रा श्रि॑ता॥१५॥

तस्ये॒न्द्रो व॑मि॒रूपे॑ण। ध॒नु॒र्ज्या॑मछि॒नत्स्व॑यम्। तदि॒न्द्र॒धनु॑रि॒त्य॒ज्यम्। अ॒भ्रव॑र्णेषु

चक्षते। एतदेव शंयोर्बाहस्पत्यस्य। एतद्रुद्रस्य धनुः। रुद्रस्य त्वेव धनुरार्तिः। शिरः  
उत्पिपेष। स प्रवर्ग्योऽभवत्। तस्माद्यः सप्रवर्ग्येण यज्ञेन यजते। रुद्रस्य स शिरः  
प्रतिदधाति। नैनं रुद्र आरुको भवति। य एवं वेद॥१६॥ [५]

अत्यूर्ध्वाक्षोऽतिरश्चात्। शिशिरः प्रदृश्यते। नैव रूपं न वासांसि। न चक्षुः  
प्रतिदृश्यते। अन्योन्यं तु न हिंसातः। सतस्तद्देवलक्षणम्। लोहितोऽक्षि  
शारशीर्ष्णिः। सूर्यस्योदयनं प्रति। त्वं करोषि न्यञ्जलिकाम्। त्वं करोषि  
निजानुकाम्॥१७॥

निजानुका मे न्यञ्जलिका। अमी वाचमुपासतामिति। तस्मै सर्व ऋतवो नमन्ते।  
मर्यादाकरत्वात्प्रपुरोधाम्। ब्राह्मणं आप्नोति। य एवं वेद। स खलु संवत्सर एतैः  
सेनानीभिः सह। इन्द्राय सर्वान्कामान्भिवहति। स द्रप्सः। तस्यैषा भवति॥१८॥

अवद्रप्सो अंशुमतीमतिष्ठत्। इयानः कृष्णो दशभिः सहस्रैः। आवर्तमिन्द्रः  
शच्या धमन्तम्। उपस्रुहि तं नृमणामथद्रामिति। एतयैवेन्द्रः सलावृक्या सह।  
असुरान् परिवृश्चति। पृथिव्यंशुमती। तामन्ववस्थितः संवत्सरो दिवं च।



नैवं विदुषाऽऽचार्यान्तेवासिनौ। अन्योन्यस्मै" द्रुह्याताम्। यो द्रुह्यति। भ्रश्यते  
स्वर्गाल्लोकात्। इत्यृतुमण्डलानि। सूर्यमण्डलान्याख्यायिकाः। अत ऊर्ध्वं  
संनिर्वचनाः॥१९॥

[६]

आरोगो भ्राजः पटरः पतङ्गः। स्वर्णरो ज्योतिषीमान् विभासः। ते अस्मै सर्वे  
दिवमातपन्ति। ऊर्जं दुहाना अनपस्फुरन्त इति। कश्यपोऽष्टमः। स महामेरुं  
न जहाति। तस्यैषा भवति। यत्ते शिल्पं कश्यप रोचनावत्। इन्द्रियावत्पुष्कलं  
चित्रमानु। यस्मिन्सूर्या अर्पिताः सप्त साकम्॥२०॥

तस्मिन् राजानमधिविश्रयेममिति। ते अस्मै सर्वे कश्यपाज्योतिर्लभन्ते।  
तान्त्सोमः कश्यपादधिनिर्धमति। भ्रस्ताकर्मकृदिवैवम्। प्राणो जीवानीन्द्रियजीवानि।  
सप्त शीर्षण्याः प्राणाः। सूर्या इत्याचार्याः। अपश्यमहमेतान्त्सप्त सूर्यानि।  
पञ्चकर्णो वात्स्यायनः। सप्तकर्णश्च प्लाक्षिः॥२१॥

आनुश्रविक एव नौ कश्यप इति। उभौ वेदयिते। न हि शेकुमिव महामेरुं

गन्तुम्। अपश्यमहमेत्सूर्यमण्डलं परिवर्तमानम्। गार्ग्यः प्राणत्रातः। गच्छन्त  
महामेरुम्। एकं चाजुहतम्। भ्राजपटरपतङ्गा निहने। तिष्ठन्नातपन्ति। तस्मादिह  
तत्रितपाः॥२२॥

अमुत्रेतरे। तस्मादिहातत्रितपाः। तेषामेषा भवन्ति। सप्त सूर्या दिवमनुप्रविष्टाः।  
तानन्वेति पृथिभिर्दक्षिणावान्। ते अस्मै सर्वे घृतमातपन्ति। ऊर्जं दुहाना  
अनपस्फुरन्त इति। सप्तर्त्विजः सूर्या इत्याचार्याः। तेषामेषा भवन्ति। सप्त दिशो  
नानासूर्याः॥२३॥

सप्त होतार ऋत्विजः। देवा आदित्या ये सप्त। तेभिः सोमाभी रक्षण  
इति। तदप्याम्नायः। दिग्भ्राज ऋतून् करोति। एतयैवावृता सहस्रसूर्यताया इति  
वैशम्पायनः। तस्यैषा भवन्ति। यद्वाव इन्द्र ते शतं शतं भूमीः। उतस्युः। नत्वा  
वज्रिन्सहस्रं सूर्याः॥२४॥

अनु न जातमष्ट रोदसी इति। नानालिङ्गत्वादृतूनां नानासूर्यत्वम्।  
अष्टौ तु व्यवसिता इति। सूर्यमण्डलान्यष्टात ऊर्ध्वम्। तेषामेषा भवन्ति।

चित्रं देवानामुदङ्गादनीकम्। चक्षुर्मित्रस्य वरुणस्याग्नेः। आप्रा द्यावापृथिवी  
अन्तरिक्षम्। सूर्य आत्मा जगतस्तस्थुषश्चेति॥२५॥\_\_\_\_\_ [७]

क्वेदमभ्रं निविशते। कायः संवत्सरो मिथः। काहः केयं देव रात्री। क्व मासा  
ऋतवः श्रिताः। अर्धमासा मुहूर्ताः। निमेषास्त्रुटिभिः सह। केमा आपो निविशन्ते।  
यदीतो यान्ति सम्प्रति। काला अप्सु निविशन्ते। आपः सूर्ये समाहिताः॥२६॥

अभ्राण्यपः प्रपद्यन्ते। विद्युत्सूर्ये समाहिता। अनवर्णे इमे भूमी। इयं चाऽसौ च  
रोदसी। किं स्विदत्रान्तरा भूतम्। येनेमे विधृते उभे। विष्णुना विधृते भूमी। इति  
वत्सस्य वेदना। इरावती धेनुमती हि भूतम्। सूर्यवसिनी मनुषे दशस्यै॥२७॥

व्यष्टभ्राद्रोदसी विष्णावेते। दाधर्थ पृथिवीमभितो मयूखैः। किं तद्विष्णोर्बल-  
माहुः। का दीप्तिः किं परायणम्। एको यद्धारयद्देवः। रेजती रोदसी उभे।  
वाताद्विष्णोर्बलमाहुः। अक्षरादीप्तिरुच्यते। त्रिपदाद्धारयद्देवः। यद्विष्णोरेकमुत्तमम्॥२८॥

अ॒ग्नयो॑ वा॒यवश्चै॒व। ए॒तद॑स्य प॒राय॑णम्। पृ॒च्छामि॑ त्वा प॑रं मृ॒त्युम्। अ॒वमं॑  
म॒ध्यम॑श्च॒तुम्। लो॒कं च॑ पु॒ण्य॑पापा॒नाम्। ए॒तत्पृ॑च्छामि॒ सम्प्र॑ति। अ॒मुमा॑हुः प॑रं  
मृ॒त्युम्। प॒वमा॑नं तु म॒ध्यम॑म्। अ॒ग्निरे॒वाव॑मो मृ॒त्युः। च॒न्द्रमा॑श्चतु॒रुच्य॑ते॥२९॥

अ॒ना॒भो॒गाः प॑रं मृ॒त्युम्। पा॒पाः सं॑यन्ति॒ सर्व॑दा। आ॒भो॒गास्त्वे॒वं सं॑यन्ति। य॒त्र  
पु॑ण्यकृ॒तो ज॑नाः। ततो॑ म॒ध्यम॑मायन्ति। च॒तुम॑ग्निं च॒ सम्प्र॑ति। पृ॒च्छामि॑ त्वा  
पा॒पकृ॑तः। य॒त्र या॑तय॒ते य॑मः। त्वं न॒स्तद्व॑ह्मन् प्रब्रू॒हि। य॒दि वै॑त्थाऽस॒तो गृ॑हान्॥३०॥

क॒श्यपा॑दु॒दिताः॑ सू॒र्याः। पा॒पान्नि॑र्घ्नन्ति॒ सर्व॑दा। रो॒दस्यो॑न्तर्द॑शेषु। तत्र न्यस्यन्ते॑  
वा॒स॒वैः। तेऽशरी॑राः प्र॑पद्यन्ते। य॒थाऽपु॑ण्यस्य॒ कर्म॑णः। अ॒पा॒ण्यपा॑द॒केशा॑सः। तत्र  
तेऽयो॑नि॒जा ज॑नाः। मृ॒त्वा पु॑नर्मृ॒त्युमा॑पद्यन्ते। अ॒द्यमा॑नाः स्व॒कर्म॑भिः॥३१॥

आशा॑तिकाः क्रि॒मय॑ इ॒व। ततः॑ पू॒यन्ते॑ वा॒स॒वैः। अपै॑तं मृ॒त्युं ज॑यति। य ए॒वं  
वे॒द। स ख॒ल्वै॒वं वि॒द्वद्वा॒ह्मणः॑। दी॒र्घश्रु॑त्तमो भ॒वति॑। क॒श्यप॑स्याति॒थिः॑ सि॒द्धग॑मनः॒

सिद्धागमनः। तस्यैषा भवति। आयस्मिन्त्सप्त वासवाः। रोहन्ति पूर्वा रुहः॥३२॥

ऋषिर्ह दीर्घश्रुतमः। इन्द्रस्य घर्मो अतिथिरिति। कश्यपः पश्यको भवति। यत्सर्वं परिपश्यतीति सौक्ष्म्यात्। अथाग्नेरष्टपुरुषस्य। तस्यैषा भवति। अग्ने नय सुपथा राये अस्मान्। विश्वानि देव वयुनानि विद्वान्। युयोध्यस्मञ्जुहुराणमेनः। भूयिष्ठां ते नम उक्तिं विधेमेति॥३३॥

[८]

अग्निश्च जातवेदाश्च। सहोजा अजिराप्रभुः। वैश्वानरो नर्यापाश्च। पङ्क्तिराधाश्च सप्तमः। विसर्पेवाऽष्टमोऽग्नीनाम्। एतेऽष्टौ वसवः, क्षिता इति। यथर्त्वेवाग्नेरर्चिर्वर्णविशेषाः। नीलार्चिश्च पीतकार्चिश्चेति। अथ वायोरेकादशपुरुषस्यैकादशस्त्रीकस्य। प्रभ्राजमाना व्यवदाताः॥३४॥

याश्च वासुकिवैद्युताः। रजताः परुषाः श्यामाः। कपिला अतिलोहिताः। ऊर्ध्वा अवपतन्ताश्च। वैद्युत इत्येकादश। नैनं वैद्युतो हिनस्ति। य एवं वेद। स होवाच व्यासः पाराशर्यः। विद्युद्वधमेवाहं मृत्युमैच्छामिति। न त्वकामं हन्ति॥३५॥

य एवं वेद। अथ गन्धर्वगणाः। स्वान्भ्राट्। अङ्घ्रिर्बम्भारिः। हस्तः सुहस्तः। कृशानुर्विश्वावसुः। मूर्धन्वान्सूर्यवर्चाः। कृतिरित्येकादश गन्धर्वगणाः। देवाश्च महादेवाः। रश्मयश्च देवां गरगिरः॥३६॥

नैनं गरौ हिनस्ति। य एवं वेद। गौरी मिमाय सलिलानि तक्षती। एकपदी द्विपदी सा चतुष्पदी। अष्टापदी नवपदी बभ्रुवुषी। सहस्राक्षरा परमे व्योमन्निति। वाचो विशेषणम्। अथ निगदव्याख्याताः। ताननुक्रमिष्यामः। वराहवः स्वतुपसः॥३७॥

विद्युन्महसो धूपयः। श्वापयो गृहमेधाश्चेत्येते। ये चेमेऽशिमिविद्विषः। पर्जन्याः सप्त पृथिवीमभिवर्षन्ति। वृष्टिभिरिति। एतयैव विभक्तिविपरीताः। सप्तभिर्वा तैरुदीरिताः। अमूल्लोकानभिवर्षन्ति। तेषामेषा भवति। समानमेतदुदकम्॥३८॥

उच्चैत्यवचाहभिः। भूमिं पर्जन्या जिन्वन्ति। दिवं जिन्वन्त्यग्नय इति। यदक्षरं भूतकृतम्। विश्वे देवा उपासन्ते। महर्षिमस्य गोप्तारम्। जमदग्निमकुर्वत। जमदग्निराप्यायते। छन्दोभिश्चतुरुत्तरैः। राज्ञः सोमस्य तृप्तासः॥३९॥

ब्रह्मणा वीर्यावता। शिवा नः प्रदिशो दिशः। तच्छुं योरावृणीमहे। गातुं यज्ञाय। गातुं यज्ञपतये। दैवीः स्वस्तिरस्तु नः। स्वस्तिर्मानुषेभ्यः। ऊर्ध्वं जिगातु भेषजम्। शं नो अस्तु द्विपदे। शं चतुष्पदे। सोमपा (३) असोमपा (३) इति निगदव्याख्याताः॥४०॥

[९]

सहस्रवृद्धियं भूमिः। परं व्योम सहस्रवृत्। अश्विनां भुज्यूनासत्या। विश्वस्य जगतस्पती। जाया भूमिः पतिव्योम। मिथुनन्ता अतुर्यथुः। पुत्रो बृहस्पती रुद्रः। सरमा इति स्त्रीपुमम्। शुक्रं वामन्यद्यजतं वामन्यत्। विषुरूपे अहनी द्यौरिव स्थः॥४१॥

विश्वा हि माया अवन्तः स्वधावन्तौ। भद्रा वां पूषणाविह रातिरस्तु। वासात्यौ चित्रौ जगतो निधानौ। द्यावाभूमी चरथः स२ सखायौ। तावश्विनां रासभाश्वा हवं मे। शुभस्पती आगत२ सूर्यया सह। त्युग्रोह भुज्युमश्विनोदमेघे। रयिं न कश्चिन्ममृवां (२) अवाहाः। तमूहथुर्नोभिरात्मन्वर्तीभिः। अन्तरिक्षप्रुङ्गिरपौदकाभिः॥४२॥

ति॒स्रः, क्ष॒प॒स्त्रि॒हा॒ति॒व्रज॑द्भिः। नास॑त्या भु॒ज्युमू॑हथुः प॒त॒ङ्गैः। स॒मु॒द्रस्य॑  
ध॒न्व॑न्ना॒र्द्रस्य॑ पा॒रे। त्रि॒भीर॑थैः श॒तप॑द्भिः षड॑श्वैः। स॒वि॒तारं॑ वि॒त॑न्वन्तम्। अ॒नु॒ब॒ध्रा॒ति  
शा॒म्बरः॑। आप॑पूर्॒षम्बर॑श्चै॒व। स॒वि॒ता॒रे॒प॒सोऽभ॑वत्। त्य॑ सु॒तृप्तं॑ वि॒दित्वै॒व।  
ब॒हु॒सोम॑ गि॒रं व॑शी॥ ४३॥

अ॒न्वे॒ति तु॒ग्रो व॑क्रिया॒न्तम्। आ॒य॒सू॒या॒न्त्सोम॑तृ॒प्सुषु॑। स स॒ङ्ग्राम॑-  
स्तमो॑द्यो॒ऽत्यो॒तः। वा॒चो गाः पि॑पा॒ति तत्। स तद्गो॑भिः स्तवा॑ऽत्ये॒त्यन्ये॑।  
र॒क्षसा॑न॒न्वि॒ताश्च॑ ये। अ॒न्वे॒ति परि॑वृ॒त्याऽस्तः॑। ए॒वमे॒तौ स्थो॑ अ॒श्विना॑। ते ए॒ते द्युः  
पृ॒थि॒व्योः। अ॒ह॒र॒ह॒र्गर्भं॑ दधा॒थे॥ ४४॥

तयो॑रे॒तौ व॒त्स॒वाव॑हो॒रा॒त्रे। पृ॒थि॒व्या अ॒हः॑। दि॒वो रा॒त्रिः। ता अ॒वि॒सृ॒ष्टौ। द॒म्प॑ती  
ए॒व भ॑वतः। तयो॑रे॒तौ व॒त्सौ। अ॒ग्निश्चा॑ऽऽदि॒त्यश्च॑। रा॒त्रेर्व॒त्सः। श्वे॒त आ॑दि॒त्यः।  
अ॒होऽग्निः॥ ४५॥

ता॒म्रो अ॑रु॒णः। ता अ॒वि॒सृ॒ष्टौ। द॒म्प॑ती ए॒व भ॑वतः। तयो॑रे॒तौ व॒त्सौ। वृ॒त्रश्च॑



वैद्युतश्च। अ॒ग्नेर्वृ॒त्रः। वै॒द्युतं आ॒दि॒त्यस्य॑। ता अ॒वि॒सृ॒ष्टौ। द॒म्प॒ती ए॒व भ॑वतः। तयो॑रे॒तौ  
व॒त्सौ॥ ४६॥

उ॒ष्मा च॑ नी॒हारश्च॑। वृ॒त्रस्यो॒ष्मा। वै॒द्युत॑स्य नी॒हारः। तौ ता॒वे॒व प्र॑ति॒पद्ये॑ते।  
से॒यः रा॒त्रीं गु॒र्भिणीं॑ पु॒त्रेण॑ सं॒व॑सति। तस्या॒ वा ए॒तदु॒ल्बण॑म्। य॒द्रात्रौ॑ र॒श्मयः॑।  
यथा॒ गोर्ग॒र्भिण्यां॑ उ॒ल्बण॑म्। ए॒वमे॒तस्यां॑ उ॒ल्बण॑म्। प्र॒जयि॑ष्णुः प्र॒जया॑ च प॒शुभि॑श्च  
भ॒वति॑। य ए॒वं वे॒द। ए॒तमु॒द्यन्त॑म॒पिय॑न्तं चे॒ति। आ॒दि॒त्यः पु॒ण्य॑स्य व॒त्सः। अथ  
प॒वि॒त्राङ्गि॑रसः॥ ४७॥

[१०]

प॒वि॒त्र॑वन्तः प॒रि॒वाज॑मा॒स॒न्ते। पि॒त॑ैषां प्र॒त्नो अ॒भि॒रक्ष॑ति व्र॒तम्। म॒हः  
स॒मु॒द्रं व॑रु॒णस्ति॒रोद॑धे। धी॒रा इ॒च्छे॒कु॒र्धरु॑णेष्वार॒भम्। प॒वि॒त्रं ते॒ वि॒त॑तं  
ब्र॒ह्म॑ण॒स्पते॑। प्र॒भु॒र्गात्रा॑णि॒ पर्ये॑षि॒वि॒श्वतः॑। अ॒त॑प्तत॒नू॒र्न तदा॑मो अ॒श्रु॑ते। शृ॒ता॒स  
इ॒द्वह॑न्त॒स्तत्स॑मा॒श॒त। ब्र॒ह्मा दे॒वाना॑म्। अ॒स॒न्तः स॒द्ये त॑त॒क्षुः॥ ४८॥

ऋष॑यः स॒प्तात्रि॑श्च॒ यत्। स॒र्वेऽत्र॑यो अ॒गस्त्य॑श्च। नक्ष॑त्रैः शङ्क॑तोऽव॒सन्। अथ॑

सवितुः श्यावाश्वस्याऽवर्तिकामस्य। अमी य ऋक्षा निहितास उच्चा। नक्तं  
ददृश्रे कुहचिद्विवेयुः। अदब्धानि वरुणस्य व्रतानि। विचाकशच्चन्द्रमा नक्षत्रमेति।  
तत्संवितुर्वरेण्यम्। भर्गो देवस्य धीमहि॥४९॥

धियो यो नः प्रचोदयात्। तत्संवितुर्वृणीमहे। वयं देवस्य भोजनम्। श्रेष्ठं  
सर्वधातमम्। तुरं भर्गस्य धीमहि। अपांगूहत सविता तृभीन्। सर्वान्दिवो अन्धसः।  
नक्तं तान्यभवन्दृशे। अस्थ्यस्त्रा सम्भविष्यामः। नाम नामैव नाम मै॥५०॥

नपुंसकं पुमांस्त्र्यस्मि। स्थावरोऽस्म्यथ जङ्गमः। यजेऽयक्षि यष्टाहे च। मया  
भूतान्ययक्षत। पशवो मम भूतानि। अनूबन्धोऽस्म्यहं विभुः। स्त्रियः सतीः। ता  
उमे पुंस आहुः। पश्यदक्षणावन्नविचेतदन्धः। कविर्यः पुत्रः स इमा चिकेत॥५१॥

यस्ता विजानात्संवितुः पितासत्। अन्धो मणिमविन्दत्। तमनङ्गुलिरावयत्।  
अग्रीवः प्रत्यमुश्वत्। तमजिह्वा असश्वत्। ऊर्ध्वमूलमवाक्छाखम्। वृक्षं यो वेद  
सम्प्रति। न स जातु जनः श्रद्दध्यात्। मृत्युर्मा मारयादितिः। हसितं रुदितं

गीतम्॥५२॥

वीणापणवुलासितम्। मृतं जीवं च यत्किञ्चित्। अङ्गानि स्नेव विद्धि तत्।  
अतृष्य॒ऽस्तृष्य॑ध्यायत्। अस्माज्जा॒ता मे॑ मिथू चरन्। पुत्रो निर्ऋत्या॑ वैदेहः। अचेता॑  
यश्च चेतनः। स॒ तं मणिम॑विन्दत्। सोऽनङ्गुलिरावयत्। सोऽग्रीवः॑ प्रत्यमुञ्चत्॥५३॥

सोऽजिह्वो असञ्चत। नैतमृषिं विदित्वा नगरं प्रविशेत्। यदि प्रविशेत्। मिथौ  
चरित्वा प्रविशेत्। तत्सम्भवंस्य व्रतम्। आतमग्ने रथं तिष्ठ। एका॑श्वमेक॒योजन॑म्।  
एकचक्र॑मेकधुरम्। वा॒तघ्रा॑जिग॒तिं वि॑भो। न॒ रि॒ष्यति॑ न व्यथते॥५४॥

नास्याक्षो यातु सञ्जति। यच्छ्वेता॑न् रोहि॒ताऽश्वा॑ग्नेः। र॒थे यु॑क्त्वाऽधि॒तिष्ठ॑ति। एकया  
च दशभिश्च॑ स्वभूते। द्वाभ्यामिष्टये वि॑शत्या॒ च। तिसृ॑भिश्च वहसे त्रि॑शता॒ च।  
नियु॒द्धिर्वाय॑विह ता॑ विमुञ्च॥५५॥\_\_\_\_\_ [११]

आत॑नुष्व॒ प्रत॑नुष्व। उ॒द्धमाऽऽध॑म॒ सन्ध॑म। आदित्ये चन्द्रवर्णानाम्। गर्भ॑माधेहि  
यः पुमान्। इतः॑ सि॒क्तः सूर्य॑गतम्। च॒न्द्रम॑से रसं कृधि। वारा॑दं जनयाग्नेऽग्निम्।

य एको रुद्र उच्यते। असङ्ख्याताः संहस्राणि। स्मर्यते न च दृश्यते॥५६॥

एवमेतं निबोधत। आ मन्द्रैरिन्द्र हरिभिः। याहि मयूररोमभिः। मा त्वा केचिन्नियेमुरिन्न पाशिनः। दधन्वेव ता इहि। मा मन्द्रैरिन्द्र हरिभिः। यामि मयूररोमभिः। मा मा केचिन्नियेमुरिन्न पाशिनः। निधन्वेव तां (२) इमि। अणुभिश्च महद्भिश्च॥५७॥

निघृष्वैरसमायुतैः। कालैरहरित्वमापन्नैः। इन्द्राऽऽयाहि सहस्रयुक्। अग्निर्विभ्राष्टिवसनः। वायुः श्वेतसिकद्रुकः। संवत्सरो विषूवर्णैः। नित्यास्तेऽनुचरास्तुव सुब्रह्मण्योः सुब्रह्मण्योः सुब्रह्मण्योम्। इन्द्राऽऽगच्छ हरिव आगच्छ मैधातिथेः। मेष वृषणश्वस्य मेने॥५८॥

गौरावस्कन्दिन्नहल्यायै जार। कौशिकब्राह्मण गौतमब्रुवाण। अरुणाश्वा इहागताः। वसवः पृथिविक्षितः। अष्टौदिग्वासंसोऽग्नयः। अग्निश्च जातवेदाश्चेत्येते। ताम्राश्वास्ताम्ररथाः। ताम्रवर्णास्तथाऽसिताः। दण्डहस्ताः खादग्दतः। इतो रुद्राः पराङ्गताः॥५९॥

उक्तं स्थानं प्रमाणं च पुर इत। बृहस्पतिश्च सविता च। विश्वरूपैरिहाऽऽगताम्।  
रथेनोदकवर्त्मना। अप्सुषा इति तद्वयोः। उक्तो वेषो वासांसि च।  
कालावयवानामितः प्रतीच्या। वासात्या इत्यश्विनोः। कोऽन्तरिक्षे शब्दं  
करोतीति। वासिष्ठो रौहिणो मीमांसां चक्रे। तस्यैषा भवति। वाश्रेवं विद्युदिति।  
ब्रह्मण उदरणमसि। ब्रह्मण उदीरणमसि। ब्रह्मण आस्तरणमसि। ब्रह्मण  
उपस्तरणमसि॥६०॥

[१२]

[अपक्रामत गर्भिण्यः]

अष्टयोनीमष्टपुत्राम्। अष्टपत्नीमिमां महीम्। अहं वेद न मे मृत्युः। न  
चामृत्युरघाऽऽहरत्। अष्टयोन्यष्टपुत्रम्। अष्टपदिदमन्तरिक्षम्। अहं वेद न मे  
मृत्युः। न चामृत्युरघाऽऽहरत्। अष्टयोनीमष्टपुत्राम्। अष्टपत्नीममूं दिवम्॥६१॥

अहं वेद न मे मृत्युः। न चामृत्युरघाऽऽहरत्। सुत्रामाणं महीम्। षु।  
अदितिर्द्यौरदितिरन्तरिक्षम्। अदितिर्माता स पिता स पुत्रः। विश्वे देवा अदितिः  
पञ्चजनाः। अदितिर्जातमदितिर्जनित्वम्। अष्टौ पुत्रासो अदितेः। ये जातास्तन्वः

परि। देवां (२) उपप्रैत्सप्तभिः॥६२॥

प॒रा मा॒र्ताण्ड॑मास्य॑त्। स॒प्तभिः॑ पु॒त्रैरदि॑तिः। उप॒प्रैत्पू॒र्व्यं यु॑गम्। प्र॒जायै॑ मृ॒त्यवे॑  
त॑त्। प॒रा मा॒र्ताण्ड॑माभ॑र॒दिति॑। ताननु॑क्र॒मिष्या॑मः। मि॒त्रश्च॑ व॒रुणश्च॑। धा॒ता चा॑र्य॒मा  
च॑। अ॒श्वश्च॑ भ॒गश्च॑। इन्द्रश्च॑ वि॒वस्वाश्च॑त्ये॒ते। हि॒र॒ण्य॒ग॒र्भो ह॒सः शु॑चि॒षत्।  
ब्र॒ह्म॑ज॒ज्ञानं॑ तदित्प॒दमि॑ति। ग॒र्भः प्रा॑जाप॒त्यः। अथ॑ पु॒रुषः॑ स॒प्त पु॒रुषः॥६३॥

[य॒था॒स्थानं॑ ग॒र्भि॒ण्यः]—————[१३]

योऽसौ॑ त॒प॒न्नुदे॑ति। स सर्वे॑षां भू॒तानां॑ प्रा॒णाना॑दायो॒देति॑। मा मे॑ प्र॒जाया॒ मा  
प॑शूनाम्। मा मम॑ प्रा॒णाना॑दायोद॑गाः। अ॒सौ योऽस्त॑मेति। स सर्वे॑षां भू॒तानां॑  
प्रा॒णाना॑दाया॒स्तमे॑ति। मा मे॑ प्र॒जाया॒ मा प॑शूनाम्। मा मम॑ प्रा॒णाना॑दायास्त॑ङ्गाः।  
अ॒सौ य॑ आ॒पूर्य॑ति। स सर्वे॑षां भू॒तानां॑ प्रा॒णैरा॒पूर्य॑ति॥६४॥

मा मे॑ प्र॒जाया॒ मा प॑शूनाम्। मा मम॑ प्रा॒णैरा॒पूरि॑ष्ठाः। अ॒सौ योऽप॑क्षीय॑ति। स

सर्वेषां भूतानां प्राणैरपक्षीयति। मा मै प्रजाया मा पशूनाम्। मा मम प्राणैरपक्षेष्टाः।  
अमूनि नक्षत्राणि। सर्वेषां भूतानां प्राणैरपप्रसर्पन्ति चोत्सर्पन्ति च। मा मै प्रजाया  
मा पशूनाम्। मा मम प्राणैरपप्रसृपत् मोत्सृपत्॥६५॥

इमे मासाश्चार्धमासाश्च। सर्वेषां भूतानां प्राणैरपप्रसर्पन्ति चोत्सर्पन्ति च। मा  
मै प्रजाया मा पशूनाम्। मा मम प्राणैरपप्रसृपत् मोत्सृपत्। इम ऋतवः।  
सर्वेषां भूतानां प्राणैरपप्रसर्पन्ति चोत्सर्पन्ति च। मा मै प्रजाया मा पशूनाम्। मा  
मम प्राणैरपप्रसृपत् मोत्सृपत्। अयं संवत्सरः। सर्वेषां भूतानां प्राणैरपप्रसर्पति  
चोत्सर्पति च॥६६॥

मा मै प्रजाया मा पशूनाम्। मा मम प्राणैरपप्रसृप मोत्सृप। इदमहः। सर्वेषां  
भूतानां प्राणैरपप्रसर्पति चोत्सर्पति च। मा मै प्रजाया मा पशूनाम्। मा मम  
प्राणैरपप्रसृप मोत्सृप। इयं रात्रिः। सर्वेषां भूतानां प्राणैरपप्रसर्पति चोत्सर्पति

चा मा मै प्रजाया मा पशूनाम्। मा मम प्राणैरपंप्रसृप मोत्सृप। ॐ भूर्भुवः स्वः।  
एतद्वो मिथुनं मा नो मिथुनं रीद्वम्॥६७॥\_\_\_\_\_ [१४]

अथाऽऽदित्यस्याष्टपुरुषस्य। वसूनामादित्यानां स्थाने स्वतेजसा भानि।  
रुद्राणामादित्यानां स्थाने स्वतेजसा भानि। आदित्यानामादित्यानां स्थाने  
स्वतेजसा भानि। सतां सत्यानाम्। आदित्यानां स्थाने स्वतेजसा भानि।  
अभिधून्वतामभिघ्नताम्। वातवतां मरुताम्। आदित्यानां स्थाने स्वतेजसा भानि।  
ऋभूणामादित्यानां स्थाने स्वतेजसा भानि। विश्वेषां देवानाम्। आदित्यानां  
स्थाने स्वतेजसा भानि। संवत्सरस्य सवितुः। आदित्यस्य स्थाने स्वतेजसा  
भानि। ॐ भूर्भुवः स्वः। रश्मयो वो मिथुनं मा नो मिथुनं रीद्वम्॥६८॥— [१५]

आरोगस्य स्थाने स्वतेजसा भानि। भ्राजस्य स्थाने स्वतेजसा भानि। पटरस्य  
स्थाने स्वतेजसा भानि। पतङ्गस्य स्थाने स्वतेजसा भानि। स्वर्णरस्य स्थाने  
स्वतेजसा भानि। ज्योतिषीमतस्य स्थाने स्वतेजसा भानि। विभासस्य स्थाने  
स्वतेजसा भानि। कश्यपस्य स्थाने स्वतेजसा भानि। ॐ भूर्भुवः स्वः। आपो वो



मिथुनं मा नो मिथुनं रीद्वम्॥६९॥\_\_\_\_\_ [१६]

अथ वायोरेकादशपुरुषस्यैकादशस्त्रीकस्य। प्रभ्राजमानानां रुद्राणां स्थाने स्वतेजसा भानि। व्यवदातानां रुद्राणां स्थाने स्वतेजसा भानि। वासुकिवैद्युतानां रुद्राणां स्थाने स्वतेजसा भानि। रजतानां रुद्राणां स्थाने स्वतेजसा भानि। परुषाणां रुद्राणां स्थाने स्वतेजसा भानि। श्यामानां रुद्राणां स्थाने स्वतेजसा भानि। कपिलानां रुद्राणां स्थाने स्वतेजसा भानि। अतिलोहितानां रुद्राणां स्थाने स्वतेजसा भानि। ऊर्ध्वानां रुद्राणां स्थाने स्वतेजसा भानि॥७०॥

अवपतन्तानां रुद्राणां स्थाने स्वतेजसा भानि। वैद्युतानां रुद्राणां स्थाने स्वतेजसा भानि। प्रभ्राजमानीनां रुद्राणीनां स्थाने स्वतेजसा भानि। व्यवदातीनां रुद्राणीनां स्थाने स्वतेजसा भानि। वासुकिवैद्युतीनां रुद्राणीनां स्थाने स्वतेजसा भानि। रजतानां रुद्राणीनां स्थाने स्वतेजसा भानि। परुषाणां रुद्राणीनां स्थाने स्वतेजसा भानि। श्यामानां रुद्राणीनां

स्थाने स्वतेजसा भानि। कपिलानां रुद्राणीनां स्थाने स्वतेजसा भानि।  
 अतिलोहितीनां रुद्राणीनां स्थाने स्वतेजसा भानि। ऊर्ध्वानां रुद्राणीनां  
 स्थाने स्वतेजसा भानि। अवपतन्तीनां रुद्राणीनां स्थाने स्वतेजसा भानि।  
 वैद्युतीनां रुद्राणीनां स्थाने स्वतेजसा भानि। ॐ भूर्भुवः स्वः। रूपाणि वो  
 मिथुनं मा नो मिथुनं रीद्वम्॥७१॥\_\_\_\_\_ [१७]

अथाग्नेरष्टपुरुषस्य। अग्नेः पूर्वदिश्यस्य स्थाने स्वतेजसा भानि। जातवेदस  
 उपदिश्यस्य स्थाने स्वतेजसा भानि। सहोजसो दक्षिणदिश्यस्य स्थाने स्वतेजसा  
 भानि। अजिराप्रभव उपदिश्यस्य स्थाने स्वतेजसा भानि। वैश्वानरस्यापरदिश्यस्य  
 स्थाने स्वतेजसा भानि। नर्यापस उपदिश्यस्य स्थाने स्वतेजसा भानि। पङ्क्तिराधस  
 उदग्दिश्यस्य स्थाने स्वतेजसा भानि। विसर्पिण उपदिश्यस्य स्थाने स्वतेजसा  
 भानि। ॐ भूर्भुवः स्वः। दिशो वो मिथुनं मा नो मिथुनं रीद्वम्॥७२॥— [१८]

दक्षिणपूर्वस्यां दिशि विसर्पी नरकः। तस्मान्नः परिपाहि। दक्षिणापरस्यां  
 दिश्यविसर्पी नरकः। तस्मान्नः परिपाहि। उत्तरपूर्वस्यां दिशि विषादी नरकः।

तस्मान्नः परिपाहि। उत्तरापरस्यां दिश्यविषादी नृकः। तस्मान्नः परिपाहि। आ  
यस्मिन्त्सप्त वासवा इन्द्रियाणि शतक्रतवित्येते॥७३॥\_\_\_\_\_ [१९]

इन्द्रघोषा वो वसुभिः पुरस्तादुपदधताम्। मनोजवसो वः पितृभिर्दक्षिणत  
उपदधताम्। प्रचेता वो रुद्रैः पश्चादुपदधताम्। विश्वकर्मा व आदित्यैरुत्तरत  
उपदधताम्। त्वष्टा वो रूपैरुपरिष्ठादुपदधताम्। संज्ञानं वः पश्चादिति। आदित्यः  
सर्वोऽग्निः पृथिव्याम्। वायुरन्तरिक्षे। सूर्यो दिवि। चन्द्रमा दिक्षु। नक्षत्राणि  
स्वलोके। एवा ह्येवा। एवा ह्यग्ने। एवा हि वायो। एवा हीन्द्र। एवा हि पूषन्।  
एवा हि देवाः॥७४॥\_\_\_\_\_ [२०]

आपमापामपः सर्वाः। अस्मादस्मादितोऽमुतः। अग्निर्वायुश्च सूर्यश्च। सह  
संश्चस्करद्धिया। वाय्वश्चा रश्मिपतयः। मरीच्यात्मानो अद्रुहः। देवीर्भुवनसूवरीः।  
पुत्रवत्वाय मे सुता। महानाम्रीर्महामानाः। महसो महसः स्वः॥७५॥

देवीः पर्जन्यसूवरीः। पुत्रवत्वाय मे सुता। अपाश्र्युष्णिमपा रक्षः। अपाश्र्युष्णि-

म॒पा रघ॑म्। अ॒पा॒घ्रा॒मप॑चाव॒र्तिम्। अ॒प॒दे॒वीरि॑तो हि॒त। व॒ज्रं दे॒वीर॑जी॒ताः॑श्च। भु॒वं न॑  
दे॒व॒सू॒व॒रीः। आ॒दि॒त्या॒नदि॑तिं दे॒वीम्। यो॒नि॒नो॒र्ध्वमु॑दी॒ष॒त॥ ७६॥

भ॒द्रं क॑र्णे॒भिः शृ॑णु॒याम॑ दे॒वाः। भ॒द्रं प॑श्ये॒माक्ष॑भि॒र्यज॑त्राः। स्वि॒रैरङ्गै॑स्तुष्टु॒वाꣳ  
स॑स्त॒नूभिः॑। व्य॒शेम॑ दे॒वहि॑तं॒ यदा॑युः। स्व॒स्ति न॒ इन्द्रो॑ वृ॒द्धश्र॑वाः। स्व॒स्ति नः॑  
पू॒षा वि॒श्ववे॑दाः। स्व॒स्ति न॒स्ताक्ष॑र्यो॒ अरि॑ष्ट॒नेमिः॑। स्व॒स्ति नो॒ बृह॑स्पति॒र्दधा॑तु।  
के॒तवो॒ अरु॑णा॒सश्च। ऋ॒षयो॒ वात॑र॒शनाः॑। प्र॒तिष्ठाꣳ श॑तधा॒ हि। स॒माहि॑ता॒सो  
सह॑स्र॒धाय॑सम्। शि॒वा नः॑ श॒न्त॒मा भ॑वन्तु। दि॒व्या आप॑ ओष॒धयः॑। सु॒मृडी॒का  
सर॑स्व॒ति। मा ते॒ व्योम॑ स॒न्दृशि॑॥ ७७॥ \_\_\_\_\_[२१]

योऽपां पुष्पं वेद। पुष्पवान् प्रजावान् पशुमान् भवति। चन्द्रमा वा अपां पुष्पम्।  
पुष्पवान् प्रजावान् पशुमान् भवति। य एवं वेद। योऽपामायतनं वेद। आयतनवान्  
भवति। अग्निर्वा अपामायतनम्। आयतनवान् भवति। योऽग्नेरायतनं वेद॥ ७८॥

आयतनवान् भवति। आपो वा अग्नेरायतनम्। आयतनवान् भवति। य एवं वेद।

योऽपामायतनं वेद। आयतनवान् भवति। वायुर्वा अपामायतनम्। आयतनवान् भवति। यो वायोरायतनं वेद। आयतनवान् भवति॥७९॥

आपो वै वायोरायतनम्। आयतनवान् भवति। य एवं वेद। योऽपामायतनं वेद। आयतनवान् भवति। असौ वै तपन्नपामायतनम्। आयतनवान् भवति। योऽमुष्य तपत आयतनं वेद। आयतनवान् भवति। आपो वा अमुष्य तपत आयतनम्॥८०॥

आयतनवान् भवति। य एवं वेद। योऽपामायतनं वेद। आयतनवान् भवति। चन्द्रमा वा अपामायतनम्। आयतनवान् भवति। यश्चन्द्रमस आयतनं वेद। आयतनवान् भवति। आपो वै चन्द्रमस आयतनम्। आयतनवान् भवति॥८१॥

य एवं वेद। योऽपामायतनं वेद। आयतनवान् भवति। नक्षत्राणि वा अपामायतनम्। आयतनवान् भवति। यो नक्षत्राणामायतनं वेद। आयतनवान् भवति। आपो वै नक्षत्राणामायतनम्। आयतनवान् भवति। य एवं वेद॥८२॥

योऽपामायतनं वेद। आयतनवान् भवति। पर्जन्यो वा अपामायतनम्।

आ॒य॒त॒न॒वा॒न् भ॒व॒ति॒। यः पु॒र्जन्य॑स्या॒ऽऽय॒त॒नं॒ वेद॑। आ॒य॒त॒न॒वा॒न् भ॒व॒ति॒। आपो॑  
वै पु॒र्जन्य॑स्या॒ऽऽय॒त॒नम्। आ॒य॒त॒न॒वा॒न् भ॒व॒ति॒। य ए॒वं वेद॑। यो॑ऽपामा॒य॒त॒नं॒  
वेद॑॥८३॥

आ॒य॒त॒न॒वा॒न् भ॒व॒ति॒। सं॒व॒त्स॒रो वा अ॒पामा॒य॒त॒नम्। आ॒य॒त॒न॒वा॒न् भ॒व॒ति॒। यः  
सं॒व॒त्स॒रस्या॒ऽऽय॒त॒नं॒ वेद॑। आ॒य॒त॒न॒वा॒न् भ॒व॒ति॒। आपो॑ वै सं॒व॒त्स॒रस्या॒ऽऽय॒त॒नम्।  
आ॒य॒त॒न॒वा॒न् भ॒व॒ति॒। य ए॒वं वेद॑। यो॑ऽप्सु ना॒वं प्र॒ति॒ष्ठि॒तां वेद॑। प्र॒त्ये॒व  
ति॒ष्ठ॒ति॥८४॥

इ॒मे वै लो॒का अ॒प्सु प्र॒ति॒ष्ठि॒ताः। तद्दे॒षाऽभ्य॑नू॒क्ता। अ॒पा॒ रस॑मुद॒य॒ सन्।  
सूर्ये॑ शु॒क्र॒ रस॑माभृ॒तम्। अ॒पा॒ रस॑स्य॒ यो रसः॑। तं वो॑ गृह्णाम्यु॒त्त॒ममि॒ति॒। इ॒मे  
वै लो॒का अ॒पा॒ रसः॑। ते॒ऽमुष्मि॑न्नादि॒त्ये स॒माभृ॑ताः। जा॒नु॒द॒घ्नीमु॑त्तरवे॒दीं खा॒त्वा।  
अ॒पां पू॑रयित्वा गु॒ल्फ॒द॒घ्नम्॥८५॥

पुष्क॑र॒पर्णेः पुष्क॑रदण्डैः पुष्क॑रैश्च॒ स॒स्तीर्य॑। तस्मि॑न्विहाय॒से। अ॒ग्निं  
प्र॒णीयो॑पसमा॒धाय॑। ब्र॒ह्म॒वा॒दि॒नो वद॑न्ति। कस्मा॑त्प्रणी॒तेऽय॑म॒ग्निश्ची॒यते॑।

साप्रणीतेऽयमप्सु ह्ययं चीयते। असौ भुवनेऽप्यनाहिताग्निरेताः। तमभित एता  
अबीष्टका उपदधाति। अग्निहोत्रे दर्शपूर्णमासयोः। पशुबन्धे चातुर्मास्येषु॥८६॥

अथो आहुः। सर्वेषु यज्ञक्रतुष्विति। एतद्ध स्म वा आहुः शण्डिलाः। कमग्निं  
चिनुते। सत्रियमग्निं चिन्वानः। संवत्सरं प्रत्यक्षेण। कमग्निं चिनुते। सावित्रमग्निं  
चिन्वानः। अमुमादित्यं प्रत्यक्षेण। कमग्निं चिनुते॥८७॥

नाचिकेतमग्निं चिन्वानः। प्राणान्प्रत्यक्षेण। कमग्निं चिनुते। चातुर्होत्रियमग्निं  
चिन्वानः। ब्रह्म प्रत्यक्षेण। कमग्निं चिनुते। वैश्वसृजमग्निं चिन्वानः। शरीरं प्रत्यक्षेण।  
कमग्निं चिनुते। उपानुवाक्यमाशुमग्निं चिन्वानः॥८८॥

इमाँल्लोकान्प्रत्यक्षेण। कमग्निं चिनुते। इममारुणकेतुकमग्निं चिन्वान इति। य  
एवासौ। इतश्चाऽमुतश्चाऽव्यतीपाती। तमिति। योऽग्नेर्मिथूया वेद। मिथुनवान्भवति।  
आपो वा अग्नेर्मिथूयाः। मिथुनवान्भवति। य एवं वेद॥८९॥ [२२]

आपो वा इदमांसन्त्सलिलमेव। स प्रजापतिरेकः पुष्करपर्णे समभवत्।

तस्यान्तर्त्मनसि कामः समवर्तत। इदं सृजेयमिति। तस्माद्यत्पुरुषो  
मनसाऽभिगच्छति। तद्वाचा वदति। तत्कर्मणा करोति। तदेषाऽभ्यनूक्ता।  
कामस्तदग्रे समवर्तताधि। मनसो रेतः प्रथमं यदासीत्॥१०॥

सुतो बन्धुमसति निरविन्दन्। हृदि प्रतीष्या क्वयो मनीषेति। उपैन्नन्तदुपनमति।  
यत्कामो भवति। य एवं वेद। स तपोऽतप्यत। स तपस्तप्त्वा। शरीरमधूनुत। तस्य  
यन्मांसमासीत्। ततोऽरुणाः केतवो वातरशना ऋषय उदतिष्ठन्॥११॥

ये नखाः। ते वैखानसाः। ये वालाः। ते वालखिल्याः। यो रसः। सोऽपाम्।  
अन्तरतः कूर्मं भूतं सर्पन्तम्। तमब्रवीत्। मम वैत्वङ्मांसम्। समभूत्॥१२॥

नेत्यब्रवीत्। पूर्वमेवाहमिहासमिति। तत्पुरुषस्य पुरुषत्वम्। स सहस्रशीर्षा  
पुरुषः। सहस्राक्षः सहस्रपात्। भूत्वोदतिष्ठत्। तमब्रवीत्। त्वं वै पूर्वम्। समभूः।  
त्वमिदं पूर्वः कुरुष्वेति। स इत आदायाऽऽपः॥१३॥

अञ्जलिना पुरस्तादुपादधात्। एवाह्येवेति। तत आदित्य उदतिष्ठत्। सा प्राची



दिक्। अथारुणः केतुर्दक्षिणत उपादधात्। एवाह्यग्र इति। ततो वा अग्निरुदतिष्ठत्।  
सा दक्षिणा दिक्। अथारुणः केतुः पश्चादुपादधात्। एवा हि वायो इति॥१४॥

ततो वायुरुदतिष्ठत्। सा प्रतीची दिक्। अथारुणः केतुरुत्तरत उपादधात्।  
एवाहीन्द्रेति। ततो वा इन्द्र उदतिष्ठत्। सोदीची दिक्। अथारुणः केतुर्मध्यं  
उपादधात्। एवा हि पूषन्निति। ततो वै पूषोदतिष्ठत्। सेयं दिक्॥१५॥

अथारुणः केतुरुपरिष्ठादुपादधात्। एवा हि देवा इति। ततो देवमनुष्याः पितरः।  
गन्धर्वाप्सरसश्चोदतिष्ठन्। सोर्ध्वा दिक्। या विप्रुषो विपरापतन्। ताभ्योऽसुरा  
रक्षांसि पिशाचाश्चोदतिष्ठन्। तस्मात्ते पराभवन्। विप्रुङ्क्षो हि ते समभवन्।  
तदेषाऽभ्यनूक्ता॥१६॥

आपो ह यद्वहतीर्गर्भमायन्। दक्षं दधाना जनयन्तीः स्वयम्भुम्। तत  
इमेध्यसृज्यन्त सर्गाः। अद्ध्यो वा इदं समभूत्। तस्मादिदं सर्वं ब्रह्म  
स्वयम्भ्विति। तस्मादिदं सर्वं शिथिलमिवाऽध्रुवमिवाभवत्। प्रजापतिर्वाव

तत्। आ॒त्मना॒ऽऽत्मानं॑ वि॒धाय॑। तदे॒वानु॑प्रावि॑शत्। तदे॒षाऽभ्य॑नू॒क्ता॥१७॥

वि॒धाय॑ लो॒कान् वि॒धाय॑ भू॒तानि॑। वि॒धाय॑ सर्वाः॑ प्र॒दिशो॑ दि॒शश्च॑। प्र॒जाप॑तिः  
प्रथ॑म॒जा ऋ॒तस्य॑। आ॒त्मना॒ऽऽत्मानं॑म॒भि संवि॑वेशेति॑। सर्व॑मे॒वेद॑मा॒त्वा।  
सर्व॑मव॒रुद्धा॑। तदे॒वानु॑प्रवि॑शति। य ए॒वं वेद॑॥१८॥ [२३]

चतु॑ष्टय्य॒ आपो॑ गृ॒ह्णाति॑। च॒त्वारि॒ वा अ॒पा॒ रू॒पाणि॑। मेघो॑ वि॒द्युत्।  
स्त॒नयि॑तुर्वृ॒ष्टिः। तान्ये॒वाव॑रुन्धे। आ॒तप॑ति॒ वर्ष्या॑ गृ॒ह्णाति॑। ताः पु॒रस्ता॒दुप॑दधाति।  
ए॒ता वै ब्र॑ह्मवर्च॒स्या आपः॑। मु॒ख॒त ए॒व ब्र॑ह्मवर्च॒सम॑वरुन्धे। तस्मा॑न्मुख॒तो  
ब्र॑ह्मवर्च॒सित॑रः॥१९॥

कू॒प्या गृ॒ह्णाति॑। ता दक्षि॑ण॒त उप॑दधाति। ए॒ता वै ते॑ज॒स्विनी॒रापः॑।  
तेज॑ ए॒वास्य॑ दक्षि॑ण॒तो द॑धाति। तस्मा॑द्दक्षि॑णोऽर्ध॒स्तेज॒स्वित॑रः। स्था॒वरा  
गृ॒ह्णाति॑। ताः प॒श्चादुप॑दधाति। प्र॒ति॑ष्ठिता॒ वै स्था॑व॒राः। प॒श्चादे॒व प्र॒ति॑तिष्ठति।  
वह॑न्तीर्गृ॒ह्णाति॑॥१००॥

ता उत्तर॑त उप॑दधाति। ओज॑सा वा ए॒ता वह॑न्तीरिवो॒द्गती॑रिव आ॒कूज॑तीरिव  
धाव॑न्तीः। ओज॑ ए॒वास्यो॑त्तर॒तो द॑धाति। तस्मा॒दुत्त॑रोऽर्ध ओज॑स्वित॑रः। स॒म्भार्या  
गृ॑ह्णाति। ता मध्य॑ उप॑दधाति। इ॒यं वै स॑म्भार्याः। अ॒स्यामे॒व प्र॑ति॒तिष्ठ॑ति। प॒ल्व॒ल्या  
गृ॑ह्णाति। ता उ॒परि॑ष्टादुपाद॑धाति॥१०१॥

अ॒सौ वै प॑ल्व॒याः। अ॒मुष्या॑मे॒व प्र॑ति॒तिष्ठ॑ति। दि॒क्षूप॑दधाति। दि॒क्षु वा आप॑ः।  
अन्नं॑ वा आप॑ः। अ॒द्ध्यो वा अन्नं॑ जायते। यदे॒वाद्ध्योऽन्नं॑ जाय॑ते। तदव॑रुन्धे। तं वा  
ए॒तम॑रु॒णाः के॒तवो॑ वात॑रश॒ना ऋष॑योऽचिन्वन्। तस्मा॑दारुणके॒तुकः॑॥१०२॥

तदे॒षाऽभ्य॑नू॒क्ता। के॒तवो॑ अरु॒णास॑श्च। ऋष॑यो वात॑रश॒नाः। प्र॑ति॒ष्ठा ५ श॑तधां हि।  
स॒माहि॑तासो स॒हस्र॑धा॒यस॑मि॒ति। श॑तश॑श्चै॒व स॒हस्र॑शश्च॒ प्र॑ति॒तिष्ठ॑ति। य ए॒तम॑ग्निं  
चि॑नुते। य उ॒चैन॑मे॒वं वेद॑॥१०३॥

[२४]

जा॒नुद॒घ्नीमु॑त्तरवे॒दीं खा॒त्वा। अ॒पां पू॑रयति। अ॒पा ५ सं॑र्व॒त्वाय॑। पु॒ष्कर॑पर्ण॒ ५  
रु॒क्मं पु॑रुषमित्युप॑दधाति। तपो॑ वै पु॒ष्कर॑पर्णम्। स॒त्य ५ रु॒क्मः। अ॒मृतं॑ पु॒रुषः॑।  
ए॒ताव॒द्वा वा॑ऽस्ति। याव॑दे॒तत्। याव॑दे॒वास्ति॑॥१०४॥

तदवरुन्धे। कूर्ममुपदधाति। अपामेव मेधमवरुन्धे। अथो॑ स्वर्गस्य॑ लो॒कस्य॑  
समंष्ट्यै। आपमापामपः सर्वाः॑। अ॒स्माद॒स्मादि॒तोऽमु॒तः। अ॒ग्निर्वा॒युश्च॒ सूर्यश्च॑। स॒ह  
सं॒श्चस्कर॑र्द्धिया॒ इति॑। वा॒य्वश्चा॑ रश्मि॒पत॑यः। लो॒कं पृ॑णच्छि॒द्रं पृ॑ण॥१०५॥

यास्ति॒स्रः प॑रम॒जाः। इन्द्र॒घोषा वो॒ वसु॑भिरे॒वाह्ये॑वेति॑। पञ्च॒चित॑य उपदधाति।  
पाङ्क्तोऽग्निः॑। यावा॑ने॒वाग्निः॑। तं चि॑नुते। लो॒कं पृ॑णया द्वितीया॒मुप॑दधाति। पञ्च॒ पदा॒ वै  
वि॒राट्। तस्या॒ वा इ॒यं पादः॑। अ॒न्तरि॑क्षं पादः॑। द्यौः पादः॑। दि॒शः पादः॑। प॒रोर॑जाः  
पादः॑। वि॒राज्ये॒व प्र॑ति॒तिष्ठ॑ति। य ए॒तम॒ग्निं चि॑नुते। य उ॒चैनमे॒वं वेद॑॥१०६॥[२५]

अ॒ग्निं प्र॒णीयो॑पसमा॒धाय॑। तम॒भित ए॒ता अ॒बीष्ट॑का उपदधाति। अ॒ग्निहो॒त्रे  
दर्श॑पूर्णमा॒सयोः॑। प॒शुब॒न्धे चा॑तुर्मा॒स्येषु॑। अथो॑ आहुः। सर्वेषु॑ यज्ञ॒क्रतु॑ष्विति॑। अथ॑  
ह स्मा॒हारु॑णः स्वा॒यम्भु॑वः। सा॒वि॒त्रः सर्वो॑ऽग्निरि॒त्यन॑नुषङ्गं म॒न्याम॑हे। नाना॒ वा  
ए॒तेषां॑ वी॒र्या॑णि। क॒म॒ग्निं चि॑नुते॥१०७॥

स॒त्रि॒यम॒ग्निं चि॑न्वा॒नः। क॒म॒ग्निं चि॑नुते। सा॒वि॒त्रम॒ग्निं चि॑न्वा॒नः। क॒म॒ग्निं चि॑नुते।

ना॒चि॒के॒त॒म॒ग्निं चि॒न्वा॒नः। क॒म॒ग्निं चि॒नु॒ते। चा॒तु॒र्हो॒त्रि॒य॒म॒ग्निं चि॒न्वा॒नः। क॒म॒ग्निं चि॒नु॒ते। वै॒श्व॒सृ॒ज॒म॒ग्निं चि॒न्वा॒नः। क॒म॒ग्निं चि॒नु॒ते॥१०८॥

उ॒पा॒नु॒वा॒क्य॑मा॒शु॒म॒ग्निं चि॒न्वा॒नः। क॒म॒ग्निं चि॒नु॒ते। इ॒म॒मा॒रु॒ण॒के॒तु॒क॒म॒ग्निं चि॒न्वा॒न इति॑। वृषा॒ वा अ॒ग्निः। वृषा॑णौ स॒ङ् स्फा॑लयेत्। ह॒न्येता॑स्य य॒ज्ञः। तस्मा॑न्नानुष॒ज्यः। सो॒त्तर॑वे॒दिषु॑ ऋ॒तुषु॑ चिन्वीत। उ॒त्तर॑वे॒द्याः ह्य॑ग्निश्ची॒यते॑। प्र॒जाका॑मश्चिन्वीत॥१०९॥

प्रा॒जा॒प॒त्यो वा ए॒षोऽग्निः॑। प्रा॒जा॒प॒त्याः प्र॒जाः। प्र॒जावा॑न् भवति। य ए॒वं वेद॑। प॒शुका॑मश्चिन्वीत। सं॒ज्ञानं॑ वा ए॒तत् प॑शूनाम्। यदापः॑। प॒शूनामे॒व सं॒ज्ञाने॑ऽग्निं चि॒नु॒ते। प॒शुमा॑न् भवति। य ए॒वं वेद॑॥११०॥

वृ॒ष्टि॑का॒मश्चि॒न्वीत॑। आपो॒ वै वृ॒ष्टिः। प॒र्जन्यो॒ वर्षु॑को भवति। य ए॒वं वेद॑। आ॒म॒या॒वी चि॒न्वीत॑। आपो॒ वै भे॑ष॒जम्। भे॒ष॒जमे॒वास्मै॑ करोति। सर्व॒मायु॑रेति। अ॒भि॒चर॑श्चिन्वीत। वज्रो॒ वा आपः॑॥१११॥

वज्र॑मे॒व भ्रातृ॑व्येभ्यः प्र॒हर॑ति। स्तृ॒णु॒त ए॒नम्। तेज॑स्कामो॒ यश॑स्कामः।

ब्रह्मवर्चसकामः स्वर्गकामश्चिन्वीत। एतावद्वा वाँऽस्ति। यावदेतत्। यावदेवास्ति। तदवर्नुधे। तस्यैतद्वृतम्। वर्षति न धावेत्॥११२॥

अमृतं वा आपः। अमृतस्यानन्तरित्यै। नाप्सु मूत्रपुरीषं कुर्यात्। न निष्ठीवेत्। न विवसनः स्नायात्। गुह्यो वा एषोऽग्निः। एतस्याग्नेरनतिदाहाय। न पुष्करपर्णानि हिरण्यं वाऽधितिष्ठेत्। एतस्याग्नेरनभ्यारोहाय। न कूर्मस्याश्रीयात्। नोदकस्याघातुंकान्येनमोदकानि भवन्ति। अघातुंका आपः। य एतमग्निं चिनुते। य उचैनमेवं वेद॥११३॥

[२६]

इमानुकं भुवना सीषधेम। इन्द्रश्च विश्वे च देवाः। यज्ञं च नस्तन्वं च प्रजां च। आदित्यैरिन्द्रः सह सीषधातु। आदित्यैरिन्द्रः सगणो मरुद्भिः। अस्माकं भूत्वविता तनूनाम्। आप्लवस्व प्रप्लवस्व। आण्डीभवज मा मुहुः। सुखादीन्दुःखनिधनाम्। प्रतिमुश्चस्व स्वां पुरम्॥११४॥

मरीचयः स्वायम्भुवाः। ये शरीराण्यकल्पयन्। ते ते देहं कल्पयन्तु। मा च ते ख्यास्मं तीरिषत्। उत्तिष्ठत् मा स्वप्त। अग्निमिच्छध्वं भारताः। राज्ञः सोमस्य

तृप्तासः। सूर्येण सयुजोषसः। युवा सुवासाः। अष्टाचक्रा नवद्वारा॥११५॥

देवानां पूरयोध्या। तस्यां हिरण्मयः कोशः। स्वर्गो लोको ज्योतिषाऽऽवृतः।  
यो वै तां ब्रह्मणो वेद। अमृतेनाऽऽवृतां पुरीम्। तस्मै ब्रह्म च ब्रह्मा च। आयुः  
कीर्तिं प्रजां ददुः। विभ्राजमानां हरिणीम्। यशसा सम्प्रीवृताम्। पुरं हिरण्मयीं  
ब्रह्मा॥११६॥

विवेशाऽपराजिता। पराडेत्यज्यामयी। पराडेत्यनाशकी। इह चामुत्र चान्वेति।  
विद्वान्देवासुरानुभयान्। यत्कुमारी मन्द्रयते। यद्योषिद्यत्पतिव्रता। अरिष्टं यत्किं च  
क्रियते। अग्निस्तदनुवेधति। अश्रुतासः श्रुतासश्च॥११७॥

यज्वानो येऽप्ययज्वनः। स्वर्यन्तो नापेक्षन्ते। इन्द्रमग्निं च ये विदुः। सिकता  
इव संयन्ति। रश्मिभिः समुदीरिताः। अस्माल्लोकादमुष्माच्च। ऋषिभिरदात्पृश्निभिः।  
अपेतं वीतं वि च सर्पतातः। येऽत्र स्थ पुराणा ये च नूतनाः। अहोभिरद्विरक्तु-  
भिर्यत्तम्॥११८॥

य॒मो द॑दात्वव॒सान॑मस्मै। नृ मु॑णन्तु नृपा॒त्वर्यः॑। अ॒कृ॒ष्टा ये च॒ कृ॒ष्टजाः॑। कु॒मारी॑षु  
क॒नीनी॑षु। जा॒रिणी॑षु च॒ ये हि॒ताः। रे॒तः पी॒ता आ॒ण्डपी॑ताः। अ॒ङ्गारे॑षु च॒ ये हु॒ताः।  
उ॒भया॑न् पु॒त्रपौ॑त्र॒कान्। यु॒वेऽहं॑ य॒मराज॑गान्। श॒तमि॒न्नु श॒रदः॑॥११९॥

अ॒दो य॒द्वह्म॑ विल॒बम्। पि॒तृणां॑ च॒ य॒मस्य॑ च। वरु॑णस्याश्विनो॒रग्नेः॑। म॒रुता॑ च  
वि॒हाय॑साम्। का॒मप्र॑यव॒णं मे॑ अस्तु। स ह्यै॒वास्मि॑ स॒नात॑नः। इति॑ नाको ब्र॒ह्मिश्र॑वो  
रा॒यो ध॒नम्। पु॒त्राना॑पो दे॒वीरि॒हाऽऽहि॑त॥१२०॥ [२७]

विशी॑र्ष्णीं गृध्र॑शीर्ष्णीं च। अपे॒तो निर्ऋ॑तिः ह॒थः। परि॑बाधः श्वे॒तकु॑क्षम्।  
नि॒जङ्घ॑ः श॒बलो॑दरम्। स॒ तान् वा॒च्याय॑या स॒ह। अ॒ग्ने नाश॑य स॒न्दृशः॑।  
ई॒र्ष्यासू॑ये बु॒भुक्षा॑म्। म॒न्युं कृ॒त्यां च॑ दी॒धिरे। रथे॑न कि॒शुका॑व॒ता। अ॒ग्ने नाश॑य  
स॒न्दृशः॑॥१२१॥ [२८]

प॒र्जन्या॑य॒ प्रगा॑यत। दि॒वस्पु॑त्राय॒ मी॒ढुषे॑। स नो॑ य॒वस॑मिच्छतु। इ॒दं वचः॑  
प॒र्जन्या॑य॒ स्व॒राजे॑। हृ॒दो अ॒स्त्वन्त॑र॒न्तद्यु॑योत। म॒योभू॑र्वातो वि॒श्वकृ॑ष्टयः सन्त्व॒स्मे।



सुपिप्पला ओषधीर्देवगोपाः। यो गर्भमोषधीनाम्। गवाँ कृणोत्यर्वताम्। पर्जन्यः  
पुरुषीणाम्॥१२२॥\_\_\_\_\_ [२९]

पुनर्मामैत्विन्द्रियम्। पुनरायुः पुनर्भगः। पुनर्ब्राह्मणमैतु मा। पुनर्द्रविणमैतु  
मा। यन्मेऽद्य रेतः पृथिवीमस्कान्। यदोषधीरप्यसंरद्यदापः। इदं तत्पुनराददे।  
दीर्घायुत्वाय वर्चसे। यन्मे रेतः प्रसिच्यते। यन्म आजायते पुनः। तेन माममृतं  
कुरु। तेन सुप्रजसं कुरु॥१२३॥\_\_\_\_\_ [३०]

अद्ध्यस्तिरोऽधाऽजायत। तव वैश्रवणः सदा। तिरोऽधेहि सपत्नान्नः। ये  
अपोऽश्रन्ति केचन। त्वाष्ट्रीं मायां वैश्रवणः। रथं सहस्रवन्धुरम्। पुरुश्चक्रं  
सहस्राश्वम्। आस्थायायाहि नो बलिम्। यस्मै भूतानि बलिमावंहन्ति। धनं गावो  
हस्ति हिरण्यमश्वान्॥१२४॥

असाम सुमतौ यज्ञियस्य। श्रियं बिभ्रतोऽन्नमुखीं विराजम्। सुदर्शने च  
क्रौञ्चे च। मेनागे च महागिरौ। शतद्वाटारगमन्ता। संहार्यं नगरं तव। इति

मन्त्राः। कल्पोऽत ऊर्ध्वम्। यदि बलिः हरेत्। हिरण्यनाभये वितुदये कौबेरायायं बलिः॥१२५॥

सर्वभूताधिपतये नम इति। अथ बलिः हत्वोपतिष्ठेत। क्षत्रं क्षत्रं वैश्रवणः। ब्राह्मणा वयः स्मः। नमस्ते अस्तु मा मां हिंसीः। अस्मात्प्रविश्यान्नमद्धीति। अथ तमग्निमादधीत। यस्मिन्नेतत्कर्म प्रयुञ्जीत। तिरोऽधा भूः। तिरोऽधा भुवः॥१२६॥

तिरोऽधाः स्वः। तिरोऽधा भूर्भुवः स्वः। सर्वेषां लोकानामाधिपत्ये सीदेति। अथ तमग्निमिन्धीत। यस्मिन्नेतत्कर्म प्रयुञ्जीत। तिरोऽधा भूः स्वाहा। तिरोऽधा भुवः स्वाहा। तिरोऽधाः स्वः स्वाहा। तिरोऽधा भूर्भुवः स्वः स्वाहा। यस्मिन्नस्य काले सर्वा आहुतीर्हुता भवेयुः॥१२७॥

अपि ब्राह्मणमुखीनाः। तस्मिन्नहः काले प्रयुञ्जीत। परः सुप्तजनाद्वेपि। मास्म प्रमाद्यन्तमाध्यापयेत्। सर्वार्थाः सिद्ध्यन्ते। य एवं वेद। क्षुध्यन्निदमजानताम्। सर्वार्था न सिद्ध्यन्ते। यस्ते विघातुंको भ्राता। ममान्तरहृदये श्रितः॥१२८॥

तस्मा॑ इ॒मम॑ग्र॒पिण्डं॑ जु॒होमि॑ । स मे॑ऽर्था॒न्मा वि॑वंधीत् । मयि॒ स्वाहा॑ ।  
 रा॒जा॒धि॒रा॒जाय॑ प्रस॒ह्यसा॒हिने॑ । नमो॑ व॒यं वै॑श्रव॒णाय॑ कुर्महे । स मे॑  
 कामा॒न्काम॑कामा॒य मह्य॑म् । का॒मे॒श्वरो॑ वै॒श्रव॑णो द॒दातु॑ । कु॒बे॒राय॑ वै॒श्रव॑णाय ।  
 म॒हा॒रा॒जाय॑ नमः॑ । के॒तवो॑ अरु॒णास॑श्च । ऋ॒षयो॑ वात॑र॒शनाः॑ । प्र॒ति॒ष्ठा ५ श॒तधा॑ हि ।  
 स॒माहि॑तासो सह॒स्रधा॑य॒सम् । शि॒वा नः॑ शन्त॑मा भवन्तु । दि॒व्या आप॑ ओष॑धयः ।  
 सु॒मृ॒डीका॑ सर॑स्वति । मा ते॒ व्यो॑म स॒न्दृशि॑ ॥ १२९ ॥ \_\_\_\_\_ [३१]

संव॑त्सरमेत॑द्व॒तं चरेत्॑ । द्वौ वा मा॒सौ । नियमः॑ संमा॒सेन॑ । तस्मि॒न्नियम॑विशेषाः ।  
 त्रिष॑वणमुदको॑पस्पर्शी । चतु॑र्थकालपान॑भक्तुः स्यात् । अ॒हर॒हर्वा॑ भैक्ष॑मश्री॒यात् ।  
 औ॒दु॒म्बरी॑भिः समि॒द्धिरग्निं॑ परि॒चरेत्॑ । पुन॑र्मा॒मैत्त्वि॑न्द्रियमित्येतेना॒नुवा॑केन ।  
 उद्ध॑तपरिपू॒ताभि॑रद्भिः का॒र्यं कुर्वी॑त ॥ १३० ॥

अ॑सञ्चयवान् । अ॒ग्नये॑ वा॒यवे॑ सू॒र्याय॑ । ब्र॒ह्मणे॑ प्र॒जाप॑तये । च॒न्द्रम॑से नक्ष॒त्रेभ्यः॑ ।  
 ऋ॒तुभ्यः॑ सं॒वत्स॑रा॒य । वरु॑णायारु॒णाये॑ति व्र॑तहो॒माः । प्र॒व॒र्ग्यव॑दादेशः । अरु॒णाः

काण्डऋषयः। अरण्येऽधीयीन्। भद्रं कर्णेभिरिति द्वे जपित्वा॥१३१॥

महानाम्नीभिरुदकं सङ्स्पर्श्य। तमाचार्यो दद्यात्। शिवानः शन्तमेत्योषधीरालुभान्।  
सुमृडीकेति भूमिम्। एवमपवर्गे। धेनुर्दक्षिणा। कंसं वासंश्च क्षौमम्। अन्यद्वा  
शुक्लम्। यथाशक्ति वा। एवङ्स्वाध्यायधर्मेण। अरण्येऽधीयीत। तपस्वी पुण्यो  
भवति तपस्वी पुण्यो भवति॥१३२॥\_\_\_\_\_ [३२]

भद्रं कर्णेभिः शृणुयाम देवाः। भद्रं पश्येमाक्षभिर्यजत्राः। स्थिरैरङ्गैस्तुष्टुवाꣳ  
संस्तनूभिः। व्यशेम देवहितं यदायुः। स्वस्ति न इन्द्रो वृद्धश्रवाः। स्वस्ति नः पूषा  
विश्ववेदाः। स्वस्ति नस्तार्क्ष्यो अरिष्टनेमिः। स्वस्ति नो बृहस्पतिर्दधातु॥

॥ॐ शान्तिः शान्तिः शान्तिः॥

## ॥द्वितीयः प्रश्नः॥

ॐ नमो ब्रह्मणे नमो अस्त्वग्नये नमः पृथिव्यै नम ओषधीभ्यः। नमो वाचे  
नमो वाचस्पतये नमो विष्णवे बृहते करोमि॥ ॐ शान्तिः शान्तिः शान्तिः॥

सह वै देवानां चासुराणां च यज्ञौ प्रततावास्तां वयं स्वर्गं लोकमेष्यामो  
वयमेष्याम इति तेऽसुराः सन्नह्य सहसैवाचरन् ब्रह्मचर्येण तपसैव देवास्तेऽसुरा  
अमुह्यंस्ते न प्राजानंस्ते पराऽभवन्ते न स्वर्गं लोकमायन् प्रसृतो न वै  
यज्ञेन देवाः स्वर्गं लोकमायन् प्रसृतो नासुरान् पराभावयन् प्रसृतो ह वै  
यज्ञोपवीतिनो यज्ञोऽप्रसृतोऽनुपवीतिनो यत्किं च ब्राह्मणो यज्ञोपवीत्यधीते यजंत  
एव तत्तस्माद्यज्ञोपवीत्यैवाधीयीत याजयेद्यजंत वा यज्ञस्य प्रसृत्या अर्जिनं वासो  
वा दक्षिणत उपवीय दक्षिणं बाहुमुद्धरतेऽव धत्ते सव्यमिति यज्ञोपवीतमेतदेव  
विपरीतं प्राचीनावीतं संवीतं मानुषम्॥१॥\_\_\_\_\_ [१]

रक्षांसि ह वा पुरोऽनुवाके तपोग्रमतिष्ठन्त तान् प्रजापतिर्वरेणोपामन्त्रयत्  
तानि वरमवृणीताऽऽदित्यो नो योद्धा इति तान् प्रजापतिरब्रवीद्योधयध्वमिति

तस्मादुत्तिष्ठन्तु९ ह वा तानि रक्षाँस्यादित्यं योधयन्ति यावदस्तमन्वंगान्तानि  
ह वा एतानि रक्षाँसि गायत्रियाऽभिमन्त्रितेनाम्भसा शाम्यन्ति तदु ह वा एते  
ब्रह्मवादिनः पूर्वाभिमुखाः सन्ध्यायां गायत्रियाऽभिमन्त्रिता आप ऊर्ध्वं विक्षिपन्ति  
ता एता आपो वज्रीभूत्वा तानि रक्षाँसि मन्देहारुणे द्वीपे प्रक्षिपन्ति यत्प्रदक्षिणं  
प्रक्रमन्ति तेन पाप्मानमवधून्वन्त्युद्यन्तमस्तं यन्तम् आदित्यमभिध्यायन् कुर्वन्  
ब्राह्मणो विद्वान्थसकलं भद्रमश्रुतेऽसावादित्यो ब्रह्मेति ब्रह्मैव सन् ब्रह्माप्येति य  
एवं वेदः॥२॥\_\_\_\_\_ [२]

यद्देवा देवहेळनं देवासश्चक्रुमा वयम्। आदित्यास्तस्मान्मा मुञ्चतर्तस्यर्तेन  
मामित। देवा जीवनकाम्या यद्वाचाऽनृतमूदिम। तस्मान्न इह मुञ्चत विश्वे देवाः  
सजोषंसः। ऋतेन द्यावापृथिवी ऋतेन त्वँ सरस्वति। कृतान्नः पाह्येनसो यत्किं  
चानृतमूदिम। इन्द्राग्नी मित्रावरुणौ सोमो धाता बृहस्पतिः। ते नो मुञ्चन्त्वेनसो  
यदन्यकृतमारिम। सजातशँसादुत जामिशँसाञ्ज्यायंसः शँसादुत वा  
कनीयसः। अनाधृष्टं देवकृतं यदेनस्तस्मात् त्वमस्माञ्जातवेदो मुमुग्धि॥३॥

यद्वाचा यन्मनसा बाहुभ्यामूरुभ्यामष्टीवद्वा॑ शिश्रैर्यदनृतं चकृमा वयम्।  
 अग्निर्मा तस्मादेनसो गार्हपत्यः प्रमुञ्चतु चकृम यानि दुष्कृता। येन त्रितो  
 अर्णवान्निर्बभूव येन सूर्यं तमसो निर्मुमोच। येनेन्द्रो विश्वा अजहादरातीस्तेनाहं  
 ज्योतिषा ज्योतिरानशान आक्षि। यत्कुसीदमप्रतीत्तं मयेह येन यमस्य निधिना  
 चरामि। एतत्तदग्रे अनृणो भवामि जीवन्नेव प्रति तत्तं दधामि। यन्मयि माता  
 यदा पिपेष यदन्तरिक्षं यदाशसातिक्रामामि त्रिते देवा दिवि जाता यदाप इमं  
 मे वरुण तत्त्वा यामि त्वं नो अग्रे स त्वं नो अग्रे त्वमग्रे अयासि॥४॥—[३]

यददीव्यनृणमहं बभूवादिथ्सन्वा सञ्जगर जनैभ्यः। अग्निर्मा तस्मादिन्द्रश्च  
 संविदानौ प्रमुञ्चताम्। यद्धस्ताभ्यां चकर किल्बिषाण्यक्षाणां वृगुमुपजिघ्रमानः।  
 उग्रं पश्या च राष्ट्रभृच्च तान्यप्सरसावनुदत्तामृणानि। उग्रं पश्ये राष्ट्रभृत्किल्बिषाणि  
 यदक्षवृत्तमनुदत्तमेतत्। नेत्रं ऋणानृणव इथ्समानो यमस्य लोके अधिरञ्जुराय। अव  
 ते हेळ उदुत्तममिमं मे वरुण तत्त्वा यामि त्वं नो अग्रे स त्वं नो अग्रे। सङ्कुसुको

विकुसुको निर्ऋथो यश्च निस्वनः। तेऽ(१)स्मद्यक्ष्ममनांगसो दूरादूरमचीचतम्।  
 निर्यक्ष्ममचीचते कृत्यां निर्ऋतिं च। तेन योऽ(१)स्मथ्समृच्छातै तमस्मै  
 प्रसुवामसि। दुःश॒॑सानु॑श॒॒साभ्या॑ घ॒णेना॑नुघ॒णेन॑ च। तेनान्योऽ(१)स्मथ्समृच्छातै  
 तमस्मै प्रसुवामसि। सं वर्चसा॑ पयसा॑ सन्तनूभि॑रगन्महि मनसा॑ स॒ शिवे॑न।  
 त्वष्टा॑ नो अत्र विदधातु रा॒योऽनु॑मार्ष्टु त॒न्वो(१) यद्विलि॑ष्टम्॥५॥\_\_\_\_\_ [४]

आयु॑ष्टे विश्वतो॑ दधदयम॒ग्निर्वरे॑ण्यः। पुन॑स्ते प्रा॒ण आया॑ति॒ पराय॑क्ष्म॒ सुवामि॑  
 ते। आयु॑र्दा अ॒ग्ने ह॒विषो॑ जुषा॒णो घृ॒तप्र॑तीको घृ॒तयो॑निरेधि। घृ॒तं पी॒त्वा मधु॑ चारु॒  
 गव्यं॑ पि॒तेव॑ पु॒त्रम॒भिर॑क्षतादिमम्। इ॒मम॑ग्र आयु॑षे वर्च॑से कृधि ति॒ग्ममो॑जो वरुण॒  
 स॒ शि॑शाधि। मा॒तेवा॑स्मा अदि॒ते शर्म॑ यच्छु॒ विश्वे॑ देवा॒ जर॑दष्टिर्यथाऽस॑त्। अ॒ग्र  
 आयू॒॑षि पव॑स॒ आ सु॒वोर्ज॑मिषं च नः। आ॒रे बा॑धस्व दु॒च्छुना॑म्। अ॒ग्ने पव॑स्व  
 स्वपा॑ अ॒स्मे वर्चः॑ सु॒वीर्य॑म्। दध॑द्र॒यि मयि॑ पोषम्॥६॥



अ॒ग्नि॒र्ऋ॒षिः प॒व॒मानः॑ पा॒ञ्च॒जन्यः॑ पु॒रोहि॑तः। त॒र्मी॒महे॑ म॒हाग॒यम्।  
 अ॒ग्ने॑ जा॒तान्प्र॑णु॒दा नः॑ स॒पत्नान्प्र॑त्यजा॒ताञ्जा॑तवे॒दो नु॑दस्व। अ॒स्मे दी॑दिहि  
 सु॒मना॑ अहे॒ळच्छ॑र्मन्ते स्याम त्रि॒वरू॑थ उ॒द्धौ। सह॑सा जा॒तान्प्र॑णु॒दा नः॑  
 स॒पत्नान्प्र॑त्यजा॒ताञ्जा॑तवे॒दो नु॑दस्व। अधि॑ नो ब्रू॒हि सु॒मन॒स्यमा॑नो व॒यं॑ स्या॒म  
 प्र॑णु॒दा नः॑ स॒पत्नान्। अ॒ग्ने यो नो॑ऽभि॒तो ज॒नो वृ॒को वा॒रो जि॒घांस॑ति। तां॑स्त्वं  
 वृ॒त्रहं॑ जहि॒ वस्व॑स्मभ्य॒माभ॑र। अ॒ग्ने यो नो॑ऽभि॒दास॑ति॒ समा॑नो यश्च॒ निष्ठ्यः॑। तं  
 व॒यं॑ स॒मिधं॑ कृ॒त्वा तु॒भ्यम॒ग्नेऽपि॑ दध्मसि॥७॥

यो नः॑ श॒पाद॑श॒पतो॑ यश्च॒ नः॑ श॒पतः॑ श॒पात्। उ॒षाश्च॒ तस्मै॑ नि॒मृक्क॒ सर्वं॑ पा॒पं  
 स॒मूह॑ताम्। यो नः॑ स॒पत्नो॑ यो र॒णो म॒र्तोऽभि॑दास॑ति दे॒वाः। इ॒ध्मस्ये॑व प्र॒क्षाय॑तो  
 मा तस्योच्छे॑षि किं च॒न। यो मां॑ द्वेष्टि॒ जात॑वे॒दो यं चा॒हं द्वेष्मि॑ यश्च॒ माम्।  
 सर्वा॑ं॒स्तान्म॑ग्ने स॒न्दह॑ यांश्चा॒हं द्वेष्मि॑ ये च॒ माम्। यो अ॒स्मभ्य॑म॒राती॒याद्य॑श्च॒ नो  
 द्वेष्टे॑ ज॒नः। नि॒न्दा॒द्यो अ॒स्मान्दि॒प्साच्च॑ सर्वा॑ं॒स्तान्म॑ष्म॒षा कुरु॑। स॒ंशितं॑ मे॒

ब्रह्म स॒ंशितं वी॒र्या(१)म्बलम्। स॒ंशितं क्ष॒त्रं मे जि॒ष्णु यस्या॒हमस्मि॑ पुरोहि॑तः।  
 उदे॑षां बा॒हू अ॑तिर॒मुद्वर्चो॑ अथो बलम्। क्षि॒णोमि॑ ब्रह्म॑णा॒ऽमित्रा॑नु॒न्नयामि॑ स्वा(१)म्  
 अ॒हम्। पुन॑र्मनः पुन॒रायु॑र्म आगा॒त्पुन॑श्चक्षुः पुनः श्रोत्रं म॒ आगा॒त्पुनः॑ प्रा॒णः पुन॑राकू॒तं  
 म॒ आगा॒त्पुन॑श्चित्तं पुन॒राधी॑तं म॒ आगा॑त्। वैश्वान॒रो मेऽद॑ब्धस्तनूपा अव॑बाधतां  
 दुरि॑तानि वि॒श्वा॥८॥

[५]

वैश्वान॒राय॑ प्रति॑वेदयामो यदी॑नृ॒णः स॑ङ्ग॒रो दे॒वता॑सु। स ए॒तान्पाशा॑न् प्र॒मुच॑न्  
 प्रवे॑द् स नो॑ मुञ्चातु दुरि॑तादव॒द्यात्। वैश्वान॒रः पव॑यान्नः प॒वित्रैर्य॑त्सं॒ङ्गर॑म॒भिधा॑वा॒म्याशा॑न्  
 अना॑जान॒न्मन॑सा॒ याच॑मानो यदत्रै॒नो अव॑ तत्सु॑वामि। अ॒मी ये सु॒भगे॑ दि॒वि  
 वि॒चृतौ॑ नाम॒ तार॑के। प्रे॒हामृ॑तस्य यच्छ॒तामे॒तद्व॒द्धक॑मोच॑नम्। विजि॑ही॒र्ष  
 लो॒कान्कृ॑धि ब॒न्धान्मु॑ञ्चासि ब॒द्धक॑म्। योने॑रिव प्रच्यु॑तो गर्भः सर्वा॑न् पथो अ॒नुष्व।  
 स प्र॑जा॒नन्प्रति॑गृ॒णीत॑ वि॒द्वान्प्रजा॑पतिः प्रथ॑म॒जा ऋ॒तस्य॑। अ॒स्माभि॑र्दत्तं ज॒रसः॑  
 पर॑स्ता॒दच्छि॑न्नं तन्तु॑मनुस॒ञ्चरे॑म॥९॥

त॒तं त॒न्तु॒मन्वे॒के॒ अनु॒ सञ्च॑रन्ति॒ येषां॑ द॒त्तं पि॒त्र्य॒माय॑नवत्। अ॒ब॒न्ध्वे॒के॒ दद॑तः  
 प्र॒यच्छा॑दातुं॒ चेच्छ॑क्र॒वा॒ऽसः॑ स्व॒र्ग ए॑षाम्। आर॑भे॒था॒मनु॒ स॒र॑भे॒था॒ऽस॒मानं॑  
 पन्था॑मवथो घृ॒तेन॑। यद्वा॑ पू॒र्तं परि॑विष्टं॒ यद॒ग्नौ तस्मै॑ गो॒त्राये॒ह जा॒याप॑ती  
 स॒र॑भे॒थाम्। यद॒न्तरि॑क्षं पृथि॒वीमु॑त द्वां यन्मा॒तरं पि॒तरं॑ वा जिहि॑ऽसि॒म।  
 अ॒ग्नि॒र्मा तस्मा॑दे॒नसो॒ गार्ह॑पत्य॒ उन्नो॑ नेषदु॒रिता॒ यानि॑ चकृ॒म। भूमि॑र्मा॒ताऽदि॑तिर्नो  
 ज॒नित्रं॒ भ्राता॑ऽन्तरि॑क्षम॒भिशा॑स्त ए॒नः। द्यौर्नः॑ पि॒ता पि॑तृ॒याच्छं भ॑वासि जा॒मि  
 मि॒त्वा मा वि॑वि॒त्सि लो॒कात्। यत्र॑ सु॒हार्दः॑ सु॒कृतो॒ मद॑न्ते वि॒हाय॒ रोगं॑  
 त॒न्वा(१)॑ऽ॒ स्वाया॑म्। अ॒श्लो॒णाङ्गैर॑हु॒ताः स्व॒र्गे तत्र॑ प॒श्येम पि॒तरं॑ च पु॒त्रम्।  
 यद॒न्नम॑द्यन्तेन दे॒वा दा॑स्यन्नदा॑स्यन्नु॒त वा॑ करि॒ष्यन्। यद्दे॒वानां॑ चक्षु॒ष्यागो॒ अस्ति॒  
 यदे॒व किं च॑ प्रतिज॒ग्राह॑म॒ग्नि॒र्मा तस्मा॑दनृ॒णं कृ॑णोतु। यद॒न्नम॑द्वि॒ बहु॑धा वि॒रूपं॑  
 वा॒सो हि॑र॒ण्यमु॑त गा॒म॒जाम॑विम्। यद्दे॒वानां॑ चक्षु॒ष्यागो॒ अस्ति॒ यदे॒व किं च॑  
 प्रतिज॒ग्राह॑म॒ग्नि॒र्मा तस्मा॑दनृ॒णं कृ॑णोतु। य॒न्मया॑ म॒नसा॑ वा॒चा कृ॑त॒मेनः॑ कदा॒चन॑।

सर्वस्मात्तस्मान्मेळितो मोग्धि त्वं हि वेत्थं यथातथम्॥१०॥\_\_\_\_\_ [६]

वातरशना ह वा ऋषयः श्रमणा ऊर्ध्वमन्थिनो बभूवुस्तानृषयोऽर्थमायुःस्ते  
 निलायमचरुःस्तेऽनुप्रविशुः कूश्माण्डानि ताःस्तेष्वन्वविन्दच्छ्रद्धया च  
 तपसा च तानृषयोऽब्रुवन्कथा निलायं चरथेति त ऋषीनब्रुवन्नमो वोऽस्तु  
 भगवन्तोऽस्मिन्धाम्नि केन वः सपर्यामेति तानृषयोऽब्रुवन्पवित्रं नो ब्रूत  
 येनारेपसः स्यामेति त एतानि सूक्तान्यपश्यन् यद्देवा देवहेळनं यददीव्यन्नृणमहं  
 बभूवाऽऽयुष्टे विश्वतो दधदित्येतैराज्यं जुहुत वैश्वानराय प्रतिवेदयाम इत्युपतिष्ठत  
 यदर्वाचीनमेनो भ्रूणहत्यायास्तस्मान्मोक्ष्यध्व इति त एतैरजुहवुस्तेऽरेपसो-  
 ऽभवन्कर्मादिष्वेतैर्जुहयात्पूतो देवलोकान्धसमंश्रुते॥११॥\_\_\_\_\_ [७]

कूश्माण्डैर्जुह्याद्योऽपूत इव मन्येत यथा स्तेनो यथा भ्रूणहैवमेष  
 भवति योऽयोनौ रेतः सिञ्चति यदर्वाचीनमेनो भ्रूणहत्यायास्तस्मान्मुच्यते  
 यावदेनो दीक्षामुपैति दीक्षित एतैः संतति जुहोति संवत्सरं दीक्षितो

भ॒वति॑ सं॒वत्स॒रादे॒वाऽऽत्मा॑नं पु॒नीते॑ मा॒सं दी॒क्षितो॑ भ॒वति॑ यो मा॒सः  
 स सं॒वत्स॒रः सं॒वत्स॒रादे॒वाऽऽत्मा॑नं पु॒नीते॑ चतुर्विं॒शति॑ रा॒त्रीर्दी॒क्षितो॑  
 भ॒वति॑ चतुर्विं॒शति॑रर्धमा॒साः सं॒वत्स॒रः सं॒वत्स॒रादे॒वाऽऽत्मा॑नं पु॒नीते॑ द्वा॒दश॑  
 रा॒त्रीर्दी॒क्षितो॑ भ॒वति॑ द्वा॒दश॑ मा॒साः सं॒वत्स॒रः सं॒वत्स॒रादे॒वाऽऽत्मा॑नं पु॒नीते॑  
 षड्रा॒त्रीर्दी॒क्षितो॑ भ॒वति॑ षड्वा ऋ॒तवः॑ सं॒वत्स॒रः सं॒वत्स॒रादे॒वाऽऽत्मा॑नं पु॒नीते॑  
 ति॒स्रो रा॒त्रीर्दी॒क्षितो॑ भ॒वति॑ त्रि॒पदा॑ गा॒यत्री॑ गा॒यत्रि॒या ए॒वाऽऽत्मा॑नं पु॒नीते॑  
 न मा॒सं॒ समं॑ श्रि॒या॒न्न स्त्रि॒यमु॒पे॒या॒न्नोप॒र्या॑सीत् जु॒गुप्से॑तानृ॒तात्प॒यो ब्रा॒ह्म॒णस्य॑  
 व्र॒तं य॒वा॒गू रा॒ज॒न्य॑स्याऽऽ॒मिक्षा॑ वै॒श्य॒स्याथो॑ सौ॒म्ये॒प्यध्व॑र ए॒तद्व्र॑तं ब्रू॒याद्य॑दि  
 म॒न्ये॒तोप॑दस्या॒मीत्यो॑दनं धा॒नाः स॒क्तून् घृ॑तमित्यनु॒व्रत॑येदा॒त्मनो॑ऽनु॒पदा॑साय ॥१२॥

[८]

अ॒जान् ह॒ वै पृ॒श्नीं॑ स्तप॒स्यमा॑नान् ब्र॒ह्मं स्वय॑म्भ॒वभ्या॑न॒र्षत्त॑ ऋ॒षयो॑ऽभ॒वन्त॑ दृ॒षीणा॑म्  
 तां दे॒वता॑मु॒पाति॑ष्ठन्त॒ यज्ञ॑का॒मास्त॑ ए॒तं ब्र॑ह्म॒यज्ञ॑म॒पश्य॑न्तमा॒हर्न्ते॑ना॒यज॑न्त॒  
 यदृ॒चोऽध्य॑गी॒षत् ताः प॑य॒आहु॑तयो दे॒वाना॑म॒भव॑न् यद्य॒जूंषि॑ घृ॒ताहु॑तयो

यथ्सामानि सोमाहुतयो यदथर्वाङ्गिरसो मध्वाहुतयो यद्वाह्मणानीतिहासान्  
 पुराणानि कल्पान्गाथा नाराश॑सीर्मेदाहुतयो देवानांमभवन्ताभिः क्षुधं पाप्मानम-  
 पाघ्नन्नपहतपाप्मानो देवाः स्वर्गं लोकमायन् ब्रह्मणः सायुज्यमृषयोऽगच्छन्॥१३॥[९]

पञ्च वा एते महायज्ञाः सन्ति प्रतायन्ते सन्ति सन्तिष्ठन्ते देवयज्ञः  
 पितृयज्ञो भूतयज्ञो मनुष्ययज्ञो ब्रह्मयज्ञ इति यदग्नौ जुहोत्यपि समिधं तद्देवयज्ञः  
 सन्तिष्ठते यत्पितृभ्यः स्वधा करोत्यप्यपस्तत्पितृयज्ञः सन्तिष्ठते यद्भूतेभ्यो बलिः  
 हरति तद्भूतयज्ञः सन्तिष्ठते यद्वाह्मणेभ्योऽन्नं ददाति तन्मनुष्ययज्ञः सन्तिष्ठते  
 यथ्स्वाध्यायमधीयीतैकामप्युचं यजुः सामं वा तद्ब्रह्मयज्ञः सन्तिष्ठते यदृचोऽधीते  
 पयंसः कूल्या अस्य पितृन्स्वधा अभिवहन्ति यद्यजूंषि घृतस्य कूल्या  
 यथ्सामानि सोमं एभ्यः पवते यदथर्वाङ्गिरसो मधोः कूल्या यद्वाह्मणानीतिहासान्  
 पुराणानि कल्पान्गाथा नाराश॑सीर्मेदसः कूल्या अस्य पितृन्स्वधा अभिवहन्ति  
 यदृचोऽधीते पयंआहुतिभिरेव तद्देवाः स्तर्पयति यद्यजूंषि घृताहुतिभिर्यथ्सामानि  
 सोमाहुतिभिर्यदथर्वाङ्गिरसो मध्वाहुतिभिर्यद्वाह्मणानीतिहासान् पुराणानि

कल्पा॒न्गाथा॑ नारा॒शः॒सी॒र्म॒दाहु॑तिभि॒रे॒व तद्दे॒वाः॒स्त॑र्पयति॒ त ए॑नं तृ॒प्ता आयु॑षा  
तेज॑सा॒ वर्च॑सा श्रि॒या यश॑सा ब्रह्म॒वर्च॑सेना॒न्नाद्ये॑न च तर्पयन्ति॥१४॥\_\_\_\_\_ [१०]

ब्रह्म॒य॒ज्ञेन॑ य॒क्ष्यमा॑णः प्रा॒च्यां दि॒शि ग्रा॒माद॑छ॒दिर्द॑र्श उदी॒च्यां प्रा॒गुदी॒च्यां  
वो॒दितं॑ आ॒दित्ये॑ दक्षि॒णत॑ उ॒प॒वीयो॑प॒विश्य॑ ह॒स्ता॒वव॑निज्य॒ त्रिरा॑चा॒मेद्विः प॑रि॒मृज्य॑  
स॒कृदु॑प॒स्पृश्य॑ शि॒रश्चक्षु॑षी॒ नासि॑के॒ श्रोत्रे॑ हृद॒यमा॑ल॒भ्य॒ यत्रि॑रा॒चाम॑ति॒ तेन॑ ऋचः  
प्री॒णाति॑ यद्विः प॑रि॒मृज॑ति॒ तेन॑ यजू॑षि॒ यत्स॒कृदु॑प॒स्पृश॑ति॒ तेन॑ सा॒मानि॑ यत्स॒व्यं  
पा॒णिं पा॒दौ प्रो॑क्षति॒ यच्छि॑र॒श्चक्षु॑षी॒ नासि॑के॒ श्रोत्रे॑ हृद॒यमा॑ल॒भते॑ तेनाथ॒र्वाङ्गि॑रसो॒  
ब्राह्म॒णानी॑तिहा॒सान् पु॑रा॒णानि॑ कल्पा॒न्गाथा॑ नारा॒शः॒सीः प्री॑णाति॒ दर्भा॑णां  
म॒हदु॑प॒स्तीर्यो॑प॒स्थं कृ॒त्वा प्रा॒डासी॑नः स्वाध्यायमधी॒यीता॑पां वा ए॒ष ओष॑धीनाः  
रसो॒ यद्दर्भाः॑ सर॒समे॑व ब्रह्म॑ कुरुते दक्षि॒णोत्त॑रौ पा॒णी पा॒दौ कृ॒त्वा स॒प॒वित्रा॑वोमिति॒  
प्रति॑पद्यत ए॒तद्वै यजु॑स्त्रयीं वि॒द्यां प्रत्ये॑षा वागे॒तत्प॑रम॒क्षरं॑ तदे॒तदृ॒चाऽभ्यु॑क्तमृ॒चो  
अ॒क्षरे॑ प॒रमे॑ व्योम॒न् यस्मि॑न्दे॒वा अधि॑ विश्वे॑ निषे॒दुर्य॑स्तन्न वेद् किमृ॒चा क॑रिष्यति॒

य इत्तद्विदुस्त इमे समासत् इति त्रीनेव प्रायुङ्क्त भूर्भुवः स्वरित्याहैतद्वै वाचः सत्यं  
यदेव वाचः सत्यं तत्प्रायुङ्क्तं सावित्रीं गायत्रीं त्रिरन्वाह पच्छोऽर्धर्चशोऽनवान्  
सविता श्रियः प्रसविता श्रियमेवाऽऽप्रोत्यथो प्रज्ञातयैव प्रतिपदा छन्दांसि  
प्रतिपद्यते॥१५॥ \_\_\_\_\_[११]

ग्रामे मनसा स्वाध्यायमधीयीत् दिवा नक्तं वेति ह स्माऽऽह शौच आह्वेय  
उतारण्येऽबलं उत वाचोत तिष्ठन्नुत व्रजन्नुताऽऽसीन उत शयानोऽधीयीतैव  
स्वाध्यायं तपस्वी पुण्यो भवति य एवं विद्वान्स्वाध्यायमधीते नमो ब्रह्मणे नमो  
अस्त्वग्नये नमः पृथिव्यै नम ओषधीभ्यः। नमो वाचे नमो वाचस्पतये नमो  
विष्णवे बृहते करोमि॥१६॥ \_\_\_\_\_[१२]

मध्यन्दिने प्रबलमधीयीतासौ खलु वावैष आदित्यो यद्वाह्मणस्तस्मात्तरहि  
तेऽक्षिणं तपति तदेषाऽभ्युक्ता। चित्रं देवानामुदगादनीकं चक्षुर्मित्रस्य  
वरुणस्याग्नेः। आऽप्रा द्यावापृथिवी अन्तरिक्षं सूर्य आत्मा जगतस्तस्थुषश्चेति



स वा ए॒ष य॒ज्ञः स॒द्यः प्र॒ताय॑ते स॒द्यः स॒न्तिष्ठ॑ते तस्य॒ प्राक् सा॒यम॑वभृ॒थो नमो॑  
ब्रह्म॑ण॒ इति॑ परिधा॒नीयां॑ त्रिरन्वा॑हाप॒ उप॒स्पृश्य॑ गृ॒हाने॑ति॒ ततो॑ यत्किं च॒ ददा॑ति॒  
सा दक्षि॑णा॥१७॥ \_\_\_\_\_[१३]

तस्य॒ वा ए॒तस्य॑ य॒ज्ञस्य॑ मे॒घो ह॒विर्धानं॑ वि॒द्युद॒ग्निर्व॒ष्पः ह॒विः स्त॑नयि॒तुर्व॑ष॒ङ्कारो॑  
यद॑व॒स्फूर्ज॑ति॒ सोऽनु॑वष॒ङ्कारो॑ वा॒युरा॒त्माऽमा॑वा॒स्यां स्वि॑ष्ट॒कृद्य॑ एवं वि॒द्वान्मे॒घे  
व॒र्षति॑ वि॒द्योत॑माने स्त॒नय॑त्यव॒स्फूर्ज॑ति॒ पव॑माने वा॒याव॑मावा॒स्याया॑ः  
स्वा॒ध्याय॑मधी॒ते तप॑ ए॒व तत्त॑प्यते॒ तपो॑ हि स्वा॒ध्याय॑ इत्यु॒त्तमं॑ नाकः॑ रोह॒त्युत्त॑मः  
स॒मा॒नाना॑ भवति॒ याव॑न्तः॑ ह॒ वा इ॒मां वि॒त्तस्य॑ पूर्णां दद॑त्स्वर्गं लो॒कं ज॑यति॒  
ताव॑न्तं लो॒कं ज॑यति॒ भूया॑ः॒सं चाक्ष॑र्य्यं चाप॑ पुन॒र्मृत्युं॑ ज॑यति॒ ब्रह्म॑णः सायु॑ज्यं  
गच्छ॑ति॥१८॥ \_\_\_\_\_[१४]

तस्य॒ वा ए॒तस्य॑ य॒ज्ञस्य॑ द्वाव॑न॒ध्यायौ॑ यदा॒त्माऽशु॑चिर्य॒द्देशः॑ समृ॑द्धिर्दे॒वतानि॑  
य॒ एवं वि॒द्वान्म॑हारा॒त्र उ॒षस्यु॑दि॒ते व्रज॑ः॒ स्तिष्ठ॑न्नासी॒नः शया॑नोऽरण्ये॑ ग्रामे॒

वा यावत्तरसः॑ स्वाध्यायमधी॑ते सर्वा॑ल्लो॒काञ्ज॑यति॒ सर्वा॑ल्लो॒कान॑नृ॒णोऽनु॒-  
 सञ्च॑रति॒ तदेषा॑भ्यु॒क्ता। अ॒नृ॒णा अ॒स्मिन्न॑नृ॒णाः पर॑स्मि॒ऽस्तृ॒तीये॑ लो॒के अ॑नृ॒णाः  
 स्या॑म। ये दै॒व्याना॑ उ॒त पि॑तृ॒याणाः सर्वा॑न्य॒थो अ॑नृ॒णा आक्षी॑येमेत्य॒ग्निं  
 वै जा॒तं पा॒प्मा ज॑ग्राह॒ तं दे॒वा आहु॑तीभिः पा॒प्मान॑मपा॑घ्नन्नाहु॑तीनां  
 य॒ज्ञेन॑ य॒ज्ञस्य॑ दक्षि॑णाभिर्दक्षि॑णानां ब्राह्म॑णेन॑ ब्राह्म॑णस्य॒ छन्दो॑भिश्छन्द॑साः  
 स्वाध्या॒येनाप॑हतपाप्मा स्वाध्या॒यो दे॒वप॑वित्रं वा ए॒तत्तं योऽनू॑त्सृ॒जत्य॑भा॒गो  
 वाचि॑ भ॒वत्य॑भा॒गो ना॒के तदेषा॑भ्यु॒क्ता। यस्ति॒त्याज॑ सखि॒विदः॑ सखा॒यं न  
 तस्य॑ वा॒च्यपि॑ भा॒गो अ॑स्ति। यदी॑ः शृ॒णोत्य॒लकः॑ शृ॒णोति॑ न हि प्र॒वेदं  
 सुकृ॑तस्य॒ पन्था॑मिति॒ तस्मा॑त्स्वाध्या॒योऽध्यै॑त॒व्यो यं यं कृ॑तुमधी॑ते तेन॑ तेनास्येष्टं  
 भ॒वत्य॑ग्नेर्वा॒योरा॑दित्यस्य॒ सायु॑ज्यं गच्छति॒ तदेषा॑भ्यु॒क्ता। ये अ॒र्वाङ्मु॑त वा पुरा॑णे  
 वेदं वि॒द्वाःसं॑म॒भितो॑ वदन्त्यादि॒त्यमे॒व ते परि॑वदन्ति॒ सर्वे॑ अ॒ग्निं द्वि॒तीयं॑ तृ॒तीयं॑ च  
 ह॒ःसमि॑ति॒ याव॑ती॒र्वे दे॒वता॒स्ताः सर्वा॑ वेद॒विदि॑ ब्राह्म॑णे व॑सन्ति॒ तस्मा॑द्ब्राह्म॑णेभ्यो

वेदविद्भ्यो दिवे दिवे नमस्कुर्यान्नाश्लीलं कीर्तयेदेता एव देवताः प्रीणाति॥१९॥  
[१५]

रिच्यंत इव वा एष प्रेव रिच्यते यो याजयति प्रति वा गृह्णाति  
याजयित्वा प्रतिगृह्य वाऽनश्नन्निः स्वाध्यायं वेदमधीयीत त्रिरात्रं वा सावित्रीं  
गायत्रीमन्वातिरेचयति वरो दक्षिणा वरेणैव वरः स्पृणोत्यात्मा हि वरः॥२०॥  
[१६]

दुहे ह वा एष छन्दांसि यो याजयति स येन यज्ञक्रतुना याजयेत्सोऽरण्यं  
परेत्यं शुचौ देशे स्वाध्यायमेवैनमधीयन्नासीत तस्यानशनं दीक्षा स्थानमुपसद  
आसनं सुत्या वाग्जुहूर्मन उपभृद्धृतिर्ध्रुवा प्राणो हविः सामाध्वर्युः स वा एष  
यज्ञः प्राणदक्षिणोऽनन्तदक्षिणः समृद्धतरः॥२१॥ [१७]

कतिधावकीर्णी प्रविशति चतुर्थेत्याहुर्ब्रह्मवादिनो मरुतः प्राणैरिन्द्रं बलेन  
बृहस्पतिं ब्रह्मवर्चसेनाग्निमेवेतरेण सर्वेण तस्यैतां प्रायश्चित्तिं विदां चकार  
सुदेवः काश्यपो यो ब्रह्मचार्यवकिरेदमावास्यायां रात्र्यामग्निं प्रणीयोपसमाधाय

द्विराज्यस्योपघातं जुहोति कामावकीर्णोऽस्म्यवकीर्णोऽस्मि काम कामाय  
 स्वाहा कामाभिद्रुग्धोऽस्म्यभिद्रुग्धोऽस्मि काम कामाय स्वाहेत्यमृतं वा  
 आज्यममृतमेवाऽऽत्मन्धत्ते हुत्वा प्रयताञ्जलिः कवातिर्यङ्मुग्निमभिमन्त्रयेत् सं  
 माऽऽसिञ्चन्तु मरुतः समिन्द्रः सं बृहस्पतिः। सं माऽयमग्निः सिञ्चत्वायुषा च  
 बलेन चाऽऽयुष्मन्तं करोत् मेति प्रति हास्मै मरुतः प्राणान्दधति प्रतीन्द्रो बलं प्रति  
 बृहस्पतिर्ब्रह्मवर्चसं प्रत्यग्निरितरथ्सर्वं सर्वतनुर्भूत्वा सर्वमायुरेति त्रिरभिमन्त्रयेत्  
 त्रिषत्या हि देवा योऽपूत इव मन्येत स इत्थं जुहुयादित्थमभिमन्त्रयेत् पुनीत  
 एवाऽऽत्मानमायुरेवाऽऽत्मन्धत्ते वरो दक्षिणा वरेणैव वरं स्पृणोत्यात्मा हि  
 वरः॥२२॥ [१८]

भूः प्रपद्ये भुवः प्रपद्ये स्वः प्रपद्ये भूर्भुवः स्वः प्रपद्ये ब्रह्म प्रपद्ये ब्रह्मकोशं  
 प्रपद्येऽमृतं प्रपद्येऽमृतकोशं प्रपद्ये चतुर्जालं ब्रह्मकोशं यं मृत्युर्नावपश्यति तं  
 प्रपद्ये देवान् प्रपद्ये देवपुरं प्रपद्ये परीवृतो वरीवृतो ब्रह्मणा वर्मणाऽहं तेजसा

कश्यपस्य यस्मै नमस्तच्छिरो धर्मो मूर्धानं ब्रह्मोत्तरा हनुर्यज्ञोऽधरा विष्णुरहदयः  
 संवत्सरः प्रजननमश्विनौ पूर्वपादावत्रिर्मध्यं मित्रावरुणावपरपादावग्निः पुच्छस्य  
 प्रथमं काण्डं तत इन्द्रस्ततः प्रजापतिरभयं चतुर्थं स वा एष दिव्यः शांकरः  
 शिशुमारस्तः ह य एवं वेदाप पुनर्मृत्युं जयति जयति स्वर्गं लोकं नाध्वनि प्रमीयते  
 नाप्सु प्रमीयते नाग्नौ प्रमीयते नानपत्यः प्रमीयते लघ्वान्नो भवति ध्रुवस्त्वमसि  
 ध्रुवस्य क्षितमसि त्वं भूतानामधिपतिरसि त्वं भूतानां श्रेष्ठोऽसि त्वां भूतान्युप  
 पर्यावर्तन्ते नमस्ते नमः सर्वं ते नमो नमः शिशुकुमाराय नमः॥२३॥ —[१९]

नमः प्राच्यै दिशे याश्च देवता एतस्यां प्रतिवसन्त्येताभ्यश्च नमो नमो  
 दक्षिणायै दिशे याश्च देवता एतस्यां प्रतिवसन्त्येताभ्यश्च नमो नमः प्रतीच्यै  
 दिशे याश्च देवता एतस्यां प्रतिवसन्त्येताभ्यश्च नमो नम उदीच्यै दिशे याश्च  
 देवता एतस्यां प्रतिवसन्त्येताभ्यश्च नमो नम ऊर्ध्वायै दिशे याश्च देवता एतस्यां  
 प्रतिवसन्त्येताभ्यश्च नमो नमोऽधरायै दिशे याश्च देवता एतस्यां प्रतिवसन्त्येताभ्यश्च

नमो॑ नमो॑ऽवान्त॒रायै॑ दि॒शे याश्च॑ दे॒वता॑ ए॒तस्यां॑ प्र॒ति॒वस॑न्त्ये॒ताभ्यं॑श्च॒ नमो॑ नमो॑  
 गङ्गा॑यमु॒नयो॑र्मध्ये॒ ये वस॑न्ति॒ ते मे प्र॑सन्नात्मानश्चिरं जी॒वितं॑ वर्धय॒न्ति॒ नमो॑  
 गङ्गा॑यमु॒नयो॑र्मुनि॒भ्यश्च॒ नमो॑ नमो॑ गङ्गा॑यमु॒नयो॑र्मुनि॒भ्यश्च॒ नमः॥२४॥ —[२०]

ॐ नमो॑ ब्रह्म॑णे॒ नमो॑ अ॒स्त्व॒ग्नये॒ नमः॑ पृथि॒व्यै नम॑ ओष॑धी॒भ्यः। नमो॑ वा॒चे  
 नमो॑ वा॒चस्प॑त॒ये नमो॑ विष्ण॑वे बृ॒हते॑ क॒रोमि॥

॥ॐ शान्तिः॒ शान्तिः॒ शान्तिः॑॥

## ॥ तृतीयः प्रश्नः ॥

ॐ तच्छुं योरावृणीमहे। गातुं यज्ञाय। गातुं यज्ञपतये। दैवीः स्वस्तिरस्तु नः।  
स्वस्तिर्मानुषेभ्यः। ऊर्ध्वं जिगातु भेषजम्। शं नो अस्तु द्विपदै। शं चतुष्पदे। ॐ  
शान्तिः शान्तिः शान्तिः॥

चित्तिः स्रुक्। चित्तमाज्यम्। वाग्वेदिः। आधीतं बर्हिः। केतो अग्निः।  
विज्ञातमग्निः। वाक्पतिर्होता। मन उपवक्ता। प्राणो हविः। सामाध्वर्युः। वाचस्पते  
विधे नामन्। विधेम ते नाम। विधेस्त्वमस्माकं नाम। वाचस्पतिः सोमं पिबतु।  
आऽस्मासु नृम्णन्धाथस्वाहा॥१॥ अध्वर्युः पञ्च च॥ [१]

पृथिवी होता। द्यौरध्वर्युः। रुद्रोऽग्नीत्। बृहस्पतिरुपवक्ता। वाचस्पते वाचो  
वीर्येण। सम्भृततमेनायक्ष्यसे। यजमानाय वार्यम्। आसुवस्करस्मै। वाचस्पतिः  
सोमं पिबतु। जजन्दिन्द्रमिन्द्रियाय स्वाहा॥२॥ पृथिवी होता दश॥ [२]

अग्निर्होता। अश्विनाध्वर्यू। त्वष्टाऽग्नीत्। मित्र उपवक्ता। सोमः सोमस्य

पुरो॒गाः। शु॒क्रः शु॒क्रस्य॑ पुरो॒गाः। श्रा॒तास्तं॑ इन्द्र॒ सोमाः॑। वा॒तापे॑र्हवन्श्रुतः॒  
स्वाहा॑॥ ३॥ अ॒ग्निर्हो॑ताऽष्टौ॥ \_\_\_\_\_[३]

सूर्यं॑ ते चक्षुः॑। वा॒तं प्रा॒णः। द्यां पृ॒ष्ठम्। अ॒न्तरि॑क्षमा॒त्मा। अ॒ङ्गैर्य॑ज्ञम्। पृ॒थि॒वी५  
शरी॑रैः। वाच॑स्पतेऽच्छि॑द्रया वा॒चा। अ॒च्छि॑द्रया जु॒ह्वा॑। दि॒वि दे॒वावृ॑ध॒५ हो॒त्रा  
मे॒रय॑स्व॒ स्वाहा॑॥ ४॥ सूर्यं॑ ते न॒वं॥ \_\_\_\_\_[४]

म॒हाह॑विर्होता॑। स॒त्यह॑विर्ध्व॒र्युः। अ॒च्यु॑तपाजा अ॒ग्नीत्। अ॒च्यु॑तमना उपव॒क्ता।  
अ॒नाधृ॑ष्यश्चा॑प्रतिधृ॑ष्यश्च॑ य॒ज्ञस्या॑भिग॒रौ। अ॒यास्य॑ उ॒द्गा॒ता। वाच॑स्पते ह॒द्विधे॑  
नामन्। वि॒धेम॑ ते॒ नाम॑। वि॒धेस्त्वम॑स्माकं॒ नाम॑। वा॒चस्प॑तिः सोम॑मपात्। मा  
दै॒व्यस्तन्तु॑श्छेदि॒ मा म॑नुष्यः॑। नमो॑ दि॒वे। नमः॑ पृ॒थि॒व्यै स्वाहा॑॥ ५॥ अ॒पा॒त्रीणि॑ च॥ \_\_\_\_\_[५]

वा॒ग्घो॒ता॑। दी॒क्षा प॒त्नी॑। वा॒तोऽध्व॑र्युः। आ॒पोऽभि॑गरः। मनो॑ ह॒विः। तप॑सि  
जुहो॑मि। भूर्भुवः॑ सु॒वः। ब्रह्म॑ स्वय॒म्भु। ब्रह्म॑णे स्वय॒म्भुवे॑ स्वाहा॑॥ ६॥ वा॒ग्घो॒ता न॒वं॥ [६]

ब्रा॒ह्मण॑ एक॑होता। स य॒ज्ञः। स मे॑ ददातु प्र॒जां प॒शून्पु॑ष्टिं यशः॑। य॒ज्ञश्च॑ मे



भूयात्। अग्निर्द्विहोता। स भर्ता। स मे ददातु प्रजां पशून्पुष्टिं यशः। भर्ता च मे भूयात्। पृथिवी त्रिहोता। स प्रतिष्ठा॥७॥

स मे ददातु प्रजां पशून्पुष्टिं यशः। प्रतिष्ठा च मे भूयात्। अन्तरिक्षं चतुर्होता। स विष्ठाः। स मे ददातु प्रजां पशून्पुष्टिं यशः। विष्ठाश्च मे भूयात्। वायुः पञ्चहोता। स प्राणः। स मे ददातु प्रजां पशून्पुष्टिं यशः। प्राणश्च मे भूयात्॥८॥

चन्द्रमाः षड्होता। स ऋतून्कल्पयाति। स मे ददातु प्रजां पशून्पुष्टिं यशः। ऋतवश्च मे कल्पन्ताम्। अन्नं सप्तहोता। स प्राणस्य प्राणः। स मे ददातु प्रजां पशून्पुष्टिं यशः। प्राणस्य च मे प्राणो भूयात्। द्यौरष्टहोता। सौऽनाधृष्यः॥९॥

स मे ददातु प्रजां पशून्पुष्टिं यशः। अनाधृष्यश्च भूयासम्। आदित्यो नवहोता। स तेजस्वी। स मे ददातु प्रजां पशून्पुष्टिं यशः। तेजस्वी च भूयासम्। प्रजापतिर्दशहोता। स इदं सर्वम्। स मे ददातु प्रजां पशून्पुष्टिं यशः। सर्वं च मे भूयात्॥१०॥ प्रतिष्ठा प्राणश्च मे भूयादनाधृष्यः सर्वं च मे भूयात्॥

अ॒ग्निर्य॒जुर्भिः॑। स॒वि॒ता स्तो॒मैः॑। इन्द्रं॑ उक्थाम॒दैः॑। मि॒त्रावरु॑णावाशिषा॑।  
 अ॒ङ्गिर॒सो धि॒ष्णि॒यैर्ग॒भिः॑। मरु॑तः स॒दोह॒वि॒र्धाना॒भ्याम्। आपः॑ प्रोक्ष॑णीभिः।  
 ओष॑धयो ब॒र्हिषा॑। अ॒दि॒तिर्वे॒द्या॑। सोमो॑ दी॒क्षया॑॥११॥

त्वष्ट्रे॒ध्मेन॑। विष्णु॑र्य॒ज्ञेन॑। वस॑व आ॒ज्येन॑। आ॒दि॒त्या दक्षि॑णाभिः। वि॒श्वे दे॒वा  
 ऊ॒र्जा। पू॒षा स्व॑गाक॒रेण॑। बृ॒ह॒स्पतिः॑ पु॒रो॒धया॑। प्र॒जाप॑तिरु॒द्गी॒थेन॑। अ॒न्तरि॑क्षं  
 प॒वित्रे॑ण। वा॒युः पात्रैः॑। अ॒ह॒ः श्रद्ध॑या॥१२॥ दी॒क्षया॑ पात्रै॑र॒कं च॑॥ [८]

से॒नेन्द्र॑स्य। धे॒ना बृ॒ह॒स्पतेः॑। प॒त्न्या पू॒ष्णः॑। वा॒गवा॒योः। दी॒क्षा सोम॑स्य।  
 पृ॒थि॒व्य॒ग्नेः। वसू॑नां गा॒य॒त्री। रु॒द्राणां॑ त्रि॒ष्टुक्। आ॒दि॒त्यानां॑ जग॑ती।  
 विष्णो॑रनु॒ष्टुक्॥१३॥

वरु॑णस्य वि॒राट्। य॒ज्ञस्य॑ प॒ङ्क्तिः॑। प्र॒जाप॑तेरनु॒मतिः॑। मि॒त्रस्य॑ श्रद्धा॑। स॒वि॒तुः  
 प्रसू॑तिः। सूर्य॑स्य म॒रीचिः॑। च॒न्द्रम॑सो रोहि॒णी। ऋ॒षी॒णाम॑रुन्ध॒ती। प॒र्जन्य॑स्य वि॒द्युत्।  
 चत॑स्रो दि॒शः। चत॑स्रोऽवा॒न्तर॑दि॒शाः। अ॒हश्च॑ रा॒त्रिश्च॑। कृ॒षिश्च॑ वृ॒ष्टिश्च॑। त्वि॒षिश्चा॒-

पंचितिश्च। आपश्चौषधयश्च। ऊर्क् सूनृतां च देवानां पत्नयः॥१४॥ अनुष्टुप्दिशः षट्॥—[९]

देवस्य त्वा सवितुः प्रसवे। अश्विनोर्बाहुभ्याम्। पूष्णो हस्ताभ्यां प्रतिगृह्णामि। राजा त्वा वरुणो नयतु देवि दक्षिणेऽग्नये हिरण्यम्। तेनामृतत्वमंश्याम्। वयो दात्रे। मयो मह्यमस्तु प्रतिग्रहीत्रे। क इदं कस्मा अदात्। कामः कामाय। कामो दाता॥१५॥

कामः प्रतिग्रहीता। कामः समुद्रमाविश। कामेन त्वा प्रतिगृह्णामि। कामैतत्ते। एषा ते काम दक्षिणा। उत्तानस्त्वाङ्गीरसः प्रतिगृह्णातु। सोमाय वासः। रुद्राय गाम्। वरुणायाश्वम्। प्रजापतये पुरुषम्॥१६॥

मनवे तल्पम्। त्वष्ट्रेऽजाम्। पूष्णेऽविम्। निर्ऋत्या अश्वतरगर्द्भौ। हिमवतो हस्तिनम्। गन्धर्वाप्सराभ्यः स्रगलं करणे। विश्वेभ्यो देवेभ्यो धान्यम्। वाचेऽन्नम्। ब्रह्मण ओदनम्। समुद्रायाऽऽपः॥१७॥

उत्तानायाङ्गीरसायानः। वैश्वानराय रथम्। वैश्वानरः प्रत्नथा नाकमारुहत्।

दिवः पृष्ठं भन्दमानः सुमन्मभिः। स पूर्ववज्जनयञ्जन्तवे धनम्। समानमज्जा  
परियाति जागृविः। राजा त्वा वरुणो नयतु देवि दक्षिणे वैश्वानराय रथम्।  
तेनामृतत्वमश्याम्। वयो दात्रे। मयो मह्यमस्तु प्रतिग्रहीत्रे॥१८॥

क इदं कस्मा अदात्। कामः कामाय। कामो दाता। कामः प्रतिग्रहीता।  
कामः समुद्रमा विश। कामेन त्वा प्रतिगृह्णामि। कामैतत्ते। एषा ते काम दक्षिणा।  
उत्तानस्त्वाङ्गीरसः प्रतिगृह्णातु॥१९॥ दाता पुरुषमपः प्रतिग्रहीत्रे नवं च॥ [१०]

सुवर्णं घर्मं परिवेद वेनम्। इन्द्रस्याऽऽत्मानं दशधा चरन्तम्। अन्तः संमुद्रे  
मनसा चरन्तम्। ब्रह्मान्वविन्ददशहोतारमर्णे। अन्तः प्रविष्टः शास्ता जनानाम्।  
एकः सन्बहुधा विचारः। शतः शुक्राणि यत्रैकं भवन्ति। सर्वे वेदा यत्रैकं भवन्ति।  
सर्वे होतारो यत्रैकं भवन्ति। समानसीन आत्मा जनानाम्॥२०॥

अन्तः प्रविष्टः शास्ता जनानां सर्वात्मा। सर्वाः प्रजा यत्रैकं भवन्ति।  
चतुर्होतारो यत्र सम्पदं गच्छन्ति देवैः। समानसीन आत्मा जनानाम्। ब्रह्मेन्द्रमग्निं

जग॑तः प्र॒ति॒ष्ठाम्। दि॒व आ॒त्मानं॑ स॒वि॒तारं॑ बृ॒ह॒स्प॒तिम्। चतु॑र्हो॒तारं॑ प्र॒दि॒शोऽनु॑  
 क्लृ॒प्तम्। वा॒चो वी॒र्यं॑ तप॒साऽन्व॑विन्दत्। अ॒न्तः प्र॒वि॒ष्टं क॒र्तार॑मे॒तम्। त्वष्टा॑रं॒ रू॒पाणि॑  
 वि॒कुर्व॑न्तं वि॒प॒श्चि॒म्॥ २१॥

अ॒मृत॑स्य प्रा॒णं य॒ज्ञमे॒तम्। चतु॑र्हो॒तृणा॒मा॒त्मानं॑ क॒वयो॑ निचि॑क्युः। अ॒न्तः  
 प्र॒वि॒ष्टं क॒र्तार॑मे॒तम्। दे॒वानां॑ ब॒न्धु नि॒हितं॑ गुहा॑सु। अ॒मृते॑न क्लृ॒प्तं य॒ज्ञमे॒तम्।  
 चतु॑र्हो॒तृणा॒मा॒त्मानं॑ क॒वयो॑ निचि॑क्युः। श॒तं नि॒युतः॑ परि॑वेद॒ विश्वा॑ वि॒श्ववा॑रः।  
 वि॒श्वमि॑दं वृ॒णाति॑। इन्द्र॑स्याऽऽत्मा नि॒हितः॑ प॒ञ्च॒हो॒ता। अ॒मृतं॑ दे॒वाना॑मायुः  
 प्र॒जाना॑म्॥ २२॥

इन्द्र॑ः राजा॑नं स॒वि॒तार॑मे॒तम्। वा॒योरा॒त्मानं॑ क॒वयो॑ निचि॑क्युः। र॒श्मिं  
 र॑श्मी॒नां मध्ये॑ तप॑न्तम्। ऋ॒तस्य॑ प॒दे क॒वयो॑ निपा॑न्ति। य आ॑ण्डको॒शे भुव॑नं बि॒भर्ति॑।  
 अ॒नि॒र्भि॒ण्णः॑ सन्न॑थ॒ लोकान्॑ वि॒चष्टे॑। यस्य॑ऽऽण्डको॒शं शुष्म॑मा॒हुः प्रा॒णमु॒ल्बम्।  
 तेन॑ क्लृ॒प्तोऽमृ॑ते॒ना॒हम॑स्मि। सु॒वर्णं॑ को॒शं रज॑सा॒ परी॑वृतम्। दे॒वानां॑ व॒सुधा॑नीं

विराजम्॥२३॥

अमृतस्य पूर्णान्तामु कलां विचक्षते। पादः षड्भितुर्न किलाविविधसे। येनर्तवः पञ्चधोत क्लृप्ताः। उत वा षड्धा मनसोत क्लृप्ताः। तः षड्भितारमृतुभिः कल्पमानम्। ऋतस्य पदे कवयो निपान्ति। अन्तः प्रविष्टं कर्तारमेतम्। अन्तश्चन्द्रमसि मनसा चरन्तम्। सहैव सन्तं न विजानन्ति देवाः। इन्द्रस्याऽऽत्मानः शतधा चरन्तम्॥२४॥

इन्द्रो राजा जगतो य ईशे। सप्तहोता सप्तधा विकृष्टः। परेण तन्तुं परिषिच्यमानम्। अन्तरादित्ये मनसा चरन्तम्। देवानां हृदयं ब्रह्मान्वविन्दत्। ब्रह्मेतद्ब्रह्मण उज्जभार। अर्कः श्रोतन्तः सरिरस्य मध्ये। आ यस्मिन्सप्त परेवः। मेहन्ति बहुलाः श्रियम्। बह्वश्वामिन्द्र गोमतीम्॥२५॥

अच्युतां बहुलाः श्रियम्। स हरिर्वसुवित्तमः। पेरुरिन्द्राय पिन्वते। बह्वश्वामिन्द्र गोमतीम्। अच्युतां बहुलाः श्रियम्। मह्यमिन्द्रो नियच्छतु। शतः शता अस्य

युक्ता हरीणाम्। अर्वाडा यातु वसुभी रश्मिरिन्द्रः। प्रमहमाणो बहुलाः श्रियम्।  
रश्मिरिन्द्रः सविता मे नियच्छतु॥२६॥

घृतं तेजो मधुमदिन्द्रियम्। मय्ययमग्निर्दधातु। हरिः पतङ्गः पटरी सुपर्णः।  
दिविक्षयो नभसा य एति। स न इन्द्रः कामवरं ददातु। पश्चारं चक्रं परिवर्तते  
पृथु। हिरण्यज्योतिः सरिरस्य मध्ये। अजस्रं ज्योतिर्नभसा सर्पदेति। स न इन्द्रः  
कामवरं ददातु। सप्त युञ्जन्ति रथमेकचक्रम्॥२७॥

एको अश्वो वहति सप्तनामा। त्रिनाभिं चक्रमजरमनर्वम्। येनेमा विश्वा भुवनानि  
तस्थुः। भद्रं पश्यन्त उपसेदुरग्रे। तपो दीक्षामृषयः सुवर्विदः। ततः क्षत्रं बलमोजश्च  
जातम्। तदस्मै देवा अभि सन्नमन्तु। श्वेतः रश्मिं बोभुज्यमानम्। अपां नेतारं  
भुवनस्य गोपाम्। इन्द्रं निचिक्नुः परमे व्योमन्॥२८॥

रोहिणीः पिङ्गला एकरूपाः। क्षरन्तीः पिङ्गला एकरूपाः। शतः सहस्राणि  
प्रयुतानि नाव्यानाम्। अयं यः श्वेतो रश्मिः। परि सर्वमिदं जगत्। प्रजां

प॒शून्धना॑नि। अ॒स्माकं॑ ददातु। श्वेतो॑ र॒श्मिः परि॒ सर्वं॑ बभूव। सुव॒न्मह्यं॑ प॒शून्  
वि॒श्वरू॑पान्। प॒त॒ङ्गम॒क्तमसुर॑स्य मा॒यया॑॥२९॥

हृ॒दा प॑श्यन्ति॒ मन॑सा मनी॒षिणः॑। स॒मु॒द्रे अ॒न्तः क॒वयो॑ विच॑क्षते। मरी॑चीनां  
प॒दमि॑च्छन्ति वे॒धसः॑। प॒त॒ङ्गो वाचं॑ मन॑सा बिभर्ति। तां ग॑न्ध॒र्वोऽव॑द॒द्रर्भे॑ अ॒न्तः।  
तां द्योत॑मानाः॒ स्व॒र्यं मनी॑षाम्। ऋ॒तस्य॑ प॒दे क॒वयो॑ निपा॑न्ति। ये ग्रा॒म्याः प॒शवो॑  
वि॒श्वरू॑पाः। वि॒रूपाः॑ सन्तो॑ बहु॒धैक॑रूपाः। अ॒ग्निस्ता॑ अ॒ग्रे प्रमु॑मोक्तु दे॒वः॥३०॥

प्र॒जाप॑तिः प्र॒जया॑ संविदा॒नः। वी॒तः स्तु॑केस्तुके। यु॒वम॒स्मासु॑ निय॑च्छतम्। प्र  
प्र॑ य॒ज्ञप॑ति॒न्तिर। ये ग्रा॒म्याः प॒शवो॑ वि॒श्वरू॑पाः। वि॒रूपाः॑ सन्तो॑ बहु॒धैक॑रूपाः।  
तेषा॑ स॒प्ताना॑मिह रन्ति॑रस्तु। रा॒यस्पोषा॑य सुप्रजा॒स्त्वाय॑ सु॒वीर्या॑य। य आ॑र॒ण्याः  
प॒शवो॑ वि॒श्वरू॑पाः। वि॒रूपाः॑ सन्तो॑ बहु॒धैक॑रूपाः। वा॒युस्ता॑ अ॒ग्रे प्रमु॑मोक्तु दे॒वः।  
प्र॒जाप॑तिः प्र॒जया॑ संविदा॒नः। इडा॑यै सृ॒प्तं घृ॒तव॑च्चराच॒रम्। दे॒वा अन्व॑विन्द॒न्गुहा॑  
हि॒तम्। य आ॑र॒ण्याः प॒शवो॑ वि॒श्वरू॑पाः। वि॒रूपाः॑ सन्तो॑ बहु॒धैक॑रूपाः। तेषा॑



सप्तानामिह रन्तिरस्तु। रायस्पोषाय सुप्रजास्त्वाय सुवीर्याय॥३१॥ आत्मा जनां वि कुर्वन्तं  
विपश्चिं प्रजानां वसुधानां विराजं चरन्तं गोमतीं मे नियच्छुत्वेकचक्रं व्योमन्मायया देव एकरूपा अष्टौ च॥ [११]

सहस्रशीर्षा पुरुषः। सहस्राक्षः सहस्रपात्। स भूमिं विश्वतो वृत्वा।  
अत्यतिष्ठद्वशाङ्गुलम्। पुरुष एवेदं सर्वम्। यद्धृतं यच्च भव्यम्। उतामृतत्वस्येशानः।  
यदत्रेनातिरोहति। एतावानस्य महिमा। अतो ज्यायाश्च पूरुषः॥३२॥

पादोऽस्य विश्वा भूतानि। त्रिपादस्यामृतं दिवि। त्रिपादूर्ध्व उदैत्पुरुषः।  
पादोऽस्येहाभवात्पुनः। ततो विष्वङ्मक्रामत्। साशनानशने अभि। तस्माद्विराडजायत।  
विराजो अधि पूरुषः। स जातो अत्यरिच्यत। पश्चाद्भूमिमथो पुरः॥३३॥

यत्पुरुषेण हविषा। देवा यज्ञमतन्वत। वसन्तो अस्यासीदाज्यम्। ग्रीष्म इध्मः  
शरद्धविः। सप्तास्यासन्परिधयः। त्रिः सप्त समिधः कृताः। देवा यद्यज्ञं तन्वानाः।  
अबध्नन्पुरुषं पशुम्। तं यज्ञं बर्हिषि प्रौक्षन्। पुरुषं जातमग्रतः॥३४॥

तेन देवा अयजन्त। साध्या ऋषयश्च ये। तस्माद्यज्ञात्सर्वहुतः।

सम्भृतं पृषदाज्यम्। पशूँस्ताँश्चक्रे वायव्यान्। आरुण्यान्ग्राम्याश्च ये।  
तस्माद्यज्ञात्सर्वहुतः। ऋचः सामानि जज्ञिरे। छन्दाँसि जज्ञिरे तस्मात्।  
यजुस्तस्मादजायत॥३५॥

तस्मादश्वा अजायन्त। ये के चौभयादतः। गावो ह जज्ञिरे तस्मात्। तस्माज्जाता  
अजावयः। यत्पुरुषं व्यदधुः। कृतिधा व्यकल्पयन्। मुखं किमस्य कौ बाहू। कावूरू  
पादाबुच्येते। ब्राह्मणोऽस्य मुखमासीत्। बाहू राजन्यः कृतः॥३६॥

ऊरू तदस्य यद्वैश्यः। पद्भ्याँ शूद्रो अजायत। चन्द्रमा मनसो जातः। चक्षोः  
सूर्यो अजायत। मुखादिन्द्रश्चाग्निश्च। प्राणाद्वायुरजायत। नाभ्या आसीदन्तरिक्षम्।  
शीर्ष्णो द्यौः समवर्तत। पद्भ्याँ भूमिर्दिशः श्रोत्रात्। तथा लोकाँ अकल्पयन्॥३७॥

वेदाहमेतं पुरुषं महान्तम्। आदित्यवर्णं तमसस्तु पारे। सर्वाणि रूपाणि  
विचित्य धीरः। नामानि कृत्वाऽभिवदन् यदास्तै। धाता पुरस्ताद्यमुदाजहार। शक्रः  
प्रविद्वान्प्रदिशश्चतस्रः। तमेवं विद्वानमृत इह भवति। नान्यः पन्था अयनाय विद्यते।

य॒ज्ञेन॑ य॒ज्ञम॑यजन्त दे॒वाः। तानि॑ धर्मा॒णि प्रथ॑मान्या॒सन्। ते ह॒ नाकं॑ महि॒मानं॑  
सचन्ते। यत्र॒ पूर्वे॑ सा॒ध्याः सन्ति॑ दे॒वाः॥ ३८ ॥ पूरुषः पुरोऽग्रतोऽजायत कृतोऽकल्पयन्नासं द्वे च (ज्याग्रानधि पूरुषः।  
अन्यत्र पूरुषः॥)॥ [१२]

अ॒द्भ्यः सम्भू॑तः पृथि॒व्यै रसा॑च्च। वि॒श्वक॑र्मणः॒ सम॑वर्तताधि॑। तस्य॒ त्वष्टा॑  
वि॒दध॑द्रूपमे॒ति। तत्पु॑रुषस्य॒ विश्व॑माजा॒नम॑ग्रे॑। वेदा॒हमे॒तं पु॑रुषं म॒हान्त॑म्।  
आ॒दि॒त्यव॑र्णं॒ तम॑सः॒ पर॑स्तात्। तमे॒वं वि॒द्वान॒मृत॑ इ॒ह भ॑वति। नान्यः पन्था॑  
विद्य॑तेऽय॒नाय॑। प्र॒जाप॑तिश्चरति॒ गर्भे॑ अ॒न्तः। अ॒जाय॑मानो बहुधा विजा॑यते॥ ३९ ॥

तस्य॒ धीराः॒ परि॑जानन्ति॒ योनि॑म्। मरी॑चीनां प॒दमि॑च्छन्ति वे॒धसः॑। यो दे॒वेभ्य॑  
आत॑पति। यो दे॒वानां॑ पु॒रोहि॑तः। पूर्॒वो यो दे॒वेभ्यो॑ जा॒तः। नमो॑ रु॒चाय॒ ब्राह्म॑ये।  
रुचं॑ ब्रा॒ह्मं ज॒नय॑न्तः। दे॒वा अ॒ग्रे तद॑ब्रुवन्। यस्त्वै॒वं ब्रा॑ह्म॒णो वि॒द्यात्। तस्य॑ दे॒वा  
अस॑न्वशे॑। ह्रीश्च॑ ते ल॒क्ष्मीश्च॒ पत्यौ॑। अ॒होरा॒त्रे पा॒र्श्वे। नक्ष॑त्राणि रू॒पम्। अ॒श्विनौ  
व्यात्त॑म्। इ॒ष्टं म॑निषाण। अ॒मुं म॑निषाण। सर्वं म॑निषाण॥ ४० ॥ जायते वशं स च॥ [१३]

भ॒र्ता सन्ध्रि॒यमा॑णो बिभ॑र्ति। ए॒को दे॒वो ब॑हु॒धा नि॒विष्टः॑। य॒दा भा॒रं त॒न्द्रय॑ते  
स भ॑र्तु॒म्। नि॒धाय॑ भा॒रं पुन॑रस्त॒मेति॑। तमे॒व मृ॒त्युम॒मृतं॑ तमा॑हुः। तं भ॒र्तारं॑ तमु॑  
गो॒प्तार॑माहुः। स भ॒ृतो भ्रि॒यमा॑णो बिभ॑र्ति। य ए॒नं वेद॑ स॒त्येन॑ भ॑र्तु॒म्। स॒द्यो जा॒तमु॒त  
ज॑हात्ये॒षः। उ॒तो ज॒रन्तं॑ न ज॑हात्ये॒कम्॥४१॥

उ॒तो ब॒हूने॒कम॑ह॒र्जहार॑। अत॑न्द्रो दे॒वः सद॑मे॒व प्रा॑र्थः। यस्त॑द्वेद॒ यत॑ आब॒भूव॑।  
स॒न्धां च॒ या॑ स॒न्दधे॒ ब्रह्म॑णै॒षः। रम॑ते॒ तस्मि॑न्नु॒त जी॒र्णे श॒या॒ने। नैनं॑ ज॑हात्य॒हः  
सु पू॒र्व्येषु॑। त्वा॒मापो॑ अनु॒ सर्वा॑श्चर॒न्ति जा॒न॒तीः। व॒त्सं प॒यसा॑ पु॒ना॒नाः। त्वम॒ग्निः  
ह॒व्य॒वाह॑ स॒मि॒न्त्से। त्वं भ॒र्ता मा॑त॒रि॒श्वा प्र॒जाना॑म्॥४२॥

त्वं य॒ज्ञस्त्वमु॑वे॒वासि॑ सोमः॑। तव॑ दे॒वा ह॒वमा॑य॒न्ति॒ सर्वे॑। त्वमे॒कोऽसि॑  
ब॒हून॑नुप्रवि॑ष्टः। नम॑स्ते अस्तु सु॒हवो॑ म ए॒धि। नमो॑ वामस्तु शृ॒णुत॑ ह॒व मे॑।  
प्राणा॑पानावजि॒र स॒श्चर॑न्तौ। ह॒यामि॑ वा॒ ब्रह्म॑णा तू॒र्तमे॑तम्। यो मां द्वेष्टि॑ तं ज॑हितं  
यु॒वाना॑। प्राणा॑पानौ संवि॒दानौ॑ ज॑हितम्। अ॒मुष्या॑सु॒नामा॑ सङ्ग॑साथाम्॥४३॥

तं मे देवा ब्रह्मणा संविदानौ। वधाय दत्तं तमह९ हं नामि। असंज्ञजान सत  
 आबभूव। यं यं जजान स उ गोपो अस्य। यदा भारं तन्द्रयते स भर्तुम्।  
 परास्य भारं पुनरस्तमेति। तद्वै त्वं प्राणो अभवः। महान्भोगः प्रजापतेः। भुजः  
 करिष्यमाणः। यद्देवान्प्राणयो नव॥४४॥ एकं प्रजानां साथां नव॥ [१४]

हरि९ हरन्तमनुयन्ति देवाः। विश्वस्येशानं वृषभं मतीनाम्। ब्रह्म  
 सरूपमनुमेदमागात्। अयनं मा विवर्धीर्विक्रमस्व। मा छिदो मृत्यो मा  
 वधीः। मा मे बलं विवृहो मा प्रमोषीः। प्रजां मा मे रीरिष आयुरुग्र। नृचक्षसं  
 त्वा हविषा विधेम। सद्यश्चकमानाय। प्रवेपानाय मृत्यवै॥४५॥

प्रास्मा आशा अशृण्वन्। कामेनाजनयन्पुनः। कामेन मे काम आगात्।  
 हृदयाद्धृदयं मृत्योः। यदमीषामुदः प्रियम्। तदैतूपमामभि। परं मृत्यो अनु परेहि  
 पन्थाम्। यस्ते स्व इतरो देवयानात्। चक्षुष्मते शृण्वते ते ब्रवीमि। मा नः प्रजा९  
 रीरिषो मोत वीरान्। प्र पूर्व्यं मनसा वन्दमानः। नार्धमानो वृषभं चर्षणीनाम्। यः  
 प्रजानामेकराण्मानुषीणाम्। मृत्युं यजे प्रथमजामृतस्य॥४६॥ मृत्यवै वीरा९श्चत्वारि च॥ [१५]

त॒रणि॑र्वि॒श्वद॑र्शतो ज्योति॑ष्कृद॒सि सूर्य॑। वि॒श्वमा॑ भा॒सि रोच॑नम्।  
उ॒प॒या॒मगृ॑हीतोऽसि॒ सूर्या॑य त्वा॒ भ्राज॑स्वत ए॒ष ते॒ योनिः॑ सूर्या॑य त्वा॒  
भ्राज॑स्वते॥४७॥ \_\_\_\_\_[१६]

आ प्या॑यस्व मदि॒न्तम् सोम॑ वि॒श्वाभि॑रू॒तिभिः॑। भवा॑ नः स॒प्रथ॑स्तमः॥४८॥  
\_\_\_\_\_ [१७]

ई॒युष्टे॑ ये पू॒र्वतरा॑मप॑श्यन् व्यु॒च्छन्ती॑मु॒षसं॑ म॒र्त्यासः॑। अ॒स्माभि॑रू॒ नु  
प्र॑ति॒चक्ष्या॑ऽभू॒दो ते य॑न्ति॒ ये अ॑प॒रीषु॑ प॒श्यान्॑॥४९॥ \_\_\_\_\_[१८]

ज्योति॑ष्मतीं त्वा सादयामि ज्योति॑ष्कृतं त्वा सादयामि ज्योति॑र्विदं त्वा  
सादयामि॒ भास्व॑तीं त्वा सादयामि॒ ज्वल॑न्तीं त्वा सादयामि॒ मल्मला॑भ॒वन्तीं॑ त्वा  
सादयामि॒ दीप्य॑मानां त्वा सादयामि॒ रोच॑मानां त्वा सादया॒म्यज॑स्रां त्वा सादयामि  
बृ॒हज्यो॑तिषं त्वा सादयामि बो॒धय॑न्तीं त्वा सादयामि॒ जाग्र॑तीं त्वा सादयामि॥५०॥  
\_\_\_\_\_ [१९]

प्र॒या॒साय॑ स्वाहा॑ऽऽया॒साय॑ स्वाहा॑ वि॒या॒साय॑ स्वाहा॑ सं॒या॒साय॑ स्वाहो॑द्या॒साय॑

स्वाहा॑ऽवया॒साय॒ स्वाहा॑ शु॒चे स्वाहा॑ शोका॒य स्वाहा॑ तप्य॒त्वै स्वाहा॑ तप॑ते स्वाहा॑  
ब्रह्म॒हत्यायै॒ स्वाहा॑ सर्व॑स्मै स्वाहा॑॥५१॥ \_\_\_\_\_[२०]

चित्त॑ः स॒न्ताने॑न भ॒वं य॒क्रा रु॒द्रन्तनि॑म्ना पशु॒पति॑ः स्थूल॒हृदये॑नाग्निः  
हृद॑येन रु॒द्रं लोहि॑तेन श॒र्वं म॒तस्त्रा॑भ्यां महादे॒वम॒न्तः पा॑र्श्वेनौषिष्ठ॒हनः॑  
शिङ्गी॑निको॒श्याभ्या॑म्॥५२॥ \_\_\_\_\_[२१]

तच्छ्रं॑ योरावृ॑णीमहे। गा॒तुं य॒ज्ञाय॑। गा॒तुं य॒ज्ञप॑तये। दैवीः॑ स्व॒स्तिर॑स्तु नः।  
स्व॒स्तिर्मानु॑षेभ्यः। ऊ॒र्ध्वं जि॑गातु भेष॒जम्। शं नो॑ अस्तु द्वि॒पदे॑। शं चतु॑ष्पदे। ॐ  
शान्तिः॑ शान्तिः॑ शान्तिः॑॥



## ॥चतुर्थः प्रश्नः॥

नमो वाचे या चोदिता या चानुदिता तस्यै वाचे नमो नमो वाचे नमो  
वाचस्पतये नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः  
परादुर्माहमृषीन्मन्त्रकृतो मन्त्रपतीन्परादां वैश्वदेवीं वाचमुद्यासः शिवामदस्तां जुष्टां  
देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च  
शर्म ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो  
वदिष्ये ब्रह्म वदिष्ये सत्यं वदिष्ये तस्मा अहमिदमुपस्तरणमुपस्तृण उपस्तरणं मे  
प्रजायै पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं  
प्राणापानौ मा मा हासिष्टं मधुं मनिष्ये मधुं जनिष्ये मधुं वक्ष्यामि मधुं वदिष्यामि  
मधुमतीं देवेभ्यो वाचमुद्यासः शुश्रूषेण्यां मनुष्येभ्यस्तं मा देवा अंवन्तु शोभायै  
पितरोऽनुमदन्तु। ॐ शान्तिः शान्तिः शान्तिः॥

नमो वाचे या चोदिता या चानुदिता तस्यै वाचे नमो नमो वाचे नमो



वाचस्पतये नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः  
 परादुर्माहमृषीन्मन्त्रकृतो मन्त्रपतीन्परादां वैश्वदेवीं वाचमुद्यासः शिवामदस्तां जुष्टां  
 देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च  
 शर्म ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो  
 वदिष्ये ब्रह्म वदिष्ये सत्यं वदिष्ये तस्मा अहमिदमुपस्तरणमुपस्तृण उपस्तरणं मे  
 प्रजायै पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं  
 प्राणापानौ मा मा हासिष्टं मधुं मनिष्ये मधुं जनिष्ये मधुं वक्ष्यामि मधुं वदिष्यामि  
 मधुमतीं देवेभ्यो वाचमुद्यासः शुश्रूषेण्यां मनुष्येभ्यस्तं मा देवा अंवन्तु शोभायै  
 पितरोऽनुमदन्तु॥१॥

[१]

युञ्जते मन उत युञ्जते धियः। विप्रा विप्रस्य बृहतो विपश्चितः। वि होत्रा दधे  
 वयुनाविदेक इत्। मही देवस्य सवितुः परिष्टुतिः। देवस्य त्वा सवितुः प्रसवे।  
 अश्विनोर्बाहुभ्याम्। पूष्णो हस्ताभ्यामाददे। अभ्रिरसि नारिरसि। अध्वरकृद्देवेभ्यः।

उत्तिष्ठ ब्रह्मणस्पते॥२॥

दे॒व॒य॒न्त॑स्त्वे॒महे॑ । उ॒प॒ प्र॒य॑न्तु म॒रुतः॑ सु॒दान॑वः । इन्द्रं प्रा॒शूर्भ॑वा स॒चा । प्रै॒तु  
ब्रह्म॑ण॒स्पतिः॑ । प्र दे॒व्यै॑तु सू॒नृता॑ । अ॒च्छा वी॒रं न॑र्यं प॒ङ्क्ति॑राध॒सम् । दे॒वा य॒ज्ञं न॑यन्तु  
नः । दे॒वी द्या॒वापृ॑थि॒वी अ॒नु मे म॑सा॒थाम् । ऋ॒द्ध्यास॑म॒द्य । म॒खस्य॑ शि॒रः॑ ॥३॥

म॒खाय॑ त्वा । म॒खस्य॑ त्वा शी॒र्ष्णे । इ॒य॒त्य॒ग्र आ॑सीः । ऋ॒द्ध्यास॑म॒द्य । म॒खस्य॑  
शि॒रः । म॒खाय॑ त्वा । म॒खस्य॑ त्वा शी॒र्ष्णे । दे॒वीर्व॑म्री॒रस्य॑ भू॒तस्य॑ प्रथ॒मजा॑ ऋ॒ताव॑रीः ।  
ऋ॒द्ध्यास॑म॒द्य । म॒खस्य॑ शि॒रः॑ ॥४॥

म॒खाय॑ त्वा । म॒खस्य॑ त्वा शी॒र्ष्णे । इन्द्र॑स्यौजो॑ऽसि । ऋ॒द्ध्यास॑म॒द्य । म॒खस्य॑  
शि॒रः । म॒खाय॑ त्वा । म॒खस्य॑ त्वा शी॒र्ष्णे । अ॒ग्नि॒जा अ॑सि प्र॒जाप॑ते॒ रेतः॑ ।  
ऋ॒द्ध्यास॑म॒द्य । म॒खस्य॑ शि॒रः॑ ॥५॥

म॒खाय॑ त्वा । म॒खस्य॑ त्वा शी॒र्ष्णे । आयु॑र्धेहि प्रा॒णं धे॑हि । अ॒पा॒नं धे॑हि व्या॒नं  
धे॑हि । चक्षु॑र्धेहि श्रो॒त्रं धे॑हि । मनो॑ धेहि वाचं धेहि । आ॒त्मानं धे॑हि प्र॒तिष्ठां धे॑हि ।

मां धेहि मयि धेहि। मधु त्वा मधुला करोतु। मुखस्य शिरोऽसि॥६॥

यज्ञस्य पदे स्थः। गायत्रेण त्वा छन्दसा करोमि। त्रैष्टुभेन त्वा छन्दसा करोमि।  
जागतेन त्वा छन्दसा करोमि। मुखस्य रास्नाऽसि। अदितिस्ते बिलं गृह्णातु। पाङ्केन  
छन्दसा। सूर्यस्य हरसा श्राय। मुखोऽसि॥७॥

पुते शिरं ऋतावरीरृद्ध्यासंमद्य मुखस्य शिरः शिरः शिरोऽसि  
नवं च॥

[२]

वृष्णो अश्वस्य निष्पदसि। वरुणस्त्वा धृतव्रत आधूपयतु। मित्रावरुणयोर्ध्रुवेण  
धर्मणा। अर्चिषे त्वा। शोचिषे त्वा। ज्योतिषे त्वा। तपसे त्वा। अभीमं महिना  
दिवम्। मित्रो बभूव सप्रथाः। उत श्रवसा पृथिवीम्॥८॥

मित्रस्य चर्षणीधृतः। श्रवो देवस्य सानसिम्। द्युमं चित्रश्रवस्तमम्। सिध्यै  
त्वा। देवस्त्वा सवितोद्वपतु। सुपाणिः स्वङ्गुरिः। सुबाहुरुत शक्त्या। अपद्यमानः  
पृथिव्याम्। आशा दिश आ पृण। उत्तिष्ठ बृहन्भव॥९॥

ऊर्ध्वस्तिष्ठद्भुवस्त्वम्। सूर्यस्य त्वा चक्षुषाऽन्वीक्षे। ऋजवे त्वा। साधवे त्वा।

सुक्षित्यै त्वा भूत्यै त्वा। इदमहममुमांमुष्यायुणं विशा पशुभिर्ब्रह्मवर्चसेन पर्यूहामि।  
 गायत्रेण त्वा छन्दसाऽऽच्छृणद्भि। त्रैष्टुभेन त्वा छन्दसाऽऽच्छृणद्भि। जागतेन त्वा  
 छन्दसाऽऽच्छृणद्भि। छृणत्तु त्वा वाक्। छृणत्तु त्वोर्क्। छृणत्तु त्वा हविः। छृन्धि  
 वाचम्। छृन्ध्यूर्जम्। छृन्धि हविः। देवं पुरश्चर सगध्यासं त्वा॥१०॥ पृथिवीं भवं वाख्यद्॥ [३]

ब्रह्मन् प्रवर्ग्येण प्रचरिष्यामः। होतर्धर्ममभिष्टुहि। अग्नीद्रौहिणौ पुरोडाशावधिंश्रय।  
 प्रतिप्रस्थातुर्विहर। प्रस्तोतुः सामानि गाय। यजुर्युक्तं सामभिराक्तं खन्त्वा।  
 विश्वैर्देवैरनुमतं मरुद्भिः। दक्षिणाभिः प्रततं पारयिष्णुम्। स्तुभौ वहन्तु  
 सुमनस्यमानम्। स नो रुचं धेह्यहणीयमानः। भूर्भुवः सुवः। ओमिन्द्रवन्तः  
 प्रचरत॥११॥ अहणीयमानो द्वे च॥ [४]

ब्रह्मन्प्रचरिष्यामः। होतर्धर्ममभिष्टुहि। यमाय त्वा मखाय त्वा। सूर्यस्य हरसे  
 त्वा। प्राणाय स्वाहा व्यानाय स्वाहाऽपानाय स्वाहा। चक्षुषे स्वाहा श्रोत्राय स्वाहा।  
 मनसे स्वाहा वाचे सरस्वत्यै स्वाहा। दक्षाय स्वाहा क्रतवे स्वाहा। ओजसे स्वाहा

बलाय॑ स्वाहा॑। दे॒वस्त्वा॑ सवि॒ता मध्वा॑ऽनक्तु॑॥१२॥

पृथि॒वीं तप॑सस्त्रायस्व। अ॒र्चिर॑सि शोचि॑रसि ज्योति॑रसि तपो॑ऽसि।  
स॒ःसी॑दस्व म॒हा॒ः अ॑सि। शोच॑स्व दे॒ववी॑तमः। विधू॑मम॒ग्ने अरू॑षं मि॒येध्य। सृ॒ज  
प्र॑शस्तदर्श॒तम्। अ॒ञ्जन्ति॒ यं प्र॒थय॑न्तो न वि॒प्राः। व॒पाव॑न्तं नाग्नि॒ना तप॑न्तः।  
पि॒तुर्न पु॒त्र उ॒पसि॒ प्रेष्ठः॑। आ घ॒र्मो अ॒ग्निमृ॑तय॒न्नसा॑दीत्॥१३॥

अ॒ना॒धृष्या॑ पु॒रस्ता॑त्। अ॒ग्नेराधि॑पत्ये। आयु॑र्मे दाः। पु॒त्रव॑ती दक्षि॒णतः॑।  
इन्द्र॒स्याऽऽधि॑पत्ये। प्र॒जां मे॑ दाः। सु॒षदा॑ प॒श्चात्। दे॒वस्य॑ सवि॒तुराधि॑पत्ये। प्रा॒णं  
मे॑ दाः। आश्रु॑तिरुत्तर॒तः॥१४॥

मि॒त्रावरु॑णयो॒राधि॑पत्ये। श्रोत्रं॑ मे दाः। विधृ॑तिरु॒परि॑ष्ठात्। बृह॒स्पते॑राधि॒पत्ये।  
ब्रह्म॑ मे दाः क्ष॒त्रं मे॑ दाः। तेजो॑ मे धा॒ वर्चो॑ मे धाः। यशो॑ मे धा॒स्तपो॑ मे धाः।  
मनो॑ मे धाः। मनो॒रश्वा॑ऽसि भूरि॑पुत्रा। विश्वा॑भ्यो मा ना॒ष्ट्राभ्यः॑ पाहि॑॥१५॥

सू॒प॒सदा॑ मे भूया॒ मा मां हि॑ःसीः। तपो॒ष्वग्ने॒ अन्तरा॑ः अ॒मित्रान्॑।

तपा॒शः॑ संमर॒रुषः॑ पर॒स्य। तपा॑वसो चि॒कितानो॑ अ॒चित्तान्। वि ते॑ तिष्ठन्ताम॒जरां॑  
अया॑सः। चि॒तः स्थ॑ परि॒चितः। स्वाहा॑ म॒रुद्धिः॑ परि॒श्रय॑स्व। मा अ॑सि। प्र॒मा  
अ॑सि। प्र॒ति॒मा अ॑सि॥१६॥

स॒म्मा अ॑सि। वि॒मा अ॑सि। उ॒न्मा अ॑सि। अ॒न्तरि॑क्षस्यान्त॒र्धि॒र॑सि। दि॒वं  
तप॑सस्त्रायस्व। आ॒भिर्गी॑र्भिर्यदतो॑ न ऊ॒नम्। आप्या॑यय हरि॒वो वर्ध॑मानः। य॒दा  
स्तो॒तृभ्यो॑ महि॑ गो॒त्रा रु॒जासि॑। भूयि॒ष्ठभाजो॑ अध॑ ते स्याम। शु॒क्रं ते॑ अ॒न्यद्य॑ज॒तं  
ते॑ अ॒न्यत्॥१७॥

विषु॑रूपे अह॑नी द्यौरि॑वासि। विश्वा॒ हि मा॒या अव॑सि स्वधावः। भ॒द्रा ते॑ पूषन्नि॒ह  
राति॑रस्तु। अर्ह॑न्बिभर्षि साय॑कानि धन्वा॑। अर्ह॑ निष्कं य॑ज॒तं विश्व॑रूपम्। अर्ह॑  
नि॒दन्द॑यसे विश्व॑मभु॒वम्। न वा ओजी॑यो रुद्र॒ त्वद॑स्ति। गा॒य॒त्रम॑सि। त्रैष्टु॑भमसि।  
जाग॑तमसि। मधु॑ मधु॑ मधु॑॥१८॥ अ॒न॒क्त॒सादी॑दु॒त्तर॒तः पा॑हि प्र॒ति॒मा अ॑सि य॒ज॒तन्ते॑ अ॒न्यज्जाग॑तम॒स्येकं च॥—[५]

दश॑ प्राची॒र्दश॑ भासि दक्षि॒णा। दश॑ प्र॒तीची॒र्दश॑ भा॒स्युदी॑चीः। दशो॒र्ध्वा भा॑सि

सुमनस्यमानः। स नो रुचं धेह्यहणीयमानः। अग्निष्वा वसुभिः पुरस्ताद्रोचयतु  
 गायत्रेण छन्दसा। स मां रुचितो रोचय। इन्द्रस्त्वा रुद्रैर्दक्षिणतो रोचयतु त्रैष्टुभेन  
 छन्दसा। स मां रुचितो रोचय। वरुणस्त्वादित्यैः पश्चाद्रोचयतु जागतेन छन्दसा।  
 स मां रुचितो रोचय॥१९॥

द्युतानस्त्वा मारुतो मरुद्भिरुत्तरतो रोचयत्वाऽनुष्टुभेन छन्दसा। स मां रुचितो  
 रोचय। बृहस्पतिस्त्वा विश्वैर्देवैरुपरिष्ठाद्रोचयतु पाङ्केन छन्दसा। स मां रुचितो  
 रोचय। रोचितस्त्वं देव घर्म देवेष्वसि। रोचिषीयाहं मनुष्येषु। सम्राद्धर्म रुचितस्त्वं  
 देवेष्वायुष्माऽस्तेजस्वी ब्रह्मवर्चस्यसि। रुचितोऽहं मनुष्येष्वायुष्माऽस्तेजस्वी  
 ब्रह्मवर्चसी भूयासम्। रुगंसि। रुचं मयि धेहि॥२०॥

मयि रुक्। दशं पुरस्ताद्रोचसे। दशं दक्षिणा। दशं प्रत्यङ्गु। दशोदङ्गु। दशोर्ध्वो  
 भांसि सुमनस्यमानः। स नः सम्राडिषमूर्जं धेहि। वाजी वाजिनै पवस्व। रोचितो  
 घर्मो रुचीय॥२१॥ रोचय धेहि नव च॥

अपश्यं गोपामनिपद्यमानम्। आ च परां च पृथिभिश्चरन्तम्। स सुधीचीः  
 स विषूचीर्वसानः। आ वरीवर्ति भुवनेष्वन्तः। अत्र प्रावीः। मधु माध्वीभ्यां मधु  
 माधूचीभ्याम्। अनु वां देववीतये। समग्रिरग्निनां गता। सं देवेनं सवित्रा। स  
 सूर्येण रोचते॥२२॥

स्वाहा समग्रिस्तपसा गता। सं देवेनं सवित्रा। स सूर्येणारोचिष्ट। धर्ता दिवो  
 विभांसि रजसः। पृथिव्या धर्ता। उरोरन्तरिक्षस्य धर्ता। धर्ता देवो देवानाम्।  
 अमर्त्यस्तपोजाः। हृदे त्वा मनसे त्वा। दिवे त्वा सूर्याय त्वा॥२३॥

ऊर्ध्वमिममध्वरं कृधि। दिवि देवेषु होत्रां यच्छ। विश्वासां भुवां पते। विश्वस्य  
 भुवनस्पते। विश्वस्य मनसस्पते। विश्वस्य वचसस्पते। विश्वस्य तपसस्पते।  
 विश्वस्य ब्रह्मणस्पते। देवश्रूस्त्वं देव घर्म देवान्पाहि। तपोजां वाचमस्मे नियच्छ  
 देवायुवम्॥२४॥

गर्भो देवानाम्। पिता मतीनाम्। पतिः प्रजानाम्। मतिः कवीनाम्। सं



दे॒वो दे॒वेन॑ स॒वि॒त्रा य॑तिष्ठ। स॒ सूर्ये॑णारु॒क्त। आ॒यु॒र्दास्त्व॑म॒स्मभ्य॑ घ॒र्म व॑र्चो॒दा  
अ॑सि। पि॒ता नो॑ऽसि पि॒ता नो॑ बो॒ध। आ॒यु॒र्धास्त॑नू॒धाः प॑यो॒धाः। व॒र्चो॒दा व॑रि॒वो॒दा  
द्र॑वि॒णो॒दाः॥ २५॥

अ॒न्त॒रि॒क्ष॒प्र उ॒रोर्व॑री॒यान्। अ॒शी॒महि॑ त्वा॒ मा मा॑ हि॒सीः। त्वम॑ग्ने  
गृ॒हप॑तिर्वि॒शाम॑सि। वि॒श्वा॑सां॒ मानु॑षी॒णाम्। श॒तं पू॒र्भिर्य॑विष्ठ पा॒ह्य॒हंसः॑।  
स॒मे॒द्धार॑ श॒त॒ हिमाः॑। त॒न्द्रा॒विण॑ हार्दि॒वान॑म्। इ॒हैव॑ रा॒तयः॑ सन्तु। त्व॒ष्टी॑मती  
ते स॒पेय॑। सु॒रेता॒ रेतो॑ दधा॑ना। वी॒रं वि॑देय॒ तव॑ स॒न्दृशि॑। माऽह॑ रा॒यस्पोषे॑ण  
वि यो॑षम्॥ २६॥ रोचते सूर्याय त्वा देवायुर्व द्रविणोदा दधाना द्वे च॥ [७]

दे॒वस्य॑ त्वा स॒वि॒तुः प्र॑स॒वे। अ॒श्विनो॑र्बा॒हुभ्या॑म्। पू॒ष्णो ह॑स्ता॒भ्यामा॑ददे।  
अदि॑त्यै रा॒स्नासि॑। इ॒ड ए॒हि। अदि॑त॒ एहि॑। सर॑स्व॒त्येहि॑। असा॒वेहि॑। असा॒वेहि॑।  
असा॒वेहि॑॥ २७॥

अदि॑त्या उ॒ष्णीष॑मसि। वा॒युर॑स्यै॒डः। पू॒षा त्वो॒पाव॑सृजतु। अ॒श्विभ्या॑ प्रदा॑पय।

यस्ते स्तनः शशयो यो मयोभूः। येन विश्वा पुष्यसि वार्याणि। यो रत्नधा वसुविद्यः  
सुदत्रः। सरस्वति तमिह धातवेकः। उस्म घर्म ः शि ः ष। उस्म घर्म पाहि॥२८॥

घर्माय शि ः ष। बृहस्पतिस्त्वोपसीदतु। दानवः स्थ पेर्वः। विष्वग्वृतो लोहितेन।  
अश्विभ्यां पिन्वस्व। सरस्वत्यै पिन्वस्व। पूष्णे पिन्वस्व। बृहस्पतये पिन्वस्व।  
इन्द्राय पिन्वस्व। इन्द्राय पिन्वस्व॥२९॥

गायत्रोऽसि। त्रैष्टुभोऽसि। जागतमसि। सहोर्जो भागेनोपमेहि। इन्द्राश्विना  
मधुनः सारघस्य। घर्म पात वसवो यजता वट। स्वाहा त्वा सूर्यस्य रश्मये  
वृष्टिवनये जुहोमि। मधु हविरसि। सूर्यस्य तपस्तप। द्यावापृथिवीभ्यां त्वा  
परिगृह्णामि॥३०॥

अन्तरिक्षेण त्वोपयच्छामि। देवानां त्वा पितृणामनुमतो भर्तु ः शकेयम्।  
तेजोऽसि। तेजोऽनु प्रेहि। दिविस्पृङ्गा मा हि ः सीः। अन्तरिक्षस्पृङ्गा मा हि ः सीः।  
पृथिविस्पृङ्गा मा हि ः सीः। सुवरसि सुवर्मे यच्छ। दिवं यच्छ दिवो मा

पाहि॥३१॥ एहिं पाहि पिन्वस्व गृह्णामि नवं च॥—————[८]

समुद्राय त्वा वाताय स्वाहा॥ सलिलाय त्वा वाताय स्वाहा॥ अनाधृष्याय त्वा वाताय स्वाहा॥ अप्रतिधृष्याय त्वा वाताय स्वाहा॥ अवस्यवे त्वा वाताय स्वाहा॥ दुवस्वते त्वा वाताय स्वाहा॥ शिमिद्वते त्वा वाताय स्वाहा॥ अग्नये त्वा वसुमते स्वाहा॥ सोमाय त्वा रुद्रवते स्वाहा॥ वरुणाय त्वाऽऽदित्यवते स्वाहा॥३२॥

बृहस्पतये त्वा विश्वदेव्यावते स्वाहा॥ सवित्रे त्वंभुमते विभुमते प्रभुमते वाजवते स्वाहा॥ यमाय त्वाऽङ्गिरस्वते पितृमते स्वाहा॥ विश्वा आशा दक्षिणसत् विश्वा देवानयाडिह। स्वाहाकृतस्य घर्मस्य। मधोः पिबतमश्विना। स्वाहाऽग्नये यज्ञियाय। शं यजुर्भिः। अश्विना घर्मं पात९ हार्दिवानम्॥३३॥

अहर्दिवाभिरूतिभिः। अनु वां द्यावापृथिवी म९साताम्। स्वाहेन्द्राय। स्वाहेन्द्रावद्। घर्ममपातमश्विना हार्दिवानम्। अहर्दिवाभिरूतिभिः। अनु वां द्यावापृथिवी अम९साताम्। तं प्राव्य यथा वद्। नमो दिवे। नमः पृथिव्यै॥३४॥

दिवि धां इमं यज्ञम्। यज्ञमिमं दिवि धाः। दिवं गच्छ। अन्तरिक्षं गच्छ।  
 पृथिवीं गच्छ। पञ्च प्रदिशो गच्छ। देवान्धर्मपान्गच्छ। पितृन्धर्मपान्गच्छ॥३५॥  
 आदित्यवन्ते स्वाहा हविर्वानं पृथिव्या अष्टौ च॥ [९]

इषे पीपिहि। ऊर्जे पीपिहि। ब्रह्मणे पीपिहि। क्षत्राय पीपिहि। अद्भ्यः पीपिहि।  
 ओषधीभ्यः पीपिहि। वनस्पतिभ्यः पीपिहि। द्यावापृथिवीभ्यां पीपिहि। सुभूताय  
 पीपिहि। ब्रह्मवर्चसाय पीपिहि॥३६॥

यजमानाय पीपिहि। मह्यं ज्यैष्ठ्याय पीपिहि। त्विष्यै त्वा। द्युम्नाय त्वा।  
 इन्द्रियाय त्वा भूत्यै त्वा। धर्माऽसि सुधर्मा मे न्यस्मे। ब्रह्माणि धारय। क्षत्राणि  
 धारय। विशं धारय। नेत्वा वातः स्कन्दयात्॥३७॥

अमुष्य त्वा प्राणे सादयामि। अमुना सह निरर्थं गच्छ। योऽस्मान्द्वेष्टि। यं च वयं  
 द्विष्मः। पूष्णे शरसे स्वाहा। ग्रावभ्यः स्वाहा। प्रतिरेभ्यः स्वाहा। द्यावापृथिवीभ्यां  
 स्वाहा। पितृभ्यो घर्मपेभ्यः स्वाहा। रुद्राय रुद्रहोत्रे स्वाहा॥३८॥

अह॒ज्योतिः॑ के॒तुना॑ जुषताम्। सु॒ज्योति॑ज्योतिषा॒ऽ स्वाहा॑। रात्रि॒ज्योतिः॑ के॒तुना॑  
जुषताम्। सु॒ज्योति॑ज्योतिषा॒ऽ स्वाहा॑। अ॒पी॒परो॒ माऽहो॑ रात्रि॒यै मा पाहि॑। ए॒षा  
ते॑ अ॒ग्ने स॒मित्। तया॒ समि॑ध्यस्व। आ॒यु॒र्मे दाः। वर्च॑सा मा॒ञ्जीः। अ॒पी॒परो॒ मा  
रात्रि॑या॒ अहो॑ मा पाहि॥ ३९॥

ए॒षा ते॑ अ॒ग्ने स॒मित्। तया॒ समि॑ध्यस्व। आ॒यु॒र्मे दाः। वर्च॑सा मा॒ञ्जीः।  
अ॒ग्नि॒ज्योति॑ज्योति॒र॒ग्निः स्वाहा॑। सू॒र्यो॒ ज्योति॑ज्योतिः॒ सूर्यः॑ स्वाहा॑। भूः स्वाहा॑।  
हुत॑ ह॒विः। मधु॑ ह॒विः। इन्द्र॑तमे॒ऽग्नौ॥ ४०॥

पि॒ता नो॑ऽसि मा मां हि॑सीः। अ॒श्याम॑ ते देव॒घर्म॑। मधु॑मतो॒ वाज॑वतः पि॒तु॒मतः॑।  
अ॒ङ्गि॒रस्वतः॑ स्वधा॒विनः॑। अ॒शी॒महि॑ त्वा मा मां हि॑सीः। स्वाहा॑ त्वा सूर्य॑स्य  
र॒श्मि॒भ्यः। स्वाहा॑ त्वा नक्ष॑त्रेभ्यः॥ ४१॥ ब्रह्मवर्चसायं पीपिहि स्कन्दयादुद्रायं रुद्रहोत्रे स्वाहाऽहो मा पाह्यग्नौ सुत च॥ [१०]

घर्म॑ या ते दि॒वि शुक्। या गा॑य॒त्रे छन्द॑सि। या ब्रा॑ह्म॒णे। या ह॑वि॒र्धाने॑। तान्तं॑  
ए॒तेना॑व॒ यजे॒ स्वाहा॑। घर्म॑ या ते॒ऽन्तरि॑क्षे शुक्। या त्रैष्टु॑भे छन्द॑सि। या रा॑ज॒न्ये।

याऽऽग्नीध्रे। तान्तं ए॒तेना॒व॑ य॒जे॒ स्वाहा॑॥४२॥

घ॒र्म॒ या ते॑ पृ॒थि॒व्या॑ शु॒क्। या जा॒गते॑ छ॒न्द॑सि। या वै॒श्यै॑। या स॒द॑सि।  
तान्तं ए॒तेना॒व॑ य॒जे॒ स्वाहा॑। अ॒नु॒नो॒ऽद्या॒नु॒म॑तिः। अ॒न्वि॒द॑नु॒म॑ते॒ त्वम्। दि॒व॒स्त्वा॑  
प॒र॒स्पा॒याः॑। अ॒न्तरि॑क्षस्य त॒नु॒वः॑ पा॒हि। पृ॒थि॒व्या॒स्त्वा॒ ध॒र्म॑णा॥४३॥

व॒यम॑नु॒क्रामा॑म सु॒वि॒ताय॑ न॒व्य॑से। ब्र॒ह्म॑ण॒स्त्वा॒ प॒र॒स्पा॒याः॑। क्ष॒त्र॒स्य॑ त॒नु॒वः॑ पा॒हि।  
वि॒श॒स्त्वा॒ ध॒र्म॑णा। व॒यम॑नु॒क्रामा॑म सु॒वि॒ताय॑ न॒व्य॑से। प्रा॒ण॒स्य॑ त्वा प॒र॒स्पा॒यै॑।  
चक्षु॑ष॒स्त॒नु॒वः॑ पा॒हि। श्रो॒त्र॒स्य॑ त्वा॒ ध॒र्म॑णा। व॒यम॑नु॒क्रामा॑म सु॒वि॒ताय॑ न॒व्य॑से।  
व॒ल्गु॑र॒सि शं॑ यु॒धा॒याः॑॥४४॥

शि॒शु॒र्ज॒न॑धा॒याः। शं च॑ व॒क्षि॒ परि॑ च॒ व॒क्षि॑। चतुः॑ स्र॒क्ति॒र्नाभि॑र्ऋ॒त॒स्य॑।  
स॒दो॑ वि॒श्वा॒युः श॒र्म स॒प्र॒थाः॑। अ॒प॒ द्वे॒षो॒ अ॒प॒ ह॒रः॑। अ॒न्य॒द्व॒त॒स्य॑ स॒श्वि॒म।  
घ॒र्मै॒त॒त्ते॒ऽन्न॑मे॒तत्पु॑री॒षम्। ते॒न॒ व॒र्ध॑स्व॒ चाऽऽ च॑ प्या॒य॒स्व। व॒र्धि॑षी॒महि॑ च व॒यम्।  
आ च॑ प्या॒सि॒षी॒महि॑॥४५॥

रन्तिर्नामांसि दिव्यो गन्धर्वः। तस्य ते पृथ्व्यविधानम्। अग्निरध्यक्षाः।  
 रुद्रोऽधिपतिः। समहमायुषा। सं प्राणेन। सं वर्चसा। सं पयसा। सं गौपत्येन।  
 स॥ रायस्पोषेण॥४६॥

व्यसौ। योऽस्मान्द्वेष्टि। यं च वयं द्विष्मः। अचिक्रददृषा हरिः। महान्मित्रो  
 न दर्शतः। स॥ सूर्येण रोचते। चिदसि समुद्रयोनिः। इन्दुर्दक्षः श्येन ऋतावा।  
 हिरण्यपक्षः शकुनो भुरण्युः। महान्धसधस्थे ध्रुव आनिषत्तः॥४७॥

नमस्ते अस्तु मा मा हिंसीः। विश्वावसु॥ सोम गन्धर्वम्। आपो ददृशुषीः।  
 तदृतेनाव्यायन्। तदन्ववैत्। इन्द्रो रारहाण आसाम्। परि सूर्यस्य परिधी॥  
 रपश्यत्। विश्वावसुरभि तन्नो गृणातु। दिव्यो गन्धर्वो रजसो विमानः। यद्वा  
 घा सत्यमुत यन्न विद्म॥४८॥

धियो हिन्वानो धिय इन्नो अव्यात्। सस्त्रिमविन्दच्चरणे नदीनाम्। अपावृणोद्गुरो  
 अश्मव्रजानाम्। प्रासाङ्गान्धर्वो अमृतानि वोचत्। इन्द्रो दक्षं परिजानादहीनम्।

ए॒तत्त्वं दे॒व घ॒र्म दे॒वो दे॒वानु॑पा॒गाः। इ॒दम॒हं म॑नु॒ष्यो म॑नु॒ष्यान्। सोम॑पी॒थानु॑मेहि॒।  
स॒ह प्र॒जया॑ स॒ह रा॒यस्पोषे॑ण। सु॒मित्रा॑ न॒ आप॒ ओष॑धयः सन्तु॥४९॥

दु॒र्मित्रा॑स्तस्मै॑ भूयासुः। यो॑ऽस्मान्द्वेष्टि॑। यं च॑ व॒यं द्वि॒ष्मः। उ॒द्वयं॑ तम॑स॒स्परी॑।  
उ॒दुत्यं॑ चि॒त्रम्। इ॒ममू॑षुत्यम॒स्मभ्य॑ꣳ स॒निम्। गा॒य॒त्रं न॑वीयाꣳसम्। अ॒ग्ने दे॒वेषु॑  
प्रवो॑चः॥५०॥ याऽऽग्नी॑ध्रे॒ तान्तं॑ ए॒तेना॑व॒ यजे॒ स्वाहा॑ ध॒र्मणा॑ शं यु॒धायाः॑ प्या॒सिषी॑महि॒ पोषे॑ण॒ निष॑त्तो वि॒द्य सं॒न्वद्यौ॑॥——[११]

म॒हीनां॑ पयो॑ऽसि॒ विहि॑तं दे॒वत्रा॑। ज्यो॒तिर्भा॑ अ॒सि व॑न॒स्पती॑ना॒मोष॑धीनाꣳ र॒सः।  
वा॒जिनं॑ त्वा वा॒जिनो॑ऽव॒ नयामः॑। ऊ॒र्ध्वं म॑नः सुव॒र्गम्॥५१॥ ——[१२]

अ॒स्का॒न्द्यौः पृ॑थि॒वीम्। अ॒स्का॒नृष॑भो युवा॒गाः। स्क्॒न्नेमा॑ वि॒श्वा भु॑वंना। स्क्॒न्नो  
य॒ज्ञः प्र॑ज॒नय॑तु। अ॒स्का॒नज॑नि॒ प्राज॑नि। आ स्क्॒न्नाज्जा॑यते॒ वृषा॑। स्क्॒न्नात्  
प्रज॑निषीमहि॥५२॥ ——[१३]

या पु॒रस्ता॑द्वि॒द्युदा॑प॒तत्। तान्तं॑ ए॒तेना॑व॒ यजे॒ स्वाहा॑। या दक्षि॑ण॒तः। या प॒श्चात्।  
योत्त॑र॒तः। योप॑रि॒ष्टाद्वि॒द्युदा॑प॒तत्। तान्तं॑ ए॒तेना॑व॒ यजे॒ स्वाहा॑॥५३॥ ——[१४]



प्रा॒णाय॒ स्वाहा॑ व्या॒नाय॒ स्वाहा॑ऽपा॒नाय॒ स्वाहा॑। चक्षु॑षे स्वाहा श्रोत्रा॑य॒ स्वाहा॑।  
मन॑से॒ स्वाहा॑ वा॒चे सर॑स्वत्यै॒ स्वाहा॑॥५४॥ \_\_\_\_\_[१५]

पू॒ष्णे स्वाहा॑ पू॒ष्णे शर॑से॒ स्वाहा॑। पू॒ष्णे प्र॑प॒त्थ्याय॒ स्वाहा॑ पू॒ष्णे न॒रन्धि॑षाय॒  
स्वाहा॑। पू॒ष्णेऽङ्घ्रि॑णये॒ स्वाहा॑ पू॒ष्णे न॒रुणा॑य॒ स्वाहा॑। पू॒ष्णे सा॑के॒ताय॒ स्वाहा॑॥५५॥  
\_\_\_\_\_ [१६]

उद॑स्य॒ शुष्मा॑द्भानु॒नार्त॑ बिभ॑र्ति। भा॒रं पृ॑थि॒वी न भू॑मः। प्र शु॒क्रैतु॑ दे॒वी म॑नी॒षा।  
अ॒स्मत्सु॑त॒ष्टो रथो॑ न वा॒जी। अ॒र्चन्त॑ ए॒के म॒हि सा॑म॒मन्व॑त। तेन॒ सूर्य॑मधारयन्।  
तेन॒ सूर्य॑मरोचयन्। घ॒र्मः शि॒रस्त॑दयम॒ग्निः। पुरी॑षमसि॒ सं प्रि॑यं प्र॒जया॑ प॒शुभि॑र्भुवत्।  
प्र॒जाप॑ति॒स्त्वा सा॑दयतु। तया॑ दे॒वत॑याऽङ्गि॒रस्व॑द्धुवा सी॒द॥५६॥ \_\_\_\_\_[१७]

यास्ते॑ अ॒ग्न आ॒र्द्रा यो॑न॒यो याः कु॑ला॒यिनीः॑। ये ते॑ अ॒ग्न इ॒न्द्रवो॑ या उ॒ नाभ॑यः।  
यास्ते॑ अ॒ग्ने त॒नुव॑ ऊ॒र्जो ना॑मः। ताभि॑स्त्वमु॒भयी॑भिः संवि॒दानः॑। प्र॒जाभि॑र॒ग्ने द्रवि॑णे॒ह  
सी॒द। प्र॒जाप॑ति॒स्त्वा सा॑दयतु। तया॑ दे॒वत॑याऽङ्गि॒रस्व॑द्धुवा सी॒द॥५७॥ — [१८]

अ॒ग्निर॑सि वै॒श्वान॑रोऽसि। सं॒व॒थ्स॑रोऽसि परि॒व॒थ्स॑रोऽसि। इ॒दा॒व॒थ्स॑रोऽसीदु॒व॒थ्स॑रो  
 इ॒द्व॒थ्स॑रोऽसि व॒थ्स॑रोऽसि। तस्य॑ ते वस॒न्तः शि॒रः। ग्री॒ष्मो दक्षि॑णः प॒क्षः।  
 व॒र्षाः पुच्छ॑म्। श॒रदु॑त्तरः प॒क्षः। हे॒म॒न्तो मध्य॑म्। पूर्॒व॒प॒क्षाश्चित॑यः। अ॒पर॑प॒क्षाः  
 पु॒रो॒षम्। अ॒हो॒रा॒त्राणी॑ष्ट॒काः। तस्य॑ ते मा॒साश्चा॑र्धमा॒साश्च॑ कल्पन्ताम्। ऋ॒तव॑स्ते  
 कल्पन्ताम्। सं॒व॒थ्स॑रस्ते॑ कल्पताम्। अ॒हो॒रा॒त्राणि॑ ते कल्पन्ताम्। एति॑ प्रेति॑ वीति॑  
 समित्यु॒दिति॑। प्र॒जाप॑तिस्त्वा सादयतु। तया॑ दे॒वत॑याऽङ्गि॒र॒स्वद्ध्रु॑वः सीद॥५८॥

चित्तयो नव च॥ [१९]

भूर्भुवः सु॒वः। ऊ॒र्ध्व ऊ॒ षु णं ऊ॒तये॑। ऊ॒र्ध्वो नः॑ पा॒ह्य॒हंसः॑। वि॒धु॒न्द॒द्राण॑  
 सम॑ने बहूनाम्। यु॒वा॒न॒ सन्तं॑ प॒लि॒तो ज॑गार। दे॒वस्य॑ पश्य॒ काव्यं॑ म॒हित्वा॒द्या  
 म॒मार॑। स॒ह्यः स॒मान॑। यदृ॒ते चि॑दभि॒श्रिषः॑। पु॒रा ज॒र्त॒भ्य आ॑तृदः। स॒न्धा॑ता स॒न्धिं  
 म॒घवा॑ पु॒रो॒वसुः॑॥५९॥

निष्क॑र्ता वि॒हुतं॑ पुनः॑। पुन॑रू॒र्जा स॒ह र॒य्या। मा नो॑ घ॒र्म व्यथि॑तो वि॒व्यथो॑  
 नः। मा नः॑ प॒र॒म॒ध॒रं मा रजो॑ऽनैः। मोष्व॑स्मा॒ स्तम॑स्यन्त॒रा धाः॑। मा रु॒द्रिया॑सो

अभिगुर्वृधानः। मा नः क्रतुभिर्हीडितेभिस्मान्। द्विषांसुनीते मा परा दाः। मा नो रुद्रो निर्ऋतिर्मा नो अस्ता। मा द्यावापृथिवी हीडिषाताम्॥६०॥

उप नो मित्रावरुणाविहावतम्। अन्वादीध्याथामिह नः सखाया। आदित्यानां प्रसितिर्हेतिः। उग्रा शतापांष्ठा घृविषा परि णो वृणक्तु। इमं मे वरुण तत्त्वा यामि। त्वं नो अग्ने स त्वं नो अग्ने। त्वमग्ने अयासि। उद्वयं तमसस्परि। उदुत्यं चित्रम्। वयः सुपर्णाः॥६१॥ पुरोवसुरहीडिषाता\* सुपर्णाः॥ [२०]

भूर्भुवः सुवः। मयि त्यदिन्द्रियं महत्। मयि दक्षो मयि क्रतुः। मयि धायि सुवीर्यम्। त्रिशुंघर्मो विभातु मे। आकूत्या मनसा सह। विराजा ज्योतिषा सह। यज्ञेन पयसा सह। ब्रह्मणा तेजसा सह। क्षत्रेण यशसा सह। सत्येन तपसा सह। तस्य दोहमशीमहि। तस्य सुम्नमशीमहि। तस्य भक्षमशीमहि। तस्य त इन्द्रेण पीतस्य मधुमतः। उपहूतस्योपहूतो भक्षयामि॥६२॥ यशसा सह पदं॥ [२१]

यास्ते अग्ने घोरास्तनुवः। क्षुच्च तृष्णा च। असुक्कानाहुतिश्च। अशनया च पिपासा च। सेदिश्चामतिश्च। एतास्ते अग्ने घोरास्तनुवः। ताभिर्मुं गच्छ। योऽस्मान्द्वेष्टि।

यं च वयं द्विष्मः॥६३॥ \_\_\_\_\_[२२]

स्निक् स्नीहि॑तिश्च स्निहि॑तिश्च। उ॒ष्णा च॑ शी॒ता च॑। उ॒ग्रा च॑ भी॒मा च॑। स॒दाम्नी॑  
से॒दिरनि॑रा। ए॒तास्ते॑ अ॒ग्ने घो॒रास्त॒नुवः॑। ताभि॑र॒मुं ग॑च्छ। योऽस्मान्द्वेष्टि॑। यं च॑ व॒यं  
द्विष्मः॥६४॥ \_\_\_\_\_[२३]

धुनि॑श्च ध्वा॒न्तश्च॑ ध्व॒नश्च॑ ध्व॒नय॑श्च। नि॒लिम्प॑श्च वि॒लिम्प॑श्च वि॒क्षिपः॥६५॥  
\_\_\_\_\_ [२४]

उ॒ग्रश्च॑ धुनि॑श्च ध्वा॒न्तश्च॑ ध्व॒नश्च॑ ध्व॒नय॑श्च। स॒हस॒ह्वाश्च॑ स॒हमा॑नश्च स॒हस्वा॑श्च  
स॒हीया॑श्च। ए॒त्य॒ प्रेत्य॑ वि॒क्षिपः॥६६॥ \_\_\_\_\_[२५]

अ॒होरा॒त्रे त्वोदी॑रयताम्। अ॒र्धमा॒सास्त्वोदी॑ जयन्तु। मा॒सांस्त्वा श्र॑पयन्तु।  
ऋ॒तव॑स्त्वा पचन्तु। सं॒व॒त्स॒रस्त्वा॑ ह॒न्त्वसौ॥६७॥ \_\_\_\_\_[२६]

खट् फड् ज॒हि। छिन्धी॑ भिन्धी॑ ह॒न्धी कट्। इति॑ वाचः कूरा॒णि॥६८॥ [२७]

विगा इन्द्र॑ वि॒चर॑न्त्स्पाशयस्व। स्व॒पन्त॑मिन्द्र पशु॒मन्त॑मिच्छ। वज्रे॑णामुं बोधय  
दुर्वि॒दत्र॑म्। स्व॒पतो॑ऽस्य॒ प्रह॑र॒ भोज॑नेभ्यः। अ॒ग्ने अ॒ग्निना॒ संव॑दस्व। मृ॒त्यो मृ॒त्युना॒

संवदस्व। नमस्ते अस्तु भगवः। सृकृत्ते अग्रे नमः। द्विस्ते नमः। त्रिस्ते नमः। चतुस्ते नमः। पञ्चकृत्वंस्ते नमः। दशकृत्वंस्ते नमः। शतकृत्वंस्ते नमः। आसहस्रकृत्वंस्ते नमः। अपरिमितकृत्वंस्ते नमः। नमस्ते अस्तु मा मा हिंसीः॥६९॥ त्रिस्ते नमः सप्त च॥

[२८]

असृन्मुखो रुधिरेणाव्यक्तः। यमस्य दूतः श्वपाद्विधावसि। गृध्रः सुपर्णः कुणपं निषेवसे। यमस्य दूतः प्रहितो भवस्य चोभयौ॥७०॥

[२९]

यदेतद्वृकसो भूत्वा। वाग्दैव्यभिरायसि। द्विषन्तं मेऽभिराय। तं मृत्यो मृत्यवे नय। स आर्त्यार्तिमार्च्छतु॥७१॥

[३०]

यदीषितो यदि वा स्वकामी। भयेडको वदति वाचमेताम्। तामिन्द्राग्नी ब्रह्मणा संविदानौ। शिवामस्मभ्यं कृणुतं गृहेषु॥७२॥

[३१]

दीर्घमुखि दुर्हणु। मा स्म दक्षिणतो वदः। यदि दक्षिणतो वदाद्विषन्तं मेऽव बाधासै॥७३॥

[३२]

इ॒त्थादु॒लूक॑ आप॑सत्। हि॒र॒ण्या॒क्षो अ॒यो॑मुखः। रक्ष॑सां दू॒त आ॑गंतः। तमि॒तो  
ना॑शया॒ग्ने॥ ७४॥ \_\_\_\_\_[३३]

यदे॒तद्भू॒तान्य॑न्वा॒विश्य॑। दै॒वीं वाचं॑ व॒दसि॑। द्वि॒षतो॑ नः॒ परा॑वद। तान्मृ॑त्यो मृ॒त्यवे॑  
नय॑। त आ॒र्त्याऽऽर्ति॑माच्छ॑न्तु। अ॒ग्निना॒ऽग्निः संव॑दताम्॥ ७५॥ \_\_\_\_\_[३४]

प्र॒सार्य॑ स॒व्यौ पत॑सि। स॒व्यम॑क्षि॑ नि॒पेपि॑ च। मेह॑कस्य च॒नाम॑मत्॥ ७६॥  
\_\_\_\_\_ [३५]

अ॒त्रि॒णा त्वा क्रि॑मे ह॒न्मि। क॒ण्वे॑न ज॒मद॑ग्निना। वि॒श्वाव॑सो॒र्ब्रह्म॑णा ह॒तः।  
क्रि॒मी॒णाऽ॒ राजा॑। अ॒प्येषा॑ऽ॒ स्थ॒पति॑र॒ह॒तः। अथो॑ मा॒ताऽथो॑ पि॒ता। अथो॑ स्थू॒रा  
अथो॑ क्षु॒द्राः। अथो॑ कृ॒ष्णा अथो॑ श्वे॒ताः। अथो॑ आ॒शाति॑का ह॒ताः। श्वे॒ताभिः॑ स॒ह  
सर्वे॑ ह॒ताः॥ ७७॥ \_\_\_\_\_[३६]

आ॒ह॒राव॑द्य। श्रु॒तस्य॑ ह॒विषो॑ यथा॑। तथ्स॒त्यम्। यद॒मुं य॒मस्य॑ ज॒म्भयोः॑।  
आद॑धामि॒ तथा॒ हि तत्। खण्फ॑ण्म॒सि॥ ७८॥ \_\_\_\_\_[३७]

ब्रह्मणा त्वा शपामि। ब्रह्मणस्त्वा शपथेन शपामि। घोरेण त्वा भृगूणां चक्षुषा प्रेक्षे। रौद्रेण त्वाङ्गिरसां मनसा ध्यायामि। अघस्यं त्वा धारया विद्धामि। अधरो मत्पदस्वासौ॥७९॥ \_\_\_\_\_[३८]

उत्तुद शिमिजावरि। तल्पेजे तल्प उत्तुद। गिरीः रनु प्रवेशय। मरीचिरूप सन्नुद। यावदितः पुरस्तादुदयाति सूर्यः। तावदितोऽमुं नाशय। योऽस्मान्द्वेष्टि। यं च वयं द्विष्मः॥८०॥ \_\_\_\_\_[३९]

भूर्भुवः सुवो भूर्भुवः सुवो भूर्भुवः सुवः। भुवोऽद्धायि भुवोऽद्धायि भुवोऽद्धायि। नृम्णायि नृम्णं नृम्णायि नृम्णं नृम्णायि नृम्णम्। निधाय्यो वायि निधाय्यो वायि निधाय्यो वायि। ए अस्मे अस्मे। सुवर्न ज्योतीः॥८१॥ \_\_\_\_\_[४०]

पृथिवी समित्। तामग्निः समिन्धे। साऽग्निः समिन्धे। तामहः समिन्धे। सा मा समिद्धा। आयुषा तेजसा। वर्चसा श्रिया। यशसा ब्रह्मवर्चसेन। अन्नाद्येन समिन्ताः स्वाहा। अन्तरिक्षः समित्॥८२॥

तां वा॒युः समि॑न्धे। सा वा॒युः समि॑न्धे। ताम॒हः समि॑न्धे। सा मा॒ समि॑द्धा।  
 आयु॑षा तेज॑सा। वर्च॑सा श्रि॒या। यश॑सा ब्रह्मवर्च॑सेन॑। अ॒न्नाद्ये॑न॒ समि॑न्ता॒ऽऽ स्वाहा॑।  
 द्यौः स॒मित्। तामा॑दित्यः समि॑न्धे॥८३॥

साऽऽदि॒त्यः समि॑न्धे। ताम॒हः समि॑न्धे। सा मा॒ समि॑द्धा। आयु॑षा तेज॑सा।  
 वर्च॑सा श्रि॒या। यश॑सा ब्रह्मवर्च॑सेन॑। अ॒न्नाद्ये॑न॒ समि॑न्ता॒ऽऽ स्वाहा॑। प्रा॒जाप॒त्या  
 मे स॒मिद॑सि सप॒त्नक्ष॑यणी। भ्रा॒तृव्य॑हा मेऽसि॑ स्वाहा॑। अग्ने॑ व्रतप॒ते व्र॑तं  
 च॑रिष्यामि॥८४॥

तच्छ॑केयं तन्मे॑ राध्यताम्। वायो॑ व्रतप॒त आदि॑त्य व्रतप॒ते। व्र॑तानां व्रतप॒ते  
 व्र॑तं च॑रिष्यामि। तच्छ॑केयं तन्मे॑ राध्यताम्। द्यौः स॒मित्। तामा॑दित्यः समि॑न्धे।  
 साऽऽदि॒त्यः समि॑न्धे। ताम॒हः समि॑न्धे। सा मा॒ समि॑द्धा। आयु॑षा तेज॑सा॥८५॥

वर्च॑सा श्रि॒या। यश॑सा ब्रह्मवर्च॑सेन॑। अ॒न्नाद्ये॑न॒ समि॑न्ता॒ऽऽ स्वाहा॑। अ॒न्तरि॑क्षः  
 स॒मित्। तां वा॒युः समि॑न्धे। सा वा॒युः समि॑न्धे। ताम॒हः समि॑न्धे। सा मा॒



समिद्धा। आयुषा तेजसा। वर्चसा श्रिया॥८६॥

यशसा ब्रह्मवर्चसेन। अन्नाद्येन समिन्ताः स्वाहा। पृथिवी समित्। तामग्निः समिन्धे। साऽग्निः समिन्धे। तामहः समिन्धे। सा मा समिद्धा। आयुषा तेजसा। वर्चसा श्रिया। यशसा ब्रह्मवर्चसेन॥८७॥

अन्नाद्येन समिन्ताः स्वाहा। प्राजापत्या मे समिदसि सपत्नक्षयणी। भ्रातृव्यूहा मेऽसि स्वाहा। आदित्य व्रतपते व्रतमचारिषम्। तदशकं तन्मेऽराधि। वायो व्रतपतेऽग्ने व्रतपते। व्रतानां व्रतपते व्रतमचारिषम्। तदशकं तन्मेऽराधि॥८८॥

समिन्धसिन्धे व्रतं चरिष्याम्यायुषा तेजसा वर्चसा श्रिया यशसा ब्रह्मवर्चसेनाद्यौ च॥[४१]

शं नो वातः पवतां मातरिश्वा शं नस्तपतु सूर्यः। अहानिशं भवन्तु नः शः रात्रिः प्रतिधीयताम्। शमुषा नो व्युच्छतु शमादित्य उदेतु नः। शिवा नः शन्तमा भव सुमृडीका सरस्वति। मा ते व्योम सन्दृशि। इडाये वास्त्वसि वास्तुमद्वास्तुमन्तो भूयास्म मा वास्तोश्छिथ्स्मह्यवास्तुः स भूयाद्योऽस्मान्द्वेष्टि यं

च व॒यं द्वि॒ष्मः। प्र॒ति॒ष्ठासि॑ प्र॒ति॒ष्ठाव॑न्तो भू॒यास्म॒ मा प्र॑ति॒ष्ठाया॑श्छि॒थ्स्मह्य॑प्रति॒ष्ठः  
 स भू॒याद्यौ॑ऽस्मान्द्वेष्टि॒ यं च॑ व॒यं द्वि॒ष्मः। आ वा॑त वा॒हि भेष॑जं वि वा॑त वा॒हि  
 यद्र॑पः। त्व॑ हि वि॒श्वभे॑षजो दे॒वानां॑ दू॒त ई॒य॑से। द्वावि॒मौ वा॑तौ वा॒त आ सि॒न्धो॒रा  
 प॑रा॒वतः॑ ॥८९॥

दक्ष॑ मे अ॒न्य आ॒वातु॑ परा॒न्यो वा॑तु॒ यद्र॑पः। यद॒दो वा॑तते गृ॒होऽमृ॑तस्य  
 नि॒धिर्हि॒तः। ततो॑ नो दे॒हि जी॒वसे॒ ततो॑ नो धे॒हि भेष॑जम्। ततो॑ नो॒ मह॒ आव॑ह  
 वा॒त आवा॑तु भेष॑जम्। श॒म्भूर्म॑यो॒भूर्नो॑ हृ॒दे प्र ण॒ आयू॑र॒षि ता॑रिषत्। इन्द्र॑स्य  
 गृ॒होऽसि॑ तं त्वा॒ प्रप॑द्ये॒ सगुः॑ सा॒श्वः। स॒ह यन्मे॑ अ॒स्ति ते॑न। भूः प्रप॑द्ये॒ भुवः॑  
 प्रप॑द्ये॒ सुवः॑ प्रप॑द्ये॒ भूर्भुवः॑ सुवः॑ प्रप॑द्ये॒ वा॒युं प्रप॑द्येऽना॑तां दे॒वतां॑ प्रप॑द्येऽश्मा॑नमा॒खणं॑  
 प्रप॑द्ये प्र॒जाप॑तेर्ब्रह्म॒कोशं॑ ब्रह्म॒ प्रप॑द्य॒ ओं प्रप॑द्ये। अ॒न्तरि॑क्षं म उ॒र्वन्तरं॑ बृ॒हद॑ग्नयः  
 पर्व॑ताश्च॒ यया॑ वा॒तः स्व॒स्त्या स्व॑स्ति॒मान्त॑या॒ स्व॒स्त्या स्व॑स्ति॒मान॑सानि। प्रा॒णापा॑नौ  
 मृ॒त्योर्मा॑ पा॒तं प्रा॒णापा॑नौ॒ मा मा॑ हा॒सिष्टं॑ मयि॑ मे॒धां मयि॑ प्र॒जां मय्य॑ग्निस्तेजो॑

दधातु मयि मेधां मयि प्रजां मयीन्द्र इन्द्रियं दधातु मयि मेधां मयि प्रजां मयि  
सूर्यो भ्राजो दधातु॥१०॥

द्युभिरक्तुभिः परिपातमस्मानरिष्टेभिरश्विना सौभगेभिः। तन्नो मित्रो वरुणो  
मामहन्तामदितिः सिन्धुः पृथिवी उत द्यौः। कया नश्चित्र आ भुवदूती सदावृधः  
सखा। कया शचिष्ठया वृता। कस्त्वा सत्यो मदानां म॑हिष्ठो मथ्सदन्धसः।  
दृढाचिदारुजे वसु। अभी षु णः सखीनामविता जरितृणाम्। शतं भवास्यूतिभिः।  
वयः सुपर्णा उपसेदुरिन्द्रं प्रियमेधा ऋषयो नाधमानाः। अप ध्वान्तमूर्णुहि पृथि  
चक्षुर्मुमुग्ध्यस्मान्निधयेव बद्धान्॥११॥

शं नो देवीरभिष्टय आपो भवन्तु पीतये। शं योरभिस्रवन्तु नः। ईशाना वार्याणां  
क्षयन्तीश्चरषणीनाम्। अपो याचामि भेषजम्। सुमित्रा न आप ओषधयः सन्तु  
दुर्मित्रास्तस्मै भूयासुर्योऽस्मान्द्वेष्टि यं च वयं द्विष्मः। आपो हि ष्ठा मयोभुवस्ता  
न ऊर्जे दधातन। महे रणाय चक्षसे। यो वः शिवतमो रसस्तस्य भाजयतेह नः।

उ॒श॒ती॒रि॒व मा॒तरः॑। तस्मा॒ अरं॑ ग॒माम वो॒ यस्य॒ क्षया॑य॒ जिन्व॑न्थ॥९२॥

आपो॑ ज॒नय॑न्था च नः। पृ॒थि॒वी शा॒न्ता साऽग्नि॑ना॒ शा॒न्ता सा मे॑ शा॒न्ता शुचः॑  
 शम॑यतु। अ॒न्तरि॑क्षः शा॒न्तं तद्वा॒युना॑ शा॒न्तं तन्मे॑ शा॒न्तः शुचः॑ शम॑यतु। द्यौः  
 शा॒न्ता साऽऽदि॒त्येन॑ शा॒न्ता सा मे॑ शा॒न्ता शुचः॑ शम॑यतु। पृ॒थि॒वी शान्ति॑र॒न्तरि॑क्षः  
 शान्ति॑द्यौः शान्ति॑र्दिशः शान्ति॑रवा॒न्तर॑दिशाः शान्ति॑र॒ग्निः शान्ति॑र्वा॒युः शान्ति॑रादि॒त्यः  
 शान्ति॑श्च॒न्द्रमाः शान्ति॑र्नक्ष॑त्राणि शान्ति॑रापः शान्ति॑रोष॑धयः शान्ति॑र्वन॒स्पत॑यः  
 शान्ति॑र्गौः शान्ति॑र॒जा शान्ति॑र॒श्वः शान्तिः॑ पु॒रुषः॑ शान्ति॑र्ब्रह्म॒ शान्ति॑र्ब्राह्म॒णः शान्तिः॑  
 शान्ति॑रे॒व शान्तिः॑ शान्ति॑र्मे अस्तु॒ शान्तिः॑। तया॒हः शा॒न्त्या सर्व॑शा॒न्त्या मह्यं॑  
 द्वि॒पदे॑ चतु॑ष्पदे च शान्तिं॑ करोमि शान्ति॑र्मे अस्तु॒ शान्तिः॑। एह॒ श्रीश्च॑ ह्रीश्च  
 धृति॑श्च तपो॑ मे॒धा प्र॑ति॒ष्ठा श्र॒द्धा स॒त्यं धर्म॑श्चै॒तानि॑ मो॒त्तिष्ठ॑न्तमनू॒त्तिष्ठ॑न्तु मा  
 माः॑ श्रीश्च॑ ह्रीश्च॑ धृति॑श्च तपो॑ मे॒धा प्र॑ति॒ष्ठा श्र॒द्धा स॒त्यं धर्म॑श्चै॒तानि॑ मा मा  
 हा॑सिषुः। उ॒दायु॑षा स्वा॒युषो॑दोष॑धीनाः रसे॒नोत्प॑र्जन्य॒स्य शुष्मे॒णोद॑स्थाम॒मृताः॑

अनु॑। तच्चक्षु॑र्दे॒वहि॑तं पु॒रस्ता॑च्छु॒क्रमु॑चरत्। पश्ये॑म श॒रदः॑ श॒तं जीवे॑म श॒रदः॑  
 श॒तं नन्दा॑म श॒रदः॑ श॒तं मोदा॑म श॒रदः॑ श॒तं भवा॑म श॒रदः॑ श॒त९ शृ॑णवा॑म  
 श॒रदः॑ श॒तं प्रब्र॑वाम श॒रदः॑ श॒तमजी॑ताः स्याम श॒रदः॑ श॒तं ज्यो॑क्क सूर्यं दृ॒शे।  
 य उद॑गान्मह॒तोऽर्णवा॑द्विभ्राज॑मानः सरि॒रस्य॑ म॒ध्या॒थ्स मा॑ वृष॒भो लो॑हिताक्षः  
 सूर्यो॑ विप॒श्चिन्मन॑सा पुनातु। ब्रह्म॑ण॒श्चोत॑न्यसि ब्रह्म॑ण आ॒णी स्थो॑ ब्रह्म॑ण  
 आव॑प॒नम॑सि धा॒रिते॑यं पृ॒थि॒वी ब्रह्म॑णा म॒ही धा॑रि॒तमे॑नेन म॒हद॑न्तरि॒क्षं दि॒वं दा॑धार  
 पृ॒थि॒वी९ सदे॑वां यद॒हं वेद॑ तद॒हं धा॑रयाणि॒ मा म॒द्वेदो॑ऽधि॒विस्त्र॑सत्। मे॒धाम॑नी॒षे  
 मावि॑शता९ स॒मीची॑ भू॒तस्य॑ भ॒व्यस्याव॑रु॒ध्यै सर्व॑मायु॒रया॑णि॒ सर्व॑मायु॒रया॑णि।  
 आ॒भिर्गी॑र्भिर्यदतो॑ न ऊ॒नमा॑प्या॒यय॑ हरि॒वो वर्ध॑मानः। यदा स्तो॒तृभ्यो॑ महि॑ गो॒त्रा  
 रु॒जासि॑ भूयिष्ठ॒भाजो॑ अ॒धं ते॑ स्याम। ब्रह्म॑ प्रा॒वादि॑ष्म॒ तन्नो॑ मा हा॑सीत्। ॐ  
 शान्तिः॒ शान्तिः॒ शान्तिः॑॥१३॥

परा॒वतो॑ दधातु ब॒द्धां जि॒वन्थ॑ दृ॒शे सु॒प्त च॑॥ [४२]

नमो॑ वा॒चे या चो॑दि॒ता या चानु॑दिता॒ तस्यै॑ वा॒चे नमो॑ नमो॑ वा॒चे नमो॑

वाचस्पतये नम ऋषिभ्यो मन्त्रकृद्भ्यो मन्त्रपतिभ्यो मा मामृषयो मन्त्रकृतो मन्त्रपतयः  
 परादुर्माहमृषीन्मन्त्रकृतो मन्त्रपतीन्परादां वैश्वदेवीं वाचमुद्यासः शिवामदस्तां जुष्टां  
 देवेभ्यः शर्म मे द्यौः शर्म पृथिवी शर्म विश्वमिदं जगत्। शर्म चन्द्रश्च सूर्यश्च  
 शर्म ब्रह्मप्रजापती। भूतं वदिष्ये भुवनं वदिष्ये तेजो वदिष्ये यशो वदिष्ये तपो  
 वदिष्ये ब्रह्म वदिष्ये सत्यं वदिष्ये तस्मा अहमिदमुपस्तरणमुपस्तृण उपस्तरणं मे  
 प्रजायै पशूनां भूयादुपस्तरणमहं प्रजायै पशूनां भूयासं प्राणापानौ मृत्योर्मा पातं  
 प्राणापानौ मा मा हासिष्टं मधुं मनिष्ये मधुं जनिष्ये मधुं वक्ष्यामि मधुं वदिष्यामि  
 मधुमतीं देवेभ्यो वाचमुद्यासः शुश्रूषेण्यः मनुष्येभ्यस्तं मा देवा अवन्तु शोभायै  
 पितरोऽनुमदन्तु। ॐ शान्तिः शान्तिः शान्तिः॥



## ॥पञ्चमः प्रश्नः॥

ॐ शं न॒स्तन्नो॒ मा हा॑सीत्॥ ॐ शान्तिः॒ शान्तिः॒ शान्तिः॑॥

दे॒वा वै स॒त्रमा॑सत। ऋ॒द्धि॑परि॒मितं॒ यश॑स्का॒माः। ते॑ऽब्रुवन्। यन्नः॑ प्रथ॒मं यश॑  
ऋ॒च्छात्। सर्व॑ेषां न॒स्तत्स॒हास॒दिति॑। तेषां॑ कुरु॒क्षेत्रं॑ वेदि॒रासीत्। तस्यै॑ खाण्ड॒वो  
दक्षि॑णार्धं आ॑सीत्। तूर्ध्व॑मुत्तरार्धः। प॒री॒णञ्ज॑घनार्धः। म॒रुवं॑ उत्क॒रः॥१॥

तेषां॑ म॒खं वैष्ण॑वं यश॑ आर्च्छत्। तन्न्य॑कामयत। तेनापा॑क्रामत्। तं  
दे॒वा अन्वा॑यन्। यशो॑ऽव॒रुरु॑त्समा॒नाः। तस्या॒न्वाग॑तस्य। स॒व्याद्ध॑नुरजा॑यत।  
दक्षि॑णादिष॒वः। तस्मा॑दिषुध॒न्वं पु॒ण्य॑जन्म। य॒ज्ञज॑न्मा॒ हि॥२॥

तमेक॑ꣳ सन्तम्। ब॒हवो॑ नाभ्य॑धृष्णुवन्। तस्मा॑देक॑मिषुध॒न्विन॑म्।  
ब॒हवो॑ऽनिषुध॒न्वा नाभि॑धृष्णुवन्ति। सो॑ऽस्मयत। एकं॑ मा॒ सन्तं॑ ब॒हवो॑  
नाभ्य॑धर्षिषु॒रिति॑। तस्य॑ सिष्मि॒याण॑स्य तेजो॑ऽपा॑क्रामत्। तद्दे॒वा ओष॑धीषु  
न्य॑मृजुः। ते श्या॒माका॑ अभवन्। स्म॒याका॑ वै नामै॒ते॥३॥

तथ्स्मयाकांनां स्मयाकृत्वम्। तस्माद्दीक्षितेनापिगृह्यं स्मेतव्यम्। तेजसो धृत्यै।  
 स धनुः प्रतिष्कभ्यातिष्ठत्। ता उपदीका अब्रुवन्वरं वृणामहे। अथ व इमं  
 रन्धयाम। यत्र क्व च खनाम। तदपोऽभितृणदामेति। तस्मादुपदीका यत्र क्व च  
 खनन्ति। तदपोऽभितृन्दन्ति॥४॥

वारैवृतं ह्यासाम्। तस्य ज्यामप्यादन्। तस्य धनुर्विप्रवमाणं शिर  
 उदवर्तयत्। तद्वावापृथिवी अनुप्रावर्तत। यत्प्रावर्तत। तत्प्रवर्ग्यस्य प्रवर्ग्यत्वम्।  
 यद्वाँ(४)इत्यपतत्। तद्धर्मस्य घर्मत्वम्। महतो वीर्यमपत्तदिति। तन्महावीरस्य  
 महावीरत्वम्॥५॥

यदस्याः समभरन्। तथ्सम्राज्ञः सम्राट्त्वम्। तं स्तुतं देवतास्त्रेधा व्यगृह्णत।  
 अग्निः प्रातः सवनम्। इन्द्रो माध्यं दिनं सवनम्। विश्वेदेवास्तृतीयसवनम्।  
 तेनापशीर्ष्णा यज्ञेन यजमानाः। नाशिषोऽवारुन्धत। न सुवर्गं लोकमभ्यजयन्। ते  
 देवा अश्विनावब्रुवन्॥६॥



भिषजौ वै स्थः। इदं यज्ञस्य शिरः प्रतिधत्तमिति। तावंब्रूतां वरं वृणावहै।  
 ग्रहं एव नावत्रापि गृह्यतामिति। ताभ्यामेतमाश्विनमंगृह्णन्। तावेतद्यज्ञस्य शिरः  
 प्रत्यधत्ताम्। यत्प्रवर्ग्यः। तेन सशीर्ष्णा यज्ञेन यजमानाः। अवाशिषोऽरुन्धत।  
 अभि सुवर्गं लोकमजयन्। यत्प्रवर्ग्यं प्रवृणक्ति। यज्ञस्यैव तच्छिरः प्रतिदधाति।  
 तेन सशीर्ष्णा यज्ञेन यजमानः। अवाशिषो रुन्धे। अभि सुवर्गं लोकं जयति।  
 तस्मादेष आश्विनप्रवया इव। यत्प्रवर्ग्यः॥७॥ उत्करो ह्येते तृन्दन्ति महावीरत्वमंब्रुवन्नजयन्मस च॥—[१]

सावित्रं जुहोति प्रसूत्यै। चतुर्गृहीतेन जुहोति। चतुष्पादः पशवः। पशून्नेवावरुन्धे।  
 चतस्रो दिशः। दिक्ष्वैव प्रतितिष्ठति। छन्दांसि देवेभ्योऽपाक्रामन्। न वोऽभागानि  
 हव्यं वक्ष्याम इति। तेभ्य एतच्चतुर्गृहीतमधारयन्। पुरोनुवाक्यायै याज्यायै॥८॥

देवतायै वषट्काराय। यच्चतुर्गृहीतं जुहोति। छन्दांस्येव तत् प्रीणाति। तान्यस्य  
 प्रीतानि देवेभ्यो हव्यं वहन्ति। ब्रह्मवादिनो वदन्ति। होतव्यं दीक्षितस्य गृहा(३)इ न  
 होतव्या(३)मिति। हविर्वै दीक्षितः। यज्जुह्यात्। हविष्कृतं यजमानमग्नौ प्रदध्यात्।

यन्न जुहुयात्॥९॥

य॒ज्ञप॒रुरन्तरि॑यात्। यजु॑रे॒व व॑देत्। न ह॒विष्कृतं॑ यज॑मानम॒ग्नौ प्र॑दधाति।  
न य॒ज्ञप॒रुरन्तरै॑ति। गा॒य॒त्री छ॒न्दा॒ऽस्य॑त्य॒मन्य॑त। तस्यै॑ वष॒ट्कारो॑ऽभ्यय्य॒  
शिरो॑ऽच्छिनत्। तस्यै॑ द्वेधा र॒सः परा॑पतत्। पृ॒थि॒वीम॒र्धः प्रावि॑शत्। प॒शून॒र्धः। यः  
पृ॒थि॒वीं प्रावि॑शत्॥१०॥

स ख॑दि॒रोऽभव॑त्। यः प॒शून्। सोऽजा॑म्। यत्खा॑दिर्य॒ग्निर्भव॑ति। छ॒न्द॑सामे॒व  
रसे॑न य॒ज्ञस्य॑ शि॒रः सम्भ॑रति। यदौदु॑म्बरी। ऊ॒र्वा उ॑दु॒म्बरः॑। ऊ॒र्जै॒व य॒ज्ञस्य॑ शि॒रः  
सम्भ॑रति। यद्वै॒ण॒वी। तेजो॒ वै वेणुः॑॥११॥

तेज॑सै॒व य॒ज्ञस्य॑ शि॒रः सम्भ॑रति। यद्वैक॑ङ्कती। भा ए॒वाव॑रुन्धे। दे॒वस्य॑ त्वा  
सवि॒तुः प्र॑स॒व इत्य॑ग्नि॒माद॑त्ते प्र॒सू॑त्यै। अ॒श्विनो॑र्बा॒हुभ्या॑मित्या॒ह। अ॒श्विनो॑ हि  
दे॒वाना॑म॒ध्वर्यू॑ आस्ता॑म्। पू॒ष्णो ह॑स्ता॒भ्या॑मित्या॒ह य॒त्यै। वज्रं॑ इ॒व वा ए॒षा।  
यद॑ग्निः। अ॒ग्नि॑र॒सि ना॑रि॒रसी॑त्या॒ह शान्त्यै॑॥१२॥

अध्वर॒कृद्दे॒वेभ्य॒ इत्या॑ह। य॒ज्ञो वा अ॑ध्वरः। य॒ज्ञकृद्दे॒वेभ्य॒ इति॒ वावै॑तदा॑ह। उत्ति॑ष्ठ  
ब्रह्म॑णस्पत॒ इत्या॑ह। ब्रह्म॑णैव य॒ज्ञस्य॒ शिरो॑ऽच्छै॑ति। प्रैतु॒ ब्रह्म॑णस्पति॒रित्या॑ह। प्रेत्यै॒व  
य॒ज्ञस्य॒ शिरो॑ऽच्छै॑ति। प्र दे॒व्यैतु॑ स॒नृतेत्या॑ह। य॒ज्ञो वै स॒नृता॑। अ॒च्छा वी॒रं न॑र्यं  
प॒ङ्क्तिरा॑धस॒मित्या॑ह॥१३॥

पाङ्क्तो॑ हि य॒ज्ञः। दे॒वा य॒ज्ञं न॑यन्तु न॒ इत्या॑ह। दे॒वाने॒व य॑ज्ञ॒नियः॑ कुरुते। देवी॑  
द्यावा॑पृथि॒वी अ॒नु मे म॑सा॒थामि॑त्या॑ह। आ॒भ्यामे॒वानु॑मतो य॒ज्ञस्य॒ शिरः॑ सम्भ॑रति।  
ऋ॒द्ध्यास॑म॒द्य म॒खस्य॒ शिर॒ इत्या॑ह। य॒ज्ञो वै म॒खः। ऋ॒द्ध्यास॑म॒द्य य॒ज्ञस्य॒ शिर॒ इति॒  
वावै॑तदा॑ह। म॒खाय॑ त्वा म॒खस्य॑ त्वा शी॒र्ष्ण इत्या॑ह। नि॒र्दिश्यै॒वैन॑द्धरति॥१४॥

त्रि॒र्हर॑ति। त्रय॑ इ॒मे लो॒काः। ए॒भ्य ए॒व लो॒केभ्यो॑ य॒ज्ञस्य॒ शिरः॑ सम्भ॑रति।  
तू॒ष्णीं च॑तु॒र्थं ह॑रति। अ॒प॑रि॒मिता॑दे॒व य॒ज्ञस्य॒ शिरः॑ सम्भ॑रति। मृ॒त्ख॒नाद॑ग्रे॒ हर॑ति।  
तस्मा॑न्मृ॒त्ख॒नः क॑रु॒ण्यं तरः॑। इ॒य॒त्यग्रं॑ आसी॒रित्या॑ह। अ॒स्यामे॒वाछं॑म्ब॒द्गारं॑ य॒ज्ञस्य॒  
शिरः॑ सम्भ॑रति। ऊ॒र्जं वा ए॒तं र॑सं पृथि॒व्या उ॑प॒दीका॒ उद्दि॑हन्ति॥१५॥

यद्वल्मीकम्। यद्वल्मीकवपा सम्भारो भवति। ऊर्जमेव रसं पृथिव्या अवरुन्धे।  
अथो श्रोत्रमेव। श्रोत्रं ह्येतत्पृथिव्याः। यद्वल्मीकः। अबधिरो भवति। य एवं वेद।  
इन्द्रो वृत्राय वज्रमुदयच्छत्। स यत्र यत्र पराक्रमत॥१६॥

तत्राद्धियत। स पूतीकस्तम्बे पराक्रमत। सोऽद्धियत। सोऽब्रवीत्। ऊतिं वै मे  
धा इति। तदूतीकानामूतीकत्वम्। यदूतीका भवन्ति। यज्ञायैवोतिं दधति। अग्निजा  
असि प्रजापते रेत इत्याह। य एव रसः पशून्प्राविशत्॥१७॥

तमेवावरुन्धे। पञ्चैते सम्भारा भवन्ति। पाङ्क्तो यज्ञः। यावानेव यज्ञः। तस्य  
शिरः सम्भरति। यद्ग्राम्याणां पशूनां चर्मणा सम्भरेत्। ग्राम्यान्पशूञ्छुचाऽर्पयेत्।  
कृष्णाजिनेन सम्भरति। आरण्यानेव पशूञ्छुचारपयति। तस्मात्समावत्पशूनां  
प्रजायमानानाम्॥१८॥

आरण्याः पशवः कनीयाः सः। शुचा ह्यृताः। लोमतः सम्भरति। अतो ह्यस्य  
मेध्यम्। परिगृह्या यन्ति। रक्षसामपहत्यै। बहवो हरन्ति। अपचितिमेवास्मिन्दधति।

उद्धते॒ सिक॑तोपो॒प्ते परि॑श्रिते॒ निद॑धति॒ शान्त्यै॑। मद॑न्तीभि॒रुप॑ सृजति॥१९॥

तेज॑ ए॒वास्मि॑न्दधाति। मधु॑ त्वा मधु॒ला क॑रोत्वित्या॑ह। ब्रह्म॑णै॒वास्मि॑न्तेजो॑  
दधाति। यद्वा॒म्याणां॑ पात्रा॑णां क॒पालैः॑ स॒सृजे॑त्। ग्रा॒म्याणि॑ पात्रा॑णि शु॒चाऽर्प॑येत्।  
अ॒र्मक॒पालैः॑ स॒सृज॑ति। ए॒तानि॑ वा अ॒नुप॑जीवनी॒यानि॑। तान्ये॒व शु॒चा॒र्पय॑ति।  
शर्करा॑भिः स॒सृज॑ति धृत्यै॑। अथो॑ श॒न्त्वाय॑। अ॒ज॒लो॒मैः स॒सृज॑ति। ए॒षा वा अ॒ग्नेः  
प्रि॒या त॒नूः। यद॒जा। प्रि॒ययै॑वैनं॑ त॒नुवा॑ स॒सृज॑ति। अथो॑ तेज॑सा। कृ॒ष्णाजि॑नस्य॒  
लोम॑भिः स॒सृज॑ति। य॒ज्ञो वै कृ॑ष्णाजि॒नम्। य॒ज्ञेनै॒व य॒ज्ञं स॒सृज॑ति॥२०॥  
याज्याये॒ न जु॑हुयादवि॒शद्वेणुः॑ शान्त्यै॑ प॒ङ्क्तिर॑ध॒समित्या॑ह॒ हरति॑ दिहन्ति॒ पुरा॑क॒मता॑र्विशत् प्र॒जार्य॑मानानां॒ सृज॑ति श॒न्त्वाया॑ष्टो च॥[२]

परि॑श्रिते करोति। ब्रह्म॑व॒र्चस॑स्य॒ परि॑गृहीत्यै। न कु॒र्वन्न॒भि प्रा॑ण्यात्। यत्कु॒र्वन्न॒भि  
प्रा॑ण्यात्। प्रा॒णाञ्छु॑चा॒र्पये॑त्। अ॒प॒हाय॑ प्राणि॑ति। प्रा॒णानां॑ गोपी॒थाय॑। न प्र॑व॒र्ग्य  
चाऽऽदि॒त्यं चा॒न्तरे॑यात्। यद॑न्तरे॒यात्। दु॒श्च॒र्मा स्या॑त्॥२१॥

तस्मा॒न्नान्तरा॑य्यम्। आ॒त्मनो॑ गोपी॒थाय॑। वेणु॑ना करोति। तेजो॑ वै वेणुः॑। तेजः॑

प्रव॒र्ग्यः॑। तेज॑सैव तेजः॒ सम॑र्धयति। म॒खस्य॒ शिरो॒ऽसीत्या॑ह। य॒ज्ञो वै म॒खः।  
तस्यै॒तच्छि॑रः॑। यत्प्र॑व॒र्ग्यः॑॥ २२॥

तस्मा॑दे॒वमा॑ह। य॒ज्ञस्य॑ प॒दे स्थ॒ इत्या॑ह। य॒ज्ञस्य॒ ह्येते॑ प॒दे। अथो॒ प्रति॑ष्ठित्यै।  
गा॒य॒त्रेण॑ त्वा॒ छन्द॑सा करो॒मीत्या॑ह। छन्दो॑भिरे॒वेन॑ करोति। त्र्यु॒द्धिं करोति॑। त्रयं  
इ॒मे लो॒काः। ए॒षां लो॒काना॑मा॒प्त्यै॑। छन्दो॑भिः करोति॥ २३॥

वी॒र्यं॑ वै छन्दा॑सि। वी॒र्ये॑णै॒वेन॑ करोति। य॒जुषा॑ बि॒लं करोति॒ व्यावृ॑त्यै। इ॒यं तं  
करोति॑। प्र॒जाप॑तिना य॒ज्ञमु॒खेन॒ सम्मि॑तम्। इ॒यं तं करोति॑। य॒ज्ञप॒रुषा॑ सम्मि॑तम्।  
इ॒यं तं करोति॑। ए॒ताव॑द्वै पु॒रुषे॑ वी॒र्यम्॑। वी॒र्यस॑म्मि॒तम्॥ २४॥

अप॑रिमितं करोति। अप॑रिमि॒तस्याव॑रुद्धौ। प॒रि॒ग्री॒वं करोति॒ धृत्यै॑। सूर्य॑स्य  
हर॑सा श्रा॒येत्या॑ह। य॒था॒य॒जुरे॒वैतत्। अ॒श्वश॑केन॒ धूप॑यति। प्रा॒जाप॑त्यो वा अ॒श्वः  
सयो॑नि॒त्वाय॑। वृ॒ष्णो अ॒श्वस्य॑ नि॒ष्पद॑सीत्या॑ह। अ॒सौ वा आ॑दि॒त्यो वृ॒षाऽश्वः॑। तस्य॒  
छन्दा॑सि नि॒ष्पत्॥ २५॥

छन्दोभिरेवैनं धूपयति। अर्चिषे त्वा शोचिषे त्वेत्याह। तेजं एवास्मिन्दधाति।  
 वारुणोऽभीद्धः। मैत्रियोपैति शान्त्यै। सिद्धौ त्वेत्याह। यथायजुरेवैतत्। देवस्त्वा  
 सवितोद्वपत्वित्याह। सवितृप्रसूत एवैनं ब्रह्मणा देवताभिरुद्वपति। अपद्यमानः  
 पृथिव्यामाशा दिश आपृणेत्याह॥२६॥

तस्मादग्निः सर्वा दिशोऽनु विभाति। उत्तिष्ठ बृहन्मवोर्ध्वस्तिष्ठ ध्रुवस्त्वमित्याह  
 प्रतिष्ठित्यै। ईश्वरो वा एषोऽन्धो भवितोः। यः प्रवर्ग्यमन्वीक्षते। सूर्यस्य त्वा  
 चक्षुषाऽन्वीक्ष इत्याह। चक्षुषो गोपीथाय। ऋजवे त्वा साधवे त्वा सुक्षित्यै त्वा  
 भूत्यै त्वेत्याह। इयं वा ऋजुः। अन्तरिक्षं साधु। असौ सुक्षितिः॥२७॥

दिशो भूतिः। इमानेवास्मै लोकान्कल्पयति। अथो प्रतिष्ठित्यै। इदमहममुमामुष्यार  
 विशा पशुभिर्ब्रह्मवर्चसेन पर्यहामीत्याह। विशैवेन पशुभिर्ब्रह्मवर्चसेन पर्यहति।  
 विशेति राजन्यस्य ब्रूयात्। विशैवेन पर्यहति। पशुभिरिति वैश्यस्य। पशुभिरेवैनं  
 पर्यहति। असुर्य पात्रमनाच्छृणम्॥२८॥

आच्छृणत्ति। देवत्राकः। अजक्षीरेणाऽऽच्छृणत्ति। पुरं वा एतत्पयः।  
यदजक्षीरम्। पुरमेणैवैनं पयसाऽऽच्छृणत्ति। यजुषा व्यावृत्यै। छन्दोभिराच्छृणत्ति।  
छन्दोभिर्वा एष क्रियते। छन्दोभिरेव छन्दाऽस्याच्छृणत्ति। छृन्धि वाचमित्याह।  
वाचमेवावरुन्धे। छृन्ध्यूर्जमित्याह। ऊर्जमेवावरुन्धे। छृन्धि हविरित्याह।  
हविरेवाकः। देव पुरश्चर सध्यासन्त्वेत्याह। यथायजुरेवैतत्॥ २९॥ स्याद्यत्त्र्यग्यं छन्दोभिः करोति  
वीर्यसम्मितं छन्दांसि निष्पत्स्युत्याह सुक्षितिरनाच्छृणुच्छन्दाऽस्याच्छृणत्त्यष्टौ च॥ [३]

ब्रह्मन्प्रचरिष्यामो होतर्धर्ममभिष्टुहीत्याह। एष वा एतर्हि बृहस्पतिः। यद्वह्मा।  
तस्मा एव प्रतिप्रोच्य प्रचरति। आत्मनोऽनात्यै। यमाय त्वा मखाय त्वेत्याह।  
एता वा एतस्य देवताः। ताभिरेवैनं समर्धयति। मदन्तीभिः प्रोक्षति। तेजं  
एवास्मिन्दधाति॥ ३०॥

अभिपूर्वं प्रोक्षति। अभिपूर्वमेवास्मिन्तेजो दधाति। त्रिः प्रोक्षति। त्र्यावृद्धि यज्ञः।  
अथो मेध्यत्वाय। होताऽन्वाह। रक्षसामपहत्यै। अनवानम्। प्राणानां सन्तत्यै।  
त्रिष्टुभः सतीर्गायत्रीरिवान्वाह॥ ३१॥



गाय॒त्रो हि प्रा॒णः। प्रा॒णमे॒व यज॑माने दधाति। सन्त॑त॒मन्वा॑ह। प्रा॒णाना॑म॒न्नाद्य॑स्य  
सन्त॑त्यै। अथो॒ रक्ष॑सा॒मर्प॑हत्यै। यत्प॑रि॒मिता॑ अनु॒ब्रूयात्। परि॑मित॒मव॑रुन्धीत।  
अप॑रि॒मिता॑ अन्वा॑ह। अप॑रि॒मित॒स्याव॑रुद्धै। शिरो॒ वा ए॒तद्य॒ज्ञस्य॑॥३२॥

यत्प्र॑व॒र्ग्यः। ऊ॒र्ङ्मु॒ञ्जः। यन्मौ॒ञ्जो वे॒दो भव॑ति। ऊ॒र्जे॒व य॒ज्ञस्य॑ शि॒रः स॑म॒र्धय॑ति।  
प्रा॒णा॒हुती॑र्जु॒होति॑। प्रा॒णाने॒व यज॑माने दधाति। स॒प्त जु॑होति। स॒प्त वै शी॑र्ष॒ण्याः  
प्रा॒णाः। प्रा॒णाने॒वास्मि॑न्दधाति। दे॒वस्त्वा॑ स॒विता॑ म॒ध्वाऽन॑त्क्रित्या॑ह॥३३॥

तेज॑सै॒वैन॑मनक्ति। पृ॒थि॒वीं तप॑स॒स्त्राय॑स्वेति॒ हिर॑ण्य॒मुपा॑स्यति। अ॒स्या  
अन॑तिदाहाय। शिरो॒ वा ए॒तद्य॒ज्ञस्य॑। यत्प्र॑व॒र्ग्यः। अ॒ग्निः सर्वा॑ दे॒वताः॑।  
प्र॒ल॒वाना॑दी॒प्योपा॑स्यति। दे॒वता॑स्वे॒व य॒ज्ञस्य॑ शि॒रः प्र॑ति॒दधा॑ति। अप्र॑तिशीर्णा॒ग्रं  
भव॑ति। ए॒तद्व॑र्हि॒रह्ये॑षः॥३४॥

अ॒र्चिर॑सि शो॒चिर॑सीत्या॑ह। तेज॑ ए॒वास्मि॑न्ब्रह्मव॒र्चसं॑ द॒धाति॑। स॒सी॑दस्व  
म॒हा॒ अ॒सीत्या॑ह। म॒हान् ह्ये॑षः। ब्र॒ह्म॒वा॒दिनो॑ वदन्ति। ए॒ते वा॒व त ऋ॒त्विजः॑।

ये दर्शपूर्णमासयौः। अथ कथा होता यजमानायाऽऽशिषो नाशास्तु इति।  
पुरस्तादाशीः खलु वा अन्यो यज्ञः। उपरिष्ठादाशीरन्यः॥३५॥

अनाधृष्या पुरस्तादिति यदेतानि यजूंष्याहं। शीरूषत एव यज्ञस्य यजमान  
आशिषोऽवरुन्धे। आयुः पुरस्तादाह। प्रजां दक्षिणतः। प्राणं पश्चात्। श्रोत्रमुत्तरतः।  
विधृतिमुपरिष्ठात्। प्राणानेवास्मै समीचो दधाति। ईश्वरो वा एष दिशोऽनून्मदितोः।  
यं दिशोऽनु व्यास्थापयन्ति॥३६॥

मनोरश्वासि भूरिपुत्रेतीमामभिमृशति। इयं वै मनोरश्वा भूरिपुत्रा। अस्यामेव  
प्रतिष्ठित्यनुन्मादाय। सूपसदा मे भूया मा मां हिंसीरित्याहाहिंसायै। चितः  
स्थ परिचित इत्याह। अपचितिमेवास्मिन्दधाति। शिरो वा एतद्यज्ञस्य। यत्प्रवर्ग्यः।  
असौ खलु वा आदित्यः प्रवर्ग्यः। तस्य मरुतो रश्मयः॥३७॥

स्वाहा मरुद्भिः परिश्रयस्वेत्याह। अमुमेवाऽऽदित्यं रश्मिभिः पर्यूहति।  
तस्मादसावादित्योऽमुष्मिल्लोके रश्मिभिः पर्यूढः। तस्माद्राजा विशा पर्यूढः।

तस्माद्द्वाम॑णीः स॑जा॒तैः पर्यू॑ढः। अ॒ग्नेः सृष्ट॑स्य॒ यतः॑। वि॒कङ्क॑तं॒ भा आ॑र्च्छत्।  
यद्वै॒कङ्क॑ताः परि॒धयो॑ भव॑न्ति। भा ए॒वाव॑रुन्धे। द्वा॒दश॑ भव॑न्ति॥३८॥

द्वा॒दश॑ मा॒साः संव॑त्सरः। संव॑त्सरमे॒वाव॑रुन्धे। अस्ति॑ त्रयो॒दशो॑  
मास॒ इत्या॑हुः। यत्र॑यो॒दशः परि॑धिर्भव॑ति। तेनै॒व त्रयो॑द॒शं मा॒सम॑वरुन्धे।  
अ॒न्तरि॑क्षस्यान्त॒र्धिर्सी॒त्याहु॑ व्यावृ॒त्त्यै। दि॒वं तप॑स॒स्त्राय॑स्वेत्यु॒परि॑ष्टा॒द्धिर॑ण्य॒मधि॑  
नि॒दधा॑ति। अ॒मुष्या॑ अ॒न॒ति॒दाहा॑य। अथो॑ आ॒भ्यामे॒वैन॑मु॒भय॑तः॒ परि॑गृह्णाति।  
अ॒र्हन् बि॒भर्षि॑ साय॑कानि॒ धन्वे॑त्याहु॥३९॥

स्तौत्ये॒वैन॑मे॒तत्। गा॒य॒त्रम॑सि॒ त्रैष्टु॑भमसि॒ जाग॑तम॒सीति॑ ध॒वित्रा॑ण्याद॒त्ते।  
छ॒न्दो॑भिरे॒वैनान्या॑द॒त्ते। मधु॑ म॒ध्विति॑ धू॒नोति॑। प्रा॒णो वै मधु॑। प्रा॒णमे॒व यज॑माने  
दधा॑ति। त्रिः परि॑यन्ति। त्रि॒वृद्धि॑ प्रा॒णः। त्रिः परि॑यन्ति। त्र्या॒वृद्धि॑ य॒ज्ञः॥४०॥

अथो॑ रक्ष॑सा॒मप॑हत्यै। त्रिः पुनः॑ परि॑यन्ति। षट्त्स॒म्पद्य॑न्ते। षड्वा ऋ॒तवः॑।  
ऋ॒तुष्वे॒व प्र॑ति॒तिष्ठ॑न्ति। यो वै घ॒र्मस्य॑ प्रि॒यां त॒नुव॑मा॒क्राम॑ति। दु॒श्चर्मा॑ वै स भ॑वति।

ए॒ष ह॒ वा अ॒स्य प्रि॒यां त॒नुव॒माक्रा॑मति। यत्रिः प॒रीत्य॑ चतु॒र्थं पर्ये॑ति। ए॒ता॒ ५ ह॒  
वा अ॒स्यो॒ग्रदे॒वो रा॒ज॒निराच॑क्राम॥४१॥

ततो॒ वै स दु॒श्चर्मा॑ऽभवत्। तस्मा॒त्रिः प॒रीत्य॑ न च॒तुर्थं॑ प॒रीयात्। आ॒त्मनो॑  
गोपी॒थाय॑। प्रा॒णा वै ध॒वित्रा॑णि। अव्य॑तिषङ्गं धू॒न्वन्ति। प्रा॒णाना॒मव्य॑तिषङ्गाय॒ कृ॒ष्यै।  
वि॒नि॒षद्य॑ धू॒न्वन्ति। दि॒क्ष्वे॒व प्र॒ति॒ति॒ष्ठन्ति। ऊ॒र्ध्वं धू॒न्वन्ति। सु॒व॒र्गस्य॑ लो॒कस्य॑  
सम॑ष्ट्यै। स॒र्वतो॑ धू॒न्वन्ति। तस्मा॑द्य॒ ५ स॒र्वतः॑ पवते॥४२॥ दधातीवान्वाह यज्ञस्याहृष उपरिष्टादाशीरन्यो  
व्यास्थापर्यन्ति रश्मयो भवन्ति धन्वेत्याह यज्ञश्चक्राम समंष्ट्ये द्वे च॥

[४]

अ॒ग्नि॒ष्ट्वा वसु॑भिः पु॒रस्ता॑द्रोचयतु गाय॒त्रेण॑ छन्द॒सेत्या॑ह। अ॒ग्निरे॒वैनं॑ वसु॑भिः  
पु॒रस्ता॑द्रोचयति गाय॒त्रेण॑ छन्द॒सा। स मा॑ रुचि॒तो रोच॑येत्या॑ह। आ॒शिष॑मे॒वैता॑मा  
शा॑स्ते। इन्द्र॑स्त्वा रु॒द्रैर्दक्षि॑ण॒तो रोच॑यतु त्रैष्टु॒भेन॑ छन्द॒सेत्या॑ह। इन्द्र॑ ए॒वैनं॑  
रु॒द्रैर्दक्षि॑ण॒तो रोच॑यति त्रैष्टु॒भेन॑ छन्द॒सा। स मा॑ रुचि॒तो रोच॑येत्या॑ह।  
आ॒शिष॑मे॒वैता॑मा शा॑स्ते। वरु॑णस्त्वाऽऽदि॒त्यैः प॒श्चाद्रो॑चयतु जा॒गते॑न॒ छन्द॒सेत्या॑ह।

वरुण ए॒वैन॑मादि॒त्यैः प॒श्चाद्रो॑चयति॒ जाग॑तेन॒ छन्द॑सा॥४३॥

स मा॑ रुचि॒तो रो॑चयेत्या॒ह। आ॒शिष॑मे॒वैता॒मा शा॑स्ते। द्युता॒नस्त्वा॑ मा॒रुतो॑  
म॒रुद्भि॑रुत्तर॒तो रो॑चय॒त्वानु॑ष्टु॒भेन॒ छन्द॑सेत्या॒ह। द्युता॒न ए॒वैन॑ मा॒रुतो॑ म॒रुद्भि॑रुत्तर॒तो  
रो॑चय॒त्वानु॑ष्टु॒भेन॒ छन्द॑सा। स मा॑ रुचि॒तो रो॑चयेत्या॒ह। आ॒शिष॑मे॒वैता॒मा शा॑स्ते।  
बृह॒स्पति॑स्त्वा॒ विश्वै॑र्दे॒वैरु॒परि॑ष्ठाद्रोचयतु॒ पाङ्के॑न॒ छन्द॑सेत्या॒ह। बृह॒स्पति॑रे॒वैनं॑  
विश्वै॑र्दे॒वैरु॒परि॑ष्ठाद्रोचयति॒ पाङ्के॑न॒ छन्द॑सा। स मा॑ रुचि॒तो रो॑चयेत्या॒ह।  
आ॒शिष॑मे॒वैता॒मा शा॑स्ते॥४४॥

रो॒चित॑स्त्वं दे॒व घ॑र्म दे॒वेष्व॑सीत्या॒ह। रो॒चितो॑ ह्ये॒ष दे॒वेषु॑। रो॒चि॒षी॒याहं॑  
म॒नुष्यै॑ष्वि॒त्याह॑। रोच॑त ए॒वेष॑ म॒नुष्यै॑षु। सम्रा॑द्धर्म रुचि॒तस्त्वं दे॒वेष्वायु॑ष्मा॒स्तेज॒स्वी  
ब्र॑ह्मवर्चस्य॑सीत्या॒ह। रुचि॒तो ह्ये॒ष दे॒वेष्वायु॑ष्मा॒स्तेज॒स्वी ब्र॑ह्मवर्चसी।  
रुचि॒तोऽहं॑ म॒नुष्यै॑ष्वायु॑ष्मा॒स्तेज॒स्वी ब्र॑ह्मवर्चसी भू॒यास॑मित्या॒ह। रुचि॒त  
ए॒वेष॑ म॒नुष्यै॑ष्वायु॑ष्मा॒स्तेज॒स्वी ब्र॑ह्मवर्चसी भ॑वति। रु॒गसि॑ रुचं॒ मयि॑ धेहि॒ मयि॑

रुगित्याह। आशिषमेवेतामा शास्ते। तं यदेतैर्यजुर्भिररोचयित्वा। रुचितो घर्म इति प्रब्रूयात्। अरोचुकोऽध्वर्युः स्यात्। अरोचुको यजमानः। अथ यदेनमेतैर्यजुर्भीरोचयित्वा। रुचितो घर्म इति प्राह। रोचुकोऽध्वर्युर्भवति। रोचुको यजमानः॥४५॥

पश्चाद्रौचयति जागतेन छन्दसा पाङ्केन छन्दसा स मां रुचितो रौचयेत्याहाशिषमेवेतामाशास्ते शास्तेऽष्टौ च॥ [५]

शिरो वा एतद्यज्ञस्य। यत्प्रवर्ग्यः। ग्रीवा उपसदः। पुरस्तादुपसदां प्रवर्ग्यं प्रवृणक्ति। ग्रीवास्वेव यज्ञस्य शिरः प्रतिदधाति। त्रिः प्रवृणक्ति। त्रयं इमे लोकाः। एभ्य एव लोकेभ्यो यज्ञस्य शिरोऽवरुन्धे। षट्थसम्पद्यन्ते। षड्वा ऋतवः॥४६॥

ऋतुभ्य एव यज्ञस्य शिरोऽवरुन्धे। द्वादशकृत्वः प्रवृणक्ति। द्वादश मासाः संवत्सरः। संवत्सरादेव यज्ञस्य शिरोऽवरुन्धे। चतुर्विंशतिः सम्पद्यन्ते। चतुर्विंशतिरर्धमासाः। अर्धमासेभ्य एव यज्ञस्य शिरोऽवरुन्धे। अथो खलु। सकृदेव प्रवृज्यः। एकं हि शिरः॥४७॥

अग्निष्टोमे प्रवृणक्ति। एतावान् वै यज्ञः। यावानग्निष्टोमः। यावानेव यज्ञः। तस्य शिरः प्रतिदधाति। नोक्थ्यै प्रवृज्यात्। प्रजा वै पशव उक्थानि। यदुक्थ्यै प्रवृज्यात्।

प्रजां पशूनस्य निर्दहेत्। विश्वजिति सर्वपृष्ठे प्रवृणक्ति॥४८॥

पृष्ठानि वा अच्युतं च्यावयन्ति। पृष्ठैरेवास्मा अच्युतं च्यावयित्वाऽवरुन्धे। अपश्यं गोपामित्याह। प्राणो वै गोपाः। प्राणमेव प्रजासु वियातयति। अपश्यं गोपामित्याह। असौ वा आदित्यो गोपाः। स हीमाः प्रजा गोपायति। तमेव प्रजानां गोप्सारं कुरुते। अनिपद्यमानमित्याह॥४९॥

न ह्येष निपद्यते। आ च परा च पृथिभिश्चरन्तमित्याह। आ च ह्येष परा च पृथिभिश्चरति। स सध्रीचीः स विषूचीर्वसान् इत्याह। सध्रीचींश्च ह्येष विषूचीश्च वसानः प्रजा अभि विपश्यति। आवरीवर्ति भुवनेष्वन्तरित्याह। आ ह्येष वरीवर्ति भुवनेष्वन्तः। अत्र प्रावीर्मधु माध्वीभ्यां मधु माधूचीभ्यामित्याह। वासन्तिकावेवास्मा ऋतू कल्पयति। समग्निरग्निना गतेत्याह॥५०॥

ग्रेष्मावेवास्मा ऋतू कल्पयति। समग्निरग्निना गतेत्याह। अग्निर्ह्येवेषोऽग्निना सङ्गच्छते। स्वाहा समग्निस्तपसा गतेत्याह। पूर्वमेवोदितम्। उत्तरेणाभिगृणाति।

धृ॒ता दि॒वो विभा॑सि॒ रज॑सः पृथि॒व्या इत्या॑ह। शा॒र॒दावे॒वास्मा॑ ऋ॒तू क॑ल्पयति॥५१॥

दि॒वि दे॒वेषु॑ हो॒त्रा य॒च्छे॒त्या॑ह। हो॒त्राभि॑रे॒वेमाँ॑ल्लो॒कान्त्स॑न्दधाति। वि॒श्वा॑सां  
भुवां प॒त इत्या॑ह। हैम॑न्तिकावे॒वास्मा॑ ऋ॒तू क॑ल्पयति। दे॒वश्रू॑स्त्वं दे॒व घ॑र्म  
दे॒वान्पा॒हीत्या॑ह। शै॒शिरा॑वे॒वास्मा॑ ऋ॒तू क॑ल्पयति। त॒पो॒जां वाच॑म॒स्मे नि॒यच्छ॑  
दे॒वायु॑व॒मित्या॑ह। या वै मे॒ध्या वाक्। सा त॑पो॒जाः। ता॒मे॒वाव॑रुन्धे॥५२॥

ग॒र्भो दे॒वाना॑मि॒त्या॑ह। ग॒र्भो ह्ये॑ष दे॒वाना॑म्। पि॒ता म॑ती॒नामि॒त्या॑ह। प्र॒जा वै  
म॒तयः॑। तासा॑मे॒ष ए॒व पि॒ता। यत्प्र॑व॒र्ग्यः। तस्मा॑दे॒वमा॑ह। पतिः॑ प्र॒जाना॑मि॒त्या॑ह।  
पति॒र्ह्ये॑ष प्र॒जाना॑म्। म॒तिः क॒वीना॑मि॒त्या॑ह॥५३॥

म॒ति॒र्ह्ये॑ष क॒वीना॑म्। सं दे॒वो दे॒वेन॑ सवि॒त्रा य॑तिष्ठ॒ स॒ सूर्ये॑णारु॒क्तेत्या॑ह। अ॒मुं  
चै॒वाऽऽदि॒त्यं प्र॑व॒र्ग्यं च॒ स॒ शा॑स्ति। आ॒यु॒र्दा॒स्त्वम॒स्मभ्य॑ घ॒र्म वर्चो॑दा अ॒सीत्या॑ह।  
आ॒शिष॑मे॒वैता॑मा शा॑स्ते। पि॒ता नो॑ऽसि पि॒ता नो॑ बो॒धेत्या॑ह। बो॒धय॑त्ये॒वैन॑म्। न  
वै ते॑ऽवका॒शा भ॑वन्ति। प॒त्न्यै द॑श॒मः। न॒व वै पु॑रु॒षे प्रा॒णाः॥५४॥



नाभिर्दशमी। प्राणानेव यजमाने दधाति। अथो दशाक्षरा विराट्। अन्नं विराट्।  
विराजैवान्नाद्यमवरुन्धे। यज्ञस्य शिरोऽच्छिद्यत। तद्देवा होत्राभिः प्रत्यदधुः।  
ऋत्विजोऽवेक्षन्ते। एता वै होत्राः। होत्राभिरेव यज्ञस्य शिरः प्रतिदधाति॥५५॥

रुचितमवेक्षन्ते। रुचिताद्वै प्रजापतिः प्रजा असृजत। प्रजानां सृष्ट्यै।  
रुचितमवेक्षन्ते। रुचिताद्वै पर्जन्यो वर्षति। वर्षुकः पर्जन्यो भवति। सं प्रजा  
एधन्ते। रुचितमवेक्षन्ते। रुचितं वै ब्रह्मवर्चसम्। ब्रह्मवर्चसिनो भवन्ति॥५६॥

अधीयन्तोऽवेक्षन्ते। सर्वमायुरयन्ति। न पत्यवेक्षेत। यत्पत्यवेक्षेत। प्रजायेत।  
प्रजां त्वस्यै निर्दहेत्। यन्नावेक्षेत। न प्रजायेत। नास्यै प्रजां निर्दहेत्। तिरस्कृत्य  
यजुर्वाचयति। प्रजायते। नास्यै प्रजां निर्दहति। त्वष्टीमती ते सपेयेत्याह। सपाद्धि  
प्रजाः प्रजायन्ते॥५७॥ ऋतवो हि शिरः सर्वपृष्ठे प्रवृणुतबर्निपद्यमानमित्याह गतेत्याह शारदावेवास्मां ऋतू कल्पयति रुन्धे कवीनामित्याह

प्राणाः प्रतिदधाति भवन्ति वाचयति चत्वारि च॥

[६]

देवस्य त्वा सवितुः प्रसव इति रशनामादत्ते प्रसूत्यै। अश्विनोर्बाहुभ्यामित्याह।  
अश्विनौ हि देवानामध्वर्यू आस्ताम्। पूष्णो हस्ताभ्यामित्याह यत्यै। आददेऽदित्यै

रास्नाऽसीत्याह यजुंष्कृत्यै। इड एह्यदित एहि सरस्वत्येहीत्याह। एतानि वा अंस्यै देवनामानि। देवनामैरेवैनामाह्वयति। असावेह्यसावेह्यसावेहीत्याह। एतानि वा अंस्यै मनुष्यनामानि॥५८॥

मनुष्यनामैरेवैनामाह्वयति। षट्थ्सम्पद्यन्ते। षड्वा ऋतवः। ऋतुभिरेवैनामाह्वयति। अदित्या उष्णीषमसीत्याह। यथायजुरेवैतत्। वायुरंस्यैड इत्याह। वायुदेवत्यो वै वृथ्सः। पूषा त्वोपावसृजत्वित्याह। पौष्णा वै देवतया पशवः॥५९॥

स्वयैवैनं देवतयोपावसृजति। अश्विभ्यां प्रदापयेत्याह। अश्विनौ वै देवानां भिषजौ। ताभ्यामेवास्मै भेषजं करोति। यस्ते स्तनः शशय इत्याह। स्तौत्यैवैनान्। उस्त्रं घर्मं शिंषोस्त्रं घर्मं पाहि घर्मायं शिंषेत्याह। यथा ब्रूयादमुष्मै देहीति। तादृगेव तत्। बृहस्पतिस्त्वोपं सीदत्वित्याह॥६०॥

ब्रह्म वै देवानां बृहस्पतिः। ब्रह्मणैवैनामुपसीदति। दानवः स्थ परंव इत्याह। मेध्यानेवैनान्करोति। विष्वग्वृतो लोहितेनेत्याह व्यावृत्त्यै। अश्विभ्यां पिन्वस्व

सरस्वत्यै पिन्वस्व पूष्णे पिन्वस्व बृहस्पतये पिन्वस्वेत्याह। एताभ्यो ह्येषा  
देवताभ्यः पिन्वन्ते। इन्द्राय पिन्वस्वेन्द्राय पिन्वस्वेत्याह। इन्द्रमेव भागधेयेन  
समर्धयति। द्विरिन्द्रायेत्याह॥६१॥

तस्मादिन्द्रो देवतानां भूयिष्ठभाक्तमः। गायत्रोऽसि त्रैष्टुभोऽसि जागन्तमसीति  
शफोपयमानादत्ते। छन्दोभिरेवैनानादत्ते। सहोर्जो भागेनोपमेहीत्याह। ऊर्ज एवैनं  
भागमकः। अश्विनौ वा एतद्यज्ञस्य शिरः प्रतिदधतावब्रूताम्। आवाभ्यामेव  
पूर्वाभ्यां वर्षद्वियाता इति। इन्द्राश्विना मधुनः सारघस्येत्याह। अश्विभ्यामेव  
पूर्वाभ्यां वर्षद्विरोति। अथो अश्विनावेव भागधेयेन समर्धयति॥६२॥

धर्मं पात वसवो यजन्ता वडित्याह। वसूनेव भागधेयेन समर्धयति। यद्वषट्कुर्यात्।  
यातयामाऽस्य वषट्कारः स्यात्। यन्न वषट्कुर्यात्। रक्षाँसि यज्ञं हन्युः। वडित्याह।  
परोक्षमेव वर्षद्विरोति। नास्य यातयामा वषट्कारो भवति। न यज्ञं रक्षाँसि  
घ्नन्ति॥६३॥

स्वाहा॑ त्वा॒ सूर्य॑स्य र॒श्मये॑ वृष्टि॒वन॑ये जुहोमीत्या॑ह। यो वा अ॑स्य पु॒ण्यो  
र॒श्मिः। स वृष्टि॒वनिः॑। तस्मा॑ ए॒वैनं॑ जुहोति। मधु॑ ह॒विर॒सीत्या॑ह। स्व॒दय॑त्ये॒वैन॑म्।  
सूर्य॑स्य तप॑स्त॒पेत्या॑ह। य॒था॒य॒जुरे॒वैतत्। द्यावा॑पृथि॒वीभ्यां॑ त्वा॒ परि॑गृह्णामीत्या॑ह।  
द्यावा॑पृथि॒वीभ्या॑मे॒वैनं॑ परि॑गृह्णाति॥६४॥

अ॒न्तरि॑क्षेण॒ त्वोप॑यच्छामीत्या॑ह। अ॒न्तरि॑क्षेणै॒वैन॒मुप॑यच्छति। न वा ए॒तं  
म॑नु॒ष्यो भ॑र्तुम॒रह॑ति। दे॒वानां॑ त्वा पि॒तृणा॑मनु॒मतो॒ भर्तु॑ः शके॒यमि॒त्या॑ह।  
दे॒वैरे॒वैनं॑ पि॒तृभि॑रनु॒मत॒ आद॑त्ते। वि वा ए॒नमे॒तदर्ध॑यन्ति। यत्प॒श्चात्प्र॑वृज्यं  
पु॒रो जुह॑ति। तेजो॑ऽसि तेजो॑ऽनु प्रेहीत्या॑ह। तेजं॑ ए॒वास्मि॑न्दधाति।  
दि॒विस्पृ॑ङ्गा मां हि॑ःसीरन्तरि॒क्षस्पृ॑ङ्गा मां हि॑ःसीः पृथि॒विस्पृ॑ङ्गा मां  
हि॑ःसीरि॒त्याहा॑हि॑ःसायै॥६५॥

सु॒व॑रसि सु॒व॑र्मे यच्छ दि॒वं यच्छ॑ दि॒वो मां पा॑हीत्या॑ह। आ॒शिषं॑मे॒वैता॑मा शा॑स्ते।  
शि॒रो वा ए॒तद्य॑ज्ञस्य। यत्प्र॑व॒र्ग्यः। आ॒त्मा वा॒युः। उ॒द्यत्य॑ वातना॒मान्या॑ह। आ॒त्मन्ने॒व

य॒ज्ञस्य॑ शि॒रः प्र॑ति॒दधा॑ति। अ॒न॒वान॑म्। प्रा॒णाना॑ꣳ स॒न्त॑त्यै। पञ्चा॑ह॥६६॥

पाङ्क्तौ॑ य॒ज्ञः। या॒वा॒ने॒व य॒ज्ञः। तस्य॑ शि॒रः प्र॑ति॒दधा॑ति। अ॒ग्नये॑ त्वा वसु॑मते॒ स्वाहे॑त्याह। अ॒सौ वा आ॑दि॒त्योऽग्नि॑र्वसु॑मान्। तस्मा॑ ए॒वैनं॑ जुहोति। सोमा॑य त्वा रु॒द्रव॑ते॒ स्वाहे॑त्याह। च॒न्द्रमा॑ वै सोमो॑ रु॒द्रवान्। तस्मा॑ ए॒वैनं॑ जुहोति। वरु॑णाय त्वाऽऽदि॒त्यव॑ते॒ स्वाहे॑त्याह॥६७॥

अ॒प्सु वै वरु॑ण आदि॒त्यवान्। तस्मा॑ ए॒वैनं॑ जुहोति। बृह॒स्पत॑ये त्वा वि॒श्वदे॑व्यावते॒ स्वाहे॑त्याह। ब्र॒ह्म वै दे॒वानां॑ बृह॒स्पतिः॑। ब्र॒ह्मणै॒वैनं॑ जुहोति। स॒वित्रे॑ त्व॒र्भुम॑ते॒ विभु॑मते॒ प्रभु॑मते॒ वाज॑वते॒ स्वाहे॑त्याह। सं॒व॒त्स॒रो वै सं॑वि॒तर्भु॑मान् वि॒भुमान्प्र॑भुमान् वाज॑वान्। तस्मा॑ ए॒वैनं॑ जुहोति। य॒माय॑ त्वाऽङ्गि॑रस्वते पि॒तृम॑ते॒ स्वाहे॑त्याह। प्रा॒णो वै य॒मोऽङ्गि॑रस्वान्पि॒तृमान्॥६८॥

तस्मा॑ ए॒वैनं॑ जुहोति। ए॒ताभ्य॑ ए॒वैनं॑ दे॒वता॑भ्यो जुहोति। द॒श स॑म्प॒द्यन्ते॑। द॒शाक्ष॑रा वि॒राट्। अ॒न्नं वि॒राट्। वि॒राजै॒वान्नाद्य॑मव॑रु॒न्धे। रौहि॑णाभ्यां॒ वै

दे॒वाः सु॒व॒र्गं लो॒कमा॑यन्। तद्रौ॑हि॒ण्यो रौ॑हि॒ण॒त्वम्। यद्रौ॑हि॒णौ भ॑वतः।  
 रौ॒हि॒णाभ्या॑मे॒व तद्य॑जमानः सु॒व॒र्गं लो॒कमे॑ति। अ॒ह॒ज्यो॒तिः के॒तुना॑ जुषता॥  
 सु॒ज्यो॒ति॒ज्यो॒ति॒षाꣳ स्वाहा॒ रात्रि॑ज्यो॒तिः के॒तुना॑ जुषता॥ सु॒ज्यो॒ति॒ज्यो॒ति॒षाꣳ  
 स्वा॑हेत्या॒ह। आ॒दि॒त्यमे॒व तद॑मुष्मि॒ल्लो॒केऽह्ना॑ प॒रस्ता॑द्वा॒धार। रात्रि॑या अ॒वस्ता॑त्।  
 तस्मा॑द॒सावा॑दि॒त्योऽमुष्मि॒ल्लो॒केऽहो॒रा॒त्राभ्या॑ धृतः॥६९॥

मनुष्यनामानि पशवः सीदत्वित्याहेन्द्रायेत्याहार्धयति

ग्रन्ति गृह्णात्यहिंसाये पश्चादहादित्यवन्ते स्वाहेत्याह पितृमानेति चत्वारि च॥ [७]

वि॒श्वा आ॑शा दक्षि॒ण॒सदि॑त्या॒ह। वि॒श्वाने॒व दे॒वान्प्री॑णाति। अथो॒ दुरि॑ष्ट्या  
 ए॒वैनं॑ पाति। वि॒श्वा दे॒वान॑याडि॒हेत्या॑ह। वि॒श्वाने॒व दे॒वान्भा॑ग॒धेये॑न॒ सम॑र्धयति।  
 स्वाहा॑कृतस्य घ॒र्मस्य॒ मधोः॑ पिबतम॒श्विने॑त्या॒ह। अ॒श्विना॑वे॒व भा॑ग॒धेये॑न॒  
 सम॑र्धयति। स्वाहा॑ऽग्नये॒ यज्ञि॑याय॒ शं यजु॑र्भिरि॒त्या॑ह। अ॒भ्ये॒वैनं॑ घारयति। अथो॒  
 ह॒विरे॒वाकः॑॥७०॥

अ॒श्विना॑ घ॒र्म पा॑त॥ हा॒दि॒वान॑महा॒दि॒वाभि॑रू॒तिभि॑रि॒त्या॑ह। अ॒श्विना॑वे॒व

भा॒ग॒धे॒येन॒ सम॑र्धयति। अनु॑ वां द्यावा॑पृथि॒वी म॑साता॒मित्या॒हानु॑मत्यै। स्वाहेन्द्रा॒य  
स्वाहेन्द्रा॒वडित्या॑ह। इन्द्रा॒य हि॑ पु॒रो हू॒यते॑। आ॒श्राव्या॑ह घ॒र्मस्य॑ य॒जेति॑। वष॑ट्कृते  
जुहोति। रक्ष॑साम॒पहत्यै॑। अनु॑यजति स्व॒गाकृत्यै॑। घ॒र्मम॑पातमश्वि॒नेत्या॑ह॥७१॥

पूर्व॑मे॒वोदित॑म्। उत्त॑रेणा॒भिगृ॑णाति। अनु॑ वां द्यावा॑पृथि॒वी अ॑म॒साता॒मित्या॒हानु॑मत्  
तं प्रा॒व्यं यथा॑वण्णमो॑ दि॒वे नमः॑ पृथि॒व्या इत्या॑ह। य॒थाय॑जुरे॒वैतत्। दि॒विधा॑  
इ॒मं य॒ज्ञं य॒ज्ञमि॒मं दि॒विधा॑ इत्या॑ह। सु॒वर्ग॑मे॒वैनं॑ लो॒कं ग॑मयति। दि॒वं  
गच्छा॑न्तरि॒क्षं गच्छ॑ पृथि॒वीं ग॒च्छेत्या॑ह। ए॒ष्वे॒वैनं॑ लो॒केषु॑ प्रति॑ष्ठापयति। पञ्च॑  
प्र॒दिशो॑ ग॒च्छेत्या॑ह॥७२॥

दि॒क्ष्वे॒वैनं॑ प्रति॑ष्ठापयति। दे॒वान्ध॑र्म॒पान्गच्छ॑ पि॒तृन्ध॑र्म॒पान्गच्छेत्या॑ह। उ॒भये॑ष्वे॒वैनं॑  
प्रति॑ष्ठापयति। यत्पि॒न्व॑ते। व॒र्षु॒कः प॒र्जन्यो॑ भवति। तस्मा॒त्पिन्व॑मानः पु॒ण्यः।  
यत्प्रा॒ङ्पिन्व॑ते। तद्दे॒वाना॑म्। यद्दक्षि॒णा। तत्पि॑तृ॒णाम्॥७३॥

यत्प्र॒त्यक्। तन्म॑नु॒ष्या॑णाम्। यदुद॑ङ्। तद्बु॒द्रा॑णा॑म्। प्राश्च॒मुद॑श्चं पिन्वयति।

देव॒त्राकः॑। अथो॒ खलु॑। सर्वा॒ अनु॒ दिशः॑ पि॒न्वय॑ति। सर्वा॒ दिशः॑ स॒मैध॑न्ते।  
अ॒न्तःप॒रिधि॑ पि॒न्वय॑ति॥७४॥

तेज॒सोऽस्क॑न्दाय। इ॒षे पी॑पि॒ह्यूर्जे पी॑पि॒हीत्या॑ह। इ॒षमे॒वोर्जं॑ यज॑माने दधाति।  
यज॑मानाय पीपि॒हीत्या॑ह। यज॑मानायै॒वैता॒माशि॒षमा॑ शा॑स्ते। मह्यं॑ ज्यै॒ष्ठ्याय॑  
पीपि॒हीत्या॑ह। आ॒त्मन॑ ए॒वैता॒माशि॒षमा॑ शा॑स्ते। त्वि॒ष्यै॑ त्वा द्यु॒म्राय॑ त्वेन्द्रि॒याय॑  
त्वा भू॒त्यै॒ त्वेत्या॑ह। य॒थाय॒जुरे॒वैतत्। धर्मा॑सि सु॒धर्मा॑ मे॒ न्य॒स्मे ब्र॒ह्मा॑णि  
धा॒रये॒त्या॑ह॥७५॥

ब्र॒ह्म॑न्ने॒वैनं॑ प्र॒तिष्ठा॑पयति। ने॒त्वा वा॒तः स्क॑न्दया॒दिति॑ यद्य॑भि॒चरे॑त्। अ॒मुष्य॑ त्वा  
प्रा॒णे सा॑दया॒म्यमु॒ना स॒ह नि॒रर्थं॑ ग॒च्छेति॑ ब्रूया॒द्यं द्वि॒ष्यात्। यमे॒व द्वेष्टि॑। तेनै॒न॑  
स॒ह नि॒रर्थं॑ ग॑मयति। पू॒ष्णे शर॑से॒ स्वाहे॒त्या॑ह। या ए॒व दे॒वता॑ हु॒तभा॑गाः। ताभ्य॑  
ए॒वैनं॑ जुहोति। ग्राव॑भ्यः॒ स्वाहे॒त्या॑ह। या ए॒वान्तरि॑क्षे॒ वाचः॑॥७६॥

ताभ्य॑ ए॒वैनं॑ जुहोति। प्र॒तिरे॒भ्यः स्वाहे॒त्या॑ह। प्रा॒णा वै दे॒वाः प्र॑ति॒राः। तेभ्य॑ ए॒वैनं॑



जुहोति। द्यावा॑पृथि॒वीभ्या॑ꣳ स्वाहेत्या॑ह। द्यावा॑पृथि॒वीभ्या॑मे॒वैनं॑ जुहोति। पि॒तृभ्यो॑  
घर्म॒पेभ्यः॑ स्वाहेत्या॑ह। ये वै यज्वानः॑। ते पि॒तरो॑ घर्म॒पाः। तेभ्य॑ ए॒वैनं॑ जुहोति॥ ७७ ॥

रुद्राय॑ रु॒द्रहो॑त्रे स्वाहेत्या॑ह। रु॒द्रमे॒व भा॑ग॒धेये॑न॒ सम॑र्धयति। सर्व॑तः सम॑नक्ति।  
सर्व॑त ए॒व रु॒द्रं नि॒रव॑दयते। उद॑श्च॒ निर॑स्यति। ए॒षा वै रु॒द्रस्य॑ दिक्। स्वाया॑मे॒व  
दि॒शि रु॒द्रं नि॒रव॑दयते। अ॒प उप॑स्पृशति मे॒ध्यत्वाय॑। ना॒न्वीक्षे॑त। यद॒न्वीक्षे॑त॥ ७८ ॥

चक्षु॑रस्य प्र॒मायु॑कꣳ स्यात्। तस्मा॒न्नान्वीक्ष्यः॑। अ॒पी॒परो॑ माऽहो रात्रि॑यै  
मा पा॒ह्येषा॑ ते अ॒ग्ने स॒मि॒त्तया॑ स॒मि॒ध्य॒स्वायु॑र्मे दा॒ वर्च॑सा माऽऽ॒ञ्जीरि॑त्या॑ह।  
आयु॑रे॒वास्मि॒न्वर्चो॑ दधाति। अ॒पी॒परो॑ मा॒ रात्रि॑या॒ अहो॑ मा पा॒ह्येषा॑ ते अ॒ग्ने  
स॒मि॒त्तया॑ स॒मि॒ध्य॒स्वाऽऽयु॑र्मे दा॒ वर्च॑सा माऽऽ॒ञ्जीरि॑त्या॑ह। आयु॑रे॒वास्मि॒न्वर्चो॑  
दधाति। अ॒ग्नि॒ज्योति॑र्ज्योति॑र॒ग्निः स्वाहा॑ सूर्यो॑ ज्योति॑र्ज्योतिः॑ सूर्यः॑  
स्वाहेत्या॑ह। यथा॑य॒जुरे॒वैतत्। ब्र॒ह्म॒वा॒दिनो॑ वदन्ति। होत॒व्यम॑ग्निहो॒त्रा(३)न्न  
होत॒व्या(३)मि॒ति॥ ७९ ॥

यद्यजुषा जुहुयात्। अयंथापूर्वमाहुती जुहुयात्। यन्न जुहुयात्। अग्निः परांभवेत्।  
भूः स्वाहेत्येव होतव्यम्। यथापूर्वमाहुती जुहोति। नाग्निः परांभवति। हुतः हविर्मधुं  
हविरित्याह। स्वदयत्येवैनम्। इन्द्रतमेऽग्नावित्याह॥८०॥

प्राणो वा इन्द्रतमोऽग्निः। प्राण एवैनमिन्द्रतमेऽग्नौ जुहोति। पिता नोऽसि मा मां  
हिः सीरित्याहाहिः सायै। अश्याम ते देव घर्म मधुमतो वाजवतः पितुमत इत्याह।  
आशिषमेवैतामा शास्ते। स्वधाविनोऽशीमहिं त्वा मा मां हिः सीरित्याहाहिः सायै।  
तेजसा वा एते व्यूध्यन्ते। ये प्रवर्ग्येण चरन्ति। प्राश्नन्ति। तेज एवात्मन्दधते॥८१॥

संवत्सरं न माः समंश्जीयात्। न रामामुपेयात्। न मृन्मयेन पिबेत्। नास्य  
राम उच्छिष्टं पिबेत्। तेज एव तत्संश्यति। देवासुराः संयन्ता आसन्। ते  
देवा विजयमुपयन्तः। विभ्राजिं सौर्ये ब्रह्मसन्त्यदधत। यत्किं च दिवाकीर्त्यम्।  
तदेतेनैव व्रतेनांगोपायत्। तस्मादेतद्व्रतं चार्यम्। तेजसो गोपीथाय। तस्मादेतानि  
यजूंषि विभ्राजः सौर्यस्येत्याहुः। स्वाहा त्वा सूर्यस्य रश्मिभ्य इति प्रातः

स०सादयति। स्वाहा० त्वा० नक्षत्रेभ्य० इति सायम्। एता वा एतस्य देवताः।  
 ताभिरेवैन० समर्धयति॥८२॥ अक०श्चिनेत्याह प्रदिशो गच्छेत्याह पितृणामन्तःपदि पिन्वयति धारयेत्याह वाचो घर्मपास्तेभ्य० एवेनं  
 जुहोत्यन्वीक्षेत होत्व्या(३)मित्यग्रावित्याह दधतेऽगोपायथ्स च॥ [८]

घर्म० या ते दिवि शुगिति तिस्र आहुतीर्जुहोति। छन्दोभिरेवास्यैभ्यो  
 लोकेभ्यः शुचमव० यजते। इयत्यग्रे जुहोति। अथेयत्यथेयति। त्रय० इमे  
 लोकाः। अनु० नोऽद्यानुमतिरित्याहानुमत्यै। दिवस्त्वा० परस्पाया० इत्याह। दिव  
 एवेमाँल्लोकान्दाधार। ब्रह्मणस्त्वा परस्पाया० इत्याह॥८३॥

एष्वेव लोकेषु प्रजा दाधार। प्राणस्य० त्वा परस्पाया० इत्याह। प्रजास्वेव  
 प्राणान्दाधार। शिरो० वा एतद्यज्ञस्य० यत्प्रवर्ग्यः। असौ खलु वा आदित्यः प्रवर्ग्यः।  
 तं यदक्षिणा प्रत्यश्चमुदश्चमुद्वासयैत्। जिह्वं यज्ञस्य० शिरो० हरेत्। प्राश्चमुद्वासयति।  
 पुरस्तादेव यज्ञस्य० शिरः० प्रतिदधाति॥८४॥

प्राश्चमुद्वासयति। तस्मादसावादित्यः पुरस्तादुदेति। शफोपयमान्धवित्राणि धृष्टी  
 इत्यन्ववहरन्ति। सात्मानमेवैन० सतनुं करोति। सात्माऽमुष्मिँल्लोके भवति। य

ए॒वं वेद॑। औदु॑म्बराणि भवन्ति। ऊ॒र्ग्व उ॑दुम्बरः। ऊ॒र्जमे॒वाव॑रुन्धे। वर्त्मना॒ वा  
अ॒न्वित्य॑॥८५॥

य॒ज्ञः रक्षा॑सि जिघा॑सन्ति। साम्ना॑ प्रस्तो॒ताऽन्व॑वैति। साम॒ वै र॑क्षो॒हा।  
रक्ष॑साम॒प॑हत्यै। त्रि॒र्निध॑नमु॒पैति॑। त्रय॑ इ॒मे लो॒काः। ए॒भ्य ए॒व लो॒केभ्यो॑  
रक्षा॑स्य॒प॑हन्ति। पु॒रुषः॑ पु॒रुषो॑ नि॒ध॒नमु॒पैति॑। पु॒रुषः॑ पु॒रुषो॑ हि र॑क्ष॒स्वी।  
रक्ष॑साम॒प॑हत्यै॥८६॥

यत्पृ॑थि॒व्यामु॑द्वासयेत्। पृ॒थि॒वीः शु॒चाऽर्प॑येत्। यद॒प्सु। अ॒पः शु॒चा॑र्पयेत्।  
यदोष॑धीषु। ओष॑धीः शु॒चाऽर्प॑येत्। यद्व॒न॒स्पति॑षु। व॒न॒स्पती॑ञ्छु॒चा॑र्पयेत्। हि॒रण्यं  
नि॒धा॒योद्वा॑सयति। अ॒मृतं॒ वै हि॒रण्य॑म्॥८७॥

अ॒मृतं॒ ए॒वैनं॒ प्रति॑ष्ठापयति। व॒ल्गुर॑सि शं यु॒धाया॒ इति॒ त्रिः प॑रिषि॒ञ्च॒न्य॑र्येति।  
त्रि॒वृ॒द्धा अ॒ग्निः। यावा॑ने॒वाग्निः। तस्य॒ शुच॑ः श॒म॒य॒ति। त्रिः पुनः॑ प॒र्येति॑।  
षट्त्स॑म्प॒द्य॒न्ते। ष॒ड्वा ऋ॒त॒वः। ऋ॒तुभि॑रे॒वास्य॒ शुच॑ः श॒म॒य॒ति। चतुः

स्रक्तिर्नाभिर्ऋतस्येत्याह॥८८॥

इ॒यं वा ऋ॒तम्। तस्यां ए॒ष ए॒व नाभिः॑। यत्प्र॑व॒र्ग्यः। तस्मा॑दे॒वमा॑ह। स॒दो वि॒श्वायु॑रित्याह। स॒दो ही॑यम्। अ॒प॒ द्वेषो॑ अ॒प॒ ह्व॒र इत्या॑ह॒ भ्रातृ॑व्यापनुत्यै। घ॒र्मैतत्ते॑ऽन्न॒मेतत्पु॑री॒षमि॑ति॒ द॒ध्ना म॑धुमि॒श्रेण॑ पू॒रय॑ति। ऊ॒र्वा अ॒न्नाद्यं॑ दधि॑। ऊ॒र्जैवैन॑म॒न्नाद्येन॑ सम॑र्धयति॥८९॥

अन॑शनायुको भवति। य ए॒वं वेद॑। रन्ति॒र्नामा॑सि दि॒व्यो गन्ध॑र्व इत्याह। रू॒पमे॒वास्यै॒तन्महि॑मान्॒ः रन्ति॑ ब॒न्धुतां॑ व्याच॑ष्टे। सम॒हमायु॑षा सं प्रा॒णेनेत्या॑ह। आ॒शिष॑मे॒वैता॒मा शा॑स्ते। व्य॑सौ यो॑ऽस्मान्द्वेष्टि॒ यं च॑ व॒यं द्वि॑ष्म इत्याह। अ॒भिचा॑र ए॒वास्यैषः॑। अचि॑क्रद॒द्वृषा॑ हरि॒रित्या॑ह। वृषा॒ ह्येषः॑॥९०॥

वृषा॒ हरिः॑। म॒हान्मि॒त्रो न द॑र्श॒त इत्या॑ह। स्तौत्ये॒वैन॑मे॒तत्। चिद॑सि समु॒द्रयो॑निरित्याह। स्वा॒मेवैनं॑ योनिं॒ गम॑यति। नम॑स्ते अस्तु॒ मा मा॑ हि॒ःसी॒रित्या॑हाहि॒ःसायै॑। वि॒श्वाव॑सु॒ः सोम॑ गन्ध॑र्वमित्याह। यदे॒वास्य॑ क्रि॒यमाण॑-

स्यान्तर्यन्ति। तदेवास्यैतेनाप्याययति। विश्वावंसुरभि तन्नो गृणात्वित्याह॥९१॥

पूर्वमेवोदितम्। उत्तरेणाभि गृणाति। धियो हिन्वानो धिय इन्नो अव्यादित्याह। ऋतूनेवास्मै कल्पयति। प्राऽऽसां गन्धर्वो अमृतानि वोचदित्याह। प्राणा वा अमृताः। प्राणानेवास्मै कल्पयति। एतत्त्वं देव घर्म देवो देवानुपांगा इत्याह। देवो ह्येष सं देवानुपैति। इदमहं मनुष्यो मनुष्यानित्याह॥९२॥

मनुष्यो हि। एष सन्मनुष्यानुपैति। ईश्वरो वै प्रवर्ग्यमुद्वासयन्। प्रजां पशून्थसोमपीथमनुद्वासः सोमं पीथानुमेहि। सह प्रजया सह रायस्पोषेणेत्याह। प्रजामेव पशून्थसोमपीथमात्मन्धत्ते। सुमित्रा न आप ओषधयः सन्त्वित्याह। आशिषमेवैतामा शास्ते। दुर्मित्रास्तस्मै भूयासुर्योऽस्मान्द्वेष्टि यं च वयं द्विष्म इत्याह। अभिचार एवास्यैषः। प्र वा एषोऽस्माल्लोकाच्च्यवते। यः प्रवर्ग्यमुद्वासयति। उदुत्यं चित्रमिति सौरीभ्यामृग्भ्यां पुनरेत्य गार्हपत्ये जुहोति। अयं वै लोको गार्हपत्यः। अस्मिन्नेव लोके प्रतितिष्ठति। असौ खलु वा आदित्यः सुवर्गो

लोकः। यथ्सौरी भवतः। तेनैव सुवर्गाल्लोकात्रैति॥१३॥ ब्रह्मणस्त्वा परस्याया इत्याह दधात्यन्वित्यं रक्षस्वी  
 रक्षसामपहत्ये वै हिरण्यमाहार्धयति ह्येष गृणात्वित्याह मनुष्यान्वित्याहास्येषांऽष्टौ च॥ [१]

प्रजापतिं वै देवाः शुक्रं पयोऽदुहन्। तदेभ्यो न व्यभवत्। तदग्निर्व्यकरोत्।  
 तानि शुक्रियाणि सामान्यभवन्। तेषां यो रसोऽत्यक्षरत्। तानि शुक्रयजुष्यभवन्।  
 शुक्रियाणां वा एतानि शुक्रियाणि। सामपयसं वा एतयोरन्यत्। देवानामन्यत्पयः।  
 यद्गोः पयः॥१४॥

तथ्साम्नः पयः। यदजायै पयः। तद्देवानां पयः। तस्माद्यत्रैतैर्यजुर्भिश्चरन्ति।  
 तत्पयसा चरन्ति। प्रजापतिमेव तत्पयसाऽन्नाद्येन समर्धयन्ति। एष ह त्वै  
 साक्षात्प्रवर्ग्यं भक्षयति। यस्यैवं विदुषः प्रवर्ग्यः प्रवृज्यते। उत्तरवेद्यामुद्वास-  
 येत्तेजस्कामस्य। तेजो वा उत्तरवेदिः॥१५॥

तेजः प्रवर्ग्यः। तेजसैव तेजः समर्धयति। उत्तरवेद्यामुद्वासयेदन्नकामस्य। शिरो  
 वा एतद्यज्ञस्य। यत्प्रवर्ग्यः। मुखमुत्तरवेदिः। शीर्ष्णैव मुखं सन्दधात्यन्नाद्याय।  
 अन्नाद एव भवति। यत्र खलु वा एतमुद्वासितं वयांसि पर्यासते। परि वै तां

समां॑ प्र॒जा वया॑ऽस्यासते॥९६॥

तस्मा॑दुत्तरवे॒द्यामे॒वोद्वा॑सयेत्। प्र॒जानां॑ गोपी॒थाय॑। पु॒रो वा॑ प॒श्चाद्वोद्वा॑सयेत्।  
पु॒रस्ता॑द्वा ए॒तज्ज्योति॑रुदेति। तत्प॒श्चान्निम्रो॑चति। स्वामे॒वैनं॑ योनि॒मनू॑द्वासयति। अ॒पां  
मध्य॑ उद्वा॑सयेत्। अ॒पां वा ए॒तन्मध्या॑ज्ज्योति॑रजायत। ज्योतिः॑ प्रव॒र्ग्यः। स्वयै॒वैनं॑  
यो॒नौ प्र॑ति॒ष्ठाप॑यति॥९७॥

यं द्वि॒ष्यात्। यत्र॑ स स्यात्। तस्यां॑ दि॒श्युद्वा॑सयेत्। ए॒ष वा अ॒ग्निर्वै॑श्वान॒रः।  
यत्प्र॑व॒र्ग्यः। अ॒ग्निनै॒वैनं॑ वैश्वान॒रेणा॒भि प्र॑वर्तयति। औदु॑म्ब॒र्यां॒ शाखा॑या॒मुद्वा॑सयेत्।  
ऊ॒र्वा उ॑दु॒म्बरः॑। अन्नं॑ प्रा॒णः। शु॒ग्ध॒र्मः॥९८॥

इ॒दम॒हम॒मुष्या॑मु॒ष्याय॑णस्यं शु॒चा प्रा॑णमपि॑ द॒हामी॒त्याह॑। शु॒चैवा॒स्यं  
प्रा॑णमपि॑ द॒हति॑। ता॒जगा॑र्ति॒माच्छ॑ति। यत्र॑ द॒र्भा उ॑प॒दीकं॑सन्तताः स्युः।  
तदुद्वा॑सये॒द्वृष्टि॑कामस्या। ए॒ता वा अ॒पाम॑नू॒ज्झ्राव॑र्यो॒ नाम॑। यद्द॒र्भाः। अ॒सौ खलु॑  
वा आ॑दि॒त्य इ॒तो वृ॑ष्टि॒मुदी॑रयति। अ॒सावे॒वास्मा॑ आदि॒त्यो वृ॑ष्टिं॒ निय॑च्छति। ता



आपो नियंता धन्वना यन्ति॥१९॥ गोः पर्यं उत्तरवेदिंरांसते स्थापयति घूर्मो यन्ति॥\_\_\_\_\_ [१०]

प्रजापतिः सम्प्रियमाणः। सम्राट्सम्भृतः। घर्मः प्रवृत्तः। महावीर उद्भासितः।  
असौ खलु वावैष आदित्यः। यत्प्रवर्ग्यः। स एतानि नामान्यकुरुत। य एवं वेद।  
विदुरेनं नाम्ना। ब्रह्मवादिनो वदन्ति॥१००॥

यो वै वसीयांसं यथानाममुपचरति। पुण्यातिं वै स तस्मै कामयते।  
पुण्यातिमस्मै कामयन्ते। य एवं वेद। तस्मादेवं विद्वान्। घर्म इति दिवाऽऽचक्षीत।  
सम्राडिति नक्तम्। एते वा एतस्य प्रिये तनुवौ। एते अस्य प्रिये नामनी।  
प्रिययैवैनं तनुवौ॥१०१॥

प्रियेण नाम्ना समर्धयति। कीर्तिरस्य पूर्वागच्छति जनतामायतः। गायत्री  
देवेभ्योऽपाक्रामत्। तां देवाः प्रवर्ग्येणैवानु व्यभवन्। प्रवर्ग्येणाऽऽप्नुवन्।  
यच्चतुर्विंशतिकृत्वः प्रवर्ग्यं प्रवृणक्ति। गायत्रीमेव तदनु विभवति। गायत्रीमाप्नोति।  
पूर्वाऽस्य जनं यतः कीर्तिर्गच्छति। वैश्वदेवः स संन्नः॥१०२॥

वसंवः प्रवृत्तः। सोमोऽभिकीर्यमाणः। आश्विनः पर्यस्यानीयमाने। मारुतः  
 कथन्। पौष्ण उदन्तः। सारस्वतो विष्यन्दमानः। मैत्रः शरो गृहीतः। तेज उद्यतः।  
 वायुर्हियमाणः। प्रजापतिरहूयमानो वाग्धुतः॥१०३॥

असौ खलु वावैष आदित्यः। यत्प्रवर्ग्यः। स एतानि नामान्यकुरुत। य  
 एवं वेद। विदुरेनं नाम्ना। ब्रह्मवादिनो वदन्ति। यन्मृन्मयमाहुतिं नाश्नुतेऽथ।  
 कस्मादेषोऽश्नुत इति। वागेष इति ब्रूयात्। वाच्येव वाचं दधाति॥१०४॥

तस्मादश्नुते। प्रजापतिर्वा एष द्वादशधा विहितः। यत्प्रवर्ग्यः। यत्प्रागवकाशेभ्यः।  
 तेन प्रजा असृजत। अवकाशैर्देवासुरानसृजत। यदूर्ध्वमवकाशेभ्यः। तेनान्नम-  
 सृजत। अन्नं प्रजापतिः। प्रजापतिर्वावैषः॥१०५॥

वदन्ति तनुवा स संस्रो हूयमानो वाग्धुतो

दधात्येषः॥ [११]

सविता भूत्वा प्रथमेऽहन्प्रवृज्यते। तेन कामा एति। यद्वितीयेऽहन्प्रवृज्यते।  
 अग्निर्भूत्वा देवानेति। यत्तृतीयेऽहन्प्रवृज्यते। वायुर्भूत्वा प्राणानेति। यच्चतुर्थेऽहन्प्रवृज्यते।

आदित्यो भूत्वा रश्मीनेति। यत्पञ्चमेऽहं न्प्रवृज्यते। चन्द्रमा भूत्वा नक्षत्राण्येति॥१०६॥

यत्षष्ठेऽहं न्प्रवृज्यते। ऋतुर्भूत्वा संवत्सरमेति। यत्सप्तमेऽहं न्प्रवृज्यते। धाता भूत्वा शक्नोतीति। यदष्टमेऽहं न्प्रवृज्यते। बृहस्पतिर्भूत्वा गायत्रीमेति। यन्नवमेऽहं न्प्रवृज्यते। मित्रो भूत्वा त्रिवृत इमाँल्लोकानेति। यदशमेऽहं न्प्रवृज्यते। वरुणो भूत्वा विराजमेति॥१०७॥

यदेकादशेऽहं न्प्रवृज्यते। इन्द्रो भूत्वा त्रिष्टुभमेति। यद्द्वादशेऽहं न्प्रवृज्यते। सोमो भूत्वा सुत्यामेति। यत्पुरस्तादुपसदा प्रवृज्यते। तस्मादितः पराङ्मूँल्लोकाः-  
स्तपन्नेति। यदुपरिष्ठादुपसदा प्रवृज्यते। तस्मादमुतोऽर्वाङ्मूँल्लोकाः-  
स्तपन्नेति। य एवं वेद। ऐव तपति॥१०८॥ नक्षत्राण्येति विराजमेति तपति॥ [१२]

ॐ शं नस्तन्नो मा हासीत्॥ ॐ शान्तिः शान्तिः शान्तिः॥



## ॥षष्ठः प्रश्नः॥

ॐ सन्त्वा॑ सिञ्चामि॒ यजुषा॑ प्र॒जामायु॑र्धनं च॥ ॐ शान्तिः॒ शान्तिः॒ शान्तिः॑॥

प॒रे॒यु॒वा॑ꣳसं प्र॒वतो॑ म॒हीरनु॑ ब॒हुभ्यः॑ पन्था॑मनपस्पशानम्। वै॒व॒स्व॒तꣳ स॒ङ्गम॑नं  
जना॑नां य॒मꣳ राजा॑नꣳ ह॒विषा॑ दुवस्यत। इ॒दं त्वा॑ व॒स्त्रं प्रथ॑मन्वाग॒न्नपै॑तदूह  
यदि॑हाबि॒भः पुरा॑। इ॒ष्टा॒पूर्त॑मनु॒ सम्प॑श्य दक्षि॑णां यथा॑ ते द॒त्तं बहु॑धा वि॒बन्धुषु॑।  
इ॒मौ यु॑नज्मि ते व॒ह्नी अ॑सु॒नी॒थाय॑ वो॒ढवै॑। या॒भ्यां य॑मस्य सा॒दनꣳ सु॒कृतां॑  
चापि॑ गच्छ॒तात्। पू॒षा त्वे॒तश्चा॑वयतु प्रवि॒द्वानन॑ष्टपशु॒र्भुवन॑स्य गो॒पाः। स त्वे॒तेभ्यः॑  
परि॑ददात्पि॒तृभ्यो॑ऽग्नि॒र्दे॒वेभ्यः॑ सु॒वि॒दत्रे॑भ्यः। पू॒षे॒मा आ॑शा॒ अनु॑वेद॒ सर्वाः॑ सो अ॒स्माꣳ  
अभ॑यतमेन नेषत्। स्व॒स्ति॒दा अ॑घृ॒णिः सर्व॑वी॒रोऽप्र॑युच्छन्पु॒र ए॑तु प्रवि॒द्वान्॥१॥

आयु॑र्वि॒श्वायुः॑ परि॑पासति त्वा पू॒षा त्वा॑ पातु प्रप॑थे पु॒रस्ता॑त्। यत्राऽऽस॑ते  
सु॒कृतो॑ यत्र॒ ते य॒युस्तत्र॑ त्वा दे॒वः सं॒वि॒ता द॑धातु। भु॒वन॑स्य पत इ॒दꣳ ह॒विः।  
अ॒ग्नये॑ रयि॒मते॒ स्वाहा॑। पु॒रुष॑स्य सयाव॒र्यपे॑द॒घानि॑ मृज्महे। यथा॑ नो अत्र

नापरः पुरा जुरसु आयति। पुरुषस्य सयावरि वि ते प्राणमसि स्रसम्।  
 शरीरेण महीमिहि स्वधयेहि पितृनुपं प्रजयाऽस्मानिहावह। मैवं माऽस्ता  
 प्रियेऽहं देवी सुती पितृलोकं यदैषि। विश्ववारा नभसा संव्ययन्त्युभौ नो लोकौ  
 पर्यसाऽभ्याववृथस्व॥२॥

इयं नारी पतिलोकं वृणाना निपद्यत उप त्वा मर्त्यं प्रेतम्। विश्वं  
 पुराणमनु पालयन्ती तस्यै प्रजां द्रविणं चेह धेहि। उदीर्ष्व नार्यभि  
 जीवलोकमितासुमेतमुपशेष एहि। हस्तग्राभस्य दिधिषोस्त्वमेतत्पत्युर्जनित्वमभि  
 सम्बभूव। सुवर्णं हस्तादाददाना मृतस्य श्रियै ब्रह्मणे तेजसे बलाय। अत्रैव  
 त्वमिह वयं सुशेवा विश्वाः स्पृधो अभिमातीर्जयेम। धनुरुहस्तादाददाना  
 मृतस्य श्रियै क्षत्रायौजसे बलाय। अत्रैव त्वमिह वयं सुशेवा विश्वाः स्पृधो  
 अभिमातीर्जयेम। मणिं हस्तादाददाना मृतस्य श्रियै विशे पुष्ट्यै बलाय। अत्रैव  
 त्वमिह वयं सुशेवा विश्वाः स्पृधो अभिमातीर्जयेम॥३॥

इममग्ने चमसं मा विजीह्वरः प्रियो देवानामुत सोम्यानाम्। एष यश्चमसो  
 देवपानस्तस्मिन्देवा अमृतां मादयन्ताम्। अग्नेर्वर्म परि गोभिर्व्ययस्व सं प्रोर्णुष्व  
 मेदसा पीवसा च। नेत्वा धृष्णुरहरसा जर्हृषाणो दधद्विधक्ष्यन्पर्यङ्क्ष्याते।  
 मैनमग्ने विदहो माऽभिशोचो माऽस्य त्वचं चिक्षिपो मा शरीरम्। यदा शृतं  
 कुरवो जातवेदोऽथेमेनं प्रहिणुतात्पितृभ्यः। शृतं यदा कुरसि जातवेदोऽथेमेनं  
 परिदत्तात्पितृभ्यः। यदा गच्छात्यसुनीतिमेतामथा देवानां वशनीर्भवाति। सूर्यं ते  
 चक्षुर्गच्छतु वातमात्मा द्यां च गच्छ पृथिवीं च धर्मणा। अपो वां गच्छ यदि  
 तत्र ते हितमोषधीषु प्रति तिष्ठा शरीरैः। अजो भागस्तपसा तं तपस्व तं ते  
 शोचिस्तपतु तं ते अर्चिः। यास्ते शिवास्तनुवो जातवेदस्ताभिर्वहेम५ सुकृतां यत्र  
 लोकाः। अयं वै त्वमस्मादधि त्वमेतदयं वै तदस्य योनिरसि। वैश्वानरः पुत्रः  
 पित्रे लोककृज्जातवेदो वहेम५ सुकृतां यत्र लोकाः॥४॥

विद्वानभ्याववृध्स्वाभिमांतीर्जयेम शरीरैश्चत्वारि

य ए॒तस्य॑ प॒थो गो॒प्तार॒स्तेभ्यः॑ स्वाहा॒ य ए॒तस्य॑ प॒थो र॑क्षि॒तार॒स्तेभ्यः॑  
 स्वाहा॒ य ए॒तस्य॑ प॒थोभि॑र॒क्षितार॒स्तेभ्यः॑ स्वाहा॑ऽऽख्या॒त्रे स्वाहा॑ऽपाख्या॒त्रे  
 स्वाहा॑ऽभिलाल॑पते स्वाहा॑ऽपलाल॑पते स्वाहा॑ऽग्नये॑ कर्म॒कृते॒ स्वाहा॒ यम॑त्र  
 नाधी॒मस्तस्मै॑ स्वाहा॑। यस्तं इ॒ध्मं ज॒भर॑त्सिष्वि॒दानो॑ मूर्धा॒नं वा॒त तप॑ते त्वा॒या।  
 दि॒वो वि॒श्वस्मा॑त्सीम॒घाय॑त उ॒रुष्यः॑। अ॒स्मात्त्वमधि॑ जा॒तोऽसि॑ त्वद॒यं जा॑यतां  
 पुनः॑। अ॒ग्नये॑ वैश्वान॒राय॑ सुव॒र्गाय॑ लो॒काय॑ स्वाहा॑॥५॥ य ए॒तस्य॑ त्वत्प॒ञ्च॥ [२]

प्र के॒तुना॑ बृ॒हता॑ भा॒त्यग्नि॑रा॒विर्विश्वा॑नि वृष॒भो रो॑रवीति। दि॒वश्चि॑दन्ता॒दुप॑  
 मामु॒दानं॑ड॒पामु॑प॒स्थे म॒हिषो॑ व॒वर्ध॑। इ॒दं त॒ एकं॑ प॒र ऊ॑त॒ एकं॑ तृतीये॒न ज्यो॑तिषा॒  
 संवि॑शस्व। सं॒वेश॑नस्त॒नुवै॑ चा॒रुरे॑धि प्रि॒यो दे॒वानां॑ पर॒मे स॒धस्थे॑। नाके॑ सु॒पर्णमु॑प॒  
 यत्प॑तन्त॒ हृदा॑ वे॒नन्तो॑ अ॒भ्यच॑क्षत त्वा। हि॒रण्य॑पक्षं॒ वरु॑णस्य दू॒तं य॒मस्य॑ यो॒नौ  
 शकु॑नं भु॒रण्युम्। अति॑द्रव सा॒रमे॒यौ श्वानौ॑ चतु॒रक्षौ॑ श॒बलौ॑ सा॒धुना॑ प॒था। अथा॑  
 पि॒तृन्सु॑विद॒त्रा अ॒पीहि॑ य॒मेन॒ ये स॑ध॒मादं॑ म॒दन्ति॑। यौ ते॒ श्वानौ॑ यमरक्षि॒तारौ॑

चतुरक्षौ पथिरक्षी नृचक्षसा। ताभ्यां राजन्परि देह्येनः स्वस्ति चास्मा अनमीवं च धेहि॥६॥

उरुणसावसुतृपावुलुम्बलौ यमस्य दूतौ चरतो वशां अनु। तावस्मभ्यं दृशये सूर्याय पुनर्दत्ता वसुमद्येह भद्रम्। सोम एकैभ्यः पवते घृतमेक उपासते। येभ्यो मधु प्रधावति तांश्चिदेवापि गच्छतात्। ये युध्यन्ते प्रधनेषु शूरांसो ये तनुत्यजः। ये वा सहस्रदक्षिणास्तांश्चिदेवापि गच्छतात्। तपसा ये अनाधृष्यास्तपसा ये सुवर्गताः। तपो ये चक्रिरे महत्तांश्चिदेवापि गच्छतात्। अशमन्वती रेवतीः सः रभध्वमुत्तिष्ठत प्रतरता सखायः। अत्रा जहाम ये असन्नशेवाः शिवान् वयमभि वाजानुत्तरेम॥७॥

यद्वै देवस्य सवितुः पवित्रं सहस्रधारं विततमन्तरिक्षे। येनापुनादिन्द्रमनार्तमात्यै तेनाहं मां सर्वतनुं पुनामि। या राष्ट्रात्पन्नादप यन्ति शाखा अभिमृता नृपतिमिच्छमानाः। धातुस्ताः सर्वाः पवनेन पूताः प्रजयास्मान्रय्या वर्चसा



स॒सृ॒जाथ॑। उ॒द्वयं॑ तम॑स॒स्परि॑ प॒श्यन्तो॑ ज्योति॒रुत्तर॑म्। दे॒वं दे॒व॒त्रा सूर्य॑म॒गन्म॒  
ज्योति॑रुत्त॒मम्। धा॒ता पु॑नातु सवि॒ता पु॑नातु। अ॒ग्नेस्तेज॑सा॒ सूर्य॑स्य॒ वर्च॑सा॥८॥  
धे॒ह्युत्तरि॑मा॒द्यौ च॥

[३]

यन्ते॑ अ॒ग्निम॑म॒न्थाम॑ वृष॒भाये॑व॒ पक्त॑वे। इ॒मन्त॑स्रं श॑मयामसि क्षी॒रेण॑ चोद॒केन॑ च।  
यन्त्वम॑ग्ने स॒मद॑ह॒स्त्वमु॒ निर्वा॑पया पुनः॑। क॒याम्बूर॑त्र जायतां पाक॒दूर्वा व्य॑ल्कशा।  
शी॒ति॒के शी॒ति॒काव॑ति॒ ह्लादु॑के॒ ह्लादु॑कावति। म॒ण्डूक्या॑ सुसङ्ग॒मये॑म॒स्व॒ग्नि॑स्रं श॑मय॑।  
शं ते॑ धन्व॒न्या आपः॑ श॒मु ते॑ सन्त्व॒नूक्याः॑। शं ते॑ समु॒द्रिया॒ आपः॑ श॒मु ते॑ सन्तु॒  
व॒र्ष्याः॑। शं ते॑ स्र॒वंन्तीस्त॑नुवे॒ श॒मु ते॑ सन्तु॒ कू॒प्याः॑। शन्ते॑ नी॒हारो व॑र्षतु॒ श॒मु  
पृ॒ष्वाऽव॑शीयताम्॥९॥

अव॑ सृज॒ पुन॑र॒ग्ने पि॒तृभ्यो॑ यस्त॒ आहु॑त॒श्चर॑ति स्व॒धाभिः॑। आयु॑र्वसा॒न् उप॑ यातु  
शेष॑स्रं सङ्ग॑च्छतां त॒नुवा॑ जातवेदः। सङ्ग॑च्छस्व पि॒तृभिः॑ स॒स्व॒धाभिः॑ समि॑ष्टापूर्तेन॒  
पर॑मे व्योमन्। यत्र॒ भूम्यै॑ वृणसे॒ तत्र॑ गच्छ॒ तत्र॑ त्वा दे॒वः स॑वि॒ता द॑धातु। यत्ते॑  
कृ॒ष्णः श॑कुन आ॒तुतो॑द॒ पिपी॑लः स॒र्प उ॒त वा॒ श्वाप॑दः। अ॒ग्नि॑ष्टद्वि॒श्वोद॑नृ॒णं कृ॑णोतु

सोमंश्च॑ यो ब्रा॑ह्म॒णमा॑वि॒वेश। उत्ति॑ष्ठात॑स्त॒नुव॑ꣳ सम्भ॑रस्व॒ मेह॑ गात्र॒मव॑हा॒ मा  
 शरी॑रम्। यत्र॒ भूम्यै॑ वृ॒णसे॑ तत्र॑ गच्छ॒ तत्र॑ त्वा दे॒वः संवि॑ता द॑धातु। इ॒दं त॒  
 एकं॑ प॒र ऊ॑त॒ एकं॑ तृती॒येन॑ ज्योति॑षा॒ संवि॑शस्व। सं॒वेश॑नस्त॒नुवै॑ चा॒रुरे॑धि प्रि॒यो  
 दे॒वानां॑ प॒रमे॑ स॒धस्थे॑। उत्ति॑ष्ठ॒ प्रेहि॑ प्र॒द्रवौ॑कः कृ॒णुष्व॑ प॒रमे॑ व्यो॒मन्। य॒मेन॑ त्वं  
 य॒म्या॑ संवि॒दानो॑त्त॒मं नाक॑मधि॒ रोहे॑मम्। अ॒श्मन्व॑ती रेवती॒र्यद्वै॑ दे॒वस्य॑ सवि॒तुः  
 प॒वित्रं॑ या रा॒ष्ट्रात्प॒न्नादु॑द्वयं तम॑स॒स्परि॑ धा॒ता पु॑नातु। अ॒स्मात्त्व॑मधि॒ जातो॑ऽस्य॒यं  
 त्वदधि॑जायताम्। अ॒ग्नये॑ वैश्वान॒राय॑ सुव॒र्गाय॑ लो॒काय॑ स्वाहा॑॥१०॥ अ॒वशी॑यताꣳ स॒धस्थे॑ पञ्च॑

च॥

[४]

आया॑तु दे॒वः सु॒मना॑भि॒रूति॑भि॒र्यमो॑ ह॒वेह॑ प्र॒य॑ताभि॒रक्ता॑। आसी॑दताꣳ सुप्र॒यते॑ह  
 ब॒र्हिष्य॑र्जाय॒ जात्यै॑ मम॑ शत्रु॒हत्यै॑। य॒मे इ॒व यत॑माने॒ यदै॑तं प्रवा॑म्भर॒न्मानु॑षा  
 दे॒वय॑न्तः। आसी॑दतꣳ स्व॒मु॒ लोकं॑ वि॒दाने॑ स्वास॒स्थे भ॑वत॒मिन्द॑वे नः। य॒माय॑  
 सोम॑ꣳ सु॒नुत॑ य॒माय॑ जुहु॒ता ह॒विः। य॒मꣳ ह॑ य॒ज्ञो ग॑च्छत्य॒ग्निदू॑तो अ॒रङ्क॑तः।  
 य॒माय॑ घृ॒तव॑द्ध॒विर्जु॑होत॒ प्र च॑ तिष्ठत। स नो॑ दे॒वेष्वाय॑मदी॒र्घमा॑युः प्र जी॒वसे॑।

य॒माय॒ मधु॑मत्त॒मꣳ राज्ञे॑ ह॒व्यं जु॑होत॒न। इ॒दं नम॑ ऋषि॑भ्यः पू॒र्वजे॑भ्यः पू॒र्वेभ्यः॑  
प॒थि॒कृद्भ्यः॑ ॥११॥

योऽस्य॒ कौष्ठ्य॒ जग॑त्: पार्थि॑वस्यै॒कं इ॒द्वशी॑। य॒मं भ॑ङ्ग्य॒श्रवो॑ गा॒य॒ यो  
राजा॑न॒प॒रो॒ध्यः। य॒मङ्गाय॑ भ॒ङ्ग्य॒श्रवो॑ यो राजा॑न॒प॒रो॒ध्यः। येना॒ऽऽपो॑ न॒द्यो ध॑न्वा॒नि  
येन॒ द्यौः पृ॑थि॒वी दृ॒ढा। हि॒र॒ण्य॒क॒क्ष्यान् सु॑धुरान् हि॒र॒ण्य॒क्षान॑यः श॒फान्।  
अ॒श्वान॑नश्य॒तो दा॑नं य॒मो रा॑जाऽभि तिष्ठ॑ति। य॒मो दा॑धार पृथि॒वीं य॒मो वि॑श्वमिदं  
जग॑त्। य॒माय॒ सर्व॑मित्र॒स्थे य॒त्प्रा॑ण॒द्वायु॑रक्षि॒तम्। यथा॑ प॒ञ्च यथा॑ षड्यथा प॒ञ्च  
द॒श॒र्ष॒यः। य॒मं यो वि॑द्या॒त्स ब्रू॑याद्य॒थैक॑ ऋषि॑र्विजान॒ते ॥१२॥

त्रि॒क॑द्रुकेभिः पत॑ति षडु॒र्वीरि॑कमिद्व॒हत्। गा॒य॒त्री त्रि॒ष्टु॒च्छन्दा॑ंसि॒ सर्वा॑ ता  
य॒म आ॑हि॒ता। अ॒ह॒र॒ह॒र्नय॑मानो गाम॒श्वं पु॑रुषं जग॑त्। वैव॑स्वतो॒ न तृ॑प्यति  
प॒ञ्चभि॑र्मान॒वैर्य॑मः। वैव॑स्वते वि॒विच्य॑न्ते यमे राज॑नि ते ज॒नाः। ये चे॒ह स॒त्येने॑च्छन्ते  
य उ॒ चानृ॑तवादिनः। ते रा॑जन्नि॒ह वि॒विच्य॑न्तेऽथा य॑न्ति त्वा॒मुप॑। दे॒वाꣳश्च॒ ये  
न॑म॒स्यन्ति॒ ब्राह्म॑णाꣳश्चाप॒चित्य॑ति। यस्मि॑न्वृ॒क्षे सु॑प॒ला॒शे दे॒वैः स॒म्पिब॑ते य॒मः।

अत्रां नो वि॒श॒पतिः पि॒ता पु॒रा॒णा अनु॒वे॒नति॥१३॥ पृथि॒कृ॒द्यौ वि॒जान॒तेऽनुं वे॒नति॥—————[५]

वै॒श्वान॒रे ह॒विरि॒दं जु॒होमि सा॒ह॒स्रमु॒त्स॑ श॒तधा॒रमे॒तम्। तस्मि॑न्ने॒ष पि॒तरं॑  
पि॒ताम॒हं प्र॒पिता॒महं बि॒भर॒त्पि॒न्वमा॒ने। द्र॒प्सश्च॑स्क॒न्द पृथि॒वीम॒नु द्यामि॑मं च॒  
योनि॑म॒नु यश्च॑ पूर्॒वः। तृ॒तीयं॑ योनि॑म॒नु स॒ञ्चर॑न्तं द्र॒प्सं जु॒होम्य॑नु स॒प्त हो॒त्राः। इ॒मं  
सं॒मु॒द्रं श॒तधा॒रमु॒त्सं व्य॒च्यमा॑नं भु॒वंन॑स्य मध्ये॑। घृ॒तं दु॒हा॒नाम॒दि॒तिं ज॒नाया॒ग्ने मा  
हि॑सीः पर॒मे व्यो॑मन्। अपे॑त् वी॒त् वि च॑ सर्प॒तातो॒ येऽत्र॒ स्थ पु॒रा॒णा ये च॒  
नूत॑नाः। अहो॑भि॒र॒द्भि॒र॒क्तुभि॑र्व्य॒क्तं य॒मो द॑दा॒त्वव॒सान॑म॒स्मै। स॒वि॒तै॒तानि॑ शरी॑राणि  
पृथि॒व्यै मा॒तुरु॒प॒स्थ आ॑दधे। तेभि॑र्यु॒ज्यन्ता॑म॒घ्नि॒याः॥१४॥

शु॒नं वा॒हाः शु॒नं ना॒राः शु॒नं कृ॑ष॒तु लाङ्ग॑लम्। शु॒नं व॑र॒त्रा ब॑ध्यन्ता॑  
शु॒नम॑ष्ट्रा॒मुदि॑ङ्ग॒य शु॒ना॑सी॒रा शु॒नम॑स्मासु॑ ध॒त्तम्। शु॒ना॑सी॒रावि॑मां वाचं॑ यद्वि॒वि  
च॑क्र॒थुः प॒यः। तेने॑मामुप॑ सिञ्च॒तम्। सी॒ते व॑न्दा॒महे॒ त्वा॒र्वाची॑ सु॒भगे॑ भव।  
यथा॑ नः सु॒भगा॑ सं॒सि यथा॑ नः सु॒फला॑ सं॒सि। स॒वि॒तै॒तानि॑ शरी॑राणि पृथि॒व्यै

मातुरुपस्थ आदधे। तेभिरदिते शं भव। विमुच्यध्वमघ्निया देवयाना अतारिष्म  
तमसस्पा रमस्य। ज्योतिरापाम सुव रगन्म॥१५॥

प्र वाता वान्ति पतयन्ति विद्युत् उदोषधीर्जिहते पिन्वते सुवः। इरा विश्वस्मै  
भुवनाय जायते यत्पर्जन्यः पृथिवीः रेतसाऽवति। यथा यमाय हार्म्यमवपन्पञ्च  
मानवाः। एवं वपामि हार्म्यं यथासाम जीवलोके भूरयः। चितः स्थ परिचितं  
ऊर्ध्वचितः श्रयध्वं पितरो देवता। प्रजापतिर्वः सादयतु तया देवतया। आप्यायस्व  
सन्ते॥१६॥ अघ्निया अंगन्म सप्त च॥

[६]

उत्ते तभ्रोमि पृथिवीं त्वत्परीमं लोकं निदधन्मो अहः रिषम्। एताः स्थूणां  
पितरो धारयन्तु तेऽत्रा यमः सादनात्ते मिनोतु। उपसर्प मातरं भूमिमेतामुरुव्यचसं  
पृथिवीः सुशेवाम्। ऊर्णम्रदा युवतिर्दक्षिणावत्येषा त्वा पातु निर्ऋत्या उपस्थे।  
उद्धश्चस्व पृथिवि मा विबाधिताः सूपायनास्मै भव सूपवञ्चना। माता पुत्रं यथा  
सिचाभ्येनं भूमि वृणु। उद्धश्चमाना पृथिवी हि तिष्ठसि सहस्रं मित उप हि श्रयन्ताम्।

ते गृहासो मधुश्चुतो विश्वाहास्मै शरणाः सन्त्वत्र। एणीर्धाना हरिणीरर्जुनीः सन्तु  
धेनवः। तिलवत्सा ऊर्जमस्मै दुहाना विश्वाहा सन्त्वनपस्फुरन्तीः॥१७॥

एषा ते यमसादने स्वधा निर्धीयते गृहे। अक्षितिर्नाम ते असौ। इदं पितृभ्यः  
प्रभरेम बर्हिर्देवेभ्यो जीवन्तु उत्तरं भरेम। तत्त्वमारोहासो मेघ्यो भवं यमेन त्वं  
यम्या संविदानः। मा त्वा वृक्षौ सम्बाधिष्ठां मा माता पृथिवि त्वम्। पितृन्  
हि यत्र गच्छास्येधासं यमराज्ये। मा त्वा वृक्षौ सम्बाधेथां मा माता पृथिवी  
मही। वैवस्वतः हि गच्छासि यमराज्ये विराजसि। नळं प्लवमारोहैतं नळेन  
पथोऽन्विहि। स त्वं नळप्लवो भूत्वा सन्तर प्रतरोत्तर॥१८॥

सवितैतानि शरीराणि पृथिव्यै मातुरुपस्थ आदधे। तेभ्यः पृथिवि शं भव।  
षड्ढोता सूर्य ते चक्षुर्गच्छतु वातमात्मा द्यां च गच्छ पृथिवीं च धर्मणा। अपो वा  
गच्छ यदि तत्र ते हितमोषधीषु प्रतितिष्ठा शरीरैः। परं मृत्यो अनुपरेहि पन्थां  
यस्ते स्व इतरो देवयानात्। चक्षुष्मते शृण्वते ते ब्रवीमि मा नः प्रजाः रीरिषो

मोत वी॒रान्। शं वा॒तः श॑ हि ते॒ घृ॒णिः श॑मु॒ ते स॒न्त्वोष॑धीः। क॒ल्पन्तां मे॒ दि॒शः  
 श॒ग्माः। पृ॒थि॒व्यास्त्वा॑ लो॒के सा॑दयाम्य॒मुष्य॒ शर्मा॑सि पि॒तरो॑ दे॒वता॑। प्र॒जाप॑तिस्त्वा  
 सादयतु॒ तया॑ दे॒वत॑या। अ॒न्तरि॑क्षस्य त्वा दि॒वस्त्वा॑ दि॒शां त्वा॒ नाक॑स्य त्वा पृ॒ष्ठे  
 ब्र॒ध्नस्य॑ त्वा वि॒ष्टपे॑ सादयाम्य॒मुष्य॒ शर्मा॑सि पि॒तरो॑ दे॒वता॑। प्र॒जाप॑तिस्त्वा सादयतु॒  
 तया॑ दे॒वत॑या॥१९॥

अ॒पूप॑वा॒न्धृत॑वा॒श्च॒रुरे॒ह सी॑द॒तूत॑भ्रुवन् पृ॒थि॒वीं द्या॑मु॒तोपरि॑। यो॒नि॒कृतः॑  
 पथि॒कृतः॑ स॒पर्य॑त॒ ये दे॒वानां॑ घृ॒तभा॑गा इ॒ह स्थ। ए॒षा ते॑ यम॒साद॑ने  
 स्व॒धा नि॒धीय॑ते गृ॒हेऽसौ। द॒शाक्ष॑रा॒ तां र॑क्षस्व॒ तां गो॑पायस्व॒ तां ते॑  
 परि॑द॒दामि॑ तस्यां॑ त्वा॒ मा द॑भ॒न्पि॒तरो॑ दे॒वता॑। प्र॒जाप॑तिस्त्वा सादयतु॒ तया॑  
 दे॒वत॑या। अ॒पूप॑वा॒ञ्छृत॑वा॒न् क्षी॒रवा॒न्दधि॑वा॒न्मधु॑मा॒श्च॒रुरे॒ह सी॑द॒तूत॑भ्रुवन् पृ॒थि॒वीं  
 द्या॑मु॒तोपरि॑। यो॒नि॒कृतः॑ पथि॒कृतः॑ स॒पर्य॑त॒ ये दे॒वानां॑ शृ॒तभा॑गाः क्षी॒रभा॑गा  
 दधि॑भागा॒ मधु॑भागा इ॒ह स्थ। ए॒षा ते॑ यम॒साद॑ने स्व॒धा नि॒धीय॑ते गृ॒हेऽसौ।

श॒ताक्ष॑रा स॒हस्रा॑क्षरा॒ऽयुता॑क्षरा॒ऽच्युता॑क्षरा॒ तां र॑क्षस्व॒ तां गो॑पायस्व॒ तां ते॒  
परि॑ददामि॒ तस्यां॑ त्वा॒ मा द॑भन्पि॒तरो॑ दे॒वता॑। प्र॒जाप॑तिस्त्वा सादयतु॒ तया॑  
दे॒वत॑या॥२०॥ अन॑पस्फुरन्तीरुत्तर॒ देव॑तया॒ द्वे च॑॥ [७]

ए॒तास्ते॑ स्व॒धा अ॒मृताः॑ क॒रोमि॒ यास्ते॑ धा॒नाः परि॑किरा॒म्यत्र॑। तास्ते॑ य॒मः पि॒तृभिः॑  
संवि॑दानो॒ऽत्र धे॒नूः का॑म॒दुघाः॑ क॒रोतु॑। त्वाम॑र्जुनौष॒धीनां॑ पयो॑ ब्र॒ह्माण॒ इद्वि॑दुः। तासां॑  
त्वा म॒ध्यादा॑ददे च॒रुभ्यो॑ अपि॑धातवे। दूर्वा॑णाः३ स्त॒म्बमा॑ह॒रैतां॑ प्रि॒यत॑मां॒ मम॑।  
इ॒मां दि॑शं मनु॒ष्याणां॑ भूयि॑ष्ठानु॒ वि रो॑हतु। काशा॑नाः३ स्त॒म्बमा॑ह॒र रक्ष॑साम॒पह॑त्यै।  
य ए॒तस्यै॑ दि॒शः प॒राभ॑वन्नघा॒यवो॑ यथा॒ तेना॑भ॒वान्पुनः॑। द॒र्भाणाः३ स्त॒म्बमा॑ह॒र  
पि॒तृणामो॑ष॒धीं प्रि॒याम्। अ॒न्वस्यै॑ मूलं॑ जीवा॒दनु॑ काण्ड॒मथो॑ फलम्॥२१॥

लो॒कं पृ॑ण॒ ता अ॑स्य॒ सूद॑दोहसः। शं वा॒तः श॑ हि ते॒ घृणिः॑ श॒मु ते स॒न्त्वोष॑धीः।  
कल्प॑न्तां ते॒ दि॒शः सर्वाः॑। इ॒दमे॒व मेतो॑ऽप॒रामा॑र्ति॒माराम॑ काश्च॒न। तथा॑ तद॒श्विभ्या॑  
कृ॒तं मि॒त्रेण॑ वरु॒णेन॑ च। व॒र॒णो वा॑रयादि॒दं दे॒वो व॒नस्प॑तिः। आ॒त्यै निर्ऋ॑त्यै॒ द्वेषा॑च्च



वन्स्पतिः। विधृतिरसि विधारयास्मदघा द्वेषांसि शमि शमयास्मदघा द्वेषांसि  
यव यवयास्मदघा द्वेषांसि। पृथिवीं गच्छान्तरिक्षं गच्छ दिवं गच्छ दिशो गच्छ  
सुवर्गच्छ सुवर्गच्छ दिशो गच्छ दिवं गच्छान्तरिक्षं गच्छ पृथिवीं गच्छाऽऽपो वा  
गच्छ यदि तत्र ते हितमोषधीषु प्रतितिष्ठा शरीरैः। अश्मन्वती रेवतीर्यद्वे देवस्य  
सवितुः पवित्रं या राष्ट्रात्पन्नादुद्वयं तमसस्परि धाता पुनातु॥२२॥ फलं पुनातु॥—[८]

आ रौहताऽऽयुर्जरसं गृणाना अनुपूर्वं यतमाना यतिष्ठ। इह त्वष्टां सुजनिमा  
सुरत्नो दीर्घमायुः करतु जीवसे वः। यथाऽहान्यनुपूर्वं भवन्ति यथर्तव ऋतुभिर्यन्ति  
क्लृप्ताः। यथा न पूर्वमपरो जहात्येवा धातरायूषि कल्पयैषाम्। न हि ते अग्ने तनुवै  
ऋरं चकार मर्त्यः। कपिर्बभस्ति तेजनं पुनर्जरायु गौरिव। अपं नः शोशुचदघमग्ने  
शुशुध्या रयिम्। अपं नः शोशुचदघं मृत्यवे स्वाहा। अनृद्धाहमन्वारंभामहे स्वस्तये।  
स न इन्द्र इव देवेभ्यो वह्निः सम्पारणो भव॥२३॥

इमे जीवा वि मृतैराववर्तिन्नभूद्भद्रा देवहूतिं नो अद्य। प्राञ्जोगामानृतये हसाय

द्राघीय॑ आयुः॑ प्र॒तरां॑ दधा॑नाः। मृ॒त्योः प॒दं यो॒पय॑न्तो॒ यदै॒म द्राघी॑य॒ आयुः॑  
 प्र॒तरां॑ दधा॑नाः। आ॒प्याय॑मानाः प्र॒जया॑ ध॒नेन॑ शु॒द्धाः पू॒ता भ॑वथ यज्ञियासः।  
 इ॒मं जी॒वेभ्यः॑ परि॒धिं द॑धामि॒ मा नोऽनु॑गा॒दप॑रो अर्ध॑मे॒तम्। श॒तं जी॑वन्तु श॒रदः॑  
 पुरु॒चीस्ति॒रो मृ॒त्युं द॑द्महे पर्व॑तेन। इ॒मा ना॒रीर॑विध॒वाः सु॒पत्नी॒राञ्ज॑नेन स॒र्पिषा॑  
 सम्मृ॑शन्ताम्। अ॒न॒श्रवो॑ अन॒मी॒वाः सु॒शेवा॑ आ॒रोह॑न्तु ज॒नयो॑ यो॒निम॑ग्रे। यदाञ्ज॑नं  
 त्रैक॑कु॒दं जा॒तं हि॒मव॑त॒स्प॒रि। तेना॒मृत॑स्य॒ मूले॒नारा॑तीर्ज॒म्भया॑मसि। यथा॒  
 त्वमु॒द्भि॒न॒थस्यो॑षधे पृथि॒व्या अ॑धि। ए॒वमि॒म उ॒द्भि॒न्दन्तु॑ की॒र्त्या यश॑सा ब्रह्मवर्च॑सेन।  
 अ॒जोऽस्य॑जा॒स्मद॒घा द्वे॒षांसि॑ य॒वोऽसि॑ य॒वया॑स्मद॒घा द्वे॒षांसि॑॥ २४॥ भ॒व जु॒म्भया॑मसि

त्रेणिं च॥

[९]

अप॑ नः॒ शोशु॑चद॒घम॑ग्रे शुशु॒ध्या र॒यिम्। अप॑ नः॒ शोशु॑चद॒घम्। सु॒क्षेत्रि॒या  
 सु॒गातु॒या व॑सू॒या च॑ यजामहे। अप॑ नः॒ शोशु॑चद॒घम्। प्र॒यद्व॒न्दि॒ष्ठ ए॒षां प्रा॒स्माका॑सश्च  
 सू॒रयः॑। अप॑ नः॒ शोशु॑चद॒घम्। प्र॒यद॑ग्रेः स॒ह॒स्वतो॑ वि॒श्वतो॑ यन्ति॑ सू॒रयः॑। अप॑ नः॒  
 शोशु॑चद॒घम्। प्र॒यत्ते॑ अ॒ग्रे सू॒रयो॑ जा॒येम॑हि प्र॒ ते व॒यम्। अप॑ नः॒ शोशु॑चद॒घम्॥ २५॥

त्व॑ हि वि॒श्वतो॑मुख वि॒श्वतः॑ परि॒भूरसि॑। अपं नः॑ शोशु॑चद॒घम्।  
 द्विषो॑ नो वि॒श्वतो॑मुखाऽति॑ ना॒वेवं॑ पा॒रय। अपं नः॑ शोशु॑चद॒घम्। स नः॑  
 सिन्धु॑मिव ना॒वयाति॑ पर्षा स्व॒स्तये॑। अपं नः॑ शोशु॑चद॒घम्। आपः॑ प्रव॒णादिव॑  
 यती॑रपा॒स्मथ्स्य॑न्दताम॒घम्। अपं नः॑ शोशु॑चद॒घम्। उ॒द्धना॑दु॒दकानी॑वापा॒स्मथ्स्य॑न्दताम॒घम्।  
 अपं नः॑ शोशु॑चद॒घम्। आ॒न॒न्दाय॑ प्रमो॒दाय॑ पुन॒रागा॑ः स्वा॒न्गृहान्। अपं नः॑  
 शोशु॑चद॒घम्। न वै तत्र॑ प्रमी॑यते गौर॒श्वः पुरु॑षः प॒शुः। यत्रे॒दं ब्रह्म॑ क्रि॒यते॑  
 परि॒धिर्जीव॑नाय॒कमपं नः॑ शोशु॑चद॒घम्॥२६॥ अ॒धम॑घं च॒त्वारि॑ च॥—[१०]

अप॑श्याम युव॒तिमा॑चर॒न्तीं मृ॒ताय॑ जी॒वां परि॑णीयमा॒नाम्। अ॒न्धेन॑ या तम॑सा  
 प्रावृ॑ताऽसि प्राची॑मवा॒चीम॑वयन्नरि॒ष्ट्यै। मयै॑तां मा॒ऽस्तां भ्रि॑यमा॒णा दे॒वी स॒ती  
 पि॒तृलो॒कं यदै॑षि। वि॒श्ववा॑रा नभ॑सा संव्य॑यन्त्यु॒भौ नो॑ लो॒को पय॑साऽऽवृ॑णीहि।  
 रयि॑ष्ठाम॒ग्निं मधु॑मन्तमूर्मि॒णमूर्जः॑ सन्तं त्वा पय॑सोप॒ स॑स॒देम। स॑ र॒य्या समु॑  
 वर्च॑सा सच॑स्वा नः स्व॒स्तये॑। ये जी॒वा ये च॑ मृ॒ता ये जा॒ता ये च॑ जन्त्याः॑।  
 तेभ्यो॑ घृ॒तस्य॑ धारयितुं मधु॑धारा व्यु॒न्दती॑। मा॒ता रु॒द्राणां॑ दुहि॒ता वसू॑नाः॒

स्वसाँऽऽदित्यानाममृतस्य नाभिः। प्रणुवोचं चिकितुषे जनाय मागामनांगामदितिं  
वधिष्ट। पिबतूदकं तृणान्यत्तु। ओमुथ्सृजत॥२७॥ वधिष्ट द्वे च॥—————[११]

सन्त्वा सिञ्चामि यजुषा प्रजामायुर्धनं च॥ ॐ शान्तिः शान्तिः शान्तिः॥

सुमङ्गलीरियं वधूरिमां समेत पश्यत। सौभाग्यमस्यै दत्त्वायाथास्तं वि परेतन।  
इमां त्वमिन्द्र मीढ्वः सुपुत्रां सुभगां कुरु। दशास्यां पुत्राना धेहि पतिमेकादशं  
कृधि॥ आवहन्ती वितन्वाना। कुर्वाणा चीरमात्मनः। वासांसि मम गावश्च।  
अन्नपाने च सर्वदा। ततो मे श्रियमावह।

ॐ शान्तिः शान्तिः शान्तिः॥



## ॥सप्तमः प्रश्नः — शीक्षावल्ली॥

शं नो मि॒त्रः शं वरु॑णः। शं नो भव॑त्व॒र्य॒मा। शं न॒ इन्द्रो॑ बृ॒हस्प॑तिः। शं नो  
 विष्णु॑रुरु॒क्रमः॑। नमो॑ ब्रह्म॑णे। नम॑स्ते वा॒यो। त्वमे॒व प्र॒त्यक्षं॑ ब्रह्मा॑सि। त्वमे॒व प्र॒त्यक्षं॑  
 ब्रह्म॑ वदिष्यामि। ऋ॒तं वदि॑ष्यामि। स॒त्यं वदि॑ष्यामि। तन्मा॑मवतु। तद्व॒क्तारं॑मवतु।  
 अव॑तु मा॒म्। अव॑तु व॒क्तार॑म्। ॐ शा॒न्तिः शा॒न्तिः शा॒न्तिः॥१॥ स॒त्यं वदि॑ष्यामि पञ्च॑ च॥[१]

शीक्षां व्याख्यास्यामः। वर्णः स्वरः। मात्रा बलम्। सामं सन्तानः। इत्युक्तः  
 शीक्षाध्यायः॥२॥ शीक्षां पञ्च॥ \_\_\_\_\_[२]

स॒ह नो॑ यशः। स॒ह नो॑ ब्रह्मव॑र्चसम्। अथातः स॒हिता॒या उप॑निषदं  
 व्याख्यास्यामः। पञ्च॑स्वधि॒करणे॑षु। अधि॒लोक॑मधि॒ज्यौति॑षमधि॒विद्य॑मधि॒-  
 प्रज॑मध्यात्मम्। ता महास॒हिता॒ इत्याच॑क्षते। अथा॑धि॒लोक॑म्। पृथि॒वी  
 पूर्वरू॑पम्। द्यौरु॒त्तर॑रूपम्। आका॑शः स॒न्धिः॥३॥

वायुः सन्धानम्। इत्य॑धि॒लोक॑म्। अथा॑धि॒ज्यौति॑षम्। अग्निः पूर्वरू॑पम्। आदित्य  
 उत्तर॑रूपम्। आपः स॒न्धिः। वैद्यु॑तः सन्धानम्। इत्य॑धि॒ज्यौति॑षम्। अथा॑धि॒विद्य॑म्।

आचार्यः पूर्वरूपम्॥४॥

अन्तेवास्युत्तररूपम्। विद्या सन्धिः। प्रवचनं सन्धानम्। इत्यधिविद्यम्।  
अथाधिप्रजम्। माता पूर्वरूपम्। पितोत्तररूपम्। प्रजा सन्धिः। प्रजननं  
सन्धानम्। इत्यधिप्रजम्॥५॥

अथाध्यात्मम्। अधराहनुः पूर्वरूपम्। उत्तराहनुरुत्तररूपम्। वाक्सन्धिः। जिह्वा  
सन्धानम्। इत्यध्यात्मम्। इतीमा महासंहिताः। य एवमेता महासंहिता  
व्याख्याता वेद। सन्धीयते प्रजया पशुभिः। ब्रह्मवर्चसेनान्नाद्येन सुवर्ग्येण  
लोकेन॥६॥ सन्धिराचार्यः पूर्वरूपमित्यधिप्रजं लोकेन॥ [३]

यश्छन्दसामृषभो विश्वरूपः। छन्दोभ्योऽध्यमृतात्सम्बभूव। स मेन्द्रो मेधया  
स्पृणोतु। अमृतस्य देव धारणो भूयासम्। शरीरं मे विचर्षणम्। जिह्वा मे  
मधुमत्तमा। कर्णाभ्यां भूरि विश्रुवम्। ब्रह्मणः कोशोऽसि मेधयाऽपिहितः। श्रुतं मे  
गोपाय। आवहन्ती वितन्वाना॥७॥

कुर्वाणा चीरमात्मनः। वासांसि मम गावश्च। अन्नपाने च सर्वदा। ततो मे

श्रिय॒माव॑ह। लो॒म॒शां पु॒शुभिः॑ सु॒ह स्वाहा॑॥ आ मां यन्तु ब्रह्मचा॒रिणः॑ स्वाहा॑॥  
 वि मांऽऽयन्तु ब्रह्मचा॒रिणः॑ स्वाहा॑॥ प्र मांऽऽयन्तु ब्रह्मचा॒रिणः॑ स्वाहा॑॥ दमा॑यन्तु  
 ब्रह्मचा॒रिणः॑ स्वाहा॑॥ शमा॑यन्तु ब्रह्मचा॒रिणः॑ स्वाहा॑॥८॥

यशो॑ जने॑ऽसानि॒ स्वाहा॑॥ श्रेया॑न् वस्य॑सोऽसानि॒ स्वाहा॑॥ तं त्वा॑ भग॒ प्रवि॑शानि॒  
 स्वाहा॑॥ स मां भग॒ प्रवि॑श स्वाहा॑॥ तस्मि॑न्त्सहस्र॑शाखे। निभ॑गाहं त्वयि॑ मृजे॒  
 स्वाहा॑॥ यथाऽऽपः॑ प्रव॑ता यन्ति॑। यथा॑ मासा॑ अह॑र्ज॒रम्। एवं मां ब्रह्मचा॒रिणः॑।  
 धात॑रायन्तु स॒र्वतः॑ स्वाहा॑॥ प्र॒ति॒वेशो॑ऽसि॒ प्र मां भाहि॑ प्र मां पद्य॑स्व॥९॥ —[४]

भूर्भुवः॑ सुव॒रिति॑ वा ए॒तास्ति॒स्रो व्याहृ॑तयः। तासा॑मुह॒स्मै तां च॑तु॒र्थीम्।  
 माहा॑चमस्यः प्रवे॑दयते। मह॒ इति॑। तद्ब्रह्म॑। स आ॒त्मा। अङ्गा॑न्य॒न्या दे॒वताः॑।  
 भूरिति॑ वा अ॒यं लो॒कः। भुव॑ इत्य॒न्तरि॑क्षम्। सुव॒रित्य॒सौ लो॒कः॥१०॥

मह॒ इत्या॑दित्यः। आ॒दि॒त्येन॒ वाव॑ सर्वे॑ लो॒का मही॑यन्ते। भूरिति॑ वा  
 अ॒ग्निः। भुव॑ इति॑ वा॒युः। सुव॒रित्या॑दित्यः। मह॒ इति॑ च॒न्द्रमाः॑। च॒न्द्रम॑सा॒ वाव॑

सर्वाणि ज्योतींषि महीयन्ते। भूरिति वा ऋचः। भुव इति सामानि। सुवरिति यजूंषि॥११॥

मह इति ब्रह्म। ब्रह्मणा वाव सर्वे वेदा महीयन्ते। भूरिति वै प्राणः। भुव इत्यपानः। सुवरिति व्यानः। मह इत्यन्नम्। अन्नेन वाव सर्वे प्राणा महीयन्ते। ता वा एताश्चतस्रश्चतुर्धा। चतस्रश्चतस्रो व्याहृतयः। ता यो वेद। स वेद ब्रह्म। सर्वेऽस्मै देवा बलिमावहन्ति॥१२॥ असौ लोको यजूंषि वेद द्वे च॥—————[५]

स य एषोऽन्तरहृदय आकाशः। तस्मिन्नयं पुरुषो मनोमयः। अमृतो हिरण्मयः। अन्तरेण तालुके। य एष स्तन इवावलम्बते। सैन्द्रयोनिः। यत्रासौ केशान्तो विवर्तते। व्यपोह्य शीर्षकपाले। भूरित्यग्नौ प्रतितिष्ठति। भुव इति वायौ॥१३॥

सुवरित्यादित्ये। मह इति ब्रह्मणि। आप्रोति स्वाराज्यम्। आप्रोति मनसस्पतिम्। वाक्पतिश्चक्षुष्पतिः। श्रोत्रपतिर्विज्ञानपतिः। एतत्ततो भवति। आकाशशरीरं ब्रह्म। सत्यात्मप्राणारामं मन आनन्दम्। शान्तिसमृद्धममृतम्। इति



प्राचीनयो॒ग्योपा॑स्व॥१४॥ वा॒याव॑मृतमेकं च॥ \_\_\_\_\_[६]

पृ॒थि॒व्यन्तरि॑क्षं द्यौर्दि॒शोऽवा॑न्तरदि॒शाः। अ॒ग्निर्वा॑युरा॒दित्यश्च॑न्द्रमा॒ नक्ष॑त्राणि।  
आप॑ ओष॑धयो॒ वन॑स्पत॑य आका॒श आ॒त्मा। इत्य॑धिभू॒तम्। अथा॑ध्या॒त्मम्। प्रा॒णो  
व्या॒नोऽपा॑न उ॒दानः स॑मानः। चक्षुः॑ श्रोत्रं॒ मनो॑ वाक्क॒क्। चर्म॑ मा॒ꣳसꣳ स्ना॒वास्थि॑  
म॒ज्जा। ए॒तद॑धि वि॒धाय॑र्षि॒रवो॑चत्। पाङ्क॑ वा इ॒दꣳ सर्व॑म्। पाङ्के॑नै॒व पाङ्के॑  
स्पृ॒णोती॑ति॥१५॥ सर्व॑मेकं च॥ \_\_\_\_\_[७]

ओमि॑ति ब्रह्म॑। ओमि॑तीदꣳ सर्व॑म्। ओमि॑त्येतद॑नुकृति॒ ह स्म॒ वा  
अ॒प्योश्रा॑वयेत्याश्रा॑वयन्ति। ओमि॑ति॒ सामा॑नि गायन्ति। ओꣳशोमि॑ति॒ शस्त्रा॑णि  
शꣳसन्ति। ओमि॑त्यध्व॒र्युः प्र॑तिग॒रं प्र॑तिगृणाति। ओमि॑ति॒ ब्रह्मा॑ प्रसौ॒ति।  
ओमि॑त्यग्नि॒होत्र॑मनु॒जाना॑ति। ओमि॑ति॒ ब्राह्म॑णः प्र॑वक्ष्यन्ना॒ह ब्रह्मो॑पा॒प्रवा॑नीति॒।  
ब्रह्मै॑वोपा॒प्रोति॑॥१६॥ ओ॒न्दशं॑॥ \_\_\_\_\_[८]

ऋ॒तं च॑ स्वाध्यायप्रव॑चने॒ च। सत्यं॑ च स्वाध्यायप्रव॑चने॒ च। तपश्च॑ स्वाध्याय॒-  
प्रव॑चने॒ च। दमश्च॑ स्वाध्यायप्रव॑चने॒ च। शमश्च॑ स्वाध्यायप्रव॑चने॒ च। अ॒ग्नयश्च॑

स्वाध्यायप्रवचने च। अग्निहोत्रं च स्वाध्यायप्रवचने च। अतिथयश्च स्वाध्याय-  
 प्रवचने च। मानुषं च स्वाध्यायप्रवचने च। प्रजा च स्वाध्यायप्रवचने च। प्रजनश्च  
 स्वाध्यायप्रवचने च। प्रजातिश्च स्वाध्यायप्रवचने च। सत्यमिति सत्यवचा राथीतरः।  
 तप इति तपोनित्यः पौरुशिष्टिः। स्वाध्यायप्रवचने एवेति नाको मौद्गल्यः। तद्धि  
 तपस्तद्धि तपः॥१७॥ प्रजा च स्वाध्यायप्रवचने च पदं॥\_\_\_\_\_ [१]

अहं वृक्षस्य रेरेरिवा। कीर्तिः पृष्ठं गिरेरिवा। ऊर्ध्वपवित्रो वाजिनीव स्वमृतमस्मि।  
 द्रविणं९ सर्वर्चसम्। सुमेधा अमृतोक्षितः। इति त्रिशङ्कोर्वेदानुवचनम्॥१८॥ अहं९  
 पदं॥\_\_\_\_\_ [१०]

वेदमनूच्याऽऽचार्योऽन्तेवासिनमनुशास्ति। सत्यं वद। धर्मं चर। स्वाध्यायान्मा  
 प्रमदः। आचार्याय प्रियं धनमाहृत्य प्रजातन्तुं मा व्यवच्छेत्सीः। सत्यान्न  
 प्रमदितव्यम्। धर्मान्न प्रमदितव्यम्। कुशलान्न प्रमदितव्यम्। भूत्यै न  
 प्रमदितव्यम्। स्वाध्यायप्रवचनाभ्यां न प्रमदितव्यम्॥१९॥

देवपितृकार्याभ्यां न प्रमदितव्यम्। मातृदेवो भव। पितृदेवो भव। आचार्यदेवो

भव। अतिथिदेवो भव। यान्यनवद्यानि कर्माणि। तानि सेवितव्यानि। नो इतराणि। यान्यस्माकं सुचरितानि। तानि त्वयोपास्यानि॥२०॥

नो इतराणि। ये के चास्मच्छ्रेयांसो ब्राह्मणाः। तेषां त्वयाऽऽसनेन प्रशंसितव्यम्। श्रद्धया देयम्। अश्रद्धयाऽदेयम्। श्रिया देयम्। हिया देयम्। भिया देयम्। संविदा देयम्। अथ यदि ते कर्मविचिकिथ्सा वा वृत्तविचिकिथ्सा वा स्यात्॥२१॥

ये तत्र ब्राह्मणाः सम्मर्शिनः। युक्ता आयुक्ताः। अलूक्षा धर्मकामाः स्युः। यथा ते तत्र वर्तेरन्। तथा तत्र वर्तेथाः। अथाभ्याख्यातेषु। ये तत्र ब्राह्मणाः सम्मर्शिनः। युक्ता आयुक्ताः। अलूक्षा धर्मकामाः स्युः। यथा ते तेषु वर्तेरन्। तथा तेषु वर्तेथाः। एष आदेशः। एष उपदेशः। एषा वैदोपनिषत्। एतदनुशासनम्। एवमुपासितव्यम्। एवमु चैतदुपास्यम्॥२२॥ स्वाध्यायप्रवचनाभ्यात्र प्रमदित्वं तानि त्वयोपास्यानि स्यात्तेषु वर्तेरन्त्यस च॥—————[११]

शं नो मित्रः शं वरुणः। शं नो भवत्वयमा। शं न इन्द्रो बृहस्पतिः। शं नो विष्णुरुक्रमः। नमो ब्रह्मणे। नमस्ते वायो। त्वमेव प्रत्यक्षं ब्रह्मासि। त्वामेव प्रत्यक्षं

ब्रह्मावादिषम्। ऋतम॑वादिषम्। स॒त्यम॑वादिषम्। तन्मा॑मा॒वीत्। तद्वृ॒त्तार॑मा॒वीत्।  
आ॒वीन्मा॑म्। आ॒वीद्वृ॒त्तार॑म्। ॐ शान्तिः॒ शान्तिः॒ शान्तिः॑॥२३॥ स॒त्यम॑वादिषं पञ्च॑ च॥[१२]

## ॥ अष्टमः प्रश्नः — ब्रह्मानन्दवल्ली ॥

ॐ सह नाववतु। सह नौ भुनक्तु। सह वीर्यं करवावहे। तेजस्वि नावधीतमस्तु  
मा विद्विषावहे। ॐ शान्तिः शान्तिः शान्तिः॥

ब्रह्मविदाप्रोति परम्। तदेषाभ्युक्ता। सत्यं ज्ञानमनन्तं ब्रह्म। यो वेद निहितं  
गुहायां परमे व्योमन्। सौऽश्नुते सर्वान्कामान्त्सह। ब्रह्मणा विपश्चितेति। तस्माद्वा  
एतस्मादात्मन आकाशः सम्भूतः। आकाशाद्वायुः। वायोरग्निः। अग्रेरापः। अद्भ्यः  
पृथिवी। पृथिव्या ओषधयः। ओषधीभ्योऽन्नम्। अन्नात्पुरुषः। स वा एष पुरुषो-  
ऽन्नरसमयः। तस्येदमेव शिरः। अयं दक्षिणः पक्षः। अयमुत्तरः पक्षः। अयमात्मा।  
इदं पुच्छं प्रतिष्ठा। तदप्येष श्लोको भवति॥१॥

अन्नाद्वै प्रजाः प्रजायन्ते। याः काश्च पृथिवीः श्रिताः। अथो अन्नैर्नैव जीवन्ति।  
अथैनदपि यन्त्यन्तः। अन्नं हि भूतानां ज्येष्ठम्। तस्मात्सर्वोषधमुच्यते।  
सर्वं वै तेऽन्नमाप्नुवन्ति। येऽन्नं ब्रह्मोपासते। अन्नं हि भूतानां ज्येष्ठम्।  
तस्मात्सर्वोषधमुच्यते। अन्नाद्भूतानि जायन्ते। जातान्यन्नेन वर्धन्ते। अद्यतेऽस्ति च

भूतानि। तस्मादन्नं तदुच्यत इति। तस्माद्वा एतस्मादन्नरसमयात्। अन्योऽन्तर  
 आत्मा प्राणमयः। तेनैष पूर्णः। स वा एष पुरुषविध एव। तस्य पुरुषविधताम्।  
 अन्वयं पुरुषविधः। तस्य प्राण एव शिरः। व्यानो दक्षिणः पक्षः। अपान उत्तरः  
 पक्षः। आकाश आत्मा। पृथिवी पुच्छं प्रतिष्ठा। तदप्येष श्लोको भवति॥२॥

प्राणं देवा अनु प्राणन्ति। मनुष्याः पशवश्च ये। प्राणो हि भूतानामायुः।  
 तस्मात्सर्वायुषमुच्यते। सर्वमेव त आयुर्यन्ति। ये प्राणं ब्रह्मोपासन्ते। प्राणो हि  
 भूतानामायुः। तस्मात्सर्वायुषमुच्यत इति। तस्यैष एव शरीर आत्मा। यः पूर्वस्य।  
 तस्माद्वा एतस्मात् प्राणमयात्। अन्योऽन्तर आत्मा मनोमयः। तेनैष पूर्णः। स  
 वा एष पुरुषविध एव। तस्य पुरुषविधताम्। अन्वयं पुरुषविधः। तस्य यजुरेव  
 शिरः। ऋग्दक्षिणः पक्षः। सामोत्तरः पक्षः। आदेश आत्मा। अथर्वाङ्गिरसः पुच्छं  
 प्रतिष्ठा। तदप्येष श्लोको भवति॥३॥

यतो वाचो निर्वर्तन्ते। अप्राप्य मनसा सह। आनन्दं ब्रह्मणो विद्वान्। न बिभेति

कदाचनेति। तस्यैष एव शारीर आत्मा। यः पूर्वस्य। तस्माद्वा एतस्मान्मनोमयात्।  
 अन्योऽन्तर आत्मा विज्ञानमयः। तेनैष पूर्णः। स वा एष पुरुषविध एव। तस्य  
 पुरुषविधताम्। अन्वयं पुरुषविधः। तस्य श्रद्धैव शिरः। ऋतं दक्षिणः पक्षः।  
 सत्यमुत्तरः पक्षः। योग आत्मा। महः पुच्छं प्रतिष्ठा। तदप्येष श्लोको भवति॥४॥

विज्ञानं यज्ञं तनुते। कर्माणि तनुतेऽपि च। विज्ञानं देवाः सर्वे। ब्रह्म  
 ज्येष्ठमुपासते। विज्ञानं ब्रह्म चेद्वेद। तस्माच्चेन्न प्रमाद्यति। शरीरे पाप्मनो हित्वा।  
 सर्वान्कामान्धसमश्नुत इति। तस्यैष एव शारीर आत्मा। यः पूर्वस्य। तस्माद्वा  
 एतस्माद्विज्ञानमयात्। अन्योऽन्तर आत्माऽऽनन्दमयः। तेनैष पूर्णः। स वा एष  
 पुरुषविध एव। तस्य पुरुषविधताम्। अन्वयं पुरुषविधः। तस्य प्रियमेव शिरः।  
 मोदो दक्षिणः पक्षः। प्रमोद उत्तरः पक्षः। आनन्द आत्मा। ब्रह्म पुच्छं प्रतिष्ठा।  
 तदप्येष श्लोको भवति॥५॥

असन्नेव स भवति। असद्ब्रह्मेति वेद् चेत्। अस्ति ब्रह्मेति चेद्वेद। सन्तमेनं ततो

विदुरिति। तस्यैष एव शरीर आत्मा। यः पूर्वस्य। अथातोऽनुप्रश्नाः। उता विद्वानमुं  
 लोकं प्रेत्य। कश्चन गच्छती(३)॥ आहो विद्वानमुं लोकं प्रेत्य। कश्चित्समंश्नुता(३)  
 उ। सोऽकामयत। बहु स्यां प्रजायेयेति। स तपोऽतप्यत। स तपस्तप्त्वा। इदं  
 सर्वमसृजत। यदिदं किं च। तत्सृष्ट्वा। तदेवानु प्राविशत्। तदनुप्रविश्य। सच्च  
 त्यच्चाभवत्। निरुक्तं चानिरुक्तं च। निलयनं चानिलयनं च। विज्ञानं चाविज्ञानं  
 च। सत्यं चानृतं च सत्यमभवत्। यदिदं किं च। तत्सत्यमित्याचक्षते। तदप्येष  
 श्लोको भवति॥६॥

असृष्ट्वा इदमग्रं आसीत्। ततो वै सदजायत। तदात्मानं स्वयमकुरुत।  
 तस्मात्तत्सुकृतमुच्यत इति। यद्वै तत्सुकृतम्। रसो वै सः। रसं ह्येवायं  
 लब्ध्वाऽऽनन्दी भवति। को ह्येवान्यात्कः प्राण्यात्। यदेष आकाश आनन्दो न  
 स्यात्। एष ह्येवानन्दयाति। यदा ह्येवैष एतस्मिन्नदृश्येऽनात्म्येऽनिरुक्तेऽनिलयनेऽभयं  
 प्रतिष्ठां विन्दते। अथ सोऽभयं गतो भवति। यदा ह्येवैष एतस्मिन्नुदरमन्तरं  
 कुरुते। अथ तस्य भयं भवति। तत्त्वेव भयं विदुषोऽमन्वानस्य। तदप्येष श्लोको



भवति॥७॥

भीषाऽस्माद्वातः पवते। भीषोदेति सूर्यः। भीषाऽस्मादग्निश्चेन्द्रश्च। मृत्युर्धावति पञ्चमं इति। सैषाऽऽनन्दस्य मीमांसा भवति। युवा स्यात्साधु युवाऽध्यायकः। आशिष्ठो दृढिष्ठो बलिष्ठः। तस्येयं पृथिवी सर्वा वित्तस्य पूर्णा स्यात्। स एको मानुषं आनन्दः। ते ये शतं मानुषां आनन्दाः। स एको मनुष्यगन्धर्वाणामानन्दः। श्रोत्रियस्य चाकामहतस्य।

ते ये शतं मनुष्यगन्धर्वाणामानन्दाः। स एको देवगन्धर्वाणामानन्दः। श्रोत्रियस्य चाकामहतस्य।

ते ये शतं देवगन्धर्वाणामानन्दाः। स एकः पितॄणां चिरलोकलोकानामानन्दः। श्रोत्रियस्य चाकामहतस्य।

ते ये शतं पितॄणां चिरलोकलोकानामानन्दाः। स एक आजानजानां देवानामानन्दः। श्रोत्रियस्य चाकामहतस्य।

ते ये शतमाजानजानां देवानामानन्दाः। स एकः कर्मदेवानां देवानामानन्दः।

ये कर्मणा देवानपियुन्ति। श्रोत्रियस्य चाकामहतस्य।

ते ये शतं कर्मदेवानां देवानामानन्दाः। स एको देवानामानन्दः। श्रोत्रियस्य चाकामहतस्य।

ते ये शतं देवानामानन्दाः। स एक इन्द्रस्याऽऽनन्दः। श्रोत्रियस्य चाकामहतस्य।

ते ये शतमिन्द्रस्याऽऽनन्दाः। स एको बृहस्पतेरानन्दः। श्रोत्रियस्य चाकामहतस्य।

ते ये शतं बृहस्पतेरानन्दाः। स एकः प्रजापतेरानन्दः। श्रोत्रियस्य चाकामहतस्य।

ते ये शतं प्रजापतेरानन्दाः। स एको ब्रह्मण आनन्दः। श्रोत्रियस्य चाकामहतस्य।

स यश्चायं पुरुषे। यश्चासावादित्ये। स एकः। स य एवंवित्। अस्माल्लोकात्प्रेत्य। एतमन्नमयमात्मानमुपसङ्कामति। एतं प्राणमयमात्मानमुपसङ्कामति। एतं मनोमयमात्मानमुपसङ्कामति। एतं विज्ञानमयमात्मानमुपसङ्कामति। एतमानन्द-

मयमात्मानमुपसङ्गामति। तदप्येष श्लोको भवति॥८॥

यतो वाचो निर्वर्तन्ते। अप्राप्य मनसा सह। आनन्दं ब्रह्मणो विद्वान्। न बिभेति कुतश्चनेति। एत९ ह वाव न तपति। किमह९ साधुं नाकुरवम्। किमहं पापमकरवमिति। स य एवं विद्वानेते आत्मानं स्पृणुते। उभे ह्येवैष एते आत्मानं स्पृणुते। य एवं वेद। इत्युपनिषत्॥९॥

सह नाववतु। सह नौ भुनक्तु। सह वीर्यं करवावहे। तेजस्वि नावधीतमस्तु मा विद्विषावहे। ॐ शान्तिः शान्तिः शान्तिः॥

॥नवमः प्रश्नः — भृगुवल्ली॥

ॐ सह नाववतु। सह नौ भुनक्तु। सह वीर्यं करवावहे। तेजस्वि नावधीतमस्तु मा विद्विषावहे। ॐ शान्तिः शान्तिः शान्तिः॥

भृगुर्वै वारुणिः। वरुणं पितरमुपससार। अधीहि भगवो ब्रह्मेति। तस्मा

ए॒तत्प्रो॒वाच। अन्नं॑ प्रा॒णं चक्षुः॑ श्रोत्रं॑ मनो॑ वाच॑मिति॑। त॒५ हो॒वाच। यतो॑ वा  
इ॒मानि॑ भू॒तानि॑ जाय॑न्ते। येन॑ जा॒तानि॑ जीव॑न्ति। यत्प्रय॑न्त्य॒भि संवि॑शन्ति।  
तद्विजि॑ज्ञासस्व। तद्ब्र॒ह्मेति॑। स तपो॑ऽतप्यत। स तप॑स्त॒प्त्वा॥१॥

अन्नं॑ ब्रह्मेति॑ व्य॒जानात्। अन्ना॒द्धैव॑ खल्वि॒मानि॑ भू॒तानि॑ जाय॑न्ते। अन्नै॒न जा॒तानि॑  
जीव॑न्ति। अन्नं॑ प्रय॑न्त्य॒भि संवि॑शन्तीति॑। तद्वि॒ज्ञाय॑। पुन॑रे॒व वरु॑णं॒ पित॑र॒मुप॑ससार।  
अधी॑हि भगवो॒ ब्रह्मेति॑। त॒५ हो॒वाच। तप॑सा॒ ब्रह्म॑ विजि॑ज्ञासस्व। तपो॑ ब्रह्मेति॑।  
स तपो॑ऽतप्यत। स तप॑स्त॒प्त्वा॥२॥

प्रा॒णो ब्रह्मेति॑ व्य॒जानात्। प्रा॒णाद्धैव॑ खल्वि॒मानि॑ भू॒तानि॑ जाय॑न्ते। प्रा॒णेन॑  
जा॒तानि॑ जीव॑न्ति। प्रा॒णं प्रय॑न्त्य॒भि संवि॑शन्तीति॑। तद्वि॒ज्ञाय॑। पुन॑रे॒व वरु॑णं॒ पित॑र॒मुप॑ससार।  
अधी॑हि भगवो॒ ब्रह्मेति॑। त॒५ हो॒वाच। तप॑सा॒ ब्रह्म॑ विजि॑ज्ञासस्व। तपो॑ ब्रह्मेति॑।  
स तपो॑ऽतप्यत। स तप॑स्त॒प्त्वा॥३॥

मनो॑ ब्रह्मेति॑ व्य॒जानात्। मन॑सो ह्यै॒व खल्वि॒मानि॑ भू॒तानि॑ जाय॑न्ते। मन॑सा॒  
जा॒तानि॑ जीव॑न्ति। मनः॑ प्रय॑न्त्य॒भि संवि॑शन्तीति॑। तद्वि॒ज्ञाय॑। पुन॑रे॒व वरु॑णं॒

पितॄमुप॑ससार। अधी॑हि भगवो ब्रह्मेति। त॒५ हो॑वाच। तप॑सा ब्रह्म विजि॑ज्ञासस्व।  
तपो॑ ब्रह्मेति। स तपो॑ऽतप्यत। स तप॑स्त॒प्त्वा॥४॥

विज्ञानं ब्रह्मेति व्य॑जानात्। विज्ञाना॒द्धे॒व खल्वि॑मानि भू॒ता॒नि जा॑यन्ते। विज्ञाने॑न  
जा॒ता॒नि जी॑वन्ति। विज्ञानं प्र॑यन्त्य॒भि संवि॑शन्तीति। तद्विज्ञा॑य। पुन॑रेव वरुणं  
पितॄमुप॑ससार। अधी॑हि भगवो ब्रह्मेति। त॒५ हो॑वाच। तप॑सा ब्रह्म विजि॑ज्ञासस्व।  
तपो॑ ब्रह्मेति। स तपो॑ऽतप्यत। स तप॑स्त॒प्त्वा॥५॥

आन॒न्दो ब्रह्मेति॑ व्य॑जानात्। आन॒न्दा॒द्धे॒व खल्वि॑मानि भू॒ता॒नि जा॑यन्ते।  
आन॒न्देन॑ जा॒ता॒नि जी॑वन्ति। आन॒न्दं प्र॑यन्त्य॒भि संवि॑शन्तीति। सैषा भा॑र्गवी  
वा॒रु॒णी वि॒द्या। पर॑मे व्यो॒मन् प्र॑ति॒ष्ठिता॑। य ए॒वं वेद॑ प्र॒ति॒तिष्ठ॑ति। अन्न॑वानन्ना॒दो  
भ॑वति। म॒हान्भ॑वति प्र॒जया॑ प॒शुभिर्ब्र॑ह्मवर्च॒सेन॑। म॒हान्की॒र्त्या॥६॥

अन्नं न नि॒न्द्यात्। तद्वृ॒तम्। प्रा॒णो वा अन्न॑म्। शरी॑रमन्ना॒दम्। प्रा॒णे शरी॑रं प्र॒ति॒ष्ठित॑म्।  
शरी॑रे प्रा॒णः प्र॒ति॒ष्ठितः॑। तदे॒तदन्न॑मन्ने प्र॒ति॒ष्ठित॑म्। स य ए॒तदन्न॑मन्ने प्र॒ति॒ष्ठितं॑  
वेद॑ प्र॒ति॒तिष्ठ॑ति। अन्न॑वानन्ना॒दो भ॑वति। म॒हान्भ॑वति प्र॒जया॑ प॒शुभिर्ब्र॑ह्मवर्च॒सेन॑।

म॒हान्की॒र्त्या॑॥७॥

अन्नं॑ न परि॑चक्षीत। तद्व॒तम्। आपो॑ वा अन्नम्। ज्योति॑रन्नादम्। अ॒प्सु  
ज्योतिः॑ प्रति॑ष्ठितम्। ज्योति॑ष्यापः॒ प्रति॑ष्ठिताः। तदे॒तदन्न॑मन्ने॒ प्रति॑ष्ठितम्। स य  
ए॒तदन्न॑मन्ने॒ प्रति॑ष्ठितं वेद॑ प्रति॑तिष्ठति। अन्न॑वानन्नादो भ॑वति। म॒हान्भ॑वति प्र॒जया॑  
प॒शुभिर्ब्र॑ह्मवर्च॒सेन॑। म॒हान्की॒र्त्या॑॥८॥

अन्नं॑ बहु॒ कुर्वी॑त। तद्व॒तम्। पृथि॒वी वा अन्नम्। आ॒का॒शोऽन्ना॒दः। पृथि॒व्यामा॑का॒शः  
प्रति॑ष्ठितः। आ॒का॒शे पृथि॒वी प्रति॑ष्ठिता। तदे॒तदन्न॑मन्ने॒ प्रति॑ष्ठितम्। स य  
ए॒तदन्न॑मन्ने॒ प्रति॑ष्ठितं वेद॑ प्रति॑तिष्ठति। अन्न॑वानन्नादो भ॑वति। म॒हान्भ॑वति प्र॒जया॑  
प॒शुभिर्ब्र॑ह्मवर्च॒सेन॑। म॒हान्की॒र्त्या॑॥९॥

न कश्चन॑ वसतौ प्रत्या॑चक्षीत। तद्व॒तम्। तस्मा॑द्यथा कया च विधया बह्व॑न्नं  
प्राप्नु॑यात्। अरा॑ध्यस्मा अन्नमि॑त्याच॒क्षते। एतद्वै मुख॑तोऽन्नं॑ रा॒द्धम्। मुख॑तोऽस्मा  
अ॒न्नं॑ रा॒ध्यते। एतद्वै मध्य॑तोऽन्नं॑ रा॒द्धम्। मध्य॑तोऽस्मा अ॒न्नं॑ रा॒ध्यते। एतद्वा  
अन्त॑तोऽन्नं॑ रा॒द्धम्। अन्त॑तोऽस्मा अ॒न्नं॑ रा॒ध्यते। य एवं वेद॑। क्षेम॑ इति वा॒चि।

योगक्षेम इति प्राणापानयोः। कर्मेति हस्तयोः। गतिरिति पादयोः। विमुक्तिरिति  
 पायौ। इति मानुषीः समाज्ञाः। अथ दैवीः। तृप्तिरिति वृष्टौ। बलमिति विद्युति। यश  
 इति पशुषु। ज्योतिरिति नक्षत्रेषु। प्रजातिरमृतमानन्द इत्युपस्थे। सर्वमित्याकाशे।  
 तत्प्रतिष्ठेत्युपासीत। प्रतिष्ठावान्भवति। तन्मह इत्युपासीत। महान्भवति। तन्मन  
 इत्युपासीत। मानवान्भवति। तन्नम इत्युपासीत। नम्यन्तैऽस्मै कामाः।  
 तद्ब्रह्मेत्युपासीत। ब्रह्मवान्भवति। तद्ब्रह्मणः परिमर इत्युपासीत। पर्येणं म्रियन्ते  
 द्विषन्तः सपत्नाः। परि येऽप्रियाः भ्रातृव्याः। स यश्चायं पुरुषे। यश्चासावादित्ये। स  
 एकः। स य एवंवित्। अस्माल्लोकात्प्रेत्य। एतमन्नमयमात्मानमुपसङ्क्रम्य।  
 एतं प्राणमयमात्मानमुपसङ्क्रम्य। एतं मनोमयमात्मानमुपसङ्क्रम्य। एतं  
 विज्ञानमयमात्मानमुपसङ्क्रम्य। एतमानन्दमयमात्मानमुपसङ्क्रम्य। इमाँल्लोकान्कामात्री  
 कामरूप्यनुसञ्चरन्। एतत्साम गायत्रास्ते। हा(३) वु हा(३) वु हा(३) वु।  
 अहमन्नमहमन्नमहमन्नम्। अहमन्नादो(२)ऽहमन्नादो(२)ऽहमन्नादः। अह३  
 श्लोककृदह३ श्लोककृदह३ श्लोककृत्। अहमस्मि प्रथमजा ऋता(३) स्य।

पूर्वं देवेभ्यो अमृतस्य ना(३) भा॒इ। यो मा ददाति स इदेव मा(३) वाः।  
 अ॒हमन्नमन्नम॒दन्त॒मा(३) द्धि। अ॒हं वि॒श्वं भुव॑न॒मभ्य॑भवाम्। सुव॒र्न ज्योतीः॑। य  
 ए॒वं वेद॑। इत्यु॑प॒निषत्॑॥१०॥

स॒ह ना॑ववतु। स॒ह नौ॑ भुनक्तु। स॒ह वी॒र्यं॑ करवावहे। ते॒ज॒स्वि ना॒वधी॑तमस्तु मा  
 वि॒द्विषा॒वहै॑। ॐ शान्तिः॒ शान्तिः॒ शान्तिः॑॥





## ॥दशमः प्रश्नः — महानारायणोपनिषत्॥

ॐ स॒ह ना॑ववतु। स॒ह नौ॑ भुनक्तु। स॒ह वी॒र्यं॑ करवावहे। ते॒ज॒स्वि ना॒वधी॑तमस्तु  
मा वि॑द्विषा॒वहै॑। ॐ शान्तिः॒ शान्तिः॒ शान्तिः॑॥

## ॥अम्भस्य पारे॥

अम्भ॑स्य पा॒रे भुव॑नस्य॒ मध्ये॒ नाक॑स्य पृ॒ष्ठे म॑ह॒तो म॒ही॒यान्। शु॒क्रेण॒ ज्योती॑ः॒षि  
सम॑नुप्रवि॑ष्टः प्र॒जाप॑तिश्चरति॒ गर्भे॑ अ॒न्तः॥ यस्मि॑न्नि॒दं सं च॒ विचै॑ति॒ सर्वं॒  
यस्मि॑न्दे॒वा अधि॒ विश्वे॑ निषे॒दुः। तदे॒व भू॑तं तदु॒ भव्य॑मा इ॒दं तद॑क्षरे॒ पर॑मे  
व्यो॑मन्॥ येना॑ऽऽवृ॒तं खं च॒ दिवं॑ म॒हीं च॒ येना॑ऽऽदि॒त्यस्त॑प॒ति तेज॑सा॒ भ्राज॑सा  
च। यम॑न्तः संमु॒द्रे क॒वयो॒ वय॑न्ति॒ यद॑क्षरे॒ पर॑मे प्र॒जाः॥ यतः॑ प्रसू॒ता ज॒गतः॑  
प्रसू॑ती॒ तोये॑न जी॒वान् व्यस॑स॒र्ज भू॒म्याम्। यदोष॑धीभिः पु॒रुषा॑न्प॒शूँश्च॒ विवेश॑  
भू॒तानि॑ चराच॒राणि॑॥ अतः॑ परं॒ नान्य॑दणी॒यसः॑ हि॒ परा॑त्परं॒ यन्म॑ह॒तो म॒हान्त॑म्।  
यदे॑कम॒व्यक्त॑मन॒न्तरूपं॑ वि॒श्वं पु॒रा॒णं तम॑सः॒ पर॑स्तात्॥१॥

तदेवर्तं तदु सत्यमाहुस्तदेव ब्रह्म परमं कवीनाम्। इष्टापूर्तं बहुधा जातं  
जायमानं विश्वं बिभर्ति भुवनस्य नाभिः॥ तदेवाग्निस्तद्वायुस्तत्सूर्यस्तदु चन्द्रमाः।  
तदेव शुक्रममृतं तद्ब्रह्म तदापः स प्रजापतिः॥ सर्वे निमेषा जज्ञिरे विद्युतः  
पुरुषादधि। कला मुहूर्ताः काष्ठाश्चाहोरात्राश्च सर्वशः॥ अर्धमासा मासा ऋतवः  
संवत्सरश्च कल्पन्ताम्। स आपः प्रदुधे उभे इमे अन्तरिक्षमथो सुवः॥ नैनमूर्ध्वं  
न तिर्यश्चं न मध्ये परिजग्रभत्। न तस्येशे कश्चन तस्य नाम महद्यशः॥२॥

न सन्दृशेति तिष्ठति रूपमस्य न चक्षुषा पश्यति कश्चनैनम्। हृदा मनीषा  
मनसाऽभिकृत्तो य एनं विदुरमृतास्ते भवन्ति॥ अद्भ्यः सम्भूतो हिरण्यगर्भ इत्यष्टौ॥  
एष हि देवः प्रदिशोऽनु सर्वाः पूर्वो हि जातः स उ गर्भे अन्तः। स विजायमानः  
स जनिष्यमाणः प्रत्यङ्मुखोऽस्तिष्ठति विश्वतोमुखः॥ विश्वतश्चक्षुरुत विश्वतोमुखो  
विश्वतोहस्त उत विश्वतस्पात्। सं बाहुभ्यां नमति सं पतत्रैर्द्यावापृथिवी जनयन्देव  
एकः॥ वेनस्तत्पश्यन्विश्वा भुवनानि विद्वान् यत्र विश्वं भवत्येकनीलम्। यस्मिन्निदः॥

सं च विचैक॑ स ओतुः प्रोत॑श्च वि॒भुः प्र॒जासु॑ । प्र तद्वो॑चे अ॒मृतं॑ नु वि॒द्वान्गान्ध॒र्वो  
नाम् निहि॑तं गुहा॑सु ॥ ३ ॥

त्रीणि॑ प॒दा निहि॑ता गुहा॑सु यस्तद्वेदं सवि॒तुः पि॒ताऽस॑त् । स नो बन्धु॑र्जनि॒ता  
स वि॒धा॒ता धामा॑नि वेद॒ भुव॑नानि वि॒श्वान् । यत्र॑ दे॒वा अ॒मृत॑मान॒शाना॑स्तृतीये  
धामा॑न्यभ्यैर॒यन्त॑ । परि॒ द्यावा॑पृथि॒वी य॑न्ति स॒द्यः परि॑ लो॒कान् परि॑ दि॒शः  
परि॑ सुवः । ऋ॒तस्य॑ तन्तुं॑ वित॑तं वि॒चृत्य॑ तद॑पश्य॒त्तद॑भवत् प्र॒जासु॑ । प॒रीत्य॑  
लो॒कान्प॒रीत्य॑ भू॒तानि॑ प॒रीत्य॑ सर्वाः॑ प्र॒दिशो॑ दि॒शश्च॑ । प्र॒जाप॑तिः प्रथम॒जा  
ऋ॒तस्याऽऽ॒त्मनाऽऽ॒त्मानं॑ म॒भिसम्ब॑भूव । स॒दस॑स्पति॒मद्भु॑तं प्रि॒यमिन्द्र॑स्य॒ काम्य॑म् ।  
सनि॑ मे॒धाम॑यासिषम् । उद्दी॑प्यस्व जा॒तवे॑दोऽप॒घ्नन्नि॑र्ऋ॒तिं मम॑ ॥ ४ ॥

प॒शूश्च॑ म॒ह्यमाव॑ह जी॒वनं॑ च दि॒शो दि॒शः । मा नो॑ हि॒ंसी॒ज्जा॒तवे॑दो गाम॒श्वं  
पु॒रुषं॑ जग॑त् । अ॒बिभ्र॑द॒ग्न आ॒ग॒हि श्रि॒या मा॒ परि॑पातय ।

## ॥ गायत्रीमन्त्राः ॥

पुरुषस्य विद्म सहस्राक्षस्य महादेवस्य धीमहि। तन्नो रुद्रः प्रचोदयात्।  
तत्पुरुषाय विद्महे महादेवाय धीमहि। तन्नो रुद्रः प्रचोदयात्। तत्पुरुषाय विद्महे  
वक्रतुण्डाय धीमहि। तन्नो दन्तिः प्रचोदयात्। तत्पुरुषाय विद्महे चक्रतुण्डाय  
धीमहि॥ ५॥

तन्नो नन्दिः प्रचोदयात्। तत्पुरुषाय विद्महे महासेनाय धीमहि। तन्नः षण्मुखः  
प्रचोदयात्। तत्पुरुषाय विद्महे सुवर्णपक्षाय धीमहि। तन्नो गरुडः प्रचोदयात्।  
वेदात्मनाय विद्महे हिरण्यगर्भाय धीमहि। तन्नो ब्रह्म प्रचोदयात्। नारायणाय विद्महे  
वासुदेवाय धीमहि। तन्नो विष्णुः प्रचोदयात्। वज्रनखाय विद्महे तीक्ष्णदृष्टाय  
धीमहि॥ ६॥

तन्नो नारसिंहः प्रचोदयात्। भास्कराय विद्महे महद्युतिकराय धीमहि।  
तन्नो आदित्यः प्रचोदयात्। वैश्वानराय विद्महे लालीलाय धीमहि। तन्नो अग्निः  
प्रचोदयात्। कात्यायनाय विद्महे कन्यकुमारि धीमहि। तन्नो दुर्गिः प्रचोदयात्।

## ॥ दूर्वासूक्तम् ॥

स॒हस्र॑पर॒मा दे॒वी श॒तमू॑ला श॒ताङ्कु॑रा। सर्व॑ ह॒रतु॑ मे पा॒पं दूर्वा॑ दुःस्वप्न॒नाश॑नी।  
काण्डा॑त्काण्डात् प्र॒रोह॑न्ती॒ परु॑षः परु॒षः परि॑ ॥ ७ ॥

ए॒वानो॑ दूर्वे॒ प्रत॑नु स॒हस्रे॑ण श॒तेन॑ च। या श॒तेन॑ प्रत॒नोषि॑ स॒हस्रे॑ण वि॒रोह॑सि।  
तस्या॑स्ते दे॒वीष्टके॑ वि॒धेम॑ ह॒विषा॑ व॒यम्। अश्व॑क्रान्ते र॒थक्रान्ते॑ वि॒ष्णुक्रान्ते॑  
व॒सुन्ध॑रा। शिरसा॑ धार॒यिष्या॑मि र॒क्षस्व॑ मां पदे॒ पदे॑।

## ॥ मृत्तिकासूक्तम् ॥

भूमि॑र्धेनु॒र्धर॑णी लो॒कधा॑रिणी। उ॒द्धृता॑ऽसि व॒राहे॑ण कृ॒ष्णेन॑ श॒तबा॑हुना। मृत्तिके॑  
हन॑ मे पा॒पं य॒न्मया॑ दुष्कृतं कृतम्। मृत्तिके॑ ब्रह्म॑दत्ताऽसि का॒श्यपे॑नाभि॒मन्त्रि॑ता।  
मृत्तिके॑ देहि॑ मे पु॒ष्टिं त्वयि॑ स॒र्वं प्र॑तिष्ठितम् ॥ ८ ॥

मृत्तिके॑ प्रतिष्ठिते स॒र्वं त॒न्मे निर्णु॑द मृत्तिके। तया॑ ह॒तेन॑ पापे॒न ग॒च्छामि॑ प॒रमा॑  
गति॑म्।

## ॥ शत्रुजयमन्त्राः ॥

यत॑ इन्द्र॒ भया॑महे॒ ततो॑ नो॒ अभयं॑ कृधि। मघ॑वन्छु॒ग्धि तव॑ तन्न॒ ऊ॒तये॑ विद्विषो॒  
विमृ॑धो॒ जहि॑। स्व॒स्ति॒दा वि॒शस्पति॑र्वृ॒त्रहा॑ विमृ॑धो॒ व॒शी। वृषेन्द्रः॑ पु॒र ए॒तु नः॑  
स्व॒स्ति॒दा अ॑भयङ्क॒रः। स्व॒स्ति न॒ इन्द्रो॑ वृ॒द्धश्र॑वाः स्व॒स्ति नः॑ पू॒षा वि॒श्ववे॑दाः। स्व॒स्ति  
न॒स्ताक्ष्यो॑ अ॒रि॑ष्टनेमिः स्व॒स्ति नो॒ बृह॑स्पति॑र्दधातु। आपो॑न्तमन्युस्तृ॒पल॑प्रभर्मा  
धुनिः॑ शिमी॑वाञ्छ॒रुमा॑ ऋ॒जी॒षी। सोमो॑ वि॒श्वान्य॑त॒सावना॑नि॒ नार्वा॑गिन्द्र  
प्रति॑माना॑निदेभुः॥९॥

ब्रह्म॑जज्ञानं प्रथ॒मं पु॒रस्ता॑द्वि॒सी॒मतः॑ सु॒रुचो॑ वे॒न आ॑वः। सबु॑ध्रिया॑ उप॒मा  
अ॒स्य वि॒ष्टाः स॒तश्च॑ योनि॒मस॑तश्च॒ विवः॑। स्यो॒ना पृ॑थिवि॒ भवा॑ऽनृ॒क्षरा॑ नि॒वेश॑नी।  
यच्छा॑नः शर्म॑ स॒प्रथाः॑। ग॒न्ध॒द्वा॒रां दु॑राध॒रूपां॑ नित्यपु॑ष्टां करी॒षिणी॑म्। ई॒श्वरी॑  
सर्व॑भूता॒नां तामि॑होप॒ह्वये॑ श्रियम्। श्री॑र्मे भ॒जतु॑। अल॑क्ष्मी॒र्मे न॒श्यतु॑। विष्णु॑मुखा  
वै दे॒वाश्छ॑न्दो॒भिरि॑माँल्लो॒कान॑नप॒जय्य॑म॒भ्यज॑यन्। म॒हा॑ इन्द्रो॒ वज्र॑बाहुः षोड॒शी

शर्म यच्छतु॥१०॥

स्वस्ति नो म॒घवा॑ करोतु ह॒न्तु पा॒प्मानं॑ योऽस्मान् द्वेष्टि॑। सो॒मान्ऽ॒ स्वर॑णं कृणुहि  
ब्र॒ह्मण॑स्पते। क॒क्षीव॑न्तं य औ॒शिज॑म्। शरी॑रं यज्ञशम॒लं कु॒सीदं॑ तस्मि॑न्त्सीदतु  
योऽस्मान् द्वेष्टि॑। च॒रणं प॒वित्रं॑ वि॒ततं॑ पु॒राणं॑ येन॑ पू॒तस्तर॑ति दुष्कृतानि॑। तेन॑  
प॒वित्रेण॑ शु॒द्धेन॑ पू॒ता अति॑ पा॒प्मान॑मरातिं॑ तरेम। स॒जोषा॑ इन्द्र॒ सग॑णो म॒रुद्भिः  
सोमं॑ पिब वृ॒त्रह॑ञ्छूर वि॒द्वान्। ज॒हि शत्रूँ॑ रप॒ मृधो॑ नुद॒स्वाथा॑भयं कृणुहि वि॒श्वतो॑  
नः। सु॒मित्रा॑ न॒ आप॒ ओष॑धयः सन्तु दु॒र्मित्रा॑स्तस्मै॑ भूयासु॒र्योऽस्मान् द्वेष्टि॑ यं चं  
व॒यं द्वि॒ष्मः। आपो॑ हि ष्ठा म॒यो भुव॑स्ता न॒ ऊ॒र्जे द॑धातन॥११॥

म॒हेर॑णाय॒ चक्ष॑से। यो वः शि॒वत॑मो रस॒स्तस्य॑ भाजयते॒ह नः॑। उ॒श॒तीरि॑व  
मा॒तरः॑। तस्मा॒ अरं॑ गमाम वो॒ यस्य॑ क्षयाय॒ जिन्व॑थ। आपो॑ ज॒नय॑था च नः।

॥ अघमर्षणसूक्तम् ॥

हिर॑ण्यशृङ्गं वरु॑णं प्रप॑द्ये ती॒र्थं मे॑ देहि याचि॑तः। य॒न्मया॑ भु॒क्तम॒साधू॑नां पा॒पेभ्य॑श्च

प्रतिग्रहः। यन्मे मनसा वाचा कर्मणा वा दुष्कृतं कृतम्। तन्न इन्द्रो वरुणो बृहस्पतिः  
सविता च पुनन्तु पुनः पुनः। नमोऽग्नयेऽप्सुमते नम इन्द्राय नमो वरुणाय नमो  
वारुण्यै नमोऽद्भ्यः॥१२॥

यदपां क्रूरं यदमेध्यं यदशान्तं तदपंगच्छतात्। अत्याशनादतीपानाद्यच्च उग्रात्  
प्रतिग्रहात्। तन्नो वरुणो राजा पाणिना ह्यवमर्शतु। सोऽहमपापो विरजो निर्मुक्तो  
मुक्तकिल्बिषः। नाकस्य पृष्ठमारुह्य गच्छेद्ब्रह्मसलोकताम्। यश्चाप्सु वरुणः स  
पुनात्वधमर्षणः। इमं मे गङ्गे यमुने सरस्वति शुतुद्रि स्तोमं सचता परुष्ण्या।  
असिक्रिया मरुद्वृधे वितस्तयाऽऽर्जीकीये शृणुह्या सुषोमया। ऋतं च सत्यं  
चाभीद्धात्तपसोऽध्यजायत। ततो रात्रिरजायत ततः समुद्रो अर्णवः॥१३॥

समुद्रादर्णवादधि संवत्सरो अजायत। अहोरात्राणि विदधद्विश्वस्य मिषतो वशी।  
सूर्याचन्द्रमसौ धाता यथापूर्वमकल्पयत्। दिवं च पृथिवीं चान्तरिक्षमथो सुवः।  
यत्पृथिव्या रजः स्वमान्तरिक्षे विरोदसी। इमांस्तदापो वरुणः पुनात्वधमर्षणः।



पुनन्तु वसंवः पुनातु वरुणः पुनात्वधमर्षणः। एष भूतस्य मध्ये भुवनस्य गोप्ता।  
 एष पुण्यकृतां लोकानेष मृत्योर्हिरण्मयम्। द्यावापृथिव्योर्हिरण्मयं सञ्श्रितं सुवः॥१४॥

स नः सुवः सञ्शिशधि। आर्द्रं ज्वलति ज्योतिरहमस्मि। ज्योतिर्ज्वलति  
 ब्रह्माहमस्मि। योऽहमस्मि ब्रह्माहमस्मि। अहमस्मि ब्रह्माहमस्मि। अहमेवाहं मां  
 जुहोमि स्वाहा। अकार्यकार्यवकीर्णी स्तेनो भ्रूणहा गुरुतल्पगः। वरुणोऽपामघ-  
 मर्षणस्तस्मात्पापात् प्रमुच्यते। रजो भूमिस्त्वमां रोदयस्व प्रवदन्ति धीराः।  
 आक्रान्त्समुद्रः प्रथमे विधर्मं जनयन्प्रजा भुवनस्य राजा। वृषा पवित्रे अधि-  
 सानो अव्ये बृहत्सोमो वावृधे सुवान इन्दुः॥१५॥ [१]

## ॥ दुर्गासूक्तम् ॥

जातवेदसे सुनवाम सोममरातीयतो निजहाति वेदः। स नः पर्षदति दुर्गाणि  
 विश्वा नावेव सिन्धुं दुरितात्यग्निः। तामग्निवर्णां तपसा ज्वलन्तीं वैरोचनीं

कर्मफलेषु जुष्टांम्। दुर्गां देवीं शरणमहं प्रपद्ये सुतरसि तरसे नमः। अग्ने  
 त्वं पारया नव्यो अस्मान्धस्वस्तिभिरति दुर्गाणि विश्वा। पूश्च पृथ्वी बहुला न  
 उर्वी भवा तोकाय तनयाय शं योः। विश्वानि नो दुर्गहा जातवेदः सिन्धुं न  
 नावा दुरितातिं पर्षि। अग्ने अत्रिवन्मनसा गृणानोऽस्माकं बोध्यविता तनूनांम्।  
 पृतनाजितं सहमानमग्निमुग्रं हुवेम परमात्सधस्थात्। स नः पर्षदतिं  
 दुर्गाणि विश्वा क्षामद्देवो अति दुरिताऽत्यग्निः। प्रतोषि कमीड्यो अध्वरेषु सनाच्च  
 होता नव्यश्च सत्सि। स्वाश्चाग्ने तनुवं पिप्रयस्वास्मभ्यं च सौभगमायजस्व।  
 गोभिर्जुष्टमयुजो निषिक्तं तवेन्द्र विष्णोरनुसञ्चरेम। नाकस्य पृष्ठमभि संवसानो  
 वैष्णवीं लोक इह मादयन्ताम्॥१६॥ [२]

## ॥ व्याहृतिहोमन्त्राः ॥

भूरन्नमग्नये पृथिव्यै स्वाहा भुवोऽन्नं वायवेऽन्तरिक्षाय स्वाहा सुवरन्नमादित्याय  
 दिवे स्वाहा भूर्भुवः सुवरन्नं चन्द्रमसे दिग्भ्यः स्वाहा नमो देवेभ्यः स्वधा पितृभ्यो

भूर्भुवः सुवरन्नमोम्॥१७॥ \_\_\_\_\_[३]

भूरग्रये पृथिव्यै स्वाहा भुवो वायवेऽन्तरिक्षाय स्वाहा सुवरादित्याय दिवे स्वाहा  
भूर्भुवः सुवश्चन्द्रमसे दिग्भ्यः स्वाहा नमो देवेभ्यः स्वधा पितृभ्यो भूर्भुवः सुवरग्र  
ओम्॥१८॥ \_\_\_\_\_[४]

भूरग्रये च पृथिव्यै च महते च स्वाहा भुवो वायवे चान्तरिक्षाय च महते च  
स्वाहा सुवरादित्याय च दिवे च महते च स्वाहा भूर्भुवः सुवश्चन्द्रमसे च नक्षत्रेभ्यश्च  
दिग्भ्यश्च महते च स्वाहा नमो देवेभ्यः स्वधा पितृभ्यो भूर्भुवः सुवर्महरोम्॥१९॥  
\_\_\_\_\_ [५]

## ॥ ज्ञानप्राप्त्यर्थहोममन्त्राः ॥

पाहि नो अग्र एनसे स्वाहा। पाहि नो विश्ववेदसे स्वाहा। यज्ञं पाहि विभावसो  
स्वाहा। सर्वं पाहि शतक्रतो स्वाहा॥२०॥ \_\_\_\_\_[६]

पाहि नो अग्र एकया। पाह्युत द्वितीयया। पाह्यूर्जं तृतीयया। पाहि गीर्भिश्च  
तसृभिर्वसो स्वाहा॥२१॥ \_\_\_\_\_[७]

## ॥ वेदविस्मरणाय जपमन्त्राः ॥

यश्छन्दसामृषभो विश्वरूपश्छन्दोभ्यश्छन्दां स्याविवेश। सतां शिष्यः  
पुरोवाचोपनिषदिन्द्रो ज्येष्ठ इन्द्रियाय ऋषिभ्यो नमो देवेभ्यः स्वधा पितृभ्यो  
भूर्भुवः सुवश्छन्द ओम्॥२२॥ \_\_\_\_\_[८]

नमो ब्रह्मणे धारणं मे अस्त्वनिराकरणं धारयिता भूयासं कर्णयोः श्रुतं मा  
च्योद्वं ममामुष्य ओम्॥२३॥ \_\_\_\_\_[९]

## ॥ तपः प्रशंसा ॥

ऋतं तपः सत्यं तपः श्रुतं तपः शान्तं तपो दमस्तपः शमस्तपो दानं तपो यज्ञं  
तपो भूर्भुवः सुवर्ब्रह्मैतदुपास्यैतत्तपः॥२४॥ \_\_\_\_\_[१०]

## ॥ विहिताचरणप्रशंसा निषिद्धाचरणनिन्दा च ॥

यथा वृक्षस्य सम्पुष्पितस्य दूराद्गन्धो वात्येवं पुण्यस्य कर्मणो दूराद्गन्धो  
वाति यथाऽसिधारां कर्तेऽवहितामवक्रामे यद्युवे युवे ह वा विह्वयिष्यामि कर्त

पतिष्यामीत्येवमनृतादात्मानं जुगुप्सेत्॥२५॥ \_\_\_\_\_[११]

## ॥ दहरविद्या ॥

अणोरणीयान्महतो महीयानात्मा गुहायां निहितोऽस्य जन्तोः। तमं क्रतुं पश्यति  
वीतशोको धातुः प्रसादान्महिमानमीशम्। सप्त प्राणाः प्रभवन्ति तस्मात्सप्तार्चिषः  
समिधः सप्त जिह्वाः। सप्त इमे लोका येषु चरन्ति प्राणा गुहाशयां निहिताः  
सप्त संस्र। अतः समुद्रा गिरयश्च सर्वेऽस्मात्स्यन्दन्ते सिन्धवः सर्वरूपाः।  
अतश्च विश्वा ओषधयो रसाच्च येनैष भूतस्तिष्ठत्यन्तरात्मा। ब्रह्मा देवानां पदवीः  
कवीनामृषिर्विप्राणां महिषो मृगाणाम्। श्येनो गृध्राणां स्वर्धितिर्वनानां सोमः  
पवित्रमत्येति रेभन्। अजामेकां लोहितशुक्लकृष्णां बर्हीं प्रजां जनयन्तीं  
सरूपाम्। अजो ह्येको जुषमाणोऽनुशेते जहात्येनां भुक्तभोगामजोऽन्यः॥२६॥

हः सः शुचिषद्वसुरन्तरिक्षसद्धोता वेदिषदतिथिर्दुरोणसत्। नृषद्वरसदृतसद्योमसद  
गोजा ऋतजा अद्रिजा ऋतं बृहत्। घृतं मिमिक्षिरे घृतमस्य योनिर्घृते श्रितो

घृतमुवस्य धाम। अनुष्वधमावह मादयस्व स्वाहाकृतं वृषभ वक्षि हव्यम्।  
समुद्रादूर्मिर्मधुमा९ उदारदुपा९ शुना सममृतत्वमानद्। घृतस्य नाम गुह्यं यदस्ति  
जिह्वा देवानाममृतस्य नाभिः। वयं नाम प्रब्रवामा घृतेनास्मिन् यज्ञे धारयामा  
नमोभिः। उप ब्रह्मा शृणवच्छस्यमानं चतुः शृङ्गोऽवमीद्वोर एतत्। चत्वारि शृङ्गा  
त्रयो अस्य पादा द्वे शीर्षे सप्त हस्तासो अस्य। त्रिधा बद्धो वृषभो रौरवीति  
महो देवो मर्त्या९ आविवेश॥२७॥

त्रिधा हितं पणिभिर्गुह्यमानं गवि देवासो घृतमन्वविन्दन्। इन्द्र एक९ सूर्य  
एकं जजान वेनादेक९ स्वधया निष्टतक्षुः। यो देवानां प्रथमं पुरस्ताद्विश्वाधियो  
रुद्रो महर्षिः। हिरण्यगर्भं पश्यत् जायमान९ स नो देवः शुभया स्मृत्या  
संयुनक्तु। यस्मात्परं नापरमस्ति किञ्चिद्यस्मान्नाणीयो न ज्यायोऽस्ति कश्चित्।  
वृक्ष इव स्तब्धो दिवि तिष्ठत्येकस्तेनेदं पूर्णं पुरुषेण सर्वम्। न कर्मणा न प्रजया  
धनेन त्यागेनैके अमृतत्वमानशुः। परेण नाकं निहितं गुहायां विभ्राजते यद्यतयो

वि॒शन्ति॑ । वे॒दान्त॑वि॒ज्ञान॑सुनि॒श्चिता॑र्थाः स॒न्त्या॑सयो॒गाद्य॑तयः शु॒द्ध॒सत्त्वाः॑ । ते ब्र॒ह्मलो॒के  
तु परा॑न्त॒काले॑ परा॑मृता॒त्परि॑मुच्यन्ति॒ सर्वे॑ । द॒हं वि॒पापं॑ प॒रमे॑श्मभूतं॒ यत्पु॑ण्डरी॒कं  
पु॒रम॑ध्यस॒ऽस्थम् । त॒त्रापि॑ द॒हं गु॒गनं॑ वि॒शोक॑स्तस्मिन् यद॒न्तस्तदु॑पा॒सित॑व्यम् ।  
यो वेदा॑दौ स्वरः प्रो॒क्तो वे॒दान्ते॑ च प्र॒तिष्ठि॑तः । तस्य॑ प्र॒कृति॑लीनस्य॒ यः परः॑ स  
म॒हेश्वरः॑ ॥ २८ ॥

[१२]

## ॥ नारायणसूक्तम् ॥

स॒हस्र॑शी॒र्षं दे॒वं वि॒श्वाक्षं॑ वि॒श्वश॑म्भुवम् । वि॒श्वं ना॒राय॑णं दे॒वम॑क्षरं॒ पर॑मं प॒दम् ।  
वि॒श्वतः॑ पर॑मान्नित्यं वि॒श्वं ना॒राय॑णं ह॑रिम् । वि॒श्वमे॒वेदं॑ पु॒रुष॑स्तद्वि॒श्वमु॑पजीवति ।  
पतिं॑ वि॒श्वस्या॒ऽऽत्मे॑श्वरं॒ शाश्व॑तं॒ शिव॑मच्युतम् । ना॒राय॑णं म॒हाज्ञे॑यं वि॒श्वात्मा॑नं  
प॒राय॑णम् । ना॒राय॑णप॒रो ज्यो॑ति॒रात्मा॑ ना॒राय॑णः प॒रः । ना॒राय॑ण प॒रं ब्र॒ह्म तत्त्वं॑  
ना॒राय॑णः प॒रः । ना॒राय॑णप॒रो ध्या॑ता॒ ध्या॑नं ना॒राय॑णः प॒रः । यच्च॑ कि॒ञ्चिज्जग॑त्सर्वं  
दृ॒श्यते॑ श्रूय॒तेऽपि॑ वा ॥ अ॒न्तर्ब॑हिश्च॒ तत्सर्वं॑ व्या॒प्य ना॒राय॑णः स्थि॑तः ॥ २९ ॥

अनन्तमव्ययं कविः समुद्रेऽन्तं विश्वशम्भुवम्। पद्मकोश प्रतीकाशः हृदयं  
चाप्यधोमुखम्। अधो निष्ठ्या वितस्त्यान्ते नाभ्यामुपरि तिष्ठति। ज्वालमालाकुलं  
भाती विश्वस्याऽऽयतनं महत्। सन्ततः शिलाभिस्तुलम्बत्याकोशसन्निभम्।  
तस्यान्ते सुषिरः सूक्ष्मं तस्मिन्सर्वं प्रतिष्ठितम्। तस्य मध्ये महान-  
ग्निर्विश्वार्चिर्विश्वतोमुखः। सोऽग्रभुग्विभजन्तिष्ठन्नाहारमजरः कविः। तिर्यगूर्ध्वमधः  
शायी रश्मयस्तस्य सन्तता। सन्तापयति स्वं देहमापादतलमस्तकः। तस्य मध्ये  
वह्निशिखा अणीयोर्ध्वा व्यवस्थितः। नीलतोयदमध्यस्थाद्विद्युल्लेखेव भास्वरा।  
नीवारशूकवत्तन्वी पीता भास्वत्यणूपमा। तस्याः शिखाया मध्ये परमात्मा  
व्यवस्थितः। स ब्रह्म स शिवः स हरिः सेन्द्रः सोऽक्षरः परमः स्वराट्॥३०॥

नारायणः स्थितो व्यवस्थितश्चत्वारि च॥

[१३]

## ॥ आदित्यमण्डले परब्रह्मोपासनम् ॥

आदित्यो वा एष एतन्मण्डलं तपति तत्र ता ऋचस्तदृचा मण्डलः स ऋचां  
लोकोऽथ य एष एतस्मिन्मण्डलेऽर्चिर्दीप्यते तानि सामानि स साम्नां मण्डलः स



सा॒म्नां लो॒कोऽथ॒ य ए॒ष ए॒तस्मिन्म॒ण्डले॒ऽर्चिषि॒ पुरु॑ष॒स्तानि॒ यजू॑षि॒ स यजु॑षा  
मण्डल॒ः स यजु॑षां लो॒कः सैषा॑ त्र॒य्येव॑ वि॒द्या त॑पति॒ य ए॒षोऽन्तरा॑दित्ये हि॒र॒ण्यः  
पुरु॑षः॥ ३१॥ \_\_\_\_\_[१४]

## ॥ आदित्यपुरुषस्य सर्वात्मकत्वप्रदर्शनम् ॥

आ॒दि॒त्यो वै तेज॒ ओजो॒ बलं॒ यश॑श्चक्षुः श्रोत्र॑मा॒त्मा मनो॑ म॒न्युर्मनु॑र्मृत्युः स॒त्यो  
मि॒त्रो वा॒युरा॑का॒शः प्रा॒णो लो॑क॒पालः कः किं कं तथ्स॒त्यमन्न॑म॒मृतो॑ जी॒वो वि॒श्वः  
क॒तमः स्व॑य॒म्भु ब्र॒ह्मैत॑दमृत ए॒ष पुरु॑ष ए॒ष भू॒ताना॑मधि॒पति॑र्ब्रह्म॒णः सायु॑ज्य॒ः  
सलो॑कता॒माप्नो॑त्येतासा॒मेव दे॒वता॑ना॒ः सायु॑ज्य॒ः सा॒र्ष्टिता॑ः स॒मानलो॑कता॒माप्नो॑ति  
य ए॒वं वेदे॑त्युप॒निषत्॥ ३२॥ \_\_\_\_\_[१५]

## ॥ शिवोपासनमन्त्राः ॥

निध॑नपतये नमः। निध॑नपतान्तिकाय॒ नमः। ऊ॒र्ध्वाय॒ नमः। ऊ॒र्ध्वलि॑ङ्गाय॒  
नमः। हि॒र॒ण्याय॒ नमः। हि॒र॒ण्यलि॑ङ्गाय॒ नमः। सुव॑र्णाय॒ नमः। सुव॑र्णलि॒ङ्गाय॒ नमः।  
दि॒व्याय॒ नमः। दि॒व्यलि॑ङ्गाय॒ नमः। भ॒वाय॒ नमः। भ॒वलि॑ङ्गाय॒ नमः। श॒र्वाय॒ नमः।

शर्वलिङ्गाय नमः। शिवाय नमः। शिवलिङ्गाय नमः। ज्वलाय नमः। ज्वललिङ्गाय नमः। आत्माय नमः। आत्मलिङ्गाय नमः। परमाय नमः। परमलिङ्गाय नमः। एतत्सोमस्य सूर्यस्य सर्वलिङ्गं स्थापयति पाणिमन्त्रं पवित्रम्॥३३॥ —[१६]

### ॥ पश्चिमवक्त्र-प्रतिपादक-मन्त्रः ॥

सद्योजातं प्रपद्यामि सद्योजाताय वै नमो नमः। भवे भवे नाति भवे भवस्व माम्। भवोद्भवाय नमः॥३४॥ —[१७]

### ॥ उत्तरवक्त्र-प्रतिपादक-मन्त्रः ॥

वामदेवाय नमो ज्येष्ठाय नमः श्रेष्ठाय नमो रुद्राय नमः कालाय नमः कलविकरणाय नमो बलविकरणाय नमो बलाय नमो बलप्रमथनाय नमः सर्वभूतदमनाय नमो मनोन्मनाय नमः॥३५॥ —[१८]

### ॥ दक्षिणवक्त्र-प्रतिपादक-मन्त्रः ॥

अघोरैभ्योऽथ घोरैभ्यो घोरघोरंतरेभ्यः। सर्वैभ्यः सर्वशर्वैभ्यो नमस्ते अस्तु

रुद्ररूपेभ्यः॥३६॥ \_\_\_\_\_[१९]

### ॥ प्राग्वक्त्र-प्रतिपादक-मन्त्रः ॥

तत्पुरुषाय विद्महे महादेवाय धीमहि। तन्नो रुद्रः प्रचोदयात्॥३७॥ —[२०]

### ॥ ऊर्ध्ववक्त्र-प्रतिपादक-मन्त्रः ॥

ईशानः सर्वविद्यानामीश्वरः सर्वभूतानां ब्रह्माधिपतिर्ब्रह्मणोऽधिपतिर्ब्रह्मा शिवो मे अस्तु सदाशिवोम्॥३८॥ \_\_\_\_\_[२१]

### ॥ नमस्कारमन्त्राः ॥

नमो हिरण्यबाहवे हिरण्यवर्णाय हिरण्यरूपाय हिरण्यपतयेऽम्बिकापतय उमापतये पशुपतये नमो नमः॥३९॥ \_\_\_\_\_[२२]

ऋतं सत्यं परं ब्रह्म पुरुषं कृष्णपिङ्गलम्। ऊर्ध्वरेतं विरूपाक्षं विश्वरूपाय वै नमो नमः॥४०॥ \_\_\_\_\_[२३]

सर्वो वै रुद्रस्तस्मै रुद्राय नमो अस्तु। पुरुषो वै रुद्रः सन्महो नमो नमः।

विश्वं भूतं भुवनं चित्रं बहुधा जातं जायमानं च यत्। सर्वो ह्येष रुद्रस्तस्मै रुद्राय  
नमो अस्तु॥४१॥ \_\_\_\_\_[२४]

कद्रुद्राय प्रचेतसे मीढुष्टमाय तव्यसे। वो चेम् शन्तमं हृदे। सर्वो ह्येष  
रुद्रस्तस्मै रुद्राय नमो अस्तु॥४२॥ \_\_\_\_\_[२५]

॥ अग्निहोत्रहवण्याः उपयुक्तस्य वृक्षविशेषस्याभिधानम् ॥

यस्य वैकङ्कत्यग्निहोत्रहवणी भवति प्रत्येवास्याहुतयस्तिष्ठन्त्यथो प्रतिष्ठित्यै॥४३॥  
\_\_\_\_\_ [२६]

कृणुष्व पाज् इति पञ्च॥४४॥ \_\_\_\_\_[२७]

॥ भूदेवताकमन्त्रः ॥

अदितिर्देवा गन्धर्वा मनुष्याः पितरोऽसुरास्तेषां सर्वभूतानां माता मेदिनीं  
महता मही सावित्री गायत्री जगत्युर्वी पृथ्वी बहुला विश्वा भूता कतमा का या  
सा सत्येत्यमृतेति वसिष्ठः॥४५॥ \_\_\_\_\_[२८]

## ॥ सर्वदेवता आपः ॥

आपो वा इदं सर्वं विश्वा भूतान्यापः प्राणा वा आपः पशव्  
 आपोऽन्नमापोऽमृतमापः सम्राडापो विराडापः स्वराडापश्छन्दाऽस्यापो  
 ज्योतीऽप्यापो यजूऽप्यापः सत्यमापः सर्वा देवता आपो भूर्भुवः सुवराप  
 ओम्॥४६॥

[२९]

## ॥ सन्ध्यावन्दनमन्त्राः ॥

आपः पुनन्तु पृथिवीं पृथिवी पूता पुनातु माम्। पुनन्तु ब्रह्मणस्पतिर्ब्रह्मपूता  
 पुनातु माम्। यदुच्छिष्टमभोज्यं यद्वा दुश्चरितं मम। सर्वं पुनन्तु मामापोऽसृतां च  
 प्रतिग्रहं स्वाहा॥४७॥

[३०]

अग्निश्च मा मन्युश्च मन्युपतयश्च मन्युकृतेभ्यः। पापेभ्यो रक्षन्ताम्।  
 यदह्ना पापमकारिषम्। मनसा वाचा हस्ताभ्याम्। पद्भ्यामुदरेण शिश्जा।  
 अहस्तदवलुम्पतु। यत्किं च दुरितं मयि। इदमहं माममृतयोनौ। सत्ये ज्योतिषि

जुहोमि स्वाहा॥४८॥ \_\_\_\_\_[३१]

सूर्यश्च मा मन्युश्च मन्युपतयश्च मन्युकृतेभ्यः। पापेभ्यो रक्षन्ताम्।  
यद्रात्रिया पापमकारिषम्। मनसा वाचा हस्ताभ्याम्। पद्भ्यामुदरेण शिश्वा।  
रात्रिस्तदवलुम्पतु। यत्किं च दुरितं मयि। इदमहं माममृतयोनौ। सूर्ये ज्योतिषि  
जुहोमि स्वाहा॥४९॥ \_\_\_\_\_[३२]

### ॥ प्रणवस्य ऋष्यादिविवरणम् ॥

ओमित्येकाक्षरं ब्रह्म। अग्निर्देवता ब्रह्म इत्यार्षम्। गायत्रं छन्दं परमात्मं  
सरूपम्। सायुज्यं विनियोगम्॥५०॥ \_\_\_\_\_[३३]

### ॥ गायत्र्यावाहनमन्त्राः ॥

आयातु वरदा देवी अक्षरं ब्रह्मसम्मितम्। गायत्रीं छन्दसां मातेदं ब्रह्म  
जुषस्व मे। यदहं त्कुरुते पापं तदहं त्प्रतिमुच्यते। यद्रात्रिया त्कुरुते पापं  
तद्रात्रिया त्प्रतिमुच्यते। सर्वं वर्णं महादेवि सन्ध्याविद्ये स्रस्वति॥५१॥ —[३४]

ओजोऽसि सहोऽसि बलमसि भ्राजोऽसि देवानां धाम नामासि विश्वमसि  
 विश्वायुः सर्वमसि सर्वायुरभिभूरो गायत्रीमावाहयामि सावित्रीमावाहयामि  
 सरस्वतीमावाहयामि छन्दऋषीणावाहयामि श्रियमावाहयामि गायत्रिया  
 गायत्रीच्छन्दो विश्वामित्र ऋषिः सविता देवताऽग्निर्मुखं ब्रह्मा शिरो विष्णुर्हृदयं  
 रुद्रः शिखा पृथिवी योनिः प्राणापानव्यानोदानसमाना सप्राणा श्वेतवर्णा  
 साङ्ख्यायनसगोत्रा गायत्री चतुर्विंशत्यक्षरा त्रिपदा षट्शुक्तिः पञ्चशीर्षोपनयने  
 विनियोग् ओं भूः। ओं भुवः। ओं सुवः। ओं महः। ओं जनः। ओं तपः। ओं  
 सत्यम्। ओं तथ्सवितुर्वरेण्यं भर्गो देवस्य धीमहि धियो यो नः प्रचोदयात्।  
 ओमापो ज्योतीरसोऽमृतं ब्रह्म भूर्भुवः सुवरोम्॥५२॥ —————[३५]

## ॥ गायत्री उपस्थानमन्त्राः ॥

उत्तमे शिखरे जाते भूम्यां पर्वतमूर्धनि। ब्राह्मणेभ्योऽभ्यनुज्ञाता गच्छ देवि  
 यथासुखम्। स्तुतो मया वरदा वेदमाता प्रचोदयन्ती पवने द्विजाता। आयुः  
 पृथिव्यां द्रविणं ब्रह्मवर्चसं मह्यं दत्वा प्रजातुं ब्रह्मलोकम्॥५३॥ —————[३६]

## ॥ आदित्यदेवतामन्त्रः ॥

घृणिः सूर्य आदित्यो न प्रभा वात्यक्षरम्। मधु क्षरन्ति तद्रसम्। सत्यं वै तद्रसमापो ज्योतीरसोऽमृतं ब्रह्म भूर्भुवः सुवरोम्॥५४॥ \_\_\_\_\_[३७]

## ॥ त्रिसुपर्णमन्त्राः ॥

ब्रह्ममेतु माम्। मधुमेतु माम्। ब्रह्ममेव मधुमेतु माम्। यास्ते सोम प्रजावत्सोभि सो अहम्। दुःस्वप्रहन्दुरुष्पह। यास्ते सोम प्राणाऽस्तां जुहोमि। त्रिसुपर्णमयाचितं ब्राह्मणाय दद्यात्। ब्रह्महत्यां वा एते घ्नन्ति। ये ब्राह्मणास्त्रिसुपर्णं पठन्ति। ते सोमं प्राप्नुवन्ति। आसहस्रात्पङ्क्तिं पुनन्ति। ओम्॥५५॥ \_\_\_\_\_[३८]

ब्रह्म मेधया। मधु मेधया। ब्रह्ममेव मधु मेधया। अद्या नो देव सवितः प्रजावत्सावीः सौभगम्। परा दुःष्वप्रियं सुवा विश्वानि देव सवितर्दुरितानि परा सुवा यद्भद्रं तन्म् आ सुवा मधु वाता ऋतायते मधु क्षरन्ति सिन्धवः। मार्चीर्नः सन्त्वोषधीः। मधु नक्तमुतोषसि मधुमत्पार्थिवं रजः। मधु द्यौरस्तु नः



पिता। मधुमान्नो वनस्पतिर्मधुमा९ अस्तु सूर्यः। माध्वीर्गावो भवन्तु नः। य इमं  
त्रिसुपर्णमयाचितं ब्राह्मणाय दद्यात्। भ्रूणहत्यां वा एते घ्नन्ति। ये ब्राह्मणास्त्रिसुपर्णं  
पठन्ति। ते सोमं प्राप्नुवन्ति। आसहस्रात्पङ्क्तिं पुनन्ति। ओम्॥५६॥ —[३९]

ब्रह्म मेधवा॥ मधु मेधवा॥ ब्रह्ममेव मधु मेधवा॥ ब्रह्मा देवानां पदवीः  
कवीनामृषिर्विप्राणां महिषो मृगाणाम्। श्येनो गृध्राणां९ स्वधितिर्वनानां९ सोमः  
पवित्रमत्येति रेभन्। ह९सः शुचिषद्वसुरन्तरिक्षसद्धोता वेदिषदतिथिर्दुरोणसत्।  
नृषद्वरसदृतसद्व्योमसदब्जा गोजा ऋतजा अद्रिजा ऋतं बृहत्। ऋचे त्वा रुचे  
त्वा समिध्रवन्ति सरितो न धेनाः। अन्तरहृदा मनसा पूयमानाः। घृतस्य धारा  
अभिचाकशीमि। हिरण्ययो वेतसो मध्यं आसाम्। तस्मिन्सुपर्णो मधुकृत्कुलायी  
भजन्नास्ते मधुदेवताभ्यः। तस्यासते हरयः सप्ततीरे स्वधां दुहाना अमृतस्य  
धाराम्। य इदं त्रिसुपर्णमयाचितं ब्राह्मणाय दद्यात्। वीरहत्यां वा एते घ्नन्ति।  
ये ब्राह्मणास्त्रिसुपर्णं पठन्ति। ते सोमं प्राप्नुवन्ति। आसहस्रात्पङ्क्तिं पुनन्ति।  
ओम्॥५७॥ —[४०]

## ॥ मेधासूक्तम् ॥

मे॒धा दे॒वी जु॒षमा॑णा न॒ आगा॑द्वि॒श्वार्ची॑ भ॒द्रा सु॑मन॒स्यमा॑ना। त्वया॒ जुष्टा॑  
जु॒षमा॑णा दुरु॒क्ता॑न्बृ॒हद्व॑देम वि॒दथे॑ सु॒वीराः॑॥ त्वया॒ जुष्टं॑ ऋषि॒र्भव॑ति दे॒वि त्वया॒  
ब्रह्मा॑ऽऽग॒तश्री॑रु॒त त्वया॑। त्वया॒ जुष्टं॑श्चि॒त्रं वि॑न्दते वसु॒ सा नो॑ जुषस्व॒ द्रवि॑णो न  
मेधे॥५८॥ \_\_\_\_\_[४१]

मे॒धां म॒ इन्द्रो॑ ददातु मे॒धां दे॒वी सर॑स्वती। मे॒धां मे॑ अ॒श्विना॑वु॒भावाध॑त्तां  
पुष्क॑रस्रजा। अ॒प्सरा॑सु च॒ या मे॒धा ग॑न्ध॒र्वेषु॑ च॒ यन्मनः॑। दै॒वी मे॒धा सर॑स्वती  
सा मां॑ मे॒धा सुर॑भिर्जुषता॒ऽऽ स्वाहा॑॥५९॥ \_\_\_\_\_[४२]

आ मां॑ मे॒धा सुर॑भिर्वि॒श्वरू॑पा॒ हिर॑ण्यवर्णा॒ जग॑ती जग॒म्या। ऊ॒र्जस्व॑ती॒ पय॑सा॒  
पिन्व॑माना॒ सा मां॑ मे॒धा सु॑प्रती॒का जु॑षन्ताम्॥६०॥ \_\_\_\_\_[४३]

मयि॑ मे॒धां मयि॑ प्र॒जां मय्य॑ग्निस्तेजो॑ दधातु॒ मयि॑ मे॒धां मयि॑ प्र॒जां मयीन्द्र॑  
इन्द्रि॒यं द॑धातु॒ मयि॑ मे॒धां मयि॑ प्र॒जां मयि॑ सूर्यो॒ भ्राजो॑ दधातु॥६१॥ —[४४]

## ॥ मृत्युनिवारणमन्त्राः ॥

अपै॑तु म॒ृत्यु॒रमृ॑तं न॒ आग॑न्वैवस्व॒तो नो॒ अभ॑यं कृ॒णोतु॑ । प॒र्णं वन॑स्पतै॑रिवा॒भि॒नः  
शी॒यता॑ र॒यिः स च॑ ता॒न्नः शची॑पतिः॥६२॥ \_\_\_\_\_ [४५]

परं॑ म॒ृत्यो॒ अनु॑ परै॑हि प॒न्थां यस्ते॒ स्व इत॑रो दे॒व्याना॑त् । चक्षु॑ष्मते शृ॒ण्वते॑ ते  
ब्रवी॑मि मा नः॑ प्र॒जा री॑रिषो॒ मोत॑ वी॒रान्॥६३॥ \_\_\_\_\_ [४६]

वातं॑ प्रा॒णं मन॑साऽन्वा र॑भामहे प्र॒जाप॑तिं यो भुव॑नस्य गो॒पाः । स नो॑  
मृ॒त्योस्त्राय॑तां पा॒त्व ह॑सो ज्यो॒ग्जी॒वा ज॒राम॑शीमहि॥६४॥ \_\_\_\_\_ [४७]

अ॒मुत्र॑ भूया॒दध॑ यद्य॒मस्य॑ बृह॑स्पते अ॒भि॒श॑स्तेरमु॒ञ्चः । प्रत्यौ॑हताम॒श्विना॑  
मृ॒त्युम॑स्माद्दे॒वाना॑मग्ने भि॒षजा॒ शची॑भिः॥६५॥ \_\_\_\_\_ [४८]

हरि॑ र॒ हर॑न्तमनु॒यन्ति॑ दे॒वा वि॒श्वस्ये॑शानं वृष॒भं म॑ती॒नाम् । ब्रह्म॑  
सरू॑पमनु॒मे॒दमा॑गा॒दय॑नं मा वि॒व॒धीर्वि॒क्रम॑स्व॥६६॥ \_\_\_\_\_ [४९]

शल॑कैर॒ग्निमि॑न्धा॒न उ॒भौ लो॒कौ स॑नेम॒हम् । उ॒भयो॑र्लो॒कयो॑र्ऋ॒ध्वाऽति॑ मृ॒त्युं

तराम्यहम्॥६७॥ \_\_\_\_\_[५०]

मा छिदो मृत्यो मा वधीर्मा मे बलं विवृहो मा प्रमोषीः। प्रजां मा मे रीरिष  
आयुरुग्र नृचक्षंसं त्वा हविषा विधेम॥६८॥ \_\_\_\_\_[५१]

मा नो महान्तमुत मा नो अर्भकं मा न उक्षन्तमुत मा न उक्षितम्। मा  
नोऽवधीः पितरं मोत मातरं प्रिया मा नस्तनुवो रुद्र रीरिषः॥६९॥ \_\_\_\_\_[५२]

मा नस्तोके तनये मा न आयुषि मा नो गोषु मा नो अश्वेषु रीरिषः। वीरान्मा  
नो रुद्र भामितोऽवधीर्हविष्मन्तो नमसा विधेम ते॥७०॥ \_\_\_\_\_[५३]

### ॥ प्रजापतिप्रार्थनामन्त्रः ॥

प्रजापते न त्वदेतान्यन्यो विश्वां जातानि परिता बभूव। यत्कांमास्ते जुहुमस्तन्नो  
अस्तु वयं स्याम पतयो रयीणाम्॥७१॥ \_\_\_\_\_[५४]

### ॥ इन्द्रप्रार्थनामन्त्रः ॥

स्वस्तिदा विशस्पतिर्वृत्रहा विमृधो वशी। वृषेन्द्रः पुर एतु नः स्वस्तिदा

अभयङ्कुरः॥ ७२॥ \_\_\_\_\_[५५]

## ॥ मृत्युञ्जयमन्त्राः ॥

त्र्यम्बकं यजामहे सुगन्धिं पुष्टिवर्धनम्। उर्वारुकमिव बन्धनान्मृत्योर्मुक्षीय  
माऽमृतात्॥ ७३॥ \_\_\_\_\_[५६]

ये ते सहस्रमयुतं पाशा मृत्यो मर्त्याय हन्तवे। तान् यज्ञस्य मायया सर्वानव  
यजामहे॥ ७४॥ \_\_\_\_\_[५७]

मृत्यवे स्वाहा मृत्यवे स्वाहा॥ ७५॥ \_\_\_\_\_[५८]

## ॥ पापनिवारक-मन्त्राः ॥

देवकृतस्यैनसोऽव्यजनमसि स्वाहा। मनुष्यकृतस्यैनसोऽव्यजनमसि  
स्वाहा। पितृकृतस्यैनसोऽव्यजनमसि स्वाहा। आत्मकृतस्यैनसोऽव्यजनमसि  
स्वाहा। अन्यकृतस्यैनसोऽव्यजनमसि स्वाहा। अस्मत्कृतस्यैनसोऽव्यजनमसि  
स्वाहा। यद्विवा च नक्तं चैनश्चकृम तस्याव्यजनमसि स्वाहा। यथ्स्वपन्तश्च

जाग्रत्तुश्चैनंश्चकृम तस्यावयजनमसि स्वाहा॥ यत्सुषुप्तंश्च जाग्रत्तुश्चैनंश्चकृम  
तस्यावयजनमसि स्वाहा॥ यद्विद्वाँसुश्चाविद्वाँसुश्चैनंश्चकृम तस्यावयजनमसि  
स्वाहा॥ एनस एनसोऽवयजनमसि स्वाहा॥ ७६॥ \_\_\_\_\_ [५९]

### ॥ वसुप्रार्थनामन्त्रः ॥

यद्वो देवाश्चकृम जिह्वायां गुरुमनसो वा प्रयुती देव हेडनम्। अरावा यो नो  
अभि दुच्छुनायते तस्मिन्तदेनो वसवो निधेतन स्वाहा॥ ७७॥ \_\_\_\_\_ [६०]

### ॥ कामोऽकार्षीत्-मन्युरकार्षीत् मन्त्रः ॥

कामोऽकार्षीन्नमो नमः। कामोऽकार्षीत्कामः करोति नाहं करोमि कामः कर्ता  
नाहं कर्ता कामः कारयिता नाहं कारयिता एष ते काम कामाय स्वाहा॥ ७८॥  
\_\_\_\_\_ [६१]

मन्युरकार्षीन्नमो नमः। मन्युरकार्षीन्मन्युः करोति नाहं करोमि मन्युः कर्ता  
नाहं कर्ता मन्युः कारयिता नाहं कारयिता एष ते मन्यो मन्यवे स्वाहा॥ ७९॥  
\_\_\_\_\_ [६२]

## ॥ विराजहोममन्त्राः ॥

तिलाञ्जुहोमि सरसा२ सपिष्टान् गन्धार मम चित्ते रमन्तु स्वाहा। गावो हिरण्यं धनमन्नपान२ सर्वेषां३ श्रियै स्वाहा। श्रियं च लक्ष्मीं च पुष्टिं च कीर्तिं चानृण्यताम्। ब्रह्मण्यं बहुपुत्रताम्। श्रद्धामेधे प्रजाः सन्ददातु स्वाहा॥८०॥ —————[६३]

तिलाः कृष्णास्तिलाः श्वेतास्तिलाः सौम्या वंशानुगाः। तिलाः पुनन्तु मे पापं यत्किञ्चिद्दुरितं मयि स्वाहा। चोरस्यान्नं नवश्राद्धं ब्रह्महा गुरुतल्पगः। गोस्तेय२ सुरापानं भ्रूणहत्या तिला शान्ति२ शमयन्तु स्वाहा। श्रीश्च लक्ष्मीश्च पुष्टीश्च कीर्तिं चानृण्यताम्। ब्रह्मण्यं बहुपुत्रताम्। श्रद्धामेधे प्रजा तु जातवेदः सन्ददातु स्वाहा॥८१॥ —————[६४]

प्राणापानव्यानोदानसमाना मे शुद्ध्यन्तां ज्योतिरहं विरजां विपाप्मा भूयासुः३ स्वाहा॥ वाङ्मनश्चक्षुःश्रोत्रजिह्वाघ्राणरेतोबुद्ध्याकूतिःसङ्कल्पा मे शुद्ध्यन्तां ज्योतिरहं विरजां विपाप्मा भूयासुः३ स्वाहा॥ त्वक्कर्ममा२सरुधिरमेदोमज्जास्नायवो-  
ऽस्थीनि मे शुद्ध्यन्तां ज्योतिरहं विरजां विपाप्मा भूयासुः३ स्वाहा॥

शिरःपाणिपादपार्श्वपृष्ठोरूदरजङ्घशिश्नोपस्थपायवो मे शुद्ध्यन्तां ज्योतिरहं  
 विरजां विपाप्मा भूयासुः स्वाहा॥ उत्तिष्ठ पुरुष हरित पिङ्गल लोहिताक्षि देहि  
 देहि ददापयिता मे शुद्ध्यन्तां ज्योतिरहं विरजां विपाप्मा भूयासुः स्वाहा॥८२॥

[६५]

पृथिव्यापस्तेजोवायुराकाशा मे शुद्ध्यन्तां ज्योतिरहं विरजां विपाप्मा भूयासुः  
 स्वाहा॥ शब्दस्पर्शरूपरसगन्धा मे शुद्ध्यन्तां ज्योतिरहं विरजां विपाप्मा भूयासुः  
 स्वाहा॥ मनोवाक्कायकर्माणि मे शुद्ध्यन्तां ज्योतिरहं विरजां विपाप्मा भूयासुः  
 स्वाहा॥ अव्यक्तभावैरहङ्कारैर्ज्योतिरहं विरजां विपाप्मा भूयासुः स्वाहा॥ आत्मा  
 मे शुद्ध्यन्तां ज्योतिरहं विरजां विपाप्मा भूयासुः स्वाहा॥ अन्तरात्मा मे  
 शुद्ध्यन्तां ज्योतिरहं विरजां विपाप्मा भूयासुः स्वाहा॥ परमात्मा मे शुद्ध्यन्तां  
 ज्योतिरहं विरजां विपाप्मा भूयासुः स्वाहा॥ क्षुधे स्वाहा॥ क्षुत्पिपासाय स्वाहा॥  
 विविट्यै स्वाहा॥ ऋग्विधानाय स्वाहा॥ कृषौत्काय स्वाहा॥ क्षुत्पिपासामलं  
 ज्येष्ठामलक्ष्मीर्नाशयाम्यहम्। अभूतिमसंमृद्धिं च सर्वान्निर्णुद मे पाप्मानं स्वाहा॥



अन्नमय-प्राणमय-मनोमय-विज्ञानमय-मानन्दमय-मात्मा मे शुद्ध्यन्तां ज्योतिरहं  
विरजा विपाप्मा भूयासुः स्वाहा॥८३॥ \_\_\_\_\_[६६]

## ॥ वैश्वदेवमन्त्राः ॥

अ॒ग्नये॒ स्वाहा॑ । वि॒श्वेभ्यो॑ दे॒वेभ्यः॑ स्वाहा॑ । ध्रु॒वाय॑ भू॒माय॑ स्वाहा॑ । ध्रु॒वक्षि॑तये॒  
स्वाहा॑ । अ॒च्युत॑क्षि॒तये॒ स्वाहा॑ । अ॒ग्नये॑ स्वि॒ष्टकृ॑ते स्वाहा॑ ॥ ध॒र्माय॑ स्वाहा॑ । अध॑र्माय॒  
स्वाहा॑ । अ॒द्भ्यः स्वाहा॑ । ओ॒षधि॑व॒नस्प॑तिभ्यः स्वाहा॑ ॥८४॥

र॒क्षोदे॒वज॑नेभ्यः स्वाहा॑ । गृ॒ह्याभ्यः॑ स्वाहा॑ । अ॒वसाने॑भ्यः स्वाहा॑ । अ॒वसान॑पतिभ्यः  
स्वाहा॑ । स॒र्वभू॑तेभ्यः स्वाहा॑ । का॒र्माय॑ स्वाहा॑ । अ॒न्तरि॑क्षाय॒ स्वाहा॑ । यदे॒जति॑ जग॑ति  
यच्च॑ चेष्ट॑ति॒ नाम्नो॑ भा॒गोऽयं॑ नाम्ने स्वाहा॑ । पृ॒थिव्यै॑ स्वाहा॑ । अ॒न्तरि॑क्षाय॒ स्वाहा॑ ॥८५॥

दि॒वे स्वाहा॑ । सूर्या॑य॒ स्वाहा॑ । च॒न्द्रम॑से स्वाहा॑ । नक्ष॑त्रेभ्यः स्वाहा॑ । इन्द्रा॑य॒  
स्वाहा॑ । बृ॒हस्प॑तये॒ स्वाहा॑ । प्र॒जाप॑तये॒ स्वाहा॑ । ब्रह्म॑णे स्वाहा॑ । स्व॒धा पि॑तृभ्यः  
स्वाहा॑ । नमो॑ रु॒द्राय॑ पशु॑पतये॒ स्वाहा॑ ॥८६॥

देवेभ्यः स्वाहा॥ पितृभ्यः स्वधाऽस्तु। भूतेभ्यो नमः। मनुष्येभ्यो हन्ता॥ प्रजापतये  
स्वाहा॥ परमेष्ठिने स्वाहा॥ यथा कूपः शतधारः सहस्रधारो अक्षितः। एवा मे  
अस्तु धान्यं सहस्रधारमक्षितम्। धनधान्ये स्वाहा॥ ये भूताः प्रचरन्ति दिवानक्तं  
बलिमिच्छन्तो वितुदस्य प्रेष्याः। तेभ्यो बलिं पुष्टिकामो हरामि मयि पुष्टिं  
पुष्टिपतिर्दधातु स्वाहा॥८७॥ \_\_\_\_\_[६७]

ओं तद्ब्रह्म। ओं तद्वायुः। ओं तदात्मा। ओं तत्सत्यम्। ओं तत्सर्वम्।  
ओं तत्पुरोर्नमः॥ अन्तश्चरति भूतेषु गुहायां विश्वमूर्तिषु। त्वं यज्ञस्त्वं  
वषट्कारस्त्वमिन्द्रस्त्वं रुद्रस्त्वं विष्णुस्त्वं ब्रह्म त्वं प्रजापतिः। त्वं तदाप आपो  
ज्योती रसोऽमृतं ब्रह्म भूर्भुवस्सुवरोम्॥८८॥ \_\_\_\_\_[६८]

## ॥ प्राणाहुतिमन्त्राः ॥

श्रद्धायां प्राणे निविष्टोऽमृतं जुहोमि। श्रद्धायामपाने निविष्टोऽमृतं जुहोमि।  
श्रद्धायां व्याने निविष्टोऽमृतं जुहोमि। श्रद्धायामुदाने निविष्टोऽमृतं जुहोमि।

श्रद्धायां॑ समाने निविष्टोऽमृतं जुहोमि। ब्रह्मणि म आत्माऽमृतत्वाय॑॥  
 अमृतोपस्तरणमसि॥ श्रद्धायां॑ प्राणे निविष्टोऽमृतं जुहोमि। शिवो मां  
 विशाप्रदाहाय। प्राणाय स्वाहा॥ श्रद्धायां॑ मपाने निविष्टोऽमृतं जुहोमि। शिवो मां  
 विशाप्रदाहाय। अपानाय स्वाहा॥ श्रद्धायां॑ व्याने निविष्टोऽमृतं जुहोमि। शिवो  
 मां विशाप्रदाहाय। व्यानाय स्वाहा॥ श्रद्धायां॑ मुदाने निविष्टोऽमृतं जुहोमि। शिवो  
 मां विशाप्रदाहाय। उदानाय स्वाहा॥ श्रद्धायां॑ समाने निविष्टोऽमृतं जुहोमि।  
 शिवो मां विशाप्रदाहाय। समानाय स्वाहा॥ ब्रह्मणि म आत्माऽमृतत्वाय॑।  
 अमृतापिधानमसि॥८९॥

[६९]

## ॥ भुक्तान्नाभिमन्त्रणमन्त्राः ॥

श्रद्धायां॑ प्राणे निविश्यामृतं हुतम्। प्राणमन्त्रेनाप्यायस्व। श्रद्धायां॑ मपाने  
 निविश्यामृतं हुतम्। अपानमन्त्रेनाप्यायस्व। श्रद्धायां॑ व्याने निविश्यामृतं हुतम्।  
 व्यानमन्त्रेनाप्यायस्व। श्रद्धायां॑ मुदाने निविश्यामृतं हुतम्। उदानमन्त्रेनाप्यायस्व।

श्रद्धाया॑ समाने निवि॑श्यामृत॑ हुतम्। समानमन्त्रे॑नाप्यायस्व॥१०॥——[७०]

॥ भोजनान्ते आत्मानुसन्धानमन्त्राः ॥

अङ्गुष्ठमात्रः पुरुषोऽङ्गुष्ठं च॑ समाश्रितः। ईशः सर्वस्य जगतः प्रभुः प्रीणाति॑  
विश्वभुक्॥११॥——[७१]

॥ अवयवस्वस्थता-प्रार्थनामन्त्रः ॥

वाङ्गं आसन्। नसोः प्राणः। अक्ष्योश्चक्षुः। कर्णयोः श्रोत्रम्। बाहुवोर्बलम्।  
ऊरुवोरोजः। अरिष्टा विश्वान्यङ्गानि तनूः। तनुवां मे सह नमस्ते अस्तु मा मां  
हिंसीः॥१२॥——[७२]

॥ इन्द्रसप्तर्षि-संवादमन्त्रः ॥

वयः सुपर्णा उप॑ सेदुरिन्द्रं प्रियमे॑धा ऋषयो॑ नाध॑मानाः। अप॑ ध्वान्तमूर्णु॑हि  
पूरि॑धं चक्षु॑र्मुमु॒ग्ध्य॑स्मान्निधये॑ऽव ब॒द्धान्।——[७३]

## ॥ हृदयालम्भनमन्त्रः ॥

प्राणानां ग्रन्थिरसि रुद्रो मां विशान्तकः। तेनान्नेनाप्यायस्व॥१३॥—[७४]

## ॥ देवताप्राणनिरूपणमन्त्रः ॥

नमो रुद्राय विष्णवे मृत्युर्मे पाहि॥१४॥—[७५]

## ॥ अग्निस्तुतिमन्त्रः ॥

त्वमग्ने द्युभिस्त्वमांशुशुक्षणिस्त्वमद्भ्यस्त्वमश्मन्स्परि। त्वं वनेभ्यस्त्वमोषधीभ्यस्त्वं  
नृणां नृपते जायसे शुचिः॥१५॥—[७६]

## ॥ अभीष्टयाचनामन्त्राः ॥

शिवेन मे सन्तिष्ठस्व स्योनेन मे सन्तिष्ठस्व सुभूतेन मे सन्तिष्ठस्व ब्रह्मवर्चसेन  
मे सन्तिष्ठस्व यज्ञस्यर्धिमनु सन्तिष्ठस्वोप ते यज्ञ नम उप ते नम उप ते  
नमः॥१६॥—[७७]

## ॥ परतत्त्व-निरूपणम् ॥

सत्यं परं परं सत्यं सत्येन न सुवर्गाल्लोकाच्च्यवन्ते कदाचन सतां हि  
 सत्यं तस्मात्सत्ये रमन्ते । तप इति तपो नानशानात्परं यद्धि परं तपस्तदुर्ध्वं  
 तदुराध्वं तस्मात्तपसि रमन्ते । दम इति नियतं ब्रह्मचारिणस्तस्माद्धमे रमन्ते ।  
 शम इत्यरण्ये मुनयस्तस्माच्छमे रमन्ते । दानमिति सर्वाणि भूतानि प्रशंसन्ति  
 दानान्नाति दुष्करं तस्माद्दाने रमन्ते । धर्म इति धर्मेण सर्वमिदं परिगृहीतं  
 धर्मान्नाति दुष्करं तस्माद्धर्मे रमन्ते । प्रजन इति भूयांसस्तस्माद्भूयिष्ठाः  
 प्रजायन्ते तस्माद्भूयिष्ठाः प्रजनने रमन्तेऽग्नयः । इत्याहु तस्मादग्नय आधातव्या  
 अग्निहोत्रमित्याहु तस्मादग्निहोत्रे रमन्ते । यज्ञ इति यज्ञो हि देवास्तस्माद्यज्ञे  
 रमन्ते । मानसमिति विद्वांसस्तस्माद्विद्वांस एव मानसे रमन्ते । न्यास इति  
 ब्रह्मा ब्रह्मा हि परः परो हि ब्रह्मा तानि वा एतान्यवराणि परांसि न्यास  
 एवात्यरेचयद्य एवं वेदैत्युपनिषत् ॥ १७ ॥

## ॥ ज्ञानसाधन-निरूपणम् ॥

प्राजापत्यो हारुणिः सुपर्णेयः प्रजापतिं पितरमुपससार किं भगवन्तः परमं वदन्तीति तस्मै प्रोवाच । सत्येन वायुरावाति सत्येनाऽऽदित्यो रोचते दिवि सत्यं वाचः प्रतिष्ठा सत्ये सर्वं प्रतिष्ठितं तस्मात्सत्यं परमं वदन्ति । तपसा देवा देवतामग्रे आयन्तपसर्षयः सुवरन्वविन्दन् तपसा सपत्नान् प्रणुदामारातीस्तपसि सर्वं प्रतिष्ठितं तस्मात्तपः परमं वदन्ति । दमेन दान्ताः किल्बिषमवधून्वन्ति दमेन ब्रह्मचारिणः सुवरगच्छन्दमो भूतानां दुराधर्षं दमे सर्वं प्रतिष्ठितं तस्माद्धमः परमं वदन्ति । शमेन शान्ताः शिवमाचरन्ति शमेन नाकं मुनयोऽन्वविन्दच्छमो भूतानां दुराधर्षच्छमे सर्वं प्रतिष्ठितं तस्माच्छमः परमं वदन्ति । दानं यज्ञानां वरूथं दक्षिणा लोके दातारः सर्वभूतान्युपजीवन्ति दानेनारातीरपानुदन्त दानेन द्विषन्तो मित्रा भवन्ति दाने सर्वं प्रतिष्ठितं तस्माद्दानं परमं वदन्ति । धर्मो विश्वस्य जगतः प्रतिष्ठा लोके धर्मिष्ठं प्रजा उपसर्पन्ति धर्मेण पापमपनुदति धर्मे सर्वं प्रतिष्ठितं तस्माद्धर्मं परमं वदन्ति । प्रजननं वै प्रतिष्ठा लोके साधु

प्रजायास्तन्तुं तन्वानः पितॄणामनृणो भवन्ति तदेव तस्यानृणं तस्मात् प्रजननं  
 परमं वदन्त्यग्नयो वै त्रयीं विद्या । देवयानः पन्थां गार्हपत्य ऋक्पृथिवी  
 रथन्तरमन्वाहार्यपचनं यजुरन्तरिक्षं वामदेव्यमाहवनीयः सामं सुवर्गो लोको  
 बृहत्तस्मादग्नीन्परमं वदन्त्यग्निहोत्रं सायं प्रातर्गृहाणां निष्कृतिः स्विष्टं सुहुतं  
 यज्ञक्रतूनां प्रायणं सुवर्गस्य लोकस्य ज्योतिस्तस्मादग्निहोत्रं परमं वदन्ति ।  
 यज्ञ इति यज्ञेन हि देवा दिवं गता यज्ञेनासुरानपानुदन्त यज्ञेन द्विषन्तो मित्रा  
 भवन्ति यज्ञे सर्वं प्रतिष्ठितं तस्माद्यज्ञं परमं वदन्ति । मानसं वै प्राजापत्यं पवित्रं  
 मानसेन मनसा साधु पश्यति मानसा ऋषयः प्रजा असृजन्त मानसे सर्वं  
 प्रतिष्ठितं तस्मान्मानसं परमं वदन्ति । न्यास इत्याहुर्मनीषिणो ब्रह्माणं ब्रह्मा विश्वः  
 कतमः स्वयम्भुः प्रजापतिः संवत्सर इति संवत्सरोऽसावादित्यो य एष आदित्ये  
 पुरुषः स परमेष्ठी ब्रह्मात्मा । याभिरादित्यस्तपति रश्मिभिस्ताभिः पर्जन्यो  
 वर्षति पर्जन्येनौषधिवनस्पतयः प्रजायन्त ओषधिवनस्पतिभिरन्नं भवत्यन्नेन  
 प्राणाः प्राणैर्बलं बलेन तपस्तपसा श्रद्धा श्रद्धया मेधा मेधया मनीषा मनीषया



मनो॒ मन॑सा॒ शान्तिः॑ शान्त्या॑ चित्तं॑ चित्तेन॒ स्मृतिः॑ ॥ स्मृत्या॒ स्मारः॑ ॥ स्मारेण॑  
विज्ञानं॑ विज्ञाने॑नाऽऽत्मानं॑ वेदयति॒ तस्मा॑दन्नं॒ दद॑न्त्सर्वा॑ण्येतानि॒ ददा॑त्यन्ना॑त्  
प्राणा॑ भवन्ति । भूतानां॑ प्राणै॑र्मनो॒ मन॑सश्च विज्ञानं॑ विज्ञाना॑दानन्दो ब्रह्म॑योनिः स  
वा ए॒ष पुरु॑षः पञ्च॑धा पञ्चा॑त्मा येन॒ सर्व॑मिदं प्रोतं॑ पृथि॒वी चा॒न्तरि॑क्षं च॒ द्यौश्च॑  
दिश॑श्चावान्तर॑दिशाश्च॒ स वै सर्व॑मिदं जग॑त्स च॒ भूतः॑ स भ॒व्यं जि॑ज्ञासकृ॒त  
ऋ॒तजा॑ रयि॑ष्ठा । श्रद्धा॑ स॒त्यो मह॑स्वान्त॒पसो॑ वरि॑ष्ठाद्वात्वा॒ तमे॒वं मन॑सा हृ॒दा  
च॒ भूयो॑ न मृ॒त्युमुप॑याहि वि॒द्वान्तस्मा॑न्या॒समेषां॑ तप॑सामतिरिक्त॒माहु॑र्वसु॒र्णवो॑  
वि॒भूर॑सि प्रा॒णे त्वम॑सि सन्धा॒ता । ब्रह्म॑न् त्वम॑सि वि॒श्वधृ॑त्तेजो॒दास्त्वम॑स्य॒ग्निर॑सि  
वर्चो॑दास्त्वम॑सि सूर्य॑स्य द्यु॒म्नोदा॑स्त्वम॑सि च॒न्द्रम॑स उपया॒मगृ॑हीतोऽसि ब्रह्म॑णै॒ त्वा  
० मह॑स॒ ओमि॑त्या॒त्मानं॑ यु॒ञ्जीतै॑तद्वै म॒होप॑निषदं दे॒वानां॑ गुह्यं॒ य ए॒वं वेद॑ ब्रह्म॑णो  
महि॑मानमाप्नोति॒ तस्मा॑द्ब्रह्म॑णो॒ महि॑मानमित्यु॒पनिष॑त् ॥ १८ ॥ ————— [ ७९ ]

## ॥ ज्ञानयज्ञः ॥

तस्यै॒वं वि॒दुषो॑ य॒ज्ञस्या॒ऽऽत्मा॑ यज॑मानः श्रद्धा पत्नी शरीरमिध्ममुरो वेदिर्लोमानि  
 ब॒र्हिर्वेदः॑ शिखा हृदयं यूपः काम आज्यं मन्युः पशुस्तपोऽग्निर्दमः शमयिता  
 दक्षि॑णा वाग्धोता प्राण उद्गाता चक्षुरध्वर्युर्मनो ब्रह्मा । श्रोत्रमग्नीद्यावद्विर्यते  
 सा दी॒क्षा यदश्ना॑ति तद्धविर्यत्पिब॑ति तदस्य सोमपानं यद्रमते तदुपसदो  
 यत्स॒ञ्चर॑त्युपविशत्युत्तिष्ठते च स प्रव॒र्ग्यो यन्मुखं॑ तदाहवनीयो या  
 व्याहृ॑तिराहुतिर्यदस्य । विज्ञानं तज्जुहोति यत्सायं प्रातर॑त्ति तत्समिधं यत्प्रातर्मध्यं  
 दिन॑ः सायं च तानि सर्व॑नानि ये अ॒होरा॑त्रे ते द॒र्शपूर्ण॑मासौ येऽर्ध॑मासाश्च  
 मासा॑श्च ते चा॒तुर्मा॑स्यानि य ऋतवस्ते पशुबन्धा ये संवत्स॒राश्च॑ परिवत्स॒राश्च॑  
 तेऽह॑र्गणाः सर्ववेदसं वा । एतत्स॒त्रं यन्मर॑णं तदव॒भृथ॑ एतद्वै ज॒राम॑र्यमग्निहोत्रं  
 स॒त्रं य ए॒वं वि॒द्वानु॑द॒गय॑ने प्र॒मीय॑ते देवानामेव महिमानं गत्वाऽऽदित्यस्य सायु॑ज्यं  
 गच्छ॑त्यथ । यो दक्षि॑णे प्र॒मीय॑ते पितॄणामेव महिमानं गत्वा च॒न्द्रम॑सः सायु॑ज्यं  
 सलो॒कता॑माप्नोत्येतौ वै सूर्याच॒न्द्रम॑सोर्महिमानौ ब्राह्म॒णो वि॒द्वान॒भिज॑यति

तस्माद्ब्रह्मणो महिमानमाप्नोति तस्माद्ब्रह्मणो महिमानमित्युपनिषत्॥९९॥ —[८०]

ॐ सह नाववतु। सह नौ भुनक्तु। सह वीर्यं करवावहै। तेजस्वि नावधीतमस्तु  
मा विद्विषावहै। ॐ शान्तिः शान्तिः शान्तिः॥





## ॥ कृष्णयजुर्वेदीयतैत्तिरीय-काठकम् ॥

॥ प्रथमः प्रश्नः ॥

संज्ञानं विज्ञानं प्रज्ञानं जानदभिजानत्। सङ्कल्पमानं प्रकल्पमानमुप-  
कल्पमानमुपकृप्तं क्लृप्तम्। श्रेयो वसीय आयथ्सम्भूतं भूतम्। चित्रः केतुः  
प्रभानाभान्सम्भान्। ज्योतिष्माऽस्तेजस्वानातपऽस्तपन्नभितपन्। रोचनो  
रोचमानः शोभनः शोभमानः कल्याणः। दर्शा दृष्टा दर्शता विश्वरूपा  
सुदर्शना। आप्यायमाना प्यायमाना प्याया सूनृतेरा। आपूर्यमाणा पूर्यमाणा  
पूरयन्ती पूर्णा पौर्णमासी। दाता प्रदाताऽऽनन्दो मोदः प्रमोदः॥१॥

आवेशयन्निवेशयन्संवेशनः सः शान्तः शान्तः। आभवन्प्रभवन्सम्भवन्सम्भूतो  
भूतः। प्रस्तुतं विष्टुतं सऽस्तुतं कल्याणं विश्वरूपम्। शुक्रममृतं तेजस्वि  
तेजः समिद्धम्। अरुणं भानुमन्मरीचिमदभितपत्तपस्वत्। सविता प्रसविता दीप्तो  
दीपयन्दीप्यमानः। ज्वलञ्ज्वलिता तपन्वितपन्सन्तपन्। रोचनो रोचमानः शुम्भूः

शुम्भ॑मानो वा॒मः। सु॒ता सु॒न्वती॑ प्रसु॒ता सू॒यमा॑नाऽभिषू॒यमा॑णा। पी॒तीं प्र॒पा स॒म्पा  
तृप्ति॑स्त॒र्पय॑न्ती॥ २॥

का॒न्ता का॒म्या का॒मजा॑ताऽऽयु॑ष्मती॒ काम॑दु॒घा। अ॒भिशा॒स्ताऽनु॑मु॒न्ताऽऽनु॑न्दो  
मोदः॑ प्र॒मोदः॑। आ॒साद॑यन्निषा॒दय॑न्त्स॒साद॑नः॒ स॒सन्नः॑ स॒न्नः। आ॒भूर्वि॒भूः  
प्र॒भूः श॒म्भूर्भुवः॑। प॒वित्रं प॑वयिष्यन्पू॒तो मे॒ध्यः। यशो॑ यश॑स्वाना॒युर॒मृतः॑। जी॒वो  
जी॑विष्यन्त्स्वर्गो लो॒कः। सह॑स्वान्त्सही॒यानो॑ज॒स्वान्त्सह॑मानः। जय॑न्नभि॒जय॑न्त्सु॒-  
द्रवि॑णो द्रवि॒णोदाः॑। आ॒र्द्रप॑वित्रो॒ हरि॑केशो॒ मोदः॑ प्र॒मोदः॑॥ ३॥

अ॒रु॒णोऽरु॒णर॑जाः पु॒ण्डरी॑को विश्व॒जिद॑भि॒जित्। आ॒र्द्रः पि॒न्वमा॑नोऽन्न॑वा॒न्नस॑वा॒निरा॑  
स॒र्वौष॑धः स॒म्भुरो॑ मह॑स्वान्। ए॒ज॒त्का जो॑व॒त्काः। क्षु॒ल्लकाः॑ शि॒पिवि॑ष्ट॒काः।  
स॒रि॒स्र॒राः सु॒शेर॑वः। अ॒जिरा॑सो॒ गमि॑ष्णवः। इ॒दानीं॑ त॒दानी॑मे॒तर॑हि॒ क्षिप्र॑म॒जिर॑म्।  
आ॒शुर्नि॑मेषः फ॒णो द्र॑वन्नति॒द्रवन्। त्वर॑स्त्वर॑माण आ॒शुरा॑शी॒याञ्ज॑वः। अ॒ग्नि॒ष्टोम॑  
उ॒क्थ्योऽति॑रा॒त्रो द्वि॑रा॒त्रस्त्रि॑रा॒त्रश्च॑तूरा॒त्रः। अ॒ग्निर्ऋ॒तुः सूर्य॑ ऋ॒तुश्च॑न्द्रमा॑ ऋ॒तुः।

प्रजापतिः संवत्सरो महान्कः॥४॥ \_\_\_\_\_[१]

भूरग्निं च पृथिवीं च मां च। त्रींश्च लोकान्संवत्सरं च। प्रजापतिस्त्वा  
सादयतु। तया देवतयाऽङ्गिरस्वद्ध्रुवा सीद। भुवो वायुं चान्तरिक्षं च मां च।  
त्रींश्च लोकान्संवत्सरं च। प्रजापतिस्त्वा सादयतु। तया देवतयाऽङ्गिरस्वद्ध्रुवा  
सीद। स्वरादित्यं च दिवं च मां च। त्रींश्च लोकान्संवत्सरं च। प्रजापतिस्त्वा  
सादयतु। तया देवतयाऽङ्गिरस्वद्ध्रुवा सीद। भूर्भुवः स्वश्चन्द्रमसं च दिशश्च मां च।  
त्रींश्च लोकान्संवत्सरं च। प्रजापतिस्त्वा सादयतु। तया देवतयाऽङ्गिरस्वद्ध्रुवा  
सीद॥५॥ \_\_\_\_\_[२]

त्वमेव त्वां वैत्य योऽसि सोऽसि। त्वमेव त्वामचैषीः। चितश्चासि  
सञ्चितश्चास्यग्रे। एतावांश्चासि भूयांश्चास्यग्रे। यत्ते अग्रे न्यूनं यदु तेऽतिरिक्तम्।  
आदित्यास्तदङ्गिरसश्चिन्वन्तु। विश्वे ते देवाश्चितिमापूरयन्तु। चितश्चासि  
सञ्चितश्चास्यग्रे। एतावांश्चासि भूयांश्चास्यग्रे। मा ते अग्रे च येन माऽति च

येनाऽऽयुरावृक्षि। सर्वेषां ज्योतिषां ज्योतिर्यददावुदेति। तपसो जातमनिभृष्टमोजः।  
तत्ते ज्योतिरिष्टके। तेन मे तप। तेन मे ज्वल। तेन मे दीदिहि। यावद्देवाः।  
यावदसांति सूर्यः। यावदुतापि ब्रह्म॥६॥ [३]

संवत्सरोऽसि परिवत्सरोऽसि। इदावत्सरोऽसीदुवत्सरोऽसि। इद्वत्सरोऽसि  
वत्सरोऽसि। तस्य ते वसन्तः शिरः। ग्रीष्मो दक्षिणः पक्षः। वरुषाः पुच्छम्।  
शरदुत्तरः पक्षः। हेमन्तो मध्यम्। पूर्वपक्षाश्चितयः। अपरपक्षाः पुरीषम्॥७॥

अहोरात्राणीष्टकाः। ऋषभोऽसि स्वर्गो लोकः। यस्यां दिशि महीयंसे।  
ततो नो मह आवाह। वायुर्भूत्वा सर्वा दिश आवाहि। सर्वा दिशोऽनुविवाहि।  
सर्वा दिशोऽनुसंवाहि। चित्त्या चितिमापृण। अचित्त्या चितिमापृण। चिदसि  
समुद्रयोनिः॥८॥

इन्दुर्दक्षः श्येन ऋतावां। हिरण्यपक्षः शकुनो भुरण्युः। महान्सधस्थे ध्रुव  
आनिषत्तः। नमस्ते अस्तु मा मां हिंसीः। एति प्रेति वीति समित्युदिति। दिवं



मे यच्छ। अ॒न्तरि॑क्षं मे यच्छ। पृ॒थि॒वीं मे॑ यच्छ। पृ॒थि॒वीं मे॑ यच्छ। अ॒न्तरि॑क्षं मे यच्छ। दि॒वं मे॑ यच्छ। अ॒ह्ना प्र॑सा॒रय। रा॒त्र्या स॑म॒च। रा॒त्र्या प्र॑सा॒रय। अ॒ह्ना स॑म॒च। का॒मं प्र॑सा॒रय। का॒म॒ꣳ स॑म॒च॥९॥ \_\_\_\_\_[४]

भूर्भुवः स्वः। ओजो बलम्। ब्रह्म क्षत्रम्। यशो महत्। सत्यं तपो नाम। रूपममृतम्। चक्षुः श्रोत्रम्। मन आयुः। विश्वं यशो महः। समं तपो हरो भाः। जातवेदा यदि वा पावकोऽसि। वैश्वानरो यदि वा वैद्युतोऽसि। शं प्रजाभ्यो यजमानाय लोकम्। ऊर्जं पुष्टिं दददभ्याववृथ्स्व॥१०॥ \_\_\_\_\_[५]

राज्ञीं विराज्ञीं। सम्राज्ञीं स्वराज्ञीं। अर्चिः शोचिः। तपो हरो भाः। अग्निरिन्द्रो बृहस्पतिः। विश्वे देवा भुवनस्य गोपाः। ते मा सर्वे यशसा सꣳसृजन्तु॥११॥ [६]

असवे स्वाहा वसवे स्वाहा। विभुवे स्वाहा विवस्वते स्वाहा। अभिभुवे स्वाहाऽधिपतये स्वाहा। दिवां पतये स्वाहाऽहस्पत्याय स्वाहा। चाक्षुष्मत्याय स्वाहा। ज्योतिष्मत्याय स्वाहा। राज्ञे स्वाहा विराज्ञे स्वाहा। सम्राज्ञे स्वाहा स्वराज्ञे

स्वाहा॑। शूषा॑य॒ स्वाहा॑ सूर्या॑य॒ स्वाहा॑। च॒न्द्रम॑से॒ स्वाहा॑ ज्योति॑षे॒ स्वाहा॑। स॒र्पा॑य॒  
स्वाहा॑ क॒ल्याणा॑य॒ स्वाहा॑। अर्जु॑नाय॒ स्वाहा॑॥१२॥ \_\_\_\_\_[७]

वि॒प॒श्चिते॒ पव॑मानाय गायत। म॒ही न धारा॑त्यन्धो अ॒र्षति॑। अहि॑र॒ह  
जी॒र्णाम॑ति॒सर्प॑ति॒ त्वच॑म्। अत्यो॒ न क्रीड॑न्नसर॒द्वृषा॑ हरिः॑। उ॒प॒या॒मगृ॑हीतोऽसि  
मृ॒त्यवे॑ त्वा जुष्टं गृह्णामि। ए॒ष ते योनि॑र्मृ॒त्यवे॑ त्वा। अप॑मृ॒त्युम॑पक्षुधम्। अपे॒तः  
श॒पथं॑ जहि। अधा॑ नो अ॒ग्न आ॑व॒ह। रा॒यस्पोष॑ सह॒स्त्रिण॑म्॥१३॥

ये ते॑ स॒हस्र॑म॒युतं॑ पाशाः॑। मृ॒त्यो म॑र्त्या॒य ह॑न्त॒वे। तान् य॒ज्ञस्य॑ मा॒यया॑।  
सर्वा॑नव॒यजा॑महे। भ॒क्षोऽस्य॑मृतभ॒क्षः। तस्य॑ ते मृ॒त्युपी॑तस्या॒मृत॑वतः। स्व॒गाकृ॑तस्य॒  
मधु॑मतः। उप॑हूत॒स्योप॑हूतो भक्षयामि। म॒न्द्राऽभि॑भूतिः के॒तुर्य॒ज्ञानां॑ वाक्।  
असा॒वेहि॑॥१४॥

अ॒न्यो जा॑गृ॒विः प्रा॑ण। असा॒वेहि॑। ब॒धिर आ॑क्रन्दयितरपान। असा॒वेहि॑।  
अ॒ह॒स्तोस्त्वा॒ चक्षुः॑। असा॒वेहि॑। अ॒पा॒दाशो॒ मनः॑। असा॒वेहि॑। क॒वे वि॑प्रचि॒त्ते श्रोत्र॑।

असावेहि॥१५॥

सुहस्तः सुवासाः। शूषो नामास्यमृतो मर्त्येषु। तं त्वाऽहं तथा वेद। असावेहि।  
अग्निर्मे वाचि श्रितः। वाग्धृदये। हृदयं मयि। अहममृते। अमृतं ब्रह्मणि। वायुर्मे  
प्राणे श्रितः॥१६॥

प्राणो हृदये। हृदयं मयि। अहममृते। अमृतं ब्रह्मणि। सूर्यो मे चक्षुषि श्रितः।  
चक्षुरहृदये। हृदयं मयि। अहममृते। अमृतं ब्रह्मणि। चन्द्रमा मे मनसि श्रितः॥१७॥

मनो हृदये। हृदयं मयि। अहममृते। अमृतं ब्रह्मणि। दिशो मे श्रोत्रे श्रिताः।  
श्रोत्रं हृदये। हृदयं मयि। अहममृते। अमृतं ब्रह्मणि। आपो मे रेतसि श्रिताः॥१८॥

रेतो हृदये। हृदयं मयि। अहममृते। अमृतं ब्रह्मणि। पृथिवी मे शरीरे श्रिता।  
शरीरं हृदये। हृदयं मयि। अहममृते। अमृतं ब्रह्मणि। ओषधिवनस्पतयो मे  
लोमसु श्रिताः॥१९॥

लोमानि हृदये। हृदयं मयि। अहममृते। अमृतं ब्रह्मणि। इन्द्रो मे बले श्रितः।

बल॒५ हृदये। हृदयं॒ मयि॑। अ॒हम॒मृते॑। अ॒मृतं॒ ब्रह्म॑णि। पु॒र्जन्यो॑ मे मूर्ध्नि श्रि॒तः॥ २०॥

मूर्धा॑ हृदये। हृदयं॒ मयि॑। अ॒हम॒मृते॑। अ॒मृतं॒ ब्रह्म॑णि। ई॒शानो॑ मे म॒न्यौ  
श्रि॒तः। म॒न्युर्हृदये॑। हृदयं॒ मयि॑। अ॒हम॒मृते॑। अ॒मृतं॒ ब्रह्म॑णि। आ॒त्मा मं आ॒त्मनि॑  
श्रि॒तः॥ २१॥

आ॒त्मा हृदये॑। हृदयं॒ मयि॑। अ॒हम॒मृते॑। अ॒मृतं॒ ब्रह्म॑णि। पुन॑र्म आ॒त्मा  
पुन॑रायुरागा॑त्। पुनः॑ प्रा॒णः पुन॑राकू॒तमागा॑त्। वै॒श्वान॒रो र॒श्मिभि॑र्वावृ॒धानः॑।  
अ॒न्तस्ति॑ष्ठत्व॒मृत॑स्य गो॒पाः॥ २२॥ \_\_\_\_\_[८]

प्र॒जाप॑तिर्दे॒वान॑सृजत। ते पा॒प्मना॒ सन्दि॑ता अजायन्त। तान्व्य॑द्यत्। यद्व्य॑द्यत्।  
तस्मा॑द्विद्युत्। तम॑वृश्चत्। यदवृ॑श्चत्। तस्मा॑द्वृष्टिः। तस्मा॑द्यत्रै॒ते दे॒वते॑ अभि॒प्राप्नु॑तः।  
वि च॑ है॒वास्य॒ तत्र॑ पा॒प्मानं॒ द्यतः॑॥ २३॥

वृश्च॑तश्च। सैषा मी॒मा॒५साऽग्नि॑होत्र ए॒व स॑म्पन्ना। अथो॑ आहुः। सर्वे॑षु  
यज्ञ॑क॒तुष्वि॑ति। होष्य॑न्नप॒ उप॑स्पृशेत्। विद्यु॑दसि॒ विद्यं॑ मे पा॒प्मान॑मिति। अथ॑

हुत्वोपस्पृशेत्। वृष्टिरसि वृश्च मे पाप्मानमिति। यक्ष्यमाणो वेष्ट्वा वा। वि च  
हैवास्यैते देवते पाप्मानं द्यतः॥२४॥

वृश्चतश्च। अत्य॒हो हाऽऽरु॑णिः। ब्र॒ह्म॒चा॒रिणे॑ प्र॒श्नान्प्रोच्य॑ प्रजि॒घाय॑। परे॑हि। पृ॒क्षं  
दय्या॑म्पातिं पृच्छ। वेत्थ॑ सावि॒त्रा(३)न्न वेत्था(३) इति॑। तमा॒गत्य॑ पप्रच्छ। आ॒चार्यो  
मा प्रा॑हैषीत्। वेत्थ॑ सावि॒त्रा(३)न्न वेत्था(३) इति॑। स हो॑वाच वेदेति॥२५॥

स कस्मिन्प्रतिष्ठित इति। पुरोर॑जसीति। कस्तद्यत्पुरोर॑जा इति। ए॒ष वाव स  
पुरोर॑जा इति होवाच। य ए॒ष तप॑ति। ए॒षोऽर्वा॑ग्रजा इति। स कस्मिन्त्वे॒ष इति॑।  
स॒त्य इति॑। किं तथ्स॒त्यमिति॑। तप॒ इति॑॥२६॥

कस्मिन्नु तप॒ इति॑। बल॒ इति॑। किं तद्वल॒मिति॑। प्रा॒ण इति॑। मा स्म  
प्रा॒णमति॑पृच्छ इति॑ माऽऽचा॒र्योऽब्रवी॑दिति॑ होवाच ब्रह्मचा॒री। स हो॑वाच पृ॒क्षो  
दय्या॑म्पातिः। यद्वै ब्र॒ह्म॒चा॒रिन्प्रा॒णमत्य॑प्रक्ष्यः। मूर्धा॑ ते व्यप॑तिष्यत्। अ॒हमु॑त  
आचा॒र्याच्छ्रेया॑न्भविष्यामि। यो मा॑ सावि॒त्रे स॒मवा॑दिष्टेति॥२७॥

तस्मात्सावित्रे न संवदेत। स यो ह वै सावित्रं विदुषां सावित्रे संवदेत।  
सहास्मिञ्छ्रियं दधाति। अनु ह वा अस्मा असौ तपञ्छ्रियं मन्यते। अन्वस्मै  
श्रीस्तपो मन्यते। अन्वस्मै तपो बलं मन्यते। अन्वस्मै बलं प्राणं मन्यते। स  
यदाहं। संज्ञानं विज्ञानं दर्शा दृष्टेति। एष एव तत्॥२८॥

अथ यदाहं। प्रस्तुतं विष्टुतं सुता सुन्वतीति। एष एव तत्। एष ह्येव  
तान्यहानि। एष रात्रयः। अथ यदाहं। चित्रः केतुर्दाता प्रदाता सविता  
प्रसविताऽभिशास्ताऽनुमन्तेति। एष एव तत्। एष ह्येव तेऽहो मुहूर्ताः। एष  
रात्रेः॥२९॥

अथ यदाहं। पवित्रं पवयिष्यन्त्सहस्वान्त्सहीयानरुणोऽरुणरजा इति। एष एव  
तत्। एष ह्येव तेऽर्धमासाः। एष मासाः। अथ यदाहं। अग्निष्टोम उक्थ्योऽग्निर्ऋतुः  
प्रजापतिः संवत्सर इति। एष एव तत्। एष ह्येव ते यज्ञऋतवः। एष ऋतवः॥३०॥

एष संवत्सरः। अथ यदाहं। इदानीं तदानीमिति। एष एव तत्। एष ह्येव ते

मुहूर्तानां मुहूर्ताः। जनुको ह वैदेहः। अहोरात्रैः समाजंगाम। त९ होचुः। यो वा  
अस्मान् वेद। विजहत्पाप्मानमेति॥३१॥

सर्वमायुरेति। अभि स्वर्गं लोकं जयति। नास्यामुष्मिल्लोकेऽन्नं क्षीयत  
इति। विजहद्ध वै पाप्मानमेति। सर्वमायुरेति। अभि स्वर्गं लोकं जयति।  
नास्यामुष्मिल्लोकेऽन्नं क्षीयते। य एवं वेद। अहीना हाऽऽश्वथ्यः। सावित्रं विदां  
चकार॥३२॥

स ह ह९सो हिरण्मयो भूत्वा। स्वर्गं लोकमियाय। आदित्यस्य सायुज्यम्।  
ह९सो ह वै हिरण्मयो भूत्वा। स्वर्गं लोकमेति। आदित्यस्य सायुज्यम्। य एवं वेद।  
देवभागो ह श्रौतर्षः। सावित्रं विदां चकार। त९ ह वागदृश्यमानाऽभ्युवाच॥३३॥

सर्वं बत गौतमो वेद। यः सावित्रं वेदेति। स होवाच। कैषा वागसीति।  
अयमह९ सावित्रः। देवानामुत्तमो लोकः। गुह्यं महो बिभ्रदिति। एतावति ह  
गौतमः। यज्ञोपवीतं कृत्वाऽधो निपपात। नमो नम इति॥३४॥

स होवाच। मा भैषीर्गौतम। जितो वै ते लोक इति। तस्माद्ये के च सावित्रं विदुः। सर्वे ते जितलोकाः। स यो ह वै सावित्रस्याष्टाक्षरं पदं श्रियाऽभिषिक्तं वेदं। श्रिया हैवाभिषिच्यते। घृणिरिति द्वे अक्षरे। सूर्य इति त्रीणि। आदित्य इति त्रीणि॥३५॥

एतद्वै सावित्रस्याष्टाक्षरं पदं श्रियाऽभिषिक्तम्। य एवं वेदं। श्रिया हैवाभिषिच्यते। तदेतदृचाऽभ्युक्तम्। ऋचो अक्षरे परमे व्योमन्। यस्मिन्देवा अधि विश्वे निषेदुः। यस्तं न वेद किमृचा करिष्यति। य इत्तद्विदुस्त इमे समांसत इति। न ह वा एतस्यर्चा न यजुषा न साम्नाऽर्थोऽस्ति। यः सावित्रं वेदं॥३६॥

तदेतत्परि यद्वैवचक्रम्। आर्द्रं पिन्वमानं स्वर्गे लोक एति। विजहद्विश्वा भूतानि सम्पश्यत्। आर्द्रो ह वै पिन्वमानः स्वर्गे लोक एति। विजहन्विश्वा भूतानि सम्पश्यन्। य एवं वेदं। शूषो ह वै वाष्प्यः। आदित्येन समाजंगाम। तं होवाच। एहि सावित्रं विद्धि। अयं वै स्वर्ग्योऽग्निः पारयिष्णुरमृतात्सम्भूत इति।



ए॒ष वा॒व स सा॑वि॒त्रः। य ए॒ष त॑प॒ति। ए॒हि मां वि॑द्धि। इति॑ है॒वैन॑ तदु॒वाच॥ ३७॥

[९]

इ॒यं वा॒व स॒रघा॑। तस्या॑ अ॒ग्निरे॒व सा॑र॒घं म॑धु॒। या ए॒ताः पू॑र्व॒पक्षा॑पर॒पक्षयो॑  
रात्रे॑यः। ता म॑धु॒कृतः॑। यान्य॑हा॒नि। ते म॑धु॒वृषाः॑। स यो ह॒ वा ए॒ता म॑धु॒कृतश्च॑  
मधु॒वृषा॑श्च॒ वेद॑। कु॒र्वन्ति॑ हा॒स्यैता॑ अ॒ग्नौ म॑धु॒। नास्ये॑ष्टा॒पूर्तं॑ ध॒यन्ति॑। अथ॒ यो न  
वेद॑॥ ३८॥

न हा॑स्यै॒ता अ॒ग्नौ म॑धु॒ कुर्व॑न्ति। ध॒यन्त्य॑स्येष्टा॒पूर्तम्॑। यो ह॒ वा अ॑हो॒रात्रा॑णां  
नाम॒धेया॑नि॒ वेद॑। नाहो॑रा॒त्रेष्वार्ति॑मा॒र्च्छति॑। स॒ज्ञानं॑ वि॒ज्ञानं॑ द॒र्शा दृ॒ष्टेति॑।  
ए॒ताव॑नुवा॒कौ पू॑र्व॒पक्ष॑स्या॒होरा॑त्राणां॒ नाम॒धेया॑नि। प्र॒स्तुतं॑ वि॒ष्टुत॑ सु॒ता सु॑न्व॒तीति॑।  
ए॒ताव॑नुवा॒काव॑पर॒पक्ष॑स्या॒होरा॑त्राणां॒ नाम॒धेया॑नि। नाहो॑रा॒त्रेष्वार्ति॑मा॒र्च्छति॑। य ए॒वं  
वेद॑॥ ३९॥

यो ह॒ वै मु॑हूर्ता॒नां नाम॒धेया॑नि॒ वेद॑। न मु॑हूर्तेष्वार्ति॑मा॒र्च्छति॑। चि॒त्रः के॒तुर्दा॑ता

प्र॒दा॒ता सं॒वि॒ता प्र॑स॒वि॒ता ऽभि॑शा॒स्ता ऽनु॑म॒न्तेति॑ । ए॒ते ऽनु॒वा॒का मु॑हूर्तानां॑ नाम॒धेया॑नि ।  
 न मु॒हूर्ते॑ष्वा॒र्तिमा॑च्छति । य ए॒वं वेद॑ । यो ह॒ वा अ॑र्धमा॒सानां॑ च॒ मासा॑नां च  
 नाम॒धेया॑नि वेद॑ । ना॒र्धमा॑सेषु न मासे॒ष्वा॒र्तिमा॑च्छति । पु॒वित्रं॑ पवयि॒ष्यन्त्सह॑-  
 स्वा॒न्त्सही॑यानरु॒णो ऽरु॒णर॑जा इति॑ । ए॒ते ऽनु॒वा॒का अ॑र्धमा॒सानां॑ च॒ मासा॑नां च  
 नाम॒धेया॑नि ॥ ४० ॥

ना॒र्धमा॑सेषु न मासे॒ष्वा॒र्तिमा॑च्छति । य ए॒वं वेद॑ । यो ह॒ वै य॑ज्ञक्रतूनां च॒र्तूनां॑ च  
 सं॒वत्स॒रस्य॑ च नाम॒धेया॑नि वेद॑ । न य॑ज्ञक्र॒तुषु॑ न॒र्तुषु॑ न सं॒वत्स॒र आ॒र्तिमा॑च्छति ।  
 अ॒ग्नि॒ष्टोम॑ उ॒क्थ्यो॑ ऽग्नि॒र्ऋतुः॑ प्र॒जाप॑तिः सं॒वत्स॒र इति॑ । ए॒ते ऽनु॒वा॒का य॑ज्ञक्रतूनां  
 च॒र्तूनां॑ च॒ सं॒वत्स॒रस्य॑ च नाम॒धेया॑नि ॥ ४१ ॥

न य॑ज्ञक्र॒तुषु॑ न॒र्तुषु॑ न सं॒वत्स॒र आ॒र्तिमा॑च्छति । य ए॒वं वेद॑ । यो ह॒ वै  
 मु॑हूर्तानां॑ मु॒हूर्तान् वेद॑ । न मु॑हूर्तानां॑ मु॒हूर्ते॑ष्वा॒र्तिमा॑च्छति । इ॒दानीं॑ त॒दानी॑मिति॑ ।

ए॒ते वै मु॑हूर्तानां॑ मुहूर्ताः। न मु॑हूर्तानां॑ मुहूर्तेष्वार्ति॑माच्छति। य ए॒वं वेद॑। अथो॒  
यथा॑ क्षे॒त्रज्ञो॑ भू॒त्वाऽनु॑प्रविश्यान्न॒मत्ति॑। ए॒वमे॒वैतान्क्षे॑त्रज्ञो भू॒त्वाऽनु॑प्रविश्यान्न॒मत्ति॑।  
स ए॒तेषा॑मे॒व स॑लो॒कता॒ऽ सायु॑ज्यमश्नुते। अप॑ पुनर्मृत्युं जयति। य ए॒वं वेद॑॥४२॥  
[१०]

कश्चि॑द्ध॒ वा अ॒स्माल्लो॒कात्प्रेत्य॑। आ॒त्मानं॑ वेद। अ॒यम॒हम॒स्मीति॑। कश्चि॑त्स्व॒  
लो॒कं न प्र॑तिप्रजा॒नाति॑। अ॒ग्निमु॑ग्धो है॒व धू॑मता॒न्तः। स्व॑ं लो॒कं न प्र॑तिप्रजा॒नाति॑।  
अथ॒ यो है॒वैतम॒ग्निः सा॑वि॒त्रं वेद॑। स ए॒वास्मा॑ल्लो॒कात्प्रेत्य॑। आ॒त्मानं॑ वेद।  
अ॒यम॒हम॒स्मीति॑॥४३॥

स स्व॑ं लो॒कं प्र॑तिप्रजा॒नाति॑। ए॒ष उ॑ वे॒वेनं॑ तथ्सा॑वि॒त्रः। स्व॑र्गं लो॒कम॒भिव॑हति।  
अ॒होरा॒त्रैर्वा इ॒दः स॒युग्भिः॑ क्रियते। इति॑रा॒त्राया॑दीक्षिषत। इति॑रा॒त्राय॑  
व्र॒तमुपा॑गुरिति। तानि॒हाने॑वं वि॒दुषः॑। अ॒मुष्मि॑ल्लो॒के शे॑व॒धिं ध॑यन्ति। धी॒तः है॒व स  
शे॑व॒धिम॒नु परै॑ति। अथ॒ यो है॒वैतम॒ग्निः सा॑वि॒त्रं वेद॑॥४४॥

तस्य हैवाहोरात्राणि। अमुष्मिल्लोके शैवधिं न धयन्ति। अधीतः हैव स शैवधिमनु परैति। भरद्वाजो ह त्रिभिरायुर्भिर्ब्रह्मचर्यमुवास। तः ह जीर्णिः स्थविरः शयानम्। इन्द्र उपव्रज्योवाच। भरद्वाज। यत्तं चतुर्थमायुर्दद्याम्। किमेनेन कुर्या इति। ब्रह्मचर्यमेवैनेन चरेयमिति होवाच॥४५॥

तः ह त्रीन्गिरिरूपानविज्ञातानिव दर्शयां चकार। तेषां हैकैकस्मान्मुष्टिनाऽऽदेव स होवाच। भरद्वाजेत्यामन्त्र्य। वेदा वा एते। अनन्ता वै वेदाः। एतद्वा एतैस्त्रिभिरायुर्भिरन्ववोचथाः। अथ त इतरदननूक्तमेव। एहीमं विद्धि। अयं वै सर्वविद्येति॥४६॥

तस्मै हैतमग्निः सावित्रमुवाच। तः स विदित्वा। अमृतो भूत्वा। स्वर्गं लोकमियाय। आदित्यस्य सायुज्यम्। अमृतो हैव भूत्वा। स्वर्गं लोकमेति। आदित्यस्य सायुज्यम्। य एवं वेद। एषो एव त्रयीं विद्या॥४७॥

यावन्तः ह वै त्रय्या विद्यया लोकं जयति। तावन्तं लोकं जयति। य एवं

वेदं। अ॒ग्ने॒र्वा ए॒तानि॑ नाम॒धेया॑नि। अ॒ग्ने॒रे॒व सायु॑ज्यं स॒लो॒कता॑माप्नोति। य ए॒वं वेदं॑। वा॒यो॒र्वा ए॒तानि॑ नाम॒धेया॑नि। वा॒यो॒रे॒व सायु॑ज्यं स॒लो॒कता॑माप्नोति। य ए॒वं वेदं॑। इन्द्र॑स्य वा ए॒तानि॑ नाम॒धेया॑नि॥४८॥

इन्द्र॑स्यै॒व सायु॑ज्यं स॒लो॒कता॑माप्नोति। य ए॒वं वेदं॑। बृ॒ह॒स्प॒ते॒र्वा ए॒तानि॑ नाम॒धेया॑नि। बृ॒ह॒स्प॒ते॒रे॒व सायु॑ज्यं स॒लो॒कता॑माप्नोति। य ए॒वं वेदं॑। प्र॒जा॒प॒ते॒र्वा ए॒तानि॑ नाम॒धेया॑नि। प्र॒जा॒प॒ते॒रे॒व सायु॑ज्यं स॒लो॒कता॑माप्नोति। य ए॒वं वेदं॑। ब्र॒ह्म॑णो वा ए॒तानि॑ नाम॒धेया॑नि। ब्र॒ह्म॑ण ए॒व सायु॑ज्यं स॒लो॒कता॑माप्नोति। य ए॒वं वेदं॑। स वा ए॒षोऽग्नि॑र॒पक्ष॑पुच्छो वा॒यु॒रे॒व। तस्या॑ग्नि॒र्मुख॑म्। अ॒सा॒वा॒दि॒त्यः शि॒रः। स य॑दे॒ते दे॒वते॒ अन्त॑रेण। तथ्सर्वं॑ सी॒व्य॑ति। तस्मा॑त्सा॒वि॒त्रः॥४९॥ —————[११]

॥इति कृष्णयजुर्वेदीयतैत्तिरीयकाठके प्रथमः प्रश्नः समाप्तः॥१॥

॥द्वितीयः प्रश्नः॥

लो॒कोऽसि स्व॒र्गोऽसि। अन॒न्तोऽस्यपा॒रोऽसि। अक्षि॑तोऽस्यक्ष॒य्योऽसि। तप॑सः  
प्रति॒ष्ठा। त्वयी॑दम॒न्तः। विश्वं॑ य॒क्षं विश्वं॑ भू॒तं विश्वं॑ सुभू॒तम्। विश्व॑स्य भ॒र्ता  
विश्व॑स्य जनयि॒ता। तं त्वोप॑दधे काम॒दुघ॒मक्षि॑तम्। प्र॒जाप॑तिस्त्वा सादयतु। तया॑  
दे॒वतया॑ऽङ्गि॒रस्व॑द्धुवा सी॑द॥१॥

तपो॑ऽसि लो॒के श्रि॒तम्। तेज॑सः प्रति॒ष्ठा। त्वयी॑दम॒न्तः। विश्वं॑ य॒क्षं विश्वं॑ भू॒तं  
विश्वं॑ सुभू॒तम्। विश्व॑स्य भ॒र्तु विश्व॑स्य जनयि॒तु। तत्त्वोप॑दधे काम॒दुघ॒मक्षि॑तम्।  
प्र॒जाप॑तिस्त्वा सादयतु। तया॑ दे॒वतया॑ऽङ्गि॒रस्व॑द्धुवा सी॑द॥२॥

तेजो॑ऽसि तप॑सि श्रि॒तम्। स॒मुद्र॑स्य॒ प्रति॒ष्ठा। त्वयी॑दम॒न्तः। विश्वं॑ य॒क्षं विश्वं॑ भू॒तं  
विश्वं॑ सुभू॒तम्। विश्व॑स्य भ॒र्तु विश्व॑स्य जनयि॒तु। तत्त्वोप॑दधे काम॒दुघ॒मक्षि॑तम्।  
प्र॒जाप॑तिस्त्वा सादयतु। तया॑ दे॒वतया॑ऽङ्गि॒रस्व॑द्धुवा सी॑द॥३॥

स॒मुद्रो॑ऽसि तेज॑सि श्रि॒तः। अ॒पां प्र॑ति॒ष्ठा। त्वयी॑दम॒न्तः। विश्वं॑ य॒क्षं विश्वं॑ भू॒तं

विश्वं सुभूतम्। विश्वस्य भूर्ता विश्वस्य जनयिता। तं त्वोपदधे कामदुघमक्षितम्।  
प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥४॥

आपः स्थ समुद्रे श्रिताः। पृथिव्याः प्रतिष्ठा युष्मासु। इदमन्तः। विश्वं यक्षं विश्वं  
भूतं विश्वं सुभूतम्। विश्वस्य भूर्त्र्यो विश्वस्य जनयित्र्यः। ता व उपदधे कामदुघा  
अक्षिताः। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥५॥

पृथिव्यस्यप्सु श्रिता। अग्नेः प्रतिष्ठा। त्वयीदमन्तः। विश्वं यक्षं विश्वं भूतं विश्वं  
सुभूतम्। विश्वस्य भूर्त्री विश्वस्य जनयित्री। तां त्वोपदधे कामदुघामक्षिताम्।  
प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥६॥

अग्निरसि पृथिव्याः श्रितः। अन्तरिक्षस्य प्रतिष्ठा। त्वयीदमन्तः। विश्वं यक्षं  
विश्वं भूतं विश्वं सुभूतम्। विश्वस्य भूर्ता विश्वस्य जनयिता। तं त्वोपदधे  
कामदुघमक्षितम्। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥७॥

अ॒न्तरि॑क्षमस्य॒ग्नौ श्रि॒तम्। वा॒योः प्र॑ति॒ष्ठा। त्वयी॑दम॒न्तः। वि॒श्वं य॒क्षं वि॒श्वं भू॑तं  
वि॒श्वं सु॒भूतम्। वि॒श्वस्य॑ भ॒र्तु वि॒श्वस्य॑ जनयि॒तृ। तत्त्वोप॑दधे काम॒दुघ॒मक्षि॑तम्।  
प्र॒जाप॑तिस्त्वा सादयतु। तया॑ दे॒वत॑याऽङ्गि॒र॒स्वद्ध्रु॒वा सी॑द॥८॥

वा॒युर॑स्य॒न्तरि॑क्षे श्रि॒तः। दि॒वः प्र॑ति॒ष्ठा। त्वयी॑दम॒न्तः। वि॒श्वं य॒क्षं वि॒श्वं भू॑तं  
वि॒श्वं सु॒भूतम्। वि॒श्वस्य॑ भ॒र्ता वि॒श्वस्य॑ जनयि॒ता। तं त्वोप॑दधे काम॒दुघ॒मक्षि॑तम्।  
प्र॒जाप॑तिस्त्वा सादयतु। तया॑ दे॒वत॑याऽङ्गि॒र॒स्वद्ध्रु॒वा सी॑द॥९॥

द्यौर॑सि वा॒यौ श्रि॒ता। आ॒दि॒त्यस्य॑ प्र॑ति॒ष्ठा। त्वयी॑दम॒न्तः। वि॒श्वं य॒क्षं  
वि॒श्वं भू॑तं वि॒श्वं सु॒भूतम्। वि॒श्वस्य॑ भ॒र्त्री वि॒श्वस्य॑ जनयि॒त्री। तां त्वोप॑दधे  
काम॒दुघा॒मक्षि॑ताम्। प्र॒जाप॑तिस्त्वा सादयतु। तया॑ दे॒वत॑याऽङ्गि॒र॒स्वद्ध्रु॒वा  
सी॑द॥१०॥

आ॒दि॒त्योऽसि॑ दि॒वि श्रि॒तः। च॒न्द्रम॑सः प्र॑ति॒ष्ठा। त्वयी॑दम॒न्तः। वि॒श्वं य॒क्षं  
वि॒श्वं भू॑तं वि॒श्वं सु॒भूतम्। वि॒श्वस्य॑ भ॒र्ता वि॒श्वस्य॑ जनयि॒ता। तं त्वोप॑दधे



कामदुघमक्षितम्। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥११॥

चन्द्रमा अस्यादित्ये श्रितः। नक्षत्राणां प्रतिष्ठा। त्वयीदमन्तः। विश्वं यक्षं विश्वं भूतं विश्वं सुभूतम्। विश्वस्य भर्ता विश्वस्य जनयिता। तं त्वोपदधे कामदुघमक्षितम्। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥१२॥

नक्षत्राणि स्थ चन्द्रमसि श्रितानि। संवत्सरस्य प्रतिष्ठा युष्मासु। इदमन्तः। विश्वं यक्षं विश्वं भूतं विश्वं सुभूतम्। विश्वस्य भर्तृणि विश्वस्य जनयितृणि। तानि व उपदधे कामदुघान्यक्षितानि। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥१३॥

संवत्सरोऽसि नक्षत्रेषु श्रितः। ऋतूनां प्रतिष्ठा। त्वयीदमन्तः। विश्वं यक्षं विश्वं भूतं विश्वं सुभूतम्। विश्वस्य भर्ता विश्वस्य जनयिता। तं त्वोपदधे कामदुघमक्षितम्। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥१४॥

ऋतवः स्थ संवत्सरे श्रिताः। मासानां प्रतिष्ठा युष्मासु। इदमन्तः। विश्वं यक्षं विश्वं भूतं विश्वं सुभूतम्। विश्वस्य भर्तारो विश्वस्य जनयितारः। तान् व उपदधे कामदुघानक्षितान्। प्रजापतिस्त्वा सादयतु। तया देवतया ऽङ्गिरस्वद्ध्रुवा सीद॥१५॥

मासाः स्थर्तषु श्रिताः। अर्धमासानां प्रतिष्ठा युष्मासु। इदमन्तः। विश्वं यक्षं विश्वं भूतं विश्वं सुभूतम्। विश्वस्य भर्तारो विश्वस्य जनयितारः। तान् व उपदधे कामदुघानक्षितान्। प्रजापतिस्त्वा सादयतु। तया देवतया ऽङ्गिरस्वद्ध्रुवा सीद॥१६॥

अर्धमासाः स्थ मासु श्रिताः। अहोरात्रयोः प्रतिष्ठा युष्मासु। इदमन्तः। विश्वं यक्षं विश्वं भूतं विश्वं सुभूतम्। विश्वस्य भर्तारो विश्वस्य जनयितारः। तान् व उपदधे कामदुघानक्षितान्। प्रजापतिस्त्वा सादयतु। तया देवतया ऽङ्गिरस्वद्ध्रुवा सीद॥१७॥

अहोरात्रे स्थो ऽर्धमासेषु श्रिते। भूतस्य प्रतिष्ठे भव्यस्य प्रतिष्ठे। युवयोरिदमन्तः।

विश्वं यक्षं विश्वं भूतं विश्वं सुभूतम्। विश्वस्य भूर्त्यो विश्वस्य जनयित्र्यौ। ते वामुपदधे कामदुघे अक्षिते। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥१८॥

पौर्णमास्यष्टकाऽमावास्या। अन्नादाः स्थान्नादुघो युष्मासु। इदमन्तः। विश्वं यक्षं विश्वं भूतं विश्वं सुभूतम्। विश्वस्य भूर्त्यो विश्वस्य जनयित्र्यः। ता वामुपदधे कामदुघा अक्षिताः। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥१९॥

राडसि बृहती श्रीरसीन्द्रपत्नी धर्मपत्नी। विश्वं भूतमनुप्रभूता। त्वयीदमन्तः। विश्वं यक्षं विश्वं भूतं विश्वं सुभूतम्। विश्वस्य भूर्त्री विश्वस्य जनयित्री। तां त्वोपदधे कामदुघामक्षिताम्। प्रजापतिस्त्वा सादयतु। तया देवतयाऽङ्गिरस्वद्ध्रुवा सीद॥२०॥

ओजोऽसि सहोऽसि। बलमसि भ्राजोऽसि। देवानां धामामृतम्।

अमर्त्यस्तपोजाः। त्वयीदमन्तः। विश्वं यक्षं विश्वं भूतं विश्वं सुभूतम्।  
विश्वस्य भर्ता विश्वस्य जनयिता। तं त्वोपदधे कामदुघमक्षितम्। प्रजापतिस्त्वा  
सादयतु। तथा देवतयाऽङ्गिरस्वद्ध्रुवा सीद॥ २१॥ —————[१]

त्वमग्ने रुद्रो असुरो महो दिवः। त्वं शर्धो मारुतं पृक्ष ईशिषे। त्वं  
वातैररुणैर्यासि शङ्गयः। त्वं पूषा विधतः पांसि नु त्मना। देवा देवेषु श्रयध्वम्।  
प्रथमा द्वितीयेषु श्रयध्वम्। द्वितीयास्तृतीयेषु श्रयध्वम्। तृतीयाश्चतुर्थेषु श्रयध्वम्।  
चतुर्थाः पञ्चमेषु श्रयध्वम्। पञ्चमाः षष्ठेषु श्रयध्वम्॥ २२॥

षष्ठाः सप्तमेषु श्रयध्वम्। सप्तमा अष्टमेषु श्रयध्वम्। अष्टमा नवमेषु श्रयध्वम्।  
नवमा दशमेषु श्रयध्वम्। दशमा एकादशेषु श्रयध्वम्। एकादशा द्वादशेषु श्रयध्वम्।  
द्वादशात्रयोदशेषु श्रयध्वम्। त्रयोदशाश्चतुर्दशेषु श्रयध्वम्। चतुर्दशाः पञ्चदशेषु  
श्रयध्वम्। पञ्चदशाः षोडशेषु श्रयध्वम्॥ २३॥

षोडशाः सप्तदशेषु श्रयध्वम्। सप्तदशा अष्टादशेषु श्रयध्वम्। अष्टादशा

एकान्नविंशेषु श्रयध्वम्। एकान्नविंशा विंशेषु श्रयध्वम्। विंशा एकविंशेषु श्रयध्वम्। एकविंशा द्वाविंशेषु श्रयध्वम्। द्वाविंशास्त्रयोविंशेषु श्रयध्वम्। त्रयोविंशाश्चतुर्विंशेषु श्रयध्वम्। चतुर्विंशाः पञ्चविंशेषु श्रयध्वम्। पञ्चविंशाः षड्विंशेषु श्रयध्वम्॥ २४॥

षड्विंशाः सप्तविंशेषु श्रयध्वम्। सप्तविंशा अष्टाविंशेषु श्रयध्वम्। अष्टाविंशा एकान्नत्रिंशेषु श्रयध्वम्। एकान्नत्रिंशास्त्रिंशेषु श्रयध्वम्। त्रिंशा एकत्रिंशेषु श्रयध्वम्। एकत्रिंशा द्वात्रिंशेषु श्रयध्वम्। द्वात्रिंशास्त्रयस्त्रिंशेषु श्रयध्वम्। देवास्त्रिरेकादशास्त्रिंशस्त्रयस्त्रिंशाः। उत्तरे भवता। उत्तरवर्त्मान् उत्तरसत्त्वानः। यत्काम इदं जुहोमि। तन्मे समृध्यताम्। वयं स्याम पतयो रयीणाम्। भूर्भुवः स्वः स्वाहा॥ २५॥ [२]

अग्नाविष्णू सजोषसा। इमा वर्धन्तु वां गिरः। द्युमैर्वाजेभिरागतम्। राज्ञी विराज्ञी। सम्राज्ञी स्वराज्ञी। अर्चिः शोचिः। तपो हरो भाः। अग्निः सोमो बृहस्पतिः। विश्वे देवा भुवनस्य गोपाः। ते सर्वे सङ्गत्य। इदं मे प्रावता वचः। वयं स्याम

पत॑यो रयी॒णाम्। भूर्भुवः॑ स्वः॑ स्वाहा॑॥२६॥ \_\_\_\_\_[३]

अन्न॑प॒तेऽन्न॑स्य नो देहि। अ॒न॒मी॒वस्य॑ शु॒ष्मिणः॑। प्र प्र॑दा॒तारं॑ तारिषः। ऊ॒र्जं नो॑  
धेहि॑ द्वि॒पदे॑ चतु॑ष्पदे। अ॒ग्ने पृथि॑वीपते। सोमं॑ वीरुधां पते। त्वष्टः॑ समिधां पते।  
विष्ण॑वाशानां पते। मि॒त्रं स॒त्यानां॑ पते। वरु॑ण धर्मणां पते॥२७॥

म॒रुतो॑ ग॒णानां॑ पतयः। रु॒द्रं प॒शूनां॑ पते। इन्द्रो॑जसां पते। बृह॑स्पते ब्रह्मणस्पते।  
आ रु॒चा रो॑चेऽह॑ꣳ स्वयम्। रु॒चा रु॑रुचे रोच॑मानः। अ॒तीत्या॑दः स्व॑राभ॒रेह॑। तस्मिन्  
यो॒नौ प्र॒ज॒नौ प्र॒जाये॑य। व॒यꣳ स्या॑म॒ पत॑यो रयी॒णाम्। भूर्भुवः॑ स्वः॑ स्वाहा॑॥२८॥  
\_\_\_\_\_ [४]

स॒प्त ते॑ अ॒ग्ने स॒मिधः॑ स॒प्त जि॒ह्वाः। स॒प्त र्ष॑यः स॒प्त धामं॑ प्रि॒याणि॑। स॒प्त हो॒त्रा  
अनु॑वि॒द्वान्। स॒प्त योनी॑रा॒पृण॑स्वा घृ॒तेन॑। प्राची॑ दिक्। अ॒ग्निर्दे॒वता॑। अ॒ग्निꣳ स  
दि॒शां दे॒वं दे॒वता॑नामृच्छतु। यो मै॒तस्यै॑ दि॒शोऽभि॒दास॑ति। द॒क्षिणा॑ दिक्। इन्द्रो॑  
दे॒वता॑॥२९॥

इन्द्र॑ꣳ स दि॒शां दे॒वं दे॒वता॑नामृच्छतु। यो मै॒तस्यै॑ दि॒शोऽभि॒दास॑ति। प्र॒तीची॑

दिक्। सोमो देवता। सोमः स दिशां देवं देवतानामृच्छतु। यो मैतस्यै दिशोऽभिदासति। उदीची दिक्। मित्रावरुणौ देवता। मित्रावरुणौ स दिशां देवौ देवतानामृच्छतु। यो मैतस्यै दिशोऽभिदासति॥३०॥

ऊर्ध्वा दिक्। बृहस्पतिर्देवता। बृहस्पतिः स दिशां देवं देवतानामृच्छतु। यो मैतस्यै दिशोऽभिदासति। इयं दिक्। अदितिर्देवता। अदितिः स दिशां देवीं देवतानामृच्छतु। यो मैतस्यै दिशोऽभिदासति। पुरुषो दिक्। पुरुषो मे कामान्त्समर्धयतु॥३१॥

अन्धो जागृविः प्राण। असावेहि। बधिर आक्रन्दयितरपान। असावेहि। उषसमुषसमशीय। अहमसो ज्योतिरशीय। अहमसोऽपोऽशीय। वयः स्याम पतयो रयीणाम्। भूर्भुवः स्वः स्वाहा॥३२॥ [५]

यत्तेऽचितं यदु चितं ते अग्ने। यत् ऊनं यदु तेऽतिरिक्तम्। आदित्यास्तदङ्गिरसश्चिन् विश्वे ते देवाश्चितिमापूरयन्तु। चितश्चासि सञ्चितश्चास्यग्ने। एतावाश्चासि भूयाश्चास्यग्ने। लोकं पृणच्छिद्रं पृण। अथो सीद शिवा त्वम्। इन्द्राग्नी त्वा

बृहस्पतिः। अस्मिन् योनावसीषदन्॥३३॥

तया देवतयाऽङ्गिरस्वद्ध्रुवा सीद। ता अस्य सूददोहसः। सोमः श्रीणन्ति  
पृश्नयः। जन्म देवानां विशः। त्रिष्वा रोचने दिवः। तया देवतयाऽङ्गिरस्वद्ध्रुवा  
सीद। अग्रे देवाः इहाऽऽवह। जज्ञानो वृक्तबर्हिषे। असि होता न ईड्यः।  
अगन्म मुहा मनसा यविष्ठम्॥३४॥

यो दीदाय समिद्ध स्वे दुरोणे। चित्रभानू रोदसी अन्तरुर्वी। स्वाहुतं विश्वतः  
प्रत्यश्चम्। मेधाकारं विदथस्य प्रसाधनम्। अग्निः होतारं परिभूतमं मतिम्।  
त्वामर्भस्य हविषः समानमित्। त्वां मुहो वृणते नरो नान्यं त्वत्। मनुष्वत्त्वा  
निधीमहि। मनुष्वत्समिधीमहि। अग्रे मनुष्वदङ्गिरः॥३५॥

देवान्देवायते यज। अग्निर्हि वाजिनं विशे। ददाति विश्वचर्षणिः। अग्नी राये  
स्वाभुवम्। स प्रीतो याति वार्यम्। इषः स्तोतृभ्य आभर। पृष्ठो दिवि पृष्ठो अग्निः  
पृथिव्याम्। पृष्ठो विश्वा ओषधीराविवेश। वैश्वानरः सहसा पृष्ठो अग्निः। स नो



दिवा॒ स रि॒षः पा॑तु नक्तम्॥३६॥ \_\_\_\_\_[६]

अयं॑ वाव॒ यः पव॑ते। सोऽग्नि॑र्नाचि॒केतः॑। स यत्प्राङ् पव॑ते। तद॑स्य शिरः॑। अथ॒ यदक्षि॑णा। स दक्षि॑णः प॒क्षः। अथ॒ यत्प्र॒त्यक्। तत्पु॒च्छम्। यदुदङ्। स उत्त॑रः प॒क्षः॥३७॥

अथ॒ यथ्सं॑वाति। तद॑स्य सु॒मञ्च॑नं च प्र॒सार॑णं च। अथो॑ सम्पदे॒वास्य॑ सा। स॒ ह वा अ॑स्मै स का॒मः प॒द्यते॑। यत्का॑मो यज॑ते। योऽग्निं॑ नाचि॒केतं॑ चि॒नुते॑। य उ॑ चैनमे॒वं वेद॑। यो ह॒ वा अ॒ग्नेर्नाचि॑के॒तस्या॒ऽऽय॑तनं प्रति॒ष्ठां वेद॑। आ॒य॑तनवान्भवति। गच्छ॑ति प्रति॒ष्ठाम्॥३८॥

हिर॑ण्यं वा अ॒ग्नेर्नाचि॑के॒तस्या॒ऽऽय॑तनं प्रति॒ष्ठा। य ए॒वं वेद॑। आ॒य॑तनवान्भवति। गच्छ॑ति प्रति॒ष्ठाम्। यो ह॒ वा अ॒ग्नेर्नाचि॑के॒तस्य॒ शरी॑रं वेद॑। सश॑रीर ए॒व स्व॑र्गं लो॒कमे॑ति। हिर॑ण्यं वा अ॒ग्नेर्नाचि॑के॒तस्य॒ शरी॑रम्। य ए॒वं वेद॑। सश॑रीर ए॒व स्व॑र्गं लो॒कमे॑ति। अथो॑ यथा॑ रु॒क्म उत्त॑प्तो भा॒य्यात्॥३९॥

ए॒वमे॒व स तेज॑सा॒ यश॑सा। अ॒स्मि॒श्च॑ लो॒केऽमु॑ष्मि॒श्च॑ भाति। उ॒रवो॑ ह॒  
वै नामै॒ते लो॒काः। येऽव॑रेणाऽऽदि॒त्यम्। अथ॑ है॒ते वरी॑या॒सो लो॒काः। ये  
परे॑णाऽऽदि॒त्यम्। अन्त॑वन्त॒ ह॒ वा ए॒ष क्ष॑य्यं लो॒कं ज॑यति। योऽव॑रेणाऽऽदि॒त्यम्।  
अथ॑ है॒षोऽन॑न्तम॒पार॑मक्ष॒य्यं लो॒कं ज॑यति। यः परे॑णाऽऽदि॒त्यम्॥४०॥

अ॒न॒न्त॒ ह॒ वा अ॒पार॑मक्ष॒य्यं लो॒कं ज॑यति। योऽग्निं॑ ना॒चिके॒तं चि॑नुते। य उ॑  
चैनमे॒वं वेद॑। अथो॒ यथा॒ रथे॒ तिष्ठ॑न्पक्ष॑सी पर्या॒वर्त॑माने प्र॒त्यपे॑क्षते। ए॒वम॑होरा॒त्रे  
प्र॒त्यपे॑क्षते। नास्या॑होरा॒त्रे लो॒कमा॑प्नुतः। योऽग्निं॑ ना॒चिके॒तं चि॑नुते। य उ॑ चैनमे॒वं  
वेद॑॥४१॥

[७]

उ॒शन् ह॒ वै वा॑जश्रव॒सः स॑र्ववे॒दसं॑ द॒दौ। तस्य॑ ह॒ नचि॑केता॒ नाम॑ पु॒त्र आ॑स।  
त॒ ह॒ कुमा॑र॒ सन्त॑म॒। दक्षि॑णासु नी॒यमा॑नासु श्र॒द्धाऽऽवि॑वेश। स हो॒वाच।  
तत् क॑स्मै॒ मां दा॑स्य॒सीति॑। द्वि॒तीयं॑ तृ॒तीय॑म्। त॒ ह॒ परी॑त उवाच। मृ॒त्यवे॑ त्वा  
ददा॑मीति॑। त॒ ह॒ स्मोत्थि॑तं वाग॒भिव॑दति॥४२॥

गौतम कुमरमिति। स होवाच। परेहि मृत्योर्गृहान्। मृत्यवे वै त्वाऽदामिति।  
तं वै प्रवसन्तं गन्तासीति होवाच। तस्य स्म तिस्रो रात्रीरनाश्वान्गृहे वसतात्।  
स यदि त्वा पृच्छेत्। कुमार कति रात्रीरवात्सीरिति। तिस्र इति प्रतिब्रूतात्। किं  
प्रथमाः रात्रिमाश्रा इति॥४३॥

प्रजां त इति। किं द्वितीयामिति। पशूःस्त इति। किं तृतीयामिति। साधुकृत्यां  
त इति। तं वै प्रवसन्तं जगाम। तस्य ह तिस्रो रात्रीरनाश्वान्गृहे उवास। तमागत्य  
पप्रच्छ। कुमार कति रात्रीरवात्सीरिति। तिस्र इति प्रत्युवाच॥४४॥

किं प्रथमाः रात्रिमाश्रा इति। प्रजां त इति। किं द्वितीयामिति। पशूःस्त  
इति। किं तृतीयामिति। साधुकृत्यां त इति। नमस्ते अस्तु भगव इति होवाच।  
वरं वृणीष्वेति। पितरमेव जीवन्नयानीति। द्वितीयं वृणीष्वेति॥४५॥

इष्टापूर्तयोर्मेऽक्षितिं ब्रूहीति होवाच। तस्मै हैतमग्निं नाचिकेतमुवाच। ततो  
वै तस्येष्टापूर्ते ना क्षीयेते। नास्येष्टापूर्ते क्षीयेते। योऽग्निं नाचिकेतं चिनुते। य उ

चैनमे॒वं वेद॑। तृ॒तीयं॑ वृणी॒ष्वेति॑। पुन॒र्मृत्यो॑र्मेऽप॑चि॒तिं ब्रू॑हीति॑ होवाच। तस्मै॑ है॒तम॒ग्निं  
ना॑चि॒केत॑मु॒वाच। ततो॒ वै सोऽप॑ पुन॒र्मृत्यु॑म॒जयत्॥४६॥

अप॑ पुन॒र्मृत्युं॑ ज॒यति॑। योऽ॒ग्निं ना॑चि॒केतं॑ चि॒नुते॑। य उ॑ चैनमे॒वं वेद॑। प्र॒जाप॑ति॒र्वै  
प्र॒जाका॑म॒स्तपो॑ऽत॒प्यत॑। स हि॒रण्य॑मुदा॑स्यत्। तद॒ग्नौ प्रा॑स्यत्। तद॑स्मै॒ नाच्छ॑दयत्।  
तद्वि॒तीयं॑ प्रा॒स्यत्। तद॑स्मै॒ नैवाच्छ॑दयत्। तत्तृ॒तीयं॑ प्रा॒स्यत्॥४७॥

तद॑स्मै॒ नैवाच्छ॑दयत्। तदा॒त्मन्ने॒व हृद॑य्येऽ॒ग्नौ वै॑श्वान॒रे प्रा॑स्यत्। तद॑स्मा  
अच्छ॑दयत्। तस्मा॒द्धि॒रण्यं॑ कनि॑ष्ठं॒ धना॑नाम्। भु॒ञ्ज॒त्प्रि॒यत॑मम्। हृद॑य॒जꣳ हि॑।  
स वै तमे॒व ना॑विन्दत्। यस्मै॒ तां दक्षि॑णा॒मनै॑ष्यत्। ताꣳ स्वा॒यैव॑ ह॒स्ताय॑  
दक्षि॑णा॒यान॑यत्। तां प्र॒त्य॑गृह्णात्॥४८॥

दक्षाय॑ त्वा॒ दक्षि॑णां॒ प्रति॑गृह्णा॒मीति॑। सोऽदक्ष॑त् दक्षि॑णां॒ प्रति॑गृह्य॑। दक्ष॑ते  
ह॒ वै दक्षि॑णां॒ प्रति॑गृह्य॑। य ए॒वं वेद॑। ए॒तद्ध॑ स्म॒ वै तद्वि॒द्वाꣳसो॑ वाज॒श्रव॑सा  
गोत॑माः। अप्य॑नू॒देश्या॑ दक्षि॑णां॒ प्रति॑गृह्णन्ति॑। उ॒भये॑न व॒यं दक्षि॑ष्याम॒ह ए॒व दक्षि॑णां

प्रतिगृह्येति। तेऽदक्षन्तु दक्षिणां प्रतिगृह्य। दक्षते ह वै दक्षिणां प्रतिगृह्य। य एवं वेद। प्र हान्यं व्रीणाति॥४९॥ \_\_\_\_\_[८]

त९ हैतमेकं पशुबन्ध एवोत्तरवेद्यां चिन्वते। उत्तरवेदिसंमित एषोऽग्निरिति वदन्तः। तन्न तथा कुर्यात्। एतमग्निं कामेन व्यर्धयेत्। स एनं कामेन व्यृद्धः। कामेन व्यर्धयेत्। सौम्ये वावैनमध्वरे चिन्वीत। यत्र वा भूयिष्ठा आहुतयो हूयेरन्। एतमग्निं कामेन समर्धयति। स एनं कामेन समृद्धः॥५०॥

कामेन समर्धयति। अथ हैनं पुरर्षयः। उत्तरवेद्यामेव सत्रियमचिन्वत। ततो वै तेऽविन्दन्त प्रजाम्। अभि स्वर्गं लोकमजयन्। विन्दत एव प्रजाम्। अभि स्वर्गं लोकं जयति। योऽग्निं नाचिकेतं चिनुते। य उ चैनमेवं वेद। अथ हैनं वायुर्ऋद्धिकामः॥५१॥

यथान्युत्तमेवोपदधे। ततो वै स एतामृद्धिमार्धोत्। यामिदं वायुर्ऋद्धः। एतामृद्धिमृध्नोति। यामिदं वायुर्ऋद्धः। योऽग्निं नाचिकेतं चिनुते। य उ चैनमेवं

वेदं। अथ हैनं गोबलो वार्षाः पशुकामः। पाङ्कमेव चिक्ये। पञ्च पुरस्तात्॥५२॥

पञ्च दक्षिणतः। पञ्च पश्चात्। पञ्चोत्तरतः। एकां मध्ये। ततो वै स सहस्रं पशून्प्राप्नोत्। प्र सहस्रं पशूनाप्नोति। योऽग्निं नाचिकेतं चिनुते। य उ चैनमेवं वेदं। अथ हैनं प्रजापतिर्ज्यैष्ठ्यकामो यशस्कामः प्रजननकामः। त्रिवृतमेव चिक्ये॥५३॥

सप्त पुरस्तात्। तिस्रो दक्षिणतः। सप्त पश्चात्। तिस्र उत्तरतः। एकां मध्ये। ततो वै स प्र यशो ज्यैष्ठ्यमाप्नोत्। एतां प्रजातिं प्राजायत। यामिदं प्रजाः प्रजायन्ते। त्रिवृद्वै ज्यैष्ठ्यम्। माता पिता पुत्रः॥५४॥

त्रिवृत्प्रजननम्। उपस्थो योनिर्मध्यमा। प्र यशो ज्यैष्ठ्यमाप्नोति। एतां प्रजातिं प्राजायते। यामिदं प्रजाः प्रजायन्ते। योऽग्निं नाचिकेतं चिनुते। य उ चैनमेवं वेदं। अथ हैनमिन्द्रो ज्यैष्ठ्यकामः। ऊर्ध्वा एवोपदधे। ततो वै स ज्यैष्ठ्यमगच्छत्॥५५॥

ज्यैष्ठ्यं गच्छति। योऽग्निं नाचिकेतं चिनुते। य उ चैनमेवं वेदं। अथ हैनमसावादित्यः स्वर्गकामः। प्राचीरेवोपदधे। ततो वै सोऽभि स्वर्गं लोकमजयत्।

अ॒भि स्व॒र्गं लो॒कं ज॑यति। योऽ॒ग्निं ना॑चि॒केतं चि॑नुते। य उ॑ चैनमे॒वं वेद॑। स  
यदी॒च्छेत्॥५६॥

ते॒ज॒स्वी य॑श॒स्वी ब्र॑ह्मव॒र्चसी॑ स्या॒मिति॑। प्रा॒डाहो॑तु॒र्धिष्ण्या॑दु॒थ्सर्पे॑त्। येयं  
प्रा॒गाद्य॑श॒स्वती॑। सा मा॒ प्रोर्णो॑तु। तेज॑सा यश॑सा ब्रह्मव॒र्चसे॑नेति॑। ते॒ज॒स्व्यैव  
य॑श॒स्वी ब्र॑ह्मव॒र्चसी॑ भ॒वति॑। अथ॒ यदी॒च्छेत्। भूयि॑ष्ठं मे श्रद्ध॑धीरन्। भूयि॑ष्ठा  
दक्षि॑णा नयेयु॒रिति॑। दक्षि॑णासु नी॒यमा॑नासु प्रा॒च्येहि॑ प्रा॒च्येही॑ति प्राचीं जुषा॒णा  
वेत्वाऽऽज्य॑स्य॒ स्वाहे॑ति॒ स्रुवे॑णो॒पह॑त्याऽऽह॒वनीये॑ जुहुयात्॥५७॥

भूयि॑ष्ठमे॒वास्मै॑ श्रद्ध॑धते। भूयि॑ष्ठा दक्षि॑णा नयन्ति। पुरी॑षमु॒पधा॑य।  
चि॒तिक्लृ॑प्तिभि॒रभि॑मृश्य। अ॒ग्निं प्र॒णीयो॑पसमा॒धाय॑। चत॑स्र ए॒ता आहु॑तीर्जुहोति।  
त्वम॑ग्रे रु॒द्र इति॑ शतरु॒द्रीय॑स्य रू॒पम्। अ॒ग्नावि॑ष्णू इति॑ वसो॒र्धारा॑याः। अन्न॑पत्  
इत्य॑न्नहोमः। स॒प्त ते॑ अ॒ग्रे स॒मिधः॑ स॒प्त जि॒ह्वा इति॑ विश्व॒प्रीः॥५८॥ ———[९]

यां प्र॒थमा॑मिष्ट॒कामु॑प॒दधा॑ति। इ॒मं तया॑ लो॒कम॑भिज॑यति। अथो॒ या अ॒स्मिँल्लो॑के  
दे॒वताः॑। तासा॒ं सायु॑ज्यं सलो॒कता॑माप्नोति। यां द्वि॒तीया॑मु॒पदधा॑ति।

अ॒न्तरि॒क्षलो॒कं तया॑ऽभिज॑यति। अथो॒ या अ॑न्तरि॒क्षलो॒के दे॒वताः॑।  
तासा॑ꣳ सायु॑ज्यꣳ सलो॒कता॑माप्नोति। यां तृतीया॑मुप॒दधा॑ति। अ॒मुं तया॑  
लो॒कम॒भिज॑यति॥५९॥

अथो॒ या अ॒मुष्मि॑ल्लो॒के दे॒वताः॑। तासा॑ꣳ सायु॑ज्यꣳ सलो॒कता॑माप्नोति। अथो॒  
या अ॒मूरि॑तरा अ॒ष्टाद॑श। य ए॒वामी॑ उ॒रव॑श्च वरी॑याꣳसश्च लो॒काः। ताने॒व  
ताभि॑र॒भिज॑यति॥ का॒मचा॑रो ह॒ वा अ॑स्यो॒रुषु॑ च॒ वरी॑यःसु च लो॒केषु॑ भवति।  
योऽग्निं॑ ना॒चिके॒तं चि॑नुते। य उ॑ चैनमे॒वं वेद॑। स॒व॒त्स॒रो वा अ॒ग्निर्ना॑चिके॒तः।  
तस्य॑ वस॒न्तः शि॑रः॥६०॥

ग्री॒ष्मो दक्षि॑णः प॒क्षः। व॒रु॒षा उत्त॑रः। श॒रत्पु॑च्छम्। मासाः॑ कर्मका॒राः। अ॒होरा॒त्रे  
श॑तरु॒द्रीय॑म्। प॒र्जन्यो॑ वसो॒र्धारा॑। यथा॒ वै प॒र्जन्यः॑ सुवृ॑ष्टं वृ॒ष्ट्वा। प्र॒जाभ्यः॑  
सर्वा॑न्कामा॒न्त्सम्पू॑रयति। ए॒वमे॒व स तस्य॑ सर्वा॑न्कामा॒न्त्सम्पू॑रयति। योऽग्निं॑  
ना॒चिके॒तं चि॑नुते॥६१॥



य उ चैनमेवं वेद। संवत्सरो वा अग्निर्नाचिकेतः। तस्य वसन्तः शिरः। ग्रीष्मो दक्षिणः पक्षः। वरुषाः पुच्छम्। शरदुत्तरः पक्षः। हेमन्तो मध्यम्। पूर्वपक्षाश्चितयः। अपरपक्षाः पुरीषम्। अहोरात्राणीष्टकाः। एष वाव सौऽग्निरग्निमयः पुनर्णवः। अग्निमयो ह वै पुनर्णवो भूत्वा। स्वर्गं लोकमेति। आदित्यस्य सायुज्यम्। योऽग्निं नाचिकेतं चिनुते। य उ चैनमेवं वेद॥६२॥ \_\_\_\_\_[१०]

॥इति कृष्णयजुर्वेदीयतैत्तिरीयकाठके द्वितीयः प्रश्नः समाप्तः॥२॥

॥तृतीयः प्रश्नः॥

तुभ्यं ता अङ्गिरस्तमाऽश्याम तं काममग्ने। आशानां त्वा विश्वा आशाः। अनु नोऽद्यानुमतिरन्विदनुमते त्वम्। कामो भूतस्य कामस्तदग्ने। ब्रह्म जज्ञानं पिता विराजाम्। यज्ञो रायोऽयं यज्ञः। आपो भद्रा आदित्यंश्यामि। तुभ्यं भरन्ति यो देह्यः। पूर्वं देवा अपरेण प्राणापानौ। हव्यवाहुः स्विष्टम्॥१॥ \_\_\_\_\_[१]

देवेभ्यो वै स्वर्गो लोकस्तिरोऽभवत्। ते प्रजापतिमब्रुवन्। प्रजापते स्वर्गो

वै नो लो॒कस्ति॒रोऽभूत्। तमन्वि॒च्छेति॑। तं य॒ज्ञक्र॒तुभि॒रन्वै॑च्छत्। तं य॒ज्ञ-  
क्र॒तुभि॒र्नान्व॑विन्दत्। तमिष्टि॑भि॒रन्वै॑च्छत्। तमिष्टि॑भि॒रन्व॑विन्दत्। तदिष्टी॑नामिष्टि-  
त्वम्। एष्ट॑यो ह॒ वै नाम॑। ता इष्ट॑य॒ इत्याच॑क्षते प॒रोक्षे॑ण। प॒रोक्ष॑प्रिया इव॒ हि  
दे॒वाः॥ २॥

तमाशा॑ऽब्रवीत्। प्रजा॑पत आ॒शया॒ वै श्रा॑म्यसि। अ॒हमु॒ वा आशा॑ऽस्मि। मां  
नु य॒जस्व। अथ॑ ते स॒त्याऽऽशा॑ भविष्यति। अनु॑ स्व॒र्गं लो॒कं वे॒थ्स्यसीति॑।  
स ए॒तम॒ग्नये॒ कामा॑य॒ पुरो॒डाश॑म॒ष्टाक॑पा॒लं निर॑वपत्। आ॒शायै॑ च॒रुम्। अनु॑म॒त्यै  
च॒रुम्। ततो॒ वै तस्य॑ स॒त्याऽऽशा॑ऽभवत्। अनु॑ स्व॒र्गं लो॒कम॑विन्दत्। स॒त्या ह॒  
वा अ॒स्याऽऽशा॑ भवति। अनु॑ स्व॒र्गं लो॒कं वि॑न्दति। य ए॒तेन॑ ह॒विषा॒ यज॑ते। य  
उ॒ चैन॑दे॒वं वेद॑। सोऽत्र॑ जुहोति। अ॒ग्नये॒ कामा॑य॒ स्वाहा॑ऽऽशायै॒ स्वाहा॑। अनु॑म॒त्यै  
स्वाहा॑ प्र॒जाप॑तये॒ स्वाहा॑। स्व॒र्गाय॑ लो॒काय॒ स्वाहा॑ऽग्नये॑ स्विष्ट॒कृते॒ स्वाहेति॑॥ ३॥

तं कामो॑ऽब्रवीत्। प्रजा॑पते॒ कामे॑न॒ वै श्रा॑म्यसि। अ॒हमु॒ वै कामो॑ऽस्मि। मां  
नु य॒जस्व। अथ॑ ते स॒त्यः कामो॑ भविष्यति। अनु॑ स्व॒र्गं लो॒कं वे॒थ्स्यसीति॑।

स ए॒तम॒ग्नये॒ कामा॑य॒ पुरो॒डाश॑म॒ष्टाक॑पालं॒ निर॑वपत्। कामा॑य च॒रुम्। अनु॑म॒त्यै च॒रुम्। ततो॒ वै तस्य॑ स॒त्यः कामो॑ऽभवत्। अनु॑ स्व॒र्गं लो॒कम॑विन्दत्। स॒त्यो ह॒ वा अ॑स्य॒ कामो॑ भवति। अनु॑ स्व॒र्गं लो॒कं वि॑न्दति। य ए॒तेन॑ ह॒विषा॒ यज॑ते। य उ॑ चैनदे॒वं वेद॑। सोऽत्र॑ जुहोति। अ॒ग्नये॒ कामा॑य॒ स्वाहा॒ कामा॑य॒ स्वाहा॑। अनु॑म॒त्यै स्वाहा॑ प्र॒जाप॑तये॒ स्वाहा॑। स्व॒र्गाय॑ लो॒काय॒ स्वाहा॒ऽग्नये॑ स्विष्ट॒कृते॒ स्वाहेति॑॥४॥

तं ब्रह्मा॑ऽब्रवीत्। प्रजा॑पते॒ ब्रह्म॑णा॒ वै श्राम्य॑सि। अ॒हमु॒ वै ब्रह्मा॑ऽस्मि। मां नु॒ यज॑स्व। अथ॑ ते ब्रह्म॑ण्वान् य॒ज्ञो भ॑विष्यति। अनु॑ स्व॒र्गं लो॒कं वे॒त्स्यसी॑ति। स ए॒तम॒ग्नये॒ कामा॑य॒ पुरो॒डाश॑म॒ष्टाक॑पालं॒ निर॑वपत्। ब्रह्म॑णे च॒रुम्। अनु॑म॒त्यै च॒रुम्। ततो॒ वै तस्य॑ ब्रह्म॑ण्वान् य॒ज्ञोऽभवत्। अनु॑ स्व॒र्गं लो॒कम॑विन्दत्। ब्रह्म॑ण्वान् ह॒ वा अ॑स्य य॒ज्ञो भ॑वति। अनु॑ स्व॒र्गं लो॒कं वि॑न्दति। य ए॒तेन॑ ह॒विषा॒ यज॑ते। य उ॑ चैनदे॒वं वेद॑। सोऽत्र॑ जुहोति। अ॒ग्नये॒ कामा॑य॒ स्वाहा॒ ब्रह्म॑णे॒ स्वाहा॑। अनु॑म॒त्यै स्वाहा॑ प्र॒जाप॑तये॒ स्वाहा॑। स्व॒र्गाय॑ लो॒काय॒ स्वाहा॒ऽग्नये॑ स्विष्ट॒कृते॒ स्वाहेति॑॥५॥

तं य॒ज्ञोऽब्र॑वीत्। प्रजा॑पते य॒ज्ञेन॒ वै श्राम्य॑सि। अ॒हमु॒ वै य॒ज्ञोऽस्मि॑। मां नु॒

यजस्व। अथ ते सत्यो यज्ञो भविष्यति। अनुं स्वर्गं लोकं वेत्स्यसीति। स एतमग्नये कामाय पुरोडाशमष्टाकपालं निरवपत्। यज्ञाय चरुम्। अनुमत्यै चरुम्। ततो वै तस्य सत्यो यज्ञोऽभवत्। अनुं स्वर्गं लोकमविन्दत्। सत्यो ह वा अस्य यज्ञो भवति। अनुं स्वर्गं लोकं विन्दति। य एतेन हविषा यजते। य उ चैनदेवं वेद। सोऽत्र जुहोति। अग्नये कामाय स्वाहा यज्ञाय स्वाहा। अनुमत्यै स्वाहा प्रजापतये स्वाहा। स्वर्गाय लोकाय स्वाहाऽग्नये स्विष्टकृते स्वाहेति॥६॥

तमापोऽब्रुवन्। प्रजापतेऽप्सु वै सर्वे कामाः श्रिताः। वयमु वा आपः स्मः। अस्मान्नु यजस्व। अथ त्वयि सर्वे कामाः श्रयिष्यन्ते। अनुं स्वर्गं लोकं वेत्स्यसीति। स एतमग्नये कामाय पुरोडाशमष्टाकपालं निरवपत्। अद्ध्यश्चरुम्। अनुमत्यै चरुम्। ततो वै तस्मिन्सर्वे कामा अश्रयन्त। अनुं स्वर्गं लोकमविन्दत्। सर्वे ह वा अस्मिन्कामाः श्रयन्ते। अनुं स्वर्गं लोकं विन्दति। य एतेन हविषा यजते। य उ चैनदेवं वेद। सोऽत्र जुहोति। अग्नये कामाय स्वाहाऽद्ध्यः स्वाहा। अनुमत्यै स्वाहा प्रजापतये स्वाहा। स्वर्गाय लोकाय स्वाहाऽग्नये स्विष्टकृते स्वाहेति॥७॥

तमग्निर्बलिमानंब्रवीत्। प्रजापतेऽग्नये वै बलिमते सर्वाणि भूतानि बलिं  
हरन्ति। अहमु वा अग्निर्बलिमानंस्मि। मां नु यजस्व। अथ ते सर्वाणि भूतानि  
बलिं हरिष्यन्ति। अनुं स्वर्गं लोकं वेत्स्यसीति। स एतमग्नये कामाय  
पुरोडाशमष्टाकपालं निरवपत्। अग्नये बलिमते चरुम्। अनुमत्यै चरुम्। ततो वै  
तस्मै सर्वाणि भूतानि बलिमहरन्। अनुं स्वर्गं लोकमविन्दत्। सर्वाणि ह वा  
अस्मै भूतानि बलिं हरन्ति। अनुं स्वर्गं लोकं विन्दति। य एतेन हविषा यजते।  
य उ चैनदेवं वेद। सोऽत्र जुहोति। अग्नये कामाय स्वाहाऽग्नये बलिमते स्वाहा।  
अनुमत्यै स्वाहा प्रजापतये स्वाहा। स्वर्गाय लोकाय स्वाहाऽग्नये स्विष्टकृते  
स्वाहेति॥८॥

तमनुवित्तिरब्रवीत्। प्रजापते स्वर्गं वै लोकमनुविविथ्ससि। अहमु वा  
अनुवित्तिरस्मि। मां नु यजस्व। अथ ते सत्याऽनुवित्तिर्भविष्यति। अनुं स्वर्गं  
लोकं वेत्स्यसीति। स एतमग्नये कामाय पुरोडाशमष्टाकपालं निरवपत्।

अनुवित्त्यै चरुम्। अनुमत्यै चरुम्। ततो वै तस्य सत्याऽनुवित्तिरभवत्। अनु  
स्वर्गं लोकमविन्दत्। सत्या ह वा अस्यानुवित्तिर्भवति। अनु स्वर्गं लोकं विन्दति।  
य एतेन हविषा यजते। य उ चैनदेवं वेद। सोऽत्र जुहोति। अग्नये कामाय  
स्वाहाऽनुवित्त्यै स्वाहा॥ अनुमत्यै स्वाहा॥ प्रजापतये स्वाहा॥ स्वर्गाय लोकाय  
स्वाहाऽग्नये स्विष्टकृते स्वाहेति॥१॥

ता वा एताः सप्त स्वर्गस्य लोकस्य द्वारः। दिवःश्येनयोऽनुवित्तयो नाम। आशा  
प्रथमा रक्षति। कामो द्वितीयाम्। ब्रह्म तृतीयाम्। यज्ञश्चतुर्थीम्। आपः पञ्चमीम्।  
अग्निर्बलिमान्ष्पृष्ठीम्। अनुवित्तिः सप्तमीम्। अनु ह वै स्वर्गं लोकं विन्दति।  
कामचारोऽस्य स्वर्गे लोके भवति। य एताभिरिष्टिभिर्यजते। य उ चैना एव वेद।  
तास्वन्विष्टि। पृष्ठौहीवरा दद्यात्क्५ सं च। स्त्रियै चाऽऽभार५ समृद्धौ॥१०॥—[२]

तपसा देवा देवतामग्र आयन्। तपसर्षयः स्वरन्वविन्दन्। तपसा  
सपत्नान्प्रणुदामारातीः। येनेदं विश्वं परिभूतं यदस्ति। प्रथमजं देव५ हविषा  
विधेम। स्वयम्भु ब्रह्म परमं तपो यत्। स एव पुत्रः स पिता स माता। तपो

ह यक्षं प्रथमं सम्बभूव। श्रद्धया देवो देवत्वमंश्रुते। श्रद्धा प्रतिष्ठा लोकस्य देवी॥११॥

सा नो जुषाणोप यज्ञमागात्। कामवत्साऽमृतं दुहाना। श्रद्धा देवी प्रथमजा ऋतस्य। विश्वस्य भर्त्री जगतः प्रतिष्ठा। तां श्रद्धां हविषा यजामहे। सा नो लोकममृतं दधातु। ईशाना देवी भुवनस्याधिपती। आगात्सत्यं हविरिदं जुषाणम्। यस्माद्देवा जज्ञिरे भुवनं च विश्वे। तस्मै विधेम हविषा घृतेन॥१२॥

यथा देवैः सधमादं मदेम। यस्य प्रतिष्ठोर्वन्तरिक्षम्। यस्माद्देवा जज्ञिरे भुवनं च सर्वे। तत्सत्यमर्चदुप यज्ञं न आगात्। ब्रह्माऽऽहुतीरुपमोदमानम्। मनसो वशे सर्वमिदं बभूव। नान्यस्य मनो वशमन्वियाय। भीष्मो हि देवः सहस्रः सहीयान्। स नो जुषाण उप यज्ञमागात्। आकूतीनामधिपतिं चेतसां च॥१३॥

सङ्कल्पजूतिं देवं विपश्चिम्। मनो राजानमिह वर्धयन्तः। उपह्वेऽस्य सुमतौ स्याम। चरणं पवित्रं विततं पुराणम्। येन पूतस्तरति दुष्कृतानि। तेन

प॒वित्रेण शु॒द्धेन॑ पू॒ताः। अति॑ पा॒प्मान॒मरा॑तिं तरेम। लो॒कस्य॑ द्वा॒रम॑र्चि॒मत्प॒वित्रम्॑।  
ज्योति॑ष्म॒द्भाज॑मानं॒ मह॑स्वत्। अ॒मृत॑स्य॒ धारा॑ बहु॒धा दोह॑मानम्। च॒रणं नो॑ लो॒के  
सुधि॑तां दधातु। अ॒ग्निर्मू॒र्धा भुवः॑। अनु॑ नो॒ऽद्यानु॑मति॒रन्वि॑दनुमते॒ त्वम्। ह॒व्यवा॒हः  
स्वि॑ष्टम्॥१४॥

[३]

दे॒वेभ्यो॑ वै स्व॒र्गो लो॒कस्ति॒रोऽभवत्॑। ते प्र॒जाप॑तिमब्रुवन्। प्र॒जाप॑ते  
स्व॒र्गो वै नो॑ लो॒कस्ति॒रोऽभूत्। तमन्वि॒च्छेति॑। तं य॑ज्ञ॒क्रतु॑भि॒रन्वै॑च्छत्।  
तं य॑ज्ञ॒क्रतु॑भि॒र्नान्वि॑न्दत्। तमिष्टि॑भि॒रन्वै॑च्छत्। तमिष्टि॑भि॒रन्वि॑न्दत्।  
तदिष्टी॑नामिष्टि॒त्वम्। ए॒ष्ट्यो ह॒ वै ना॑म। ता इष्ट्य॑ इत्याचक्षते प॒रोक्षे॑ण।  
प॒रोक्ष॑प्रिया इव॒ हि दे॒वाः॥१५॥

तं तपो॑ऽब्रवीत्। प्र॒जाप॑ते॒ तप॑सा॒ वै श्रा॑म्यसि। अ॒हमु॒ वै तपो॑ऽस्मि। मां नु  
य॑जस्व। अथ॑ ते स॒त्यं तपो॑ भविष्यति। अनु॑ स्व॒र्गं लो॒कं वे॒त्स्यसी॑ति। स  
ए॒तमा॑ग्ने॒यम॒ष्टाक॑पालं॒ निर॑वपत्। तप॑से च॒रुम्। अनु॑मत्यै च॒रुम्। ततो॒ वै तस्य॑  
स॒त्यं तपो॑ऽभवत्। अनु॑ स्व॒र्गं लो॒कम॑विन्दत्। स॒त्यं ह॒ वा अ॑स्य॒ तपो॑ भवति।



अनु॑ स्व॒र्गं लो॒कं वि॑न्दति। य ए॒तेन॑ ह॒विषा॑ यज॑ते। य उ॑ चैनदे॒वं वेद॑। सोऽत्र॑  
जुहोति। अ॒ग्नये॑ स्वाहा॒ तप॑से॒ स्वाहा॑। अनु॑मत्यै॒ स्वाहा॑ प्र॒जाप॑तये॒ स्वाहा॑। स्व॒र्गाय॑  
लो॒काय॑ स्वाहाऽग्नये॑ स्विष्ट॒कृते॑ स्वाहेति॥१६॥

त॒ऽ श्र॒द्धाऽब्र॑वीत्। प्रजा॑पते श्र॒द्धया॑ वै श्रा॑म्यसि। अ॒हमु॑ वै श्र॒द्धाऽस्मि॑। मां  
नु य॑जस्व। अथ॑ ते स॒त्या श्र॒द्धा भ॑विष्यति। अनु॑ स्व॒र्गं लो॒कं वे॒थ्स्यसीति॑। स  
ए॒तमा॑ग्नेयम॒ष्टाक॑पालं॒ निर॑वपत्। श्र॒द्धायै॑ च॒रुम्। अनु॑मत्यै च॒रुम्। ततो॑ वै तस्य॑  
स॒त्या श्र॒द्धाऽभ॑वत्। अनु॑ स्व॒र्गं लो॒कम॑विन्दत्। स॒त्या ह॒ वा अ॑स्य श्र॒द्धा भ॑वति।  
अनु॑ स्व॒र्गं लो॒कं वि॑न्दति। य ए॒तेन॑ ह॒विषा॑ यज॑ते। य उ॑ चैनदे॒वं वेद॑। सोऽत्र॑  
जुहोति। अ॒ग्नये॑ स्वाहा॒ श्र॒द्धायै॑ स्वाहा॑। अनु॑मत्यै॒ स्वाहा॑ प्र॒जाप॑तये॒ स्वाहा॑। स्व॒र्गाय॑  
लो॒काय॑ स्वाहाऽग्नये॑ स्विष्ट॒कृते॑ स्वाहेति॥१७॥

त॒ऽ स॒त्यम॑ब्रवीत्। प्रजा॑पते स॒त्येन॑ वै श्रा॑म्यसि। अ॒हमु॑ वै स॒त्यम॑स्मि। मां  
नु य॑जस्व। अथ॑ ते स॒त्यः स॒त्यं भ॑विष्यति। अनु॑ स्व॒र्गं लो॒कं वे॒थ्स्यसीति॑।  
स ए॒तमा॑ग्नेयम॒ष्टाक॑पालं॒ निर॑वपत्। स॒त्याय॑ च॒रुम्। अनु॑मत्यै च॒रुम्। ततो॑ वै

तस्य सत्यं सत्यमभवत्। अनु स्वर्गं लोकमविन्दत्। सत्यं ह वा अस्य सत्यं भवति। अनु स्वर्गं लोकं विन्दति। य एतेन हविषा यजते। य उ चैनदेवं वेद। सोऽत्र जुहोति। अग्नये स्वाहा सत्याय स्वाहा। अनुमत्यै स्वाहा प्रजापतये स्वाहा। स्वर्गाय लोकाय स्वाहाऽग्नये स्विष्टकृते स्वाहेति॥१८॥

तं मनोऽब्रवीत्। प्रजापते मनसा वै श्राम्यसि। अहमु वै मनोऽस्मि। मां नु यजस्व। अथ ते सत्यं मनो भविष्यति। अनु स्वर्गं लोकं वेत्स्यसीति। स एतमाग्नेयमष्टाकपालं निरवपत्। मनसे चरुम्। अनुमत्यै चरुम्। ततो वै तस्य सत्यं मनोऽभवत्। अनु स्वर्गं लोकमविन्दत्। सत्यं ह वा अस्य मनो भवति। अनु स्वर्गं लोकं विन्दति। य एतेन हविषा यजते। य उ चैनदेवं वेद। सोऽत्र जुहोति। अग्नये स्वाहा मनसे स्वाहा। अनुमत्यै स्वाहा प्रजापतये स्वाहा। स्वर्गाय लोकाय स्वाहाऽग्नये स्विष्टकृते स्वाहेति॥१९॥

तं चरणमब्रवीत्। प्रजापते चरणेन वै श्राम्यसि। अहमु वै चरणमस्मि। मां नु यजस्व। अथ ते सत्यं चरणं भविष्यति। अनु स्वर्गं लोकं वेत्स्यसीति। स

ए॒तमा॑ग्ने॒यम॒ष्टाक॑पालं॒ निर॑वपत्। च॒र॒णाय॑ च॒रुम्। अ॒नु॒म॒त्यै च॒रुम्। ततो॑ वै तस्य॑  
स॒त्यं च॑र॒णम॑भवत्। अ॒नु॒ स्व॒र्गं लो॒कम॑विन्दत्। स॒त्यं॑ ह॒ वा अ॑स्य॒ चर॑णं भवति।  
अ॒नु॒ स्व॒र्गं लो॒कं वि॑न्दति। य ए॒तेन॑ ह॒विषा॑ यज॑ते। य उ॑ चैन॒दे॒वं वेद॑। सोऽ॒त्र  
जु॒होति॑। अ॒ग्नये॑ स्वाहा॒ चर॑णाय॒ स्वाहा॑। अ॒नु॒म॒त्यै स्वाहा॑ प्र॒जाप॑त॒ये स्वाहा॑।  
स्व॒र्गाय॑ लो॒काय॑ स्वाहाऽ॒ग्नये॑ स्वि॒ष्टकृ॑ते स्वाहेति॑॥२०॥

ता वा ए॒ताः प॑ञ्च स्व॒र्गस्य॑ लो॒कस्य॑ द्वा॒रः। अ॒पा॒घा अ॒नु॒वि॒त्तयो॑ नाम॑।  
तपः॑ प्रथ॒मा॑ र॒क्षति॑। श्र॒द्धा द्वि॒तीया॑म्। स॒त्यं तृ॒तीया॑म्। म॒नश्च॑तु॒र्थी॑म्। च॒र॒णं  
पञ्च॒मी॑म्। अ॒नु॒ ह॒ वै स्व॒र्गं लो॒कं वि॑न्दति। का॒म॒चा॒रोऽस्य॑ स्व॒र्गे लो॒के भ॑वति। य  
ए॒ताभि॑रिष्टि॒भिर्य॑ज॑ते। य उ॑ चै॒ना ए॒वं वेद॑। तास्व॑न्वि॒ष्टि। प॒ष्ठौही॒वरां॑ द॒द्यात्क॒सं  
च॑। स्त्रियै॑ चाऽऽभा॒र॑ समृ॒द्धौ॥२१॥\_\_\_\_\_ [४]

ब्र॒ह्म वै च॑तु॒र्हो॒तारः। च॑तु॒र्हो॒तृ॒भ्योऽधि॑य॒ज्ञो निर्मि॑तः। नैन॑ श॒प्तम्।  
नाभि॑च॒रित॒माग॑च्छति। य ए॒वं वेद॑। यो ह॒ वै च॑तु॒र्हो॒तृ॒णां च॑तु॒र्हो॒तृ॒त्वं वेद॑।

अथो पञ्चहोतृत्वम्। सर्वा हास्मै दिशः कल्पन्ते। वाचस्पतिर्होता दशहोतृणाम्। पृथिवी होता चतुर्होतृणाम्॥२२॥

अग्निर्होता पञ्चहोतृणाम्। वाग्धोता षड्होतृणाम्। महाहविर्होता सप्तहोतृणाम्। एतद्वै चतुर्होतृणां चतुर्होतृत्वम्। अथो पञ्चहोतृत्वम्। सर्वा हास्मै दिशः कल्पन्ते। य एवं वेद। एषा वै सर्वविद्या। एतद्वैषजम्। एषा पङ्क्तिः स्वर्गस्य लोकस्याञ्जसाऽयनिः स्मृतिः॥२३॥

एतान् योऽध्यैत्यच्छदिर्दृशे यावत्तरसम्। स्वरेति। अनपब्रवः सर्वमायुरेति। विन्दते प्रजाम्। रायस्पोष गौपत्यम्। ब्रह्मवर्चसी भवति। एतान् योऽध्यैति। स्पृणोत्यात्मानम्। प्रजां पितृन्। एतान् वा अरुण औपवेशिर्विदां चकार॥२४॥

एतैरधिवादमपाजयत्। अथो विश्वं पाप्मानम्। स्वर्ययौ। एतान्योऽध्यैति। अधिवादं जयति। अथो विश्वं पाप्मानम्। स्वरेति। एतैरग्निं चिन्वीत स्वर्गकामः। एतैरायुष्कामः। प्रजापशुकामो वा॥२५॥

पुरस्ताद्दशहोतारमुदञ्चमुपदधाति यावत्पदम्। हृदयं यजुषी पत्यौ च।  
दक्षिणतः प्राञ्चं चतुरहोतारम्। पश्चादुदञ्चं पञ्चहोतारम्। उत्तरतः प्राञ्चं  
षड्होतारम्। उपरिष्ठात्प्राञ्चं सप्तहोतारम्। हृदयं यजूंषि पत्यञ्च। यथावकाशं  
ग्रहान्। यथावकाशं प्रतिग्रहलोकं पृणाञ्च। सर्वा हास्येता देवताः प्रीता अभीष्टा  
भवन्ति॥२६॥

सदेवमग्निं चिनुते। रथसंमितश्चेतव्यः। वज्रो वै रथः। वज्रेणैव पाप्मानं भ्रातृव्यं  
स्तृणुते। पक्षः संमितश्चेतव्यः। एतावान् वै रथः। यावत्पक्षः। रथसंमितमेव चिनुते।  
इममेव लोकं पशुबन्धेनभिजयति। अथो अग्निष्टोमेन॥२७॥

अन्तरिक्षमुक्थ्येन। स्वरतिरात्रेण। सर्वाल्लोकानहीनेन। अथो सूत्रेण। वरो  
दक्षिणा। वरेणैव वरं स्पृणोति। आत्मा हि वरः। एकविंशतिर्दक्षिणा ददाति।  
एकविंशो वा इतः स्वर्गो लोकः। प्र स्वर्गं लोकमाप्नोति॥२८॥

असावादित्य एकविंशः। अमुमेवाऽऽदित्यमाप्नोति। शतं ददाति। शतायुः

पुरुषः श॒तेन्द्रि॑यः। आयु॑ष्येवेन्द्रि॒ये प्रति॑तिष्ठति। स॒हस्रं॑ ददाति। स॒हस्रं॑सम्मितः  
स्व॒र्गो लो॒कः। स्व॒र्गस्य॑ लो॒कस्या॒भिजि॑त्यै। अ॒न्विष्ट॒कं दक्षि॑णा ददाति। सर्वा॑णि  
वया॑ँसि॥२९॥

सर्व॑स्याऽऽप्त्यै॑। सर्व॑स्यावरु॒द्धौ। यदि॑ न वि॒न्देत्। म॒न्थाने॑ताव॒तो द॑द्यादोद॒नान्  
वा॑। अ॒श्रुते॑ तं का॒मम्। यस्मै॑ का॒माया॒ग्निश्ची॑यते॑। प॒ष्ठौहीं॑ त्व॒न्तर्व॑तीं दद्यात्। सा  
हि सर्वा॑णि वया॑ँसि। सर्व॑स्याऽऽप्त्यै॑। सर्व॑स्यावरु॒द्धौ॥३०॥

हि॒र॒ण्यं द॑दाति। हि॒र॒ण्यज्यो॑तिरे॒व स्व॒र्गं लो॒कमे॑ति। वा॒सो द॑दाति। तेनाऽऽयुः  
प्रति॑रते। वे॒दि॒तृती॑ये य॒जेत। त्रिष॑त्या हि दे॒वाः। स स॑त्यम॒ग्निं चि॑नुते। तदे॒तत्प॑शुब॒न्धे  
ब्राह्म॑णं ब्रूयात्। नेत॑रेषु य॒ज्ञेषु॑। यो ह॒ वै चतु॑र्होत॒ृननु॑स॒वनं॑ त॑र्पयित॒व्यान् वेद॑॥३१॥

तृ॒प्यति॑ प्र॒जया॑ प॒शुभिः॑। उपै॑न॒ सोम॑पी॒थो न॑मति। ए॒ते वै चतु॑र्होतारोऽनु॑स॒वनं॑  
त॑र्पयित॒व्याः। ये ब्रा॑ह्म॒णा ब॑हुविदः। तेभ्यो॑ यद्वक्षि॑णा न नये॑त्। दुरि॑ष्टः स्यात्।  
अ॒ग्निम॑स्य वृ॒ज्जीरन्। तेभ्यो॑ यथाश्र॒द्धं द॑द्यात्। स्वि॑ष्टमे॒वैतत्क्रि॑यते। नास्या॒ग्निं

वृञ्जते॥३२॥

हिरण्येष्टको भवति। यावदुत्तममङ्गुलिकाण्डं यज्ञपरुषा सम्मितम्। तेजो हिरण्यम्। यदि हिरण्यं न विन्देत्। शर्करा अक्ता उपदध्यात्। तेजो घृतम्। सतेजसमेवाग्निं चिनुते। अग्निं चित्वा सौत्रामण्या यजेत मैत्रावरुण्या वा। वीर्येण वा एष व्यृध्यते। योऽग्निं चिनुते॥३३॥

यावदेव वीर्यम्। तदस्मिन्दधाति। ब्रह्मणः सायुज्यं सलोकतामाप्नोति। एतासामेव देवतानां सायुज्यम्। सार्ष्टिता समानलोकतामाप्नोति। य एतमग्निं चिनुते। य उ चैनमेवं वेद। एतदेव सावित्रे ब्राह्मणम्। अथो नाचिकेते॥३४॥ [५]

यच्चा॒मृतं॑ यच्च॒ मर्त्यम्॑। यच्च॒ प्राणि॑ति॒ यच्च॒ न। सर्वा॑स्ता इष्ट॑काः कृत्वा। उप॑ काम॒दुघा॑ दधे। तेन॑र्षिणा॒ तेन॒ ब्रह्म॑णा। तया॑ दे॒वता॑याऽङ्गिर॒स्वद्ध्रु॑वा सीद। सर्वाः॑ स्त्रियः॒ सर्वा॑न्पु॒ंसः। सर्वं॑ न स्त्री॑पुमं च॒ यत्। सर्वा॑स्ताः। याव॑न्तः पा॒सवो॑ भूमेः॑॥३५॥

सङ्ख्याता देवमायया॥ सर्वास्ताः। यावन्तु ऊषाः पशूनाम्। पृथिव्यां पुष्टिर्हिताः।  
 सर्वास्ताः। यावतीः सिकताः सर्वाः। अपस्वन्तश्च याः श्रिताः। सर्वास्ताः। यावतीः  
 शर्करा धृत्यै॥ अस्यां पृथिव्यामधि॥ ३६॥

सर्वास्ताः। यावन्तोऽश्मानोऽस्यां पृथिव्याम्। प्रतिष्ठासु प्रतिष्ठिताः। सर्वास्ताः।  
 यावतीर्वीरुधः सर्वाः। विष्ठिताः पृथिवीमनु। सर्वास्ताः। यावतीरोषधीः सर्वाः।  
 विष्ठिताः पृथिवीमनु। सर्वास्ताः॥ ३७॥

यावन्तो वनस्पतयः। अस्यां पृथिव्यामधि। सर्वास्ताः। यावन्तो ग्राम्याः पशवः  
 सर्वे। आरण्याश्च ये। सर्वास्ताः। ये द्विपादश्चतुष्पादः। अपाद उदरसर्पिणः।  
 सर्वास्ताः। यावदाञ्जनमुच्यते॥ ३८॥

देवत्रा यच्च मानुषम्। सर्वास्ताः। यावत्कृष्णायसु॥ सर्वम्। देवत्रा यच्च मानुषम्।  
 सर्वास्ताः। यावल्लोहायसु॥ सर्वम्। देवत्रा यच्च मानुषम्। सर्वास्ताः। सर्व॥ सीस॥  
 सर्वं त्रपु। देवत्रा यच्च मानुषम्॥ ३९॥



सर्वास्ताः। सर्व॑ हिर॑ण्य॑ रज॑तम्। दे॒व॒त्रा यच्च॑ मा॒नु॒षम्। सर्वास्ताः। सर्व॑ सु॒व॑र्ण॑ ह॒रि॑तम्। दे॒व॒त्रा यच्च॑ मा॒नु॒षम्। सर्वास्ता इष्ट॑काः कृत्वा। उप॑ का॒म॒दु॒घा दधे। तेन॑र्षि॒णा तेन॑ ब्रह्म॑णा। तया॑ दे॒व॒त॒या ऽङ्गि॒र॒स्व॒द्धु॒वा सी॑द॥४०॥ — [६]

सर्वा दि॒शो दि॒क्षु। यच्चा॒न्त॒र्भू॒तं प्र॒ति॑ष्ठितम्। सर्वास्ता इष्ट॑काः कृत्वा। उप॑ का॒म॒दु॒घा दधे। तेन॑र्षि॒णा तेन॑ ब्रह्म॑णा। तया॑ दे॒व॒त॒या ऽङ्गि॒र॒स्व॒द्धु॒वा सी॑द। अ॒न्त॒रि॒क्षं च॒ के॒वल॑म्। यच्चा॒स्मि॒न्न॒न्त॒राहि॑तम्। सर्वास्ताः। आ॒न्त॒रि॒क्ष्यं च॒ याः प्र॒जाः॥४१॥

ग॒न्ध॒र्वा॒प्स॒र॒सं च॒ ये। सर्वास्ताः। सर्वा॑नु॒दा॒रा॒न्ध॒स॒लि॒लान्। अ॒न्त॒रि॒क्षे प्र॒ति॑ष्ठितान्। सर्वास्ताः। सर्वा॑नु॒दा॒रा॒न्ध॒स॒लि॒लान्। स्था॒व॒राः प्रो॒ष्यां च॒ ये। सर्वास्ताः। सर्वा॑ धु॒निः सर्वा॑न्ध्व॑सान्। हि॒मो यच्च॑ शी॒यते॑॥४२॥

सर्वास्ताः। सर्वा॑न्म॒री॒चीन् वि॒त॒तान्। नी॒हा॒रो यच्च॑ शी॒यते॑। सर्वास्ताः। सर्वा॑ वि॒द्यु॒तः सर्वा॑न्ध॒स्त॒नयि॑तून्। ह्रा॒दु॒नी॒र्यच्च॑ शी॒यते॑। सर्वास्ताः। सर्वाः स्र॑व॒न्तीः स॒रि॒तः।

सर्वमप्सुचरं च यत्। सर्वास्ताः॥४३॥

याश्च कूप्या याश्च नाद्याः समुद्रियाः। याश्च वैशन्तीरुत प्रासचीर्याः। सर्वास्ताः।  
ये चोत्तिष्ठन्ति जीमूताः। याश्च वर्षन्ति वृष्टयः। सर्वास्ताः। तपस्तेज आकाशम्।  
यच्चाऽऽकाशे प्रतिष्ठितम्। सर्वास्ताः। वायुं वयांसि सर्वाणि॥४४॥

अन्तरिक्षचरं च यत्। सर्वास्ताः। अग्निं सूर्यं चन्द्रम्। मित्रं वरुणं भगम्।  
सर्वास्ताः। सत्यं श्रद्धां तपो दमम्। नाम रूपं च भूतानाम्। सर्वास्ता इष्टकाः  
कृत्वा। उप कामदुघा दधे। तेनर्षिणा तेन ब्रह्मणा। तया देवतयाऽङ्गिरस्वद्ध्रुवा  
सीद॥४५॥ —————[७]

सर्वान्दिवं सर्वान्देवान्दिवि। यच्चान्तर्भूतं प्रतिष्ठितम्। सर्वास्ता इष्टकाः  
कृत्वा। उप कामदुघा दधे। तेनर्षिणा तेन ब्रह्मणा। तया देवतयाऽङ्गिरस्वद्ध्रुवा  
सीद। यावन्तीस्तारकाः सर्वाः। वितन्ता रोचने दिवि। सर्वास्ताः। ऋचो यजूंषि  
सामानि॥४६॥

अथ॒र्वाङ्गि॒रसं॑श्च॒ ये। सर्वा॒स्ताः। इति॒हा॒स॒पुरा॑णं च। सर्प॒दे॒व॒ज॒नाश्च॒ ये। सर्वा॒स्ताः।  
ये च॑ लो॒का ये चा॑लो॒काः। अ॒न्तर्भू॑तं प्रति॒ष्ठित॑म्। सर्वा॒स्ताः। यच्च॒ ब्रह्म॒ यच्चा॑ब्र॒ह्म।  
अ॒न्तर्ब्र॑ह्मन्प्रति॒ष्ठित॑म्॥ ४७ ॥

सर्वा॒स्ताः। अ॒हो॒रा॒त्राणि॑ सर्वा॒णि। अ॒र्ध॒मा॒साश्च॒ के॒वलान्। सर्वा॒स्ताः।  
सर्वा॑नृ॒तून्त्सर्वा॑न्मा॒सान्। सं॒व॒त्स॒रं च॒ के॒वल॑म्। सर्वा॒स्ताः। सर्वं॑ भू॒तं॑ सर्वं॑  
भव्य॑म्। यच्चा॒तोऽधि॑भविष्यति। सर्वा॒स्ता इष्ट॑काः कृ॒त्वा। उप॑ काम॒दुघा॑ दधे।  
तेन॑र्षि॒णा तेन॑ ब्रह्म॑णा। तया॑ दे॒वत॑याऽङ्गि॒रस्व॑द्धु॒वा सी॑द॥ ४८ ॥ —————[८]

ऋ॒चां प्रा॒चीं मह॑ती दि॒गुच्य॑ते। दक्षि॑णामाहु॒र्यजु॑षामपा॒राम्। अथ॑र्वणा॒मङ्गि॒रसां॑  
प्र॒तीचीं॑। साम्ना॒मुदी॑ची मह॑ती दि॒गुच्य॑ते। ऋ॒ग्भिः पू॒र्वा॒ह्ने दि॒वि दे॒व ई॑यते। य॒जुर्वे॑दे  
ति॒ष्ठति॒ मध्ये॒ अहं॑। सा॒मवे॑देना॒स्तम॑ये मही॑यते। वेदै॒रशू॑न्यस्त्रि॒भिरे॑ति॒ सूर्यः॑।  
ऋ॒ग्भ्यो जा॒ताः सर्व॑शो मूर्ति॑माहुः। सर्वा॑ गति॑र्याजु॒षी है॒व शश्व॑त्॥ ४९ ॥

सर्वं॑ तेजः॑ सा॒मरू॒प्यं हं॑ शश्वत्। सर्वं॑ हे॒दं ब्रह्म॑णा है॒व सृ॑ष्टम्। ऋ॒ग्भ्यो जा॒तं

वैश्यं वर्णमाहुः। यजुर्वेदं क्षत्रियस्याऽऽहुर्योनिम्। सामवेदो ब्राह्मणानां प्रसूतिः।  
पूर्वे पूर्वभ्यो वच एतदूचुः। आदर्शमग्निं चिन्वानाः। पूर्वं विश्वसृजोऽमृताः। शतं  
वर्षसहस्राणि। दीक्षिताः सत्रमासत॥५०॥

तप आसीद्गृहपतिः। ब्रह्म ब्रह्माऽभवत्स्वयम्। सत्यं ह होतैषामासीत्।  
यद्विश्वसृज आसत। अमृतमेभ्य उदगायत्। सहस्रं परिवत्सरान्। भूतं ह  
प्रस्तोतैषामासीत्। भविष्यत्प्रति चाहरत्। प्राणो अध्वर्युरभवत्। इदं सर्वं  
सिषासताम्॥५१॥

अपानो विद्वानावृतः। प्रतिप्रातिष्ठदध्वरे। आर्तवा उपगातारः। सदस्या  
ऋतवोऽभवन्। अर्धमासाश्च मासाश्च। चमसाध्वर्यवोऽभवन्। अशंसद्वह्मणस्तेजः।  
अच्छावाकोऽभवद्यशः। ऋतमेषां प्रशास्ताऽऽसीत्। यद्विश्वसृज आसत॥५२॥

ऊर्ग्राजानमुदवहत्। ध्रुवगोपः सहोऽभवत्। ओजोऽभ्यष्टौद्वाव्णः। यद्विश्वसृज  
आसत। अपंचितिः पोत्रीयामयजत्। नेष्ट्रीयामयजत्त्विषिः। आग्नीद्वाद्विदुषी सत्यम्।

श्रद्धा हैवायंजथ्स्वयम्। इरा पत्नी विश्वसृजाम्। आकूतिरपिनङ्गुविः॥५३॥

इध्मः ह क्षुच्चैभ्य उग्रे। तृष्णा चाऽऽवहतामुभे। वागेषाः सुब्रह्मण्याऽऽसीत्।  
छन्दोयोगान् विजानती। कल्पतत्राणि तन्वानाऽहः। सःस्थाश्च सर्वशः। अहोरात्रे  
पशुपाल्यौ। मुहूर्ताः प्रेष्या अभवन्। मृत्युस्तदभवद्धाता। शमितोग्रो विशां  
पतिः॥५४॥

विश्वसृजः प्रथमाः सत्रमांसत। सहस्रसमं प्रसुतेन यन्तः। ततो ह जज्ञे भुवनस्य  
गोपाः। हिरण्मयः शकुनिर्ब्रह्म नाम। येन सूर्यस्तपति तेजसेद्धः। पिता पुत्रेण  
पितृमान् योनियोनौ। नावेदविन्मनुते तं बृहन्तम्। सर्वानुभुमात्मानः सम्पराये।  
एष नित्यो महिमा ब्राह्मणस्य। न कर्मणा वर्धते नो कनीयान्॥५५॥

तस्यैवाऽऽत्मा पदवित्तं विदित्वा। न कर्मणा लिप्यते पापकेन।  
पञ्चपञ्चाशतस्त्रिवृतः संवत्सराः। पञ्चपञ्चाशतः पञ्चदशाः। पञ्चपञ्चाशतः सप्तदशाः।  
पञ्चपञ्चाशत एकविंशाः। विश्वसृजाः सहस्रसंवत्सरम्। एतेन वै विश्वसृजं

इ॒दं वि॒श्व॑म॒सृ॒जन्त॑। यद्वि॒श्व॑म॒सृ॒जन्त॑। तस्मा॑द्वि॒श्व॑म॒सृ॒जः॑। वि॒श्व॑मे॒नान॒नु प्र॒जा॑यते।  
 ब्र॒ह्म॑णः सायु॑ज्य॒ः स॒लो॒कता॑ यन्ति। ए॒तासा॑मे॒व दे॒वता॑ना॒ः सायु॑ज्यम्। सा॒र्ष्टि॑ता॒ः  
 स॒मा॒न॒लो॒कता॑ यन्ति। य ए॒तदु॑प॒यन्ति॑। ये चै॒न॒त्प्रा॑हुः। येभ्य॑श्चै॒न॒त्प्रा॑हुः॥५६॥ ॐ॥

---

[९]

॥इति कृष्णयजुर्वेदीयतैत्तिरीयकाठके तृतीयः प्रश्नः समाप्तः॥३॥

॥इति कृष्णयजुर्वेदीयतैत्तिरीयकाठकं समाप्तम्॥

हरिः ॐ॥